

Feagaiiga Fou

TUSI LESONA A LE FAIAOGA



Tusi Lesona a le Faiaoga Feagaiga Fou

**Saunia e le
Ofisa o Aoga a le Ekalesia**

**Lomia e le
O Le Ekalesia a Iesu Keriso o le Au Paia o Aso e Gata Ai
Aai o Sate Leki, Iuta**

FAASINO MATAUPU

Faatomuaga i le <i>Tusi Lesona a le Faiaoga Feagaiga Fou</i>	1	Galuega 24–26	159
Fuafuaina o le Saosasoa o Lau Aoaina Atu o le Feagaiga Fou	5	Galuega 27–28	161
O Se Faatomuaga i le Feagaiga Fou	7	O le Tusi a le Aposetolo o Paulo i Roma	163
Fesoasoaniga mo le Suesueina o Tusitusiga Paia	10	Roma 1–3	163
Vaiga Lautele i le Ata o le Faaolataga	13	Roma 4–6	165
O le Vaitaimi i le va o le Feagaiga Tuai ma le Feagaiga Fou	17	Roma 7–8	168
O le Talalelei e Tusa ma le Faamatalaga a Mataio	20	Roma 9–11	170
Mataio 1–2	20	Roma 12–16	174
Mataio 3–4	23	O le Tusi Muamua a le Aposetolo o Paulo i Korinito	179
Mataio 5–7	26	1 Korinito 1–4	182
Mataio 8–10	32	1 Korinito 5–7	184
Mataio 11–13	36	1 Korinito 8–11	179
Mataio 14–15	41	1 Korinito 12–14	188
Mataio 16–18	42	1 Korinito 15–16	190
Mataio 19–20	48	O le Tusi e Lua a le Aposetolo o Paulo i Korinito	193
Mataio 21–23	50	2 Korinito 1–3	193
Mataio 24–25	52	2 Korinito 4–7	195
Mataio 26–28	55	2 Korinito 8–9	196
O le Talalelei e Tusa ma le Faamatalaga a Mareko	59	2 Korinito 10–13	197
Mareko 1–3	59	O le Tusi a le Aposetolo o Paulo i Kalatia	199
Mareko 4–6	62	Kalatia 1–2	199
Mareko 7–16	66	Kalatia 3–6	202
O le Talalelei e Tusa ma le Faamatalaga a Luka	75	O le Tusi a le Aposetolo o Paulo i Efeso	205
Luka 1–3	75	Efeso 1–3	205
Luka 4–6	80	Efeso 4–6	207
Luka 7–9	82	O le Tusi a le Aposetolo o Paulo i Filipi	210
Luka 10–13	89	Filipi 1–4	210
Luka 14–15	93	O le Tusi a le Aposetolo o Paulo i Kolose	213
Luka 16–18	98	Kolose 1–4	213
Luka 19–21	102	O le Tusi Muamua a le Aposetolo o Paulo i Tesalonia	215
Luka 22–24	105	1 Tesalonia 1–5	215
O le Talalelei e Tusa ai ma le Faamatalaga a Ioane	112	O le Tusi e Lua a le Aposetolo o Paulo i Tesalonia	217
Ioane 1	112	2 Tesalonia 1–3	217
Ioane 2–3	114	O le Tusi Muamua a le Aposetolo o Paulo ia Timoteo	220
Ioane 4–5	116	1 Timoteo 1–6	220
Ioane 6	118	O le Tusi e Lua a le Aposetolo o Paulo ia Timoteo	223
Ioane 7–8	122	2 Timoteo 1–4	223
Ioane 9–10	125	O le Tusi a Paulo ia Tito	225
Ioane 11–12	129	Tito 1–3	225
Ioane 13–17	131	O le Tusi a Paulo ia Filemoni	227
Ioane 18–21	136	Filemoni 1	227
O le Galuega a le Au Aposetolo	140	O le Tusi a le Aposetolo o Paulo i Eperu	229
Galuega 1–2	140	Eperu 1–2	229
Galuega 3–5	143	Eperu 3–6	230
Galuega 6–7	145	Eperu 7–10	233
Galuega 8–9	148	Eperu 11–13	234
Galuega 10–12	149	O le Tusi a Iakopo	237
Galuega 13–14	151	Iakopo 1–5	237
Galuega 15	152		
Galuega 16–18	153		
Galuega 19–20	155		
Galuega 21–23	157		

O le Tusi Muamua a Peteru	241	Faaaliga 12–14	263
1 Peteru 1–5	241	Faaaliga 15–16	266
O le Tusi e Lua a Peteru	245	Faaaliga 17–19	267
2 Peteru 1–3	245	Faaaliga 20–22	269
O le Tusi Muamua a Ioane	248	Faaopoopoga	273
1 Ioane 1–5	248	Lisi o Mau Tauloto	273
O le Tusi e Lua a Ioane	250	O le Fuafuaga Tele o le Fiafia	274
2 Ioane 1	250	O le Vaitaimi i le va o le Feagaiga Tuai ma le Feagaiga Fou ..	278
O le Tusi e Tolu a Ioane	251	O Se Tagata Tauaso ina o Fanau Mai	281
3 Ioane 1	251	O le Malaga Faa-Tupu	282
O le Tusi a Iuta	252	O le Vaiaso Mulimuli o le Soifuaga o le Faaola	283
Iuta 1	252	O le Aso Mulimuli o le Soifuaga o Keriso	288
O le Faaaliga a Ioane lē Paia	253	O le Esoto ma le Ioane 6	289
Faaaliga 1–3	253	O Mea na Tutupu i le Soifuaga o Peteru	290
Faaaliga 4–5	257	O le Lalolagi Metitirane i ono po o le Feagaiga Fou	291
Faaaliga 6–7	259	O Misiona a le Aposetolo o Paulo	292
Faaaliga 8–11	261	O Ekalesia e Fitu i Asia (Faaaliga 2–3)	294
		O Mea o Loo I ai le Faamamafa	296
		O Pu e Fitu o le Faamaufaailoga lona Fitu	297
		Ata	298

“O le faamoemoega o aoaoga faalelotu i le Ofisa o Aoga a le Ekalesia, o le fesoasoani lea i tagata taitoatasi, o le aiga, ma taitai o le perisitua ina ia faataunuuina le misiona a le Ekalesia” (*Aoaoina Atu o le Talalelei: O Se Tusitaulima a Faiaoga ma Taitai o le OAE* [1994], 3). O le vaega muamua lava e faamamafa ina ia ausia lenei faamoemoega, o le aoao lea o tamaiti o le vasega i le talalelei a Iesu Keriso, e pei ona maua i tusitusiga faavae ma afioga tulei a perofeta. Ua saunia lenei tusi lesona e fesoasoani ai ia te oe ina ia ausia lena tulaga—po o le a lava lou tomai faafiaoga ma pe o le a foi le gagana o loo e aoao atu ai.

O le vaega lona lua e faamamafa o le aoao atu lea i mataupu, o faaitaiga, ma le mana o le Agaga. O i latou e aoao atu i mataupu ma faaitaiga, e sili atu ona lelei lo latou aoaoina atu o le talalelei. O le aoao atu i mataupu, e tatau ona e sailia muamua, “e ala i le suesue ma le faatuatua” (MFF 88:118), ina ia malamalama ai i mataupu faavae o le talalelei a Iesu Keriso. Ina ia aoao atu e ala i faaitaiga e tatau ona e ola i le talalelei i lou lava olaga. Ma e tatau ona e faalagolago i le Agaga mo le taitaiga. Na aoao mai Elder Boyd K. Packer, o se sui o le Korama a Aposetolo e Toasefululua: “E oo mai le mana pe a uma ona ia faia mea uma na te mafaia ina ia saunia ai, ae le na o le lesona lava ia, ae ia ogatasi lona olaga ma le Agaga. Afai o le a ia aoao e faalagolago i le Agaga mo musumusuga, e mafai ona ia tulai atu i luma o lana vasega . . . ua matua’i mautu i le iloaina lea e mafai ona ia aoao atu i musumusuga” (*Teach Ye Diligently* [1975], 306). O le mana lea e saunoa i ai Elder Packer e masani ona faaalua atu a o tuuina atu e se faiaoga lana lava molimau i le mataupu po o le aoaoga faavae sa aoaoina atu.

O le Auala e Faaogaina ai Lenei Tusi Lesona

O tusitusiga paia e ao lava ona avefa ma au puna’oa silisili a o e sauniaina au lesona. Ina ia fesoasoani ia te oe i lau suesueina o tusitusiga paia ma le sauniaina o au lesona, e tatau ona ia te oe ia tusi lesona nei:

- O le tusi lesona lenei—*Tusi Lesona a le Faiaoga Feagaiga Fou* (numera 34590.890)
- O le tusi lesona a le tamaitiiti o le vasega o le seminare e suesue lava ia i le fale—*Taiala Suesue a le Tamaitiiti o le vasega o le Feagaiga Fou* (numera 34188)
- O mea e lagolagoina ai ia le faasologa o vitio o le Feagaiga Fou—*Vitio Taiala o le Fegaiga Fou* (nu. 34232)

O nei tusi lesona e le suia ai lau suesueina o tusitusiga paia, pe suitulaga foi i taitaiga musuia a le Agaga Paia a o sauni e aoaoina au tamaiti o le vasega. Ua na o risosi ma ni fesoasoaniga faaopoopo mo le sauniuniga o au lesona. Aemaise lava, o le *Tusi Lesona a le Faiaoga o le Feagaiga Fou* o loo tuuina atu ai faamatalaga tomua e faatatau i poloka o mau, o tootoo atu ai ia mataupu faavae taua o le talalelei e vaavaai i ai, ma fautua atu ai auala e mafai ona aoaoina atu ai le tele o na mataupu faavae ina ia fesoasoani ai i tamaiti o le vasega ia malamalama i ai ma faaogaina i o latou olaga.

“Ua mautu le faamoemoe o taitai o le OAE i lana faatulagaga o aso taitasi, o loo tele ai taimi avanoa mo aoaoga, e tatau ona aoaoina tusitusiga paia i se faasologa e talafeagai ai lona sao. O se tasi o auala sili e aoao atu ai le talalelei a Iesu Keriso o le aoao lea o tusitusiga paia i se faasologa sa’o. O le faasologa talafeai o le aoaoina o tusitusiga paia o le aoao atu lea ile faasologa o loo faaalua mai i tusitusiga paia” (*Aoaoina o le Talalelei*, 22; tagai i le itulau lena mo nisi faamatalaga i le faasologa o le aoaoina atu o tusitusiga paia). O lenei tusi lesona e mulimuli i le faasologa o tusitusiga paia ae le o tuuina atu ai ni fesoasoaniga mo aoaoga mo fuaiupu uma o loo i le poloka o mau. O fesoasoaniga faaopoopo o loo maua i le tusi lesona a tamaiti o le vasega o aoaoga faalelotu ma le taiala suesue a tamaiti o le seminare.

O le Aoaoina Atu o le Talalelei: O le Tusitaulima mo Faiaoga ma Taitai o le Ofisa o Aoga a le Ekalesia (nu. 34829.890) o loo tuuina mai ai ni fesoasoaniga auiliili i le aoaoina o se vasega a le OAE. E tatau ona e matuai masani lava i ona vaega. O fautuaga faalauaitele nei e mafai ona fesoasoani tele i le saunia o lau lesona.

Saunia Lou Tagata Ina ia Suesueina ma Aoaoina Atu le Talalelei

- Ola i le talalelei.
- Tatalo mo le Agaga ina ia taitaiina oe a o e suesue, a o e sauniuni, ma a o e aoao atu.
- Faatinoina le faatuatua i le Alii, i le mana o le Agaga, ma le mana o tusitusiga paia ina ia faafetaia ai manaoga o au tamaiti o le vasega.

Fuafua Po o le a le Mea o le a e Aoaoina Atu

- Fuafua po o le a le vaega o tusitusiga paia e te manao e aofia i lau lesona. O lenei tusi lesona ua vaevaeina i ni poloka o mau lea o loo faailoa mai ai le tala po o le suiga o le mataupu. O le saosaoa taiala o loo i le itulau 5–6 e mafai ona fesoasoani ia te oe e fuafua po o le a le tele o mea e faaogaina e aofia ai i aso taitasi o le vaiaso.
- Suesue mae’ae’a le poloka o mau. Faitau soo i ai, ma faailoga ia aoaoga faavae, mataupu faavae, mea na tutupu, ma upu po o fuaitau faigata. O le tusi lesona lenei, o le tusi lesona a le tamaitiiti o le vasega o aoaoga faalelotu, ma le taiala suesue a le tamaitiiti o le vasega o le a fesoasoani lea ia te oe ina ia malamalama ai i le poloka o mau ma fuafua ai po o le a le mea e taua i au tamaiti o le vasega. Ole a lelei lau aoao atu pe afai na e mauaina se vaega musuia i le poloka o mau. Atonu o le a e taitaia foi au tamaiti o le vasega ina ia faia foi lea lava sailiiliga.
- Filifili aoaoga faavae, mataupu faavae, ma mea na e sili atu ona taua mo au tamaiti o le vasega ina ia iloa. Ia tuu atu i uunaiga a le Agaga ma manaoga o lau vasega e taitaiina ai oe a o e fuafuaina po o le a le mea e aoao atu.




Fuafua Pe o le a Faapefea Ona e Aoa Atu


- Filifili se auala faafaiaoga se tasi pe sili atu mo mea taitasi na tutupu, mataupu faavae, po o se aoaoga faavae e te manao e aoa atu. Faaoga au auala po o auala na o loo fautuaina atu i mea e faaogaina mo aoaoga.
- Filifili auala na e uunaia ai le sauniuni, auai, ma le faaogaina e tamaiti o le vasega.
 1. O le *Saunia* o lona uiga o le saunia o tamaiti o le vasega i le faaleagaga ma le faalemaufau, mataala, taula'i, ma naunautai e faataunuuna le aoaoga. O le saunia o uiga ia o le loto ma le mafau (Aoaoina o le Talalelei, 14). E le o se fuafuaga e faaoga e amata ai se lesona; ae o se iloiloaga faifaipea o le naunautai o au tamaiti o le vasega.
 2. O le *Auai* o lona uiga o loo aafia tamaiti o le vasega i le aoaoga. O lo latou auai e mafai ona faaletino, faalelagona, faalemaufau, ma faaleagaga. O le tele lava o le auai o tamaiti o le vasega i le aoaoga, o le tele foi lena o lo latou malamalama, manatuaina, ma le faaogaina.
 3. O le *Faaogaina* o lona uiga ua taliaina e tamaiti o le vasega ia manatu na aoaoina, malamalama i le auala e faaogaina ai i o latou olaga, ma saili e ola e tusa ai ma na mataupu faavae.

O le Auala o Loo Faatulagaina ai Lenei Tusi Lesona

O poloka taitasi o mau i Talalelei e fa o loo amataina i se faasologa o taimi tonu o mea na tutupu o loo aofia ai i lena poloka. O taimi o loo fuafua i le siata o le "Lotogatasi o Talalelei" o loo i le Taiala i Tususiga Paia.



O faatomuaga i Tusi taitasi a Paulo o loo aofia ai se faasologa faapea o taimi e faatulaga ai ia Tusi e faatatau i le tusi o Galuega. O lena faamatalaga e faavae lea i le "Tusi a Paulo" i le Taiala i Tususiga Paia.



O risosi e faaogaina mo poloka o mau o loo maua i vaega e fa.

Faatomuaga o Mea e Faaogaina

O le vaega lenei e tuuina atu ai se talaaga o mea e faaogaina ma isi faamatalaga e fesoasoani ai ia te oe ina ia e malamalama ai i le poloka o mau i lona talafaasolopito ma lona faatulagaga faaletusipaia. O le faatomuaga o mea e faaogaina ua sauniaina foi mo tusi uma o tusitusiga paia. O nei faamatalaga, faatasi ai ma faamatalaga o le talaaga i totonu o le tusi taiala a le tamaitiiti o le vasega ma le tusi lesona a le tamaitiiti o le vasega o aoaoga faalelotu, e mafai ona faalauteleina ai lau lava suesuega ma le malamalama i tusitusiga paia. E mafai foi ona e faaogaina le faatomuaga o mea e faaogaina e saunia ai:

- Fesili faatupu manatu e tuuina atu i tamaiti o le vasega ma siitia ai le saunia o tagata e aoaoina.
- Faamatalaga o le talaaga, o mea mo tamaiti o le vasega e sailia a o latou faitau, ma isi fesoasosani ae le'i faitauina.
- Upusii e faaali atu pe tusia i luga o le laupapa, po o ni faaaliga e tusia e tamaiti o le vasega i totonu o a latou tusitusiga paia.

O Nisi Mataupu Faavae Tavaa o le Talalelei e Saili Iai

Atonu e mafai ona e mauaina ni aoaoga faavae ma ni mataupu faavae taua i se poloka o mau. O le vaega lenei o loo lisiina atu ai nisi o na mataupu faavae na atonu e te manao e aoaoina atu i au tamaiti o le vasega. O auala nei e faaogaina ai i lau aoa atu:

- Ia faaogaina e avea o se faatulagaga ina ia mautinoa ai o loo aoaoina atu aoaoga faavae sa'o.
- Faaogaina e fesoasoani ai ina ia fuafuaina po o le a le mea e manaomia ona aoa atu i au tamaiti o le vasega.
- Tusi i luga o le laupapa ina ia tuu atu ai i tamaiti o le vasega ia ni mataupu faavae latou te sailia a o latou suesueina le poloka o mau.
- Ia valaaulia tamaiti o le vasega ina ia sueina nisi faamatalaga faaopoopo o mau lea e lagolagoina ai pe faamalalamaina ai le aoaoga faavae.

Risosi Faaopoopo


O le faamatalaga o loo i totonu o le tusi lesona a tamaiti o le vasega o aoaoga faalelotu—*The Life and Teachings of Jesus and His Apostles*—ua faatulagaina o se tusi e ogatasi ma le Feagaiga Fou (o fuaiupu o mau o loo faatulagaina i le faatulagaga o mea na tutupu na manatu na tutupu). O le tusi lesona lenei—o le *Tusi Lesona a le Faiaoga Feagaiga Fou*—o loo mulimuli i se faasologa taulalata atu i le Feagaiga Fou (o fuaiupu o mau o loo talanoaina i le faasologa o loo i ai i totonu o le Tusi Paia). O le vaega lenei o loo tuuina atu ai numera o itulau o loo i totonu o le tusi lesona a tamaiti o le vasega o aoaoga faalelotu ina ia fesoasoani ai ia te oe e sailia le faamatalaga o le risosi fesoasoani. O loo maua ai foi ia faamatalaga i lea e faaogaina i le vaega faaopoopo.

Fautuaga mo le Aoao Atu


O le vaega leni o loo aofia ai manatu e aoao atu ai atonu e te manao e mafaufau i ai a o e fuafua pe faapefea ona aoaoina atu ia mea na tutupu, mataupu faavae, ma aoaoga faavae na e filifilia mai le poloka o mau. E le tau manaomia ona e faaaogaina ia nei fautuaga mo aoaoga. Ua sauniaina e avea o se risosi mo oe a o e mafaufau i manaoga o au tamaiti o le vasega faatasi ai ma le taitaiga a le Agaga. O le a e mauaina ai foi ni fautuaga aoga tele i totonu o le taiala suesue a le tamaitiiti o le vasega lea a mafai ona fetuunaia mo le faaaogaina i totonu o le potuaoga (tagai “O Se Faatomuaga mo Faiaoga i le *Taiala Suesue a le Tamaitiiti o le vasega o le Feagaiga Fou*,” i. 4).

O ulutala mo fautuaga mo aoaoga o loo aofia ai vaega nei:

- **Faamatalaga e Tulimatai i ai.** O le faailoaina atu o fautuaga taitasi o se vaega lea o loo faamatamata tetele atu lona lolomiina o loo ta’u atu po o le a le poloka o mau ma le mataupu faavae o loo taulai atu i ai lena fautuaga e aoaoina ai. E masani ona faatatau i mataupu faavae o loo maua i le “O Nisi o Mataupu Faavae Taua o le Talalelei e Saili Iai” i le poloka o mau.


-  **Mau Tauloto.** O Fautuaga mo le Aoao Atu lea e aofia ai ia fuaitau mai mau tauloto o loo faailoaina atu i le faailoga o loo faailoa atu iinei. Na saunoa mai ia Peresitene Howard W. Hunter, a o avea ma Peresitene o le Korama a Aposetolo e Toasefululua, “Matou te faamoemoe o le a leai se tasi o au tamaiti o le vasega o le a tuua le potu aoga ma le fefe po o le faalumaina po o le matamuli e le mafai ona latou mauaina le fesoasoani o loo latou manaomia ona latou le iloa lelei ia tusitusiga paia ina ia sue ai ia fuaiupu sa’o” (*Eternal Investments* [lauga na tuuina atu i taitai o aoaoga faalelotu, 10 Fep. 1989], 2).

“Mau Tauloto” o se auala lea mo le aoaoina o tamaiti o le vasega ia iloa ai ona sailia ia fuaiupu o mau, maua ai se malamalama i o latou uiga, ma faaaogaina i o latou olaga. E selau ia fuaitau faatusitusiga paia—e ta’i luasefululima mo vasega taitasi—ua filifilia ina ia tuuina atu i ai se faamamafa faapitoa i le seminare. O nei mau ua faaigoaina o “Mau Tauloto” i fautuaga mo le aoaoina atu i mea o loo mauaina ai. E tatau ona e fesoasoani i tamaiti o le vasega ina ia atamamai i le taulotoina o mau e ala lea i le iloiloaina i totonu o le vasega ma le uunaia o tamaiti o le vasega ina ia latou aoaoina e i latou lava, Mo fautuaga i le auala e uunaia ai le taulotoina o mau i au vasega, tagai *Teaching the Gospel: A Handbook for OAE Teachers and Leaders*, itulau 34–35.

-  **Faailoga Faalevaiaso.** O nisi fautuaga e aoaoina atu ai o loo faailoa atu ai foi le faailoga lea iinei. O leni faailoga e iloa ai ia fautuaga mo le aoaoina atu ua fautuaina mo se faiaoga i totonu o se polokalama o suesuega i le fale po o se tasi o loo manao e fesoasoani e aoaoina atu ia poloka lapopoa o mau.
- **Taimi Faatulagaina.** I le faaiuga o le ulutala o loo i ai se aofaiga taulalata ane ai o le taimi o le a faaaluina e aoao atu ai lena fautuaga. O loo aofia atu ai ina ia fesoasoani atu ai ia te oe i le fuafuaina o au lesona i aso taitasi ae le o se

faailoga o le aofaiga o le taimi e tatau ona faaaluina e aoao atu ai ia fautuaga.

Isi Fesoasoaniga mo le Aoao Atu

-  **Ata Vitio o le Feagaiga Fou** (nu. 53141). O leni afifi o le vitio o loo aofia ai ni ata e fesoasoani ai ia te oe e aoaoina le Feagaiga Fou. O fautuaga mo le aoao atu mo le *Ata Vitio o le Feagaiga Fou* o loo maua i le *Vitio Taiala mo le Feagaiga Fou* (nu. 34232). O Poloka o mau mo vaega o loo i ai se ata vitio ua fuafuaina faatasi ma le faailoga lea o loo faaali atu iinei faapea ma se faaaliga i le amataga o le vaega mo fautuaga mo le aoaoina atu.
- **Faapoopoga.** E seā lava ona faatatau se fautuaga e aoao atu ai i se siata, se isi tala faatusipaia, po o se pepa e tufaina atu i le faapoopoga lea e mafai ona fesoasoani ai ia te oe e aoao atu lena lesona. O nei mea o loo faatatau i le ulutala ma le numera o le itulau mo le fesoasoani ia te oe.
- **Faitauina e Tamaiti o le vasega o le Feagaiga Fou.** Ia uunai tamaiti o le vasega e faitauina le Feagaiga Fou atoa. Na saunoa mai Peresitene Spencer W. Kimball i se tasi taimi e faapea: “Ua ou iloa pe a ou le maua se fesootaiga ma mea paia, ma pe a foliga mai foi ua leai se taliga paia e faafofoga mai ma se leo paia e fetalai mai, o lona uiga ua ou matua mamao ese lava. Ae pe a ou faitauina ia tusitusiga paia, ona toe latalata mai ai lea o le lagi ma toe foi mai le faaleagaga” (*The Teachings of Spencer W. Kimball*, ed. Edward L. Kimball [1982], 135).

Ia uunaia au tamaiti aoga ina ia mulimuli i tofiga o loo i le “Siata Faitau o le Feagaiga Fou” i totonu o le *Taiala Suesue a le Tamaitiiti o le vasega o le Feagaiga Fou*. (Atonu e moomia ona fetuunai leni siata i lau tausaga faaleaoaoga.) O le a fesoasoani lea ia te oe e fuafuaina le saosasaoa o le latou faitau ia ogatasi ma gaoioga a le vasega. O tamaiti o le vasega e mananao e muamua le latou faitau e mafai lava ona fai, ae ia uunaia i latou ina ia iloiloaina le poloka o mau o le a suesueina e le vasega i le vaiaso a sau. O le faaaogaina o le siata faitau o le a luitauina ai oe ina ia fuafua le saosasaoa o lau aoao atu i le gasologa o le tausaga ina ia mafai ona e aoaoina uma atu le Feagaiga Fou.

- **Tamaiti o le vasega e i ai ni Manaoga Faapitoa.** O “manaoga faapitoa” o se faaupuga faalauaitete lea e faaaogaina e iloa ai tamaiti o le vasega e ese ni o latou tulaga. E mafai ona aofia ai i latou e faafaigata ona faitau, amioga faaletonu, ma ni le atoatoa i le mafaufau. E mafai foi ona aofia ai i latou o loo saisaitia, auai i nisi aoga, feoai i nofo faataavalevale, nofo i le fale ona o le ma’i, le atoatoa le faalogo po o le vaai, ma isi.

Na saunoa mai le Perofeta o Iosefa Samita, “O mafaufau ma agaga uma na auina mai e le Atua i le lalolagi e avanoa mo le faalauteleina” (*Teachings of the Prophet Joseph Smith*, sel. Joseph Fielding Smith [1976], 354). E tatau ona e faia taumafaiga aoga uma ina ia faafetaiaia ai manaoga mo aoaoga a tamaiti o le vasega uma. Atonu e le mafai ona faafetaiaia ia manaoga uma o tamaiti uma i le taimi e tasi.

Ae peitai, e mafai ona e malamalama i manaoga faapitoa o au tamaiti o le vasega ma fetuunai ai ia mea e faaogaina mo lesona aoaoina ina ia mafai e tamaiti o le vasega uma ona maua mai se mea mai se vaega o lesona taitasi. O isi tamaiti o le vasega e mafai foi ona tuuina atu i ai le avanoa e fesoasoani ai i tamaiti o le vasega e i ai ni manaoga faapitoa. O lea auunaga lē manatu faapito o se faamanuiaga lea i lē na te foai ma lē na te talia.

I le faaopoopo atu i mea masani e faaogaina mo aoaoga, o loo maua foi isi mea e faaogaina ina ia fesoasoani ai e aoaoina i latou e i ai ni manaoga faapitoa. O mekasini a le Ekalesia o ni puna’oa lelei ia mo tala, ata, ma manatu ia e mafai ona fetui i manaoga faapitoa o au tamaiti o le vasega. O le Pusa Ata o le Talalelei (nu. 34730) ma le Faaopoopoga (nu. 34740) o se aofaiga o ni ata lanu se 160 o loo faaalua mai ai tusitusiga paia ma tala o le talafaasolopito o le Ekalesia po o ni mataupu faavae o le talalelei ua valiina i ni ata.

O Se Faatomuaga mo Faiaoga i le Taiala Suesue a le Tamaitiiti o le Vasega o le Feagaiga Fou

O le *Taiala Suesue a le Tamaitiiti o le Vasega o le Feagaiga Fou* e fesoasoani i tamaiti o le vasega ia faitauina le Feagaiga Fou ona mafafau loloto lea i ona aoaoga. E moomia ai le polokalama o le suesue i le fale, ae o le toatele lava o faiaoga i aso taitasi o le a iloina le aoga tele i a latou sauniuniga ma aoaoga.

Faaogaina i le Polokalama a le Seminare e Suesue i le Fale

O le seminare o se polokalama e lima aso o le vaiaso (po o se vaega e tai faapena) i le tausaga atoa faaleaoaoaoga. Talu ai ona o vasega seminare e suesueina i le fale e na o le faatasi i le vaiaso ona feiloai, o lea e tatau ai i tamaiti o le vasega o loo suesue lava i le fale ona faaogaina le taiala suesue a tamaiti o le vasega i isi aso e fa. E ui lava o loo fautuaina tamaiti o le vasega e faitauina ia tusitusiga paia i aso taitasi, e tatau i tamaiti o le vasega o loo suesue lava i le fale ona malamalama o loo faamoemoeina i latou e faaalu le 30–40 minute i aso taitasi mo aso aoga e fa i vaiaso taitasi e galulue ai i gaoioiga ma mea e faataunuuna o loo i totonu o le taiala suesue.

E le tusitusi tamaiti o le vasega i totonu o a latou taiala suesue. Faaoga se tasi o vaega nei mo tusitusiga:

- Tuu atu i tamaiti o le vasega taitoatasi e faia le galuega tusitusi i luga o itulau o se api e sasae gofie ona laupepa ma tuu atu itulau ua mae’a i vaiaso taitasi. A toe faafoi le galuega i le tamaitiiti o le vasega, ona mafai lea ona latou toe tuuina ia itulau i totonu o a latou api.
- Ia tuu atu i tamaiti e faaoga ni api se lua ma feuaui ona faaoga. O le vaiaso muamua, e galulue ai tamaiti i totonu o le isi api ma tuu atu ia te oe pe a faia le vasega. O le isi vaiaso e tusitusi ai tamaiti i le isi api ona faafesuia lea i totonu o le vasega mo le isi api lea na tuuina atu muamua ia te oe, ma faasolo ai pea faapena.

A maea ona e aoina mai galuega a tamaiti o le vasega i vaiaso taitasi, faitau i ai ma tusi atu ni faamatalaga i tamaiti. O se auala lelei lenei mo oe e te iloa ai au tamaiti taitoatasi ma fuafuaina ai po o le a le lelei o lo latou malamalamaaga i a latou suesuega. E mafai ona e fesoasoani e faagaua’i au tamaiti o le vasega e ala lea i le valaaulia o soo se tasi o loo naunau e fetufoai atu se mea na latou tusia i totonu o a latou api e avea o se vaega o lesona faalevaiaso a le vasega.

Togiina o Api a Tamaiti o le vasega

E leai se pepa o tali mo le siakiina ai o gaoioiga i totonu o le taiala suesue a tamaiti o le vasega. O nisi o tali o loo maua i totonu o tusitusiga paia ma e tatau ona e ilogofieina a o e faamasani ai i gaoioiga taitasi. O isi tali o loo faavae i auala a tamaiti o le vasega, mea na oo i ai, manatu, ma molimau. O tulaga faapea e le mafai ai ona tasi se tali e sa’o. Ia iloilo ma togi tamaiti o le vasega i le mauuluga o le taumafaiga e fuafua i o latou malosiaga. A o e tusia au faamatalaga, ia e faasa’oina soo se le malamalama po o ni tali e le ’o manino lelei ma ia viia tamaiti mo a latou taumafaiga.

Ia nofouta mo tamaiti o le vasega e i ai ni manaoga faapitoa ma fetuunai le taiala suesue a le tamaitiiti o le vasega e fuafua i ai. Mo se faataitaiga, afai e i ai se le atoatoa o se tamaitiiti o le vasega e faigata ai ona tusitusi, e mafai ona e faatagaina le tamaitiiti e faaoga se laau pu’eleo e pu’e ai ana galuega pe tuu atu foi i se uo po o se tagata o le aiga e na te tusia ia galuega mo le tamaitiiti. Atonu e moomia ona e fetuunaia le aofaiga o gaoioiga suesue e tuuina atu i nisi tamaiti ona o ni manaoga faapitoa. O isi tamaiti o le vasega atonu e sili atu le alualu i luma ma e mafai ona uunaia e galulue ia sili atu nai lo tulaga o loo manaomia.

Faaoga i le Polokalama o le Seminare i Aso Uma

O le *Taiala Suesue a le Tamaitiiti o le vasega o le Feagaiga Fou* e le manaomiaina mo tamaiti o le vasega o loo auai i polokalama a le seminare i aso uma, ae tatau ona e tuuina se kopi i totonu o le potu ia avanoa mo tamaiti uma. E mafai ona e tuu atu i tamaiti e faatatau i le vaega o le “Malamalama i Tusitusiga Paia” mo le fesoasoani ia malamalama i upu ma fuaitau faigata ma upusii ma faamalamalamaga.

A o saunia ia lesona, ia vaai i faatomuaga o poloka taitasi o mau ma vaega o le “Suesueina o Tusitusiga Paia” mo le fesoasoani e fuafua ai pe faapefea ae o le a foi le auala e aoao atu ai. Mo se faataitaiga, o nisi o faatomuaga o loo tuuina atu ai ni fesili mo talanoaga lea e fesoasoani ai e faatupuina le mataala i tagata o loo aoaoina. Atonu e te mana’o mai lea taimi i lea taimi ia tuu atu i tamaiti o le vasega e faia se isi gaoioiga o le “Suesueina o Tusitusiga Paia” i le taimi o le vasega ona tuu atu lea ia i latou e fetufoai mai mea na latou tusia—pe fai vaega po o le vasega atoa foi. E tusa lava pe le mulimulitai ia gaoioiga i le faatulagaga o loo faatulagaina mai ai i le taiala suesue, e mafai lava ona latou saunia ni manatu lelei lea e mafai ona fetuunaia mo le faaogaina i totonu o se potuaoga.

FUAFUAINA O LE SAOASAOA O LAU AOAONA ATU O LE FEAGAIGA FOU

E pei lava o isi tusi faavae, e le lava le taimi i le tausaga faaleaoaoga e talanoaina ai fuaiupu uma i totonu o le Feagaiga Fou. O le luitau o le fuafua lelei lea o lau aoao atu. Afai e te faifaimalie ma tele le taimi e aoao atu ai ia Talalelei, o le a e misia ia savali o loo i Tusi faapea ma le tusi o Faaaliga. Afai e saosaoa lau aoao atu, atonu o le a le malamalama au tamaiti o le vasega ma lē talisapaia ia vaega taua o le Feagaiga Fou. Ia faaoga lenei taiala e fuafua ai ina ia fesoasoani ia te oe e iloilo ina po o le a le tele o mea e manaomia ona e aoaoina i aso taitasi ma le vaiaso ae po o a foi mataupu e tuuina atu i au tamaiti o le vasega e faitauina.

Talu ai ona o le tele o ituaiga polokalama seminare i le lalolagi atoa, o lea ua le mafai ai ona faatulagaina lenei tusi lesona ina ia fetauti i tulaga uma lava. Atonu e te manao e fetuunai lenei taiala e 36-vaiaso i lau polokalama faapea ia manaoga o au

tamaiti o le vasega. O le seminare e aoaoina atu i aso e lima o le vaiaso, ae o mea e faaogaina i lesona ua sauniaina mo na o aso e fa ina ia lava ai le taimi mo ni mea e faalavelave i ai e pei o gaoioiga ma faatasiga a le aoga, o ni gaoioiga ma ni polokalama faapitoa a le seminare, su'ega mau ma su'ega. Atonu e te manao e filifili e faaalu ia sili atu ma le aso e tasi e matuai aoao lelei atu ai se poloka o mau. O lenei fetuunaiga e uunaia ai le taitaiga a le Agaga ina ia faafetaiaia ai manaoga faapitoa o au tamaiti o le vasega.

O le aoaoina atu o le talalelei a Iesu Keriso i le autalavou o le Ekalesia o se faatuutuuga paia ma se tiute faafiafiaina lea. Ia faamanuia oe ma au tamaiti o le vasega e le Alii a o outou suesueina le galuega a Iesu Keriso ma Ana Aposetolo i totonu o le Feagaiga Fou i lenei tausaga.

Taiala o le Fuafuaina o le Saoasaoa mo se Tausaga Aoga e 36-Vaiaso

Vaiaso	Poloka o Mau e Fautuaina ina ia Aoaoina
1	Aso 1: "O Se Faatomuaga i le Feagaiga Fou" ma "Fesosoaniga i le Suesueina o Tususiga Paia" Aso 2-3: "O Se Vaaiga Lautele i le Ata o le Faaolataga" Aso 4: "O le Taimi i le va o le Feagaiga Tuai ma le Feagaiga Fou"
2	Aso 1: Mataio 1-2 Aso 2: Mataio 3 Aso 3: Mataio 4 Aso 4: Mataio 5
3	Asos 1-2: Mataio 5-7 (faaauau) Aso 3: Mataio 8-9 Aso 4: Mataio 10
4	Aso 1: Mataio 11-12 Aso 2: Mataio 13 Aso 3: Mataio 14-15 Aso 4: Mataio 16
5	Aso 1: Mataio 17 Aso 2: Mataio 18 Aso 3: Mataio 19-20 Aso 4: Mataio 21-23
6	Aso 1: Mataio 24 Aso 2: Mataio 25 Aso 3-4: Mataio 26
7	Aso 1: Mataio 27 Aso 2: Mataio 28 Aso 3: Mareko 1 Aso 4: Mareko 2-3
8	Aso 1: Mareko 4-5 Aso 2: Mareko 6 Aso 3: Mareko 7-8 Aso 4: Mareko 9-10

Vaiaso	Poloka o Mau e Fautuaina ina ia Aoaoina
9	Aso 1-2: Mareko 11-13 Aso 3-4: Mareko 14-16
10	Aso 1: Luka 1 Aso 2: Luka 2-3 Aso 3: Luka 4 Aso 4: Luka 5-6
11	Aso 1-2: Luka 7 Aso 3: Luka 8 Aso 4: Luka 9
12	Aso 1: Luka 10 Aso 2: Luka 11-13 Aso 3: Luka 14 Aso 4: Luka 15
13	Aso 1: Luka 16 Aso 2: Luka 17-18 Aso 3: Luka 19 Aso 4: Luka 20-21
14	Aso 1-2: Luka 22 Aso 3: Luka 23 Aso 4: Luka 24
15	Aso 1: Ioane 1 Aso 2: Ioane 2 Aso 3: Ioane 3 Aso 4: Ioane 4-5
16	Aso 1-2: Ioane 6 Aso 3: Ioane 7 Aso 4: Ioane 8

Vaiaso Poloka o Mau e Fautuaina ina ia Aoaoina

17	Aso 1: loane 9 Aso 2: loane 10 Aso 3: loane 11 Aso 4: loane 12
18	Aso 1: loane 13 Aso 2: loane 14 Aso 3: loane 15 Aso 4: loane 16–17
19	Aso 1: loane 18 Aso 2: loane 19 Aso 3: loane 20 Aso 4: loane 21
20	Aso 1: Galuega 1 Aso 2: Galuega 2 Aso 3: Galuega 3 Aso 4: Galuega 4–5
21	Aso 1: Galuega 6–7 Aso 2: Galuega 8–9 Aso 3: Galuega 10 Aso 4: Galuega 11–12
22	Aso 1: Galuega 13–14 Aso 2: Galuega 15 Aso 3: Galuega 16–18 Aso 4: Galuega 19–20
23	Aso 1: Galuega 21 Aso 2: Galuega 22–23 Aso 3: Galuega 24–26 Aso 4: Galuega 27–28
24	Aso 1: Roma 1–3 Aso 2: Roma 4–5 Aso 3: Roma 6 Aso 4: Roma 7–8
25	Aso 1: Roma 9–10 Aso 2: Roma 11 Aso 3: Roma 12 Aso 4: Roma 13–16
26	Aso 1: 1 Korinito 1–4 Aso 2: 1 Korinito 5–7 Aso 3: 1 Korinito 8–11 Aso 4: 1 Korinito 12–14

Vaiaso Poloka o Mau e Fautuaina ina ia Aoaoina

27	Aso 1: 1 Korinito 15–16 Aso 2: 2 Korinito 1–3 Aso 3: 2 Korinito 4–7 Aso 4: 2 Korinito 8–13
28	Aso 1: Kalatia 1–2 Aso 2: Kalatia 3–6 Aso 3: Efeso 1–3 Aso 4: Efeso 4–6
29	Aso 1: Filipi 1–4 Aso 2: Kolose 1–4 Aso 3: 1 Tesalonia 1–5 Aso 4: 2 Tesalonia 1–3
30	Aso 1: 1 Timoteo 1–6 Aso 2: 2 Timoteo 1–4 Aso 3: Tito 1–3 Aso 4: Filemoni
31	Aso 1: Eperu 1–2 Aso 2: Eperu 3–6 Aso 3: Eperu 7–10 Aso 4: Eperu 11–13
32	Aso 1: Iakopo 1–2 Aso 2: Iakopo 3–5 Aso 3: 1 Peteru 1–2 Aso 4: 1 Peteru 3–5
33	Aso 1: 2 Peteru 1–3 Aso 2: 1 loane 1–5 Aso 3: 2 loane; 3 loane Aso 4: Iuta
34	Aso 1: Faaaliga 1 Aso 2: Faaaliga 2–3 Aso 3: Faaaliga 4–5 Aso 4: Faaaliga 6–7
35	Aso 1: Faaaliga 8–9 Aso 2: Faaaliga 10–11 Aso 3: Faaaliga 12–14 Aso 4: Faaaliga 15–16
36	Aso 1: Faaaliga 17–19 Aso 2: Faaaliga 20–22 Aso 3: Filifiliga o le faiaoga Aso 4: Molimau ma faamavae atu i tamaiti o le vasega

O SE FAATOMUAGA I LE FEAGAIGA FOU

Faatomuaga

I se lauga i faiaoga o le Ofisa o Aoga a le Ekalesia, na saunoa ai faapea ia Elder Boyd K. Packer o le Korama a le Toasefululua:

“E matuai taua lava le tuuina atu o se aotelega faatulagaina lelei ma *pupuu* o le mataupu atoa lava i le amataga. . . .

“O nai piriota tau amata na, e pupuu ae o se taimi aoga lea pe a faatusatusa i ai, e mafai ai e tamaiti o le vasega ona latou iloa tonu le vaega o le ala o loo latou i ai. O le a i ai so latou lagona e uiga i le mataupu o le a aoaoina. E tele mea o le a latou taofiofia pe a latou iloina le fesooteaiga o vaega uma, ma o le a faigofie ai foi ona aoaoina i latou. O le mua’i aotelega e maua ai se auivi ma e sili atu ona aoga ai le taimi ma le galuega o loo tuuina atu i ai” (*The Great Plan of Happiness* [lauga na tuuina atu i faiaoga o mataupu faalelotu i se tauaofiaga e uiga i le Mataupu Faavae ma Feagaiga/Talafaasolopito o le Ekalesia, Iunivesite o Polika Iaga, 10 Aok. 1993], 2–3; po o le *Charge to Religious Educators*, 3rd ed. [1994], 113–14).

Faauu le taimi e atinaeina ma aoao atu ai se faatomuaga ma se vaaiga lautele i le Feagaiga Fou. O le a fesoasoani lea i tamaiti o le vasega ia malamalama i le taua o le Feagaiga Fou ma tulimatai atu ai i mea e faaogaina o le a latou faitauina ma aoaoina i le gasologa o le tausaga aoaoina. O se faatomuaga ma se vaaiga lautele o le a faamalosa ai lou malamalama ma le malamalama o au tamaiti o le vasega i le misiona paia a Iesu Keriso.

O le a le Feagaiga Fou?

O le Feagaiga Fou o se talafaamaumau lea o le soifuaga, aoaoga, ma le misiona a Iesu Keriso ma le galuega a Ona soo i le siitiaina o le faasalalauina atu o le Ekalesia Kerisiano. O le upu na faaliliuina o le *molimau* e mafai foi ona faaliliuina o le *feagaiga*, o le ia, o le Molimau Fou o le feagaiga fou lea. I sona tulaga faaletalalelei, o se feagaiga o se tautoga paia lea poo se maliliea i le va o se tagata po o se vaega o tagata ma le Alii. Afai tatou te osia se feagaiga tatou te folafola atu tatou te faia ni mea patino, ae e folafola mai e le Alii ia faamanuiaga e avea ma tau. Ua faatulagaina e le Alii ia aiaiga mo taumafaiga uma tatou te faia (usiusitai i tulafono ma sauniga) ma faamanuiaga tatou te mauaina. Afai tatou te tausua a tatou feagaiga ma tumau e oo i le iuga i le faatuatua, e faamanuiaina i tatou e le Alii i le taimi i la le tino nei ma folafola mai ia i tatou le faaolataga ma le faaeaga pe a mavae lenei olaga. O le Feagaiga Fou o loo aofia ai feagaiga ma aoaoga faavae a le Alii ma Ana Aposetolo na tuuina atu i Lana fanau i le taimi o Lana galuega i le faaletino e aoao ai i latou i le auala e toe foi atu ai i Lona afioaga.

Aisea e Tatau Ai Ona Tatou Suesueina le Feagaiga Fou?

Na tau fai faamamafaina uma e perofeta anamua ma perofeta o ona po nei le taua o tusitusiga paia i le fesoasoani lea ia i tatou

ia tatou iloina le Atua. Na aoao mai Iesu, “O le ola e faavavau foi lenei, ia latou iloa oe le Atua moni e toatasi, atoa ma le ua e auina mai, o Iesu Keriso lea” (Ioane 17:3). Na aoaoina e le Aposetolo o Paulo ia Timoteo e uiga i le taua o tusitusiga paia:

- E mafai ona latou “faapoto ai se tasi e iu ai i le ola i le faatuatua” (2 Timoteo 3:15).
- E tuuina mai le “agaga o le Atua” (f. 16).
- E “aoga foi e aoao ai, e aoai ai, e faatonu ai, e faapoto ai foi i le amiotonu” (f. 16).
- E fesoasoani ai i e amiotonu ina ia atoatoa ma “ia saunia i galuega lelei uma” (f. 17).

Na tusia e le perofeta o Mamona:

“Toe, ua tatou iloa ai, ai sē tago i le afioga a le Atua, ua telelisa ai ma ua mamana e vavaeeseina le atamai uma ma maili ma togafiti uma a le tiapolo, a e taitai atu le tagata o Keriso i le ala sa’o ma le vaapiapi, i tala atu o le vanu faavavau o le puapuaga ua saunia e tofatumoanaina ai e amioleaga—

“E faataunuuna atu ai o latou agaga, ioe, o latou agaga e le oti, i le itu taumatau o le Atua i le malo o le lagi” (Helamana 3:29–30).

E fesoasoani tusitusiga paia ia i tatou e vavaeeseina (faatoilaloina) ia pepelo ma faaosoosoga a le tiapolo ma mulimuli atu i se ala lea e “taunuu atu ai i tatou” (avatu ai i tatou) i le malo selesitila.

Na aoao mai Elder Boyd K. Packer:

“I le vasega o le Feagaiga Fou, e te aoao ai i le fanau mai ma le galuega a Iesu Keriso ma le avea o Ia ma Alo o le Atua. E te aoao ai e uiga i sauniga, e uiga i le papatisoga i le faatofuina mo le faamagaloina o agasala.

“E te faitau i le valaauina o le Toasefululua ma a latou galuega. E te aoao i le tulaga faaleTama o le Atua. E te aoao e uiga i le Agaga Paia, le Fesoasoani, ma faaaliga i le tagata lava ia.

“E te aoao i aso o le Faaolataga ma le Faasatauroga, ma aoao i upumoni faasilisilia o le Togisala ma le Toetu. E te aoao e uiga i le alofa ma tulafono ma le pogai ua manaomia ai se Togiola.

“Mai talalelei e fa se’ia oo atu i le tusi o Faaaliga, e fofola mai ia te oe aoaoga a le Matai ma Ana aposetolo, ma le talalelei a le Alii o Iesu Keriso” (i le Conference Report, Mat.–Ape. 1990, 49; po o le *Liahona*, Iulai 1990, 48).

O aoaoga faavae nei, o loo aoaoina uma i totonu o le Feagaiga Fou, o loo faaali mai ai le mafuaaga e le gata i le taua ae o le aanoa foi o le suesueina ma le faaeteete o le Feagaiga Fou:

- O le Atua o lo tatou Tama o i le Lagi.
- Na foafoaina e le Tama Faalelagi ia lagi ma le lalolagi e ala mai i Lona Alo o Iesu Keriso.
- Na auina mai e le Tama Faalelagi Lona Alo i le lalolagi ina ia “faaolaina le lalolagi ia te ia” (Ioane 3:17).



- Ua tuuina atu e le Tama Faalelagi le faamasinoga uma i le Alo.
- E mafai e le Atua ma e fesootai sa’o mai i olaga o tagata.
- Ua vaevaeina le Lagi i ni malo eseese o le mamalu.
- Tatou te mauaina faamanuiaga mai le Atua e ala lea i le osia ma le tausia o feagaiga paia.
- O le ifo i tupua i soo se ituaiga o le faatamaia lea faaleagaga.
- Ua valoia le Afio Faalua Mai o Iesu Keriso, e aofia ai ma mea e tutupu i aso mulimuli.

Talu ai ona o loo tatou ola i se vaitaimi e matuai ese ai lava ia taimi ma aganuu nai lo le vaitaimi o le Feagaiga Fou, o lea ua aumaia ai ma ni luitau ia i latou e suesueina le Tusi Paia. I le faapoopo atu i ai, o le tusi o loo tatou umiaina nei e le ato-atoa. E tele vaega “ua malamalama i ai” na aveeseina (1 Nifae 13:26). O le tele o mea na leiloloa na toefuataiina e le Tusi a Mamona, o le Faaliliuga a Iosefa Samita o le Tusi Paia, ma isi faaaliga i ona po nei (tagai 1 Nifae 13:33– 41). E le gata i lea, o nisi vaega o le Tusi Paia ua faanunumi pe nanaina i gagana faatusa. O ia ituaiga valoaga e faapea ua musuia perofeta anamua ina ia ufiufia a latou tusitusiga i faailoga sa aoga aua o i latou o e sa taumafai e aveesea vaega “malamalama ma le taua” ua tuueseina le tele o fuaiupu le mautonu e faatatau i ai. O lea, ua tele ai upumoni ua faasaina ina ia faitau ma malamalama i ai e ala i le mana o le Agaga Paia ma le “Agaga o valoaga” (2 Nifae 25:4) lea ua faaavanoaina mai e le Atua i le Au Paia o Aso e Gata Ai.

E Faapefea Ona Faatulagaina le Feagaiga Fou?

O le Tusi Paia e le o se tusi se tasi ae o se tuufaatasiga o ni tusi; o le uiga lena o le upu *bible*. O nei tusi e le o faatulagaina i le faatulagana na tusia ai e pei ona o loo faaali mai ai i le Tusi Paia. O le Feagaiga Fou o loo aofia ai ni tusi se luasefulufitu lea e mafai ona vaevaeina i ni vaega autu se fa e fuafua lava i le natura o o latou autu.

1. **Tusi o Talafaasolopito**—O le vaega lenei e aofia ai ia Talalelei e fa ma le tusi o Galuega. O Talalelei o loo tusia ai molimau a Mataio, Mareko, Luka, ma Ioane e faatatau i le galuega a le Faaola. O le tusi o Galuega o se tala lea i le galuega a nisi o aposetolo a le Alii. O Talalelei e mafai foi ona vaevaeina i ni vaega se lua. O Mataio, Mareko, ma Luka ua lauiloa o Talalelei e talitutusa ona o a latou faamatalaga. O le molimau a Ioane o se molimau e tulagaese mai ai ma ua manatu na tusiaina faapitoa lava mo tagata o le Ekalesia. E tusa ai ma le faamatalaga a se tasi o faiaoga o le Au Paia o Aso e Gata Ai: “I totonu o Tusi Paia ua faasalaluina i aso nei o tusi taitasi uma a Mataio, Mareko, Luka, ma Ioane . . . ua faaulutalaina, ‘O le Talalelei a . . .’ Ae peitai, ua ta’u mai e tagata atamamai ia i tatou e faapea, o nei ulutala na faatoa faapoopo i ai i se vaitaimi o le senituri lona fa T.A., ae o le taimi i luma atu atonu sa na o le igoa lava o le tagata na tusia le tusi na aofia ai; o lona uiga, e na o le igoa lava

o Mataio, mo se faaitaiga” (Robert J. Matthews, *Behold the Messiah* [1994], 22).

2. **Tusi a Paulo**—O lenei vaega e aofia ai ia tusi a Roma e tau atu ia Eperu. O le tele o tusi a Paulo na tusia e faatatau lea i ni paranesi o le Ekalesia na faatuina i aai sa talai atu i ai e Paulo le talalelei ma sa ia faavaeina. O Eperu ma Filemoni e le aofia ai i le vaega lea. O tusi a Paulo ua faatulagaina i lo latou uumi, se’i vagana ai ia Eperu.
3. **Tusi Faalauaitetele**—O lenei vaega e aofia ai tusi na tusia e Iakopo, Peteru, Ioane, ma Iuta. E taua o Tusi Faalauaitetele aua e le o faamaotiina atu i ni paranesi po o ni tagata taitoatasi o le Ekalesia, se’i vagana ai le tusi e lua ma le tolu a Ioane.
4. **O le Apokalifa**—O le tusi mulimuli lenei i le Feagaiga Fou ma ua lauiloa o le tusi o Faaaliga. O se talafaamaumau o se faaaliga na mauaina e le Aposetolo o Ioane a o faafalepuipuiina o ia i le motu o Patamo. Na vaaia e Ioane le talafaasolopito o le lalolagi, e aofia ai mea e tutupu i aso mulimuli ma le manumalo o Iesu Keriso i le malo o Satani.

Mo nisi faamatalaga e uiga i le pogai ma le talafaasolopito o le Tusi Paia, tagai i le “Tusi Paia” i le Taiala i Tusitusiga Paia.

Ia filifili ma le agaga tatalo ia mea nei e faaogaina mo le faatomuaga faapea ma mataupu faavae nei ae le’i saunia au lesona.

O Nisi Mataupu Faavae Taua o le Talalelei e Saili Iai

- E fesoasoani le Feagaiga Fou ia i tatou ina ia tatou o mai ia Keriso.
- O le Feagaiga Fou na faasaina mo o tatou aso faapea ma lo tatou manuia.

Fautuaga mo le Aoa Atu

Faaoga ata vitio nei po o nisi o ou manatu e aoao atu ai se aotelega o le Feagaiga Fou. (*Faaaliga*: O manatu nei e lua e aoao atu ai o loo aofia ai nisi o mea e pei o ata vitio ma atonu e aoga tele mo i latou e leai ni vitio.)



Ata vitio 1o le *Feagaiga Fou*, “O Mai ia te A’u” (11:26), o loo faaaliga ai le auala e mafai ona fesoasoani ai le suesueina o le Feagaiga Fou ia i tatou ina ia tatou aoao atili e uiga i le Faaola ma le auala e mafai ai ona Ia fesoasoani i o tatou olaga. Ata lona 2, “O le Paso” (9:55), o loo aoao mai ai faapea, e mafai e le Feagaiga Fou ona tuuina mai ia i tatou ni manatu i le foiaina o fesili ma faafitauli o le olaga. (Tagai *Taiala o Vitio o le Feagaiga Fou* mo le aoaoina atu o fautuaga.)

Vaiga Lautele i le Feagaiga Fou. E Fesoasoani le Feagaiga Fou ia i tatou ina ia o mai ia Keriso.
(15–20 minute)

Tuu ni nai oneone sūsū i totonu o se koneteaina papa’u. Ia valaaulia ni nai tamaiti e oomi o latou lima tusi i totonu o le

oneone ona toe se'i mai lea i fafo. Fai atu i ai e faitau ia oneone na o loo pipii i o latou tamailima. Tuu atu ia i latou e mateina mai pe fia ni oneone o loo i totonu o le pusa. Ia valaaulia le vasega e faafoliga o loo taumafai e faitau ia oneone o loo i le talafatai i sisifo o Alaska e tau atu i le faatausiugiuga o Amerika i Saute. Tuu atu i tamaiti o le vasega e faitau le Mose 7:30, ma fesili atu:

- O le a le mea o loo aoao mai e lenei fuaiupu e uiga i le mea e gata mai ai ia foafoaga ma le mana o Keriso?
- Faitau le Ioane 1:1–3. O le a le mea o loo ta'u mai e nei fuaiupu e uiga ia Iesu Keriso ma Lona mana?

Ta'u atu i tamaiti o le vasega faapea o Iesu o le Atua (o le Upu) ae le'i soifua mai o Ia i le lalolagi, ma sa Ia foafoaina ia lagi ma le lalolagi i lalo o le taitaiga a lo tatou Tama Faalelagi.

- Faitau le Ioane 1:14. O le a sou manatu, aisea na filifili ai Iesu Keriso, o le na foafoaina mea uma, e sau i lenei lalolagi ma aveva ma tagata faaletino? (tagai Mosaea 3:7–9).
- O le a Lana faiā i lo tatou Tama o i le Lagi?
- Faitau le Mataio 11:28–30. O le a le valaaulia na tuu mai e Iesu Keriso ia i tatou?
- O a nisi o mafuaaga e tatau ai ona tatou omai ia Iesu Keriso? (Ia lisi i luga o le laupapa ia tali.)

Ia faamanatu atu i tamaiti o le vasega o loo naunau le Faaola ina ia faaoga uma Lona mana e fesoasoani ai ia i latou o e omai ia te Ia. Ia valaaulia i latou e mafaufau i taimi na fesoasoani ai le Faaola ia i latou poo o latou aiga. Ia valaaulia soo se tasi e manao e fetufaai mai i le vasega soo se mea talafeagai na oo i ai.

Ia molimau atu o lenei tausaga o se avanoa matagofie lea e aoao ai ia Iesu Keriso e ala i lo latou suesueina o le Feagaiga Fou. Ia faamalamalama atu faapea i le taimi o lo latou suesuega o le a latou molimauina ai le toatele o tagata na o atu i le Faaola ma maua Lona malologa, e faapea foi le toatele o i latou na teenaina Lana valaaulia. Ia faamatala atu i tamaiti faapea o le a latou maua foi lea lava avanoa e tasi. Ia fesili atu: E faapefea ona e taliaina Lana valaaulia ma sau ia te Ia?

Vaai Lautele i le Feagaiga Fou. O le Feagaiga Fou na faasaosaina mo o tatou aso ma lo tatou manuia. (15–20 minute)

Fai atu i tamaiti o le vasega e su'e a latou Tusi Paia i le faasologa o mataupu. Fesoasoani ia i latou e faailoga ia vaeveaga o le Feagaiga Fou (o Talafaasolopito, o Tusi a Paulo, o Tusi Faalauaitete, ma le Apokalifa), ma talanoaina po o a mea o loo aofia ai i vaega taitasi (tagai "E Faapefea Ona Faatulagaina le Feagaiga Fou?" o loo i luga atu).

Tuu atu i tamaiti e ta'u mai nisi o tala po o aoaoga e fiafia i ai mai le Feagaiga Fou ma faamatala mai pe aisea e fiafia iai. Fesili atu:

- Pe ua talosagaina ea oe e faataunuuina se mea e foliga mai e le mafai ona faataunuuina?
- Pe na tuuaia pe faasalaina oe mo le faia o se mea e te le'i faia?
- Pe na faafetauia ea oe e ni tagata faasaua?
- Pe na tuua ea na o oe i se taimi?

Tuu atu i tamaiti o le vasega e faitauina le Eperu 2:18 ma fesili atu: E mafai faapefea e le Faaola ona silafia ona faamafanafanaina i tatou i o tatou faigata? (Na ia puapuagatia foi i faigata faapea ma sili atu.) Ta'u atu i tamaiti o le vasega faapea o le Au Paia i le Feagaiga Fou sa feagai foi ma faafitauli e pei foi o i tatou. Faamanatu atu i ai latou e ui lava o le Feagaiga Fou o le tusitusiga mai le taimi ua tuanai, o ona aoaoga faavae, talafaasolopito, ma tala e matuai taua tele i aso nei. O le Feagaiga Fou na faatulagaina ma faasaosaina mo o tatou aso faapea ma lo tatou manuia.

Ta'u atu i tamaiti o le vasega faapea e mafai ona tatou malamalama i le Feagaiga Fou i le na o lo tatou faitau ma suesue i ai. Fesili atu: O le a sou manatu o le a le faiā i le va o amioga a tagata e faatatau i le Feagaiga Fou ma lo latou malosi e malamalama ai i mataupu faavae o loo aoaoina ai? Ia uunaiina tamaiti o le vasega e faataunuuina a latou suesuega o le Feagaiga Fou ma se taumafaiga faamaoni ma se uiga o le agaga tatalo.

Fesoasoaniga i Suesuega o Tusi Tuufaatasi e Tolu

I le 1993 na gaosia ai e le Ekalesia se seti fou o fesoasoaniga mo suesuega ina ia aofia ai i tusi tuufaatasi e tolu (o le Tusi a Mamona, o le Mataupu Faavae ma Feagaiga, ma le Penina Tautele). O nei fesoasoaniga e mafai ona matuai aoga ai se suesueina o tusitusiga paia. I le tautalagia o le taumafaiga lea na tuuina i totonu o lomiga fou o tusitusiga paia a le AAG, na molimau mai ai Elder Boyd K. Packer: “O lenei galuega . . . e i ai le aso o le a tulai mai ai o se faailoilo musuia i lo tatou augatupulaga. Talu ai ona o lenei fesoasoaniga, o le a tatou tutū a’ē ai o se augatupulaga o le Au Paia o Aso e Gata Ai o e o le a malamalama i le talalelei ma iloa le Alii” (Bruce R. McConkie, *Apostle* [lauga i le falelauasiga o Elder Bruce R. McConkie, 23 Apr. 1985], 4).

O Nisi Mataupu Faavae Tava o Le Talalelei e Saili i Ai

- O tusi tuufaatasi e tolu o loo aofia ai ni fesoasoaniga taua e suesue ai lea e mafai ona fesoasoani ia i tatou ia faateleina lo tatou malamalama i tusitusiga paia uma.

Fautuaga Mo Le Aoao Atu

Filifili mai manatu nei, pe faaaoga foi ni ou lava manatu, a o e sauniaina au lesonea i fesoasoaniga mo le suesueina o tusitusiga paia.

Fesoasoaniga mo Suesuega. O le iloaia o igoa ma le faasologa o tusi i le Feagaiga Fou e fesoasoani lea ia i tatou e sailia vave ia mau. (10–15 minute)

Fesoasoaniga i le Suesueina o Tusitusiga Paia. O fesoasoaniga mo suesuega o loo tuuina atu i tusi tuufaatasi e tolu e fesoasoani ai lea ia i tatou ia maua ni mea se tele mai a tatou suesuega o tusitusiga paia. (40–45 minute)

Ua faaaofia e le Ekalesia le anoanoai o fesoasoaniga mo suesuega i totonu o tusi tuufaatasi e tolu. O fautuaga nei e mafai ona fesoasoani ai ia te oe i le aoaoina o au tamaiti o le vasega ina ia faaaogaina lelei ai.

Ulutala o Mataupu ma Faatomuaga o Vaega. Tuu atu i tamaiti e su’e i le ulutala mataupu mo le Alema 32.

Faitau ma faamalamalama atu faapea o loo faamamafaina mai e ulutala ia manatu autu o mataupu taitasi ma e masani ona tuuina mai ai ni aoaoga faavae atamai.

Tuu atu i tamaiti o le vasega e faitauina ia ulutala o mataupu atofaina ma tali i fesili nei:

- 1 Nifae 14—E tusa ai ma le tala a le agelu na tautala atu ia Nifae, e fia ni lotu o iai iina?
- Mataupu Faavae ma Feagaiga 88—O le a se ulutala e mafai ona faaulutalaina ai lenei vaega?
- Mose 6—O a talafaamaumau na teuina e fanau a Atamu?
- Aperaamo 3—Na faapefea ona iloa e Aperaamo le la, masina, ma fetu?

Ia faaali atu faapea o vaega o le Mataupu Faavae ma Feagaiga o loo aofia ai ni ulutala se lua. O le ulutala muamua o loo aofia ai ia faamatalaga faamalamalama ma le lona lua o se aotelega o mea o loo aofia ai i le mataupu.

Faamatalaga i le pito i lalo. Fai atu i tamaiti o le vasega e su’e i le 2 Nifae 12 mo faataitaiga o le tele o faamatalaga i le pito i lalo o loo maua i tusi tuufaatasi e tolu. Ia fetuفاai ma i latou le aoga o faamatalaga i le pito i lalo:

- Ia faailoa atu o fuaiupu taitasi uma lava e tofu ma faamatalaga pito i lalo ma o faamatalaga uma pito i lalo taitasi i totonu o le fuaiupu o loo faasolo i le alafapeta.
- Faaali atu ni faataitaiga o faamatalaga i le pito i lalo o loo faasino i le Taiala i Tusitusiga Paia (TTP).
- Faaali atu ni faamatalaga i le pito i lalo o loo tuuina mai ai ni uiga Eperu.
- Faaali atu ni faataitaiga o faamatalaga i le pito i lalo o loo tuuina mai ai ni upu e uiga tutusa ma faamalamalama mo ni upu maotua po o ni upu ma ni fuaitau faalēmanino.

Faaoga ia fesili nei e tuu atu ai i tamaiti o le vasega se avanoa e faataitai ai le faaaogaina o faamatalaga i le pito i lalo:

- Faitau le 1 Nifae 21:21. O ai o loo faatatau i ai le upu *e* (ona e)?
- Faitau le 2 Nifae 17:14. O le a le uiga o le upu *Emanuelu*?
- Faitau le Alema 32:42. O ai isi e ese mai ai i le ‘aina o le fua o le laau e pei ona tautala ai ia Alema? (Lia; tagai i le faamatalaga faaopoopo o loo i le faamatalaga pito i lalo *e*.)

O le Taiala i Tusitusiga Paia. O le Taiala i Tusitusiga Paia o se aotelega o fesoasoaniga mo suesuega o loo maua i le pito i tua o tusi tuufaatasi e tolu. O lenei taiala o loo aofia ai le lisi o autu i le alafapeta; o vaega filifilia mai le Faaliliuga a Iosefa Samita o le Tusi Paia; faafanua, faatasi ai ma se faasino upu o igoa o nofoaga; ma ata o nofoaga faatusipaia. O vaega uma taitasi nei o loo faamatalaina atu i lalo. (Tagai i le faatomuaga o loo i luma o le Taiala i Tusitusiga Paia mo nisi faamatalaga.)

Lisi Faaalafapeta o Autu. O le lisi faaalafapeta o autu, e amata mai le itulau e 6 o le Taiala i Tusitusiga Paia, o se lolomi fefiloi lea, e i ai ni faauigaina mo le fiaselau o autu mai tusitusiga paia. Ia fetuفاai atu ni nai autu patino i tamaiti o le vasega. Ia aofia ai vaega nei:

- Faasologa o mea na tutupu (“faasologa,” i. 41–45)
- Uiga o le Ekalesia a Keriso (“Ekalesia, faailoga o le moni,” i. 45–46)
- O se afaatasi o talalelei e fa (“Talalelei,” i. 97–102)
- O se iloiloga o tusi a le Aposetolo o Paulo (“Tusi a Paulo,” i. 187–89)

O se tasi vaega fesoasoani tele o le lisi faaalafapeta o autu o le iloa ai lea ona maitau tagata e tutusa ia igoa. Fai atu i le vasega e su’e i le igoa “Iosefa” e saili ai pe toafia ni alii e igoa i le igoa lena ae po o ai foi i latou uma taitoatasi.

O le lisi faaalafapeta o autu e avea foi o se faasino upu po o se taiala i tusi faavae, e aofia ai le Tusi Paia. Ta’u atu i tamaiti e mafai ona faigofie lo latou sailia o mau e ala lea i le sueina o upu autu i le lisi faaalafapeta. Ma e talu ai ona o le lisi faaalafapeta o loo faatulagaina i autu, o lea e mafai ai ona latou faaaogaina e sue ai le fia selau o mataupu o le talalelei i le loloto latou te mananao i ai. O faataitaiga nei e mafai ona fesoasoani ai i tamaiti o le vasega ina ia masani i le lisi faaalafapeta o autu:

- Tuu atu i tamaiti o le vasega taitoatasi e filifili se mataupu e manao e talanoa i ai pe afai e talaosagaina e lauga atu i se sauniga a le ekalesia. Tuu atu i tamaiti o le vasega e faaaoga le lisi faaalafapeta e fuafua ai ia mau e mafai ona latou faaaogaina e sauni ai a latou tautalaga.
- Tuu atu i tamaiti o le vasega e sue i le lisi faaalafapeta ma maitauina ai le tele o autu eseese e uiga ia Iesu Keriso.

Mo nisi faamatalaga i le auala e faaaoga ai le lisi faaalafapeta o autu, ia tagai i le faatomuaga ma le ata o loo i le itulau e 6 o loo i le Taiala i Tusitusiga Paia.

Vaega Filifilia mai le Faaliliuga a Iosefa Samita o le Tusi Paia. Ia fetufaai ma au tamaiti o le vasega ia le faamatalaga mai le “Faaliliuga a Iosefa Samita (FIS)” i le lisi faaalafapeta o autu (i. 136–37). O le tele o suiga na faia e Iosefa Samita i le Tusi Paia o loo aofia ai i totonu o le Taiala i Tusitusiga Paia e amataina i le itulau e 264. Tuu atu i au tamaiti o le vasega upu mo le FIS, Ioane 4:26 ma le FIS, 1 Korinito 15:40 ma iloilo ai po o a suiga na faia e le Perofeta.

O faamatalaga i le pito i lalo i totonu o tusi tuufaatasi e tolu o loo faatatau foi i vaega filifilia mai le Faaliliuga a Iosefa Samita. Faitau le Mataupu Faavae ma Feagaiga 93:1 ma faasino tamaiti o le vasega i le faamatalaga pito i lalo e. Tuu atu ia i latou e su’e le FIS, 1 Ioane 4:12 i vaega filifilia mai le Faaliliuga a Iosefa Samita o le Tusi Paia. Fesili atu: O a ni malamalamaaga na tatou mauaina mai le Faaliliuga a Iosefa Samita o lena fuaiupu o le Tusi Paia? (E na o i latou e talitonu i le Atua e mafai ona vaai ia te Ia.)

Mo nisi faamatalaga i le auala e faaaoga ai nei vaega filifilia mai le Faaliliuga a Iosefa Samita o le Tusi Paia, ia tagai i le faatomuaga ma le ata o loo i le itulau e 264 i le Taiala i Tusitusiga Paia.

Faafanua ma Faasinoupu o Nofoga-Igoa. O le vaega o faafanua e amataina i le itulau e 292 o le Taiala i Tusitusiga Paia. Faasino tamaiti o le vasega i le parakalafa mulimuli i le faatomuaga o le vaega lena mo se faamalamalama puupuu i le auala e faaaoga ai le faasinoupu o nofoaga-igoa. O loo lisiina mai e le faasinoupu ia igoa o nofoaga o loo i faafanua i le alafapeta. Tuu atu i tamaiti o le vasega latou te sailia mai ia aai po o laueleele eseese i luga o faafanua. Faasino i le faafanua 10 ma tuu atu ia i latou e fuafuaina po o le a le mamao mai le faatoaga a le aiga o Samita i Manchester, Niu Ioka i Katelani, Ohaio.

Mo nisi faamatalaga i le auala e faaaoga ai ia faafanua ma le faasinoupu o nofoaga-igoa, ia tagai i le faatomuaga o loo i le itulau e 292 i le Taiala i Tusitusiga Paia.

Ata o Nofoga Faatusipaia. O le vaega lena, e amataina i le itulau e 309 i le Taiala i Tusitusiga Paia, e aofia ai ata o nofoaga mai le talafaasolopito o le Ekalesia anamua ma ona po nei. O loo aofia ai foi i le vaega i luma ia faamatalaga ma mau e faatatau i ia nofoaga.

Tuu atu i tamaiti o le vasega e vaavaai i ata eseese latou te le masani ai ma fuafuaina ai po o a mea o loo faaali mai i ata taitasi. Fai atu ia i latou e saili se ata o le Malumalu o Herota (nu. 4). Faasino i latou i le vaega o loo maua ai le faamatalaga (i. 310) ma fai atu ia i latou e ta’u mai ni mea taua se tolu na tutupu ai iina.

Mo nisi faamatalaga i le auala e faaaoga ai ia ata o nofoaga faatusipaia, ia tagai i le parakalafa tomua o loo i le itulau e 309 i le Taiala i Tusitusiga Paia.

Fesoasoaniga mo le Suesueina o Tusitusiga Paia. O le faaaogaina o fesoasoaniga mo suesuega e mafai ona fesoasoani e faalauteleina ai lo tatou malamalama i tusitusiga paia. (5–10 minute)

Ia fetufaai atu le tala lena mai ia Elder Richard G. Scott, a o avea ma se tasi o le Au Fitugafulu. O lea tala, o loo ia faatatau ai i fesoasoaniga mo suesuega na muai saunia mo le lomiga faaPeretania o tusitusiga paia i le 1979 ma le 1981, lea o loo faavae i ai ia fesoasoaniga i lomiga aupito lata mai.

“Ou te manatuaina ina ua faatoa faailoa atu ia tusi tuu faatasi e tolu i le Usoga. O Elder McConkie na faailoaina atu. Na ia uuina i luga se tusi ma faitau atu mai se itulau, ‘Mo Bruce R. McConkie.’ Sa sainia e ‘Amelia’ [lona faletua i le lumanai] ma na tusia i le aso na ulufale ai i le misiona. Na ia saunoa faapea, ‘sa ou tauaveina nei tusitusiga paia i le lalolagi atoa. Ua ou faaaogaina soo. Ua faapipiina faatolu. e mafai ona ou ta’uina atu ia te outou ia le itulau mo le tele o mau o loo i totonu o lena tusi.’ Ona ia faaopoopo mai ai lea faapea, ‘Ae o le a ou le toe faaaogaina lava lena tusi. E le o maua ai ia fesoasoaniga sili mo aoaoga ma meafaigaluega malolosi e faalauteleina ai le suesuega ma le malamalama e pei ona i ai i totonu o lena voluma fou.’ Sa ou matuai faagaetia lava i ai. O le aso na sosoo ai na ou alu atu ai i totonu o lona ofisa. E lapoa lana kesi, ma o loo ia nofo mai ai iina, ma le tusi i lona lima, ma se vase ma se penitala mūmū o loo faailogaina ai le lomiga fou o tusitusiga paia. O lea la, afai e i ai se tasi na te iloaina lelei ia tusitusiga paia e pei ona ia iloaina ai o le a mauaina le aoga o le faaaogaina o le lomiga fou, o lea na ou fuafua ai loa o le a ou faia foi faapea” (“Spiritual Communication,” in *Principles of the Gospel in Practice*, Sperry Symposium 1985 [1985], 18–19).

Fesoasoaniga mo le Suesueina o Tusitusiga Paia. Fesoasoani i tamaiti o le vasega ina ia faaaogaina mea na latou aoaoina e uiga i fesoasoaniga mo le suesueina o tusitusiga paia. (30–35 minute)

A maea ona e aoaoina ia tamaiti o le vasega e uiga i fesoasoaniga mo le suesueina o tusitusiga paia, ona fai atu lea ia i latou e faaaoga e faamaea ai le suega lena e avea o se iloiloga o mea na latou aoaoina. Atonu e te mana'o latou te galulue i ni vaega.

1. Tali fesili nei e uiga i le papatisoga:
 - a. O le a le uiga o le upu *papatisoga*?
 - e. O a ni faamaoniga o loo i ai iina e iloa ai na faia papatisoga ae le'i oo i le taimi o Keriso?
 - i. Aisea na papatisoia ai Iesu?
 - o. Aisea e taua ai le papatisoga?
2. Ia lisi mai ni mau se tolu mo autu taitasi uma nei:
 - a. Aso mulimuli
 - e. Meaalofa a le Agaga
 - i. Valoaga
 - o. Faaaliga
3. Faitau e uiga i le miti a Liae i le laau o le ola o loo i le 1 Nifae 8 ma, ia faaaoga ia mau o loo i le faamatalaga pito i lalo e iloa ai po o le a le uiga o faailoga taitasi:
 - a. Vaitafe
 - e. Ai uamea
 - i. Pua'o o le pogisa
 - o. Fale tele ma le vateatea
4. Faitau le Iakopo 1:8 ma, ia faaaoga mau o loo i le faamatalaga pito i lalo *i*, e faamatala mai ai le uiga o le “tauave lona satauro.”
5. Ia saili tagata nei ma ta’u mai po o gafea o loo ta’ua mai ai i latou i tusitusiga paia:
 - a. Edward Partridge
 - e. Iesepela
6. O a setete, teritori, ma atunuu na faimalaga atu i ai le Au Paia i le taimi o a latou faigamalaga mai Niu Ioka e agai atu i Sate Leki?

Faatomuaga

I le 1993 na faamatala atu ai e Elder Boyd K. Packer i faiaoga o le Ofisa o Aoga a le Ekalesia e faapea, faatasi ai ma se aotelega puupuu o le mataupu e ao ona susesueina, e tatau ona latou tuuina atu se vaaiga lautele i le ata o le faaolataga i le amataga o tausaga uma taitasi faaleaoaoga. O fautuaga nei mo le aoao atu e faatatau soo i ai le saunoaga a Elder Packer, o loo aofia ai ni vaega, faatasi ai ma isi fesoasoaniga, i le faaopoopoga. Faamolemole ia tagatagai i ai ao e sauni e aoao atu le ata o le faaolataga i au tamaiti o le vasega. (Tagai “O le Ala Sili o le Fiafia,” i. 274–77.)

Susesue ma le agaga tatalo le “O le Ala Sili o le Fiafia” ma mafau i mataupu faavae nei ae le'i sauniaina au lesona.

O Nisi Mataupu Faavae Tava o le Talalelei e Saili Iai

- O le Tama Faalelagi o se Tama faamamaluina, atoatoa, ma faasesilitilaina, o lē o loo i ai le fiafia uma (tagai Mosaea 4:9; 3 Nifae 28:10).
- Sa tatou nonofo faatasi ma le Tama Faalelagi ae tatou te le'i o mai i le lalolagi. O i tatou o Ana fanau agaga ma e finagalo o Ia ina ia tatou maua le olioli o loo ia te Ia ma ia avea i tatou e faapei o Ia (tagai Ieremia 1:5; Eperu 12:9).
- Ina ia avea faapei o le Atua, e tatau ona i ai ni o tatou tino toetutu, ma faamamaluina ma e tatau ona tatou alualu i luma i le umiaina o uiga faaleatua (tagai Alema 11:43–44; 3 Nifae 27:27; MFF 130:22).
- O o tatou tino faaletino i le lalolagi ua fuafuaina ina ia fesoasoani ia i tatou ia maua ai uiga faaleatua. Ua tuuina mai ai ia i tatou le avanoa e maua ai se tino faaletino ma aoao ai i les-ona o le aigaatua e ala lea i le mauaina o le saolotoga e filifili ai e mulimuli i fautuaga a le Atua po o faaososoga a Satani (tagai Kenese 2:16–17; 2 Nifae 2:25–27; Alema 34:32–34).
- O le Fofoaoina o le lalolagi ma le Pa'u o Atamu na maua ai tulaga talafeagai o le faaletino, e aofia ai le oti faaletino ma le faaleagaga ma se lalolagi o le a i ai le galue malosi, tiga, ma le faanoanoa (tagai Kenese 2:17; 3:6–7; 2 Nifae 2:15–25).
- O le Togiola a Iesu Keriso na saunia ai le Toetutu ina ia maua e tagata uma se tino faaletino e ola pea (tagai Iopu 19:25–27; Esekielu 37:12–14; Alema 11:42–45; 42:23).
- O le Togiola foi e mafai ai ona faamamaina i tatou mai a tatou agasala e ala i lo tatou salamo ma mafai ai ona tatou maua le ola e faavavau ma avea ai e pei o le Atua (tagai Isaia 1:18; 2 Nifae 10:24–25; Mosaea 3:19; Moronae 10:32–33).
- I tisipenisione uma lava, na auina mai ai e Iesu Keriso ia perofeta e aoao atu Lana talalelei i fanau a le Atua i le lalolagi. Ua faavaeina le Ekalesia a Iesu Keriso i nei aso e gata ai ina ia valaau atu i tagata uma e omai ia Keriso ma tofo i Lana ala o le fiafia (tagai Amosa 3:7; Alema 12:32–34; MFF 1:1–14).

Risasi Faaopoopo

- “O le Ala Sili o le Fiafia,” 274–77.

Fautuaga mo le Aoao Atu

Filifili mai manatu nei, pe faaoga nisi o ou manatu, a o e sauni e te aoaoina atu se vaaiga lautele i le ata o le faaolataga.

Faaaliga: O fautuaga e fa mo le aoaoina atu o le vaaiga lautele i le ata o le faaolataga o le a tutusa uma mo vasega uma e fa o tusitusiga paia. Ua fautuaina ina ia ese se fautuaga e te filifilia i tausaga taitasi.



Vaaiga Lautele i le Ata o le Faaolataga: Fautuaga 1. (90–120 minute)

Fesoasoani i tamaiti o le vasega ina ia vaai faalemafaufau i le ata o le faaolataga (le ala o le fiafia) e ala lea i le tosoina o se manoa mai le isi puipui o le potu aoga i le isi puipui. Faatautau ai se kilipa pepa i luga o le manoa ina ia faigofie ona feseeta'i i luga o le manoa. Ia saunia ni faatagata se lua e tutusa lelei, o le isi e fai mai se palasitika ae o le isi e fai mai se pepa pa'epa'e, lea e mafai ona faapipii i le kilipa pepa.

Ta'u atu i tamaiti o le vasega o le manoa o le faatusa lea o le laina o o tatou olaga ma o le isi pito o le manoa e faatusa i ai lo tatou taimi ua tuanai ae o le isi pito e faatusa i ai lo tatou lumanai. O le faatagata palasitika o le faatusa lea o o tatou tino agaga, ae o le ata pepa pa'epa'e e faatusa i ai lo tatou tino faaletino. Faasolo le kilipa i luga o le manoa ma faapipii i ai ia faatagata a o e talanoaina lo tatou alualu i luma mai le muai olaga e oo mai i lo tatou olaga i le lumanai. Afai e te talanoaina le oti, ona tuuese lea o le kilipa pepa faatasi ma le faatagata palasitika mai le ata pepa pa'epa'e. Ia tuuina atu fesili e pei ona lisiina atu i vaega nei a o e aoaoina atu le ala o le fiafia, ma faaoga ia faamatalaga o loo i le vaega faaopoopo e pei ona manaomia ai. E sili ona tuu atu i tamaiti e sailia ni tali se tele latou te mafaia e ala lea i le tuu atu ia i latou e sailia ia mau fautuaina mai tusitusiga paia.

Mua'i olaga

- O fea e amata ma muta ai le laina o le olaga? (tagai MFF 93:29; Aperaamo 3:18; “Fofoaga Faaleagaga,” i. 275). Ia faamalalama atu faapea o le laina o o tatou olaga e tau atu i talaatu o puipui o le potu ma faaauu pea e faavavau i itu uma e lua. O o tatou olaga e le'i i ai se amataga, ma o le a leai foi se iuga.
- O le a se mea e te iloa e uiga i lou Tama o i le Lagi ma lou olaga faatasi ma Ia ae te le'i fanau mai i le lalolagi? (tagai “Mua'i Olaga,” i. 275).
- O le a le uiga o le avea ma se atalii/afafine agaga o le Atua? (tagai “Mua'i Olaga,” i. 275; “Fofoaga Faaleagaga,” i. 275). Faatautau le faatagata palasitika i luga o le kilipa pepa e faatitai atu ai le laasaga lenei.

- Talu ai ona sa tatou nonofo faatasi ma le Tama Faalelagi i le muai olaga ma sa tatou ola pea foi, aisea na tatou le nonofo ai pea iina? (tagai “Filifiliga,” “O le Fono Tele ma le Taua i le Lagi,” i. 275).
- O le a se mea ua tatou iloa e uiga i le eseese o le fuafuaga a le Tama Faalelagi ma le fuafuaga a Lusifelo? (tagai Mose 4:1–4; “O le Fono Tele ma le Taua i le Lagi,” i. 275).
- O le a sou manatu aisea na matuai faatauaina ai e le Alii le saolotoga e filifili ai (filifiliga) lea na Ia faatagaina ai foi ia Lusifelo ma ana ‘au e tete e ma amataina se taua i le lagi? (tagai “Filifiliga,” i. 275).

Olaga faaletino

- Talu ai ona o le a lafoina lava i fafo ia Satani i le pogisa, aisea na faatagaina ai o ia ma ana ‘au e le Atua ina ia o mai i le lalolagi ma faasoosoa ia i tatou? (tagai MFF 29:39).
- Aisea e talafeagai ai mo i tatou le o mai i se lalolagi faaletino ma mauaina se tino faaletino? (tagai MFF 93:33–34; Mose 1:39; “O le Fono Tele ma le Taua i le Lagi,” “Fofoaga Faaletino,” i. 276).
- O a taunuuga o le solitulafono a Atamu ma Eva? Aisea na talafeagai ai le Pa’u o Atamu ma Eva? (tagai 2 Nifae 2:19–25; “O le Pa’u ma le Olaga Faaletino,” i. 275).
- Aisea na filifilia ai se Togisala e oo lava foi i le muai olaga? O le a se mea e tupu pe ana leai se Togisala? (tagai 2 Nifae 9:7–10; “O le Fono Tele ma le Taua i le Lagi,” i. 275; “O le Togiola,” i. 277).
- Aisea na manaomia ai ona sau ia Ieova (Iesu Keriso) i le lalolagi ma Ia mauaina se tino faaletino? (tagai “O le Togiola,” i. 277).
- Talu ai ona tatou te faafeagai ma le tele o faasoosoga i le lalolagi i aso nei, o le a se mea e mafai ona tatou faia i le galulue faatasi ai lea ma le Alii ina ia suia o tatou natura ma tete atu i le tiapolo? (tagai 1 Nifae 2:16; Mosaea 3:19; 4:1–3; 5:1–2; Eteru 12:27).

O le olaga i tua atu o le olaga faaletino

- O le a le eseese o le va o le oti faaletino ma le oti faaleagaga? E faapefea ona laveaiina i tatou mai oti uma na e lua? O le a la tatou vaega i le faatoilaloina o le oti faaleagaga? (tagai 2 Nifae 9:6–23; Alema 40:11–14; MFF 29:40–44; “O le Misiona a le Ekalesia ma Mataupu Faavae ma Sauniga o le Talalelei,” “O le Togiola,” i. 277; “O le Lalolagi o Agaga,” i. 277).
- O fea tatou te o i ai pe a tatou oti? O a galuega taua ia tatou te iloa o loo faia i le lalolagi o agaga? (tagai Alema 40:11–14; MFF 138:11–37; “O le Lalolagi o Agaga,” i. 277).
- O ai le Faamasino silisili? O afea o le a faamasinoina ai i tatou? Pe sili atu ea ma le tasi le faamasinoga? (tagai “Faamasinoga,” i. 277).
- O a mea o le a faamasinoina ai i tatou? O le a le maualuga o le tulaga o le a faamasinoina ai i tatou? (tagai Mosaea 2:36–41; Alema 41:3–7; MFF 82:3; “Faamasinoga,” i. 277).

- O a ni tulaga lelei o loo avanoa mo i latou o ē le faalogo i le talalelei i lenei olaga? (tagai MFF 138:1–37; “Faamasinoga,” i. 277).
- O le a faape’i i tatou pe a tatou toetutu? (tagai Alema 11:42–45; “Faamasinoga,” “Toetutu,” i. 277).
- O le a lo tatou taunuuga silisili ae o le a foi le mea e mafai ona tatou oo i ai pe a tatou mulimuli i le “ala sili o le fiafia”? (tagai MFF 76:50–70).
- Aisea na le mafai ai e lo tatou Tama o i le Lagi ona tuuina mai ia i tatou ia uiga faaleatua e aunoa ma lo tatou oo mai i lenei olaga faletino? (tagai Alema 34:32–34).

Mafaufau i le faataatia ese o le manoa mo sina taimi ma toe faatatau i ai pe a manaomia ina ia fesoasoani ai i tamaiti e vaai pe faapefea ona fetauai mea o loo latou aoaina i le fuafuaga.


Fesili atu i tamaiti pe faapefea ona fesoasoani se malamalama i le fuafuaga ia i latou i le mafuaaga ua poloaiina ai e le Alii nisi mea ae faasaina nisi mea. Filifili se poloaiga o loo foliga mai e faafaigata ona ola ai nisi o tagata i lo outou eria (atonu o le faamaoni, ola mama, tausia o le Sapati) ma fesili atu i tamaiti o le vasega pe aisea e aoga ai le tausia o lena poloaiga ina ua e malamalama i le ala o le fiafia.

Ia fetufaa atu lau molimau i le matagofie o le fuafuaga ma le taua o le manatuaina pe aisea ua tatou i ai iinei ma le mea ua faia e le Alii ina ia fesoasoani ai ia i tatou ia tatou toe foi atu ia te Ia.



Vaaiiga Lautele i le Ata o le Faaolataga: Fautuaga 2. (90–100 minute)

O se ata, e pei o le ata lenei, e mafai ona faaogaina e aoao atu ai le ata o le faaolataga. O lenei auale e lelei mo le aoao atu o le fuafuaga i le vaai i ai ae le aoaina ai le faasologa e pei ona i ai i le fautuaga 1.




Ia tuuina atu ni fesili e pei o fesili na o loo lisiina atu i le fautuaga 1 a o e tusia le ata i luga o le laupapa (e mafai foi ona e faaogaina se pepa e tufaina atu) ma talanoaina ia elemene o le ata o le faaolataga. Tusi na o faamatatao ina ia fesoasoani

e faailoa ai lo tatou alualu i luma i laasaga uma o loo tatou ai, e tusa ai ma le fuafuaga. Pe a talafeagai ai, ia tuu atu i tamaiti o le vasega e sailia tali i fesili e ala lea i le sailia o mau fautuaina. ia fuafua e faaali atu le siata i totonu o le potuoaiga ina ia mafai ona e faasino i ai i le gasologa o le tausaga atoa.



Vaaiaga Lautele i le Ata o le Faaolataga: Fautuaga 3. (60–70 minute)

O se auala faigofie ma aoga e iloiloaina ai le ata o le faaolataga lea e faamamafaina ai le taua o le olaga faaletino o le faaaogaina lea o se ata o se auala laupapa. Tusi le ata lenei i luga o le laupapa po o se pepa lautelē. Aua ne'i tusia ai ia igoa i le taimi muamua ae tusi i ai pe a iloa e tamaiti ia elemene o le fuafuaga a o outou susesueina faatasi ia tusitusiga paia.



Faaali atu i tamaiti le auala laupapa ma fesili atu: O le a se faamoemoega e mafai e se auala laupapa ona faia lea e le mafaia e se auala ona faia na o ia? (E fesoasoani ia te oe e sopoia ai se tafa po o se va.) Faitau faatasi ma au tamaiti o le vasega le Aperamo 3:22 ma fesoasoani ia i latou ia malamalama i le mea sa tatou i ai muamua ae tatou te le'i o mai i le lalolagi. Ona faitau lea o le Mose 1:39 ina ia fesoasoani ia i latou ia malamalama i le mea o loo tau saili le Tama Faalelagi e faataunuaina, ma le mea o loo Ia finagalo e ave tatou i ai. (O le tino ola pea o lona uiga o le ola e faavavau o ni tagata toetutu; o le ola e faavavavau o lona uiga o le faatasi lea ma le Atua ma avea faapei o Ia; tagai “Muai Olaga,” i. 275; “Fofoaga Faaleagaga,” “Filifiliga,” i. 275.) Tusi le *Tagata Uma* i le vaega pito i lalo o le auala laupapa faapea ma le *ola e faavavavau*, ma lona faauigaina, i le isi itu.

Ia tuuina atu fesili nei:

- Aisea na uunaia ai i tatou ina ia tatou tuua le muai olaga ae o mai i lenei lalolagi?
- O le a le “va” po o le “tafa” (o le a le eseese) sa i ai i le va o le Tama Faalelagi ma i tatou lava a o tatou ola faatasi ma Ia i le avea ai ma Ana fanau agaga?

Fesoasoani i tamaiti o le vasega ina ia latou iloina e ui lava sa tatou ola faatasi ma le Tama faalelagi ma avea ma Ana fanau, e tele lava ni auala sa le'i avea ai i tatou e faapei o Ia (tagai 3 Nifae 12:48; MFF 76:70; 88:41; 130:22; “Muai Olaga,” i. 275).

Ta'u atu i tamaiti o le vasega o poutu o loo lagolagoina ai le auala laupapa o le faatusa lea o mea ua faataunuaina e le Tama Faalelagi ina ia fesoasoani ai ia i tatou ia avea faapei o Ia, ae o laau faalava o loo i luga a'e o poutu o le faatusa ia o mea e ao ona tatou faia. Tuu atu i au tamaiti o le vasega e faitauina le Aperamo 3:24–27 e saili ai po o le a le mea na faia e le Tama Faalelagi mo i tatou; ona talanoaina lea pe aisea e moomia ai lena mea (tagai “Filifiliga,” “O le Fono Tele ma le Taua i le Lagi,” “Fofoaga Faaletino,” i. 276). Tusi le *O le Foafoaga* i luga o le potu muamua.

Fesili atu i tamaiti o le vasega:

- O le a so outou manatu o le a le mea e faatusa i ai le poutu lona lua?
- Ina ua mavae le fofoaina faaletino o le lalolagi, o le a le vaega na faataunuaina e Atamu ma Eva ina ia saunia ai le ala mo i tatou ina ia avea faapei o le Tama Faalelagi? (tagai 2 Nifae 2:22–25; “O le Pa'u ma le Olaga Faaletino,” i. 276).

Tusi le *O le Pa'u* i luga o le poutu lona lua ma talanoaina faapuupu pe na faapefea ona aumaia e le Pa'u le faafeagai, agasala, ma le oti i le lalolagi.

Fesili atu i tamaiti o le vasega: O le a le mea semanu e tupu ia i tatou i le faaletino ma le faaleagaga pe ana faapea e tumau ai pea mea uma i le tulaga pa'u? Faitau le 2 Nifae 9:6–10 ma talanoaina po o le a le mea na faia e le Atua ina ia fesoasoani ai ia i tatou e faatoiloina ia aafiaga o le Pa'u (tagai “O le Togiola,” i. 277). Fesili atu i tamaiti o le vasega po o le a le mea e faatusa i ai le poutu lona tolu ma faaigoa loa *O le Togiola a Iesu Keriso*. Fesili atu:

- Aisea na mafai ai e Iesu Keriso ona folafola mai e togiolaina i tatou mai a tatou agasala?
- O a tulaga e mafai ai ona faamagaloina i tatou mai a tatou agasala ma faataunuaina le fuafuaga o le togiola i o tatou olaga? (tagai Alema 42:9–15).

Tuu atu i tamaiti o le vasega e faitauina le Helamana 14:15–17 e saili ai ia faamanuiaga o le Togiola ia ua tuuina mai i tagata uma e tusa lava po o le a le ituaiga olaga e ola ai. (O le Toetu ma le toe aumaia i le afioaga o le Atua mo le faamasinoga.) E i ai isi faamanuiaga lea e tuuina atu na o i latou o ē e sailia ma le faamaoni ma ola ai i Lana talalelei. Tuu atu i tamaiti o le vasega e faitauina le Mataupu Faavae o le Faatuatua 1:3–4 ma lisi ia mea muamua na e moomia e le Atua ina ia tatou faia ia faamagaloina ai a tatou lava agasala ma ia faaatoatoaina ai (tagai foi “O le Misiona a le Ekalesia ma Mataupu Faavae ma Sauniga o le Talalelei,” i. 276).


Faaua le faaigoaina o le auala laupapa e pei ona i ai i le ata ma fesili atu i tamaiti pe faapefea ona fesoasoani lo latou malamalama i le ata o le faaolataga ia malamalama ai i le mafuaaga ua poloaiina ai i tatou e faia nisi mea ae faasaina ona faia nisi mea. Filifili ni poloaiga atonu o loo tauivi ai nisi talavou i lo outou eria ma talanoaina po o le a le mea o loo aaoaina mai e le fuafuaga i le mafuaaga na tuuina mai ai e le Atua na poloaiga.

Faitau atu i au tamaiti o le vasega le saunoaga a Elder Boyd K. Packer e uiga i le “Faamasinoga” (i. 277) ma fetuafaai atu

lau molimau i le “ala sili o le fiafia” ua saunia e le Tama Faalelagi mo Ana fanau.



Vaaiaga Lautele i le Ata o le Faaolataga:
Fautuaga 4. (40–45 minute)



Ia saunia le ata lenei e avea ma se pepa e tufatufaina atu mo tamaiti o le vasega taitoatasi pe faia ai foi se pepa mo le masini malamalama. Ia iloilo ina faatasi ma tamaiti faapea sa tatou ola muamua i le afioaga o le Atua (tagai “Muai Olaga,” i. 275) ma tulaga na tatou oo mai ai i lo tatou tulaga pa’u (tagai “O le Pa’u ma le Olaga Faaletino,” i. 276).

Fesili atu i tamaiti o le vasega:

- O fea e tau atu i ai le ala sa’o ma le vaapiapi?
- O le a le mea ua tuuina mai e lo tatou Tama Faalelagi ina ia fesoasoani ai ia i tatou ia tutumau i le ala?

Ia valaaulia se tamaitiiti o le vasega e faitauina le saunoaga lenei mai ia Elder Orson F. Whitney, o le a avea ma sui o le Korama a le Toasefululua, ina ia fesoasoani ia i latou ia malamalama i le taua o lo tatou tulaga pa’u ma le auala e tasi e mafai ona tatou saoloto mai ai:

“Ina ua pa’u Atamu, sa pei lava ua pa’uu atu uma le aiga tagata i se lua, lea sa latou le toe maua ai se malosi, i soo sa latou mea e fai, pe atiae; sa leai se auala e mafai ai ona fea’ei mai ai i fafo, ma e leiloa foi pe faapefea ona fea’ei. Ae o se Uo, e tumu i le faautauta ma le mana uma, sa tu o ia i augutu o le lua . . . ma folafola atu e laveaiina i latou mai se tulaga lē fiafia. Na Ia avea lona lava soifua e fai ma apefa’i; na tuuina ifo i lalo i totonu o le lua ma faapea atu: ‘A’e mai loa!’ O i latou o ē e fea’ei mai, o le a o ese mai le lua. O i latou o ē e mumusu e fea’ei, e tumau ai pea i totonu o le lua—ma o le a tuuaia ai lava i latou?” (i le Conference Report, Oke. 1927, 149).

Tuu atu i tamaiti o le vasega, taitoatasi pe fai vaega, e suesueina ia fesili nei e fesoasoani ai ia i latou ia sailia pe na faapefea ona saunia e le Togiola a Iesu Keriso ma mataupu faavae ma sauniga o le talalelei le auala mo i tatou ina ia faatoilaloina ai lo tatou tulaga pa’u:

- O le a le ala lea e taitaiesaina mai ai i tatou mai lo tatou tulaga pa’u? O a laasaga muamua e tatau ona tatou uia ina ia tatou ui ai i lena ala? (tagai 2 Nifae 31:17–19; “O le Misiona a le Ekalesia ma Mataupu Faavae ma Sauniga o le Talalelei,” i. 276).
- O a nisi o auala ua fesoasoani mai ai le meaalofa o le Agaga Paia ia i tatou ina ia faatoilaloina lo tatou tulaga pa’u ma tulei ai agai i luma i le ala? (tagai Ioane 14:26; 15:26; 16:13; 3 Nifae 27:20; MFF 45:56–57).
- O ai na saunia ma faasinoina mai lenei ala mo i tatou? O le a le mea e tatau ona tatou faia ina ia tatou tutumau ai i luga? (tagai 2 Nifae 31:19–21; “O le Togiola,” i. 276).
- I le faaopoopo atu i le feagaiga o le papatisoga, o a isi sauniga ma feagaiga ua tuuina mai e le Tama Faalelagi ia i tatou e fesoasoani ai ina ia tatou faatoilaloina lo tatou tulaga pa’u? (tagai MFF 84:33–40; 131:1–4).
- O le a faape’i le tulaga o le a i ai pe a tatou toe foi atu e mau faatasi ma lo tatou Tama Faalelagi pe afai sa tatou faamaoni i le osia ma le tausia o a tatou feagaiga paia? (tagai 1 Ioane 3:1–4; Moronae 7:48).
- E faapefea ona fesoasoani se malamalamaaga i le ata o le faaolataga ina ia tatou malamalama ai i le mafuaaga ua poloaiina ai i tatou ina ia tatalo? ia papatisoina? ia faamaoni? ia ola mama?
- E faapefea ona fesoasoani se malamalamaaga i le ata o le faaolataga ina ia tatou malamalama ai i le mafuaaga ua poloaiina ai i tatou ina ia saoloto mai mea ua fai ma o tatou mausa? ia totogi le sefuluai? ia auuina atu faamisiona? ia auai i le malumalu?

A maea ia galuega a tamaiti o le vasega, ona valaaulia lea o i latou e fetufaai atu mea na latou aoaoina i le vasega. Ia fetufaai atu lau molimau i le uiga o le ata o le faaolataga ia te oe. Ia uunaia tamaiti o le vasega ina ia mafafafau loloto e uiga i le ata o le faaolataga ma fuafuaina pe mafai faapefea e se malamalama i ai ona fesoasoani ia i latou ia ola ai i le talalelei i o latou olaga i aso taitasi. Ia faaiu i le faitauina atu o le saunoaga lenei mai ia Peresitene Hugh B. Brown, o lē sa avea ma se tasi o le Au Peresitene Sili:

“Ua aoaoina e taitai o le Ekalesia, mai le amataga, le faatuatua ia Iesu Keriso, ma ia tatou faailoa atu o ia o lo tatou Faaola ma le Togiola. O lo tatou tiute le aoaoina atu o lenei mea i a tatou fanau . . . ma, talu ai ona o i latou o fanau a le Atua, [ia] aoaoina i latou ia faamaoni i le agaga e paia o loo i totonu ia i latou” (i le Conference Report, Set.–Oke. 1966, 104).

Faatomuaga

I le va o Malaki ma Mataio, e fa selau tausaga ua mavae i le Nuu Paia e le o i ai sa tatou faamaumauga faaperofeta. O le tele o mea na tutupu i lenei vaitaimi lea e aafia ai lo tatou malamalama i le Feagaiga Fou, o lea e taua ai le faamasani ia tau na o mea taua na tutupu i lenei vaitaimi i le va o le Feagaiga Tuai ma le Feagaiga Fou. Ina ua mavae le tafeaga i Papelonia, sa faapea ona pulea ia Sa Iutā e Peresia, o Eleni, o Aikupito, o Suria, ma Roma, faatasi ai ma se vaitaimi puupuu o le puleaina i lalo o Hasimoneana. O le Feagaiga Tuai na faaliliuina i se lomiga faaEleni na ta’ua o le Septuagint, o se lomiga lea e masani ona siitiaina mai i le Feagaiga Fou. E le gata foi i lea, o le vaitau lenei na vaaia ai foi le tulai mai o Faresaio ma Satukaio faapea ma le faateleina o le aafiaga o le au tusiupu.

Suesue ma le agaga tatalo le “O le Vaitaimi i le Va o le Feagaiga Tuai ma le Feagaiga Fou” (i. 278–80) ma mafaufau i mataupu faavae nei ae le’i sauniaina au lesona.

O Nisi Mataupu Faavae Taua o le Talalelei e Saili Iai

- O le iloaina o le talaaga o le vaitaimi i le va o le Feagaiga Tuai ma le Feagaiga Fou e fesoasoani lea ia i tatou ia malamalama atili ai i le Feagaiga Fou.
- E ui lava o loo toatele pea i latou o loo mananao i le oo mai o le Mesia i lenei vaitaimi, ae o le liliuese ma le lē malamalama na mafua ai ona “vaai atu ia le toatele o tagata Iutaia i faailoga” ma teenaina ia Iesu Keriso o le Mesia (tagai Mataio 16:13–16; Iakopo 4:14).
- E ui lava e toatele ia tagata Iutaia e matuai le fiafia lava i tagata Samaria ma Tagata o Nuu Ese, ae o le talalelei a Iesu Keriso e aumaia faatasi ai tagata uma o ni fanau a le Atua (tagai Galuega 10:34–35).
- E pei lava ona i ai i o tatou aso, sa tele foi ni tapuaiga faalelotu i le Nuu Paia i taimi o le Feagaiga Fou. Na aoaiina e Iesu le tele o nei vaega. Ae peitai, o nisi tagata lelei, sa faatasi ma i latou (tagai Ioane 3:1–12; 7:50–51; 19:38–40; Galuega 21:40–22:3; 23:6).

Risosi Faapoopo

- “O le Vaitaimi i le Va o le Feagaiga Tuai ma le Feagaiga Fou,” 278–80.

Fautuaga mo le Aoao Atu

Filifili mai manatu nei, pe faaoga nisi o ou manatu, a o e sauni e te aoaina atu le vaitaimi i le va o le Feagaiga Tuai ma le Feagaiga Fou.



Ata vitio 3 *O le Feagaiga Fou*, “Faatulagaina o le Feagaiga Fou” (12:15), e mafai ona faaaogaina i le aoaina atu o tulaga faalelotu ma faaupufai i le taimi o Keriso (tagai *Vitio Taiala o le Feagaiga Fou* mo fautuaga i le aoaina atu).

Vaitaimi i le Va o le Feagaiga Tuai ma le Feagaiga Fou. O le iloaina o le talaaga o le vaitaimi i le va o le Feagaiga Tuai ma le Feagaiga Fou e fesoasoani lea ia i tatou ia malamalama atili ai i le Feagaiga Fou. (30–40 minute)

O le piriota i le va o le Feagaiga Tuai ma le amataga o le Feagaiga Fou ua lauiloa o le “vaitaimi i le va o le Feagaiga Tuai ma le Feagaiga Fou.” O le gaoioga lenei ua fuafuaina e fesoasoani ai i tamaiti o le vasega ia malamalama i le taua o lenei vaitaimi i lo latou suesueina o le Feagaiga Fou. Vaevae le vasega i ni vaega laiti. Ia tuu atu i vaega taitasi se kopi o le siata lenei faatasi ai ma mea o loo i ai ua toe fetuunaia (o lea ua faasolo nei i le faasaologa o taimi). Tuu atu ia i latou e sueina ia mea taitasi i le Taiala i Tusitusiga Paia ma ia maua pe faamatala faapuupuu mai ai. (O upu o loo i ai faailoga o upusii o autu ia o upu o loo i le Taiala i Tusitusiga Paia.)

Mea ua Logologoa	Faamatalaga
Paseka	
“Malo o Roma”	
Herota le Sili (“Herota”)	
“Malumalu o Herota”	

Ia talanoaina mea taitasi ma le vasega ina ia fesoasoani ia i latou ia malamalama i le taua o le Feagaiga Fou. Faatasi ai ma le fesoasoani a tamaiti o le vasega, ia tusia ia mea taitasi i luga o le laupapa faatasi ai ma lona faatulagaga sa’o (ia faasino tamaiti o le vasega i le faasologa o mea na tutupu o loo i itulau 635–45 o a latou Taiala i Tusitusiga Paia).

Vaitaimi i le Va o le Feagaiga Tuai ma le Feagaiga Fou. E ui lava i le toatele o tagata Iutaia sa mananao i le afio mai o le Mesia, ae o le liliuese ma le lē malamalama na mafua ai ona “vaai atu isi i faailoga” ma teenaina ai ia Iesu Keriso (tagai Mataio 16:13–16; Iakopo 4:14). (30–40 minute)

Tuu atu i tamaiti o le vasega e faitauina le “Mesia” i le Taiala i Tusitusiga Paia ma fesili atu:

- O le a le uiga o le upu *Mesia*?
- O ai na vavalu e uiga i le Mesia? (tagai Iakopo 7:11).
- E faapefea ona toatele tagata Iutaia, o e sa faatalitali mo se taimi umi i le Mesia, ona le amanaiaina o ia ma teenaina o Ia ina ua ia afio mai? (tagai Iakopo 4:14–15).

Faitau atu le mea moni lava lenei na tupu pe fetufaai atu foi se mea faapea na e oo oe i ai:

“O le a le mafai lava ona galo ia te a’u le aso na faatoa ou fo’i mai ai mai la’u misiona. Ina ua ou malaga ese atu mo la’u misiona i Nouei sa faato’a vasega iva lo’u uso. Ina ua ou taunuu i le malae vaalele sa ou savali atu lava i ona luma. O le mea sa ou faamoemoe ou te vaai ai ia te ia e matuai ese lava mai le mea na ou vaai i ai ua ou matua’i leiloaina lava o ia.”

Ia faamalamalama atu faapea o lenei mea na tupu e fesoasoani ia i tatou ia malamalama ai i se vaega o le mafuaaga na leiloa ai e tagata Iutaia o Iesu o le Mesia. I auga senituri talu ona mavae atu le perofeta mulimuli na faamaumauina i le Feagaiga Tuai na faapea mai, “Ua fetalai mai ai Ieova” (Malaki 1:4).

Fesili atu i tamaiti o le vasega: O le a le tusi mulimuli o le Feagaiga Tuai? Ia valaaulia i latou e su’e po o le a le taimi na tusi ai e Malaki lana tusi e ala lea i le sailia o “Malaki” i le Taiala i Tusitusiga Paia (430 T.L.M.). O le a le mea na tupu i le taimi lenei ma le fanau mai o Iesu Keriso?

Fesoasoani i tamaiti o le vasega ina ia malamalama e le o ia i tatou se tusitusiga a se perofeta moni i le Nuu Paia i le va o le taimi o Malaki ma le vaitaimi o le Feagaiga Fou. O le toatele o tagata Iutaia latou te talitonu ma ola ai i lenei vaega o le talalelei o loo ia i latou, ae e tele ia aoaoga faavae moni na leiloloa pe na fenumiai ma mafaufauga o tagata. Tusi le vaega lenei i luga o le laupapa:

O Ni Malamalamaga Sese o Tagata Iutaia e Faatatau i le Mesia e Afio Mai

- Latou te manatu o le a avea o Ia ma se taitai’au malosi.
- Latou te manatu o Lona mua’i afio mai e mamalu.
- Latou te manatu o le a Ia faasaolotoina i latou mai o latou fili faalelalolagi.

Faitau faatasi ia mau nei ma au tamaiti o le vasega ina ia faaali mai ai pe na faapefea ona taliaina o Ia e isi o e sa tumau pea i le faaleaga e ui lava i le toatele o e sa teenaina ia Iesu o le Mesia.

- Ioane 1:10–12 (O le toatele o tagata latou te le’i taliaina ia Iesu o le Mesia.)
- Luka 2:25–38 (Na iloa e Simeona ma Ana, e ala i le mana o le Agaga Paia, o le pepe o Iesu o le Mesia.)
- Mataio 16:13–17 (E ala i le agaga o faaaliga, na iloa ai e Peteru po o ai ia Iesu.)

Faamatala atu i tamaiti o le vasega faapea a o latou faitauina le Feagaiga Fou i lenei tausaga o le a latou aoao ai i tagata lotomaulalo o e na taliaina ia Iesu e avea ma Mesia ma tagata o e na teenaina o Ia.

Vaitaimi i le Va o le Feagaiga Tuai ma le Feagaiga Fou. “E le faailogaina tagata e le Atua” (Galuega 10:34). (20–30 minute)

Tusi upu *Siamani, Mekisiko, Amerika, Sapani, Suria, Iraki*, ma le *Korea* i luga o le laupapa.

- O le fea o nei tagatanuu ua valaaulia e avea ma tagata o le Ekalesia a Iesu Keriso o le Au Paia o Aso e Gata Ai?
- E faapefea ona tuufaatasia e le talalelei ia tagatanuu uma, lanu, ituaiga, ma aganuu?

Faamatala atu i au tamaiti o le vasega ia le mea lenei, na toe faamatalaina e Elder James M. Paramore, o se sui o le Au Fitugafulu:

“Ou te manatuaina se tala na faamatalaina i le taimi o le Taa Lona Lua o le Lalolagi, ina ua manu’a se fitafita Siamani a le Au Paia o Aso e Gata Ai i se uafana a se tagata Amerika ma sa taoto ai ua matuai tigaina lava. Na ia ta’uina atu i lona taitai, ‘Faamolemole ave se fu’a pa’epa’e ma alu atu i le isi itu ma vaai ia i pe i ai se toaina Mamona e mafai ona faauuina a’u.’ E maue se talosaga tulaga ese i se taua a ni fili faaletino se lua. Ae i le vaai atu i le tulaga ua ia oo i ai, ma le naunau e faataunuuina se toe talosaga, sa aveina ai loa e le taitai le fu’a pa’epa’e, ma sopoia le laina a le fili, ma talosaga atu mo se toaina Mamona. Sa maua le toatasi, ma sa sopoia e ia ma le taitai Siamani le laina a le fili, ma faaee ona lima i luga o le ulu o lona uso, ma poloaiina i le suafa o Iesu Keriso ina ia ola pea o ia seia oo atu se fesoasoani. E i ai se lagona o le avea ma tagata auai lea e faataunuuina e le talalelei a Iesu Keriso—e muamua i lo tatou Tama o i le Lagi; ona sosoo ai lea ma o tatou aiga, lea e mafai ona avea ma se iunite e faavavau; ona sosoo ai lea ma tagata uma i luga o le fogaeleele” (i le Conference Report, Ape. 1983, 37; po o le *Liahona*, Iulai 1983, 28).

Tuu atu i tamaiti o le vasega e faitau le 2 Nifae 26:33, ma fesili atu:

- O ai ua valaaulia e omai ia Iesu Keriso?
- E mafai faapefea e le talalelei ona fesoasoani e soloia i lalo ia pa vaeloto o le feitaga’i ma le faailoga lanu?
- E mafai ona e mafaufau i faataitaiga mai tusitusiga paia o loo faaaliga mai ai le mafaia ona faatoilaloina o le feitaga’i ma le feeseesea’i i aganuu? (O se tasi faataitaiga o le misiona a atalii o Mosaea i tagata sa Lamanā; tagai Alema 17–24.)

Tuu atu i tamaiti e sue ia Samaria i luga o le faafanua 4 o le Taiala i Tusitusiga Paia. Tuu atu ia i latou e faitauina ia faamatalaga mo le upu “Samaria” ma le “Tagata Samaria” i totonu o le Taiala i Tusitusiga Paia. Fesili atu: Aisea na i ai pea se feeseeseaiga i le va o tagata Iutaia ma tagata Samaria?

Fai atu i tamaiti o le vasega e faitau ia fuaiupu nei ma faamatala mai pe faapefea ona latou faatatauina i le talanoaga:

- Luka 10:29–37 (I le faataoto o le Samaria agalelei, o se ositaulaga ma se sa Levī na savavali ane i tafatafa o se tagata na fasia ma faoina ana mea ma o lava, ae na tu se tagata Samaria ma fesoasoani atu i ai.)
- Ioane 4:3–10, 27 (Na talanoa Iesu i se tamaitai Samaria i le vaieli o Iakopo. Na taufaiifo ona soo ona ua Ia tautala atu ia te ia.)
- Galuega 1:8 (Na ta’u atu e Iesu i Ona soo faapea o le a latou talai atu le talalelei i Iutaia, i Samaria, ma “tuluiga uma o le lalolagi.”)

Fesoasoani i tamaiti o le vasega ina ia malamalama pe na faapefea ona saunia e Iesu Keriso le auala ma le faataitaiga e aveese ai le fevaevaeai i le va o tagata.

Vaitaimi i le Va o le Feagaiga Tuai ma le Feagaiga Fou. E pei ona i ai i o tatou taimi, sa tele ni ituaiga talitonuga faalelotu sa i ai i le Nuu Paia i le taimi o Iesu Keriso. (25–35 minute)

Fesili atu: Aisea ua tele ai ekalesia ma talitonuga faalelotu eseese i le lalolagi i aso nei? Ia faamalamalama atu o le tulaga foi lea sa i ai i tagata Iutaia i le taimi o Iesu Keriso.

Sa faatasi ai ma taitai Iutaia o e na tetee ia Iesu ia le au Faresaio, Satukaio, ma le au tusiupu. Ina ia fesoasoani i tamaiti o le vasega ia malamalama i le eseese o nei vaega, ia tufa atu i tamaiti o le vasega se kopi o le pepa leni e tufatufaina atu faatasi ai ma tali o loo avanoa. Tuu atu ia i latou e faaoga a latou Taiala i Tusitusiga Paia e saili ai le uiga o vaega taitasi. Ona latou tusia lea o le “S” mo Satukaio, “F” mo Faresaio, po o le “T” mo tusiupu i avanoa.

1. S Latou te faavaeina ia le vaega filifilia o tagata Iutaia.
2. T O loia nei a tagata Iutaia i aso anamua.
3. F O le uiga o le igoa “vavaeeseina.” Latou te tavavaeeseina i latou mai tapuaiga faalauaitete.
4. F Latou te tauaveina le pule o uputuu e tutusa lava ma tusitusiga paia.
5. S O le vaega leni e toaitiiti lona faitau aofai ae matuai malosi lava.
6. F O nei tagata latou te aloese mai le fesootai ma ni tagata o nuu ese.
7. T O i latou lava o ni faiaoga.
8. S O i latou nei e taofimau tele i le tusi o tulafono a Mose ae teena ia tu ma aganuu anamua.
9. F O le vaega leni e talitonu i le Toetu o le tino faapea foi ma agelu.
10. S Latou te le talitonu i le Toetu po o agelu foi.
11. S Latou te faapelepeleina le faasalalauina o le aganuu faaEleni i totonu o Isaraelu.
12. T O le vaega leni na faaliliuina auiliili le tulafono a Mose ma faaogaina i o latou taimi.

Ia talanoaina talitonuga faalelotu eseese a o outou talanoaina ia tali.

- O le a se lagona o Iesu Keriso e uiga i nei vaega? (tagai Mataio 3:7; 5:20; 16:6; 23:13–32).
- O le a se faataitaiga e mafai ona e mauaina o tagata o nei vaega o e sa lelei ma faamaoni? (o Paulo, Nikotemo, Iosefa le Arimataia, ma Kamalielu o ni Faresaio uma.)

Ia molimau atu e faapea foi le tulaga o loo i ai i o tatou aso.

O LE TALALELEI E TUSA MA LE FAAMATALAGA A MATAIO

Tusitala: O Mataio le atalii o Alefaio o nisi taimi sa valaau ai o ia i lona faaiu, o Levi (Mareko 2:14; Luka 5:27). Sa nofo o ia i Kapanaumi ma o se telona, po o le ao lafoga. O Mataio o se tasi o uluai Aposetolo e Toasefululua a le Alii ma o ia foi o se molimau vaaitino i le tele o mea sa ia faamatalaina (tagai Mataio 9:9). Sa matuai malamalama lelei Mataio i le Feagaiga Tuai ma o lea sa ia siitia mai ai le tele o faamatalaga mai le Feagaiga Tuai i totonu o lana Talalelei. I le avefa ai ma se ao lafoga, sa moomia ona ia fesoootai atu i tagata Iutaia ma Roma ma sa ia tautala ai i le gagana Aramaika ma le faaEleni. O se tasi faamaoniga o le tautala o Mataio i le faaEleni o lona faaogaina lea o igoa Eleni, e pei o Isaia (Mataio 12:17), Iona (Mataio 12:39–40), Elia (Mataio 17:3), ma “Iesu” mo Iesua, o le faaAramaika lea o le suafa o le Alii.

O e na tusi atu i ai: O le Talalelei a Mataio na faaautu lava agai i tagata Iutaia. Na talitonu Mataio ua masani ia lana au faitau i tu ma aganuu faalutaia. Sa ia siitia soo mai faamatalaga mai le Feagaiga Tuai i se taumafaiga ina ia fesoasoani ai i tagata Iutaia ia iloina le Mesia folafolaina. Na ia faamamafaina atu le gafa o le Faaola e tau ia Tavita ma faatulagaina ana tusitusiga ina ia mafai e tagata Iutaia ona latou vaaia se atagia o lo latou talafaasolopito i le soifuaga o Iesu Keriso.


Talaaga Faasolopito: I le taimi o mea na tutupu sa faamatalaina mai e Mataio, sa taumafai ai ia tagata Iutaia e sailia se saolotoga mai pulega a Roma. E toatele tagata Iutaia na latou iloina o Iesu o lo latou laveai lea seia oo ina ua latou iloina o le a Ia lē aveeseina i latou mai tagata Roma.

Uiga e le Masani Ai: Talu ai ona sa tusi atu ia Mataio i tagata Iutaia, sa masani ona ia tusia soo ia mea na tutupu ma mataupu faavae i lana molimau e avefa ma se talosaga ia i latou. Na ia tuuina atu se faamamafa faapitoa i valoaga o le Feagaiga Tuai e uiga i le Mesia lea na faataunuuna i le soifuaga o Iesu Keriso (tagai Taiala i Tusitusiga Paia). O nisi o nei valoaga e faapea o le a fanaua mai Keriso i se taupou (tagai Mataio 1:21–23; Isaia 7:14), e faapea o le a fanau mai o Ia i Peteleema (tagai Mataio 2:6; Mika 5:2), ma o le a sosola atu o Ia i Aikupito ma Lona aiga (tagai Mataio 2:15; Hosea 11:1). E na o Mataio le tusitala o Talalelei o loo aofia ai le asiasiga a makoi i le pepe o Keriso faapea ma le faailoga o le fetu i sasa'e (tagai Mataio 2:1–12), o le fasiotia o tamaiti i Peteleema (tagai Mataio 2:16), o nisi o faataoto a le Faaola (tagai Mataio 13:24–30, 36–52), o le faamaumauga aupito sili ona sa'o o le Lauga i luga o le Mauga (tagai Mataio 5–7), ma le mea moni “ua avanoa foi tuugamau, ua toe tutu mai foi tino o tagata paia e toatele na momoe, ina ua mavae lona toetu mai” (Mataio 27:52–53).

Autu: Na molimau Mataio faapea o Iesu o Nasareta o le Mesia lea na valoia i le Feagaiga Tuai (tagai Taiala i Tusitusiga Paia, “Mataio,”).

Mataio 1–2

O le Soifuaga o Iesu Keriso



Faatomuaga

O le Mataio mataupu 1–2 o loo tusia ai faamatalaga e uiga i le fanau mai ma le soifuaga o le Alii a o tamaitiiti. O tulaga e le masani ai na siomia ai Lona fanau mai o loo faaalai ai e ese ai lava o Ia mai isi tagata uma sa ola ai i le lalolagi. E toatele perofeta na latou faia vavega e pei foi o vavega na faia e le Faaola. Ae o le soifua mai o le Alii, o le Togiola, ma le toetu o mea ia na tutupu e matuai manino ai lava le molimau o Lona paia.

Suesue ma le agaga tatalo le Mataio 1–2 ma mafaufau i mataupu faavae nei ae le'i sauniaina au lesona.

O Nisi Mataupu Faavae Tava o le Talalelei e Saili Iai

- O Iesu Keriso o le alo paia o le Tama Faalelagi ma Maria (tagai Mataio 1:18–25; tagai foi Luka 1:32, 35; 1 Nifae 11:13–22; Mosaea 3:8; Alema 7:10).
- O le fanau mai, soifuaga, ma le misiona a Iesu Keriso na faataunuuna ai le tele o folafolaga na tuuina atu i perofeta anamua (tagai Mataio 1:21–23; 2:6, 15–18, 23; tagai foi Isaia 7:14; Ieremia 31:15; Hosea 11:1; Mika 5:2; 2 Nifae 10:3).
- O i latou o e e malamalama ma mulimuli i aoaoga a tusitusiga paia o le a saunia lelei i latou e fetai ai ma le Alii (tagai Mataio 2:1–11; tagai foi MFF 18:34–36).
- O le faamoemoega o le Alii e le mafai ona faafememeaiina pe taofia (tagai Mataio 2:13–21; tagai foi MFF 121:33).

Fautuaga mo le Aoao Atu

Filifili mai manatu nei, pe faaoga foi ni ou lava manatu, a o e saunia ia lesona mo le Mataio 1–2.

Mataio 1:1-17 (tagai foi Luka 3:23-38). O le iloaina o o tatou gafa ma le mea na tatou omai ai e taua tele. (10-15 minute)

Ia valaaulia ni nai tamaiti o le vasega e o mai i le laupapa ma ootoo mai o latou gafa. Ia vaai po o ai e mafai ona tele ni augatupulaga na te lisiina mai. Pe talosaga atu foi i ni nai tamaiti o le vasega e faamatala atu se mea uiga ese i se tasi o loo i le talafaasolopito o lo latou aiga. (Talu ai ona o lenei lesonea o le a faia i le amataga o le tausaga, afai e te le'i maua le avanoa e faailoa atu ai ia tagata o le vasega, atonu o se auala lelei lava lenei e faia ai. Ia valaaulia uma au tamaiti o le vasega e faamatala atu o latou igoa ma faamatala faapuupuupu atu se tasi o o latou augatuaa.) Faamatala atu se tala puupuupu mai lou lava talafaasolopito lea e faaaliga ai le matagofie e mafai ona oo i ai le sailia o talafaasolopito o aiga.

Ia faamalamalama atu na amataina e Mataio lana molimau e ala lea i le tusia i lalo o le gafa o Iesu Keriso. Fai atu i tamaiti o le vasega e faitau vave le Mataio 1:1-17 e saili ai ia igoa latou te iloaina i le gafa o le Faaola (mo se faataitaiga, Aperaaamo, Isaako, Iakopo, Ruta). Fesili atu:

- O ai na sailia i ai e Mataio le gafa o le Faaola?
- O ai tagata e toalua ia o loo i le gafa o le Faaola o loo taulai i ai ia Mataio?
- O a ituaiga taitai sa i ai ia Tavita ma Aperaaamo? (O se tasi na aveva ma se tupu, o le isi o se perofeta.)
- Aisea e taua ai le aveva o Iesu Keriso ma suli e le gata mai se taitai faalemalo ae o se taitai faalelotu o Isaraelu?

Fai atu i tamaiti o le vasega e faitau le Faaaliga 19:16 ma mafaufau pe faapefea ona mafai ona faatatauina ia igoa o loo faaaoaga i lenei fuaiupu e faamatalaina ai le Mesia e le gata o Ia o se taitai faalemalo ae o se taitai faalelotu.

Ua maua e tamaiti le fafine lea sa ta'ua i le Mataio 1:5 ma le Ruta 1:4.

- O fea le nuu e sau ai lenei augatuaa o Iesu?
- O le a lona atunuu?

Faamatala atu i tamaiti o le vasega faapea o Iesu Keriso e i ai ni ona augatuaa o e sa lototoa faapea ma isi na gauai atu i faaososoga. Ia mafaufau i le tuuina atu o fesili nei:

- O le a se taua o le fanau mai i totonu o se aiga ua augatupulaga o i ai i totonu o le Ekalesia?
- O a ni tulaga lelei o loo i ai iina i le i ai o ni augatuaa amiotonu?
- O a ni aafiaga o ni mea sese a o tatou augatuaa i lo tatou malosiaga e faia le mea sa'o?



Mataio 1:18-23. O Iesu Keriso o le alo paia o le Tama Faalelagi ma Maria. O Maria na ia maua mai ai Lona soifuaga faaletino, lea na faatagaina ai ona la maliu. Mai Lona Tama Faalelagi na maua mai ai le ola pea ma le mana e toetu ai. (10-15 minute)

Tusi ia fuaitau nei, e aunoa ma ni mau e faatatau i ai, i luga o le laupapa:

Anapogi mo aso e fasefulu (Esoto 34:28)
Faamaloloina e mama'i (2 Tupu 5:10-14)
Faateleina meaai (1 Tupu 17:10-16)
Savali i luga o le vai (Mataio 14:25-29)
Faatuina e ua oti (3 Nifae 19:4)
Sa faamuina ma fasiotia ona o le upumoni (Mosaea 17:13, 20)

Fai atu i tamaiti o le vasega po o le fea vavega o loo lisiina i luga o le laupapa e patino i le Faaola. Fesoasoani i tamaiti o le vasega e taliina le fesili mo mea taitasi e ala lea i le faaaliina atu ia i latou o se ata o se perofeta o loo faia lenei vavega po o le oo foi i lenei tulaga pe faitau atu i ai ia mau o loo tusia atu i luga.

Fesili atu: Afai na faia e isi nei foi vavega, na faapefea ona ese mai ai ia Iesu? Faitau le Mosaea 3:7 ma le Alema 34:8-10 e saili ai po o le a le mea na faia e le Faaola e le'i mafaia e se tasi ona fai. Faitau le Mataio 1:18-23 ma le Luka 1:32, 35 ma saili ai po o le a le mea na Ia maua ai le malosiaga e faia ai le Togiola. Ina ia fesoasoani i tamaiti e vaai faalemafaufau i lenei mataupu faavae, ia tusi le ata lenei. Fesoasoani i tamaiti o le vasega ia malamalama o Iesu o le alo moni lava o le Atua, ma o lona malosiaga e faataunuaina ai le Togiola ma aumaia ai le Toetu o ni faamaoniga ia o lona aveva ma alo paia.



Mataio 1:18-25. O ni uiga patino e aveva ai ma ni matua lelei. (10-20 minute)

Fai atu i tamaiti o le vasega se toalua e faamatala mai se uiga latou te fiafia ai i o latou matua. Ia valaaulia se tama po o se tina o se tamaitiiti o le vasega e sau i le vasega ma tautala atu mo le tolu i le lima minute ma faamatala atu o latou lagona ina ua fanau mai se la tamaitiiti, faamatala atu pe faape'i foliga o le tamaitiiti a o pepe, ma faailoa atu lo la alolofa mo le tamaitiiti. (Afai foi e maua, ia faaaoaga se telefoni e valaau atu ai i nisi matua ina ia faia foi le mea lava lea e tasi. Pe fai atu foi i nisi matua e tusi mai pe pu'eina foi i se laau pu'eleo-po o le vitio, ona fetufaai atu lea o tali a matua i le vasega.)

Ia valaaulia tamaiti o le vasega e lisi atu uiga o se matua lelei. Vaevae le vasega i ni vaega se lua. Fai atu i le isi afa e faitauina le Mataio 1:18-25 e sailia ai uiga lelei o Iosefa i le aveva ai ma se tane ma se tama. Ia valaaulia le isi afa e faitauina le Luka 1:28-30, 38, 46-55 e sailia ai uiga lelei o Maria.

Faitau le Roma 8:16-17 ma saili ai lo tatou sootaga ma lo tatou Tama o i le Lagi a o taitaiina ai i tatou e Lona Agaga.

Faitau le Efeso 2:4 ma saili ai po o a ni lagona o lo tatou Tama Faalelagi mo i tatou. Fesili atu:

- E faapefea ona fesoasoani le avea ai ma se matua lelei e saunia ai i tatou e avea ma atua?
- O le a se mea e mafai ona e faia nei e saunia ai oe e avea ma se matua lelei i le lumanai?

Ia lisi tali a tamaiti o le vasega i luga o le laupapa.



Mataio 1:22–23. O le fanau mai ma le soifuaga o Iesu Keriso na faataunuaina ai le tele o folafolaga na tuuina atu i perofeta anamua. (15–20 minute)

Ia valaaulia tamaiti o le vasega e tusi se taumatematega o nisi mea e ono tutupu i le lumanai i luga o se fasi pepa. Ia ao mai nei taumatematega ma fetufaai atu i nisi o le vasega. Fesili atu:

- E faapefea ona ono faataunuaina nisi o nei taumatematega?
- E faapefea ona mautinoa o le a faataunuaina uma?
- Pe avea ea le faia o se taumatematega moni e faamaonia ai le avea o se tasi ma se perofeta? Aisea e mafai ai pe aisea foi e le mafai ai?

Fesoasoani i tamaiti o le vasega ina ia malamalama o perofeta latou te le taumateina le lumanai. E faaali atu i perofeta le lumanai e le Atua, ma o a latou valoaga e faataunuaina pea lava.

Ia toe tusia le siata lenei, ma ia faaavanoa le koluma ogatotonu. Ia valaaulia tamaiti o le vasega e faitauina ia fuaiupu ma tusi i le vaega o loo avanoa le faataunuaina o le valoaga.

Valoaga	Mea na tupu	Faataunuuga
Isaia 7:14	E to le taupou	Mataio 1:21–23
Mika 5:2	Ua fanau Keriso i Peteleema	Mataio 2:6
Hosea 11:1	Ua sosola atu Iosefa ma Maria ma Iesu i Aikupito	Mataio 2:15
Ieremia 31:15	Ua poloaina e Herota le fasiotia o pepe i Peteleema	Mataio 2:16–18
1 Nifae 11:13	Ua malaga mai Keriso mai Nasareta	Mataio 2:23
Isaia 40:3–5	Ua saunia e Ioane le Papatiso le ala	Mataio 3:3
Isaia 9:1–2	Ua galue Keriso i Kapanaumi	Mataio 4:14–16
Isaia 53:4	Ua faamalolo e Keriso ia ē mama'i	Mataio 8:17
Malaki 3:1	O Ioane le Papatiso o le avefeau folafolaina lea	Mataio 11:10
Isaia 42:1–4	Na teena e Keriso ni feutagaiga ma taitai o Iutaia; sa faamoemoe atu tagata ia te Ia	Mataio 12:17–21
Isaia 6:9–10; 53:1	E toatele na faalogo ae le'i malamalama pe talitonu ia Keriso	Mataio 13:14–15
Salamo 78:2	Ua aoao atu Keriso i faataoto	Mataio 13:35

Sakaria 9:9	Ua ulufale atu Keriso i Ieruselema ma le manumalo, o loo tietie i se asini	Mataio 21:5
Salamo 118:22–23	Ua teenaina e tagata Iutaia ia Keriso, le Maatulimanu	Mataio 21:42
Sakaria 13:7	Na pu'eina Iesu, ma ua sosola ona soo	Mataio 26:31, 54–56

A mae'a, ona fesili atu lea:

- O le a se mea o loo faaali mai e nei valoaga faapea lo latou faataunuaina e uiga ia Iesu?
- Aisea na taua ai le faataunuaina e Iesu o valoaga o le Feagaiga Tuai?
- E mafai faapefea e valoaga mai tusitusiga paia e uiga i aso e gata ai ona fesoasoani ia i tatou i aso nei?



Mataio 2:1–11. Na taitaiina atu makoi mai Sasa'e i le pepe o Keriso. (15–20 minute)

Fai atu i tamaiti o le vasega e tusi se ata o le fanau mai o Iesu, pe valaaulia se tamaitiiti o le vasega e tusi i luga o le laupapa le vaiga lea e pei ona faamatalaina atu e isi tamaiti o le vasega. Ta'u atu ia i latou ina ia aofia ai mea uma latou te mafai i lo latou manatuaina. A maea ni nai minute, ona faitau lea o le Mataio 2:1–11 ma le Luka 2:1–16, ma tuu atu i tamaiti o le vasega e saili ia auililiga e tatau ona latou faaopoopoina atu pe toese mai foi mai a latou ata ina ia matuai sa'o atoatoa ai. (Mo se faaitaiga, e toatele tamaiti o le vasega o le a latou tusia ia makoi e toatolu, e ui lava e le o ma'oti se fuainumera na ta'uina mai e Mataio. E le gata foi i lea, o le Mataio 2:11 e foliga mai o makoi na faato'a o mai mulimuli ane, ina ua nonofo Maria ma le Keriso i totonu o se fale.) Ia talanoaina ia fesili nei:

- Aisea e manatu sese ai nisi tagata i le fanau mai o Keriso?
- Aisea e le malamalama soo ai i tusitusiga paia? (O le le lava ona faitauina soo e tagata o tusitusiga paia, po o le le faitauina foi ma le faaeteete. O mea sese i le faaliliuga e mafai ona tupu ai foi le manatu sese.)
- E mafai faapefea ona tatou aloese mai le manatu sese i mataupu faavae ma tala mai tusitusiga paia? (E mafai ona tatou sailia ia tusitusiga paia ma susesueina ia le faaliliuina e perofeta ma aposetolo o tusitusiga paia.)

Mataio 2:1–9. O i latou o e e malamalama ma mulimuli i aoaoga a tusitusiga paia o le a saunia lelei i latou e fetaii ma le Alii. (10–15 minute)

Ae le'i amataina le vasega ia tuu se tamai fetu pepa i se mea e iloa uma atu ai e tamaiti aoga. Ia amataina le vasega i le tusia o le faailoga taofi e aunoa ma le tusia ai i luga o le upu *taofi*. Fesili atu i tamaiti o le vasega:

- O le a se mea e faatusa i ai lenei faailoga?
- Pe tutusa ea le vaai atu i le faailoga ma le iloina o lona uiga? (E leai.)

- E toafia nisi o outou na vaai i le fetu fou ina ua outou o mai i totonu?
- Pe na i ai se tasi na ia iloaina lona uiga?

Ia valaaulia tamaiti o le vasega e faitau le Mataio 2:1–9 ma saili ai po o fea na faaali mai ai le fetu fou lea na faailoa mai ai le fanau mai o le pepe o Keriso.

- Pe na i ai nisi na vaai i le fetu ae le'i malamalama i lona uiga?
- Aisea na mafai ai ona iloaitino e makoi le uiga o le fetu?
- Aisea na le mafai ai e isi e toatele ona iloaina le taua o le fetu?

Ina ia fesoasoani i tamaiti o le vasega ia malamalama i le mafuaaga na le gata ai ina iloa e makoi le fetu ae faapea foi ona malamalama i lona uiga, ia faitau atu le saunoaga lenei mai ia Elder Bruce R. McConkie, o lē sa avea ma uso o le Korama a Aposetolo e Toasefululua:

“O le mafuaaga ona o [makoi] o i latou o ni tagata Iutaia o e na ola, e pei o le fia miliona o tagata Iutaia, i totonu o se malo i le itu i Sasae. O tagata Iutaia, ae le o Nuu Ese, o e sa masani ma tusitusiga paia ma sa latou faatalitali ma le naunautai i le oo mai o se Tupu” (*The Mortal Messiah: From Bethlehem to Calvary*, 4 vols. [1979–81], 1:358).

Ia valaaulia tamaiti o le vasega e faitauina le Iosefa Samita—Mataio 1:29–31 ma vaai i ai po o a faailoga o loo faaalia mai e le Atua i aso nei. Ia fesili atu:

- O ai o loo aoga i ai le uiga o nei faailoga i aso nei?
- E mafai faapefea e i tatou, e pei o makoi anamuā, ona mauaina le Faaola?

Faitau le Mataupu Faavae ma Feagaiga 18:34–35 ma le 45:39 ma vaai ai i isi auala e mafai ai ona tatou mauaina Iesu i aso nei.

Mataio 2:11. E pei lava ona tuuina atu e makoi o meaalofa ia Iesu, e mafai foi ona tatou tuuina atu ni meaalofa ia te Ia. (5–10 minute)

Ia aumai i totonu ni afifi ua afifiina e pei oni meaalofa. Fesili atu i tamaiti o le vasega:

- O le a le meaalofa mulimuli na e tuuina atu i se tagata?
- Aisea na e filifilia ai lena meaalofa?
- E faapefea ona aafia le meaalofa e te tuuina atu i lena tagata ona o lou iloaina o lena tagata?
- E faapefea ona aafia le ituaiga meaalofa tatou te filifilia mo lena tagata ona o lo tatou alofa i ai?

Faitau le Mataio 2:11 ma vaai ai po o a mea na tuuina atu e makoi mo Iesu. Fesili atu: O le a sou manatu aisea na filifilia ai e makoi ia meaalofa na latou faia? (o le auro, pulu lipano, ma le muro o ni meaalofa taugata uma e fetau i se tupu. O le pulu lipano o se ituaiga mea manogi lea latou te tuuina atu i le Alii i totonu o le malumalu i Ierusalem. O le muro, lea sa

faaaogaina i le u'uina o tino maluu, o se faailoga valoia lea o le taulaga a Keriso.) Ia valaaulia tamaiti o le vasega e faitau le Mataio 11:29–30; Alema 11:42–44; Mataupu Faavae ma Feagaiga 14:7; 19:16–19 ma sailia ia meaalofa ua ofoina mai e le Faaola ia i tatou. (Afai e te manao i ai, ia lisi a latou tali i luga o le laupapa.) Ia tuu atu i tamaiti o le vasega se fasi pepa ma valaaulia i latou e tusi se lisi o meaalofa e mafai ona latou tuuina atu ia Iesu i le asō (mo se faataitaiga, tausia o poloaiga ma le ola amiotonu, tausia o isi ma le agalelei, ma ia loto faafetai mo mea ua faia e Iesu mo i tatou).

Mataio 2:13–21. O faamoemoga ma le galuega a le Alii e le mafai ona faafememeaiina.

(5–10 minute)

Faaali atu i tamaiti o le vasega se ipu vai ma se sipuniti suka. Saeu le suka i totonu o le vai. Ona valaaulia lea o se tamaitiiti o le vasega e tuueseese le suka mai le vai. Faitau le Mataupu Faavae ma Feagaiga 121:33 ma fesili atu i tamaiti o le vasega:

- E faapefea ona faigata ona tuueseese le suka mai le vai e pei o mea o loo aoaoina mai i totonu o tusitusiga paia?
- O le a le mana e mafai ona toafia le lagi?

Faitau le Mataio 2:14–21 ma fesili atu:


- O le a le mea na taumafai Herota e fai ina ia faaleagaina ai le galuega a le Alii?
- O le a le mea na faia e le Alii ina ia toafia ai faiga a Herota?
- E tusa ai ma le fuaiupu e 14, o le a le matafaioi a Iosefa ma Maria na fai i le taofia o le fuafuaga a Herota?

Ina ia fesoasoani i tamaiti o le vasega e faaaogaina lenei mataupu faavae, ia fesili atu:

- E mafai faapefea ona tatou fesoasoani e taofia ia fuafuaga a Satani i o tatou olaga?
- O le a se eseese e faia i lou olaga i le iloaina lea o le Alii ma Ana fuafuaga o le a manumalo ma o Lana fuafuaga o le a faataunuuiina?

Mataio 3–4

O le Soifuaga o Iesu Keriso



Faatomuaga

O le Mataio 3–4 o loo faamatalaina mai ai ia sauniuniga na faia a Iesu a o le'i amataina Lana galuega aloaia. O Lana faaitaiga o le saunia e faamanatu mai ai ia i tatou afai tatou te “saunia o le a [tatou] le matata'u lava” (MFF 38:30). O le vaitaimi lea na oo ai foi Iesu i faaososoga e pei foi o o tatou faaososoga (tagai Mataio 4:3–11).

Suesue ma le agaga tatalo le Mataio 3–4 ma mafaufau i mataupu faavae nei ae le'i sauniaina au lesona.

O Nisi Mataupu Faavae Tava o le Talalelei e Saili Iai

- E tatau ona tatou papatisoina ina ia tatou maua ai le mamalu selesitila (tagai Mataio 3:13–15; tagai foi 2 Nifae 9:24; 31:5–7).
- O le Aigaatua o loo i ai ni tagata eseese se toatolu: o le Tama, o le Alo, ma le Agaga Paia (tagai Mataio 3:16–17; tagai foi Galuega 7:55–56; MFF 130:22).
- O le anapogi e fesoasoani ia i tatou tatou te latalata atu ai i le Tama Faalelagi, e maua ai le malosiaga faaleagaga, ma maua ai faamanuiaga (tagai Mataio 4:1–2; FIS, Mataio 4:1).
- O le usiuitai tatou te maua ai le mana e tete ai faaososoga a Satani (tagai Mataio 4:3–11; tagai foi Iakopo 4:7; 1 Nifae 22:26; Alema 48:17).

Fautuaga mo le Aoao Atu

Filifili mai manatu nei, pe faaoga ni ou lava manatu, ao e sauniaina ia lesona mo le Mataio 3–4.



O le *Ata Vitio o le Feagaiga Fou* ata lona 4, “Aganuu a le Feagaiga Fou” (10:21), e mafai ona faaogaina e faamalamalama ai tu ma aganuu i taimi o le Feagaiga Fou. E mafai ona e faaogaina i le taimi o se vasega e tasi pe faaali uma atu foi ona vaega pupuu e sefuluono pe a tulai mai ia ni vaega o loo latou aoaoina i tusitusiga paia. (Tagai *Vitio Taiala o le Feagaiga Fou* mo fautuaga mo le aoao atu.)

Mataio 3:13–17 (tagai foi Mareko 1:9–11; Luka 3:21–22; Ioane 1:32–34). E tatau ona tatou papatisoina ina ia maua ai le mamalu selesitila. (15–20 minute)

Ia valaaulia le vasega e vaai faalemafaufau faapea o oe o se tagata sailiili o loo i ai ni fesili faamaoni e uiga i le moomia ona papatisoina. Tuu atu i ni tamaiti o le vasega se toalua e o atu i luma e faatino ia vaega a faifeautalai faamisiona. Fesili atu ia i laua:

- Sa papatisoina a'u a o o'u pepe. Aisea e manaomia ai ona ou toe papatiso?
- Aisea e papatisoina ai a'u i le faatofuina?

- Aisea e taua ai lenei sauniga i lo'u faaolataga?
- O le a le mea o loo faatusa i ai le sauniga o le papatisoga?

Tusi mau nei i luga o le laupapa: Mataio 3:13–17; Ioane 3:3–5; Roma 6:3–5; Mosaea 5:5–12; Alema 5:14; 3 Nifae 11:26; Moronae 8:25; Mataupu Faavae ma Feagaiga 13:1; 20:73–74; 128:12. Ia valaaulia tagata o le vasega e faaoga ia mau e fesoasoani ai i “faifeautalai” e taliina ia fesili.

Ia valaaulia se ositaulaga i le Perisitua Arona e faitauina le Mataupu Faavae ma Feagaiga 20:46. Fesili atu ia te ia po o le a le pule o loo ia umiaina. Fesili atu ia te ia po o soo se ositaulaga foi o i totonu o le vasega pe sa mauaina le avanoa e papatisoina ai se tasi. Afai na faia, ia valaaulia le tamaitiiti o le vasega e fetufaai atu faapuupuua lenei mea na oo i ai i le vasega. Fesili atu i le ositaulaga po o le a sona lagona pe a talosagaina o ia na te papatisoina le Faaola. Tuu atu i le vasega e faitauina le Mataio 3:14–15, ma talanoaina ia fesili nei:

- O le a le upu a Ioane le Papatiso na fai ina ua alu atu Iesu ia te ia ina ia papatisoina?
- O le a le tali a Iesu?
- O le a le uiga “ina ia faataunuaina mea tonu uma”? (tagai 2 Nifae 31:4–11).
- O le a le mea sili e te manatuaina i lou papatisoga?

Tuu atu i tamaiti o le vasega e faitauina le Mosaea 18:8–10, ma talanoaina pe faapefea ona faaauau pea ona faaogaina o latou papatisoga i aso nei.



Mataio 3:16–17 (tagai foi Mareko 1:10–11; Luka 3:21–23; Ioane 1:32–34). O le Aigaatua o loo i ai ni tagata eseese se toatolu: o le Tama, o le Alo, ma le Agaga Paia. (5–10 minute)

Faaali atu i le vasega ni tusi tuufaatasi e tolu (se Tusi a Mamona, Mataupu Faavae ma Feagaiga, ma le Penina Tautele). Fesili atu i tamaiti o le vasega:

- O a ni auuala ua tasi ai nei tusi e tolu?
- E faapefea ona eseese?
- E faapefea ona pei ia tusi tuufaatasi e tolu o le Aigaatua?

Ia valaaulia tamaiti o le vasega e faitauina le Mataio 3:16–17 ma lisi ia ni mea iloga o loo tuuina mai i lenei fuaiupu e faapea o le Tama, le Alo, ma le Agaga Paia o ni tagata mavaevae se tolu. Ia valaaulia tamaiti o le vasega e vaai i a latou Taiala i Tusitusiga Paia i le ulutala “Aigaatua” e saili ai isi mau e lagolagoina ai le manatu faapea o le Aigaatua o loo aofia ai ni tagata mavaevae se toatolu (tagai faapitoa lava i le Galuega 7:55–56; MFF 130:22–23; Talafaasolopito Iosefa Samita 2:17). Tuu atu i tamaiti o le vasega e fetufaai atu mea na latou mauaina i le vasega. Faitau atu le faamatalaga lenei mai le *Lectures on Faith (Tautalaga i le Faatuatua)*, na tuufaatasia i lalo o le taitaiga a le Perofeta o Iosefa Samita:

“Ia tatou maitauina iinei, e tolu mea e moomia ina ia mafai ai e soo se tagata ma soo se atamai ona faatinoina le faatuatua i le Atua i le olaga nei ma le faaolataga.

“Muamua, o le manatu o loo i ai moni lava o ia.

“Lona lua, o se manatu sa’o i lona ituaiga, atoatoaga, ma uiga.

“Lona tolu, o se malamalama sa’o o le ala o le olaga o loo ia sailia e tusa lea ma lona finagalo” (*Lectures on Faith* [1985], 38).

A maea ona fetufaai atu lenei saunoaga, ona fesili atu lea i tamaiti o le vasega:

- Aisea e tatau ai ona tatou malamalama i le natura moni o le Atua a o le’i mafai ona tatou faatuatua atu ia te Ia “i le ola ma le olataga”?
- E mafai faapefea ona tatou alualu i luma i lo tatou malamalama i le natura moni o le Atua?

Tuu atu i tamaiti aoga e faitauina le Ioane 17:3, ma fesili atu:

- E faapefea ona faatatau lenei fuaiupu i le faamatalaga o loo i le *Lectures on Faith* (*Tautalaga i le Faatuatua*?)
- O le a le uiga ia te oe?

Faitau le Alema 34:38 ma fesili atu:

- O le a le sootaga e tatau ona tatou maua ma le Aigaatua?
- O lea se mea e mafai ona tatou faia ina ia maua ai lenei sootaga?

Mataio 4:1–2 (tagai foi Mareko 1:12–13; Luka 4:1–2). O le anapogi e fesoasoani ia i tatou tatou te latalata atu ai i le Tama Faalelagi, e maua ai le malosiaga faaleagaga, ma maua ai faamanuiaga. (5–10 minute)

Fai atu i le vasega e sii o latou lima pe afai o loo latou tulimatai atu i Aso Sa anapogi. Aisea e tulimatai atu i ai pe aisea foi e le tulimatai atu i ai? Faitau le Mataio 4:1–2 ma vaai po o le a le mea na faia e le Faola e sauniunia i mo Lana galuega.

Vaevae le vasega i ni vaega se fa. Tuu atu i vaega taitasi e faitauina mai ia mau nei ma lipoti mai po o le a se mea na latou aoaoina ai e uiga i le anapogi: Mataio 17:14–21; Alema 5:46; Alema 17:2–3; Mataupu Faavae ma Feagaiga 59:13–14.

Tuu atu i tamaiti o le vasega e faitauina ia fuaiupu nei ma tali i fesili:

- O le a le mea o loo fai mai ai le Mataio 6:16–18 e tatau ona tatou aloese mai ai pe a tatou anapopogi?
- E tusa ai ma le Isaia 58:3–5, o le a le tele o se lelei e faia e le anapogi ia i tatou pe afai tatou te anapopogi e aunoa ma le naunautaiga moni faaleagaga? (tagai i le faamatalaga i le pito i lalo 4e).

- O le a le mea o loo ta’u mai e le fuaiupu 6–7 e tatau ona tatou faia pe a tatou anapopogi?
- O a fuafuaga ua faia e le Alii mo Lana Ekalesia ma tagata e fesoasoani ai i e matitiva?



Mataio 4:1–11 (tagai foi Mareko 1:12–13; Luka 4:1–13). O le ususitai tatou te maua ai le mana e tetea ai faaososoga a Satani. (20–25 minute)

Tuu se moli ‘aina i totonu o se pakete vai e mafai ona iloa atu ai (e tatau ona opeopea). Fai atu i tamaiti o le vasega e mate mai po o le a le mea e mafua ai ona opeopea. Fofu’e le moli ma aveese le vaega ogatotonu, ona toe tuu lea o le moli i totonu o le vai (e tatau ona magoto). Fesili atu:

- O le a sou manatu o le a le mea na fesoasoani i le moli ina ia opeopea ai?
- E mafai faapefea e le fofu’eina o le moli ona pei o lo tatou malosi e teteina ia faaososoga i aso nei?

Tuu atu i tamaiti o le vasega e faitauina le Mataio 4:1–11 (ia maitauina suiga i le Faaliliuga a Iosefa Samita).

- O le a le mea na faia e le Faola e aloese ai mai faaososoga? (sa Ia anapogi, sa Ia saili ina ia faatasi ma le Atua, sa Ia siitia mai upumoni ma i tusitusiga paia, ma sa Ia tuua lē na faaososoga faapea ma le nofoaga na faaososoina ai; tagai foi MFF 20:22).
- E mafai faapefea ona tatou faaaogaina nei fesoasoaniga i le faatoilaloina o faaososoga i o tatou lava olaga? (*Faaaliga*: Faaalu sina taimi i tulaga moni o le olaga lea e aafia ai au tamaiti o le vasega i aso nei. Mo se faaitaiga, ia talanoaina le alu ese mai se nofoaga o faaososoga e ala lea i le suia o le alaata o le televise, savali ese mai se ata tifaga e le talafeagai ai, po o le tuua o se patii.)
- O a faaososoga o loo faaaogaina e Satani i aso nei e “fofo’e ese ai” le puipua o e amiotonu?

Toe faitau le Mataio 4:1–11, o le taimi la lenei ia vaai ai mo ituaiga faaososoga eseese na tuuina atu e Satani i le Faola. Faitau le saunoaga lenei mai ia Elder David O. McKay, a o avea ma se uso o le Korama a le Toasefululua:

“O lenei, e toetoe lava o faaososoga uma e oo mai ia te outou ma a’u e oo mai i se tasi o na ituaiga. Ia faavasega ina, ma o le a e iloaina ai e toetoe lava o faaososoga uma e tuuina mai lea e faaeleleaina ai outou ma a’u, pe tau afaina ai foi, e oo mai ia i tatou o se (1) faaososoga o le fia’ai; (2) o le manao i le faamaualuga ma le faausili ma le manao i mea ua taumamaoese mai le Atua; po o le (3) o le faamalieina o se manaoga, po o se naunautaiga mo oa o le lalolagi, po o le pule i tagata” (in Conference Report, Oct. 1911, 59).¹

Tusi ulutala e tolu i luga o le laupapa: (1) *Fia’ai Faaletino*; (2) *Faamaualuga, Faausili, ma le Fiailoa*; ma le (3) *‘Oa po o le Pule*.

Ia valaaulia tamaiti o le vasega e ta’u atu nisi o faaososoga o loo taatele i le autalavou i aso nei. A o ta’u mai ia faaososoga taitasi, ia fesili atu i tamaiti po o le fea vaega e tatau ona lisiina ai i lalo, ona tusi lea i lalo o le ulutala talafeagai i luga o le laupapa.

Faamanatu atu i tamaiti le tala i moli ‘aina ma fesili atu:

- O le a le tulaga na oo i ai le fua o le moli ina ua leai lona pa’u i fafo?
- O le a le umi ma le tumau o le lelei ma le suamalie o le fualaau e aunoa ma le pa’u pe a faatusatusa atu i le fualaau e pipii pea lona pa’u?
- Afai tatou te gauai atu i faaososoga, e i ai se isi auala e toe maua ai le puipuiga faalelagi? E faapefea?

Faitau le Mosaea 26:29–32 ma fesili atu: O le a se mea e mafai ona tatou faia pe afai ua aveesea e Satani lo tatou puipuiga ma ua tatou gauai atu i faaososoga? Faitau le Alema 34:32–34 ma fesili atu:


- O le a le leaga o le tolopoina o le salamo?
- O le a le auala sili ona lelei, o le teteaina o faaososoga po o le gauai atu i faaososoga ae salamo mulimuli ane?

Ia faailoa atu i tamaiti o le vasega faapea o le faataitaiga a le Faaola o loo i le Mataio 4 e aoaoina ai i tatou faapea e sili atu le teteaina o le faaososoga nai lo le gauai atu i ai ma salamo mulimuli ane ai. (Mo nisi manatu faapoopo, tagai i le, tagai Spencer W. Kimball, “O le a Faamagaloina e le Atua,” *Liahona*, Setema 1982, p. 7.) Ae peitai, ia faamautinoa atu ia i latou, e ala mai le Togiola a le Faaola, ua avanoa ai le faamagaloga mo tagata uma lava o e salamo faamaoni i a latou agasala.

Mataio 5–7

O le Soifuaga o Iesu Keriso

O mea na tutupu i nei mataupu e foliga mai na tutupu lava i leni vaaitaimi



Faatomuaga

O le Mataio 5–7 o loo tusia ai le faamatalaga na ta’ua e Peresitene Iosefa Filitia Samita o le “lauga maoae ua laugaina” (i le Conference Report, Oct. 1941, 95). O lenei lauga o le uluai aoaoga lea o ni aoaoga maoae se lima na tuuina mai e le Faaola e pei ona tusia ai i le Mataio (o isi aoaoga o loo maua i le Mataio 10; 13; 18; ma le 24–25). Ua

lauiloa o le Lauga i luga o le Mauga ma sa tuuina atu e latalata i auvai o le Sami o Kalilaia.

Na tusia e Luka se lauga ua lauiloa “o le Lauga i Fanua Laugatasi” lea e tai foliga lava i le Lauga i luga o le Mauga. O nisi e manatu o le Lauga i luga o le Mauga na tuuina muamua mai ae le’i filifilia ia Aposetolo e Toasefululua, ae na faamanino mai e Elder Bruce R. McConkie, a o avea ma se Fitugafulu, o nisi o mea o loo aofia ai i le Lauga na tuuina atu faapitoa lava i le Toasefululua. Na faamalamalama mai e Elder McConkie:

“E matuai manino lava o le Lauga i le Laugatasi, e pei ona tuuina mai e Luka, na tuuina mai tonu lava ina ua tuanai le filifiliaina ma le faauuina o le Toasefululua. . . . O le lomiga a sa Nifaē [o le Lauga i luga o le Mauga] na tuuina mai ina ua mavae le valaauina o le Toasefululua a sa Nifaē, ma o ni vaega o le lauga na tuuina sa’o atu i aposetolo nai lo le lautele o le motu o tagata. (3 Nifae 13:25.) I le tala a Mataio, e pei ona maua i le Lomiga Musuia [o le Faaliliuga a Iosefa Samita], na faaopoopo atu i ai e le Perofeta se aofaiga tele o mea ia e faaaoaina e i latou e valaauina i le Toasefululua nai lo le lautele o tagata. (I. V. Mataio 5:3–4; 6:25–27; 7:6–17.) . . .

“E sosoo atu ai faapea o le Lauga i luga o le Mauga ma le Lauga i le mea Laugatasi e tutusa lava” (*Doctrinal Feagaiga Fou Commentary*, 3 vols. [1966–73], 1:213–14).

O le lauga lenei, na tuuina atu ai e Iesu ia tulaga maualuga e ola ai Ona soo. O le taua o lenei lauga, na ta’ua ai e Peresitene Ezra Taft Benson e faapea:

“O Tulafono e Sefulu ma le Lauga i luga o le Mauga o mataupu faavae ia e fausia ai faigamalo uma ma lo tatou foi lalolagi (tagai Esoto 20:1–17; Mataio 5–7). O lona faaleaogaina o le a taitaiina atu ai le iloagofie o le faaleaogaina ma le tauleaogaina o le tagata. O le le amanaiaina e se malo o le a taitaiina atu ai lena malo i le faatafunaina” (*The Teachings of Ezra Taft Benson* [1988], 677–78).

Suesue ma le agaga tatalo le Mataio 5–7 ma mafaufau i mataupu faavae nei ae le’i sauniaina au lesona.

O Nisi Mataupu Faavae Taua o le Talalelei e Saili Iai

- O lo tatou tausaiina o isi e aafia ai le auala e tausai ai i tatou e le Atua (tagai Mataio 5:7; 6:14–15; 7:2, 12).
- Na faataunuuna e Keriso le tulafono a Mose ma toefuataiina le atoatoaga o le talalelei ma aumaia se tulafono maualuga (tagai Mataio 5:21–48).
- E tatau ona tatou tauivi ina ia atoatoa e pei o Iesu ma le Tama Faalelagi (tagai Mataio 5; tagai foi 3 Nifae 12:48).
- E le tatau ona tatou mitamita i a tatou galuega amiotonu (tagai Mataio 6:1–23).
- Na tuuina mai e le Tama Faalelagi ia i tatou le tatalo e avea o se auala e faaali atu ai la tatou faafetai ma o tatou manaoga ia te Ia (tagai Mataio 6:5–15). Na te talia a tatou tatalo ma finagalo e faamanuia i tatou (tagai Mataio 7:7–11).

- E mafai ona tatou iloatinoina le amiotonu mai le amioleaga e ala i a latou mea e fai. E na o i latou e amiotonu o latou faamoemoega ma mea e fai o le a “sao atu i le malo o le lagi” (tagai Mataio 7:15–27; tagai foi Moronae 7:5–6).

Fautuaga mo le Aoa Atu

Filifili mai manatu nei, pe faaoga foi ni ou lava manatu, a o e saunia ia lesona mo le Mataio 5–7.

Mataio 5–7 (tagai foi Luka 6:17–49). O se faatomuaga i le Lauga i luga o le Mauga.

(3–5 minute)

Fesili atu i tamaiti o le vasega:

- O le a le taimi mulimuli na e auai atu ai i se faeasaite i le Aso Sa?
- Afai ua e iloaina o Iesu o le a avea ma failauga i le isi faeasaite, e te alu i ai iina?

Ia faamalamalama atu o le Mataio 5–7 o se lauga na tuuina mai e le Alii, ma e talu ai tatou le'i iai iina e faalogo atu ai i le Faaola, o lea e mafai ai ona tatou faitau ma suesue i mea na Ia aoaoina mai. Ina ia faamamafaina le taua o nei mataupu, ia fetufaai atu upusii nei mai ia Iosefa Filitia Samita ma Ezra Taft Benson o loo i totonu o le faatomuaga i lenei poloka o mau.

Mataio 5:1–12 (tagai foi Luka 6:20–26). O le Lauga Faaamuia o ni taiala ia e fesoasoani ai ia i tatou ia avea atili faapei o le Faaola.

(15–20 minute)

Ia auuauai taitoatasi ona uu atu i luga ni mekasini eseese se tolu pe fa po o ni ata o nusipepa o ni tagata e leiloa. A o e uuina atu i luga ia ata taitasi, ia fesili atu i tamaiti o le vasega pe latou te manatu e amiotonu pe amioleaga le tagata o loo e uuina lona ata.

- Pe mafai ona tatou ta'uina ni tagata amiotonu mai o latou foliga?
- E mafai faapefea ona tatou iloa pe amiotonu pe amioleaga se tasi?
- O le fea e sili ona taua, o totonu po o le matagofie o fafo?

Talu ai ona e mafai ona tatou suia na o ni nai vaega o lo tatou aulelei i fafo, ae tele naua se malosia o loo i ai tatou e suia ai o tatou tagata i totonu. Ia faamalamalama atu na tuuina mai e Iesu se lisi o “uiga matagofie” lea e ta'ua o Faaamuia. Ia fesili atu pe toafia ni tamaiti o le vasega ua faalogo i Faaamuia. Afai tatou te atinaeina nei uiga po o ituaiga tagata i o tatou olaga o le a tatou mauaina ni faamanuiaga. (O le uiga o le upu *faamuia* o le “*amuia*.”) Ia valaaulia tamaiti o le vasega e faitau le Mataio 5:1–12 ma saili ia uiga taitasi na ta'ua e Iesu faapea ma le faamanuiaga e maua mai ai. Faitau le saunoaga lenei e faatatau i Faaamuia mai ia Peresitene Harold B. Lee:

“I lenei Lauga e le mafaatusalia i luga o le Mauga, na tuuina mai ai e Iesu ni auala tulaga ese se valu lea e mafai ona tatou maua ai le ... olioli. ... O nei folafolaga a le Matai ua lauiloa ... o Faaamuia ma o loo faatatau i ai le tele o tagata atamamai i le Tusi Paia o sauniuniga talafeagai ia mo le ulufale atu i le malo o le lagi. ... O loo aofia ai moni lava se FAAVAE MO SE OLAGA ATOATOA” (*Decisions for Successful Living* [1973], 56–57).

Ia faia ni kopi o faamatalaga nei e valu e uiga i Faaamuia mai ia Peresitene Lee, ma valaaulia ni tamaiti o le vasega se toavalu e faitauina atu i le vasega.

1. **Amuia e matitiva i le agaga:** “O le mativa i le agaga o le lagonaina lea e o outou tagata le manaomia o le faaleagaga, o le faalagolago atu lea i le Alii mo outou lavalava, o a outou meaai ma le 'ea o loo manavaina, o lou soifua maloloina, o lou ola; o le iloaina lea e le mafai ona tuana'i atu se aso e aunoa ma se tatalo faamaoni o le faafetai, mo le taitaiga ma le faamagaloga ma le malosia ua lava ma totoo mo manaoga o aso taitasi.”
2. **Amuia ē faanoanoa:** “Ina ia faanoanoa, e pei o le lesona a le Matai lea o le a aoaoina iinei, e tatau i se tasi ona faaalua le “tiga i le Atua e tupu ai le salamo” ma manumalo ai i le salamo e faamagaloina ai agasala ma faagalo ai ona toe mafaufau i mea sa ia faanoanoa ai.”
3. **Amuia ē agamalu:** “O se tagata e agamalu o se tagata lea e le faigofie ona faaita pe faaonoona i ai ma e lavā tatali tiga ma faigata e oo i ai. O le agamalu e le uiga faatasi ma le vaivai. O le tagata agamalu e malosia, e tulaga ese, o se tagata e atoatoa lona puleaina o ia lava. O le ituaiga tagata lea e lototele i ona talitonuga, e ui lava i ni faatosinaga a ana uo.”
4. **Amuia ē fia aai ma fia inu i le amiotonu:** “Pe na e fia 'ai ea i se meaai po o le fia inu foi i se vai ae sa na o sina fasi falaoa magumagu lava po o sina vai e tau ina ia faamalieina ai le manao lea sa ia te oe ma na foliga mai ai o se mea sili ona taua lea ua e mauaina? Afai sa e matuai fia ai lava ona amata lea ona e mafaufau i le uiga o le fetalaiga a le Matai e tatau ona tatou fia aai ma fia feinu i le amiotonu. O le fia ai ma le fia inu lenei lea e taitaieseina ai i latou na mai le aiga ae saili atu le faaumeaina faatasi ma le au paia i le sauniga faamanatuga ma e aofia ai le tapuai i le Aso o le Alii i soo se mea tatou te i ai. E uunaia ai le tatalo faatauana ma taitaiina atu ai i tatou i malumalu paia ma uunaiina i tatou ina ia faaaloalo ai iina.”
5. **Amuia ē alolofa atu:** “O lo tatou faaolataga e faalagolago lea i le alofa tatou te faaali atu i isi. O upu agaleaga ma le faasausili, po o uiga faaonoona ma leaga e faaalua i tagata po o manu, e ui lava e foliga mai o se tau'i ma sui, e faaleaoagaina ai le faataunuuna e ia o lana taumafai atu mo le alofa pe a ia manaomia le alofa i le aso o le faamasinoga i luma o faamasinoga faalelalogi po o le faalelagi. Pe i ai ea se tasi e le'i faamanu'alia i se tau'faaleaga a se tasi na ia manatu o lana uo? E te manatuaina ea le tauviga na e oo

i ai ina ia aloese mai le faasalaga? Amuia e alolofa atu aua e alofaina outou!”

6. **Amuia ē loto mamā:** “Afai o le a e vaai i le Atua e tatau ona e mama. O loo i ai i tusitusiga a Iutaia le tala i se tamaloa na ia vaai atu i se mea faitino i se mea mamao lava, o se mea sa ia manatu o se manu. Ina ua tau lalata atu i ai sa ia iloina ai o se tagata ma ina ua matuai latalata atu lava ia te ia sa ia iloa ai o lana uo. E mafai ona e vaai i mea na e manao ou mata e vaai i ai. O nisi o tagata sa faifaima faatasi ma Iesu sa na ona latou vaai ia te Ia o se atalii o Iosefa le kamuta. O isi sa manatu o ia o se tagata ua inu tele i le uaina po o se tagata onā ona o ana upu. Ae o isi o loo latou manatu o ia ua ulufia i temoni. Sa na o tagata amiotonu lava sa latou vaai atu ia te ia o le Alo o le Atua. Seiloga lava e mama lou loto ona faatoa mafai lea ona e vaai i le Atua, e le gata i lea o le a mafai ona e vaai i le ‘Atua’ po o le lelei i le tagata ma alofa ia te ia ona o le lelei o loo e vaai atu ai ia te ia. Ia faaeteete i le tagata lena e faitioina ma taufaaleaga i le tagata o le Atua po o taitai faauuina a le Alii. O se tagata faapea e tautala mai o ia i se loto eleelea.”

7. **Amuia ē faatupuina le filemu:** “O tagata faatupu filemu e taua o fanau a le Atua. O le tagata faatupu faalavelave, o le faatautee i le tulafono ma le poloaiga, o le taitai o tagata leaga, o le tagata solitulafono e uunaiina e uiga o le tiapolo ma seiloga latou te tuu pe taofia na uiga o le a lauiloa i latou o fanau a Satani ae le o ni fanau a le Atua. Ia aloese outou mai ia te ia o lē na te faatupuina ia masalosologa e ala lea i le faalauaitelina atu o mea paia aua na te le o sailia le filemu ae o le faasalalauina atu o le fenumiai. O le tagata e finau pe lotovale, ma o ana finauga e mo nisi faamoemoega nai lo le sailia o le mea moni, ua solia se mataupu faavae na faataatia mai e le Matai o se vaega taua lea o le atinaeina o se olaga faatamaoigaina atoatoa. ‘O le manuia i le lalolagi, ma le finagalo alofa i tagata o le pese lena na usuina e agelu i le fanau mai o le Alii o le Filemu.”

8. **Amuia ē sauania:** “Talosia ia manatua e le autalavou uma i soo se mea ina ia lapataia pe afai e ulagia ma taufaifai tagata ia te outou ona o lo outou mumusu e fetuunaia o outou tulaga o mea e faasaina, o le faamaoni ma le ola mama ina ia taliaina ai e le lautele o tagata. Afai tou te tutumau i le mea moni e ui lava i ni faatosinaga a tagata po o ni sauaga foi, o le a faapaleina outou i le olioli e faavavau. O ai na te iloa pe atonu e toe moomia foi e pei ona i ai i nisi o le au paia e oo lava i aposetolo, e pei ona i ai i aso ua tuanai, le tuuina atu o le latou ola i le puipuia o le upumoni? Afai e oo mai lena taimi, o le a le tuuina atu i latou e le Atua ina ia faatoilaloina!” (*Decisions for Successful Living*, 57–62).

Tuu atu i tamaiti o le vasega e tusi i luga o se fasi pepa ia Faaamua e sili ona latou ola ai ma Faaamua o le a latou matuai faaogaina ma le atoatoa i o latou olaga.



Mataio 5; 7:15–27 (tagai foi Luka 6:20–36, 44–49). Afai tatou te faia le mea sili tatou te mafai i le tausiga o poloaiga, o le a faaatoatoaina i tatou e le Alii. (25–30 minute)

Fesili atu i tamaiti o le vasega: O le fea poloaiga tou te manatu e faigata atu ona tausii? Lisi a latou tali i luga o le laupapa. Fesili atu: O le fea poloaiga e sili atu ona faigata i poloaiga uma? Afai e le o lisiina ai le atoatoa, ona fai atu lea i tamaiti o le vasega o le Mataio 5:48 o loo faamatalaina mai ai se poloaiga e faigata atu nai lo soo se poloaiga lava o loo lisiina mai i luga o le laupapa. Faitau le Kenese 6:9; Iopu 1:1; 1 Nifae 3:7; Mataupu Faavae ma Feagaiga 107:43; ma le Mose 8:27, ma mafaufau pe mafai ona atoatoa. Ona faitau lea o le Moronae 10:32–33 ma vaai ai pe mafai faapefea ona tatou atoatoa ae pe na faapefea e tagata o loo ta’ua i mau na muamua atu ona faaatoatoaina.

Ae le’i amataina le vasega, ia ave se pepa telē po o se pepa lautele ma tusi ai i mataitusi lapopoa le, “Ia Atoatoa e pei o le Tama Faalelagi.” Faafao ma tusi ai ni vaega se sefulufitu o se paso i le pito i tua. Tusi se mau mai le siata o loo i ai i luga o vaega taitasi, ona ‘oti’oti lea o vaega o le paso.

Uiga o le Atoatoa

Mataio 5:3	Ia mativa i le agaga (lotomauualalo)
Mataio 5:5	Ia agamalu
Mataio 5:6	Fia ai ma fia inu i le amiotonu
Mataio 5:7	Ia alofa atu
Mataio 5:8	Ia loto mama
Mataio 5:9	Ia faatupu filemu
Mataio 5:13–16	Ia taua i tagata; ia fai ma faataitaiga lelei
Mataio 5:19–20	Tausi poloaiga ma ia amiotonu
Mataio 5:21	Aua le fasioti tagata
Mataio 5:22	Aua le ita ma aua le taufaifai i tagata
Mataio 5:23–25	Ia fai se faaleleiga ma tagata
Mataio 5:27	Aua ne’i faia ni uiga eleelea i soo se auala
Mataio 5:28	Ia mafaufau i mafaufauga mama
Mataio 5:31–32	Galue mo se faaipoipoga faamanuaina ae aloese mai le tatalaina o se faaipoipoga
Mataio 5:33–37	Ta’u atu le mea moni ma ia faamaoni i lau upu
Mataio 5:38–42	Ia loto faamagalalo, alofa, ma loto foai
Mataio 5:43–44	Alofa ma tatalo mo ou fili

I totonu o le vasega, tusi le *Ia Atoatoa e pei o le Tama Faalelagi* i luga o le laupapa. Tufatufa atu vaega o le paso i au tamaiti o le vasega, faamalamalama atu afai e sa’o ona tuufaatasi le paso o le faaupuga lena o le a maua mai ai. Ta’u atu i tamaiti o le vasega o le upu *atoatoa* o loo i le Mataio 5:48 e sau mai le upu Eleni o le *teleios*, lea e mafai foi ona faaliliuina o se “mea atoa” po o le “atoa lelei.” Faaoga lena faaogaina, o apoapoaga a le Faola o loo i le Mataio mataupu 5 e mafai ona avea ma ni vaega o se paso lea e mafai ona faataunuuna uma ona faatoa mafai lea ona atoatoa o se tasi.

Fai atu i tamaiti o le vasega e vaai i mau o loo i tua o a latou vaega o le paso. Fai atu ia i latou e tusi ia uiga o le atoatoa o loo i a latou mau, ia tusi muamua i luga o le vaega o le paso ona tusi ai lea i luga o le laupapa i lalo ifo o le *Ia Atoatoa e pei o le Tama Faalelagi*. (E le tau tulua ia tutusa lelei ma faaupuga o loo i luga o le siata.) Ona tuu atu lea ia i latou e galulue

faatasi ma isi tamaiti o le vasega e tuufaatasi le paso. A uma loa le paso, ona aveese lea o se vaega e tasi ma fesili atu:

- Pe o atoatoa pea le paso, pe afai e misi se vaega e tasi?
- O le a le umi e te tauivi ai mo le atoatoa?
- O le a le umi o le taimi e te manatu o le a alu ai ina ia mauaina?

Faitau le Mataupu Faavae ma Feagaiga 67:13 ma le upusii lenei ina ia fesoasoani ai i tamaiti o le vasega ia malamalama o le avefa ma se tasi e atoatoa e umi lava se taimi o tau saili ma e na o le fesoasoani lava a le Alii e maua ai. Na faamalamalama mai e Elder Bruce R. McConkie:

“E leai se tasi e atoatoa i lenei olaga. . . . O le atoatoa ia Keriso o se faagasologa.

“Tatou te amataina i le tausia o poloaiga i le asō, ma tatou tausia nisi poloaiga a taeao. . . . E mafai ona tatou atoatoa i nisi mea laiti. . . .

“Afai tatou te fuafuaina se auala ina ia atoatoa ai, ma ia auauai, o lea laasaga ma lea laasaga, o loo tatou faaatoatoaina ai o tatou agaga e ala lea i le faatoilaloina o le lalolagi, ona matuai faamautuina lea—e leai ma se fesiligia—o lo tatou mauaina o le ola e faavavau. . . . Afai tatou te fuafuaina se auala ma mulimuli i ai i le mea e gata mai ai lo tatou malosi i lenei olaga, ona tatou mavae atu lea ma lenei olaga o le a tatou faaauau ai pea lava i le lea lava auala. . . .

“Na tauina mai e le Perofeta o [Iosefa Samita] ia i tatou e faapea e tele mea e ao ona faia e tagata, e oo lava i talaatu o le tuugamau, ina ia galueaina ai lo latou faaolataga” (“Jesus Christ and Him Crucified,” 1976 *Devotional Speeches of the Year* [1977], 399–401).

Ina ia faatinoina lenei tulaga, ia faatulaga ia kesi po o nofoa i totonu o le potu e fai ai se pa e pupuni ai le auala. Ona fusi lea o mata o se tamaitiiti o le vasega ma fai atu i ai e savali i le auala ae na o au faatonuga lava e taitaiina ai o ia. A mae’a ona e fesili atu lea:

- O le a le fesoasoaniga na e moomia ina ia e uia ai le auala?
- O le a se mea semanu e tupu pe anafai e na o au lava taumafaiga e te faalagolago i ai?

Faitau le Mataio 7:15–27 ma vaai pe faafia ona faaaoga e le Alii le upu “faia” i nei fuaiupu. O le a se taua o a tatou upu ma galuega i lo tatou faaolataga? Faitau le 2 Nifae 25:23 ma fesili atu i tamaiti o le vasega e faatusatusa i le faaitaiga lea na faia i le auala na pupunia.

- O ai tagata e toalua ia e i ai le la vaega o loo faatinoina i lo tatou taumafai atu i le atoatoa?
- O ai le tagata lea o loo i lenei fuaiupu e pei o le tagata lea sa fusi ona mata?
- O ai le leo ta’iala?

Mataio 5:7; 6:14–15; 7:2, 12 (tagai foi Luka 6:37–42). O mea tatou te faia i isi e le gata ina aafia ai mea e faia mai e isi ia i tatou ae faapea foi i le auala o le a tausia ai i tatou e le Alii.

(10–15 minute)

Ia valaaulia ni tamaiti o le vasega se toatolu ina ia auai i le faatinoina o se tala. Ia valaaulia se tasi o tamaiti o le vasega e tutu i fafo o le potu mo se minute lea o le a ia le mafai ai ona lagonaina mea o loo e ta’uina atu i isi. A alu loa i fafo le tamaitiiti o le vasega, ona e faamalamalamaina atu loa lea i isi tamaiti o le vasega e toalua e faapea, afai e toe foi mai i totonu le tamaitiiti o le vasega muamua, e tatau i se tasi o i laua ona fai faalelei o ia i se auala faauo (mo se faaitaiga ia faatalofa atu i ai, ataata atu i ai, vaai atu i ai, ma fesili atu i ai po o a mai o ia) ae o le isi tamaitiiti o le vasega e tatau ona le amanaiaina o ia (‘aue ne’i vaai atu i ai, u i ai lona tua, ma isi mea faapea). A maea ona toe valaauliina atu le tamaitiiti o le vasega o loo i fafo i totonu o le potu ma maitauina uiga o isi tamaiti o le vasega e toalua, ia fesili atu:

- O le a sou lagona ina ua uma ona outou “feiloai” ma nei tamaiti o le vasega e toalua?
- O le fea o le toalua lenei e te manao e faatasi atu i ai?
- O a ni mea na e manao e fai i le tamaitiiti o le vasega lea na faaali atu ni uiga faauo?
- O a ni ituaiga lagona na oo ia te oe i le tamaitiiti o le vasega lea sa faasia atu ia te oe?

Ia valaaulia le vasega e faitau le Mataio 7:12 ma vaai ai pe faapefea ona faatatau lenei fuaiupu i le tala sa faatinoina. Ta’u atu ia i latou faapea o le apoapoiga ina ia e faia atu i isi e pei ona e manao i isi e fai mai ia te oe ua lauiloa o le Tulafono Faaauo. ia fetufaai atu le saunoaga lenei mai ia Peresitene Ezra Taft Benson:

“O le fua faatatau mo fegalegaleaiga faamanuiaina ma isi e mafai ona aoteleina i le tulafono lena ua lauiloa o le Tulafono Faaauo. . . . O le auuina atu i isi ma le naunautai ma le lē manatu faapito e tatau ona avefa lea ma se tasi o o tatou uiga silisili. E le o se mea tatou te filifili pe fai pe leai. O se tiute, o se poloaiga paia” (*The Teachings of Ezra Taft Benson*, 447).

- I lou lava malamalama, pe ua e faamaonia ea le moni o lenei mataupu faavae?
- E faapefea ona tatou taulimaina i latou o e ua agaleaga mai ia i tatou?
- O a ni uiga faaalua o tagata o e na e agalelei atu i ai ina ua maea ona latou agaleaga mai ia te oe?

Faitau le Mataio 5:7; 6:14–15; 7:2 ma vaai ai pe faapefea ona faatatau ia le mataupu faavae na aaoaina i nei fuaiupu i lo tatou va ma le Alii.

- O le a le mea o loo aao mai e nei fuaiupu e uiga i le Alii?

- E tusa ai ma nei fuaiupu, o le a le mea o loo faalagolago i ai le tausiga o i tatou e le Alii?
- O le a sou lagona i lou iloaina lea o le a sa’o ma faamaoni le Alii?
- E mafai faapefea e le malamalama i lenei mataupu faavae ona aafia ai le auala tatou te taulimaina ai isi tagata?



Mataio 5:14–16 (Mau Tauloto tagai foi Luka 8:16; 11:33). E tatau ona tatou mulimuli i le malamalama o Keriso ma ia faailoa atu lena faataitaiga ina ia faali atu ai i isi le auala e o mai ai ia Keriso. (10–15 minute)

Tapē uma moli o loo i totonu o le potu ae ki se moliuila. Fai atu i tamaiti o le vasega ina ia latou manatunatu e pei lava o loo latou i ai i totonu o se ana umi lava ma e na o le pau le auala e saili ai lo latou auala i fafo o le malamalama lea o lau moliuila. Ia valaaulia tamaiti o le vasega e faitau le Mataio 5:14–16 a o e uuina le moliuila i luga o le tusi.

- E faapefea ona faatusatusa le malamalama o le moliuila i totonu o le ana i le malamalama o loo i ai i nei fuaiupu?
- E mafai faapefea e a tatou faataitaiga ona aafia ai isi e pei ona taitaiina e se moliuila i latou o loo i le pouliuli?

Faaaoga fesili nei e fesoasoani ai i tamaiti aoga ia malamalama o Iesu Keriso o le pogai lea o le malamalama lea e tatau ona tatou mulimuli atu i ai:

- Faitau le Moronae 7:16–17. O le a le mea lea o loo fananau mai ma tagata lea latou te maua ai se lagona o le sa’o ma le sese?
- E tusa ai ma le Mataio 5:14–16, o le a le malamalama lea e oo mai i olaga o tagata amiotonu ma aafia ai isi mo le lelei?
- Faitau le Mataupu Faavae ma Feagaiga 88:5–13. O ai le pogai o le malamalama?
- Faitau le 3 Nifae 15:12. O ai Na te fetuفاai atu i ai lena malamalama?

Ta’u atu i tamaiti o le vasega, afai tatou te maua le malamalama, ua ia te i tatou le tiutetauave o le faasusuluina atu lea i isi. Ae tatau ona ‘aua ne’i galo ia i tatou le e ana le malamalama lea e ao ona tatou faasusulu atu i le lalolagi. Na faamalamalama mai e le Faola, “Faauta, o a’u o le malamalama tou te sisii i luga” (3 Nifae 18:24). Fesili atu: E faapefea ona aafia isi i a tatou faataitaiga? Faitau le Alema 39:11 ma vaai ai pe na faapefea ona aafia isi i faataitaiga a Korianetona. Ia valaaulia tamaiti o le vasega e fetuفاai atu ni mea na tutupu i tagata na oo i ai ni aafiaga lelei po o ni aafiaga leaga ona o faataitaiga a isi. Fesili atu: E tusa ai ma le Mataio 5:16, afai e vaai mai isi i a tatou galuega lelei, o ai e tatau ona latou naunau e mulimuli atu i ai?

Mataio 5:21–48 (tagai foi Luka 6:29–36). Na faataunuuina e Iesu Keriso le tulafono a Mose

ma toefuataiina le atoatoaga o le talalelei, ma aumaia le tulafono mauuluga. (10–15 minute)

Aumai ni poloka taalo a tamaiti i le vasega. Tusi i luga o le laupapa le *Ua faataunuuina e Keriso le tulafono a Mose ma aumaia se tulafono mauuluga*. Ia valaaulia se tamaitiiti o le vasega e faaoga ia poloka taalo e fausia ai se mea e foliga i le faaupuga o loo i luga o le laupapa ona faamalamalama atu lea pe faapefea ona faatatau i le faamatalaga. (Mo se faataitaiga e mafai e se tamaitiiti ona fausia se faavae e faatusa i ai le tulafono a Mose ae o le isi vaega uma o le fale e faatusa i ai le tulafono mauuluga a Keriso.) Faitau faatasi ma tamaiti o le vasega le Mataio 5:21–48 ma saili ai ia faataitaiga o le faaopoopoina atu e Keriso o tulafono fou i tulafono na Ia faavaeina e ala mai ia Mose. Tusi i luga o le laupapa mea na e mauaina (faaoga le siata o loo auuina atu faatasi e tagatagai i ai).

O le Tulafono Tuai a Mose	O le Tulafono Fou a Keriso
Aua e te fasioti tagata (tagai Esoto 20:13)	Aua e te ita (tagai Mataio 5:22)
Aua e te mulilua (tagai Esoto 20:14)	Aua ne’i i ai ni ou manatu manaonao (tagai Mataio 5:28)
Aua ne’i faatete’aina se ulugalii e aunoa ma se tusi alei (tagai Teuterome 24:1–2)	Aua ne’i tete’a se’i vagana ua mulilua (see Mataio 5:32)
Aua ne’i solia ni tautoga na faia i le suafa o le Alii (tagai Numera 30:2)	Aua ne’i faia ni tautoga; ua lava lau upu (tagai Mataio 5:34–37)
Faamasinoga—sui le mata i le mata (tagai Levitiko 24:20)	Alofa—lilii le isi alafau (tagai Mataio 5:39–42)
Alofa i lou tuaoi (tagai Levitiko 19:18)	Alofa i lou fili (tagai Mataio 5:44–47)

Fesili atu i tamaiti o le vasega: E fia ni tulafono a Mose o loo tatou talitonu pea i ai ma faaogaina? Faitau le Mataio 5:48 ma fesili atu: E faapefea ona faatatau le tulafono fou lea na faatuina e Keriso i le avea ma se tagata atoatoa?

Mataio 6:1–23. E le tatau ona tatou mitamita i a tatou galuega. (15–20 minute)

Feula se paluni mo le vasega e aunoa ma le nonoaina. Ta’u atu i tamaiti o le vasega e te manao e faaali atu ia i latou le ‘ea o loo i totonu o le paluni. Faaalu le ‘ea i fafo. Fesili atu: O le a le aoga o se paluni pe a leai se ‘ea i totonu?

Ta’u atu i tamaiti nisi o mea e sili atu ona taofiofia ia i tatou ae aua ne’i fetuفاaiina atu i isi. Ia valaaulia tamaiti o le vasega e faitauina le Mataio 6:1–4 e uiga i mea alofa, fuaiupu 5–7 e uiga i le tatalo, ma le fuaiupu 16–18 e uiga i le anapogi. Ia talanoaina fesili nei:

- E faapefea ona avea le faaalii o uiga amiotonu e pei o le faaaluina i fafo o le ‘ea o se paluni?
- E faapefea ona aafia lo tatou foai atu i e matitiva, tatalo, po o le anapogi i lo tatou faalialiavale?

Ia fetufaai atu le tala lenei mai ia Elder Thomas S. Monson, o se uso o le Korama a Aposetolo e Toasefululua:

“Talu ai nei lava, sa ou oo atu ai i le laulau pito i luma o se falema’i telē lava e saili ai le numera o le potu o le ma’i o loo alu atu e asiase i ai. O lenei falema’i, e pei lava o le tele o falema’i i le lalolagi, o loo tele se galuega o loo faia i ai e toe faatele ai. O tua atu o le laulau o loo nofo ai le tali telefoni o loo i ai se laupapa mata-gofie lava o loo tusia ai i luga suafa o i latou sa foaiina atu ni tupe ua mafai ai ona faia lenei galuega o le faateleina o le falemai. O igoa o i latou uma na foaiina le ta’i \$100,000 o loo tusia faalelei, i luga o ni apamemea o loo tautau ifo i se filifili iila mai le laupapa autu.

“O igoa o i latou sa foai atu e lauiloa. O kapeteni o feaatauaiga, o fale gaosi mea tetele, o polofesa o aoga—sa i ai uma lava iina. Sa ou lagonaina le loto faafetai mo lo latou alofa faamaoni. Ona tulaui atu lea o la’u pupula i se isi fasi apamemea e ese mai ai lava—e le o i ai se igoa i luga. E tasi lava le upu, ma e na o le tasi lava le upu, o loo tusia ai:

‘Leiloa.’ Sa ou ataata ma ou ofo po o ai lenei tagata foai e leiloa le igoa. E mautinoa lava o loo maua e ia se olioli filemu e le o iloa e se tasi. . . .

“Tatou tepa a’e ia i luga a o tatou agai i luma i le galuega a lo tatou Atua ma o tatou uso a tagata. . . . O le a faamalamalamaina ai o tatou loto, o le faapupulaina ai o tatou olaga, ma o le a faatamaoigaina ai foi o tatou agaga.

“O le auaunaga alofa e leiloa e mafai ona leiloaina e tagata—ae o le meaalofa faapea ma lē na foaiina o loo silafia e le Atua” (i le Conference Report, Ape. 1983, 73, 76; po o le *Liahona*, Iulai 1983, 55, 57).

Ta’u atu i tamaiti o le vasega na faataitai mai e le Alii lava Ia lenei mataupu faavae e ala lea o lona tauina soo atu i ai latou na Ia faamaloloina ina ia “‘aua ne’i ta’uina atu i se tasi” (Mataio 8:4). Faitau le Mataio 19:16–17 ma vaai i ai i uiga o le Faola lea e tatau ona tatou faataitai. Fesili atu:

- E te manao e mafuta pea i tagata o e latou te mitamita pea i latou i lo latou lava lelei po o tagata latou te taofiofia na mea ia i latou lava? Aisea?
- E faapefea ona tatou ola pe a i ai i luma o tatou matua ma taitai o le Ekalesia?
- E faapefea ona tatou ola pe a tatou le faatasi ma i latou?
- Faitau le Mataupu Faavae ma Feagaiga 20:77. E mafai faapefea ona tatou faaali atu ia Iesu o loo tatou “manatua pea o ia”?

Ia faailoa atu o se tasi o auala sili ona lelei e faaali atu ai i le Alii tatou te manatua pea o Ia o le “tausia lea o ana poloaiga ua ia tuuina mai ia i tatou” i taimi uma lava, ae le seiloga e vaavaai mai isi tagata.

Faaliga: O le mataupu faavae o le aua ne’i avatu ni a tatou meaalofa i luma o tagata e ono feteenai pe a faatusatusa atu i le mataupu faavae o le faasusulu atu lo tatou malamalama (tagai Mataio 5:14–16). Fesoasoani i tamaiti o le vasega ia malamalama tatou te le agasala pe a vaai mai isi i a tatou galuega lelei, faatoa tatou agasala lava pe a tatou faia ma le faatalapelo po o le faalialia, e fai ona o le vaaiga a tagata.



Mataio 6:5–13; 7:7–11 (tagai foi Luka 11:2–4, 9–13). Na tuuina mai e le Tama Faalelagi ia i tatou le tatalo e avea o se auala e faailoa atu ai a tatou faafetai ma manaoga ia te Ia. Na te taliina mai a tatou tatalo ma e finagalo e faamanuia i tatou. (15–20 minute)

Aumai se telefoni i le vasega. Fesili atu i tamaiti o le vasega po o le a le tele o le taimi i se aso latou te faaaluina e talanoa ai ma a latou uo. Fesili atu i ai latou po o le a so latou manatu pe a latou mauaina se telefoni lenei mai se uo. Sii i luga le telefoni ma faapea atu: “Talofa,” (ta’u se igoa o se tasi o tamaiti o lau vasega). “O lea ou te valaau atu pe e te manao tatou te faatasi nanei e faia tatou meaa’oga mo le tatou suega o le talafaasolopito.” (Aua ne’i faatali umi mo se tali.) “Ma ua ou matuai leiloa lava po o le a la’u mea a fai i le faaiuga o lenei vaiaso. Pe tatau ona ou alu i tifaga lea sa tatou mananao tatou te matamata i ai pe tatou te o i se taaloga? O le a sou manatu?” (Ae le’i lava se taimi e tuuina mai ai se tali, ia faatofa atu i ai ma tuu i lalo le telefoni.)

Fesili atu i tamaiti o le vasega:

- O a faafitauli e oo ia te oe pe afai e te la’i faatali mo se tali ina ua e talanoa atu i au uo i le telefoni?
- Afai e le’i maua e au uo se avanoa e tali mai ai i au fesili, o le a le umi o le a latou faalogologo mai ai pea ia te oe?
- E faapefea ona tutusa lenei telefoni ma nisi o tatalo?

Ia faamalamalama atu na aoaoina i tatou e le Alii lava Ia i le Lauga i luga o le Mauga i le auala e tatalo ai. Faitau ma talanoaina le Mataio 6:5–13, e avea ai le siata o loo auina atu faatasi e avea ma taiala. Pe toe fai ni kopi ma tufa atu, ae faaavanoa pea le koluma taumatau. Tuu atu i tamaiti o le vasega e faitauina ia faamatalaga ma faatumu po o a mea taitasi o loo aoaoina mai e uiga i le tatalo.

O Mea na Aoaoina Mai e le Alii e uiga i le Tatalo

Mataio 6:5–6	Tatalo i le mea lilo ina ia aloese ai mai le faafoliga e amiotonu i luma o tagata.
Mataio 6:7	Tatalo mai le loto, ina ia aloese ai mai le “tautū i upu.”
Mataio 6:9	Tatalo atu i lo tatou Tama o i le Lagi.
Mataio 6:10	Ia manatua o loo silafia e le Atua le mea sili ma ia tatalo atu ina ia faia Lona finagalo.
Mataio 6:11	Tatalo mo mea e manaomia ma manaoga faaletino.
Mataio 6:12	Tatalo mo le faamagaloina mai agasala.
Mataio 6:13	Tatalo ina ia aloese mai faosoosoga.

Ia valaaulia tamaiti o le vasega e faitau le Mataio 7:7–11 ma vaai ai po o a isi mea na aoaoina mai e le Alii i le Lauga i luga o le Mauga e uiga i le tatalo. Ia fetufaai atu le saunoaga lenei mai ia Elder Boyd K. Packer:

“E leai se savali e sili atu ona ta’ua soo i totonu o tusi-tusiga paia nai lo le manatu faigofie o le ‘Ia ole atu, ma o le a outou maua ai’ (MFF 4:7)” (i le Conference Report, Oke. 1979, 30; po o le *Liahona*, Mati. 1980, 21).

Faitau le Alema 29:1–4 ma fesili atu: O le a le lapataiga lea na tuuina mai e Alema e tatau ona tatou mafaufau i ai pe a tatou tatalo? Faitau le Mataio 26:39 e vaai ai pe na faapefea ona faaaogaina e Iesu lenei mataupu faavae i Lona lava soifuaga.

Faaali atu i tamaiti o le vasega se ata o Moronae o loo tatalo a o ia tanumia ia papatusi auro (Ua Nanaina e Moronae ia Papatusi i le Mauga o Kumora [Moronae 10], numera. 62462). Usu pe faitau upu o le viiga “O le Tatalo o Moomooga Moni o le Agaga” (nu. 80), ma ia valaaulia tamaiti o le vasega e tusa i luga o se fasi pepa se mea latou te mafaia ona fai e faaleleia ai a latou tatalo.



Mataio 6:24 (Mau Tauloto; tagai foi Luka 16:13). E le mafai ona tatou auauna atu i le Atua ma mea o le lalolagi. (10–15 minute)

Tuu le upu *Atua* i luga o le puipui ma le upu *Faalelalolagi* i le isi puipui faafeagai. Ia valaaulia se tamaitiiti o le vasega e tu i luma o le vasega ma faasaga i se tasi o puipui o puipui e lua. Ona fai atu lea i le tamaitiiti o le vasega e faliu ma faasaga atu i le isi puipui. Fesili atu: E mafai ona faasaga i puipui uma e lua i le taimi e tasi? Ia valaaulia tamaiti aoga e faitauina le Mataio 6:24, ma fesili atu i ai pe faapefea ona avea le auauna atu i le Atua ma Mamone e pei o le taumafai e faasaga i puipui uma e lua i le taimi e tasi.

Ia fetufaai atu le saunoaga lenei mai ia Elder Bruce R. McConkie:

“O le Mamone o se upu Aramaika mo ‘oa. O lea na fetalai mai ai Iesu, ‘E le mafai ona outou auauna i le Atua ma ‘oa, po o mea faalelalolagi, lea e masani lava o le tuinanau i tupe.’” (*Doctrinal Feagaiga Fou Commentary*, 1:240).


Faitau le 1 Timoteo 6:10 ma fesili atu i tamaiti o le vasega:

- E tusa ai ma lenei mau, o le a le pogai o mea leaga uma?
- E mafai faapefea ona tatou iloina le mea e sili ona tatou alolofa i ai?
- O le a le mea e te mafaufau i ai pe a leai se mea e te mafaufau i ai?

Tuu atu i tamaiti o le vasega e faitauina le Mataupu Faavae ma Feagaiga 20:77 ma lisi mai ia feagaiga ia latou te osia lea e mafai ai ona fesoasoani ia i latou ia alolofa i le Atua nai lo mea faalelalolagi.

Mataio 8–10

O le Soifuaga o Iesu Keriso



Faatomuaga

E masani ona faatulagaina e Mataio ia faamatalaga o lana Talalelei i autu ae le o le faasologa o mea na tutupu i le galuega a le Faaola. Mo se faaitaiga, na ia tuuvaegaina le tele o vavega a Iesu Keriso i totonu o le mataupu e 8 ma le 9, o le tele o gaoioga o le Sapati i totonu o le mataupu 12, ma le tele o faataoto i totonu o le mataupu e 13. E masani ona faaafia e Mataio ia faamatalaga mai le Feagaiga Tuai o loo faaalia ai o Iesu Keriso o le Mesia folafolaina (tagai i le faatomuaga o le Talalelei a Mataio, i. 20). A o suesueina le Mataio 8–10, ia tagai mo upusii a Mataio mai le Feagaiga Tuai (tagai Mataio 8:17; 11:10, 14; 12:17–21; 13:35) ma mafaufau po o le a se mea e mafai ona tatou aoaoina mai le auala na faavasegaina ai e Mataio ia mea na tutupu.

Suesue ma le agaga tatalo le Mataio 8–10 ma mafaufau i mataupu faavae nei ae le'i sauniaina au lesona.

O Nisi Mataupu Faavae Tava o le Talalelei e Saili Iai

- O ituaiga vavega eseese na faia e Iesu Keriso na faaalia ai Lona mana i mea uma lava (tagai Mataio 8–9; tagai foi Mosaea 4:9; Alema 26:35).
- Na tuuina atu e Iesu Keriso Lana pule i Aposetolo ma valaauina i latou o ni molimau faapitoa ia Ia ma Lana misiona (tagai Mataio 10:1–15; tagai foi Galuega 4:33; MFF 107:23).
- A o tatou taliaina (usiusitai) i auauna a le Alii, ua tatou taliaina le Alii. O se vaega faavae lea o le tautoga ma le feagaiga o le perisitua (tagai Mataio 10:40–41; tagai foi MFF 1:38; 84:33–39).

Fautuaga mo le Aoao Atu

Filifili mai manatu nei, pe faaoga ni ou lava manatu, a o e sauniaina ia lesona mo le Mataio 8–10.



Ata Vitio o le Feagaiga Fou ata lona 5, “O Lou Faatuatua ua e Ola Ai” (16:17), e mafai ona faaaogaina e aoao

atu ai le Mataio 9. Pe fesoasoani foi e faapaleni ai ata vitio i le gasologa o le tausaga faaleaoaoga, e mafai foi ona e faaogaina leni ata e aoao atu ai le Mareko 5. (tagai *Vitio Taitala o le Feagaiga Fou* mo fautuaga e aoao atu ai.)

Mataio 8–10 (tagai foi Mareko 1:29–34; 4:35–6:11; Luka 4:38–41; 5:17–26; 7:1–9:5; 11:14). O ituaiga vavega eseese na faia a le Alii na faaalua ai e i ai Lona mana i mea uma. Na ia faasafua atu leni mana i Aposetolo. (15–20 minute)

Fai atu i tamaiti o le vasega e mafaufau faapea ua folafolaina mai le mana e pule i ma'i, e pule i elemene, e pule i agaga leaga, po o le oti. Ona manatunatu lea i fesili nei:

- O le fea o nei mana o le a e filifilia? Aisea?
- O a nisi o auala e mafai ona e faamanuiaina ai isi e ala i leni mana?

Ia faamalamalama atu faapea na umia e Iesu ia nei mana uma ma o vavega o loo tusia i le Mataio 8–9 ua fesoasoani e faaali mai ai Lona mana i mea uma lava (tagai foi Mosaea 4:9; Alema 26:35).

Tuu atu i tamaiti o le vasega e tusia ia ulutala e fa mai le siata o loo auina atu i luga o se fasi pepa. Ia lisi mau mai le siata i soo se faasologa i luga o le laupapa. Ia valaaulia tamaiti o le vasega e saili ia mau taitasi ma tusi, faatasi ai ma se faamatalaga puupuu o le vavega, i le koluma sa'o.

Pule i Ma'i	Pule i Elemene	Pule i Agaga Leaga	Pule i le Oti
Faamaloloina se lepela (Mataio 8:2–4)	Faafilemuina le vasa sousou (Mataio 8:18–27)	Tuliese o le tele o temoni i le lafu puua (Mataio 8:28–34)	Faatuina mai o le afafine o Iairo mai le oti (Mataio 9:18–19, 23–26)
Faamaloloina o le auauna a le taitai o le toaselau (Mataio 8:5–13)		Tuliese o se temoni mai se tagata sa gūgū (Mataio 9:32–33)	
Faamaloloina o le tina o le avā a Peteru (Mataio 8:14–17)			
Faamaloloina o le tagata sa maua i le supa (Mataio 9:2–8)			
Faamaloloina o le fafine sa maua i le puna toto (Mataio 9:20–22)			
Faamaloloina o ni alii tauaso se toalua (Mataio 9:27–31)			

Faaoga fesili nei e fesoasoani ai i tamaiti o le vasega ia iloa le sootaga i le va o le Mataio 8–9 ma le Mataio 10:

- O le a se ulutala lelei lava mo le siata? (O tali talafeagai e aofia ai le “O Vavega a Iesu” po o le “E i le Keriso ia Mana Silisiliese.”)
- E faapefea ona aafia ai lou faatuatua i le iloaina lea o loo i ai i le Atua leni ituaiga mana?
- O ai na tuuina atu i ai e le Alii leni mana po o le pule?
- O ai o loo umiaina leni lava mana i aso nei? (tagai MFF 20:2).

Ia valaaulia tamaiti o le vasega e faitauina le Mataio 10:1–4. Ia tuuina atu ia fesili nei, ma lisi tali a tamaiti o le vasega i luga o le laupapa:

- O ai igoa o Aposetolo e Toasefululua?
- O a mana o le perisitua na tuuina atu e le Faola ia i latou?
- Faitau le Mataio 10:7–8. O a isi mea o loo ta'ua mai i nei fuaiupu na tuuina atu ai le mana o le perisitua i Aposetolo e faia?

Ia fetufuai ma le vasega le faamatalaga o loo maua i le faatomuaga o le Mataio 8–10 e uiga i le auala na tuuvaegaina ai e Mataio ia manatu ma mea na tutupu faatasi. Fesili atu: O le a sou manatu aisea na faasosoo ai e Mataio le tala i vavega ma se tala i le valaauina o Aposetolo e Toasefululua?

Mataio 10:1–15 (tagai foi Mareko 6:7–11; Luka 9:1–5). Na tuuina atu e Keriso Lana pule i Aposetolo e faamalolo ai e mamai, tuliese ai temoni, ma talai atu ai le talalelei. Ua ia te i latou foi se tiutetauave faapitoa o le avea ma molimau o Iesu Keriso ma Lana misiona. (20–25 minute)

Ia uu atu i luga ia ki o lau taavale, ma fai atu i se tamaitiiti o le vasega e sau i luma o le vasega. Ta'u atu i le tamaitiiti o le vasega, “Ia mafaufau faapea ua ou sau i le vasega ae ua galo ona aumaia se mea ma ua ou talosaga atu ia te oe e faaogaina la'u taavale e te alu ma aumai ai. Ona mafaufau lea faapea ua taofia oe e le leoleo i luga o le auala.” Ia tuuina atu ia fesili nei:

- Pe o le a e oo atu ea i se tulaga faigata? Aisea e leai ai? (Aua ua tuuina atu ia te oe faatagana, po o le pule.)
- Aisea e taua ai le i ai o le pule tonu?
- O le a faapefea ona ese le tulaga ma le leoleo pe ana faapea na e aveina la'u taavale e aunoa ma le faatagana?
- E faapefea ona tali tutusa leni mea ma le mauaina ma le faaogaina o le perisitua a le Atua?
- O le a le taua o le i ai o le pule a Keriso e faia ai Lana galuega?

Ia valaaulia tamaiti o le vasega e faitauina le Mataio 10:1–4, ma fesili atu: O ai na faasafua atu i ai e Iesu Lana pule? Ia lisi igoa o Aposetolo i luga o le laupapa. Faitau le Mataio 10:5–8 ma fesili atu: O le a le mea na poloaiina ai ia Aposetolo e faia i le mana o le Faola? (tagai f. 1, 7). Tuu atu i tamaiti o le vasega e faatusatusa i le Mataio 10:5–8 ma le Galuega 4:33 ma le Mataupu Faavae ma Feagaiga 107:23, ma fesili atu:

- O a isi tiutetauave e o mai faatasi ma lenei pule?
- E faapefea ona tuu mai lenei pule e galue ai mo le Alii? (tagai Mataupu Faavae o le Faatuatua 1:5).
- O fea o i ai lenei pule i aso nei? Na faapefea ona oo mai? (tagai Talafaasolopito—Iosefa Samita 2:72).
- O a ni faamaoniga o loo ia i tatou i le Ekalesia i aso nei e faaalua ai na toefuataiina mai le perisitua?
- Na faapefea ona e molimauina le mana o le perisitua i lou olaga? (*Faaaliga*: Aua ne'i faamalosa ia ni tali e matuai patino i le tagata lava ia.)

Ia fetufaai atu ia le vaega lenei i tamaiti o le vasega e faamalamalama atu ai le tulaga moni lenei faapea o le mana lava o le perisitua lea na tuuina atu e Iesu i Ana Aposetolo o loo i ai pea i aso nei. O le mea na tupu, na ma'i tigaina toetoe a oti ia Ella Jensen, le tama a le tuafafine o Peresitene Lorenzo Snow e sefuluiva ona tausaga le matua i le fiva. Na talosagaina e matua o Ela ia Peresitene Snow, o lē na o mai faatasi ma Rudger Clawson, o le peresitene o le siteki a Ela ma mulimuli ane avea ma Peresitene o le Korama a Aposetolo e Toasefululua. Na faamatalaina e Peresitene Clawson:

“Ina ua ma ulufale atu i le fale, sa matou feiloai ma le Tuafafine o Jensen, o lē sa matuai lē mautonu lava ma mataalia. Na ma oo atu i tafatafa o le moega o Ela. . . .

“Na faliu mai Peresitene Snow ma faapea mai ia te au: ‘Le Uso e Clawson, pe e te faauuina o ia,’ ona ou faia loa lea. Ona ma faaee lea o o ma lima i luga o le ulu ma sa faamauina le faauuga e Peresitene Snow, o lē na faamanuiaina o ia faapea ma isi mea, ma faaogaina lenei faaupuga, i se faaleoga faapoloa'iina, ‘Foi mai Ela, foi mai. O lau galuega i le lalolagi e le'i mae'a, fo'i mai.’”

Na faaaauuina e le tama o Ela, o Jacob Jensen le tala:

“Ina ua maea le tuuina atu e Peresitene Snow o le faamanuiaga, sa ia faliu mai i lo'u toalua ma a'u ma faapea mai; ‘Ia aua loa ne'i toe faanoanoa pe toe tagi. O le a lelei mea uma. O loo pisi lava i ma'ua ma le Uso o Clawson ma ua tatau ona ma o. . . .’

“Na tumau ai ia Ela i le tulaga lenei mo le sili atu ma se itula ina ua mavae ona faamanuiaina o ia e Peresitene Snow, po o le sili atu foi ma le tolu itula talu ona oti o ia. Sa ma nonofo ai iina i tafatafa o lona moega ma maitauina o ia, ae na faateia i ma'ua ma lona tina ina ua ma vaaia le pupula o ona mata. Sa fetilofilofai solo o ia i totonu o le potu, ma iloa ai i ma'ua o loo ma nonofo ai iina, ae o loo i ai lava le tagata o loo ia sailia, ma o le mea muamua lava sa ia tautala ai: ‘O fea o ia? O fea o ia?’ Na ma fesili atu, ‘O ai? O fea ia ai?’ ‘Aisea,

o Brother Snow,’ na ia tali mai ai. ‘Na ia toe faafoi mai a'u.’” (i le LeRoi C. Snow, “Raised from the Dead,” *Improvement Era*, Sept. 1929, 885–86).

Na toe manuia ia Ela mai le ma'i, sa auauna i le Ekalesia, ma faaipoipo atu ia Henry Wright, ma sa maua se fanau e toavalu.

Manatunatu i le tuuina tau o fesili nei:

- E mafai faapefea e le iloaina o le mana o le Atua o loo i ai i le lalolagi i aso nei ona aafia ai i tatou?
- E mafai faapefea e lena malamalamaaga ona avea ma se faamanuiaga i faifeautalaitai?
- E mafai faapefea ona aafia ai le tama po o le tina o se tamaitiiti ma'i?
- O le a se suiga ua faia e lenei mana i lou olaga?
- O a sauniga o le perisitua ua e mauaina i lou olaga?

Ia molimau atu i le moni o le mana o le Atua i le lalolagi i aso nei.

Mataio 10:5–15, 21–35 (tagai foi Mareko 6:8–11; Luka 9:3–5). Na filifilia e le Alii Ana Aposetolo ma tuuina atu ia i latou le mana o le perisitua.

(20–25 minute)

Faali atu se ata o Aposetolo e Toasefululua o loo i ai nei. Afai o au ata o loo i ai ma igoa, ona ufiufi lea o igoa. Tuu atu i tamaiti latou te ta'u maia ma faailoa mai ia ni Aposetolo latou te mafaia ma tusi ia igoa o loo ufiufia. A maea ona e lisiina uma ia igoa, ona tuuina atu lea o fesili e pei o nei:

- O a mea taua e te iloaina e uiga i soo se Aposetolo?
- O a nisi o tala e te fiafia lava i ai e uiga i soo se tasi o nei alii?
- O a ni lauga na latou tuuina mai na aafia ai lou olaga?

Fai atu i tamaiti o le vasega e faitau le mataupu faavae e lima o le faatuatua ma vaai po o le a le mea o loo aoao mai ai e uiga i le auale e valaauina ai se Aposetolo (tagai foi Luka 6:12–13). Sue faatasi ma tamaiti o le vasega i le Mataio 10:1–4 ma vaai ia igoa o uluai Aposetolo a Iesu Keriso. A o sailia e tamaiti o le vasega o latou igoa, ia faapea ona lisiina i luga o le laupapa. Ia molimau atu faapea o nei alii o ni tagata moni lava, ma, e pei foi o a tatou Aposetolo i aso nei e matuai tele so latou aafiaga i olaga o le toatele o tagata.

Fai atu i tamaiti o le vasega e faitau le Mataio 10:5–7 ma vaai ai mo se mafuaaga tonu na filifilia ai e le Alii ia Aposetolo e Toasefululua (tagai foi MFF 29:12). Ia faailoa atu faapea o le aofaiga o Aposetolo e faataua lea i le aofaiga o ituaiga o Isaraelu aua o Aposetolo e Toasefululua e aoaoina ma o le a fesoasoani i le faamasinoina o Isaraelu. Faitau le saunoaga lenei mai ia Elder Orson Pratt, o se tasi o le Korama a le Toasefululua:

“Aisea na filifilia ai ia Aposetolo e toasefululua ae le iva, pe sefulutolu, po o se isi foi numerā? Aisea lava ua faapitoa ai lena numerā? Aua . . . na faauuina e le Alii ina ia . . . faatulagaina ituaiga e sefululua i le lalolagi ma o le a ia faamasinoina i latou. Na Ia faamoemoe e le gata ina tatau ona latou faatulagaina o ni ituaiga i lenei olaga, ae faapea foi i le olaga a sau. Ma ina ia mafai ona faamasinoina uma, o lea ua filifilia ai le toasefululua e faataunuina le galuega, nai lo se isi lava numerā” (i le *Journal of Discourses*, 19:117; tagai foi 1 Nifae 12:9).

Faaaliga: Afai e fesiligia e tamaiti o le vasega pe i ai ia Iuta le Sekara, lea na faalataina ia Iesu i Aposetolo e Toasefululua o e o le a faamasinoina ia ituaiga e sefululua, ia faailoa atu i ai na filifilia ia Matatia e suitulaga ia Iuta le Sekara i le Toasefululua (tagai Galuega 1:21–26).

Atonu e te faaalua ni nai minute e iloiloia ai ia talaaga o Aposetolo a Iesu. Fesoasoani i tamaiti o le vasega e taulotoina ia igoa o le uluai Toasefululua pe faailogaina i totonu o a latou Tusi Paia. Atonu e te manao e tuu atu ia i latou e aoaoina ia igoa o Aposetolo i ona po nei e faapoopo atu i ai pe suitulaga foi i uluai Aposetolo.

Mataio 10:5–42 (tagai foi Mareko 6:8–11; Luka 9:3–5). Na tuuina atu e Iesu i Ana Aposetolo le mana e pule ai i ma’i, faama’i, ma agaga leaga ma aoaoina i latou o le a latou oo i sauaga matautia ae le’i faamae’aina a latou misiona. (15–20 minute)

Fesili atu i tamaiti o le vasega:

- E mafai ona outou lisiina maia ia ni faatonuga po o ni tulafono e tuuina atu i faifeautalāi?
- O le a so outou manatu aisea e tuuina atu ai ia i latou nei faatonuga?

Faitau le Mataio 10:5–14 ma vaai ai mo taiala na tuuina atu e le Alii i le Toasefululua ae le’i auina atu i latou e talai le talalelei. Ia tuuina atu nisi o fesili nei:

- O le a so outou manatu aisea e fesoasoani tele ai nei faatonuga i le Toasefululua?
- O a nisi o mea na faasaina e le Alii na tuuina atu i le Toasefululua e tusa ai ma le latou galuega?
- O le a so outou manatu aisea na ta’uina atu ai e Iesu e ‘aua ne’i aveina ni a latou tupe po nisi lavalava i a latou misiona?

Fai atu i tamaiti o le vasega e faitau lemu ia fuaiupu 16–32. Mafaufau i le tuuina atu o fesili nei a o outou talanoaina ia nei fuaiupu:

- O le a se mea na sili ona faagaetia ai oe mai lenei luitau faaaposetolo?

- Ana faapea o oe o se tasi o lena Toasefululua, o le fea poloaiga po o se faasilasilaga faaperofetaga a Iesu o le a sili ona e maua ai le mafanafana?
- O a afioga a le Faaola o le a sili ona e toafilemu ai?
- O le fea o Ana aoaoga o le a sili ona e lagonaina ai le lotomaualalo?

O le fuaiupu e 35–42 o loo faamanino mai ai le mea o loo manaomia e le Faaola mai ia i latou o e gauai atu i aoaoga a Aposetolo. Tuu atu i tamaiti o le vasega e faitauina ia fuaiupu na ma vaai mo tiutetauave a i latou o e taliaina ia Aposetolo. Ia talanoaina ia fesili nei:

- Talu ai ona o loo i ai a tatou Aposetolo i le lalolagi i aso nei, o le a so tatou manatu i ai ia i latou ma a latou savali?
- O a nisi o savali o loo tuuina mai e Aposetolo ia i tatou i aso nei?
- E mafai faapefea ona tatou faaali atu lo tatou naunautai e mulimuli i ai latou?
- O a faamanuiaga tou te talitonu e oo mai ia i latou o e mulimuli i Aposetolo?


E tele mea ua moomia mai tagata o le Ekalesia i aso nei. O le faamatalaga lenei mai le *Lectures on Faith*, (*Tautalaga e uiga i le Faatuatua*) na tuufaatasia i lalo o le faatonuga a Iosefa Samita, e mafai ona fesoasoani atu i ai:

“Ia tatou manatuaina iinei, o se talitonuga faalelotu e le moomia ai le ositaulagaina o mea uma e le taitai ona lava se mana e atinaeina ai le faatuatua e moomia i le olaga ma le faaolataga. . . . O le ositaulaga lenei, ma e na o le pau lenei, na faauuina e le Atua ina ia tatau ai i tagata ona olioli i le ola e faavavau. . . . Pe ofoina atu i se taulaga e se tagata mea uma ua ia te ia mo le upumoni, e oo i lona ola na te le taofia, ma talitonu i luma o le Atua na valaauina o ia e faia lenei taulaga ona ua saili o ia e faia lona finagalo, e na te iloaina, ma le mautinoa atoatoa, o le a taliaina e le Atua lana taulaga ma le foai, ma o le a ia le sailia, e faamaualugaina o ia. O lea la, afai o nei tulaga e oo i ai, o le a mafai e ia ona maua le faatuatua e manaomia mo ia e maua ai le ola e faavavau” (*Lectures on Faith*, 69).

O le taulaga na moomia mai ia Iesu ma Ana Aposetolo e tulaga ese. Sa latou tuuina atu mea uma sa ia te i latou. Ia uunaiina au tamaiti o le vasega e saunia i latou lava i le faaleagaga ma le faaletino ina ia saunia i latou e faia soo se osigataulaga e moomia mai e le Atua mai ia te i latou.

Mataio 11–13

O le Soifuaga o Iesu Keriso



Faatomuaga

O vavega tetele na faia e Iesu (tagai Mataio 8–9) ma Ana gaoioiga i le aso Sapati (tagai Mataio 12) na tupu ai feeseeseaiga i le va o tagata. O le toatele o le motu o tagata o e na mulimuli atu ia te Ia na talitonu o Ia o le “atalii o Tavita,” le Mesia folafolaina (tagai Mataio 12:23). Ae peitai, o le toatele lava o taitai Iutaia sa tuuaia o Ia i le faia o vavega i le mana o le tiapolo (tagai Mataio 12:24). Sa latou mananao ia Iesu e faali atu se faailoga e faamaonia ai o Ia (tagai Mataio 12:38–45). Sa latou ta’uleagaina o Ia ona o Ana gaoioiga i le Sapati ma “faia se taupulepulega ia te ia, pe faapefea ona fasiotia o ia (tagai Mataio 12:2, 14). O le taimi lena na “maliu ese ai Iesu mai lea mea” (Mataio 12:15). Sa fetalai atu o ia i le motu o tagata i faataoto (tagai Mataio 13:34). O lona fetalai atu i faataoto na mafai ai ona Ia aoaina i latou o e sa maua le agaga ae o upumoni natia sa faatupuina ai le le fiafia o i latou e le’i mauaina le agaga.


Suesue ma le agaga tatalo le Mataio 11–13 ma mafaufau i mataupu faavae nei ae le’i sauniaina au lesona.

O Nisi Mataupu Faavae Tava o le Talalelei e Saili Iai

- O avega tatou te oo i ai i le olaga faaletino e mafai ona faamāmāina i le Togiola a Iesu Keriso (tagai Mataio 11:28–30).
- O le aso Sapati e ao ai ona tatou malolo mai a tatou galuega i aso uma lava ma galulue ma le naunautai i mea lelei (tagai Mataio 12:1–13; tagai foi Esoto 20:8–11; MFF 59:9–10).
- Afai tatou te le alualu i luma i a tatou sootaga ma le Alii ma le faalauteleina o Lana galuega, ona tatou faatautee lea ia te Ia ma Lana galuega (tagai Mataio 12:30; tagai foi Faaaliga 3:16).
- E mafai ona faamagaloina i tatou mo soo se agasala se’i vagana ai le upu vale i le Agaga Paia (tagai Mataio 12:31–32).
- O aso mulimuli o le a faapotopotoina ai e amiotonu a o latou taliaina le talalelei. O le a faatafunaina e amioleaga i le Afio Faalua Mai o Iesu Keriso (tagai Mataio 13:1–52).

Fautuaga mo le Aoao Atu

Filifili mai manatu nei, po o le faaaoga o ni ou lava manatu, a o e sauniaina au lesona mo le Mataio 11–13.

 *Ata Vitio o le Feagaiga Fou* ata lona 6, “Faataoto” (12:44), e mafai ona faaaogaina i le aoaina atu o le Mataio 13 (tagai *Vitio Taiala o le Feagaiga Fou* mo fautuaga e aoao atu ai).

Mataio 11:1–19 (tagai foi Luka 7:18–35). E le’i tu mai i e na fananau i fafine sē sili ia Ioane le Papatiso. (5 minute)

Ia faamalalama atu i tamaiti o le vasega faapea o nei fuaiupu o le a matuai auiliilina i lo latou suesueina o le tusi a Luka (tagai i fautuaga mo aoaoga mo Luka 7:17–35, i. 85).

O le vaega lenei ua faasoina mai ina ia sosolo lelei ai le molimau a Mataio.

Tuu atu i tamaiti o le vasega e faitauina le Mataio 11:2 ma saili ai po o fea sa i ai ia Ioane le Papatiso i le vaiatai lea. Tuu atu ia i latou e faitauina ia le fuaiupu e 11, ma fesili atu pe na faapefea ona faamatalaina e Iesu ia Ioane le Papatiso. Ia fetufaa atu le saunoaga lenei mai le Perofeta o Iosefa Samita, o lē na faamatalaina ia mafuaaga e tolu o le silisili o Ioane:

“Muamua. Na tofiaina o ia i se misiona paia o le sauniaina o le ala i luma atu o le Alii. . . .

“Lona lua. Na tuuina atu ia te ia se misiona taua . . . ina ia papatisoina le Atalii o le Tagata. . . .

“Lona tolu. O Ioane, i le taimi lena, sa na o ia le tagata faatulafonoina e taulimaina mataupu o le malo i le lalolagi, ma sa umia ia ki o le mana. . . . O nei mafuaaga e tolu ua avea ai o ia o le perofeta silisili ua fanau mai i se fafine” (*Teachings of the Prophet Joseph Smith, 275–76*).

Mataio 11:28–30. O avega tatou te amoina i la le tino nei e mafai ona faamāmāina e ala i le Togiola a Iesu Keriso. (10–15 minute)

Aumai i le vasega se pusa o loo i ai ni maa feoloolo e oo i maa lapopoa. Ia valaaulia se tamaitiiti o le vasega e sau i luma o le potu ma asoa se ato faafafa. Fai atu i tamaiti o le vasega e ta’u mai ni mea e mafua ai le popole ma le atu o le mafaufau, ae fai atu i se isi tamaitiiti o le vasega e lisi a latou tali i luga o le laupapa. (O tali e mafai ona aofia ai le feoti o nisi e pele ia i tatou, o le siitia atu i se fale fou, amata i se galuega fou, ma’i, tete’a, a’oga, ma le agasala.) Ia tuu se maa i totonu o le ato faafafa e fuafua i tali uma lava. Fesili atu i le tamaitiiti o le vasega o loo asoaina le ato faafafa: O le a se tulaga e i ai le olaga pe afai o le a e amoina lena mamafa i soo se mea e te alu i ai? Fesili atu i le vasega:

- Pe ua outou oo ea i se tasi o nei mea? E mafai ona outou fetufaaaina maia i le vasega po o a na vaega?
- Afai e tutupu nei mea ia te outou, o a ni aafiaga na oo i ai isi vaega o lou olaga?

- Mai mea na lisiina tou te le'i oo i ai, o fea ni mea tou te manatu e mafai ona oo i ai i le lumanai?
- O le a se mea e mafai ona outou faia nei ina ia saunia ai pe a oo mai nei mea?
- Aisea e taua ai pe afai e i ai sa tatou auala e maua ai se faaolatotoga mai a tatou avega?

Ia valaaulia tamaiti o le vasega e faitauina le Mataio 11:28–30 ma vaai po o le a le mea na ofoina mai e le Faaola ia i tatou.

Tusi fesili nei e tolu i luga o le laupapa:

O a nisi o avega mamafa o loo tatou tauaveina?
E faapefea ona aveeseina e le Faaola a tatou avega?
O le a le amo māmā ma le faigofie lea na ofoina mai e Iesu e suitulaga i a tatou avega?


Faaalu se taimi e talanoaina ai nei fesili:

O a avega mamafa ia tatou te tauaveina? Tuu atu i tamaiti o le vasega e faitauina le Alema 7:11–13 ma sue ai upu ia e faamatalaina ia ituaiga avega o loo tatou tauaveina lea na puapuagatia ai le Alii (tiga, mafatiaga, faaososoga, ma'i, oti, lē atoatoa, agasala). Fesili atu: E tusa ai ma le tala a Alema, o a ni mafuaaga o le popole na tatou tusia muamua i luga o le laupapa o le a aafia ai i mea na puapuagatia ai Iesu?

E faapefea ona aveeseina e le Faaola a tatou avega? Fesili atu: O anafea na puapuagatia ai le Faaola i avega o loo ta'ua i le Alema 7:11–13? (tagai Mataio 26:36–39). Ia fetufaai atu le saunoaga lenei mai ia Peresitene George Q. Cannon o le Au Peresitene Sili i taunuuga o le Togiola:

“Afai tatou te faanoanoa, afai e i ai ni a tatou avega mamafa, pe o faaletonu foi le mafaufau, o le a Ia faafofoga mai ia i tatou; o le a Ia aveeseina a tatou avega, faamāmāina o tatou faanoanoaga, aveese le pouliuli, ma faatumuina i tatou i le malamalama faapea ma lena lagona faalelagi lea e sau mai ia te Ia e ala i le faatasi mai o le Agaga Paia” (“Blessings Not Appreciated,” in Brian H. Stuy, ed., *Collected Discourses Delivered by President Wilford Woodruff, His Two Counselors, the Twelve Apostles, ma le Others*, 5 vols. [1987–92], 4:12).

Tusi i luga o le laupapa pe faaali atu i tamaiti o le vasega le ata lenei o se amo mo povi.



O le a le amo māmā ma le faigofie lea na ofoina mai e Iesu e suitulaga i a tatou avega? Ia maitauina le amo e i ai sona nofoaga mo povi e lua. E lua ni povi e galulue faatasi ina ia faataunuuna le galuega. Fesili atu: O le a le sootaga lea tatou te ulu atu i ai ma le Alii pe a tatou papatiso? (O se feagaiga o le sootaga.) Faitau le Mosaea 18:8–10 ma vaai ai mo feagaiga sili ona taua tatou te osia ma le Alii. Ia fetufaai atu le saunoaga lenei mai ia Elder Bruce R. McConkie:

“Ina ia tausia poloaiga ma auuuna atu ma le faamaoni ma le naunautai i le Ekalesia o le amoina lea o le *Amo a Keriso*, o le amo o le auuuna atu ma le. O i latou o e alolofa i le Alii ma mananao ia faaolaina e naunau amoina lenei amo, ona latou maua ai lea o le malologa mo o latou agaga (Mataio 11:28–30) ma iloa ai o poloaiga a le Alii e le mamafa. (1 Ioane 5:3.)” (*Mormon Doctrine*, 2nd ed. [1966], 853).

Fesoasoani i tamaiti aoga ina ia malamalama o le faamoemoega autu o se olaga amiotonu o le tau atu lea i le filemu sili ma le fiala nai lo se olaga amioleaga. Ia faaiuina i le usuina pe faitauina ia upu o le viiga “E Malu ma Alofa Poloaiga a le Atua” (nu. 66).

Mataio 12:1–13 (tagai foi Mareko 2:23–3:5; Luka 6:1–10). O le aso Sapati e tatau ai ona tatou malolo mai a tatou galuega i aso faipea ae ia auai ma le malos i galuega lelei. (25–30 minute)

Aumai se mea e masani ai i le vasega, e pei o se ipu vai po o se tamai laau toto i totonu o le fale. Faatu i le ogatotonu o le potu, ma faaoga se mea faapiipii e vase ai se vaega o le foloa o loo i tafatafa. Fai atu i tamaiti o le vasega e mafaufau faapea o lea mea (laau po o le ipu vai) o se mea e matuai matautia lava, e pei o se vai oona po o se laau oona.

- Afai o lenei mea o se mea moni lava e matautia, aisea e taua ai le tuuina o se pa i tafatafa?
- Afai e te sopoiaina le pa, pe mafai la ona e mu pe e te onā foi? Aisea e te mu ai pe onā ae aisea foi e leai ai?
- Pe talafeagai la, pe afai e ia i ni tagata e sopoiaina le laina tuaoi e aunoa ma le papa'i atu i le mea matautia, afai tatou te tausaiaina lelei i latou e tusa lava pe na latou onānā pe mu foi? Aisea e talafeagai ai pe le talafeagai ai foi?

Ia faamalalama atu faapea o nisi taitai faalelotu i totonu o le Tusi Paia sa latou faia se mea faapea. Sa latou faatuina ia tulafono ma aiaiga e si'osi'o ai poloaiga ina ia puipua ai tagata mai le solia. Talu ai ona o lo latou naunautai e lelei, o lea sa latou matuai tautū tele i ai i nisi taimi. O lea faiga e pei o le sioina o le potu atoa mo le “mea matautia” o loo i le lesona faatino, ia po o le fale atoa foi. I taimi o Iesu, sa lagona e taitai faalelotu e faapea o le sopoiaina o nei tuaoi na faia e le tagata o le solia lava lea o le poloaiga.

Ia valaaulia tamaiti o le vasega e faitauina le Mataio 12:1–9, ma fesili atu:

- O le a le poloaiga lea na fai mai le au Faresaio ua solia e soo o Iesu?
- Faitau le fuaiupu 10–14. O le a le mea na faia e Iesu na feita ai le au Faresaio?

Faitau le Esoto 20:8–11 ma le Mataupu Faavae ma Feagaiga 59:9–10 e vaai ai mo auililiga o loo i le poloaiga o le tausia o le faapaiaina o le aso Sapati. E tusa ai ma nei fuaiupu, e i ai se mea na leaga ai le mea na faia e Iesu po o Ona soo?

- O le a le mataupu faavae lautele lea na aoao atu e Iesu ina ia fesoasoani ai ia i tatou ia iloa le mea e talafeagai i le Sapati? (tagai Mataio 12:12).

Tuu atu i tamaiti o le vasega e faitauina le Esoto 20:8–11 ma le Mataupu Faavae ma Feagaiga 59:9–13 ma lisi i luga o se fasi pepa ia galuega talafeagai mo le Sapati. Ia valaaulia nisi o i latou e fetufaai mai a latou lisi i le vasega. Fesili atu:

- O a nisi o faamanuiaga ua outou maua i le tausiiaina o le Sapati ia faapaiaina?
- E tusa ai ma le fetalaiga a le Alii, o ai na fai i ai le Sapati?
- E tusa ai ma le Mataupu Faavae ma Feagaiga 59:9, 13–17, o a faamanuiaga ua folafola mai e le Alii pe a tatou faamamaluina le aso Sapati?

Mataio 12:30 (tagai foi Luka 11:23). E ao ona tatou atinaeina lo tatou sootaga ma le Alii ma faalautele Lana galuega. E le mafai ona tatou le mautonu pe feeseeseai ma tumau pea ma le Alii. (20–25 minute)

Aumai se tamai taavale meataalo, mapu, po o se polo i le vasega. Faatulaga se laulau lapoa ae faasipa. Faaigoa le pito i luga o le “Latalata i le Alii” ma le pito i lalo o le “Taumamao ma le Alii.” Faataatia le meataalo i le ogatotonu ma tuu e taavale atu i le pito i lalo. Fesili atu pe aisea e le tumau ai le meataalo i le ogatotonu. Ia valaaulia tamaiti o le vasega e faitauina le Mataio 12:30, ma fesili atu: E faapefea ona faatusatusa lo tatou sootaga ma le Alii i le tamai taavale meataalo i luga o le laulau o loo faasipa?

Ia fetufaai atu le talanoaga lenei ma Iosefa Samita, na faamatalaina e Daniel Tyler, o se tagata na auai i le Ekalesia i ona pōpō fou:

“E le’i leva talu ona taunuu atu le Perofeta i Commerce (ina ua mavae Navu) mai le falepuipui i Misuri, sa ma asiati atu loa i ai ma le Uso o Isaako Pehuni i lona fale. O ona sauaga o le autu lea o le talanoaga. Na ia ta’ua soo ia le tele o faamatalaga sese ma le le sa’o ma le feteenai sa faia e faasaga ia te ia e tagata ua liliuese, o tagata o le Ekalesia ua fefefe faapea ma tagata e le auai i le Ekalesia. . . .

“Ina ua faamaeaina e le Perofeta ona faamatalaina mai le faiga o ia, sa faapea atu le Uso o Pehuni: ‘Afa i e tatau ona ou tuua lenei Ekalesia ou te le faia e pei

ona faia e na tagata: ou te alu atu i se nofoaga e le’i faalogoina ai lava le talitonuga faaMamona[,] ma ou faamautu ai, ma o le a leai ma se tasi na te iloina e i ai se mea ou te malamalama e uiga i ai.’

“Na vave ona tali atu le Tagatavaai: ‘Le Uso Pehuni, e te leiloa le mea o le a e faia. E leai foi se masalosalo na manatunatu foi nei tagata e pei ona e manatu i ai. Ae te le’i auai mai i lenei Ekalesia sa e i ai i eleele e le faaituau. Ina ua talaiina atu le talalelei sa faapea ona oo atu i ou luma le lelei ma le leaga. E mafai ona e filifili i ai. E lua ni matai faafeagai sa valaauliaina oe e auaua atu ia te i laua. Ina ua e auai mai i lenei Ekalesia, ua e ofo mai e te auaua i le Atua. Ina ua e faia lenei mea, sa faapea ona e tuua le laueleele e le faaituau, ma e le mafai lava ona e toe foi atu i ai.’”
(*Juvenile Instructor*, 15 Aok. 1892, 491–92).

Ia valaaulia tamaiti o le vasega e faitau le Faaaliga 3:16 ma vaai ai pe faapefea ona faatatau i lenei manatu. Ona fetufaai atu lea o le toe faaupuna lenei o le Mataio 12:30 e Elder Bruce R. McConkie:

“O a’u o Keriso; sa ou tuliese ia temoni i le suafa o lo’u Tama; sa ou faamaloloina ia ma’i i lona mana; o le faaolataga e auala mai ia te au. Aua ne’i i ai se tasi o outou e tumau pea i le le mautonu. Afai e te le o ia te au, pe ua e faasagatau mai ia te au. Seiloga e te sau ia te au ma e auai i la’u galuega, ma tausii au poloaiga. O le a e tetee mai pea ia te au. E leai se faavaelutai”
(*Mortal Messiah*, 2:213).

Faitau le Mataupu Faavae ma Feagaiga 58:26–27 ma fesili atu:

- O a mataupu faavae o loo ta’ua i nei fuaiupu ua fesoasoani ai ia i tatou ia faaauu pea ona tatou agai atu i le Alii?
- O le a se isi mea e mafai ona tatou faia e faaali atu ai i le Alii o loo tatou i ai i Lana itu?

Ia uunaia tamaiti o le vasega e taumafai pea ina ia faalatalata atu i le Alii.

Mataio 12:31–32 (tagai foi Mareko 3:28–29; Luka 12:10). O agasala uma faapea ma upu leaga e mafai ona faamagaloina ia i tagata, ae o le upu vale i le Agaga Paia e le faamagaloina lea i tagata. (15–20 minute)

Fesili atu: O le a le agasala e le mafai ona faamagaloina?

Fai atu i tamaiti o le vasega e faitau le Mataio 12:31–32 ma le saili ai le agasala lea e le mafai ona faamagaloina ai se tagata. Faitau le Mataupu Faavae ma Feagaiga 76:31–36 ma le 132:27 ma talanoaina pe faapefea ona faauigaina e nei fuaiupu le upu leaga i le Agaga Paia. Ia fetufaai atu le saunoaga lenei mai le Perofeta o Iosefa Samita:

“O le a lea mea e tatau i se tagata ona fai ina ia solia ai le agasala e le mafaamagaloina? E tatau ona ia mauaina le Agaga Paia, tatalaina atu ia te ia ia le lagi, ma iloa le Atua, ona ia agasala lea i ai. . . . E ao ona ia faapea ane e le o susulu le la ae o loo ia vaai atu i ai; e ao ona ia teenaina ia Iesu Keriso pe a tatalaina atu le lagi ia te ia” (*Teachings of the Prophet Joseph Smith*, 358).

Ia fetufaai atu foi le saunoaga lenei, lea na faamalamalama mai ai e Elder Melvin J. Ballard, o se tasi o le Korama a le Toasefululua le mafuaaga e sili atu ai ona ogaoga le agasala i le Agaga Paia nai lo le agasala ia Iesu Keriso:


“E tuuina mai e le Agaga Paia le aia ma le avanoa e faaali atu ai le upumoni i tagata lea e le mafaia e se isi lava mana ona faia. Afai loa o le a Ia faailoaina atu i se tagata se mea o le a ia iloa lelei e sili atu nai lo lona iloaina o se isi lava mea; ma o le agasala e faasaga i lena malamalama o le agasala lea e faasaga i le malamalama sili o loo i ai iina, ma oo ai ina solia le agasala sili ona matuia lena” (*Millennial Star*, 11 Aug. 1932, 499–500).

Tusi i luga o le laupapa: *E faapefea ona avea le iloaina lea o agasala uma se'i vagana ai le upu vale i le Agaga Paia e mafai ona faamagaloina ona tupu ai ni ou lagona i le Togiola a Iesu Keriso? E mafai faapefea e lenei malamalama ona maua ai e i tatou se faamoemoe sili?* Tuu atu i tamaiti o le vasega e faitauina le Mataupu Faavae ma Feagaiga 19:16–19 ma upu o le “Mo Ia o Lē na Faalavaau” (*Viiga*, nu. 105). Ia valaaulia i latou e tusi i totonu o a latou api o latou lagona e uiga i fesili o loo i luga o le laupapa.



Mataio 13:1–52 (tagai foi Mareko 4:1–34; Luka 8:4–18). I aso mulimuli o le a faapotopotoina ai e amiotonu a o latou taliaina le talalelei. O le a faumatiaina e amioleaga i le Afio Faalua Mai o Iesu Keriso. (45–50 minute)

Tusi faailoga nei i luga o le laupapa (pe sui foi i ai ni au lava faailoga):



Fai atu i tamaiti e fai mea nei:

- Sii i luga lou lima pe afai e te iloaina le uiga o soo se faailoga nei.
- Tuu pea i luga lou lima pe afai e te iloaina le uiga o ni faailoga se lua.

- Tuu pea i luga lou lima pe afai e te iloaina le tolu.
- Tuu pea i luga lou lima pe afai e te iloaina uma le uiga o le fa.

Tuu atu i se tasi na te iloaina uma le fa e faailoga mai le uiga o faailoga taitasi. Fesili atu: Aisea e iloa ai e nisi tamaiti le uiga o faailoga ae leiloa e isi? Tuu atu i tamaiti e faitauina le parakalafa muamua o “Faataoto” i totonu o le Taiala i Tusitusiga Paia. E faapefea ona faatusa ia faataoto i faailoga? Faitau le Mataio 12:14 ma vaai ai mo le mafuaaga atonu na manao ai Iesu e tapunia nisi o Aoaoga mai nisi.

Ae le'i amataina le vasega ia tusi i luga o se fasi pepa i ni mataitusi lapopoa le upu *faapotopotoina*. ‘Oti’oti le pepa ia maua ai ni fasi pepa se tele, ona ‘oti lea o se fasi pepa lona lua ma fenumiai uma faatasi ia fasi pepa. Ona fai tuu atu lea o fasi pepa i ni nai tamaiti o le vasega ma fai atu i ai e tuueseese ia fasi pepa o loo i ai ia tusitusiga i luga mai isi fasi pepa. Tuu atu ia i latou e faatulaga ia fasi pepa ina ia maua ai le upu, ona aveese lea o isi fasi pepa. Faitau le Mataio 13:27–30 ma fesili atu:

- O le a le upu o loo faaalua soo mai i nei fuaiupu e faataata i le lesona faatino? (*Faapotopoto*.)
- O le a le faapotopotoina o Isaraelu?

Ia fetufaai atu le vaega lenei:

“O le faapotopotoina o Isaraelu i aso e gata ai e aofia ai vaega nei: (1) o le faapotopotoina faaleagaga, lea e aofia ai le iloaina o Iesu o le Keriso ma le auai i le Ekalesia a Iesu Keriso o le Au Paia o Aso e Gata Ai; (2) o le faapotopotoina o tagata o le Ekalesia i siteki ua faatulagaina; ma le (3) o le faapotopotoina o fanau a atalii e toasefululua o Iakopo—e aofia ai ituaiga e sefulu o loo leiloloa (MFF 110:11)—i le nuu o lo latou tofi” (“Israel: Gathering of Israel,” i le Daniel H. Ludlow, ed., *Encyclopedia of Mormonism*, 5 vols. [1992], 2:351).

Na aoao mai e le Perofeta o Iosefa Samita faapea o faataoto o loo i le Mataio 13 “ua maua ai e i tatou se malamalamaaga manino i le taua o le mataupu o le faapotopotoina, e pei lava o soo se mea o loo tusia i le Tusi Paia” (*Teachings of the Prophet Joseph Smith*, 94). Vaevae le vasega i ni vaega se valu ma tuu atu i ai se faataoto mai le siata o loo i le itulau e 40. Ia faamalamalama atu faapea e i ai isi faaliliuga e talafeagai ai o nei faataoto, ae fai atu ia i latou e faaalu se 5–10 minute e saili ai i a latou faataoto po o le a le mea o loo aoao mai ai e uiga i le faapotopotoina. Tuu atu ia i latou e sailia ia tali i fesili e pei o nei:

- O a ituaiga suiga o loo outou maitauina i le faataoto? O le a le mea e faatupuina? O le a le mea e faavasegaina pe tuufaatasia?
- E faapefea ona tali tutusa ia suiga e oo i ai tagata pe a latou ulufale mai i totonu o le malo o le Atua i suiga o loo i le faataoto?

Tuu atu i se tagata o vaega taitasi e fai mai se aotelega o le faataoto na tuuina atu ia i latou ma faamatata mai pe faapefea ona faataata i le faapotopotoina. Faaoga le siata i luga o se

Mataio 13:Faataoto i le Faapotopotoina


Faamaoniga	Faataoto	O le Faapotopotoina
f. 3–9, 18–23	Tagata Lulu Saito — e eseese le ola o fatu ona e faalagolago i le elelee na pauu i ai.	E eseese uiga faaalua o tagata i le savali o le talalelei. O lo latou naunau e taliaina le talalelei e iloa ai pe ua faapotopotoina mai i latou. Na aoao mai e Iosefa Samita e faapea “o lenei faataoto na tautalaga e faaalua ai ia aafiaga e maua mai le talaiga o le upu; ma tatou te talitonu e i ai sona aafiaga tonu i le amataga, po o le faatuina o le Malo” (<i>Teachings of the Prophet Joseph Smith, 97</i>).
f. 24–30	O le Saito ma le Titania — o se laau ua fai ma fili le titania i totonu o se toga saito. Na ta’u atu e le pule o le fanua i ana auauna ina ia tuu ai pea le saito ma le titania e ala faatasi seia oo i le seleselega.	Sa nonofo faatasi e amiotonu ma e amioleaga mo se taimi. Ae o aso mulimuli o le a faapotopotoina ai e amiotonu ae o le a faatafunaina e amioleaga. Na aoao mai e Iosefa Samita faapea afai e vave tuueseeseina ia e amiotonu ma e amioleaga, “o le a le faaleagaina ai le saito, po o le Ekalesia, faatasi ma titania; o lea e sili atu ai ona tuu i latou e ala faatasi seia oo i le seleselega, po o le iuga o le lalolagi.” (<i>Teachings, 98</i>).
f. 31–32	O le Fatu o le Sinapi — o le tamai fatu laau pito sili ona laitiiti ae ala mai ai ni togalaau tetele.	O le malo o le Atua e amataina i se mea laitiiti ae tupu ma ola. Na aoao mai e Iosefa Samita: “Se’i o tatou aveina le Tusi Mamona, lea na aveina e se tagata na nanaina i lona fanua, ma puipuia i lona faatuatua, ina ia tupu ae i aso mulimuli. . . . O le mea moni lena, ua tatupu a’e ma ua tupu a’e nai le elelee, ma ua amata ona silasila ifo le amiotonu mai le lagi, ma ua auina mai e le Atua Ona mana, meaalofa, ma agelu, e mau i ona lālā” (<i>Teachings, 98</i>).
f. 33	O le Fefete — o se aofaiga laitiiti o le fefete e tuu i totonu o le falaoa mata tumu, e oo ina faafefeteina uma ai.	O le a ola le Ekalesia seia oo ina mafai ona faamanuaina ai le lalolagi atoa. Na aoao mai ia Iosefa Samita: “E ono malamalama i ai o le Ekalesia . . . ua tulai ae mai se fefete laitiiti na tuuina i ai e ni molimau se toatolu. Faauta, e pei lava lenei mea o le faataoto! Ua faateleavaveina ona faafefeteina, ma o le a le pine ae faafefeteina uma ai” (<i>Teachings, 100</i>).
f. 44	’Oa Natia — ua faatau atu e se tagata ana mea uma ina ia faatau mai ai se fanua o loo i ai se ’oa natia.	E maua e e amiotonu le upumoni ma faia mea uma ina ia maua mai ai. Na faatatau e Iosefa Samita lenei faataoto i le faapotopotoina atu i Misuri: “Sa galulue le Au Paia i lenei faatulagaga. Tagai i le Ekalesia . . . , ua faatau atu mea uma sa ia i latou, ma latou faapotopoto atu i se nofoaga lea e mafai ona latou faatauina e avea ma tofi, ina ia mafai ona faatasia i latou ma tauaveina ia mafatiaga o isi i taimi o faigata” (<i>Teachings, 101</i>).
f. 45–46	Penina Tautele — ua faatau atu e se tagata faatauoa mea uma sa ia te ia ina ia faatau mai ai le penina tau tele.	E faapotopotoina e amiotonu ina ua mavae le tele o sailiiliga. “Sa toe galulue foi le Au Paia i lenei faataitaiga. Tagai i alii o loo malaga atu e sailia ia nofoaga mo Siona ma ona siteki, o e, afai latou te mauaina se nofoaga mo Siona, po o le penina tautele, ona latou faatau atu lea o mea uma o loo ia i latou, ma faatau mai ai” (<i>Teachings, 102</i>).
f. 47–50	O le Upega I’a — e maua e le au faifaiva ia ituaiga eseese i a latou upega, ona latou tuueseeseina lea mulimuli.	E faapotopotoina muamua e le Ekalesia ituaiga tagata eseese. I le faaiuga o le lalolagi e tuueseeseina ai e amiotonu mai tagata amioleaga. “Aua o le galuega o lenei faatulagaga, faauta o le laau o Iosefa, e faasalalauina atu le upega o le Talalelei i le lalolagi, ina ia faapotopotoina mai ituaiga uma, ina ia mafai ona faasaoina i latou e lelei i fanua saunia mo lena faamoemoega, ae o le a vaavaaia e agelu i latou e leaga. Ma o le a faia lea i le faaiuga o le lalolagi” (<i>Teachings, 102</i>).
f. 52	Oloa Fou ma Oloa Tuai — o se tusiupu amiotonu ua aumaia i fafo ia mea tuai ma mea fou.	E faaogaina e le Alii ia tusitusiga paia tuai ma tusitusiga paia fou e faapotopotoina mai ai Lana fanau. “Aua o le galuega o lenei faataitaiga, tagai i le tulai mai o le Tusi a Mamona mai le ’oa o le loto. E faapea foi i feagaiga na tuuina atu i le Au Paia o Aso e Gata Ai, e faapea foi i le faaliliuina o le Tusi Paia [le Faaliliuga a Iosefa Samita]—o le aumaia lea i fafo mai le loto o mea fou ma mea tuai” (<i>Teachings, 102</i>).

masini malamalama pe tufatufa atu foi e fesoasoani ai i la outou talanoaga pe a manaomia. Fesili atu i tamaiti o le vasega:

- E faapefea ona faatatau le faapotopotoina ia i tatou i aso nei?
- O a mea e faapotopotoina atu i ai i tatou?
- Pe i ai nisi ua uma ona faapotopotoina mai ua toe se ese atu? Aisea?
- E mafai faapefea ona tatou aloese mai le se ese?
- I le Afio Faalua Mai o Iesu Keriso, o le a le mea e tupu ia i latou e le'i faapotopotoina mai?

Mataio 14–15

O le Soifuaga o Iesu Keriso



Faatomuaga

O le tusi a Mataio o loo faavasegaina ai le tele o vavega a le Faaola i le mataupu 8–9, o gaoioiga i le Sapati i le mataupu 12, o faataoto i le mataupu 13, faapea ma se vaega lona lua o vavega i le mataupu 14–15. A o e faitauina ia le mataupu 14–15 mafaufau i auala eseese na faaalua ai e Iesu Lona mana.

Suesue ma le agaga tatalo le Mataio 14–15 ma mafaufau i mataupu faavae nei ae le'i sauniaina au lesona.

O Nisi Mataupu Faavae Tava o le Talalelei e Saili Iai

- O i latou e auuina atu i isi ma le lē manatu faapito, e manatunatu muamua i manaoga o isi nai lo latou lava manaoga o uiga ia FaaKeriso (tagai Mataio 14:3–23).
- Pe a tatou faaautu lo tatou faatuatua i le Faaola, ua sili atu ona faamanuiaina i tatou i le faataunuaina o Lona finagalo (tagai Mataio 14:24–33).
- O vavega a le Atua e faaalua i olaga o i latou o e faatuatua ia te Ia (tagai Mataio 14–15).

Fautuaga mo le Aoao Atu

Filifili mai manatu nei, pe faaoga ni ou lava manatu, a o e sauniaina au lesona mo le Mataio 14–15.

Mataio 14:3–23 (tagai foi Mareko 6:17–46; Luka 3:19–20; 9:10–17). O i latou o e faamuamua ina manaoga o isi nai lo latou ua sili atu ona faa-Keriso ma iloaina le fiafia faateleina. (10–15 minute)

Ia tuuina atu le tulaga faatusatusa lena i au tamaiti o le vasega. O loo outou faimalaga ma lou aiga i se nofoaafi. E le'i pine ae tulai mai se faalavelave matuia lava ma ua alu ese ai le nofoaafi mai le auala ma tofu atu ai le nofoaafi i se tofē. O loo uso laitiiti ma le toatele o isi sa i luga o le nofoaafi sa maliliu ai. A o e lagonaina le faanoanoa i le oti o lou uso, e toatele i latou sa i luga o le nofoaafi sa manunua tigaina ma sa moomia le fesoasoani. Fesili atu:

- O le a sou manatu o le a se mea e te faia pe afai e te oo i se tulaga faapea?
- O le a se faigata o le agai pea i luma ma uunaia ia isi?

Ia faamalamalama atu faapea o se mea faapea na tupu i se tasi i totonu o tusitusiga paia. Faitau faatasi ma tamaiti aoga le Mataio 14:10–23 ma fesili atu:

- O ai le pele lea na silafia e Iesu ua fasiotia?
- Na faapefea ona oti ia Ioane le Papatiso?
- O a ni uiga na faaalua o Iesu?

Ia lisi i luga o le laupapa uiga na faaalua o Iesu e faailoa mai ai lona faamuamua o popolega o isi tagata nai lo Ia (tagai f. 13–20).

Ia fetuفاai atu le saunoaga lena mai ia Elder William R. Bradford, o se tasi o le Au Fitugafulu, i le lē manatu faapito. Fesili atu i tamaiti o le vasega e faalogo mo faamanuiaga o le lē manatu faapito.

“O le lē manatu faapito o le amiotonu lea. E fusia ai le agaga moni o le faauo. O le auga moni lea o le fefaaauoa'i. O le atagia foi lea o le alofa moni ma le tasi i uiga faaletagata. O lona tau i le saoloto lea o le agaga, o le latalata atu i le paia, o le agavaa mo le mafutaga a le Agaga. Soo se mea e manaomia lea ua fuafuaina e le Atua mo lo tatou faaolataga e faavae lea i luga o le tuuina atu o le ola o se tasi” (i le Conference Report, Oct. 1987, 92; po o le *Liahona*, Ian. 1988, 76).

Faitau le Mareko 8:35 ma talanoaina pe faapefea ona faatatau i le lē manatu faapito. O le a se mea e mafai ona tatou faia ina ia atinaeina ai le malosi ina ia faamuamua ai isi i o tatou olaga? (Taumafai e mafaufau i auala na faaalua e le Faaola, taumafai e mafaufau i ai tatou lava i tulaga o isi, taumafai e mafaufau i lagona o isi pe a mafatia.)

Mataio 14:24–33 (tagai foi Mareko 6:47–52; Ioane 6:15–21). Afai e taulai atu lo tatou faatuatua i le Faaola, o le a mafai ona tatou faataunuaina Lona finagalo. (15–20 minute)

Tuu se mea faapipii pe tusa ma le valu futu le umi i se laina sa'o i luga o le foloa. Ia valaaulia se tamaitiiti o le vasega

e savali i luga o le laina ae fusi ona mata. Fai atu i le tamaitiiti o le vasega e valaaulia se tasi na te faatuatuaina i totonu o le potu e taitaiina le tamaitiiti o le vasega i luga o le laina. A maea ona savali le tamaitiiti i luga o le laina, ona valaaulia lea o ia e toe savali i tua i luga lava o le laina ae o le a leai se fesoasoani mai lana uo. (Atonu o le a le mafai e le tamaitiiti o le vasega ona tumau ai pea i luga o le laina.)

Ia valaaulia le vasega e faitauina le Mataio 14:24–33 ma tali i fesili nei:

- O ai i totonu o le mau e pei o le tamaitiiti o le vasega na fusi ona mata?
- O ai e pei o le uo lea na taitaiina le tamaitiiti o le vasega na fusi ona mata?
- O le a le mea na faia e Peteru sa pei o le savali i luga o le laina ao ia faalogo atu i lona taiala?
- O le a le mea na ia faia sa pei ai lava o le savali i luga o le laina e aunoa ma le faalogo atu i lona taiala?
- O le a le mea na iloa ai le eseeseaga i le va o le faamanuiaina ma le faatoilaloina?

Ia fetufaai atu le saunoaga lenei mai ia Peresitene Howard W. Hunter, a o avea ma Peresitene o le Korama a Aposetolo e Toasefululua:


“A o tepe taulai atu mata o [Peteru] i lona Alii, atonu sa lelelelea i le matagi lona lauulu, ma faasūsūina e le pisi o peau lona ofutalaloa, ae sa lelei mea uma’ [Frederic W. Farrar, *The Life of Christ* (1964), 311]. Na o le taimi lava o le maluelue o lona faatuatua ua tepaese ai mai le Matai, ae tepe i peau sousou ma le moana uliuli i ona lalo ifo, o le taimi lena sa amata ai ona magoto o ia. . . .

“O lo’u talitonuga maumaututu lava afai, i le avea ai ma tagata taitoatasi, ma aiga, ma alalafaga ma malo, e mafai ona tatou faapei o Peteru, e tepe taulai atu o tatou mata ia Iesu, o le a mafai foi e i tatou ona savavali manumalo i luga o peau sousou o le le talitonu ma tumau ma le le matata’u i le totonugalemu o matagi malolosi o le masalosalo. Ae afai e tepe ese o tatou mata mai ia te Ia o Lē e tatau ona tatou talitonu i ai, lea e faigofie lava ona fai ma ua faosoosoina naua le lalolagi e fai lea mea, afai tatou te tepe atu i le malosi ma le aasa o na elemene matautia faatafuna o siomia ai i tatou, nai lo le tepe atu ia te Ia o Le e mafai ona fesoasoani mai e laveai i tatou, o le a oo ina goto atu i tatou i se sami o fevaevaeaiga ma le faanoanoa ma le atuatuvaletu” (i le Conference Report, Oke. 1992, 24; po o le *Liahona*, Ian. 1993, 22).

- O a auala e mafai ona “tepe taulai atu ai o tatou mata i le Alii” i aso nei?
- O a faamanuiaga o le tepe taulai atu ia te Ia?

Mataio 16–18

O le Soifuga o Iesu Keriso



Faatomuaga

O le Mataio 16:15–19 o loo tusia ai se molimau mamana na tuuina mai e Peteru faapea o Iesu o le Keriso, e faapea foi i le folafolaga na tuuina atu ai e Iesu ia te ia ia “ki o le malo.” I ni nai aso na lumanai ai, na ave ai e le Alii ia Peteru, Iakopo, ma Ioane i se nofoaga tuufua ina ia tuuina atu ai ia i latou nei ki. Na faamalamalama mai e Elder Bruce R. McConkie e faapea na faaalua e i latou e toafa “se po paia e vaai ai i faaaliga o le faavavau. O lenei po faamanuiaina o se tasi o na vaitaimi o faaaliga vaaia ina ua faaaliga mea lilo o le malo, ia i latou uma o e au faatasi ma Lē e Faavavau. E maeu le ofoofogia o ia upumoni faaaliga lea e ‘faasaina le tagata ona tautala’ i ai, ‘ e le mafaia foi e le tagata ona faalauiloaina atu, aua e na o le mana lava o le Agaga Paia e mafai ona vaai ma malamalama i ai.’ Ua faapolopoloina e le Alii mo perofeta na ma tagatavaai na o e, ‘a o i ai i la le tino,’ e mafai ona latou tauaveina lona i ai i le lalolagi o le mamalu.’ (MFF 76:114–118.)” (*Mortal Messiah*, 3:54).

Suesue ma le agaga tatalo le Mataio 16–18 ma mafaufau i mataupu faavae nei ae le’i sauniaina au lesona.

O Nisi Mataupu Faavae Tava o le Talalelei e Saili Iai

- O le faatuatua e le maua mai i faailoga ma vavega; o faailoga e mulimuli atu ia i latou o e talitonu (tagai Mataio 16:1–4; tagai foi Mareko 16:17; Mamona 9:20; Eteru 12:6; MFF 63:9–12).
- O aoaoga sese o le a faaleagaina ai i latou o e le o puipuia mai ai (tagai Mataio 16:5–12).
- O se molimau ia Iesu Keriso e oo mai i se faaaliga (tagai Mataio 16:13–19; tagai foi Helamana 5:12; Moronae 10:4–5; MFF 42:17).
- Na maua e Peteru, Iakopo, ma Ioane ia ki o le perisitua (aia po o le pule) mai avefau mai le lagi ina ia mafai ona latou taitaiina ai le Ekalesia ina ua mavae le maliu o Iesu. Na toefuatai e le Alii ia na lava ki e ala mai i ni avefau mai le lagi i perofeta ma aposetolo i o tatou aso (tagai Mataio 16:19; 17:1–13).

- O ni tulaga paia e oo i ai se tagata e tatau ona fetufaaaina atu pe a musuia ai i tatou e le Agaga (tagai Mataio 17:9; tagai foi Alema 12:9; MFF 63:64).
- O le ola ai i le tulafono o le laueleele o se vaega foi lea o le talalelei a Iesu Keriso (tagai Mataio 17:24–27; tagai foi MFF 134:1, 5; Mataupu Faavae o le Faatuatua 1:12).
- Na aoao mai e Iesu faapea ina ia ulu atu i le malo o le lagi e tatau i se tagata ona liuaina, ia lotomaulalo, ma ia avea e pei o se tamaitiiti (tagai Mataio 18:1–4; tagai foi Mosaea 3:19).

Fautuaga mo le Aoao Atu

Filifili mai manatu nei, pe faaoga ni ou lava manatu, a o e sauniaina lesona mo le Mataio 16–18.

Mataio 16:1–4 (tagai foi Mareko 8:11–12). O le faatuatua e le oo mai i ni faailoga po o vavega, ae mulimuli atu faailoga ia i latou o e talitonu. (15–20 minute)

Tuu se fasi fualaaui aina i totonu o se taga pepa. E aunoa ma le faaaliina atu i le vasega o le fualaaui aina, ia sii i luga le taga pepa ma faamalamalama atu i tamaiti o le vasega faapea o loo i ai se mea i totonu o le taga pepa e le mafai e se mata ona vaai i ai. Fesili atu pe toafia nisi e talitonu ia te oe. Ia valaaulia se tamaitiiti e talitonu e sau ma vaai i totonu o le taga pepa. Afai e uma ona vaai le tamaitiiti i totonu o le taga pepa ma vaai i le fualaaui aina, ona e musumusu atu lea i ai e leai ma se tasi na vaai i fatu o loo i totonu o le fualaaui aina. Fai atu i le tamaitiiti o le vasega e lipoti atu i le vasega pe sa e ta'uina atu le mea moni pe leai. Fesili atu i le vasega:

- E toafia la nisi ua talitonu nei ia te au o loo i ai se mea i totonu o le taga pepa e le mafai e se mata ona vaai i ai?
- E toafia nisi e manaomia se faamaoniga ona faatoa e talitonu lea?

Faaali atu le fualaaui aina i le vasega ma faamalamalama atu ia fatu. Fesili: Aisea e faigata ai ona talitonu i mea tatou te le o vaai pe malamalama i ai? Ia valaaulia tamaiti o le vasega e faitauina le Mataio 16:1–4 ma fesili atu:

- E faapefea ona faatatau ia nei fuaiupu i le lesona faatino? (O le sailia o faailoga ina ia maua ai le malamalama e le tutusa ma le faatinoina o le faatuatua ina ia maua ai le malamalama.)
- O a mataupu faavae o le talalelei na vaivai ai le au Faresaio ma le au Satukaio ina ua latou fesili mo se faailoga? (tagai Mataupu Faavae o le Faatuatua 1:4).

Faitau le Eteru 12:6 ma le Mamona 9:20 ma fesili atu:

- O le a so outou manatu aisea na ou filifilia ai le tamaitiiti o le vasega na ou fai i ai e vaai i totonu o le taga pepa? (Aua sa talitonu le tamaitiiti o le vasega.)
- O le a le faamoemoega o faailoga ma vavega?
- Pe mafai ona faaliliuina eseese e ni tagata se toalua ia ni faailoga?

- O a ituaiga tagata e faali atu i ai e le Alii ia faailoga ma vavega?
- Aisea e le tumau ai ona faatauina pe faaliliuina e faailoga ia se tasi?
- O le a le eseese i le va o le sailia o se faailoga ma le agavaa e molimauina ia vavega i o tatou olaga?
- O le a le eseese e faia e o tatou lagona?

Ia molimau atu i tamaiti o le vasega faapea o le faatuatua e muamua mai nai lo vavega i totonu o le Ekalesia a le Alii.

Mataio 16:1–12 (tagai foi Mareko 8:14–21). O aoaoga sese o le a faaleagaina ai i latou o e le o puipuia mai ai. (20–25 minute)

Aumai se falaoa i le vasega ma faali atu i tamaiti o le vasega. Tusi ia mau nei i luga o le laupapa: Mataio 14:16–21; 15:34–38. Fai atu i tamaiti o le vasega e saili po o le a le faiā a nei fuaiupu i le falaoa.

Ia ta'u atu i tamaiti o le le lava o le falaoa na maua ai e Iesu se avanoa e aoao atu ai o loo i totonu o le Mataio 16. Tuu atu i tamaiti o le vasega e sueina le Mataio 16:1–4 ma sue ai tali i fesili nei:

- O le a le mea na mananao le au Faresaio ma le au Satukaio e faia e Iesu?
- Pe na tuuina atu ea e Iesu ia i latou se faamaoniga po o ai o Ia? (Faamanatu atu i tamaiti o le vasega le fafagaina o le lima afe ma le fa afe lea sa latou faitau i ai i le Mataio 14–15.)
- O le a sou manatu o le a se eseese pe ana toe fai atu e Iesu se isi vavega ia i latou?
- E faapefea ona fesoasoani lena i le mafuaaga na ta'ua ai i latou e Iesu o tagata pepelo?

O le “faailoga o le perofeta o Iona” e faatatau lea i le toetu o Iesu i aso e tolu, e pei lava o le toe luai maia i fafo o Iona mai le manava o le i'a ina ua mavae aso e tolu. Fesili atu: E faapefea ona avea lena ma faailoga o le paia o Iesu?

Faitau faatasi ma au tamaiti o le vasega le Mataio 16:5–12, ma talanoaina ai ia fesili nei a o outou faitauina:

- O le a le mea na galo i le au soo ona latou o ma ave?
- O le a le mea na ta'u atu e Iesu na latou le malamalama i ai?
- Mafaufau i le fafagaina o le lima afe ma le faafe, aisea na fou ai ia i latou le manatu faapea o loo popole Iesu i le areto?
- E faapefea ona faatusatusa ia aoaoga sese ma le pepelo a le au Faresaio ma le au Satukaio i le fefete? (E na o si tamai luutaga lava e aafia ai le paluga atoa.)

Tuu atu i tamaiti o le vasega e lisi mai ni aoaoga sese o loo aoaoina i le lalolagi i aso nei. Ia fetufaaui atu ia i latou le fautuaga lena mai ia Elder M. Russell Ballard, o se tasi o le Korama a le Toasefululua:

“E tatau ona tatou galulue e taofiofia le tai fana’e o agasala ma le amioleaga nai lo le taitaieseina atu ai o i tatou. Tatou te manaomia uma le fesoasoani e foia ai faafitauli nai lo le le amanaiaina po o le teenaina. Ou te fiafia i si tamai solo lenei:

“O vai uma lava i le lalolagi
E tusa lava po o le a lona matūtū
E le mafai lava ona goto ai se tamai vaa
Seiloga lava e sao i totonu.
O mea leaga uma lava o loo i le lalolagi
Ma ituaiga agasala uma
E le mafai ona faaleagaina ai le agaga o le tagata
Seiloga tatou te faatagaina i totonu”

(i le Conference Report, Ape. 1989, 101;
po o le *Liahona*, Iulai 1989, 80).



Mataio 16:15–19 (Mau Tauloto tagai foi Mareko 8:29; Luka 9:20). O molimau e maua mai i faaaliga e ala mai le Agaga Paia.
(20–25 minute)

Faaaliga: O lenei fautuaga e aoao atu ai e mulimuli tonu lava i le Mataio 16:1–4.

Ia valaaulia tamaiti o le vasega e mafaufau ia Nifae ma ona uso i totonu o le Tusi a Mamona. Fesili atu:

- O le a le mea na faia e uso matutua o Nifae ia te ia ina ua faatoilaloina faalua i latou e taumafai e aumai ia papatusi apamemea? (Sa latou sasa ia te ia; tagai 1 Nifae 3:28.)
- O le a le isi mea na tupu? (Sa faaali atu se agelu; tagai f. 29.)
- O ai o le au uso na vaai i le agelu?
- Faitau le 1 Nifae 3:31. Tou te manatu o le vaai i se agelu na maua ai e Lamana ma Lemuelu se molimau? Aisea na maua ai pe aisea foi na le maua ai?

Faatusatusa le Mataio 16:1–4 i le Mataio 16:15–17 ma tali i fesili nei:

- O le a so outou manatu aisea na mananao ai le au Faresaio ma le au Satukaio e vaai i se faailoga?
- Pe o le vaai ea i se faailoga e maua ai e i latou le faatuatua? Aisea na maua ai pe aisea foi na le maua ai?
- Na faapefea ona faaaliga e Peteru lona faatuatua o Iesu o le Keriso?
- O le a le fetalaiga a Iesu i le mafuaaga o le malamalama o Peteru?

Ia valaaulia tamaiti o le vasega e faitauina le 1 Tupu 19:9–12, ma fai atu ia i latou e faatatau mea na latou aooina mai nei fuaiupu i Faresaio faapea ma Peteru. Na faapea mai ia Peresitene Iosefa Filitia Samita o le iloaina o Iesu o le Alo o le Atua ma le Faola o tagata “e oo mai i le na o le molimau lava a le Agaga Paia. E mafai e tagata ona *talitonu* o Iesu o le Keriso,

ae o le *iloaina* e moomia ai faaaliga mai le Agaga Paia” (*The Way to Perfection* [1978], 158).

E tusa ai ma le saunoaga a Peresitene Samita, o le a le auale e tasi lea e mafai ona tatou maua ai se molimau? Faitau le Mataupu Faavae ma Feagaiga 8:2; 9:8 ma fesili atu: O le a faapefea ona tatou lagonaina le molimau a le Agaga Paia ia i tatou i le moni o le talalelei?

Fai atu i tamaiti o le vasega e faitau le Mataio 16:18–19 ma vaai i ai po o a faamanuiaga na maua e Peteru ina ua uma ona fetufaai atu lana molimau. Faitau fuaiupu nei ina ia iloa ai nisi o faamanuiaga faaopoopo tatou te mauaina mai le i ai o le faatuatua ma se molimau:

- Roma 5:1 (filemu e ala mai ia Iesu Keriso).
- Mamona 9:21 (o le faatuatua e moomia e maua ai tali i a tatou tatalo).
- Mataupu Faavae ma Feagaiga 42:12–14 (o le malosi e aoao atu ai e ala i le mana o le Agaga Paia).
- Mataupu Faavae ma Feagaiga 52:9 (o le malosi e aooina ai i lea lava Agaga e tasi).
- Mataupu Faavae ma Feagaiga 121:45 (o le talitonuga e tu ai i luma o le Atua).

Ia valaaulia tamaiti o le vasega e tusi i luga o se fasi pepa se lisi o suiga e mafai ona latou faia i o latou olaga lea o le a fesoasoani ai ia i latou ina ia maua pe faamalosi ai a latou molimau.

Mataio 16:19; 17:1–13 (tagai foi Mareko 9:2–13; Luka 9:28–36). Ua tuuina mai e le Alii ia ki o le malo i Ana perofeta ma aposetolo. (20–25 minute)

Ia uu atu i luga se laisene avetaavale, ia pe i ai foi se tamaitiiti o le vasega e i ai sona laisene avetaavale, fai atu i ai e faaali atu i le vasega. Fesili atu:

- O le a se mea tatou te taumateina e uiga i se tagata e i ai sona laisene avetaavale? (O lena tagata ua i ai le “pule” e ave ai se taavale.)
- O le uiga o lena mea afai ua i ai sou laisene ma e i ai se taavale a ou matua po o lou pule, e mafai lava ona e aveina i soo se taimi e te manao ai?

Ia uu atu i luga se fuifui ki. Fesili atu: Afai e i ai sou laisene ma ua tuuina atu e ou matua po o lou pule ia ki i le taavale ma fai atu ia te oe e te alu i se feau, e mafai nei ona e aveina le la taavale?

Ia valaaulia tamaiti o le vasega e faitau le Mataio 16:19 ma vaai po o le a le mea na folafola e Iesu e tuuina atu ia Peteru. Tuu atu ia i latou e faitau le Mataio 17:1–3. Ia fetufaai atu le saunoaga leni mai le Perofeta o Iosefa Samita:

“O le Faola, Mose, ma Elia, na tuuina atu ki [o le malo] ia Peteru, Iakopo ma Ioane, i luga o le mauga, ina ua liuaina i latou i ona luma” (*Teachings of the Prophet Joseph Smith*, 158).

Fesili atu: E tusa ai ma le saunoaga a Iosefa Samita, o le a le mea na tupu i luga o le Mauga o Liua e faatatau i le perisitua? Ia fetufaai atu le saunoaga leni mai ia Peresitene Iosefa F. Samita:

“O le Perisitua i lona tulaga lautele o le pule lea ua tuuina atu i le tagata e galue ai mo le Atua. O alii uma e faauuina i soo se vaega o le Perisitua, ua ia te ia lea pule ua tuuina atu ia te ia.

“Ae e talafeagai mo galuega uma e faatinoina i lalo o leni pule e tatau ona faia i le taimi sa’o ma le nofoaga sa’o, i le auala sa’o, ma le faatulagaga sa’o. O le mana o le taitaiina o nei galuega o loo aofia ai i ki o le Perisitua. I lo latou atoatoa, e na o le toatasi le tagata e umiaina ia ki i lea taimi ma lea taimi, ma o le perofeta ma le peresitene o le Ekalesia. E mafai ona ia faasafuaina atu soo se vaega o leni mana i isi, lea e mafai ai e lea tagata ona umia ia ki o lena lava galuega faapitoa. O lea la, o le peresitene o se malumalu, o le peresitene o se siteki, o le epikopo o se uarota, o le peresitene o se misiona, o le peresitene o se korama, e tofu ma ki o loo umiaina e faataunuuina ai galuega i lena vaega patino po o le nofoaga” (*Gospel Doctrine*, 5th ed. [1939], 136).

Fesili atu:

- O le a le eseesea i le va o le pule o le perisitua ma ki o le perisitua?
- O ai o loo umiaina uma ia ki o le perisitua i aso nei? (tagai MFF 81:2).
- O ai isi alii ia o loo umiaina ia ki o le perisitua?

Ia fetufaai atu le tala leni na faamatalaina mai e Elder Robert D. Hales, o se tasi o le Korama a le Toasefululua:

“I le konafesi faaeria i Copenhagen i Tenimaka na faia i le aso 3-5 o Aokuso, 1976, sa malaga atu ai ia Peresitene [Spencer W.] Kimball e maimoa i faatagata matagofie a Thorvaldsen. . . . Ina ua mavae ni nai minute faaleagaga o le mata’ia o le faatusa o Keriso, sa tuuina atu e Peresitene Kimball lana molimau i le tagata o loo teuina ma vaaia le falelotu sa tūtū e latalata ane. A o ia faliu atu i le faatagata o Peteru ma faasino i ni ki lapopoa lava o loo i le lima taumatau o Peteru, ma ia faapea atu: ‘O ki o le pule faaperisitua sa umia e Peteru a o avea ma Peresitene o le Ekalesia o loo o’u umiaina nei i le avea ai ma Peresitene o le Ekalesia i leni tisipenisione.’ Ona ia faapea atu lea i le tagata o loo vaaia le falelotu, ‘O loo outou galulue i aso uma ma Aposetolo o loo faia i maa, ae o le aso leni o loo e faatasi ai ma Aposetolo soifua.’ Ona ia faailoaina atu lea o Peresitene N. Eldon Tanner, Elder Thomas S. Monson, ma Elder Boyd K. Packer. Na ia tuuina atu i le tagata e vaaia le falelotu se Tusi a

Mamona i le gagana Danish, ma tuuina atu lana molimau i le Perofeta o Iosefa Samita. Sa ootia le tagata e vaaia le falelotu ma sa maligi ona loimata i lona lagonaina o le i ai o le Agaga i le faatasi ai o se perofeta ma Aposetolo. Na ia faailoa mai ia te au ina ua matou o ese mai le falelotu, ‘O le asō sa matou faatasi ai ma auauna a le Atua.’” (i le Conference Report, Oke. 1981, 27; po o le *Liahua*, Ian. 1982, 20).

- O a ni tulaga e mafai ai e i latou taitoatasi o loo umia le perisitua ona faataunuuina ia sauniga paia ma isi vaega faapitoa o le perisitua?
- E faapefea ona tatou ava ma lagolagoina i latou o e o loo umiaina ia “ki o le malo”?



Mataio 17:1–13 (tagai foi Mareko 9:2–13; Luka 9:28–36). O isi mea taua na tutupu i luga o le Mauga o Liua. (40–45 minute)

Sii atu i luga se tusi o loo i ai se faatomuaga po o se faamaoniga na saina e se tasi ua sili atu lona lauiloa nai lo le tusitala o le tusi.

- Aisea e masani ai ona talosaga ia tusitala i se tagata ua lauiloa latou te tusia ia faatomuaga o a latou tusi? (Ina ia matuai faateleina le alu ma le faatauina o le tusi.)
- Afai e te tusia se tusi, o ai le tagata sili ona lauiloa e te iloa e mafai ona e talosaga atu i ai na te tusia se faatomuaga?
- O ai o le a e talosaga atu i ai pe afai e te talosaga atu i se tasi?

Fai atu i tamaiti o le vasega e faitau le Mataio 3:17 ma tali i fesili nei:

- O ai na faailoaina atu (pe molimau atu) ia Iesu i tagata?
- O fea le faatasiga na tuuina atu ai leni faatomuaga? (Papatisoga o Keriso.)
- Aisea na matuai taua ai leni mea na tupu?
- O a ni tulaga na molimau mai ai le Tama i Lona Alo? (tagai Talafaasolopito—Iosefa Samita 2:17; 3 Nifae 11:7).

Faitau le Mataio 17:5 ma faamalamalama atu faapea i tamaiti o le vasega o le aso o le a outou suesueina ai se isi mea taua na tupu lea na toe molimau mai ai le Tama Faalelagi i Lona Alo.

Fai atu i tamaiti o le vasega e faitau ma le faateete le Mataio 17:1–13 ma tali i fesili nei:

- O le a le mea na tupu ia Iesu i luga o le mauga? (tagai f. 2).
- E tusa ai ma le Mose 1:11, aisea e liuaina ai tagata faaletino?
- O ai Aposetolo e toatolu ia e masani lava ona i ai ma Iesu i faatasiga taua? (tagai Mareko 5:22–23, 37; 14:32–34).
- O ai Aposetolo sa faatasi ma Iesu i le taimi o Lona Liuaina?
- O ai isi na faaali mai i le Mauga o Liua?
- O a ituaiga tino sa ia Mose ma Elia ina ua la faaali mai?

Fai atu i tamaiti o le vasega e faitau le Alema 45:19; 2 Tupu 2:11; ma le Mataupu Faavae ma Feagaiga 110:13 e saili ai pe na faapefea ona tuua e Mose ma Elia le olaga faaletino. (Sa liuaina i laua.)

Tuu atu i tamaiti o le vasega e faitauina ia mau mai le siata o loo auina atu faatasi ma le lisi o uiga o tagata e liuaina.

Uiga o Tagata e Liuaina

3 Nifae 28:7	O tagata e liuaina “e le’i tofo lava i le oti.”
3 Nifae 28:8, 39–40	I le Afio Faalua Mai o tagata na liuaina o le a suia vave lava i se tulaga o le toetutu.
3 Nifae 28:30	E mafai ona latou faaali mai ma toe mou atu e pei o agelu.
3 Nifae 28:38	E le oo le “tiga ma le faanoanoa” ia te i latou seiloga o agasala a le lalolagi.
3 Nifae 28:39	E le mafai e Satani ona faosoosoina i latou.

Ia valaaulia tamaiti o le vasega e lisi i luga o se fasi pepa mea uma latou te mafaia na tutupu i luga o le Mauga o Liua. Ia fetufaai atu le vaega lenei mai ia Elder Bruce R. McConkie. Ia lava se taimi e totoe pe a maea ia manatu taitasi mo tamaiti e faapoopo ai i a latou lisi soo se mea na latou misia.

“(1) Sa faatulagaina ese lava e Iesu ia Peteru, Iakopo, ma Ioane mai le toatele o le Toasefululua; ma aveina i latou i se mauga e leai se igoa; o iina na liua ai o ia i o latou luma, ma vaavaai i lona mamalu. . . .

“(2) Sa liua foi ia Peteru, Iakopo, ma Ioane, i ona luma’ (*Teachings [of the Prophet Joseph Smith]*, p. 158). . . .

“(3) Na faaali atu Mose ma Elia . . . i luga o le mauga, ma sa latou tuuina atu ma Iesu ia ki o le malo ia Peteru, Iakopo, ma Ioane. (*Teachings*, p. 158.)

“(4) O Ioane le Papatiso, lea sa muai vavaeeseina e Herota lona ulu, sa i ai foi. . . .

“(5) Na vaai Peteru, Iakopo, ma Ioane i se faaaliga i le liuaina o le lalolagi . . . lea o le a faataunuuina i le Afio Faalua Mai pe a oo mai le vaitaimi o le meleniuma. [MFF 63:20–21]. . . .

“(6) E foliga mai na mauaina e Peteru, Iakopo, ma Ioane o latou lava faaeega paia a o i ai i luga o le mauga. ([Joseph Fielding Smith,] *Doctrines of Salvation*, vol. 2, p. 165.)

“(7) Ua iloaitino mai sa faamalositia Iesu lava ia e Mose ma Elia ina ia saunia ai mo mafatiaga ma le tiga [o le] togioala. ([James E. Talmage,] *Jesus the Christ*, p. 373.)

“(8) O le mea mautinoa lava o aporetolo e toatolu na filifilia sa aoaoina manino e uiga i lona maluu ma lona toetu’ [FIS, Luka 9:31]. . . .

“(9) E tatau foi ona matuai mautinoa ia i latou faapea o tisipenisione ua tuanai [na faailoa mai ia Mose ma Elia] ua mou atu. . . .

“(10) Na foliga mai o le Atua le Tama, sa ufitia ma natia i tua atu o se ao, sa i ai i luga o le mauga, e ui sa faalogoina e [Peteru, Iakopo, ma Ioane] lona siufofoga ae le’i vaai i ai” (*Doctrinal New Testament Commentary*, 1:399–401).

Fesili atu i tamaiti o le vasega:

- O le fea o mea na tutupu i le Mataio 17:1–13 e foliga mai e ono tutupu ia te outou i soo se taimi lava?
- E toafia nisi o outou ua i ai se sini e ulu atu i le malumalu? Aisea?
- O a sauniga o loo faataunuuina i totonu o le malumalu? (tagai MFF 124:33).
- Faitau le Mataupu Faavae ma Feagaiga 97:15–16. O a sauniuniga e talafeagai mo le ulu atu i le malumalu?

Ia valaaulia tamaiti o le vasega e faia se lisi i luga o a latou pepa o mea o le a fesoasoani ia i latou e saunia ai i latou mo faamanuiaga ma feagaiga o le malumalu.

Mataio 17:9 (tagai foi Mareko 9:9; Luka 9:36). O mea faaleagaga paia e oo i ai le tagata lava ia e tatau ona fetufaaiina atu pe a musuia ai e le Agaga i tatou. (10–15 minute)

Fesili atu i tamaiti o le vasega:

- Aisea o le a avea ai ma faafitauli le tuuina atu i se pepe se ata e tasi o loo totoe o lou tama matua?
- O le a le mea e faia e le tele o pepe i ni ata?
- Aisea e sili atu ai ona faatali se’i matua le pepe? (E mafai e se tamaitiiti matua ona sili atu ona talisapaia se ata ma tausia faalelei.)

Fai atu i tamaiti o le vasega e faitau le Mataio 17:9 ma vaai ai po o a mea na poloaiina ai e Iesu ia soo e toatolu o e sa faatasi ma Ia i Lona Liuaina. Tuu atu i tamaiti o le vasega e faitau le Alema 12:9 ma le Mataupu Faavae ma Feagaiga 63:64, ma fesili atu:

- Aisea na poloaiina ai e Iesu Ona soo e aua nei tautalatala i Lona Liuaina?
- E faapefea ona pei le faamatala atu o le Liuaina o le tuuina atu o se ata taua i se pepe?

Ia fetufaai atu le saunoaga lenei mai ia Elder Boyd K. Packer:

“Na ou aoaoina e faapea, o lena uunaiga malosi faaleagaga e le oo mai soo ia i tatou. Ma afai e oo mai, e masani ona oo mai mo lo tatou lava aoaoina po o le faatonuina. Sei vagana ua valaauina i tatou e se pule tatau e faia ai faapena, tatou te le mauaina i aafiaga faaleagaga le aia tatou te fautuaina ai pe faatonuina ai isi.

“Ou te talitonu e le o se mea ua alagatau le faaaauu pea ona talanoa e uiga i aafiaga faaleagaga uiga ese. O mea na e tatau ona puipuia ma le faaeteete ma na o le pau lava le taimi e tatau ai ona ta’u atu, pe afai lea ua musuia ai oe e le Agaga e te faaaoaga na aafiaga mo le manuia o isi” (“O le Lamepa a le Alii,” *Liahona*, Tes. 1988, 35).

Ta’u atu i tamaiti o le vasega o le Liuaina o loo tusia i soo se Talalelei se’i vagana ai ia Ioane (tagai Mareko 9:2–13; Luka 9:28–36). Faitau faatasi ma tamaiti o le vasega le Mataio 17:1 ma fesili atu:

- O ai o tusitala e toafa o le Talalelei na i ai tonu lava i le taimi o le Liuaina?
- Faamata aisea ua le tusia ai e Ioane lenei mea na tupu i lana Talalelei? (tagai Mataio 17:9).
- O a ni ituaiga mea e oo i ai tagata i aso nei lea e tatau ona latou fetufaaiina atu pe a musuia ai e le Agaga? (faamanuiaga faaPeteriaka, faamanuiaga faaletamā, ni mea na oo i le tagata lava ia po o le aiga, faatalanoaga a le epikopo.)
- E tusa ai ma le Alema 12:9 ma le Mataupu Faavae ma Feagaiga 63:64, o le a le taimi e talafeagai ai ona fetufaai atu ni mea paia na oo i ai se tasi?

Mataio 17:24–27. O le ola i le tulafono o le laueleele o se vaega lea o le talalelei a Iesu Keriso . (10–15 minute)

Fesili atu i tamaiti o le vasega pe latou te iloa le mea e maua ai ia Mataupu Faavae o le Faatuatua (i le pito i tua o le Penina Tautele). Ia valaaulia se tamaitiiti o le vasega e faitau atu pe tauloto atu le mataupu faavae e sefululua o le faatuatua. Ia valaaulia se isi tamaitiiti o le vasega e faamalamalama atu lona uiga. Faitau le Mataupu Faavae ma Feagaiga 134:1, 5 ma fesili atu:

- O le a le faamoemoega e faavaeina ai ia malo?
- O a mafuaaga e tatau ai i malo ona faia ia ni tulafono?
- O a tiutetauave o loo ia i tatou e faatatau i lo tatou malo?

Ia valaaulia tamaiti o le vasega e faitau le Mataio 17:24–27 ma vaai ai po o le a le mea na faia e Iesu na faailoa mai ai Lona tausia o le tulafono o le laueleele. Ia fetufaai atu le saunoaga lenei mai ia Elder James E. Talmage, o lē sa avea ma sui o le Korama a Aposetolo e Toasefululua:

“O le galuega a lo tatou Faaola i le lalolagi na matuai iloga lava i Lona amanaiaina lea o malosiaga o le laueleele sa i ai, e le gata i Iutaia ae faapea foi i Roma. . . . Ina ua talosagaina e le ao lafoga ia tupe e foaiina atu e pei ona poloaiina ai e taitai, sa poloaiina . . . e Keriso le totoigiina atu o lafoga, ma folafolaina atu se tulaga ofoofogia lea e mafai ona maua mai ai le tupe” (*The Articles of Faith*, 12th ed. [1924], 416).

Fesili atu i tamaiti o le vasega pe o tausia e tagata o loo faia ia mea nei ia poloaiga:

- Silia le saosaoa faatulagaina.
- Taufaaoleole i a latou lafoga.
- Aveesea o ni meatotino mai le galuega.
- Tuuina atu o se auaunaga laitiiti mo se galuega o le aso atoa oloo totoigiina ai.
- Kopiaiina o polokalama faakomepiuta i se ala solitulafono.

Fesili atu:

- O a nisi o auala masani o loo solia ai e tagata le tulafono o le laueleele?
- Faitau le Alema 39:3, 11. E tusa ai ma nei fuaiupu, o le a le isi mafuaaga e tasi lea e tatau ai ona tatou tausia le tulafono o le laueleele? (O a tatou amioga, pe lelei pe leaga e aafia ai isi o loo i o tatou tafatafa.)

Mataio 18:1–10 (tagai foi Mareko 9:33–37, 42–48; Luka 9:46–48). Na aoao mai e le Faola faapea ina ia ulu atu i Lona malo e tatau ona avea i tatou e faapei o se tamaitiiti. (15–20 minute)

E mafai e tamaiti laiti ona tautatala ma faia ni mea fou. Fai atu i tamaiti o le vasega e ta’u mai nisi o mea malie ua latou vaai o tautatala pe faia e tamaiti. Faitau le Mataio 18:1–4 ma fesili atu:


- O ai e sili i le malo o le lagi?
- Aisea ua talosaga mai ai le Faola ia i tatou ina ia avea i tatou faapei o se tamaitiiti?
- O le a so outou manatu o le a le uiga o le avea e faapei o se tamaitiiti? (tagai Mosaea 3:19).
- O le a le eseesea i le va o le “faatamaitiiti” ma le “avea faapei o se tamaitiiti”?

Tuu se ata o Keriso ma Tamaiti (nu. 80243) po o se ata lapoa o se tamaitiiti laitiiti i luma o le vasega. Ia tusi ni koluma se tolu i luga o le laupapa ma faaigoa *Uiga, O Mea e Mafai e Tamaiti Ona Fai*, ma le *O Mea e Mafai Ona Ou Fai*. Fai atu i tamaiti o le vasega e ta’u mai nisi o uiga o tamaiti, ma lisi a latou tali i le koluma muamua. Fai atu i tamaiti o le vasega e faamatala mai pe faapefea ona faaalua e tamaiti nei uiga taitasi, ma tusi a latou tali i le koluma lona lua. (Tagai i le siata o loo auina atu faatasi mo faaitaiga.) Ia fesili mulimuli atu po o le a se mea

e mafai ona tatou faia ina ia atinaeina ai nei lava uiga e tasi, ona lisi lea o a latou tali i le koluma lona tolu.

Uiga	O Mea e Mafai e Tamaiti Ona Fai	O Mea e Mafai Ona Ou Fai
Lē tausalaina	O tamaiti e fananau mai ma le lē tausalaina ma e saoloto mai le agasala.	
Lotomauualalo	O tamaiti e le faamaualuluga pe faasausili.	
Aoao gofie	O tamaiti e le tau vaai ona faatoa talitonu lea.	
Alofa ma le faamagalo atu	O tamaiti e faagalo gofie le ita ma e le umi ae toe fefaaouai.	
Faalagolago i matua	E faatuatuaina e tamaiti o latou matua ma lo latou Tama Faalelagi.	
Leai se faailoga tagata	E faigofie i tamaiti ona taliaina ia eseese e pei o lanu ma ni le atoatoa faaletino.	

Tuu atu i tamaiti o lau vasega e faitauina le Mataio 18:6, ma fesili atu: O le a le matuia o le faaonoono po o le faatiga i fanau a lo tatou Tama o i le Lagi? Atonu e te manao e faaali atu i tamaiti o le vasega se ata o se maaolo pe tusi foi se ata i luga o le laupapa. Ta’u atu i tamaiti o le vasega faapea o le sauaina i le faaletino po o upu o se tamaitiiti o se tasi lea o solitulafono faaleagaga ua sili ona matuia. O se tasi auala e faaleagaina ai fanau o le aoaoina atu lea ia i latou o mataupu faavae sese po o le faatoilaloina foi ona aoaoina i latou i mataupu faavae sao.




- O ai isi e faatatau i ai le faaupuga “tamaitiiti” nai lo tamaiti? (tagai Mosaea 3:18–19).
- O ai isi e le tatau ona tatou faaonoono pe faatiga i ai?

Fesoasoani i au tamaiti o le vasega ina ia malamalama pe faapefea ona faatatau nei mataupu faavae ia i latou. Afai tatou te faasaua i le faaletino po o upu i o tatou uso ma tuafafine laiti po o soo se tasi o fanau a le Atua, ua tausalaina i tatou i se solitulafono na matuai aoaiina e le Faaola.

Mataio 19–20

O le Soifuaga o Iesu Keriso



Faatomuaga

I le Mataio 19–20 na amata ai e le Faaola le malaga i Ierusalem mo le Paseka ina ia ofoina atu o la lava e avea ma mamoe e isi ai le taulaga. Sa Ia faaauau pea ona aoao atu ma auauna atu i luga o le ala, ma sa mulimuli atu le motu o tagata ia te Ia (tagai Mataio 19:2). O aoaoga ma mea na tutupu i nei mataupu e lua ua tatou oo atu ai i le taimi a o lumanai le ulufale atu o Iesu ma le manumalo faapea ma le amataga o le vaiaso mulimuli o Lona soifuaga.

Suesue ma le agaga tatalo le Mataio 19–20 ma mafaufau i mataupu faavae nei ae le’i sauniaina au lesona.

O Nisi Mataupu Faavae Tava o le Talalelei e Saili Iai

- O le faaipoipoga ua faauuina e le Atua ma ua fuafuaina e Ia ina ia tumau e faavavau. Talu ai ona o le faatete’aina e talafeagai i nisi taimi i le olaga faaletino, “ae le’i faapea talu mai le amataga” (tagai Mataio 19:8; tagai foi 1 Korinito 11:11–12; MFF 131:1–3).
- Tatou te toilalo uma lava i le taulalata atu i le atoatoa, ae afai tatou te ole atu ma le faamaualalo, e mafai e le Alii ona taitaiina i tatou i le atoatoa i lea laasaga ma lea laasaga (tagai Mataio 19:16–26; tagai foi Moronae 10:32–33).
- Ua i ai i taitai se tiutetauave sili ma le avanoa e auauna atu ai (tagai Mataio 20:25–28; tagai foi Esekielu 3:17–21; Iakopo 1:19).

Fautuaga mo le Aoao Atu

Filifili mai manatu nei, pe faaoga nisi o ou lava manatu, a o e sauniaina ia lesona mo le Mataio 19–20.

Mataio 19:3–8 (tagai foi Mareko 10:2–9). O le faaipoipoga ua faauuina e le Atua ma ua fuafuaina e Ia ina ia tumau e faavavau. Talu ai ona o le faatete’aina e talafeagai i nisi taimi

I le olaga faaletino, “ae le’i faapea talu mai le amataga.” (20–25 minute)

Ia valaaulia atu se tamaitiiti o le vasega i luma o le vasega. Faaali atu i ai ni ituaiga lole eseese se lua ma fai atu ia te ia e filifili le tasi po o le isi. Fesili atu i le vasega:

- E fia ni faaiuga e te faia i se aso?
- O a nisi o faaiuga taua e ao ona e faia i le asō? (Lisi tali i luga o le laupapa.)
- O le a sou manatu o le a se faaiuga sili ona taua o le a e faia i lou olaga?

Ia fetufaai atu le saunoaga lenei mai ia Elder Spencer W. Kimball, a o avea ma se sui o le Korama a Aposetolo e Toasefululua:

“O le aafiaga sili e tasi i le tulaga o le a e oo i ai i le lumanai, o lou toaga, o au amioga, e oo lava i lou taunuuga . . . o le faaiuga lea e tasi e te faia i lena po masina pe a e talosaga atu i lena tagata ina ia avea ma au soa mo le olaga. O le faaiuga aupito sili lena ona taua i lou olaga atoa!” (*The Teachings of Spencer W. Kimball*, 301).

- O le a so outou manatu o a ni lagona o nisi tagata o le lalolagi e uiga i le taua o le faaiuipoga?
- O a nisi o auala ua outou vaai i nisi o ulugalii o loo foiaina ai ni faafitauli i a latou faaiuipoga?

Ia valaaulia tamaiti o le vasega e faitauina le Mataio 19:5–6 e vaai ai po o le a le mea na aoaoina mai e le Faaola e uiga i le faaiuipoga. Faaali atu i le vasega se ata o se malumalu ma fesili atu i tamaiti o le vasega po o fea e mananao e faaiuipo ai. Ona faitau lea o le fuaiupu e 7–9 ma fesili atu: O le a se mea tatou aoaoina mai e uiga i le faaiuipoga e ala lea i le malamalama i aoaoga a Iesu e faatatau i le tete’a? (*Faaaliga*: Ia nofouta mo tamaiti o le vasega o e ua tete’a matua po o tagata o aiga. O le faamamafa e le tatau ona i luga o faafitauli o isi ae o le fesoasoani i tamaiti o le vasega ina ia saunia mo faaiuipoga e faavavau.) Ia fetufaai atu le saunoaga lenei mai ia Elder Bruce R. McConkie:

“O le faaiuipoga faaselesitila po o le faaiuipoga e faavavau o le faitotoa lea i le faaeaga. Ina ia faataunu-uina le faamoemoega atoa o lana foafoaga ma le mauaina o le ola e faavavau e tatau i se tagata ona ulu atu i lenei faatulagaga o le faaiuipoga ma tausia feagaiga uma ma matafaioi e o faatasi ai. Afai ua faamauiina se ulugalii, ua ta’ua loa i laua o le tane ma le ava i le olaga nei ma e faaaau ai pea i lea lava sootaga i le lalolagi a sau. (MFF 131:1–4; 132.)

“O le tete’a e le o se vaega o le fuafuaga o le talalelei e tusa lava po o le a le ituaiga faaiuipoga o loo aafia

ai. Ae talu ai ona o tagata latou te le ola e tusa ai ma faatulagaga o le talalelei, o lea ua faatagaina ai e le Alii le tete’a mo se mafuaaga e tasi po o se isi foi, e faalagolago lava i le mautu faaleagaga o tagata o loo aafia ai. . . . I le tele lava o tulaga atoatoa e leai se tete’aga e faatagaina se’i vagana ai ua aafia ai ni agasala o le feusuai. O aso nei ua faatagaina ai ia tete’aga e tusa ai ma tulafono faalemalo, ma o tagata ua tete’a e faatagaina e le Ekalesia ona toe faaiuipo atu e aunoa ma se aafia i le ola le mama lea e mafai ai e se faatulagaga e maualuga atu ona taulimaina” (*Doctrinal New Testament Commentary*, 1:547).

Ia faamamafa atu faapea e ui lava i le tele o tete’aga i le lalolagi, e oo lava foi i tagata o o tatou aiga i nisi o tulaga, ae taua le ‘aua ne’i faamasino atu ia i latou o e ua i ai ni faigata i o latou olaga. Ae ao ona tatou faaaogaina nei aoaoga a le Faaola i o tatou olaga i se auala lelei. Fesili atu: E mafai faapefea ona tatou saunia ina ia faia se faaiuga lelei e faatatau i le faaiuipoga? (Faatu se sini ina ia faaiuipo i totonu o le malumalu, ola i se auala e te manao ai i lou toalua i le lumanai ina ia ola ai, ia faifaimea faatasi ma talavou o e o loo agavaa e o atu i le malumalu.)

Mataio 19:16–26 (tagai foi Mareko 10:17–27; Luka 18:18–27). Tatou te toilalo uma lava i le taulalata atu i le atoatoa, ae afai tatou te ole atu ma le faamaualalo, e mafai e le Alii ona taitaiina i tatou i le atoatoa i lea laasaga ma lea laasaga. (20–25 minute)

Tusi le upu *Tapuai* i luga o le laupapa. Fai atu i tamaiti o le vasega e faauiga mai le upu. (E tele tali sa’o.) A maea ni fai faauigaina, ona fetufaai atu lea o le faauigaina lenei na tuuina mai e Elder Bruce R. McConkie:

“O le tapuai ma le atoatoa o le faataitai lea” (*The Promised Messiah: The First Coming of Christ* [1978], 568).

Tuu atu i tamaiti o le vasega e faitauina le 3 Nifae 27:27, ma fesili atu: E faapefea ona faatatau lenei fuaiupu i le saunoaga a Elder McConkie? Faitau le Mataio 19:16–26 ma fesili atu: O le a le mea na moomia ona faia e le alii talavou ina ia avea ai faapei o le Faaola?

Ina ia tuuina atu i tamaiti o le vasega ni manatu e uiga i auala e mafai ai ona avea atili e pei o le Faaola, ia usu pe faitau ia upu i le “Faapaia Mai A’u” (*Viiga*, nu. 70). Fai atu i tamaiti o le vasega e tusi i luga o se fasi pepa le suiga tele e tasi lea e moomia ona latou faia i o latou olaga ina ia avea atili ai faapei o Iesu. Fesili atu: E te manatu o le a tutusa uma le mea e tusia e tagata taitoatasi? Aisea e le tutusa ai?

Ia fetufaai atu le saunoaga lenei mai ia Peresitene Harold B. Lee:

“E le’i manaomia ona aoaoina le taulealea aoao tula-fono i le salamo mai le fasioti tagata po o mafaufauga fasioti tagata. E le’i tau aoaoina o ia ina ia iloa ona salamo mai le mulilua, pe mai le gaoui, pepelo, taufaasese, po o le lē ava i lona tina. O nei mea uma sa ia ta’ua sa ia tausia talu mai lona laitiiti. . . .

“Ae o le Matai, faatasi ai ma Lona iloatinoina o mea faapea ma le mana o le Faiaoga Silisili, sa ia togafitia le mataupu a lenei taulealea i le atoatoa: O le mea sa ia manaomia ma le mea sa ia vaivai ai o lona faatoilaloina lea o lona tuinanau i mea faalelalolagi. . . .

“O i tatou uma lava taitoatasi, afai tatou te oo atu i le atoatoa, e tatau i se isi taimi ona fesili ia i tatou lava le fesili lenei, ‘O le a se mea o loo o’u vaivai ai?’ pe afai o le a tatou amataina la tatou taumafaiga agai i luga i le ala e tau atu i le atoatoa. O le taitai mataala o ia lea na te fesoasoani i le tagata o loo aoaoina ina ia iloaina le mea o loo vaivai ai, ia togafitia ona faigata faavae, ona faamatala atu lea i ai ona fofa faaleagaga” (*Stana Ye in Holy Places* [1974], 208–10).

Ia uunaiina tamaiti o le vasega e faia ni taumafaiga faamaoni ina ia suia ai o latou olaga ina ia avea ma ni tagata lelei. Ia uunai i latou e tatalo ina ia iloa se isi mea e mafai ona latou faia ina ia avea atili ai e faapei o le Faaola.

Mataio 20:25–28 (tagai foi Mareko 10:42–45; Luka 22:24–27). Ua i ai i taitai se tiutetauave sili ma le avanoa e auuna atu ai. (10–15 minutes)

Fai atu i tamaiti o le vasega e faafoliga faapea faatoa avea lava i latou ma taitai o lo latou atunuu. Fai atu i ai e faafoliga o le a faatalanoaina i latou e le au fai nusipepa ma le au faasalalau ma o le a mananao e fia iloa po o le a se mea o le a taulai atu i ai le latou faigamalo. Fesili atu: O le a sa outou tala e fai?

Fai atu i ai latou e lisi i lalo nisi o uiga o se taitai lelei. Tuu atu i tamaiti o le vasega e faitauina le Mataio 20:25–28 ma lisi mai ai pea na ta’ua e le Alii i nei fuaiupu e uiga i taitai. Tuu atu ia i latou e faitauina le Mosaea 2:11–19, 27 ma faitau le aofaiga o taimi o loo ta’u mai ai le upu *auauna* po o le *auaunaga*. Fesili atu:

- O le a se lagona sa i ai i le Tupu o Peniamina e uiga i le auuna atu?
- E faapefea ona faatusatusa nei fuaiupu i le mea na aoaoina mai e le Faaola i totonu o le Mataio 25:34–40?


Faitau le Iakopo 1:19 ma le Esekielu 3:17–21 ma fesili atu:

- O le a se mea na outou aoaoina mai nei fuaiupu e faatatau i le matafaioi o se taitai?
- O a ni auala atonu o le a valaauina ai oe ina ia avea ma taitai? (Ia faailoa atu faapea e toetoe lava o i tatou uma e i ai se taimi i o tatou olaga e valaauina ai e tuuina atu le taitaiga i le lotu, aoga, galuega, po o totonu o o tatou aiga.)

- O le a se mea e mafai ona e faia nei ina ia saunia ai oe e avea ma se taitai?
- E mafai faapefea ona tatou lagolagoina nei o tatou taitai i ni auala e fesoasoani ai ia i latou e faataunuuna o latou tiutetauave?

Mataio 21–23

O le Soifuaga o Iesu Keriso



Faatomuaga

O le Mataio 21–23 e amataina ai le vaiaso mulimuli o le soifuaga faaletino o le Faaola. (Mo se auiliiliga afaatasi o nei mea na tutupu, ia tagai i le “O le Vaiaso Mulimuli o le Soifuaga o le Faaola” i le faaopoopoga, i. 283.) Mo le tolu tausaga sa aoao atu ma faamalolo, faamalosiua, ma faaalua e le Faaola le ituaiga alofa lea na mulimuli atu ai le motu o tagata ia te Ia. O Lona ulufale atu ma le manumalo faapea ma totonu o le malumalu mulimuli ane, na faailoa mai ai e tagata o Iesu o le Mesia folafolaina (tagai Mataio 20:9, 15). O le mea lenei na tupu ai le feita o taitai Iutaia, o e na saili ina ia aveeseina Lona soifua. Ina ua uma ona faamamaina le malumalu, sa faaluina e Iesu le tele o le taimi e aoaoina ai tagata sa iina.

Suesue ma le agaga tatalo le Mataio 21–23 ma mafau fau i mataupu faavae nei ae le’i sauniaina au lesonea.

O Nisi Mataupu Faavae Tava o le Talalelei e Saili Iai

- Pe a tatou vaavaai ia Iesu Keriso i Lona silisiliese moni ma le ofofofia, o le a mafai ai ona tatou malamalama lelei i le taua o le viiaina o Ia o lo tatou Faaola ma le Togiola (tagai Mataio 21:1–11; tagai foi Mosaea 3:17).
- E faamasinoina i tatou e Iesu mo a tatou mea sese (tagai Mataio 21:12–16; tagai foi MFF 97:15–16).
- O le poloaiga sili o le alofa atu i le Atua ma o tatou lotu atoa, agaga atoa, ma le mafau fau atoa (tagai Mataio 22:36–38).
- O le poloaiga sili lona lua o le alofa atu lea i isi e pei ona tatou alolofa ia i tatou lava (tagai Mataio 22:39).

- E mafai ona tatou faa-aafiaina isi i le lelei po o le faalēlelei e ala i le auala tatou te ola ai (tagai Mataio 23:2–28; tagai foi Alema 39:3, 11).
- “O le Vaiaso Mulimuli o le Soifuaga o le Faaoia,” 283.

Fautuaga mo le Aoao Atu

Filifili mai manatu nei, pe faaoga ni ou lava manatu, a o e sauniaina ia lesona mo le Mataio 21–23.



Ata Vitio o le Feagaiga Fou ata lona 7, “Faamasinoga Tonu ma le Alofa” (6:00), e mafai ona faaogaina i le aoaoina atu o le Mataio 21 (tagai *Vitio Taiala o le Feagaiga Fou* mo fautuaga e aoaoina ai).

Mataio 21:1–11 (tagai foi Mareko 11:1–11; Luka 19:29–40; Ioane 12:12–19). Pe a tatou vaavaai ia Iesu Keriso i Lona silisiliese moni ma le ofoofogia, o le a mafai ai ona tatou malamalama lelei i le taua o le viiaina o Ia o lo tatou Faaoia ma le Togiola. (15–20 minute)

Fai atu i tamaiti o le vasega faapea o se taitai taualoa ma le faaaloaloga o lo latou atunuu ua savali atu i totonu o le potu.

- O le a sou manatu o le a i ai?
- O le a sou lagona o le a i ai?
- O a ni au mea o le a fai?
- O le a sau tala o le a fai?

Tuu atu ia i latou e manatunatu faapea ua savali atu le perofeta i totonu o le potu ma tali i fesili lava na e tasi. Ia mafaufau nei la faapea o Iesu Keriso lea ua savali atu i totonu o le potu ma taliina ia fesili.

- O le a faapefea ona eseese au tali i tagata e toatolu?
- Aisea o le a eseese ai?

Ia faamalamalama atu faapea o le asō o le a outou faitau ai e faatatau i uiga na faaalua e tagata i se asiasiga a Iesu Keriso.

Ia valaaulia tamaiti o le vasega e faitau le Mataio 21:1–11 ma lisi i lalo mea na faia e tagata e viia ai Iesu a o ulufale atu i Ierusalema. Faitau ia mau nei ma lisi i lalo ia mafuaaga e tatau ai ona tatou viia ia Iesu Keriso:

- Helamana 14:12
- 1 Korinito 15:21–22
- Mosaea 3:17

Fesili atu:

- E mafai faapefea ona tatou viia Iesu e tusa lava pe le o iinei o Ia i la le tino? (O tali e talafeagai ai e aofia ai le usuina o viiga e uiga ia te Ia, o le tausia o a tatou feagaiga ina ia manatuaina pea o Ia, faafetai atu i le Tama Faalelagi mo Ia, faailoa atu le loto faafetai mo le Togiola pe a tatou tatalo.)
- Faitau le 2 Nifae 2:10. E tusa ai ma lenei fuaiupu, o le a se mea o le a tatou oo uma lava i ai i se aso?

Fai atu i tamaiti o le vasega e mafaufau lemu lava i fesili nei:

- Pe o le a avea ea lena aso ma se aso fiafia po o se aso faanoanoa mo oe?
- O le a se mea o le a e manatunatu i ai, tautala i ai, ma fai pe a oo mai lena aso mo oe?

Mataio 21:12–16 (tagai foi Mareko 11:15–19; Luka 19:45–48). E faamasinoina i tatou e Iesu mo a tatou mea sese. (5–10 minute)

Ia valaaulia tamaiti o le vasega e faitau le Mataio 21:12–16 ma tali i fesili nei:

- O le a le mea na tupu i totonu o le malumalu?
- O le a le mea na faia e Iesu ina ia suia ai lea tulaga?
- Aisea e le faigiofie ai mo se tagata e toatasi ona faia lenei mea?
- O ai sa le fiafia i le mea na faia e Iesu?
- E mafai faapefea e lenei mea ona faatatau ia i tatou i aso nei?

Faitau le Mataupu Faavae ma Feagaiga 97:15–16 ma fesili atu:

- O le a sou lagona o le a le mea e tatau ona faia e se tagata ina ia maua ai se loto mama?
- O le a le mea e faigata ai ona tumau pea i tatou i lenei auala i taimi uma?
- O le a le mea o loo i ai tatou lea e mafai ona fesoasoani ia i tatou ina ia tatou agavaa pea mo faamanuiaga o loo maua i totonu o le malumalu?

Mataio 21:18–22:46 (tagai foi Mareko 11:12–12:34; Luka 20:1–40). E tele aoaoga faavae taua na aoaoina atu e Iesu a o lumanai Lona maliu. (45–50 minute)

Ia valaaulia tamaiti o le vasega e faafoliga ua latou iloaina e toe tasi le vaiaso ona latou feoti lea. Ia tuuina atu i ai ia fesili nei:

- O le a se mea e te faia i le toe vaiaso o lou olaga?
- O ai e te faaaluina i ai lou taimi?
- O le a se mea e te ta’uina atu i lou aiga?
- O le a faapefea ona e manao i tagata e manatuaina oe?
- O le a faapefea ona e saunia ina ia feiloai ma lou Tama Faalelagi?

Ia faamalamalama atu o le tulaga lenei sa i ai ia Iesu i le Mataio 21–22. Na Ia silafia o le a Ia maliu i ni nai aso ma e puupuu lava Lona taimi o loo totoe e aoao atu ai. Na aoao atu e Iesu le tele o aoaoga faavae taua i aso nei a’o lumanai Lona maliu.

Vaevae le vasega i ni vaega se iva ma tuu atu i ai se poloka o mau se tasi mai le siata o loo auina atu faatasi. (Afai e i lalo ifo o le iva au vaega, ona tuuina atu lea i nisi o vaega ia sili atu ma le tasi le poloka o mau.) Ia tuu atu i tamaiti o le vasega le lima i le sefulu minute e suesue ai a latou poloka ma saunia ai e faia le vaega lenei:

- Ia iloa le mataupu faavae o le talalelei na faamamafaina e Iesu i le poloka o mau. (*Faaaliga*: O loo aofia ai i le siata ni nai mataupu faavae o loo maua ai i nei mau. E mafai e tamaiti o le vasega ona sailia nisi mataupu faavae e sili atu.)
- Faitau pe fai se aotelega o fuaiupu o loo i le poloka lea o le a fesoasoani tele i le malamalama ai i mataupu faavae.
- Ia faamalalama atu pe faapefea ona faatatauina nei mataupu faavae ia i tatou i aso nei.

	Poloka o Mau	Aoaga a Iesu
1	Mataio 21:18–22	E mafaia mea uma ia i latou o e ole atu i le Atua ma le faatuatua.
2	Mataio 21:23–27	Na galulue Iesu ma Ioane le Papatiso ma le pule a le Atua.
3	Mataio 21:28–32	O le salamo e mafai ai ona tatou auuuna atu i lo tatou Tama Faalelagi.
4	Mataio 21:33–46	O i latou o e teenaina ia perofeta ma Iesu Keriso o le a faatafunaina.
5	Mataio 22:1–14	O le a taliaina e le Alii i latou o e mulimuli ia te Ia ma le naunautai ma le tonu.
6	Mataio 22:15–22	E tatau ona tatou auuuna atu i le Atua ma usiusitai i tulafono o le laueleele.
7	Mataio 22:23–33	O le Toetu e moni. O i latou e lē faamauina o le a le faaiipoipoina i le Toetutu (tagai foi MFF 132:15–16).
8	Mataio 22:34–40	O le poloaiga sili ma le muamua o le alofa atu i le Atua. O le poloaiga sili lona lua o le alofa atu i isi.
9	Mataio 22:41–46	O Iesu Keriso o le Alo o le Atua.

Tuu atu i vaega taitasi e lipoti mai a latou sailiga. Ia uunaia ia tamaiti o le vasega e faatatau nei mataupu faavae i o latou olaga.

Mataio 23:2–28 (tagai foi Mareko 12:38–40; Luka 20:45–47). Afai tatou te le ola e tusa ai ma faatulagaga o le talalelei ua tatou umiaina, e mafai ona tatou faa-aafiaina ai isi i le leaga. (10–15 minute)

Aumai i le vasega ni ipu inu e le iloa atu totonu. Ia nini i le ga’o ma le palapala ia fafo o le ipu muamua ae o totonu o le ipu lona lua, ae tuu ai pea le ipu lona tolu e mama. Faaali atu i le vasega ia ipu (e tatau ona latou mafai ona iloa na o fafo). Fesili atu: O le fea o ipu nei e tolu e te le manao e inu ai? Ia valaaulia se tamaitiiti o le vasega e sau i luma o le vasega ma vaai i totonu o ipu. Fai atu i le tamaitiiti o le vasega lenesi e faailoa mai po o le fea o ipu e tolu e manao e inu ai.

- O le fea ipu e sili atu ona sefe e inu ai?
- O a ni auala ua pei ai tagata o nei ipu?

Faitau le Mataio 23:2–4, 15, 23–28 ma fesili atu:

- O a vaega e lua ia na lapataiina ai e Iesu ia tagata? (tagai f. 2).
- O le a le latou mea sa fai na aoaiina ai i latou e Iesu? (Ia lisi tali i luga o le laupapa pe a mananao ai.)
- O le a le mea na ta’u ai e Iesu i latou o e na faia nei ituaiga mea? (tagai f. 23).
- O le fea o ipu o loo i le lesona faatino e sili ona faatusa i ai i latou? (tagai f. 25).
- O nei mau o loo aoao mai e uiga i se isi le faamaoni e tasi. O le a se isi ituaiga e i ai?


Ia fetufaaia atu le saunoaga lenesi mai ia Peresitene N. Eldon Tanner, o se tasi o le Au Peresitene Sili:

“Na maitauina e Harry Emerson Fosdick faapea e lua ituaiga lē faamaoni: pe a tatou taumafai e faafoliga tatou te lelei nai lo le mea o loo tatou i ai, ma ua tatou foliga atu tatou te leaga nai lo le mea o loo tatou i ai. Ua tatou tautalagia le ituaiga le faamaoni lea e faafoliga ai tagata e sili atu po o le lelei atu nai lo le mea o loo latou i ai. Ae peitai, e masani ona tatou vaaia tagata o le Ekalesia o e o loo iloa ma talitonu i o latou loto, ae o le fefe i le vaaiga a tagata ua le mafai ai ona tu atu ma tautala mo le upumoni. O lenesi ituaiga le faamaoni e sili atu ona matautia nai lo le isi” (i le Conference Report, Oke. 1970, 52–53).

Faitau le Mataio 23:15 ma le Alema 39:3, 11 ma vaai i aafiaga a tagata le faamaoni e mafai ona fai i isi. Faitau le Mataio 23:8–12 ma vaai ai mo le fautuaga na tuuina atu e Iesu lea e mafai ona fesoasoani ai ia i tatou e aloese mai le lē faamaoni.

Mataio 24–25

O le Soifuaga o Iesu Keriso



Faatomuaga

I ni nai aso a o lumanai le Faasatauroga, na fesili atu ai le au soo ia Iesu e uiga i Lona Afio Faalua Mai (tagai Mataio 24:3). I totonu o le Mataio 24 ma le 25 tatou te mauaina ai le tele o faamalalamaaga ma valoaga e uiga i lena taimi. O mea na tutupu i nei mataupu e matuai matagofie lava ia i tatou

i le taimi nei aua o loo tatou saunia nei le lalolagi mo le Afio Faalua Mai ma ona o loo tatou ola i se vaitaimi ua tele ai ia valoaga ua faataunuuiina.

Na faia e le Perofeta o Iosefa Samita le tele o suiga ma faapoopoga i le Mataio 24 i totonu o le Faaliliuga a Iosefa Samita. O lenei mataupu na toe lomaiina uma lava i totonu o le Penina Tautele ma avea o le Iosefa Samita—Mataio. O fautuaga mo le aoaoina atu mo le Mataio 24 o le a maua mai le Iosefa Samita—Mataio i totonu o le Penina Tautele.

Suesue ma le agaga tatalo le Mataio 24–25 ma mafauafau i mataupu faavae nei ae le'i sauniaina au lesona.

O Nisi Mataupu Faavae Tava o le Talalelei e Saili Iai

- O se faasologa o mea na tutupu o le a muamua mai i le Afio Faalua Mai o Iesu Keriso. O le suesueina o nei mea o le a tutupu e mafai ona fesoasoani ai ia i tatou ina ia saunia mo le Afio Faalua Mai (tagai Iosefa Samita—Mataio 1:22–37; tagai foi Mataio 24:1–35; MFF 29:14–21; 45:16–53, 63–75).
- Talu ai ona e leai se tasi e iloa tonu le taimi o le Afio Faalua Mai, o e amiotonu e mafai ona iloa i se auala faalauaitete pe a latalata mai (tagai Iosefa Samita —Mataio 1:38–54; tagai foi Mataio 24:32–51).
- Tatou te faaali atu lo tatou alofa mo le Atua i le auala tatou te tausia ai Ana fanau (tagai Mataio 25:40; tagai foi Mosaea 2:17).
- “O le Vaiaso Mulimuli o le Soifuaga o le Faaola,” 283.

Fautuaga mo le Aoao Atu

Filifili mai manatu nei, pe faaaoga ni ou lava manatu, a o e sauniaina ai lesona mo le Mataio 24– 25.



Iosefa Samita —Mataio (tagai foi Mataio 23:39– 24:51, Mareko 13; Luka 12:37–48; 17:20–37; 21:5–36). E sili atu ona suesueina le Mataio 24 mai le Iosefa Samita —Mataio i totonu o le Penina Tautele. (5 minute)

Fai atu i tamaiti o le vasega e manatunatu faapea ua leiloloa i latou. Ina ua mavae se taimi umi lava o fesea'i solo, sa latou vaai loa se isi tagata. O le tagata lenei e lua ana faafanua mo le nofoaga lenei. O faafanua uma e lua e sa'o lelei ina ua gaosia ma o le a fesoasoani tele nei ia i latou. O le isi faafanua ua 200 tausaga le matua. O le isi o se faafanua lata mai nei lava. Fesili atu: O le fea faafanua e sili atu ona ia te outou? Aisea?

Ia valaaulia tamaiti o le vasega e faitauina le ulutala mo le Iosefa Samita —Mataio. (Afai e leiloa e tamaiti le mea e ta'u o le Faaliliuga a Iosefa Samita, ona valaaulia lea o i latou e faitauina le “Faaliliuga a Iosefa Samita” o loo i totonu o le Taiala i Tusitusiga Paia.) Fesili atu:

- E faapefea ona pei le Mataio e 24 ma le Iosefa Samita — Mataio o faafanua e lua o loo faamatalaina i luga?

- O le fea poloka o mau e fetai ma le a le faafanua?
- O le a le matua o le tusi a Mataio? (Ua latalata i le lua afe tausaga.)
- O le a le matua o le Iosefa Samita—Mataio? (Na faaliliuina i le 1831.)
- O le fea o nei tusi e sili ona sa'o?
- O le fea poloka o mau e sili ona e suesue mai ai?



Iosefa Samita —Mataio 1:5–20 (tagai foi Mataio 24:4–22; Mareko 13:5–20; Luka 17:31; 21:8–24). Ina ua mumusu e amioleaga e salamo, sa latou aumaia i o latou luga le aoaiga a le Alii. (10–15 minute)

Fesili atu i tamaiti o le vasega po o le a le taunuuga mai le faia o mea nei:

- Tuuina o lou lima i totonu o le afi?
- Pa'u ese mai se mauga po o se fale maualuga?
- 'Aina o se meaai pe a e fia ai?
- Fuiina ma le tausia o se laau toto?

Ia faailoa atu o nei mea uma e i ai lava ni latou taunuuga.

Ia valaaulia tamaiti o le vasega e suesueina le Iosefa Samita — Mataio 1:5–12.

- O a ni taunuuga ua masani ona oo i tagata e ola amioleaga?
- E faapefea ona faatatau nei fuaiupu i le auala o loo ola ai le toatele o tagata i aso nei?
- Faitau le fuaiupu e 18–20. O a taunuuga o le ola amioleaga o loo faamatalaina mai e nei fuaiupu?
- O ai o loo fetalai i ai Iesu i nei fuaiupu?
- Faitau le Alema 41:10. E faapefea ona faatatau lenei fuaiupu i le fesili o taunuuga e masani ai o le amioleaga?
- Faitau le Iosefa Samita —Mataio 1:13–17. O le a le mea na ta'u atu e Iesu i tagata amiotonu o e na ola i Ieruselema e fai ina ia aloese ai mai taunuuga ua masani ai o le amioleaga i o latou aso?



Iosefa Samita —Mataio 1:21–37 (tagai foi Mataio 24:6–35; Mareko 13:7–31; Luka 17:21– 37; 21:9–32). O se faasologa o mea na tutupu o le a muamua mai i le Afio Faalua Mai o Iesu Keriso. O le suesueina o nei mea o le a tutupu e mafai ona fesoasoani ai ia i tatou ina ia saunia mo le Afio Faalua Mai. (20–25 minute)


Aveese mai se mekasini se ata o se tagata lauiloa e toatele tamaiti o lau vasega e iloaina. 'Oti'oti le ata i ni vaega se fitu pe valu. Faapipii se vaega se tasi i luga o le laupapa ma fesili atu pe i ai se tasi e mafai ona tauina maia po o ai lea. Ia tuu atu i luga se isi vaega, faapea ma le isi seia oo lava ina ua faapipii uma i luga ia vaega pe mateina mai foi e se tasi po o ai.

Faitau le Iosefa Samita —Mataio 1:1, 4 ma tuu atu i tamaiti o le vasega e vaai po o le a le mea na fesili atu ai le au soo ia Iesu. Ta'u atu i tamaiti o le vasega faapea o le asō o le a latou vaavaai ai i se isi paso. O vaega o le paso o mea ia na valoia ae le'i oo i le Afio Faalua Mai e pei ona maua ai i le Iosefa Samita —Mataio. Ia toe faia ni kopi o le siata e avea ma pepa e tufatufaina atu faatasi ai ma le koluma o "Faailoga o le Afio Faalua Mai" e faaavanoa, ma valaaulia ia tamaiti o le vasega e faaogaina ia tusitusiga paia e faatumu ai ia faamatalaga e uiga i faailoga.

Mau	faailoga o le Afio Faalua Mai
IS—M 1:22	O Keriso pepelo ma perofeta pepelo o le a faia vavega e faaseseina ai e ua filifilia.
IS—M 1:23, 28	O le a i ai taua ma tala o taua.
IS—M 1:26	O le a afio mai Keriso e pei o le la i sasae. O le a iloa uma e le lalolagi ua la afio mai.
IS—M 1:26	O le a faapotopotoina e amiotonu.
IS—M 1:29	O le a i ai ia taua, o oge, faama'i, ma mafuie.
IS—M 1:30	O le a faateleina le amioleaga ma le inoino.
IS—M 1:31	O le a talaiina atu le talalelei i le lalolagi atoa, ona faaumatiaina lea o e amioleaga.
IS—M 1:32	O le a faataunuaina le "faatafunaina o le mea inosia" mo le taimi lona lua.
IS—M 1:33	O le a le susulu mai le la ma le masina, o le a pauu foi ia fetu.
IS—M 1:34–35	O le a faataunuaina valoaga uma.

A maea i latou, ona fesili atu lea:

- O fea o nei mea ua uma ona outou vaai i ai ua tutupu, pe na o se vaega?
- Faitau le Mataupu Faavae ma Feagaiga 97:21–22, 25. E tusa ai ma nei fuaiupu, o le a se mea e mafai ona tatou faia nei e saunia ai mo mala e oo ia ae le'i oo i le Afio Faalua Mai o Iesu Keriso?

 **Iosefa Samita —Mataio 1:38–54 (tagai foi Mataio 24:32–51; Mareko 13:28–37; Luka 12:37–48; 17:26–37; 21:29–36). Talu ai ona e leai se tasi e iloa tonu le taimi o le Afio Faalua Mai, o e amiotonu e mafai ona iloa i se auala faalauaitetele pe a latalata mai.** (10–15 minute)

Aumai se vaiinu malamalama ma aava, ma ni nai vine, ma se ipu malamalama i le vasega. Sasaa le vai inu i totonu o le ipu malamalama. Ia uu atu i luga se vine ma faamalalama atu afai e te faapa'uina le vine i totonu o le vai inu, o le a i ai ni putaputa e feosofi a'e mai le vine seia oo lava ina tele ma opeopea ai loa i luga. Ta'u atu i tamaiti o le vasega o le a tupu lava lenei mea ae e faigata tele ona iloa po o le a le umi e faia ai. Ia valaaulia i latou e mate mai po o le a le umi o le a faatali ai ona faatua opeopea lea o le vine. Faapa'u le vine i totonu ma faamaumau i lalo po o le a le umi e faagaioi ai. (Faailoga: Ia mautinoa e fou le vai inu—afai e le lava le aava, o le a le opeopea foi le vine.)

Ia valaaulia tamaiti o le vasega e faitauina le Iosefa Samita — Mataio 1:38–54, ma fesili atu:

- E faapefea ona pei le aoaoina o mea e tutupu ae le'i oo i le Afio Faalua Mai o le faapa'uina o le vine i totonu o se ipu vai inu? (tagai f. 38–39).
- O le a le mea o loo ta'u mai i nei fuaiupu i le taimi tonu o le Afio Faalua Mai? (tagai f. 40).
- O le a so outou manatu aisea e le finagalo ai le Alii ina ia tatou iloa tonu le taimi o Lona Afio Mai? (tagai f. 47–54).
- Aisea o le a taua ai le iloa ina o mea e tutupu lea e tau atu i le Afio Faalua Mai?
- O le a le poloaiga o loo tuuina mai ia i tatou i le fuaiupu e 46?
- Talu ai ona tatou te leiloa tonu lava le taimi o le Afio Faalua Mai, o le a se auala sili lava tatou te saunia ai?

Mataio 25. Na tele mea na aoaoina mai e Iesu e uiga i Lona Afio Faalua Mai e ala mai i faataoto. (15–20 minute)

Vaevae le vasega i ni vaega se tolu. Ia valaaulia vaega taitasi e suesueina ia vavega nei: o taupou e toasefulu (f. 1–13), o taleni (f. 14–30), po o mamoe ma oti (f. 31–46). Tuu atu i vaega le ta'i lima minute e suesue ai a latou faataoto ma saili ai vaega nei:

- O le a le mea o loo tupu i totonu o le faataoto?
- E faapefea ona faatatau le faataoto i le Afio Faalua Mai o Iesu Keriso ?
- E faapefea ona faatatau le faataoto ia i tatou i aso nei?
- E mafai faapefea ona tatou saunia mo le Afio Faalua Mai ona o se taunuuga o le iloa ina o lenei faataoto?

A saunia loa ia vaega, ona tuu atu lea ia i latou e lipoti mai a latou sailiga i le vasega.

 **Mataio 25:40 (Mau Tauloto). Tatou te faaali atu lo tatou alofa i le Atua e ala i le auala tatou te tausia ai Ana fanau.** (5–10 minute)


Fesili atu i tamaiti o le vasega:

- O le a le poloaiga muamua ma le lona lua? (Alofa i le Atua ma alofa i lou tuaoi; tagai Mataio 22:36–39.)
- O a nisi o auala e mafai ona tatou faaali atu ai i o tatou tuaoi tatou te alolofa ia i latou?
- O a nisi o auala e mafai ona tatou faaali atu ai i le Atua tatou te alolofa ia te Ia?

Ia valaaulia tamaiti o le vasega e faitauina le Mataio 25:40 ma vaai ai po o a mea e mafai ona tatou faia e tausia ai le poloaiga muamua ma le lona lua i le taimi e tasi. Tuu atu i tamaiti o le vasega e faitauina ma toe tagai i le Mosaea 2:17, ma talanoaina pe faapefea ona fesootai i le Mataio 25:40. Ia valaaulia i latou e tusi i luga o se fasi pepa nisi o auala e mafai ona latou faaali atu ai le alofa i o latou aiga, uo, taitai, e oo foi lava i tagata ese.

Mataio 26–28

O le Soifuaga o Iesu Keriso



Faatomuaga

O mataupu mulimuli o Mataio o loo faamatalaina ai toe aso o le soifuaga faaletino o Iesu Keriso. O iinei o loo faamaumauina ai ia ituaiga mea paia na tutupu e pei o le faatuina o le faamanatuga ma le Togiola a Keriso, maliu, ma le Toetu. Na aoaoina atu e le Perofeta o Iosefa Samita le matuai taua silisili o nei mea ina ua ia faapea mai:

“O mataupu faavae o lo tatou talitonuga o molimau a Aposetolo ma Perofeta, e faatatau ia Iesu Keriso, e faapea na maliu o Ia, sa tanumia, ma toetu mai i le aso tolu, ma afio a’e i le lagi; ae o isi mea uma e faatatau i lo tatou talitonuga ua na o ni faapoopoga i ai” (*Teachings of the Prophet Joseph Smith*, 121).

O nei mataupu o loo aofia ai ia aoaoga faavae mai tusitusiga paia e uiga i le Togiola ma le Toetu.

Suesue ma le agaga tatalo le Mataio 26–28 ma mafaufau i mataupu faavae nei ae le’i sauniaina au lesona.

O Nisi Mataupu Faavae Taua o le Talalelei e Saili Iai

- Pe a tatou taumamafa i le faamanatuga tatou te folafola atu e tauaveina i o tatou luga le suafa o Keriso, ia manatua pea o Ia ma Lana taulaga togiola, ma ia tausia pea Ana poloaiga (tagai Mataio 26:26–28; tagai foi 1 Korinito 11:23–29).
- Na matuai puapuagatia Iesu Keriso i se tiga tele ina ia saunia ai se togiola mo tagata uma (tagai Mataio 26:36–46; 27:1–2, 11–50; tagai foi Mosaea 3:7; Alema 7:11–13; MFF 19:16–19).
- Faatasi ai ma faataitaiga ma faamanuiga a le Alii, e mafai ai ona tatou tumau i tofotofoga faigata tatou te feagai (tagai Mataio 26:46–27:35; tagai foi Mosaea 23:21–24).
- O le maliu ma le Toetu o Iesu Keriso, o le a toetutu ai foi tagata uma (tagai Mataio 27:52–53; 28:1–10; tagai foi 1 Korinito 15:22; Helamana 14:15; 3 Nifae 23:11–12).
- O le toatele o molimau faapea o Iesu Keriso na toetu ma o loo soifua i le taimi nei (tagai Mataio 28:1–9, 16–20; tagai foi 3 Nifae 11:15; MFF 76:22–23).

- “O le Vaiaso Mulimuli o le Soifuaga o le Faola,” 283.

Fautuaga mo le Aoao Atu

Filifili mai manatu nei, pe faaoga ni ou lava manatu, a o e saunia au lesona mo le Mataio 26–28.



Ata Vitio o le Feagaiga Fou ata lona 9, “To This End Was I Born” (27:00), e mafai ona faaogaina e aoao atu ai le Mataio 26–28 pe avea o se vaega o se lesona e ogatasi ma le vaiaso mulimuli o le soifuaga o le Faola (tagai *Vitio Taiala o le Feagaiga Fou* mo fautuaga e aoao atu ai).

Mataio 26:1–16 (tagai foi Mareko 14:1–11; Luka 22:1–6). O le taimi lava tatou te aoaoina ai po o ai tonu lava le Faola ma le mea na la faia mo i tatou, o le a le mafai ona le mautonu o tatou lagona mo Ia. (10–15 minute)

Aumai se tipiga tipolo i le vasega. Ia uu atu i luga ma fesili atu:

- E malosi pe vaivai le tofo o le tipolo?
- Pe i ai se tasi i totonu o le vasega e fiafia i le tofo o se tipolo mata?
- O ai e le fiafia e ‘ai ia tipolo mata?
- E i ai nisi e le o mautonu?
- Pe i ai ni o outou manatu i ni tofo o ni tipolo tou te le’i tofo lava i ai? Aisea?

Ia faamalamalama atu i tamaiti o le vasega faapea e toalaiti lava i latou ua tofo i se tipolo mata e le o le mautonu. O le tofo e matuai malosi lava ma e toatele tagata e fiafia i ai pe le fiafia foi i ai. Fesili atu: E faapefea ona ese a outou tali pe ana fai o loo tatou talanoa i vine ae le o tipolo?

Ia faailoa atu i tamaiti o le vasega e faigata tele ona le mautonu i ni tagata e matuai malolosi lava ni o latou uiga. Tuu atu i tamaiti o le vasega e faitauina le Mataio 26:1–16.

- O a ni lagona o tagata o loo i le fuaiupu 1–5 e uiga ia Iesu?
- O a ni lagona o le fafine o loo i le fuaiupu e 6–13 e uiga ia te Ia?
- O a ni lagona o le alii o loo i le fuaiupu e 14–16 e uiga ia te Ia?

Iloilo le tala ia Isaako Pehuni o loo i le fautuaga e aoao atu ai mo le Mataio 12:30 (i. 38) ma fesili atu pe i ai ni tulaga le mautonu mo i tatou e faatatau i le Faola.

Mataio 26:26–29 (tagai foi Mareko 14:22–25; Luka 22:19–20). Na faatuina e le Faola le faamanatuga ina ia faamanatu mai ai ia i tatou na la ositaulagaina Lona soifua ina ia maua ai le Togiola. (10–15 minute)

Fesili atu i se tamaitiiti o le vasega i totonu o le vasega e le’i leva ona foi mai se tafaoga:

- Na e aumaia se mea e faamanatu ai le nofoaga sa e i ai? O le a lena mea?

- Aisea lava na e filifilia ai lena suvania?
- O le a se mea e te mafaufau i ai pe a e vaai i le suvania?
- E faapefea ona faamanatu ai ia te oe lau tafaoga?

Ia valaaulia tamaiti o le vasega e faitau le Mataio 26:26–29.

- Aisea na tuuina atu ai e Iesu i Ona soo le faamanatuga?
- O le a le mea na faia e Iesu i le areto ae le'i tufatufaina atu i Ona soo?
- E faapefea ona faamanatu mai ia i tatou i le tofitofiina o le areto le tino o le Faaola?
- E faapefea ona faamanatu mai e le uaina (po o le vai) ia i tatou le toto o le Faaola?

Ia faailoa atu i tamaiti o le vasega faapea afai tatou te aai ma feinu i se mea, ua avea lena ma vaega o lo tatou tino.

Fesili atu: E mafai faapefea e le taumafa i faatusa o le Togiola ona fesoasoani ia i tatou e faaogaina le Togiola i o tatou olaga?

Ia fetufaai atu le saunoaga lena mai ia Elder Spencer W. Kimball, a o avea ma se sui o le Korama a le Toasefululua:

“Soo se taimi lava tatou te taumafaina ai le areto ma le vai, e tatau foi ona i ai se toe faapaiaina, se toe faatautinoina. Pe a tatou le ola ai e tusa ma poloaiga, pe a tatou solitulafono, pe a tatou feita ma inoino ma tiga, e tatau ona tatou matuai manatunatu lava pe tatau ona tatou taumafaina le faamanatuga”
(*The Teachings of Spencer W. Kimball*, 225).

Ia uunaiina tamaiti o le vasega e mafaufau loloto i le taulaga a le Faaola ma lo latou tulaga faaleagaga pe a latou taumamafa i le faamanatuga i vaiaso taitasi.

Mataio 26:30 (tagai foi Mareko 14:26).
O musika o se vaega taua o le talalelei.
(5–10 minute)

Fesili atu i le vasega:

- O le a le matafaioi a musika e faia i o tatou olaga?
- Sii i luga lou lima pe afai na e faalogo i se ituaiga musika i le luasefulufa itula ua tuanai.
- Pe na e aoaoina ea se mea e ala lea i lou aveaina e fai ma musika? (O le alafapeta, o tusi o le Feagaiga Fou.)
- E mafai faapefea ona taua ia musika e tusa lava pe leai ni upu e iai?
- O le a se faamaoniga o loo i ai iina o musika o se vaega o le fuafuaga a le Alii?

Tuu atu i tamaiti o le vasega e faaoga a latou Taiala i Tusitusiga Paia e saili ai ia mau lea e faaalai ai le taua o musika. (E tele naua ia mau o loo i lalo o “Musika” ma le “Pese”). Tuu atu i tamaiti o le vasega e faitau le Mataio 26:30 vaai mo le mea na faia e Iesu ma Ona soo ae le'i o atu i le Faatoaga

o Ketesemane e togiola ai mo agasala a tagata uma. Afai e manaomia, ia fetufaai atu le faamatalaga mai le “Faatomuaga a le Au Peresitene Sili” o loo i totonu o le tusi pese. Mafaufau i le faaumaina o lena talanoaga i le usuina lea o se pese e fiafia i ai tamaiti o le vasega.

Mataio 26:31–35 (tagai foi Mareko 14:27–31; Luka 22:31–34; Ioane 13:36–38). Na valoia e Iesu le faafiti o Peteru.

Afai e te manao e aoaoina nei fuaiupu, ona tagai lea i fautuaga mo le aoaoina atu mo le Luka 22:31–38, 56–62.



Mataio 26:36–45 (tagai foi Mareko 14:32–42; Luka 22:40–46). Na mafatia Iesu Keriso i le puapuaga tele ina ia saunia se togiola mo tagata uma. (30–35 minute)

Tusi le upu Togiola i luga o le laupapa. Afai e maua ia faaali atu le ata o Iesu o Loo tatalo i Ketesemane (Mataio 26:36–45) (nu. 62175). Ia valaaulia tagata o le vasega e mafaufau i le uiga o le Togiola i le faitauina lea o fuaiupu nei ma taliina ia fesili e faatatau i ai:

Malamalamaaga i le Togiola	
Fesili	Mau faatasi ma le Tali
O le a se tasi taunuuga o le Pa'u a Atamu?	Mose 5:4
O le a le faaupuga faatusitusiga paia mo lea tulaga?	Alema 42:9
O le a le tulaga faaleagaga e tatau ona tatou oo i ai ina ia mafai ai ona tatou mau i le afioaga o le Atua?	Mose 6:57
E toafia nisi o i tatou e le o mama?	1 Ioane 1:8
O le a le misiona a le Ekalesia?	Morona 10:30, 32

A maea ona talanoaina nei fuaiupu, tusi i lalo o le TOGIOLA le fesili lena: *Afai e tafiese i tatou e le Atua i a tatou agasala, e mafai faapefea ona tatou toe foi atu i Lona afioaga?* Ia fetufaai atu le mea lena na oo ia Stephen E. Robinson:

“I se tasi aso . . . na sau ai lo’u afafine o Sara, ua fitu ona tausaga, ma faapea mai, ‘Tamā, e mafai ona maua sa’u uila vilivae? E na o a’u lava le tamaitiiti i lena vaiaai e leai se uila.’

“E le’i lava sa’u tupe e faatau ai sana uila, o lea sa ou faato’ato’aina ai o ia ma faapea atu i ai, ‘e mautinoa lava, Sara.’ . . .

“Sa ou faapea atu, ‘Ia e teuina uma lava au sene, ma e le pine ae lava e faatau ai se uila.’ Ma sa faapea loa ona ia alu ese atu.

“I ni nai vaiaso na lumanai ai a o o’u nofonofo i le nofoa lava lea e tasi, sa ou iloina ai le faia e Sara o se

galuega mo tina ma sa tofogiina ai o ia. Sa alu atu o ia i totonu o se tasi o potu ma sa ou faalogoina le ‘tagi, tagi.’ Sa ou fesili atu, ‘Sara, o le a lau mea lena e fai?’

“Sa sau o ia i fafo ma faapea mai . . . , ‘Na e folafola mai ia te au faapea afai ou te teuina uma lava a’u sene, e le pine ae lava se tau o se uila. Ma ua ou teuina uma lava sene taitasi ou te mauaina Tama.’

“O ia o lo’u afafine, ma ou te alofa ia te ia. Na momomo lo’u loto. Sa ia faia mea uma i lona malosi e mulimuli ai i au faatonuga. E le’i faapea ua ou pepelo ia te ia. Afai na te teuina uma ia sene o le a i’u lava ina mau ai se tau mo se uila, ae atonu e oo atu i ai i le taimi lena ua manao i se taavale. Ae le’i faafetaiaia lava ona manaoga. Talu ai ona ou te alofa ia te ia, o lea sa ou faapea atu ai, ‘Ia, se’i o ta o atu i le taulaga e vaai ai i uila.’

“Sa ma o atu i faleoloa uma i Williamsport, Pennsylvania. Mulimuli ane sa ma mauaina lava. . . . Sa oso o ia i luga o le uila; sa matuai fiafia lava. Ona ia vaai atu lea i le tau o loo tautau mai ai i le uila, ma aapa atu i ai ma liliu a’e i luga. Ina ua ia vaai i ai i le tele o le tau, sa punou ona foliga ma sa amata ona tagi. Sa ia faapea mai, ‘Oi, Tamā, e le taitai ona lava la’u tupe mo le uila.’

“O lea sa ou faapea atu ai, ‘Sara, e fia se tupe o ia te oe?’

“Sa ia tali mai, e onosefulutasi sene.’

“O le a ou ta’uina atu ia te oe le mea e fai. Ia e tuuina uma mai lava mea o loo ia te oe faapea ma se fusi ma se sogi ma a’u ona ave lea ma oe le uila.’ . . . Sa ia fusi atu ia te au ma sogi mai. Sa ia tuuina mai ia te au le onosefulutasi sene. Ona alualu lemu atu lea o la’u taavale i le fale aua ua le mafai ona toe aluese o ia mai le uila. Sa tietie atu o ia i le fale i tafatafa o le auala, ma a o o’u tietie atu i ona tafatafa na oso mai se lagona ia te a’u faapea o le faataoto lenei mo le Togiola a Keriso” (“Believing Christ: A Practical Approach to the Atonement,” i le *Brigham Young University 1989–90 Devotional and Fireside Speeches* [1990], 122–23).

Ia valaaulia tamaiti o le vasega e faitau le 2 Nifae 25:23 ma faatusatusa i lenei tala. O fea e sau ai le “alofa tunoa” i totonu o le mau faapea ma le tala? Toe foi lava i le upu *TOGIOLA* o loo i luga o le laupapa. Ia faamalalamalama atu e mafai ona “tasi” i tatou ma le Atua e ala i le Togiola. Na amataina e Iesu ona faataunuaina le Togiola i le Faatoaga i Ketesemane.

Faitau le Mataio 26:36–45 ma vaai mo tulaga na sa siomia ai ia puapuaga o Keriso i Ketesemane. Ia sue mau e fetau i nei fuaiupu i le Mataupu Faavae ma Feagaiga 19:16–19 ma le Mosaea 3:7. Tuu atu i tamaiti o le vasega e vaai i nei mau e aoaoina ai le faigata ma le tiga o le ogiola sa i ai. Faitau le Alema 7:11–13 ma fesili atu:

- O le a le isi mea na puapuagatia ai Iesu ma tauaveina i Ona luga e faaopoopo atu i a tatou agasala?

- O le a sou lagona i le iloina lea na faia e Iesu lenei mea mo oe ma a’u?

Ia fetufaai atu lau molimau i le Togiola, ma valaaulia ni tamaiti o le vasega e faia foi faapea.

**Mataio 26:46–27:35 (tagai foi Mareko 14:42–15:25; Luka 22:47–23:33; Ioane 18:1–19:18).
Faatasi ai ma faataitaiga ma faamanuiaga
a le Alii e mafai ai ona tatou tumau i tofotofoga
faigata tatou te feagai. (35–40 minute)**

Fai atu i tamaiti o le vasega po o a tofotofoga faigata sa latou tumau ai. (O nisi e mafai ona oo i le oti o se tagata o le aiga, ma’i faigata, faaletonu i mea tau tupe, leai se uo, po o ni luitau i le aiga po o le aiga.) Ia tuuina atu ni nai fesili e fetufaai mai ai ni mea na latou oo i ai.

Ia faamalalamalama atu i tamaiti o le vasega faapea itula i le va o Ketesemane ma Lona Faasatauroga, na tumau ai le Faaola i sauaga matautia. Ia valaaulia tamaiti o le vasega e feauauai i le faitauina ma le faaaloalo o fuaiupu mai le Mataio 26:46–27:33 ma toe tomanatu ai i puapuaga o le Alii. O nei fuaiupu e mamana tele ma o le a taofiofia ai le fiafia o tamaiti. A o latou faitau e uiga ia Iesu, tuu atu ia i latou e mafaufau pe o a ni Ona lagona atonu sa i ai. Tuu atu ia i latou e mafaufau i le agamalu ma le onosai lea na faaalua e le Alii i le faatagaina o tagata leaga e faatiga ia te Ia ae o loo ia te Ia le mana uma e taofia ai. Atonu e te manao i tamaiti o le vasega e tusi i luga o le laupapa ia faigata taitasi a o latou faitauina ma faalogaina i totonu o a latou tusitusiga paia. O loo auina atu faatasi le siata lenei mo au faamaumauga.

O Nisi o Tofotofoga o Iesu i le va o Ketesemane ma le Faasatauroga

Ina ua tuanai ia Ketesemane, sa matuai vaivai lava ma le lavā ia Iesu.	Mataio 26:36–46; Mosaea 3:7; MFF 19:16–19
Na faalataina o Ia e se soo ma se uo lelei o Iuta.	Mataio 26:45–50
O le toatele lava, e aofia ai le au soo, sa le amanaiaina o Ia.	Mataio 26:55–56
Na pepelo tagata e uiga ia te Ia.	Mataio 26:59–62
Na tuuaia o ia i le upuleaga ma le ta’uina o le mea moni.	Mataio 26:63–65
Na faasalaina o ia i le oti e aunoa ma se mafuaaga.	Mataio 26:66
Na tuufeanu ia te Ia, sasa, ma tauemu e sili atu ma le faatasi.	Mataio 26:67–68; 27:29–30
Na faasalaina e se taitai faalemalo ia Iesu i le oti, e ui lava sa ia iloina o Ia e leai sana sala.	Mataio 27:11–26
Na sasaina ia Iesu (o se ituaiga sasa lea e masani ona oti ai lava se tagata).	Mataio 27:26
Na aveeseina Ona lavalava.	Mataio 27:28, 35
Na oomi e fitafita se pale tuitui i Lona ao.	Mataio 27:29

Fesili atu i tamaiti o le vasega:

- E mafai faapefea e o tatou puapuaga ma faigata ona maua ai e i tatou se talisapaia tele mo le mea na puapuagatia ai le Faaola?
- E mafai faapefea ona tatou faaali atu lo tatou alofa ma le loto faafetai mo le mea na Ia faia mo i tatou? (tagai Ioane 14:15).

Ia valaaulia se tamaitiiti o le vasega e taulotoina mai le mataupu faavae e sefulutolu o le talalelei.

- O le fea vaega o le mataupu faavae o le faatuatua e faatatau i le mea lea sa tatou faatoa suesueina e uiga i le Faaola? (“Ua uma ona matou onosai i mea e tele, ma matou te faamoemoe o le a mafai ona matou onosai i mea uma.”)
- O a ituaiga o faigata e ono oo ia te oe e ao ona e tumau ai i le lumanai?
- E mafai faapefea e le faataitaiga a le Faaola ona fesoasoani ia i tatou i o tatou faigata?



Mataio 27:35–54 (tagai foi Mareko 15:24–39; Luka 23:34–47; Ioane 19:23–30). Na mafatia Iesu Keriso i se oti matautia ma le tiga. (20–25 minute)

Usu pe faitau upu o se tasi o viiga nei: “Sa Faasatauro le Alii” (nu. 96), “E! Ua Malii le Faaola” (nu. 99), “E Iai se Mauga Lanu Vao” (nu. 108). Fesili atu:

- O le a le viiga e te fialia lava i ai e uiga i le Togiola?
- Aisea e te fialia ai i ai?

Fai atu i tamaiti o le vasega e auauai i le faitauina leotele o fuaiupu mai le tala a Mataio i le Faasatauroga (Mataio 27:35–54). Ia valaaulia i latou e tuuina mai ni fesili ma aumai ni faamatalaga ao latou faitauina.

Afai e moomia, ona usu lea o se isi viiga o le Togiola. Ona valaaulia lea o tamaiti o le vasega e tusi i luga o se fasi pepa se tusi i le Faaola, e faamatala atu i ai o latou lagona e uiga i Lona puapuaga mo i tatou ma le auala e mafai ai ona latou faaali atu lo latou loto faafetai.



Mataio 27:52–53; 28:1–10 (tagai foi Mareko 16:1–14; Luka 24:1–12; Ioane 20:1–18). O le malii ma le toetu o Iesu Keriso, o le a toetutu uma ai tagata. (25–30 minute)

Fesili atu i tamaiti o le vasega:

- O le a sou lagona pe a e vaaia se tagata e i ai se le atoatoa, mo se faataitaiga o se tasi e faaletonu le mafaufau pe leai se lima po o se vae pe tauaso foi pe tutuli?

- O le a se taua o se fofo o le a i ai mo nei mafatiaga?
- Pe i ai se tasi o outou ua malii se uo pele po o se tagata o le aiga?
- Aisea e faigata ai le malii?

Ta’u atu i tamaiti o le vasega ua e iloa se “fofo” e le gata mo nei mafatiaga ae faapea foi mo le oti lava ia. Ia valaaulia tamaiti o le vasega e faitau le Alema 11:43–44 ma saili ai le vaifofo. Tuu atu ia i latou e faitauina le Mataio 28:1–10 ma le 27:52–53 ma tali ia fesili nei. (Afai e manaomia, ia tuuina atu i tamaiti o le vasega e aveva ma se pepa e tufaina atu pe tusi foi i luga o le laupapa.)

- (Mataio 28:1) O le a le aso lea o le vaiaso?
- (Mataio 28:1) O ai na o atu i le tuugamau?
- (Mataio 28:2) O ai na faaali mai?
- (Mataio 28:2) Na faapefea ona fuliese le maa mai le tuugamau?
- (Mataio 28:4) O le a le mea na tupu i fitafita?
- (Mataio 28:5–7) O le a le tala a le agelu na fai?
- (Mataio 28:8) O fea na o i ai ia fafine?
- (Mataio 28:9–10) O le a le mea na tupu ia i latou i le ala?
- (Mataio 27:52–53) O le a le mea na tupu i nisi o tagata na feoti i Ierusalem ina ua mavae le toetu o Keriso?

Faaaoga le lesona faatino leni e fesoasoani ai i tamaiti o le vasega ia malamalama lelei i le Toetu. Ia sii i luga se tasi o ou lima. Faagaoioi ou tamailima ma uumau lau moto. Ta’u atu i tamaiti o le vasega faapea o lou lima e faatusa i ai o tatou agaga. Tuu se totinilima i lou lima ma fesili atu i tamaiti o le vasega:

- E mafai faapefea e le totinilima ona faatusa i o tatou tino faaletino? (E maua e o tatou agaga pe “faaofuina” foi i se tino pe a tatou fananau mai.)
- E mafai faapefea ona tatou faatusaina le oti? (Aveese le totinilima.)
- E mafai faapefea ona tatou faatusaina le Toetu? (Toe tuu le lima i totonu o le totinilima.)
- O le a le eseese o le iloaina o le a e toetu ma a mavae lou toetu e le mafai ona e toe ma’i pe oti?
- O le a le eseese o le iloaina e mafai ona e toe ola faatasi ma e pele ia te oe o e ua maliiu?
- O le a sou manatu o ai o le a sili atu ona fialia i le Toetutu? Aisea?

O LE TALALELEI E TUSA MA LE FAAMATALAGA A MAREKO

Tusitala: E tele ma anoanoai ia uluai tusitusiga e faailoa mai ai o Mareko le tusitala o lenei Talalelei, e ui lava e le o faailoaina mai ai i totonu o le tusi. Na faaulutalaina e le Perofeta o Iosefa Samita le tusi, “O le Molimau a Mareko”. Mo nisi faamatalaga auiliili ia tagai i le Mareko i totonu o le Taiala i Tusitusiga Paia.

O e o Loo Tusi Atu Iai: O le Talalelei a Mareko o loo tuuina mai ai ni faamalamalamaga o tu ma aganuu ma nofoaga e ono faatosina ai se tagata faitau o nuu ese (e le o ni tagata Iutaia) (tagai i le Taiala i Tusitusiga Paia, “Talalelei,”).

Talaaga Faasolopito: O Mareko e masani ona manatunatu i ai o le Talalelei muamua lea na tusia ma atonu na maua mai ai se faavae mo le tele o le galuega a Mataio ma Luka. O le aso tonu na tusia ai e le o iloaina ae “o tu ma aganuu faaKerisiano ma mea o loo atagia ai i totonu o tusitusiga a Mareko o loo faailoa mai ai le pogai o lana Talalelei i totonu o Roma ina ua mavae le maliu o Peteru (T.A. 64) ma luma mai o le faatafunaina mulimuli o le Malumalu o Ierusalem (T.A. 70)” (S. Kent Brown, “The Testimony of Mark,” in *Studies in Scripture: Volume Five, the Gospels*, ed. Kent P. Jackson and Robert L. Millet [1986], 67).


Uiga e le Masani Ai: O le Talalelei a Mareko e pito i puupuu ai lava i Talalelei e fa. O se tala e televave lea o loo faamamafaina ai mea na faia e le Faola nai lo mea na Ia fetalai i ai. Na patino lava le faatauaina e Mareko o vavega a le Faola. E silia ma le 90 pasene mea o loo i totonu o Mareko o loo maua foi i isi Talalelei. O mea na tutupu ma aoaga o loo maua ia Mareko ae le o maua i isi Talalelei e aofia ai le faataoto i le saito na totoina faalilolilo (tagai Mareko 4:26–29), o le manatu faapea o Iesu o se kamuta (tagai Mareko 6:3), o le faamaloloina o se tauaso i Petesaita (tagai Mareko 8:22–26), ma le aoaga faavae faapea e mulimuli atu faailoga ia i latou o e talitonu (tagai Mareko 16:17–18).

Autu: O le tusi a Mareko o loo molimau mai faapea o Iesu Keriso o le alo o le Atua ma o se tagata e ofoofogia lona mana. Na faamatalaina e Mareko lenei manatu i le faamamafaina lea o mea na faia e le Faola.

Mareko 1–3

O le Soifuaga o Iesu Keriso

O mea na tutupu i nei mataupu e foliga mai na tutupu lava i lenei vaaitaimi



Faatomuaga

E le pei o Mataio ma Luka, o le Mareko 1–3 e le o aofia ai se faamatalaga e uiga i le fanau mai o Iesu po o Lona talavou. O le tala a Mareko e amataina i le galuega a Iesu Keriso, e aofia ai Lona papatisoga ma le valaauina o Ona soo ma Aposetolo. Ia maitauina le vave ona faailoa mai e Mareko o vavega a Iesu.

Suesue ma le agaga tatalo le Mareko 1–3 ma mafaufau i mataupu faavae nei ae le'i saunia au lesona.

O Nisi Mataupu Faavae Tava o le Talalelei e Saili Iai

- O agaga sa i le mua'i olaga o e na mulimuli atu ia Satani na tulia i le lalolagi ma taumafai e maua ni tino i tagata faaletino (tagai Mareko 1:23–26, 34; 3:11; tagai foi Mareko 5:1–13; MFF 29:36–37).
- E ia Iesu Keriso le mana e faamalolo ai i tatou i le faaletino ma faamamaina ai i tatou mai le agasala (tagai Mareko 1:23–45; 2:1–12).
- E tatau ona tatou tatalo soo e le aunoa ina ia fesootai ma le Atua (tagai Mareko 1:35; tagai foi Mareko 6:46).
- O le Sapati o se aso e malolo ma viia ai le Atua (tagai Mareko 2:23–28; 3:1–6; FIS, Mareko 2:27).

Fautuaga mo le Aoao Atu

- Filifili mai manatu nei, pe faaaoaga ni ou lava manatu, a o e saunia lesona mo le Mareko 1–3.

Mareko 1:1–23. Faailoaina o le Talalelei a Mareko. (15–20 minute)

Ina ia fesoasoani i au tamaiti o le vasega mo lo latou suesueina o Mareko, ia fetufaai atu ia i latou nisi o faamatalaga mai le Faatomuaga i le tusi o Mareko lea e te lagonaina o le a aoga tele. Mo se faataitaiga, e mafai ona e faaaliina atu le puupuu o le Talalelei a Mareko e ala lea i le tusia o mea nei na tutupu i luga o le laupapa: *O le fanau mai o Iesu, o Lona papatisoga e Ioane le Papatiso, ma le O le valaauina o Simona Peteru ma Aneterea.* Tuu atu i au tamaiti o le vasega e sailia na mea na tutupu i uluai mataupu e fa o Mataio. Ona tuu atu lea ia i latou e amata ona faitauina le Mareko 1 ma faatusatusa ai pe fia ia fuaiupu na faamatalaina ai e Mareko ia mea foi lava nei e tasi na tutupu. (*Faaaliga:* E le o aofia ai ia Mareko se tala i le fanau mai o Iesu.)

Ina ia faaali atu le faamamafaina e Mareko o vavega a Iesu, ia ta'u atu i tamaiti o le vasega faapea e le'i ta'uina mai e Mataio le faia e Iesu o se vavega seia faatoa oo mai lava i le Mataio 8:2–3. Fai atu ia i latou e faaauau pea le faitauina o le Mareko 1 seia oo ina latou mauaina le vavega muamua lea e ta'ua e Mareko (tagai Mareko 1:23–25). Ia faamanino atu i tamaiti o le vasega faapea o loo faamamafaina e Mareko ia mea na faia ma vavega a le Alii, ae o Mataio o loo tuu atu lana faamamafa

i Ana aoaoga. Ia faamalamalama atu faapea e ui lava i le tele o mea o loo faaogaina i totonu o Mareko e faapea foi i totonu o isi Talalelei, ae o loo tuuina mai e Mareko se vaaiiga manino i lana molimau ia Iesu Keriso.

Mareko 1:23–2:12 (tagai foi Mataio 8:2–17; 9:2–8; Luka 4:33–5:26). E ia Iesu Keriso le mana e faamaloloina ai i tatou i le faaletino ma le faaleagaga. (35–45 minute)

A o ulufale mai tamaiti o le vasega i le vasega, ia “faaleatoatoa” i latou i se le atoatoa faaletino. Mo se faataitaiga, fusi se ie e pupuni ai mata o tamaiti o le vasega, faatautau se tasi o o latou lima i se asoa, fusi faatasi o latou vae ina ia le mafai ona savavali, pe faapipii o latou gutu ina ia le mafai ai ona tautatala. (Ia nofouta mo i latou e i ai tonu lava ni le atoatoa. Ia fesili atu muamua lava i tamaiti o lau vasega e i ai ni le atoatoa ae le’i faia le vasega po o a mea e faanoono ma faalumaina ai i latou. Ae peitai ia maitauina o a latou tali i fesili i lenei lesona e matuai taua lava.)

A maea ona tuuina atu i tamaiti o le vasega e aoaoina ni o latou “le atoatoa” mo le lima i le sefulu minute, ia fesili atu:

- O le a se lagona e oo mai pe a “le atoatoa” i le faaletino?
- O a ni faigata na e oo i ai ona o se taunuuga o sou “le atoatoa”?
- O le a se lagona e oo ia te oe pe afai e oo ia te oe lenei le atoatoa i lou olaga atoa?

Tuu atu i tamaiti o le vasega e tusi le “Mareko 1:23–2:12” i le pito i luga o se pepa. Ta’u atu ia i latou o nei fuaiupu o loo aofia ai ia tala i tagata o e sa le atoatoa i le tele o auala eseese. Tuu atu ia i latou e faitauina ia fuaiupu ma tusi tali i fesili nei e uiga i tagata mafatia sa latou faitau i ai:

- O le a le le atoatoa na mafatia ai lenei tagata?
- O lea le vavega na faia e Iesu e fesoasoani ai i le tagata?
- Afai sa i ai se mea sa fesoasoani atu ai le tagata i le vavega, o le a lena mea?

Fesili atu:

- Pe o tutupu ea ni faamalologa i aso nei? (Fesoasoani i tamaiti o le vasega ia malamalama e mafai e Keriso ona faamaloloina ia le atoatoa faaletino i aso nei; tagai Mamona 9:15.)
- O a faamanuiaga e ono silisili atu nai lo le faamaloloina o se le atoatoa faaletino?

Tusi le saunoaga lenei a Peresitene Harold B. Lee i luga o le laupapa:

“O vavega silisili ua ou vaai i ai i aso nei e le o le faamaloloina o tino mama’i, ae o vavega silisili ua ou vaai i ai o le faamaloloina o agaga mama’i” (i le Conference Report, Ape. 1973, 178; po o le *Liahona*, Mati 197, 123).

Fesili atu i tamaiti o le vasega po o le a so latou manatu o le a le uiga o le saunoaga a Peresitene Lee.

- Aisea e sili atu ai le faamaloloina o agaga mama’i nai lo le faamaloloina o tino mama’i?
- E te talitonu e i ai i le Faaola le mana e faamaloloina ai i tatou uma mai ni le atoatoa faaleagaga?

Toe faitau le Mareko 2:5–12 ma tuu atu i tamaiti o le vasega e sailia le faamaoniga o le mana o Iesu e faamaloloina ai tagata mai le agasala. Fesoasoani i tamaiti o le vasega e faatusatusa ia le atoatoa faaleagaga i le atoatoa faaletino i le tuuina atu o fesili nei:

- O le a le uiga o le tauaso, tutuli, po o le pipili faaleagaga?
- E faapefea ona “faaleatoatoaina” i tatou e vaivaiga faaleagaga po o agasala?
- Afai o loo i ai sou le atoatoa faaletino ma le faaleagaga, o le fea e sili ona e manao ina ia faamaloloina? Aisea?

Faitau le Alema 7:11–13 ma fesoasoani atu i tamaiti o le vasega ina ia iloa ma lagonaina o le Faaola e i ai le mana e faamaloloina ai o tatou le atoatoa faaletino ma faaleagaga.

Mareko 1:35 (tagai foi Luka 4:42; 6:12). E tatau ona tatou tatalo soo e le aunoa ina ia fesooteai ma le Atua. (15–20 minute)

Fai atu i se tasi vasega e usu se viiga e uiga i le tatalo, e pei o le “Le Itula o Talosaga” (nu. 77) po o le “Pe na Faia Sau Tatalo?” (nu. 75). Fai atu i tamaiti o le vasega e faamalamalama atu le savali o le viiga. Ia valaaulia tamaiti o le vasega e mafafau ia i latou lava pe na latou tatalo i lenei taeao. Fesili atu:

- Aisea e filifili ai tagata e tatalo?
- O a nisi o mafuaaga e mumusu ai tagata e tatalo?

Ia valaaulia se tamaitiiti o le vasega se toatasi pe toalua o e e mananao e fetufaai atu a la molimau e uiga i le tatalo.

Ia valaaulia tamaiti o le vasega e faitau le Mareko 1:35 ma mafafau i fesili nei:

- E faapefea ona faatatau le savali o le viiga na tatou usuina i lenei fuaiupu?
- O le a sou manatu aisea na tatalo ai Iesu?
- O a faamanuiaga e mafai ona oo mai i le alapo i luga i le taeao e tatalo?
- E faapefea ona fesoasoani ia te oe pe a e tatalo i se nofoaga tuufua?
- O a isi tagata o loo i tusitusiga paia e te iloaina na sailia se nofoaga filemu ina ia mafai ona latou tatalo ai ma ia tuua na o i latou ma le Atua?

Faitau ia saunoaga nei pe tufaina atu foi.

Na tusia e Peresitene Spencer W. Kimball, a o aveva ma Peresitene o le Korama a le Toasefululua:

“O le tuufuaina e tamaoiaiga ma faamanuiaina. Pe a tatou tatalo na o i tatou ma le Atua, tatou te tuuese uma ia sese ma pepelo, o le le faamaoni ma le le migao. Na maua e le Faaola ana mauga ma tuumuli atu loa i ai e tatalo. O Paulo, le aposetolo tautaua, na foliga mai sa le mafai ona ia mauaina le agaga o lona valaauga fou seia oo ina ua ia mauaina le faamamaina na o ia i Arapi. Na tuua na o ia o se tagata o le lalolagi, ae foi mai ua faamamaina, sauniaina ma toe faamalosia. . . . Na maua e Enosa lona nofoaga na tuua ai na o ia i le togavao. Na alu atu ia Morianekuma i le tumutumu o le mauga e ole atu i le Alii ina pa’i atu i maa ina ia faamalalamaina ai le ala o ona tagata. Ma sa aoaoina ia Nifae ina ia iloa ona fau se vaa e ala i fesootaiga ma lona Alii i luga o se mauga e mamao ese mai taliga o tagata. Na maua e Iosefa Samita lona nofoaga tuufua na o ia i le togavao ma sa na o manufelegelei ma laau ma le Atua na faalogo atu i lana tatalo. E mafai foi e i tatou, i le tuua ai na o i tatou ona tatou tatalo atu ma le naunautai ma le faamaoni” (*Faith Precedes the Miracle* [1972], 209).

Na saunoa mai ia Bishop H. Burke Peterson, o le sa avea ma se sui o le Au Epikopo Pulefaamalumu:

“A o e lagonaina le manaomia ona e faalagolago atu i le Alii pe faaleleia le tulaga o au asiasiga atu ia te ia—i le tatalo, afai e mafai faamolemole—ou te fautua atu se faagasologa e mulimuli i ai: alu i se nofoaga e mafai ona tuua ai na o oe, alu i se mea e mafai ona e manatunatu ai, alu i se mea e mafai ona e tootuli ai, alu i se mea e mafai ona e tautala leotele atu ai ia te ia. O le potu moe, o le fale taele, po o le pusa tu, ua lava lena. Ia, pu’e mai nei loa sona ata i ou mata faalema-faufau. Mafaufau i le tagata o loo e tautala atu i ai, faatonutonu ou manatu—aua le fefoifoa’i, ia faailoa atu ia o lou Tama ma lau uo. Ia ta’u atu nei loa ia te ia mea o loo e lagonaina e ta’u atu ia te ia—e le o ni faaupuga e masani ai e tau leai se uiga, ae ia maua se fesootaiga faamaoni ma le faamomoloto ma ia. Faalagolago atu ia te ia, ia ole atu ia te ia mo le faamagaloga, ole atu ia te ia, ia fiafia ia te ia, ia faailoa atu lou alofa ia te ia, ma faalogo atu mo ana tali. O le faalogo o se vaega taua o le tatalo. O tali mai le Alii e oo mai filemu—e matuai filemu lava. O le mea moni lava, e toaitiiti lava nisi e lagonaina ana tali i o latou taliga. E tatau ona tatou matuai faalogo ma le faaeteete a leai o le a tatou le iloina lava. O le tele o tali mai le Alii e lagonaina i o tatou loto o ni faamatalaga faamafanafana, pe mafai foi ona oo mai o ni manatunatuga i o tatou mafaufau. E oo mai ia i latou o e saunia ma i latou o e onosai” (i le Conference Report, Oke. 1973, 13; po o le *Ensign*, Ian. 1974, 19).

Ia uunaia tamaiti o le vasega e faaleleia le tulaga o a latou tatalo e ala lea i le sailia o se taimi ma se nofoaga i aso taitasi e mafai ona tuua ai na o i latou ma fesootai ai ma le Alii e ala i le tatalo.



Mareko 2:23–3:6 (tagai foi Mataio 12:1–14; Luka 6:1–11). O le Sapati o se aso e malolo ai mai a tatou galuega faalelalolagi ae faalatalata atu ai i le Atua. (35–45 minute)

Ae le’i amataina le vasega, ia lisi i luga o le laupapa nisi o gaoioiga ua lauiloa a le autalavou lea e ogatasi ma faatulagaga a le Ekalesia, e pei o le soka, aau, faitau tusi, pasiketipolo, siva, suesue, usuusu pese, faatauga, aai, ma le momoe. Ia iloilo ina faatasi ma le vasega le lisi ma fesili atu pe faamaonia e le Alii ia nei gaoioiga uma taitasi.

Tusi le ulutala *Taiala o le Sapati* i se isi vaega o le laupapa. Tuu atu i tamaiti o le vasega e faitau le Mareko 2:23–3:5 e vaai ai po o le a le mea na faia e le au soo na mafua ai ona tuuaia i latou e le au Faresaio i le solia o le Sapati. Fesili atu: O le a le mea na aoa atu e le Faaola i nei fuaiupu i le faamoemoega o le Sapati? (Ia lisi tali i luga o le laupapa i lalo o *Taiala o le Sapati*.)

Ta’u atu i tamaiti o le vasega faapea o tu ma aganuu a lutaia na faaopoopo atu ia i le tele o mea e faasaina i le tausiga o le aso Sapati ia faapaiaina nai lo o se aso e malolo ai ma ua avea ai ma se avega mamafa. Na aoa atu e Iesu, “ua faia le sapati mo tagata, a ua le faia tagata mo le sapati” (Mareko 2:27). I nisi upu, o le Alii na faatuina le Sapati mo lo tatou faamanuiaina.

Ia faamamafa atu i tamaiti o le vasega faapea o le faaupuga “ua faia le sapati mo tagata” o lona uiga e le faapea e mafai ona tatou faia soo se mea tatou te filifili e fai i le Sapati. O lona uiga o le le amanaiaina o mea ua faasaina e isi e ese mai poloaiga a le Alii o loo tuuina mai i tusitusiga paia (tagai Esoto 20:8–11; MFF 59:9–14) ma auala mai i Ana perofeta ma aposetolo o ona po nei. Faitau le Faaliliuga a Iosefa Samita o le Mareko 2:26–27. Ta’u atu i tamaiti o le vasega o nei fuaiupu o loo tuu mai ai isi faamoemoega faaopoopo e lua o le Sapati: ia malolo ma viia ai le Atua. (Ia faaopoopo atu vaega nei i le koluma o le “Taiala o le Sapati” i luga o le laupapa.) Ia faamalalama atu faapea talu ai ona o Iesu na faia le aso Sapati, o Ia foi e pule ai.

Ia valaaulia se tamaitiiti o le vasega e faitau atu i le vasega le vaega o “Amioga i le Aso Sa” i totonu o le *Mo le Malosi o le Autalavou* ([tamatusi, 1990], i. 16–17).

- O a isi taiala o loo tuuina mai i totonu o lenei tamaitusi mole Sapati?
- E mafai faapefea e nei taiala ona fesoasoani ia i tatou e mauaina le malosi faaleagaga, malolo mai a tatou galuega, ma viia le Atua?

Faaopoopo atu nisi o taiala mai le *Mo le Malosi o le Autalavou* i le koluma o “Taiala o le Sapati” i luga o le laupapa. Faasino tamaiti i le lisi o gaoioiga. Ta’u atu ia i latou e ui lava o nei gaoioiga uma e talafeagai mo aso e ono, ae o nisi gaoioiga e le talafeagai mo le Sapati.

- O le fea o nei gaoioiga e talafeagai mo le Sapati?

- O a nisi mea e mafai ona tatou faia i le Sapati e fesoasoani e viia ai le Atua?

Ia talanoaina ma au tamaiti o le vasega nisi o faamanuiaga i le tausia o le paia o le Sapati e ala lea i le faitauina atu i ai o soo se saunoaga lenei e te lagonaina e fesoasoani tele.

Na saunoa mai Peresitene Gordon B. Hinckley:

“A o tatou agai atu i luma i se lumanai matagofie, o loo i ai ni poloaiga atonu ua manatu nisi e maualalo ifo, ae ua maoae foi lo latou taua.

“Ou te ta’ua le aso Sapati. O le Sapati o le Alii ua avea ma aso taalo o tagata. O se aso ta polo ma matamata lakapi i le televise, pe faatau ai foi ma faatau atu ni mea i o tatou faleoloa ma maketi. Pe o tatou agai atu ea i le [alavai autu] e pei ona maitauina e nisi o tagata o vaavaai mai? O lea tulaga ou te fefe tele ai ona o loo tatou agai atu i ai. . . .

“O lo tatou malosi mo le lumanai, o la tatou faaiuga ia faatupuina le Ekalesia i le lalolagi atoa, o le a vaivai pe afai tatou te soli le finagalo o le Alii i lenei mataupu taua. Sa ia fetalai manino mai i aso anamua ma toe fetalai mai foi i faaaliga o ona po nei. E le mafai ona tatou le manatu i ai e aunoa ma se faasalaga lena sa fetalai mai ai o Ia” (i le Conference Report, Oke. 1997, 93; po o le *Liahona*, Ian. 1998, 69).

Na saunoa mai ia Elder James E. Faust, a o avea ma se sui o le Korama a le Toasefululua:

“I nei aso i le faateleina o le faigofie ona maua o oloa ma le mafaufau pea o tagata i mea faaletino, o loo i ai se puipuiga mautinoa mo i tatou ma a tatou fanau mai mala o o tatou aso. O le ki i lena puipuiga mautinoa, e ofo ai lava, e mafai lea ona maua i le tausia o le Sapati” (i le Conference Report, Oke. 1991, 47; po o le *Liahona*, Ian. 1992, 40).


Na saunoa mai ia Elder John H. Groberg, o se sui o le Au Fitugafulu:

“E i ai le mana i le tausia o le aso Sapati ia paia—o le mana e fesoasoani ai isi e faapea foi ia i tatou lava. Afai tatou te mauaina ia faamanuiaga a le Atua ma le puipuiga o i tatou taitoatasi, o aiga, ma malo, e tatau ona tatou tausia Lona aso Sapati ia paia” (i le Conference Report, Oke. 1984, 101; po o le *Liahona*, Ian. 1985, 81).

Ia faaiuina i le tuuina atu o le molimau i faamanuiaga ua oo mai ia te oe i le mulimuli ai i lenei poloaiga.

Mareko 4–6

O le Soifuaga o Iesu Keriso



Faatomuaga

I le taimi o Lana galuega i Kalilaia na faataunuaina ai e Iesu le tele o Ana vavega ofoofogia. Na faaalai ai i nei vavega Lona mana i elemene o le lalolagi, o malosiaga o le tiapolo mo ma'i o le tino ma le agaga, e oo lava i le oti. A o e suesueina le Mareko 4–6, ia vaai po o le a le mea na aoaoina atu e le Faaola e uiga i le mana o le faatuatua ma le alofa. Vaai foi po o a mea o loo aoaoina mai e nei mataupu e uiga i le taulimaina o le faanoanoa ma le teenaina.


Ia mafaufau i mataupu faavae nei ma suesue ma le agaga tatalo le Mareko 4–6 ae le'i sauniaina au lesona.

O Nisi Mataupu Faavae Taa o le Talalelei e Saili Iai

- O i latou o e e ola e tusa ai ma le malamalama o le talalelei na latou mauaina o le a tuuina atu i ai mea e tele (tagai Mareko 4:24–25; tagai foi Luka 8:18).
- Na foafoaina e Iesu Keriso le lalolagi, ma o elemene uma o loo i ai e usiusitai ia te Ia (tagai Mareko 4:37–41; 6:35–44, 47–52).
- E tele le alofa o Iesu Keriso mo i tatou uma taitoatasi, ma o Lona alofa tunoa ua lava lea mo o tatou vaivaiga (tagai Mareko 5:19; 6:34, 41–44; tagai foi Mareko 1:40–41).
- O i latou o e faatuatua ia Iesu Keriso e mafai ona faamalo-loina . Afai e leai so tatou faatuatua, ua tatou faatapulaaina lo tatou malosi e iloa ai ia vavega i o tatou olaga (tagai Mareko 5:34; 6:1– 6; tagai foi Eteru 12:12; Moronae 7:37).

Fautuaga mo le Aoao Atu

Filifili mai manatu nei, pe faaoga ni ou lava manatu, a o e saunia ia lesona mo le Mareko 4–6.

 O le *Ata Vitio o le Feagaiga Fou* ata lona 5, “O Lou Faatuatua ua e Ola Ai” (16:17), e mafai ona faaaogaina i le aoaoina atu o le Mareko 5 pe afai e te le'i faaaogaina i le

Mataio 9 (tagai i le *Vitio Taiala o le Feagaiga Fou* mo fautuaga e aoao atu ai).

Mareko 4:1–25 (tagai foi Mataio 13:1–23; Luka 8:4–18). O i latou o e e ola e tusa ai ma le malamalama o le talalelei na latou mauaina o le a tuuina atu i ai mea e tele. (20–25 minute)

Ia valaaulia se tamaitiiti o le vasega e faia ni nai faamalositino e fao i lalo ma tetee i luga le tino i lima. Fesili atu:

- O le a se mea e faia e lenei faamalositino mo ou maso?
- E mafai faapefea e le auala o le tuputupu ae o le malamalama i le talalelei ona faatusatusa i le auala e tutupu ai ia maso?

Faitau faatasi ma au tamaiti o le vasega le faataoto i le tagata lulu saito (Mareko 4:2–9). Fesili atu: O le a le mea o loo faatusa i ai le fatu i lenei faataoto? (“O le upu”; tagai f. 15.) Tuu atu i tamaiti o le vasega e faitau le Mareko 4:15–20 ma vaai ai mo tali i vaega nei:

- O ai ae po o le a foi le mea o loo faatusa i ai ia manufelegele? (Satani; tagai f. 4, 15.)
- Le mea papa? (tagai f. 16–17).
- Le vao tuitui? (tagai f. 18–19).
- Le eleele lelei? (tagai f. 20).
- O le fua? (E mafai e lenei fua ona faatusa i ai lo tatou malamalama i le talalelei ma faamanuiaga ma galuega lelei e maua mai le faaogaina o lenei malamalama; tagai f. 20.)

Fesili atu: O le a le mea e tupu i le malamalama o tagata i le talalelei ma le malamalama pe a mavae le papatisoga pe afai o lo latou eleele e lelei ma tumau ai pea ona malosi i totonu o le Ekalesia? Faitau faatasi ma au tamaiti o le vasega le Mareko 4:24–25 ma fesili atu ia i latou po o le a le mea o loo aoao mai e nei fuaiupu e uiga ia i latou o e faatagaina le eleele o o latou loto ina ia matua’i malo pe tuituia. Faitau le Alema 12:9–11 ma fesili atu:

- O le a le mea o loo aoao mai e nei fuaiupu e uiga i le mauaina o le malamalama ma le atamai?
- O le a le mea o loo latou aoao mai e uiga i le le maua o le malamalama ma le atamai?
- O le a le mea e tupu i le malamalama o tagata i le talalelei pe a latou le toaaga? Aisea?
- E faapefea ona faapei lenei leiloa o le malamalama o ituaiga eleele eseese o loo i le faataoto?

Faitau faatasi ma au tamaiti o le vasega le Mataupu Faavae ma Feagaiga 76:5–10 ma fesili atu:

- O le a le mea o loo tauina mai e nei fuaiupu ia i tatou e uiga i le mea e mafai ona tatou aoaina pe a tatou usiusitai?
- O le a se mea o loo aoaina mai e nei fuaiupu e uiga i le auala e mafai ai ona tatou aoaina nei mea silisili?
- E mafai ona e tuuina mai ni faaitaiga o lenei mataupu faavae mai lou lava olaga po o olaga o isi?

Ia valaaulia tamaiti o le vasega o e e mananao e fetuفاai atu ni mea na oo i ai ina ia faia loa. (Ia lapataiina i latou ina ia ‘aua ne’i tuuina atu ni igoa sao.)

Faitau le faamatalaga lenei mai ia Elder Bruce R. McConkie:

“O le malamalama o le talalelei e le oo mai i tagata i aoauli teatea, ae . . . e tuputupu malie ae i o latou loto, o lea fuaiupu ma lea fuaiupu, o le mataupu ma lea mataupu, o sina mea itiiti iinei ma sina mea itiiti iina [tagai MFF 50:24]. O le mea e oo i ai, o e faamaoni o le a faaauau pea ona alualu i luma i le malamalama ma le upumoni, o le a faaalua atu ia i latou mea uma ma o le a iloaina mea uma. (MFF 76:5–10; 93:26–28; 101:32–34; 121:26–29.) . . .

“E leai se faataoto, leai se aoaoga, leai se mea lilo, leai se mea e natia, e taofia mai le malamalama o e faamaoni; o le a faaalua atu i ai mea uma, ma o e amiotonu o le a iloaina.” (Doctrinal New Testament Commentary, 1:291).

Ia faaiu i le luitauina lea o tamaiti o le vasega ina ia sailia le malamalama o le talalelei i o latou olaga atoa.

Mareko 4:35–41 (tagai foi Mataio 8:18–27; Luka 8:22–25). E mafai e Iesu ona faatofilemuina ia afa i o tatou olaga e pei ona la faatofilemuina le matagi i le Sami o Kalilaia. (10–15 minute)



Faali atu i tamaiti o le vasega le ata o le Faatofilemuina o le Matagi (Mataio 8:23–27) (tagai i le faaopoopoga, i. 298). Fai atu i tamaiti e iloiloaina ia foliga o tagata uma o loo i le ata. Faitau faatasi ma le vasega le Mareko 4:35–41 ma fesili atu:

- O le a le fuaiupu lea na matuai faaali mai lava e le tusiata?
- Afai e te manao i le tusiata e toe vali le ata, o le a le mea e te fai atu ia te ia e sui? Aisea?

Fai atu i tamaiti o le vasega e mafauafau i taimi o “matagi” pe a latou oo i ni faigata. Ia faamalamalama atu e foliga mai sa tofā ia Iesu ae tulai mai ia faigata. Ae ui i lea, e pei lava ona i ai i le tala, Na te le tuua lava na o i tatou. Tuu atu i se tamaitiiti o le vasega e faitauina le saunoaga lenei mai ia Elder Bruce R. McConkie:

“O le mea ua iloga ai [lenei vavega] o loo aoao mai ai faapea o le Alii o Iesu e latalata pea i ana uo ma o le a ia laveaiina i latou i tulaga faigata, e tusa lava pe foliga mai e ono afaina lo latou saogalemu i elemene.

“E le gata foi i lea, o le sami—o se sami e maitaita, ma sousou—o se faailoga o se lalolagi agasala ma le amioleaga. . . . Pe a faafilemuina e Keriso ia vasa o le olaga, o le a faapea ona ulufia ia loto o tagata i le filemu.

“E le gata i lea, e i ai nisi o i latou o e ua faatusaina le Ekalesia lava ia i se vaa, o loo uliina ma faatautaia e aposetolo ma perofeta i vasa o le lalolagi, lea e fesouaina ma felafaiina, ma taia ai le tino o le vaa, ae le mafai ona faatoilaloina ai. O le vaa faalelagi e le mafai lava ona goto; o ona pasese faamaoni e le mafai ona malelemo i le loloto maitaita, aua o Keriso o loo faatautaia lona lava vaa. Atonu e foliga mai o loo tofā o Ia i le taumuli i se aluga i lalo o lona ao, ae o loo i ai o ia iina. Ma o taimi o faigata e fafaguina ai o ia i luga i talosaga a ana auauna, ma ia toe aoaiina ai ia matagi ma vai; na te laveaiina i latou o e faatuatua i lona suafa; na te fetalai atu i agaga ua fememeai; o lona siufofoga e toe faalogoia, ‘Faalologo ia, ina malū ia.’” (*Mortal Messiah*, 2:278).

Ia valaaulia tamaiti o le vasega e tusi pe faamatala atu se taimi na latou lagonaina ai le aafiaga filemu a le Faola. Atonu foi e te manao e fetufaai atu se mea na e oo i ai ina ua “laveaiina” oe e le Faola i se taimi “sousou” o lou olaga.

Usu pe faitau upu o le “Matai e ua Sou le Vasa” (*Viiga*, nu. 58). Ia valaaulia tamaiti o le vasega e toe faitau le fuaiupu mulimuli ma ta’u atu le auala e faatupu lagona ai ia i latou.

Mareko 5:21–43; 6:1–6 (tagai foi Mataio 9:18–26; 13:54–58; Luka 8:41–56). O le faatuatua e tomua i vavega. (25–35 minute)

Fai atu i tamaiti o le vasega e ta’u mai ni vavega na faia i aso nei e faapei foi o vavega na tutupu i le taimi o Keriso. Faitau faatasi ma tamaiti o le vasega le Moronae 7:37 ma tuu atu ia i latou e sailia po o le a le mea e tupu ai ia vavega. Ta’u atu ia i latou faapea o le a latou suesueina nei ni faataitaiga se lua o vavega e maua mai le faatuatua ma se faataitaiga se tasi i le lava o le faatuatua e faatupulaaina ai ia vavega.

Tuu atu i au tamaiti o le vasega e auuai i le faitauina leotele o fuaiupu o loo i le Mareko 5:22–43. Ia talanoaina fesili nei a o outou faitau:

- O le a le mea na sailia e Iairo mai ia Iesu?
- O le a le faaupuga a Iairo na fai na faaalua ai le tele o lona faatuatua sa i ai ia Iesu? (tagai f. 23).
- O le a le mea na fai ma tautala ai le fafine na ta’u mai ai ia i tatou le tele o lona faatuatua sa ia i ia Iesu? (tagai f. 27–28).
- O le a sou manatu aisea na lagonaina ai e Iesu se mea ua ese mai le pa’i atu a lenei fafine mai isi tagata uma o e na lolofi atu i Ona tafatafa?
- Aisea na faamaloloina ai le fafine ae le’i mafai ona fesoasoani atu isi tagata ia te ia?
- O le a le fetalaiga a Iesu na fesoasoani ai i le faamaloloina o le fafine? (tagai f. 34).
- I le tulaga o le afafine o Iairo, o le faatuatua o ai na fesoasoani atu i le toe faaolaina mai o ia?

Tuu atu i tamaiti o le vasega e faitau le Mareko 6:1–6 e vaai ai pe faapefea ona faatatau nei fuaiupu i tala e lua o loo i fuaiupu e 22–43. Fesili atu:

- O le a le faia i le va o le mana o Iesu Keriso e faamalolo ai ma le faatuatua o se tagata ia te Ia? (tagai foi Mamona 9:19–20).
- O le a sou manatu aisea ua toatele ai tagata i aso nei e le o talitonu i vavega?

Ia valaaulia tamaiti o le vasega e mafauafau po o le a le malosi o o latou faatuatua o loo i ai ma le mea e mafai ona latou faia e atinaeina ai se faatuatua tele. Tuu atu ia i latou se kopi o le saunoaga lenei mai ia Elder Merrill J. Bateman, o se sui o le Au Fitugafulu, e avefa ma se pepa e tufaina atu pe tusi i luga o le laupapa:

“O le faatuatua e le gata o se mataupu faavae ae o se faagasologa. E faamanino mai ai le ala tatou te atinaeina ai se sootaga o le faatuatua ma le Faola. Ina ia atinaeina le faatuatua, e tatau ona tatou amataina i se loto maualalo ma se agaga nutimomoia, ia i ai se naunautaiga malosi ia iloa le Alii, ona usiusitai lea i mataupu faavae o le talalelei. O lona taui, e tauia ai e le Faola i latou o e usiusitai i faamautinoaga a le agaga i a latou mea e fai (tagai Alema 32:16, 27–32). A o faatupulaia le faatuatua, o le a faalateleina ai la tatou vaai atu i le faavavau, lea e mafai ai ona faateleina lo tatou malosi e faafetaia ia luitau o le olaga” (“Faith That Preserves and Strengthens,” in *Brigham Young University 1996–97 Speeches* [1997], 141).

Ia talanoaina ia fesili nei faatasi ma au tamaiti o le vasega a o latou suesueina lenei faamatalaga.

- E mafai faapefea ona tatou mauaina le faatuatua?
- E faapefea ona aafia le faatutua i le usiusitai?

- E mafai faapefea e lo tatou faatuatua ona aafia ai lo tatou malosi e ususitai?
- O le a la le mea e mafai ona tatou faia e faateleina ai lo tatou faatuatua?

Mafaufau e faaiuina i lau molimau faapea e mafai ona tatou atinaeina se faatuatua tele ma o loo faia pea e le Atua ia vavega i aso nei e tali ai i lo tatou ususitai ma le faatuatua.

Mareko 6:14–29 (tagai foi Mataio 14:6–12; Luka 9:7–9). O le tausia o poloaiga e masani ona tele le lototele ma le osigataulaga e alu ai.

(20–30 minute)

Faitau atu le tala moni lenei i lau vasega:

“Na 19 tausaga o Iosefa F. Samita ina ua ia foi mai le misiona i Hawaii. A o ia faimalaga atu mai Kalifonia i lona aiga i Iutā, sa faafetauia o ia i se tasi taeao i se taavale solofanua ‘ e tumu i tagata onana ma laulauvavale . . . , o loo faapāpā a latou fanau, ma tauvalavalaau solo, ma taufaifai i Mamona.’ O se tasi o le au onana nei, sa ‘talotalo solo sana tamai fana,’ na savali atu ia te ia. E ui lava ‘sa fefe ia Iosefa ae sa ia lagonaina e le o se mea lelei ma e leai foi se aoga pe a tamoe . . . , ma o le sa ia agai atu ai e faafetaui i le tagata lenei o loo sau ma le fana. “O oe o se ___ ___ Mamona?” sa fesili atu ai lenei tagata ese. Sa ia tau faato’atoa lemu lava, ona tali atu lea o Iosefa a o ia tilotilo sa’o atu i mata o le tagata lenei, “Ioe, alii; e matuai faamaoni a’ia’i lava. Na toetoe a pe lona fatu i lenei tali e le’i mafaufauina, sa tu le tagata lenei ma lana fana, ua tuu ona lima i ona puimanava, ma, faatausisila atu ia Iosefa mo sina taimi, ma faapea atu i lona leo malu, “O oe le ___ ___ tagata lelei muamua lava ua ou feiloai i ai! Faatalofa. Ou te fialia ou te vaai i se tagata o loo tumau ma le malosi i ona talitonuga.” Na ia tali mai ai faapea ma savali ese’ [Francis M. Gibbons, *Joseph F. Smith: Patriarch and Preacher, Prophet of God* (1984), 43–44]” (M. Russell Ballard, i le Conference Report, Oke. 1997, 51; po o le *Liahona*, Ian. 1998, 37).

Fesili atu: O a uiga e moomia ona i ai ina ia faia ai se ituaiga faaiuga e pei ona faia e Iosefa F. Samita? Fesili atu i tamaiti o le vasega pe i ai ni tagata o o latou aiga po o ni uo o e na tausia ia poloaiga i ni tulaga faigata, ma valaaulia i latou e fetufaai atu a latou tala.

Ta’u atu i tamaiti o le vasega o le asō o le a latou aoao ai e uiga i se tasi sa tausia ia poloaiga lea na manaomia ai le lototele ma le osigataulaga tele. Faitau le Mareko 6:14–16 ma fesili atu:

- O ai “ia” lea o loo i le fuaiupu e 14? (Iesu.)
- Aisea na manatu ai ia Herota atonu o Iesu le Ioane le Papatiso lea na toetu mai le oti?

- O le a se mea atonu na fefe ai ia Herota?

Faitau faatasi ma au tamaiti o le vasega le Mareko 6:17–29, ia taofi pe a manaomia ina ia tuu atu ai i tamaiti e talanoaina ia fesili nei. Ia faamalamalama atu o le Mareko 6:14–16 o loo faamatalaina ai le mea na tupu ina ua *mavae* le oti o Ioane le Papatiso ae o le fuaiupu e 17–29 Mareko o loo iloiloaina ai pe na faapefea ae o le a foi le mafuaaga o le oti o Ioane.

- Aisea na faafalepuipuiina ai e Herota ia Ioane?
- Aisea na maua ai e Ioane le lototele e valaau atu ai ia Herota ina ia salamo?
- O le a le tau na totogiina e Ioane?
- O a uiga o loo ta’ua i le Mareko 6:20 e te manatu na fesoasoani ia Ioane ina ia maua le lototele e tausai ai poloaiga?
- Aisea na aoga ai le osigataulaga a Ioane ina ia tausai ia poloaiga?
- O a nisi o auala o loo faaalai ai e le autalavou le lototele ma le osigataulaga i le tausia o poloaiga? (Ia papatisoina, o i misiona, tausai faatulagaga o le ola mama, tausai le Upu o le Poto, tu atu mo isi o loo agaleagaina.)
- O le a sou manatu aisea e taua ai le tausai o poloaiga?

Ia faaiuina i le fesili atu i tamaiti e faitau le Taiala i Tusitusiga Paia i le ulutala Ioane le Papatiso. A o latou faia, ia valaaulia i latou e vaavaai mo le uiga e tasi po o se tulaga foi na oo i ai ia Ioane le Papatiso na sili ona faagaetia ai i latou. Ia uunaia i latou e faaaga ia Ioane e avea ma se faaitaiga mo a latou faaiuga.

Mareko 6:34 (tagai foi Mataio 14:14). E tele le alofa ma le ma le manatu mai o le Faola mo tagata uma. (10–15 minute)

Ia amataina le vasega i le usuina o le “Ou te Lagonaina le Alofa o Lo’u Faaola” (*Tusipese a Tamaiti*, 74) po o le “Ou te Tu ma Ofo” (*Viiga*, nu. 107). Fesili atu i tamaiti o le vasega e faailoa mai po o a ni o latou lagona i le Faaola i le usuina o le pese.

Tusi ia mau nei i luga o le laupapa: *Mataio 20:34; Mareko 1:40–41; 5:19; 6:34; Luka 7:12–13*. Tuu atu i le vasega e faitauina ma vaai ai mo le upu lena e faamatalaina ai ia lagona o le Faaola ina ia faamanuina atu i fuaiupu taitasi. Fesili atu: E faapefea ona faatatau lenei mea ia i tatou? Faitau le 3 Nifae 17:5–7 ma fesoasoani atu i tamaiti o le vasega ia malamalama e i ai le manatu mai ma le alofa o le Faaola mo tagata uma. O mea uma Na te faia e uunaiina lea e Lona alofa. Fesili atu:

- Aisea e foliga mai ai e taofia e le Tama ia faamanuiaga i nisi o taimi, e ui lava i Lona alofa ia i tatou?
- E mafai faapefea e le taofiofia o faamanuiaga ona avea ma se aga o le alofa?

Faitau le saunoaga lenei mai ia Elder Neal A. Maxwell, a o avea ma se tasi o le Au Fitugafulu:


“O le alofa o Iesu le ua paia mo i tatou e le o le alofa tonu lea o se tagata agasala o lē le’i puapuagatia lava; ae o le alofa ma le manatu mai o Lē na matuai puapuagatia, e ui i le leai o se sala, mo agasala a i tatou uma” (All These Things Shall Give Thee Experience [1979], 35).

- E mafai faapefea e le malamalama i le alofa ma le manatu ai o le Faaola ia i tatou ona uunaia ma faamanuiaina o tatou olaga?
- E mafai faapefea e lena malamalama ona aafia ai o tatou lagona e uiga ia te Ia ma mea o loo Ia talosaga mai tatou te faia?

Tuu atu i se tasi e faamatala mai se taimi na ia lagonaina ai le manatu mai po o le alofa o le Faaola. Ia valaaulia tamaiti o le vasega e vaai mo avanoa i le vaiaso a sau, e mafai ona latou faali atu ai le alofa i se isi e pei o le Faaola.

Mareko 7–16

O le Soifuaga o Iesu Keriso



Faatomuaga

O le Mareko 7–16 e toetoe lava a aofia ai le tausaga mulimuli o le soifuaga o le Faaola, e aofia ai Ana galuega mulimuli i Kalilaia, Perea, ma Iutaia. Ae peitai, o le tele lava o lenei vaega, o loo talanoaina ai ia mea taua na tutupu i le vaiaso faaiu o le Faaola, e aofia ai Lana Togiola, maliu, ma le Toetu.

Suesue ma le agaga tatalo le Mareko 7–16 ma mafaufau i mataupu faavae nei ae le’i sauniaina au lesona.

O Nisi Mataupu Faavae Tava o le Talalelei e Saili Iai

- Tatou te le mama i o tatou mafaufauga ma gaoioiga leaga (tagai Mareko 7:14–24).
- O le anapogi ma le tatalo e mafai ona faateleina ai lo tatou faaleagaga ma le faatuatua (tagai Mareko 9:14–29; tagai foi Mataio 17:14–21; Luka 9:37–43).

- O i latou o e lotomauualalo, usiusitai, ma naunau e auauna atu i isi e sili o ia i le silafaga a le Atua (tagai Mareko 9:33–37; tagai foi Mataio 18:1–5; Luka 9:46–48; Mosaea3:19).
- Na oo Iesu i le fia ai, fia inu, le lavā, tiga, ma le faasoosoina, ma ua iloa foi ona faamafanafana ma fesoasoani mai ia i tatou (tagai Mareko 11:12; tagai foi Mosaea 3:7; Alema 7:11–13).
- O le maota o le Alii o se nofoaga e paia ma e tatau ona tausia ma le faaaloalo (tagai Mareko 11:15–18; tagai foi MFF 110:8).
- Pe a tatou tatalo atu i le faatuatua, o le a tuuina mai e le Tama Faalelagi ia manaoga tonu o o tatou loto (tagai Mareko 11:22–24; tagai foi Mataio 21:21–22; Iakopo 1:5–7; 3 Nifae 18:20).
- E tatau ona tatou aoao ina ia ositaulagaina a tatou meatotino faalelalolagi mo faamanuiaga faalelagi ina ia avea ai faapei o Keriso (tagai Mareko 12:41–44; tagai foi Luka 21:1–4; Moronae 7:6–8).

Risosi Faaopoopo

- “O le Vaiaso Mulimuli o le Soifuaga o le Faaola,” 283.

Fautuaga mo le Aoao Atu

Filifili mai manatu nei, pe faaoga nisi o ou lava manatu, a o e sauniaina au lesona mo le Mareko 7–16.

Mareko 7:1–23 (tagai foi Mataio 15:1–20). Tatou te le mama i o tatou mafaufauga ma gaoioiga. (30–40 minute)

Ae le’i amataina le vasega, ia faia sina paluga palapala i totonu o se pesini, aumai se iputi ua palapala sa faaaogaina, ma tusi le upu *faaleagaina* i luga o le laupapa. Fesili atu i tamaiti o le vasega po o le a le uiga o le upu *faaleagaina* (ia faaeleleaina po o le lē mama). Ia valaaulia se tama o loo umiaina le perisitua e sau i luma o le vasega ma tuu lona lima i totonu o le paluga palapala. A mae’a ona ia faia, ona fesili atu lea: Pe avea ea ia lima eleelea ma auala e le agavaa ai o ia e umiaina le perisitua? Aisea e mafai ai pe aisea foi e le mafai ai? Tuu atu le iputi eleelea i se tasi o teineiti ma fesili atu: Pe avea ea le inu mai lena iputi ma auala e le agavaa ai o ia e aoaoina se vasega o le Peraimeri po o le Aoga Sa?

Tuu atu i tamaiti o le vasega e faitau le Mareko 7:1–15, ma fesili atu:

- O le a le mea na tuuaia ai e le au Faresaio ia soo o Iesu?
- Na faapefea ona tali atu Iesu ia i latou?

Ia mautinoa ia malamalama tamaiti o le vasega e le’i faapea mai Iesu o le fafanoina o lima ae le’i ai e le taua. Na Ia saunoa faapea o le ai ae le’i fafaoina ia lima e ma’i ai le tagata pe le mama ai foi.

- Na faapefea ona faaaogaina e le au Faresaio le kopano e ’alo ai mai le tulafono?

- O le a le mea na aoao mai e Iesu e faatatau i lenei mataupu? (tagai Mareko 7:10–13).

Tuu atu i tamaiti o le vasega e faitau le Mareko 7:17–23 ma saili ai po o le a moni lava le mea e faaleagaina ai se tagata. Ona talanoaina lea o fesili nei:

- O a ituaiga manatu ma gaoioiga e lē mama faaleagaga ai ia tagata? (Ia lisi tali i luga o le laupapa.)
- Pe sili atu ona taua le mama i le faaleagaga po o le faaletino? Aisea?
- O le a le ituaiga mama e te manatu e faigofie ona faatumauiina? Aisea?


Faitau le saunoaga lenei mai ia Elder Spencer W. Kimball, a o avea ma se sui o le Korama a le Toasefululua:

“E le o le palapala o le eleele po o le ga’o i lima o se tagata e faaleagaina ai o ia; e le o le . . . tupuga mai i le faataunuuina o galuega faamaoni, po o le manogi foi o le tino o le tagata e mafua mai i le faataunuuina o galuega mamafa. E mafai e se tasi ona taele i lea taimi ma lea taimi, faamanogi le tino i mea manogi i le tele o taimi, uu le ulu i taimi uma ma taoti atigilima i aso taitasi, ma tautala i upu malu, peitai e mafai lava ona palapala ma leaga o ia e pei o lua ua lafo i ai le otaota ma mea leaga. Ua pogai lea tulaga ona o le agasala, aemaise lava agasala o le feusui” (*O le Vavega o le Faamagalo Atu* [1969], 63).

Ia fetufaai atu le saunoaga lenei mai ia Dallin H. Oaks, a o avea ma Peresitene o le Iunivesite o polika Iaga:

“O loo i ai i le tino ni mea tau e puipuia ai le tino mai i meaai e le mama, E i ai nisi tulaga e le lelei ai, o meaai leaga e na o le maua ai o oe i le ma’i ae le tumau ona faaleaga ai le tino. I le faatusatusaga, o se tagata e taumafa i tala leaga ma tifaga leaga ma tusi leaga e faamauiina na mea i le vavega ofoofogia e toe manatua ai ua tatou ta’ua o le fai’ai. E le mafai e le fai’ai ona toe luai mai i fafo le eleelea. O le taimi lava e faamauiina ai, o le a tumau ai pea lava seia toe manatua ai, ma o le a faali mai ai na vaaiga leaga i lou mafaufau ma aveesea ai oe mai mea lelei i le olaga” (“Aua e te Mata’u, Tau Lava Ina e Faatuatua,” *Liahona*, Ian. 1998, 51–52).

Faitau le 1 Nifae 15:34. Ia fetufaai atu ou lagona i au tamaiti o le vasega e uiga i le avea ma se tagata e mama i le faaleagaga ma tumau ai pea.

 **Mareko 8:1–30 (tagai foi Mataiao 15:32–16:20). E mafai e Iesu ona faamaloloina le tauaso faaletino ma le faaleagaga.** (30–40 minute)

Ae le’i amataina le vasega ia tusi i ni mataitusi laiti i luga o se fasi pepa ia le faataoto *E leai se tagata e tauaso e pei o se e le vaai*. Faapipii le pepa i luga o le laupapa ma tuu atu i se tamaitiiti o loo i le pito i tua o le potu e taumafai e faitau. Afai e i ai se tamaitiiti o le vasega e faaletonu lana vaai latalata, ona tuu atu lea ia te ia e taumafai e faitau e aunoa ma lana tioata. Fesili atu i tamaiti o le vasega: O le a le eseesea i le va o se tasi e le mafai ona vaai ma se tasi o le a le vaai?

Iloilo faatasi ma au tamaiti o le vasega ia le tala i le fafagaina o le fa afe (Mareko 8:1–9), ona fesili atu lea:

- O le a le mea na faia e le au Faresaio ina ua uma ona fafagaina e Iesu le fa afe? (tagai f. 11–12).
- O le a le ituaiga tauaso sa i le au Faresaio?
- O le a le ituaiga o tauaso na faaalua e le au soo i le vaa? (tagai f. 13–21).
- E ui lava sa faaalua e i latou uma le tauaso faaleagaga, o ai sa sili atu ona tauaso—o le au soo po o le au Faresaio?

Tuu atu i au tamaiti o le vasega e iloiloia ia le fuaiupu e 22–26 (tagai foi i le fautuaga e aoao atu ai o loo i lalo mo le Mareko 8:22–26). Fesili atu: E ono mafai faapefea ona puapuagatia tagata mai vaega eseese o le tauaso? Faitau le fuaiupu 27–30.

- O le a le mea na molimau mai ai ia Peteru?
- E faapefea ona avea o ia ma se faataitaiga lelei o se tasi e mafai ona vaai faaleagaga?

Faitau le fuaiupu 31–33 ma talanoaina pe na faapefea ona leiloa foi e Peteru ia mea uma (tagai foi i le fautuaga e aoao atu ai mo le Mataiao 16:15–19, i. 42–43).

- O le a le mea na manaio Peteru e teena?
- O le a le mea sa ia le malamalama i ai pe le’i “vaai ia i”?

Faitau atu le fuaiupu 34–38 i au tamaiti o le vasega. Ia fetufaai atu lau molimau faapea e mafai e le Faaola ona faamaloloina le tauaso faaleagaga e pei lava ona Ia faamaloloina le tauaso faaletino, ae sei vagana ua i ai lo tatou manaio e vaai ai.

Mareko 8:22–26. O le tulaga na faataunuuina ai e Iesu Keriso Ana vavega e mafai ona aoaoina ai i tatou i ni lesona taua. (10–15 minute)

Tuu atu i tamaiti o le vasega e iloiloia ia vavega na faia e le Faaola e pei ona tusia i le Mareko 6:54–56 ma le 7:31–37. Ona tuu atu lea ia i latou e faitauina le Mareko 8:22–26, ma fesili atu:

- E faapefea ona ese mai lenei faamalologa mai isi?
- O le a le lesona e mafai ona tatou aoaoina mai le mea moni lenei faapea o lenei tagata e le’i faamaloloina atoatoa i le taimi muamua?

Ia valaaulia tamaiti o le vasega e faalogo i le saunoaga lenei mai ia Elder Bruce R. McConkie e vaai ai pe mafai faapefea ona latou faatatauina i o latou olaga:

“O lenei vavega e tupito; e na o le pau lea o le vavega o loo tusia na faamaloloina auauai ai e Iesu se tagata. Atonu na mulimuli lo tatou Alii i lenei auala ina ia faamalosia ai le faatuatua vaivai o le tagata tauaso. E foliga mai o faaitaiga faamanuiaina o fesootaiga faaletino ma Iesu e i ai aafiaga faaopoopo o le faamomoe, mautinoa, ma le faatuatua i le ua le pupula. . . .

“O le mea mautinoa lava o le tulaga na faataunuaina ai lenei faamalologa ina ia tatau ai i tagata o na sailia le alofa tunoa faamalolo o le Alii i o latou malosi, ma le faatuatua uma, aua ua lava lea e faamaloloina ai, ae peitai, o le mulimuli i le taliaina o lea faamalologa, e mafai ai ona latou mauaina se faaopoopoga i le mautinoa ma le faatuatua ina ia atoatoa ai i soo se vaega. E masani foi ona faamaloloina auauai tagata i o latou ma’i faaleagaga, i lea laasaga ma lea laasaga a o latou faagatasiiina o latou olaga ma fuafuaga a le Silisiliese” (*Doctrinal New Testament Commentary*, 1:379–80).

Mareko 9:14–29 (tagai foi Mataio 17:14–21; Luka 9:37–43). O le avea ai o le anapogi ma se soa i le tatalo e mafai ona faateleina ai lo tatou faaleagaga ma le faatuatua. (20–25 minute)

Ia valaaulia au tamaiti o le vasega e su’e i le “faatuatua” i le Taiala i Tusitusiga Paia. Faitau faatasi ma i latou le faauigaina. Ia valaaulia i latou e filifili ni manatu autu se fa pe lima mai le uiga, ma tusi i luga o le laupapa.

Faitau le Mareko 9:14–29 ma talanoaina nisi o fesili nei:

- O a elemene taua i le atinaeina o le faatuatua o loo faaalai i lenei tala?
- O le a le mea na vaivai ai le au soo i le taimi lea na mafua ai ona latou le mafaia ona “tulua le agaga gugu”? (tagai f. 18, 28–29).
- O le a le aafiaga a le anapogi ma le tatalo e i ai i le faatuatua?
- O le a sou manatu o le a le uiga o le faamatalaga a le tama i le fuaiupu e 24?

Na saunoa ia Elder Bruce R. McConkie e faapea:

“O le faatuatua e mafaia ai mea uma lava; e leai se mea e faigata i le Alii. E leai se ma’i e tigaina, e leai se faama’i e matautia, e leai se mala e faatamaia ai ae fofoina uma e le mana o le faatuatua. E tusa po o le ola po o le oti e leai se mea e taofia mai ia i latou o e tausia le tulafono o le faatuatua lea e i ai la latou aia e mauaina ai. Ae i le faatinoina, e oo lava i tagata sili ona amiotonu, o le faatuatua po o le mana e olioli ai i vaega eseese, ae o nisi ma’i e moomia ai le faatinoina o le mana silisili e faamalolo ai nai lo isi” (*Doctrinal New Testament Commentary*, 1:409).

Na saunoa mai ia Elder James E. Talmage:

“O le anapogi, afai e faatinoina ma le faautauta, faapea ma le tatalo faamaoni e faaopoopo atu i le atinaeina o le faatuatua faatasi ma lona mana o loo i ai mo le lelei. O faatinoga taitasi o lenei mataupu faavae e mafai ona faamanuiaina ai. Pe ua i ai ea ni ou vaivaiga ua lofituina ai, o ni manaoga e agasala ai ua e le mafaia ona faotoilaloina? E pei o le temoni leaga na tuliese e Iesu mai le tamaitiiti, o lau agasala atonu o se ituaiga e na o le tatalo ma le anapogi e mafai ona aveeseina ai” (*Jesus the Christ*, 3rd ed. [1916], 395).

Ia tuuina atu lau molimau i le auala e mafai ai ona faateleina le faatuatua e ala i le tatalo ma le anapogi. Afai e lava le taimi, ia mafaufau e faitau faatasi ma au tamaiti o le vasega le Alema 32:26–37 ma talanoaina le mea o loo aaoaina mai e uiga i le faateleina o le faatuatua.

Mareko 9:33–37 (tagai foi Mataio 18:1–5; Luka 9:46–48). O i latou o e lotomavalalo, ususitai, ma naunau e auuina atu i isi e silisili i latou i le silafaga a le Atua. (25–35 minute)

Tuu upu nei i luga o le laupapa: *Pulega Aoa, peresitene o siteki, epikopo, faiaoga, tagata e vaai le potutusi*. Fesili atu i tamaiti o le vasega po o le fea o nei tofiga e manatu le toatele o tagata e sili atu. Aisea? Tuu atu ia i latou e faitau le Mareko 9:33–35.

- Na faapefea ona tali e Iesu le fesili po o ai e sili?
- O le a le uiga o le ua sili e tatau ona avea ma “auauna a tagata uma”?
- O a tofiga o loo lisiina i luga o le laupapa e mafai ona aafia ai le auuina a tagata uma? (Soo se tofiga lava e mafai ma o tofiga uma lava e tatau ona auuina atu ai i tagata uma.)
- Na faapefea ona faatinoina e Iesu lenei mataupu faavae i Lona soifuaga?



Faaali atu se ata o Iesu faatasi ma tamaiti laiti e pei o lenei o loo faaali atu iinei. Tuu atu i tamaiti o le vasega e faitau le Mareko 9:36–37, ma talanoaina nisi o fesili nei.

- O le a se mea e te manatu na aoaoina atu e Iesu i Ona soo i lona siitiaina lea o le tamaitiiti i Ona aao?
- O le a le uiga o le “taliaina” o se tamaitiiti i le suafa o Keriso?
- O le a sou manatu aisea ua mumusu ai nisi tagata i aso nei e auauna atu ia i latou o e latou te manatu e le taua tele pe lelei e pei o i latou?
- O le a se lagona o Iesu sa i ai i le auauna atu i isi, aemaise lava i tamaiti? (tagai Mareko 10:13–14).

Faitau le tala a Mataio i le mea lava lenei e tasi o loo i le Mataio 18:1–6.

- O le a le mea o loo ta’u mai e le tala a Mataio e tatau ona tatou faia e ese mai lo tatou naunau e taliaina ia tamaiti?
- E mafai faapefea e le liuaina ma le faamaualaloina o i tatou e pei o se tamaitiiti ona tatou mafaia ai ona auauna atu i isi? (tagai Mosaea3:19).
- E mafai faapefea e le aveia e pei o se tamaitiiti ona fesoasoani ia i tatou ina ia sili i le malo o le lagi?

Ia fetufaai atu le saunoaga lenei mai ia Elder Bruce R. McConkie:

“O le silisili moni lava i le malo faalelalolagi o le Alii e fuatiaina, e le o tofiga o loo umia, e le o le lauiloa e mauaina, e le o tulaga faamamaluina ua tuuina i ai e tagata faaletino, ae o tulaga agavaa taua ma lelei. O i latou e aveia faapei o tamaiti ma mauaina uiga faaleatua mo i latou lava, e tusa po o le a le tulaga e valaauina i ai i latou e auauna atu ai, e ‘silisili lava i latou i le malo o le lagi.’” (*Doctrinal New Testament Commentary*, 1:415).

Mareko 9:43–50 (tagai foi Mataio 18:8–9). Pe tatau moni ea ona tatou tipieseina se lima po o se vae ona o se agasala? (20–25 minute)

Fai atu i tamaiti o le vasega e vaavaai i le lima o loo latou tusitusi ai ma mafaufau i mea uma e mafai ona latou faalagolago ai i le lima lenei na te faia.

- O le a se faigata o le a i ai pe a ola pea e aunoa ma lenei lima?
- Pe i ai se mea aoga e aveeseina ai lou lima?

Faitau faatasi ma au tamaiti o le vasega le ma talanoaina ia fesili nei:

- Afai e ao ona aveeseina se lima i lenei olaga ina ia maua ai le ola e faavavau, pe aoga ea?
- Pe aoga ea pe afai e aveeseina ai se vae? se mata?

- Pe aoga ea ia te oe pe afai e maimau ai lou olaga faalelalolagi?
- E ui lava o le malo o le Atua e aoga i soo se osigataulaga, e te manatu e finagalo moni lava le Atua e tipieseina o tatou lima pe afai tatou te solia se agasala i lenei lima?

Tuu atu i tamaiti o le vasega e faitauina le Faaliliuga a Iosefa Samita o le Mareko 9:40–48 o loo i le Taiala i Tusitusiga Paia.

- O le a le uiga faaopoopo o loo tuuina mai i le Faaliliuga a Iosefa Samita i nei fuaiupu o loo i le Mareko?
- O le a le mea e faatusa i ai lo tatou lima faatausui?
- O ai e faatusa i ai lo tatou vae lea e faatausui?
- I le fuaiupu e 42, o ai e faatatau i ai le “se na te faatau-suaiina”? (O tagata e te vaai atu i ai, o i latou o e faia se faaitaiga mo oe.)
- O ai e faatusa i ai lo tatou mata faatausui?
- O ai ua tofiaina e “vaaia oe ina ia faaali atu ia te oe le malamalama”?
- O le a le mea e tupu i nisi o tagata pe a pauu i le agasala atu ia ni taitai o le Ekalesia po o ni tagata o le aiga e vaai atu ia mo le taitaiga?

Faitau le Faaliliuga a Iosefa Samita o le Mareko 9:44–45 ma fesili atu:

- O le a sou manatu o le a le uiga o le “tu po o le pa’u” ia te oe lava ia?
- O ai e tatau ona tatou faatuatuaina?

Ia fetufaai atu le saunoaga lenei mai ia Peresitene Heber C. Kimball, o se tasi sa aveia ma sui o le Au Peresitene Sili, e fesoasoani ai i le taliina o nei fesili:

“Ina ia faafetaia ia mea faigata o le a oo mai, o le a talafeagai mo oe ona e mauaina se malamalama i le upumoni i lenei galuega mo outou lava. O mea faigata o le a matuai tulaga ese lava ma o soo se alii ma soo se tamaiti e na te le mauaina lenei malamalama po o le molimau o le a pa’u. Afai e te le’i mauaina le molimau, ia ola amiotonu ma valaau atu i le Alii ma aua ne’i taofia seiloga ua e mauaina. Afai e leai o le a e le tu. . . .

“O le a oo mai le taimi o le a le toe i ai se alii po o se tamaiti e mafai ona tumau i se malamalama e nonoina mai. O i latou uma lava o le a taitaina e le malamalama o loo i totonu ia te ia lava. . . .

“Afai e le o ia te oe o le a e le tu atu foi; o lea la, ia saili mo le molimau ia Iesu ma tumau ai, ina ia oo mai taimi faigata ae ua le mafai ona e tautevateva pe pa’u ese” (Orson F. Whitney, *Life of Heber C. Kimball*, 3rd ed. [1967], 450).

Mareko 10 (tagai foi Mataio 19:16–30; 20:20–34; Luka 18:15–43). O mea tatou te mananao i ai e faaalua ai mea o i totonu o o tatou loto ma aafia ai mea tatou te mauaina. (25–30 minute)

Fai atu i au tamaiti o le vasega e mafaufau faapea ua latou maua se faatalanoaga na o i latou ma le Faola ma e mafai ona latou talosaga atu i ai mo se faamanuiaga e tasi. Tuu atu ia i latou se minute e mafaufau ai e uiga i lea o le a latou ole atu ai, ae ia lapataiina i latou ina ia aua e'i tauina atu i soo se tasi.

Ia tusi i luga o le laupapa, *O le a le mea e sili ona taua ia _____?* Ta'u atu i tamaiti o le vasega e i ai nisi tagata latou te mauaina le avanoa. Ia iloiloina faatasi ma au tamaiti o le vasega ia tala faatusipaia nei o loo i le Mareko 10 ma tusi i luga o le laupapa ia mea e foliga mai e sili ona taua i tagata o loo lisiina atu i lalo:

- Fuaiupu 17–22: o le aoao tulafono talavou
- Fuaiupu 25–30: Peteru
- Fuaiupu 35–41: Iakopo ma Ioane
- Fuaiupu 46–52: Patimaio
- Fuaiupu 32–34: Iesu

Fesili atu:

- O le a le mea na tupu i nei tagata uma e tolima?
- O a manaoga e sili atu ona taua e faavavau nai lo isi?
- O le a le mea o loo aoaoina mai e nei tala ia i tatou e uiga i aafia e mafai e o tatou manaoga ona faia i o tatou olaga? (tagai Alema 41:3–7).

Tusi le upu *oe* i le avanoa o loo i luga o le laupapa ma tuu atu i tamaiti o le vasega e taliina le fesili e i latou lava. Fai atu ia i latou e mafaufau e uiga i se mea e ono tupu ia i latou pe afai e lelei pe leaga o latou manaoga. Fai atu ia i latou e mafaufau po o le a le mea atonu e tupu pe afai e le suia o latou manaoga. Fesili atu: O le a se mea e mafai ona tatou faia ina ia aveai ai o tatou manaoga ma manaoga e faavavau ma faapei o Keriso? (tagai 2 Nifae 31:20; Enosa 1:1–6; Moronae 10:32–33).

Mareko 11:12 (tagai foi Mataio 21:18). Na oo Iesu le fia ai, fia inu, le lava, tiga, ma faoso-osoga, ua ua iloa ai foi ona faamafanafana ma fesoasoani mai ia i tatou. (15–20 minute)


Aumai i le vasega nisi o ata mai mekasini po o nusipepa o ni mafatiaga o tagata (e pei o le oge, maliliu o e ua pele, lologa, afi, po o taua). Fesili atu i tamaiti o le vasega pe i ai se tasi o i latou ua oo i soo se mea faapea e pei ona faaalua mai i nei ata (mo se faataitaiga, pe sa latou matuai fia aai pe mafatia i se lologa po o se mu). Afai e le matuai patino i se tagata pe faigata foi, ia valaaulia i latou e faamatala atu le mea na tupu ia i latou. Fesili atu:

- O le a se lagona na oo ia te oe i le vaai atu i isi o puapuagatia e pei o oe pe sili atu foi nai lo oe?
- Pe tutusa ea ou lagona pe afai e te le'i mafatia ai lava?
- Aisea tatou te matele atu ai i le lagonaina o le alofa mo isi pe afai sa tatou oo foi i tatou i ni o tatou puapuaga?

Ta'u atu i tamaiti o le vasega faapea o le mataupu e 11 o le Mareko e amataina ai lana tusi i le vaiaso mulimuli o le soifuaga o le Faaola. Tuu atu ia i latou e faitauina le Mareko 11:12; Ioane 19:28; Mosaea3:7; Alema 7:11–13; ma le MFF 19:15–19 ma lisi i lalo ituaiga mea na puapuagatia ai Iesu. Fesili atu:

- O le a se mea o loo aoaoina mai e nei fuaiupu ia i tatou e uiga ia Iesu?
- Aisea na sili atu ai ona puapuagatia ia Iesu nai lo i tatou?
- Aisea o le a aveai ai na puapuaga ma auala o le a aveai ai o Ia ma faamasino lelei i o tatou olaga?

Tuu atu i au tamaiti o le vasega e tusi i luga o se fasi pepa po o le a se lagona e oo ia i latou i le iloaina lea o le naunau o le Faaola e puapuaga i nei mea uma mo i tatou. Afai e te lagonaina e talafeagai, ia valaaulia nisi o tamaiti o le vasega e fetufaai atu i le vasega mea na latou tusia.

 **Mareko 11:12–14, 19–26 (tagai foi Mataio 21:18–22). Afai tatou te tatalo i le faatuatua, o le a tuuina mai e le Tama Faalelagi ia i tatou le mea tonu ma sili ona lelei mo i tatou.** (35– 45 minute)

Fai atu i tamaiti o le vasega e ta'u mai uma ia vavega na faia e Iesu e mafai ona latou mafaufau i ai, ma faia se lisi vave o na vavega i luga o le laupapa. Ona tuu atu lea ia i latou e faitauina le Mareko 11:12–14, 19–20 e vaai ai pe faapefea ona ese le vavega na faia e Iesu iina mai isi vavega uma. Tuu atu i tamaiti o le vasega e faitauina le Mareko 11:21–24, ma fesili atu: O le a le lesona na aumaia e Iesu mai le vavega o le fetuina o le laau o le mati?

Ta'u atu i tamaiti o le vasega: Faapea la e i ai sau uo ua manao ia te oe e te fesoasoani atu ia te ia ina ia atinaeina le ituaiga faatuatua lea na faamatalaina e Iesu i nei fuaiupu. O le a se fautuaga e mafai ona e tuuina atu ia te ia? Ina ia fesoasoani i tamaiti o le vasega i lenei fesili, ia talanoaina o se vaega le vaega lenei:

- E faapefea ona manaomia e se tasi le faatuatua i le tulaga muamua lava? (O le faatuatua o se meaalofo mai le Atua; tagai 1 Nifae 10:17; MFF 46:13–14.)
- O le a se mea e tatau ona tatou faia ina ia atinaeina ai le faatuatua? (Ia ususitai ma lotomauualalo, saili ma le maelega, ma ole atu mo le meaalofo o le faatuatua; tagai Ioane 7:17; 1 Nifae 10:18–19; Alema 32:21–27.)

Na saunoa mai ia Elder James E. Talmage:

“E ui lava e mafai e i latou uma o e sailia ma le maelega ina ia maua, o le faatuatua o se meaalofo faalelagi. E pei ona fetau lona tau ma se penina tautele, o lea ua tuuina atu ai na o i latou o e faaaliga e ala i lo latou faamaoni lo latou agavaa i ai, ma i latou o e ua folafola le usitai i ona poloaiga. . . . E leai se faamalosi e faaaogaina i le aumaia o tagata i se malamalama o le Atua; ae peitai, e pei ona televave ona tatou tatalaina o tatou loto i aafiaga o le amiotonu, o le faatuatua lea e tau atu i le ola e faavavau o le a tuuina mai e lo tatou Tama” (*The Articles of Faith*, 107).

Fesili atu: O le a le mea e tatau ona tatou faia pe a uma ona tuu mai le faatuatua? (Faaauau pea ona faafaileleina lo tatou faatuatua e ala i le suesue, tatalo, ma le usiusitai; tagai Mareko 9:23–24; Roma 10:17; 2 Nifae 31:20; Alema 32:28–37; Helamana 10:4–5.)

Na saunoa mai le Perofeta o Iosefa Samita:

“O le faatuatua e maua mai le lagonaina o le afioga a le Atua, e ala i le molimau a auaua a le Atua; o lena molimau e i ai pea le Agaga o valoaga ma faaaliga” (*Teachings of the Prophet Joseph Smith*, 148).

Tuu atu i tamaiti o le vasega e tusi o latou lagona e uiga i le faatuatua i luga o se fasi pepa. Ia valaaulia nisi o tamaiti o le vasega e fetufaai mai mea na latou tusia.

Mareko 11:15–18 (tagai foi Mataio 21:12–16; Luka 19:45–48). O le maota o le Alii o se nofoga e paia ma e tatau ona tausia ma le faaloalo.
(30–45 minute)

Faaali atu i tamaiti o le vasega se ata o se malumalu, e lelei se ata o se malumalu e sili ona latalata atu i lo outou eria, ma fesili atu:

- O ai o outou ua asiasi atu i se malumalu o le Ekalesia?
- E faapei le savalivali ai i lotoa o le malumalu?
- O le a sou lagona pe afai e i ai ni tamai potu i totonu o lotoa o le malumalu e faatau ai ia lavalava, meaai, ma isi oloa?
- O le a le mea e faia e fefaatauaiga i le agaga ma le faaloalo i le malumalu?

Faitau le Mareko 11:15–17. Ia faailoa atu o le taimi lona lua lea na faamamaina ai e Iesu le malumalu. Tuu atu ia i latou e faitauina le taimi muamua i le Ioane 2:13–17 ma faatusatusa i le tala o loo i le Mareko. Atonu e te manao e fetufaai atu i tamaiti o le vasega le saunoaga lena mai ia Elder Bruce R. McConkie:

“I le tau amatamataga o lana galuega faalauaitete, i le taimi o le Paseka, na toatele na vaavaai atu ia Iesu i le tuliese lea mai le malumalu o i latou o e na faia fefaatauaiga i le maota o lona Tama. O lena, i le gasologa o le vaiaso mulimuli o lana galuega i le tino, na ia siitia mai ai e ia lava le mea na taua e le Alii o Ieova o loo i le Isaia (Isa. 56:7), ‘E tatau ona ta’ua lo’u fale o se fale tatalo,’ na ia toe faaaliga ai foi lana aia faalelagi e faamamaina ai e le gata o lona fale ae o le fale foi o lona Tama” (*Doctrinal New Testament Commentary*, 1:584–85).

Fesili atu: Aisea e taua ai le faaloalo ma le migao i totonu o o tatou fale paia uma? Ia fetufaai atu le saunoaga lena mai ia Elder Boyd K. Packer:

“Pe a tatou feiloai e aoaoina ia aoaoga faavae o le talalelei, e tatau ona faia i se agaga o le faaloalo. E faatatau i le faaloalo ma le auala e fetau ai i faaaliga lea ou te manao ou te tautala i ai.

“O musumusuga e faigofie ona oo mai i tulaga filemu. O upu e pei o le filemu, malu, toafimalie, Fesoasoani, o loo tumu i totonu o tusitusiga paia: ‘Ina soia, ma ia outou iloa o au lava o le Atua’ (Salamo 46:10; faaopoopo le faatusilima). Ma le folafolaga, ‘O le a e maua foi lo’u Agaga, o le Fesoasoani lea, o le a aoaoina oe i mataupu tau le filemu o le malo’ (MFF 36:2; faaopoopo le faatusilima). . . .

“O amio le faaloalo i totonu o o tatou falelotu e aoga lea e fai ma faamanatu, a leai o se aoaiga. E tatau i taitai ona aoao atu faapea o le faaloalo e valaaulia ai ia faaaliga” (i le Conference Report, Oke. 1991, 27–28; po o le *Liahona*, Ian. 1992, 21–22).

Tuu atu i tamaiti o le vasega e faitau le Mataio 21:12–16 ma saili ai po o le a le mea na tupu ina ua uma ina faamamaina e Iesu le malumalu. Faaoga le saunoaga lena mai ia Elder James E. Talmage mo se fesoasoani:

“O Lona toasa na mulimuli mai ai le toafilemu o le galuega agamalu; o iina i lotoa mama o Lona maota, na o mai ai ia e tauaso ma pipili e saili ia te Ia, ma Ia faamalololo ia i latou. O le ita o faitaulaga sili ma tusiupu sa faasagasaga ia te Ia; ae sa le aoga lea. Sa latou folafolaina Lona maliu, ma faia ni taumafaiga faifaiepa ina ia maua ai o Ia, ma o iina sa nofo ai o Ia i le vaega tonu lava sa latou faia ai le faamasinoga, ma sa latou fefefe e fetagofi atu ia te Ia ona o tagata lautele, . . . ‘aua sa naunau uma tagata e faalatalata atu ia te ia.’” (*Jesus the Christ*, 528–29).



Faaali atu i tamaiti o le vasega ia ata o loo auina atu faatasi (o se ata atoa o loo i le faapoopoga, i. 299). Fesili atu:

- O le a se mea e tutusa ai nei ata?
- E faapefea ona pei le faamamaina o le malumalu o le faamaloloina o le tino i ma'i faaletino?
- E faapefea ona pei o le faamaloloina o o tatou ma'i faaleagaga? (tagai 1 Korinito 3:16–17; 6:19).

Faitau faatasi ma au tamaiti o le vasega le Moronae 10:32–33 ma uunaia i latou ina ia “o mai ia Keriso” ma ole atu ia te Ia ina ia faamamaina i latou e pei ona Ia faamamaina le malumalu i Ierusalem.

Mareko 12:41–44 (tagai foi Luka 21:1–4). Ina ia avefaapei o Keriso, e tatau ona tatou aoaoina ia ositaulaga. (20–25 minute)

Fai atu i au tamaiti o le vasega e mafaufau faapea o lo latou aso fanau leni ma o nisi e toalua o a latou uo ua tofu ma meaalofo ua tuuina atu. Na tuu atu e le tasi ia te oe le \$20 ae o le isi na tuuina atu se meaalofo e le atoa se \$2 o lona tau.

- O le fea meaalofo o le a sili ona faagaetia ai oe?
- Pe i ai ea se eseese pe afai o le tagata na tuuina atu ia te oe le \$20 e mauoia ma e leai se osigataulaga na alu ai?
- Pe i ai ea se eseese pe afai o le tagata na tuuina atu ia te oe se meaalofo \$2 e matuai mativa lava ma ua misia lana meaai o le aoauli na faasaosaina mo le tele o vaiaso ina ia mafai ona faatauina ai se meaalofo?
- O le fea uo na sili ona tele mea na ia tuuina atu?

Faitau le Mareko 12:41–44. Ia faailoa atu faapea o le tupe lea e ta'ua i le mau leni o le “tupe iti” o le tupe pito i laitiiti lava lea sa faaogaina i lea vaitaimi. Fesili atu:

- E faapefea ona pei nei fuaiupu o le tala i uo e toalua?
- O ai lea na fetalai Iesu na sili mea na ia lafo, o i latou ea e “toatele o e mauoa” po o le fafine mativa ua oti lana tane?

Ia fetufaai atu le saunoaga leni mai ia Elder James E. Talmage:

“I faamaumauga o loo tusia e agelu, e fuafuaina e tusa ai ma le faafuainumera a le lagi, o mea e tusia e fuafua i le taua nai lo le aofaiga ma o aoga e fuafuaina i le gafatia ma le faamoemoega. O e mauoa na tele mea na tuuina atu ae sili atu mea na teuina; ae o le meaalofo a le fafine ua oti lana tane na ave uma lava. E le o le laitiiti o lana taulaga na talia faapitoa ai, ae o le agaga o le taulaga ma le faamaoni o le naunautaiga sa ia tuuina atu ai. I tusi a le au tusi tusi faalelagi o le foai a le fafine ua oti lana tane sa tusia o se meaalofo na tuuina mai ma le matamau, e sili atu lona taua nai lo meaalofo a tupu. ‘Aua sa i ai le mafaufau, na taliaina e tusa ai ma le mea ua maua e le tagata, ae le tusa ai ma mea na te le'i maua’ [2 Korinito 8:12]” (*Jesus the Christ*, 561–62).

Ia talanoaina faatasi ma au tamaiti o le vasega pe mafai faapefea ona faaogaina le savali o le tala i le tupe iti a le fafine ua oti lana tane i meaalofo tatou te tuuina atu i le Alii i aso nei. Ina ia fesoasoani i au tamaiti o le vasega ia malamalama i le taua o le ositaulaga, ia talanoaina fesili nei:

- E mafai lava e le Alii ona faataunuuna Ona faamoemoega e aunoa ma ni tupe ia tatou te tuuina atu i taulaga. Aisea ua Ia moomia ai ona tatou ositaulaga ina ia fesoasoani ai i le fausiaina o le malo?
- E faapefea ona fesoasoani lau osigataulaga i le malo?
- O le a se mea a lau osigataulaga e faia mo oe?
- O le a le mea a le osigataulaga e faia i le faatuatua i le Alii?

Ia faaiiuna i le saunoaga leni mai *Lectures on Faith (Lauga i le Faatuatua)*, na tuufaatasia i lalo o le taitaiga a le Perofeta o Iosefa Samita:

“O se tapuaiga latou te le faatulafonoina le taulagaina o mea uma ua le lava le mana ua i ai e faatupu ai le faatuatua tatau ai mo le ola ma le faaolataga; aua talu mai le soifuaga muamua o le tagata, o le faatuatua e tatau ai mo le fiafia i le olaga ma le faaolataga, e le mafai lava ona maua e aunoa ma le taulagaina o mea uma faaletino. O le ositaulaga leni, ma e na o le pau lava leni, ua faauuna e le Atua ina ia tatau ai i tagata ona olioli i le ola e faavavau” (*Lectures on Faith*, 69).

Mareko 13 (tagai foi Mataio 24; Luka 12:37–48; 17:20–37; 21:5–36). Na aoaoina e Iesu Ona soo e uiga i aso mulimuli ma Lona Afio Faalua Mai. (5–10 minute)

O le vaega leni o le tala a Mareko o loo matuai auiliiliina lona tusiaina i totonu o le Mataio 24 aemaise lava i le Faaliliuga

a Iosefa Samita i totonu o le Penina Tautele (tagai Iosefa Samita — Mataio). Afai na e aoaoina lenei vaega i le Mataio, ia mafaufau e faamanatu faapuupuu atu i au tamaiti o le vasega ia mea na latou aoaoina ma agai atu loa i le Mareko 14.

Mareko 14 (tagai foi Mataio 26; Luka 22; Ioane 18:1–27). Ua faaopoopo mai e Mareko ia nisi auiliiliga i lo tatou malamalamamaaga ia Ketesemane, o le pu'eina, ma faamasinoga. (25–35 minute)

Ua tuuina mai e Mareko ni nai auiliiliga e uiga i puapuaga o Keriso ae le'i oo i Lona Fasatauroga lea e le o ta'ua i tala isi Talalelei. Ia amata i le iloilo ina faapuupuu o le taimi o le faasologa o le tala o le Mareko 14:10–31. Tuu atu i tamaiti o le vasega e faitau le Faaliliuga a Iosefa Samita o le Mareko 14:36–38, ma fesili atu:

- O a mea na mafaufau ma lagonaina e le au soo a o latou agai atu i Ketesemane?
- O le a le mea na faia e le Faola i a latou faitioga ma fesili?
- O le a sou manatu aisea na Ia aveina ai ia Peteru, Iakopo, ma Ioane e ese mai isi ma aoaiina na o i latou?
- O a isi mea na oo i ai na o Peteru, Iakopo, ma Ioane faatasi ma le Faola lea na tatau ona saunia ai i latou mo lenei po? (tagai Mataio 17:1–13; Mareko 9:2–13).

O le Mareko 14:46–52 o loo aofia ai ni auiliiliga tupito ma se avanoa mo sina galuega silisili laitiiti. Faitau na o fuaiupu na ma au tamaiti o le vasega ma ta'u atu ia i latou faapea e na o Mareko lava o loo taua mai ai le alii talavou lea na mulimuli atu ina ua uma ona pu'eina ia Iesu. E le o ta'ua mai e Mareko ia i tatou po o ai le alii talavou, ae o le Faaliliuga a Iosefa Samita o loo ta'u mai ai o le alii talavou o se soo (tagai FIS, Mareko 14:51). Fesili atu: Talu ai ona o isi soo ua latou "tuuua o ia, ma sosola" (f. 50), ae na iloa e Mareko lenei mea na tupu, po o ai lena alii talavou?(E foliga mai o Mareko lava le alii talavou.)

O le Mareko 14 o loo aofia ai foi se faamaninoga o le mea na tupu ina ua faamasinoina ia Iesu i luma o Kaiafa. Tuu atu i tamaiti o le vasega e faatusatusaina le Mareko 14:55–64 ma le Mataio 26:59–66, ma talanoaina ia fesili nei:

- Faatasi ai ma molimau pepelo uma na aumai e molimau e faasaga ia Iesu, aisea na le mafai ai e ositaulaga sili ona maua se mea e "molua ai o ia"? (tagai Mataio 26:60–61; Mareko 14:57–59).
- E faapefea ona fesoasoani lena mea ia i tatou ia malamalama ai i le mafuaaga na poloaiina ai e ositaulaga sili faapea ua molimau Iesu e faasaga ia te Ia lava?

Faatusatusa le tali atu a le Faola i ositaulaga sili o loo i tala taitasi (tagai Mataio 26:64; Mareko 14:62). E faapefea ona fesoasoani le tala a Mareko ia te oe ia e malamalama lelei ai i le mea na molimau ai Iesu ia te Ia lava? Talu ai ona o le molimau a Iesu, na molua ai o ia e tagata Iutaia i Lona upu leaga, lea e faapea mai ai se tasi o ia e pei o se atua ma o loo i ai ia mana ma uiga.

- O le a sou manatu aisea na latou le manatunatu ai o loo ta'uina mai e Iesu le mea moni?
- Aisea sa na o Iesu ai le tagata sa i totonu o le potu e le'i tausalaina i le upu leaga?

Mareko 15 (tagai foi Mataio 27:1–61; Luka 23; Ioane 18:28–19:42). O le tala a Mareko ua tuuina mai ai se malamalamaaga faaopoopo i puapuaga o Keriso ona o Pilato ma luga o le satauro. (50–65 minute)

Tuu atu i tamaiti o le vasega e faitauina le Mareko 15:1–5, ma fesili atu:

- O fea le isi mea na ave i ai e ositaulaga sili ia Iesu?
- Aisea na latou aveina atu ai Iesu ia Pilato pe afai ua latou iloina o Ia "e tatau ona oti"? (Mareko 14:64; tagai Ioane 18:31).

Tuu atu i tamaiti o le vasega e faitauina foi le Isaia 53:3–7 ma saili ai se valoaga a Isaia lea na faataunuuna i le Mareko 15:1–5. Tuu atu ia i latou e faatusatusa le Mataio 27:15–16 ma le Mareko 15:6–7 ma tali i fesili nei:

- O a nisi mea tatou te aoaoina i le Mareko i le ituaiga tagata e i ai Parapa?
- O le a sou manatu o le a se lagona na oo ia Iesu ina ua mananao ia tagata Iutaia e faasatauro o Ia ae ia faasaolotoina se tagata fasioti tagata e sui ia te Ia?
- Ta'u atu i tamaiti o le vasega faapea o le igoa *Parapa* o lona uiga "atalii o se tama." O le a se mea e le'i faamoemoeina e uiga i le filifilia e tagata Iutaia o se pagota e i ai le igoa lea? (o Iesu Keriso o le Alo o le Tama.)
- O ai sa sili ona mananao ina ia fasiotia le Alo o le Atua, o tagata Roma o e le'i talitonu i le Atua po o ositaulaga Iutaia o e sa faapea ua talitonu?
- Aisea e te manatu ai o le tulaga lea?

Faitau faatasi ma tamaiti o le vasega le Mareko 15:15–33, ma fesoasoani ia i latou e sailia ia tali i fesili nei a o outou faitauina:


- O le a le mea na faia e fitafita Roma ia Iesu? (tagai f. 15–20).
- O le a se mea atonu e mafai ona tauina mai ai ia i tatou e uiga ia i latou? (Sa latou lagolagoina ia Pilato, e mafai ona latou amio le mafaufau, latou te le'i iloina o Iesu o le Alo o le.)
- O le a le mea na faia e ositaulaga sili ma isi tagata Iutaia ia Iesu a o Ia tautau ai i luga o le satauro? (tagai f. 29–32).
- O le a se mea atonu e mafai ona tau mai ai ia i tatou e uiga ia i latou? (Sa latou vaai i tua atu o mea na vaai i ai ia Mareko, sa latou tuuina lo latou malamalamaaga e suitulaga i le ala o le iloina o Le na tuuina mai le tulafono.)
- E te manatu o gaoioiga a tagata Roma po o tagata Iutaia na sili ona faatiga ia Iesu?
- Faitau le Isaia 53:9. E mafai ona e mauaina se faataunuuga o le vaega o lenei valaauga a Isaia i soo se mea na tupu i le Mareko 15? (tagai f. 27–28).

Tusi i luga o le laupapa se siata e pei o le “O le Aso Mulimuli o le Soifuaga o Keriso” o loo maua i le faaopoopoga (i. 288) ae aunoa ma ni igoa. Tuu atu i tamaiti o le vasega e sue le Mareko 15:25–37 mo faamatalaga nei. Faailoga ia taimi ma mea na tutupu i luga o le siata a o latou mauaina.

- Pe tusa o le a le taimi na tuu ai Iesu i luga o le satauro? (tagai f. 25).
- Pe tusa o le a le taimi na ia Ia tuuina atu ai Lona tino ia oti? (tagai f. 34–37).
- Ta’u atu i tamaiti o le vasega e faapea o le sefululua itula o le aso e faitauina mai le oso o le la i le goto o le la, po o le mai le 6 I LE TAEAO i la tatou uati i le 6 I LE AFIAFI. Pe tusa o le a le umi talu ona mafatia ia Iesu i luga o le satauro?
- Afai e te faaaofia ai ia puapuaga o Iesu i le Togalaau i Ketesemane, lea na tupu i le po na muamua atu, faapea ma Ona faamasinoga, lea na alu ai le po atoa ma le taeao, o le a le umi talu ona puapuagatia ia Iesu ae le’i maliu?

Tuu atu i tamaiti o le vasega e su’e i le ata o le Togalaau i le Tuugamau, numera 18 i vaega o ata o le Tusi Paia. Faitau faatasi ma au tamaiti o le vasega le Mataio 27:57–61 ma le Isaia 53:8–9 ma talanoaina pe na faapefea ona faataunuaina e le maliu ma le falelauasiga o Iesu ia valoaga. Tuu atu i tamaiti o le vasega e faatusatusa le Mataio 27:57–61 ma le Mareko 15:42–47. Fesili atu: O a nisi mea tatou te aoaina mai le Mareko e uiga ia Iosefa, Pilato, ma le falelauasiga o Iesu?

Mareko 16 (tagai foi Mataio 28; Luka 24; Ioane 20–21). Na toetu mai Iesu Keriso mai le oti ma ua atoatoa ai le taulaga togiola mo tagata uma.
(15–20 minute)



Faaali atu pe tusi se ata o le satauro faaKerisiano ma fesili atu:

- Aisea e mafaufau ai le tele o ekalesia o le faailoga lenei o le faaKerisiano?
- Aisea e leai ai tatou?

Ia fetufaai atu le saunoaga lenei mai ia Elder Gordon B. Hinckley, a o avea ma se sui o le Korama a le Toasefululua:

“Ou te le manao e tuuina atu se faatiga i soo se tasi o o’u uso Kerisiano o loo faaaogaina le satauro i luga o o latou falesa ma fata faitaulaga o o latou falesa. . . . Ae mo i tatou, o le satauro o le faailoga lea o le Keriso o loo maliu pea, ae o la tatou savali e faalauiloa ai le Keriso soifua” (i le Conference Report, Ape. 1975, 136; po o le *Liahona*, Iulai 1975, 92).

Faitau le Mareko 16:1–11 ma fesili atu:

- O le a sou manatu aisea na faigata ai i le au soo ona talitonu ua toetu Iesu mai le oti?
- E faapefea ona avea le mea moni o Iesu le uluai tagata ua toetu mai ma auala na manino ma malamalama ai o latou masalosaloga?
- O le a se eseese e i ai pe ana faapea e le toetu mai Iesu?
- Pe faamata o le a ese se ituaiga olaga e te ola ai pe afai e te talitonu o lenei olaga ua na o le pau lea o le olaga e te ola ai? Aisea o le a ese ai pe aisea foi o le a le suia ai?

Ina ia fesoasoani e taliina nei fesili, faitau faatasi ma au tamaiti o le vasega le 2 Nifae 9:5–10. Ia fetufaai atu lau molimau i le mafanafana lea e maua mai le iloaina lea o le oti e le o le mutaaga lea.

O LE TALALELEI E TUSA MA LE FAAMATALAGA A LUKA

Tusitala: O Luka o se fomai (tagai Kolose 4:14) ma sa valaauina e avea ma se “avefeau a Iesu Keriso” (FIS, Luka 1:1). O Luka foi o se tagata o Nuu Ese (e le o se Iutaia) i lona fanau mai. O ana tusitusiga e faaalua ai na aoaina lelei o ia i le aganuu ma le gagana faaEleni. O Luka e le o se molimau vaaitino i mea na tutupu i le soifuaga o le Faola ae na masani lelei i le soifuaga ma aooga a le Faola e ala mai ia i latou o e na i ai (tagai Luka 1:2–3). Sa avea Luka ma soa ia Paulo i le tele o taimi. Na ia faimalaga faatasi ma le Aposetolo i le taimi o ana faigamalaga lona lua ma le tolu. Ina ua faafalepuipuiina ia Paulo i Roma mo le taimi lona lua, sa tumau pea ia Luka e ui lava ina ua tuua o ia e le toatele (tagai 2 Timoteo 4:11). O Luka o le tusitala foi lea o le tusi o Galuega, o se soa lea i lana Talalelei. (tagai Taiala i Tusitusiga Paia, “Luka,”.)

O e o Loo Tusi Atu Iai: Na manao Luka ina ia maua foi e Nuu Ese le malamalama lava lea e tasi o le upumoni sa ia mauaina. O lana molimau sa tuuina atu ia Teofilo (tagai Luka 1:3), o se tasi atonu sa avea ma se taitai maualuga o Roma. Ua tuuina mai e Luka ia faamatalaga ia o le a fesoasoani ai i soo se taitai ia malamalama ma talitonu i le talalelei e uiga i le Togiola.

Talaaga Faasolopito: Na muamua tusia ia Luka nai lo Galuega (tagai Acts 1:1), masalo po o le va o le T.A. 59–79.

Uiga e le Masani Ai: E le gata o le tusi pito i umi lea i le Feagaiga Fou, ae na faapoopo atu foi i ai e Luka ia manatu o se tasi e le o se Iutaia i tala a Talalelei i le soifuaga o Iesu.


“Ua tuuina mai e Mataio ia Keriso o le Tupu, o Mareko na tuuina Mai o ia o se Auauna, na tuuina mai e Ioane o Ia o le Alo o le Atua, ae ua tuuina mai o ia e Luka o le Atalii o le tagata, o le tagata -paia [e faaletino le isi vaega]. . . i le aufaatasi ai ma lona faamoemoega, na faamatalaina e Luka ia mea na sa tutupu e faaalua ai le itu faaletagata o Keriso. O le gafa paia e tau atu lava ia Atamu. O se faamatalaga auiliili o le tina o Keriso ma Lona pepe ma a o laitiiti o loo tuuina mai ai. O faataoto o loo faaafia ai e Luka e i ai sona lagona faaletagata. E ui lava ua faatulagaina ma le matagofie e Luka le tulaga faletagata o Le ua paia ae sa ia puipuia ma le faaeteete Lona silisiliese ma lona tulaga tau tupu (1:32–35)” (Merrill F. Unger ma isi, *The New Unger’s Bible Dictionary*, rev. ed. [1988], “Luka, Gospel of,” 788).

O le Talalelei a Luka o loo aafia ai le tele o mea e le o maua i isi Talalelei. O lenei vaega e masani ona taulai atu i tamaiti, o e matitiva, ma le vaega maualalo. O le molimau a Luka o loo tuuina mai ai se savali o le faamoemoe i tagata uma e ala mai i le soifuaga ma le taulaga togiola a Iesu Keriso. O lenei faamamafa e ogatasi ma le tusi o Galuega, lea e faaautu i le misiona i Nuu Ese.

Autu: O le Luka 19:10 o se aotelega lelei lea o le autu a Luka lea e faapea “Aua ua sau le Atalii o le tagata e sili ma faaola i le na le iloa.” O le molimau a Luka e faapea o Iesu o le Mesia folafolaina ma o le Faola o tagata uma.

Luka 1–3

O le Soifuaga o Iesu Keriso



Faatomuaga

“Mo le tele o augatupulaga, sa tau saili ai ma le naunautai ia tagata i le faataunuunuina o valoaga na valoia e alii amiotonu o le Atua Silisiliese. . . .

“Ona oo mai ai lea o lona po o po na oo mai ai le agelu i leoleo mamoe o loo leoleo a latou lafu, faatasi ma le folafolaga: ‘Aua o le aso nei ua fanau ai i le aai a Tavita lo outou Faaola, o le Alii ia o Keriso.’ (Luka 2:8–11.) . . .

“Faatasi ai ma le fanau mai o le pepe i Peteleema, na oo mai ai se faaeeega sili, se mana sili atu lona malosi i auupega o taua ma se ‘oa e sili atu le tumau nai lo tupe a Kaisara. O lenei tamameamea, na fanau mai i tulaga mativa, na avea ma Tupu o tupu ma Alii o alii, o le Mesia folafolaina, o Keriso lea le Alo o le Atua.

“Sa fanau i le fale o manu, ma sa moe i vaovao, na tulai a’e o ia mai le lagi ina ia ola i le lalolagai o se tagata faitino ina ia faatuina le malo o le Atua” (Thomas S. Monson, i le Conference Report, Oct. 1965, 141). O le molimau a Luka e tatalaina i se tala auiliili o mea na tutupu na siomia ai le Soifua mai o Keriso.

Suesue ma le agaga tatalo le Luka 1–3 ma mafaufau i mataupu faavae nei ae le’i sauniaina au lesonea.

O Nisi Mataupu Faavae Taa o le Talalelei e Saili Iai

- O Iesu Keriso, Ioane le Papatiso, Maria, ma isi na muai faauuina i le muai olaga e faataunuunuina ni misiona patino i le lalolagi (tagai Luka 1:5–45, 67–79; tagai foi Alema 7:9–10; 13:1–3; Aperaamo 3:22–23).
- O le fanau mai o se Faola o se vaega taua o le ata o le faaolataga (tagai Luka 1:30–33, 46–55, 67–79; 2:10–11, 25–38; 3:2–6; FIS, Luka 3:4–11; tagai foi Mosaea3:5–13; 5:8).
- E ala mai i faaaliga e mafai ona tatou mauaina se molimau ia Iesu Keriso ma mauaina le taitaiga mai le Atua (tagai Luka 1:11–22, 26–33; 2:8–15, 25–38).

- O le auai i totonu o le Ekalesia e le aumaia ai le atoatoa o faamanuiaga o le talalelei; e tatau ona tatou tausiamā ma le faamaoni a tatou feagaiga ina ia maua ai na faamanuiaga (tagai Luka 3).

Fautuaga mo le Aoao Atu

Filifili mai manatu nei, pe faaaoga ni ou lava manatu a o e saunia au lesona mo le Luka 1–3.

Luka 1:1–2:20 (tagai foi Mataio 1:18–24; Ioane 1:1–5). O Iesu Keriso, o Ioane le Papatiso, o Maria, ma le toatele o isi na muai faauuina i le muai olaga ina ia faataunuuna ni misiona patino i le lalolagi. (25–35 minute)

Faaali atu i tamaiti o le vasega ituaiga faasilasilaga eseese (mo se faaitaiga valaaulia o se faaipoipoga, faasalalauaga i se nusipepa, ma faasilasilaga o tau). Fesili atu: Afai e mafai ona e mauaina soo se faasilasilaga i le aso lenei, o le a se mea e te manao ina ia i ai? Ia valaaulia tamaiti o le vasega e faitau le Luka 1:5–17, 26–31 ma vaai mo faasilasilaga na maua e Maria ma Sakaria. Fesili atu: O a ni pogai o loo i ai i nei fuaiupu na mafua ai ona la mauaina nei faasilasilaga faapitoa?

Ia fetufaai atu i le vasega ia saunoaga nei mai ia Elder Bruce R. McConkie:

“O le tina o lo tatou Alii, o Maria, e pei o Keriso, na filifilia ma muai faauuina i le muai olaga mo le vaega sa ia faataunuuna i le ata sili o le faaolataga. O lona tofiga o le saunia lea o se tino faaletino mo le Alii Silisiliese, e tausi ma faapelepele ia te ia i lona fanau mai ma lona laitiiti, ma ia fesoasoani ia te ia mo lena misiona tele lea e na o ia e mafai ona faia. O le mea moni lava o ia o se tasi o fanau agaga sili ona taualoa a le Tama” (*Mormon Doctrine*, 471).

“E ui i le tele o tagata Iutaia i le vaeluaga o taimi sa i se tulaga o le le mautonu ma le matuai liliuese, o lea ituaiga pouliuli o le mafaufau ma le agaga sa le’i aofia ai le lalolagi atoa. E le’i lofia ai le malo atoa. O Elisapeta ma Sakaria o ni au paia amiotonu. O i laua uma o nisi e tupuga mai ia Arona, ma o Sakaria sa umia le tofi o le ositaulaga i le Perisitua Arona” (*Doctrinal New Testament Commentary*, 1:78).

Fesili atu: O le a se mea tatou te aoaoina mai e uiga ia Maria, Sakaria, ma Elisapeta mai nei faamatalaga?

Ia faailoa atu i tamaiti o le vasega o le toalua o Sakaria, o Elisapeta, e pa (e le fanau) ae o Maria o se taupou. Fesili atu:

- E faapefea ona faapoopo atu nei tulaga i le tulaga ese o nei fananau mai?
- E te silafiaina soo se tasi na fanau mai i ni tulaga ofoofogia faapea?

- O a ni manatu po o ni lagona ua fetufaai atu e ou matua ia te oe e uiga i le paia ma le faapitoa o le aumaia o se tamaititi i le lalolagi? (Maufaufau e fesili atu i se matua e asiasi atu i le vasega e fetufaai atu ai nei manatu ma lagona.)

Faitau faatasi o se vasega le Luka 1:38–55, 67–79. Fai atu i tamaiti o le vasega e taulai atu i le faamatalaina o le filemu, olioli, ma le faamoemoe sa faaalii e Maria ma Sakaria. Ona fesili atu lea:

- E faapefea ona e manatunatu i ni ou lagona o le a i ai i le avea ai ma se matua?
- E mafai faapefea ona ono faamalosia ia ituaiga lagona ona o nei tamaiti e toalua o Iesu ma Ioane le Papatiso?
- O le a se mea o loo aoaoina mai e nei fuaiupu e uiga i le faatuatua o Maria ma Sakaria?
- O a lesona e mafai ona e aoaoina mai ia i latou e fesoasoani ai i lou faatuatua ina ia faatupuina?

Tuu atu i tamaiti o le vasega e toe faamanatu mai ia tala a Mataio ma Mareko i nei mea na tutupu, ma fesili atu: O le a se mea e tulaga ese ai le molimau a Luka? Faitau le faamatalaga o loo i le “au faitau” ma “uiga e le masani ai” o loo i le Faatomuaga i le Talalelei a Luka (i. 75). Fesili atu: E faapefea ona fesoasoani lena faamatalaga ia te oe ia malamalama ai i le mafuaaga ua na o Luka ai le tusitala o loo ta’ua ia feutagaiga a Maria ma Sakaria ma se agelu?

Faaali atu se ata po o nisi mea mai se vaaiga o le Kerisimasi, ma valaaulia tamaiti aoga e faalogo a o e faitauina le Fanau mai o Keriso mai le Luka 2:1–20. Ia molimau atu i le Faaola ma faatagaina ia tamaiti o le vasega o e r mananao e fetufaai mai a latou molimau ina ia faia.

Luka 1:13. O tatalo e le masani ona taliina vave maia. O nisi taimi e tatau ai ona tatou faatali mo se taimi umia e maua ai tali i a tatou tatalo. (10–15 minute)

A maea le tatalo amata, ona fesili atu lea i tamaiti:

- Pe faafogaina ea e le Atua ia tatalo uma lava?
- Pe Na te taliina ea ia tatalo uma?
- O le a le mea e tatau ona tatou faia pe afai e le maua vave mai se tali?

Faitau le Luka 1:13. O le a le mea o loo aoao mai e lena fuaiupu e uiga i le Atua? (Na te faafogoga ma tali mai i tatalo.) Ia iloiloina le fuaiupu 5–12 ma vaai ai po o le a le umi na tatalo ai ia Sakaria ma Elisapeta ae faatoa oo mai se tali. O le a se mea o loo aoaoina mai ai oe e uiga i le taliina e le Atua o tatalo?

Ia fetufaai atu le saunoaga lena mai ia Bishop H. Burke Peterson, a o avea ma se tasi o le Au Epikopo Pulefaamalumalu:

“E faafogoga le Tama Faalelagi i tatalo uma mai lana fanau. . . . E tusa lava po o le a le mea sese tatou te faia, e faafogoga mai o ia ia te i tatou. . . .

“. . . O nisi [talosaga] e vave ona tali mai, ae o nisi e umi le taimi e faatali ai, ma o iina tonu e oo mai ia ia te i tatou le loto vaivai. . . .

“E i ai . . . taimi e oo ai i lou loto le faaletonu pe mata o le a tali mai o ia i a tatou talosaga. Pe tusa o le luasefululua tausaga talu ai na fanau mai ai le ma’ua tama teine lona fa. Ina ua uma ona fanau mai, sa tau atu e le fomai i lou toalua e le tatau ona toe maua e ia nisi tamaiti. Sa ma talanoa i lea tulaga, ma sa faapea mai lou toalua, ‘Ou te lagona o loo i ai se isi tamaitiiti mo i taua.’ Ma sa faia loa la ma’ua filifiliga e tatau lava ona toe maua e i maua se isi pepe.

“Sa mavae le tausaga e tasi, ae lei maua lava se pepe; ua faapea foi ona mavae atu le lua tausaga. Sa iu ina faapea mai se tasi o le fanau teine, ‘E te lua mautinoa e tatau ona toe i ai se isi pepe?’ Sa faapea mai lo’u toalua e mafai ona toe i ai se isi pepe, o lea sa ma o atu ai loa ma fesili atu ia te ia, ‘E te mautinoa o le a toe maua se isi a tatou pepe?’ Sa ia tali mai, ‘Ioe, ae le’i lava le umi o a tatou tatalo ma le malosi.’ O lea sa matou toe tatalo ai mo le isi tausaga, ae leai lava se pepe. Ona matou toe fesili atu foi lea: ‘E te mautinoa le mea o loo e talanoa e uiga i ai?’ ‘Ioe,’ o lana tali lea. O lea sa matou tatalo ai mo le tasi ma le lua ma le tolu ma le fa ma le lima ma le ono ma le valu tausaga! Ae te’i ua oo i se tasi aso i le laulau ai sa ia faapea mai ai, ‘E te iloa le mea ua tupu? O le a toe maua se isi a tatou pepe.’ Ua outou silasila la, o tatalo o nisi taimi e vave ona tali mai, a o nisi foi taimi e te tatalo mo le taimi umi, a o le’i maua e oe le mea e te manao i ai. . . .

“Ia faamanuia e le Alii outou ina ia faaauau pea i faamoemoega amiotonu” (“Tatalo—Toe Taumafai,” *Liahona*, Tesema 1981, 13).

Ia valaaulia tamaiti o le vasega e fetufaai atu ni o latou lagona i le iloaina lea e tali mai e le Atua ia tatalo.

Luka 1:13–17, 26–56; 3:1–22 (tagai foi Mataio 3; 14:3–5; Mareko 1:4–11; 6:17–20; Ioane 1:1–36). E mafai ona avea ia Maria ma Ioane ma faataitaiga mo i tatou. (45–50 minute)

Aumai se faata i le vasega, ma uu i luma o ni tamaiti.

- O le a se mea tou te fiafia ai i faata? O le a se mea tou te le mananao i ai?
- O le a sou popole o i ai i ou foliga vaaia? O le a se mea e te faia e taumafai ai e suia ou foliga vaaia?
- O le a le taua o lou vaaiga i fafo e faatusatusa i ou uiga ma lou ituaiga tagata i totonu? (tagai foi 1 Samuelu 16:7).

Ia talanoaina faapuupuu pe mafai faapefea e tagata lauiloa (e pei o tagata autu i televise, faaali teuga, tagata lauiloa i taaloga, po o tagata fai musika) ona faa-aafiaina ou faatulagaga. Fesili

atu: O le a le leaga atonu e tulai mai i le avea o nisi o i latou na ma tagata e te faataitai i ai? Ia molimau atu o nisi o tagata sili ona lelei e faataitai i ai o loo maua i totonu o tusitusiga paia, ma a o tatou mulimuli i a latou faataitaiga o le a mafai ai ona tatou faamallosia o tatou agaga, ae le na o le faaleleia o o tatou foliga faaletino po o mea e mafaia. O nisi o tagata lelei e toalua e avea ma faataitaiga e mafai ona tatou mulimuli i ai o Ioane le Papatiso ma Maria.

Faitau le Luka 7:28 ma vaai pe na faapefea ona faamatalaina e le Faaola ia Ioane le Papatiso. Ia fetufaai atu le saunoaga lenei mai ia Elder Bruce R. McConkie, ma valaaulia tamaiti o le vasega e faalogo mo mafuaaga na faamatalaina ai e le Alii ia Ioane i le auala na Ia faamatalaina ai.

“E toaitiiti lava ni nai perofeta e tutusa ma Ioane le Papatiso. Faatasi ai ma isi mea, o lana galuega na muai ta’uina mai e Liae (1 Nifae 10:7–10), e Nifae (1 Nifae 11:27; 2 Nifae 31:4–18), ma Isaia (Isaia 40:3); na oo mai Kaperielu mai lotoa o le mamalu e faailoa atu le oo mai o Ioane (Luka 1:5–44); o ia o le taitai mulimuli faaletulafono, na umia ia ki ma le pule i lalo o le augatupulaga a Mose (MFF 84:26–28); o lana misiona o le muamua lea e saunia le auala, papatiso, ma folafola atu le paia o le avea ai o Keriso ma Alo (Ioane 1); ma i ona po nei, i le aso 15 o Me, 1829, na toe foi mai ai o ia i le lalolagi o se tagata toetu e tuuina mai le Perisitua Arona i luga o Iosefa Samita ma Oliva Kaotui. ([Talafaasolopito—Iosefa Samita 2:66–75]; MFF 13.)” (*Mormon Doctrine*, 393).

Ta’u atu i tamaiti o Ioane o se faataitaiga lelei mo i latou o loo umia le Perisitua Arona. Faitau faatasi ma i latou le valoaga e faataata ia Ioane o loo i le Luka 1:13–17.

- O a uiga o Ioane e mafai ona e sailia o le a taua tele mo i latou o loo umia le perisitua i ona po nei? (Na ia aumaia le olioli ma le fiafia i isi [f. 14], e sili o ia i luma o le Alii [f. 15], na ia fesoasoani e saunia tagata e taliaina le Alii [f. 17].)
- Aisea e taua ai le i ai o nei uiga?
- E faapefea ona faatusatusa le taua o nei uiga i o tatou foliga vaaia?

Fesili atu i teine o lau vasega: O le a sou lagona e i ai pe afai e i ai ia i latou o loo umia le Perisitua Arona i aso nei ia uiga ia sa ia Ioane? Fai atu i tamaiti o le vasega e faitau malie le Luka 3:1–22 e vaai ai mo isi uiga po o mea na faataunuuina e Ioane ia e mafai foi e alii talavou ona faataitai i ai, ma talanoaina o se vasega.

Fesili atu:

- O le a le ituaiga tamaitai e te talitonu sa avea ai Maria?
- Faitau le 1 Nifae 11:14–15. O le a se tulaga popole tele sa ia te ia e te mafai ona taumateina e uiga i ona foliga vaaia?

Ia fetufaai atu le saunoaga lenei mai ia Elder Bruce R. McConkie e uiga ia Maria:

“A o filifilia e le Tama le atalii agaga sili ona tamalii ma amiotonu o ona atalii uma ina ia sau i le lalolagi e avea ma Ona Alo Pele i la le tino, o lea e mafai ai foi ona tatou manatu ma le mautinoa na ia filifilia lona afafine agaga sili ona agavaa ma faaleagaga mai ona afafine agaga uma ina ia avea ma tina faaletino o lona Alo e Faavavau” (*Doctrinal New Testament Commentary*, 1:85).

Fesili atu i teine i lau vasega: Aisea o le a matuai aoga ai lava le i ai o se tamaitai i totonu o tusitusiga paia e avea ma faataitaiga? Ia valaaulia tamaiti o le vasega e faitau le Luka 1:26–56, ma fesili atu:

- O a uiga o Maria e te manatu e aoga ona faataitaia? (Sa mama o ia [f. 27, 35], sa faatasi le Alii ma ia [f. 28], sa avea o ia ma se auuana lotomauualalo [f. 38], sa ia viia le Alii [f. 46–47].)
- O le fea o na uiga e sili ona e manao ia maua?
- O le a se mea e mafai ona e faia ina ia atinaeina ai na uiga?

Fesili atu i tama: O le a so outou lagona pe afai e maua e tamaitai talavou o aso nei ia uiga o Maria? Ia valaaulia teine e tauloto mai le Autu a Tamaitai Talavou (tagai *Tusi Taulima a Tamaitai Talavou* [1995], i. 4). Fesili atu: O a uiga o loo faaalua i lena autu e te manatu sa ia Maria?

Ta’u atu i tamaiti o le vasega o le auala na ola ai ia Ioane ma Maria na fesoasoani e faalatele ai le ata o le faaolataga. Sa la’ua saunia le ala mo le fanau mai ma le galuega a Iesu Keriso. O a la galuega maoae na faamoemoe e faateleina ai le mamalu o le Faaola, ae le o la’ua. Ia molimau atu faapea o le auala tatou te ola ai e sili atu ona taua nai lo o tatou foliga i fafo. Ia faasino i le faata ma uunaia ia tama e taumafai e “toe tomanatu” i mea na latou aooina e uiga ia Ioane i o latou lava olaga, ma uunaia ia teine e toe tomanatu i uiga o Maria.



Luka 1–3 (tagai foi Mataio 3; 14:3–5; Mareko 1:4–11; 6:17–20; Ioane 1:1–36).

O i latou uma e mauaina se molimau ia Iesu Keriso e tatau ona tuuina atu le molimau ia te Ia i isi i upu ma galuega. (35–40 minute)

Fai atu i tamaiti e toe manatunatu ma fetufaaai mea na oo i ai lea na latou lagonaina ai le Agaga a o tuuina atu se molimau a se tasi.

- O le a le mea na molimau ai le tagata?
- O a ni auala na aafia ai lou olaga i le molimau?

Tuu atu i tamaiti o le vasega e mafaufau po o le a so latou manatu i le mea e sili ona taua ina ia molimau atu ai. Fai atu ia i latou e tusi a latou molimau i se fuaiupu se tasi pe lua i luga o se fasi pepa, ma valaaulia i latou e fetufaaai atu mea na latou tusia.

O mataupu muamua e tolu o Luka o loo aafia ai ia molimau a nisi o tagata:

Maria	Luka 1:46–55
Sakaria	Luka 1:67–79
o le agelu i le vao	Luka 2:10–12
o ’au mai le lagi	Luka 2:13–14
o leoleo mamoe	Luka 2:20
Simeona	Luka 2:29–35
Ana	Luka 2:38
Ioane le Papatiso	Luka 3:4–6; FIS, Luka 3:4–11
Tama Faalelagi	Luka 3:22

Ia valaaulia tamaiti o le vasega e iloiloaina nei molimau ma mafaufau po o le a le mea e tutusa ai. Fesili atu:

- Aisea e taua ai le taulai uma atu o nei molimau i le Faaola?
- E faapefea ona faamanuiaina lou olaga i le avea o Iesu Keriso ma se faavae o lau molimau?
- O le a le mea e le talafeagai ona tautala i ai pe a tatou tutu atu e faailoa atu o tatou tagata i sauniga molimau?

Ia fetufaaai atu le saunoaga lena mai ia Elder Henry B. Eyring, o se sui o le Korama a le Toasefululua, e uiga i le mea e aloese mai ai a o tuuina atu se molimau:

“O i latou o e ua saunia faalelei mo le sauniga molimau ma le anapogi . . . latou te le faia ni lauga po o ni timaiga po o ni lipoti o malaga, pe taumafai foi e faafiafia tagata a o latou molimau atu. Ona ua uma ona latou faaali atu le faafetai i tagata i ni tulaga patino, e le manaomia ai la e i latou ona fai lena mea i luma o tagata. E le manaomia ai foi ona latou lagona e tatau ona latou faaaogaina se gagana maotua pe tautala umi foi . . .” (i le Conference Report, Oke. 1996, 43; po o le *Liahona*, Ian. 1997, 32).

Afai e lava sou taimi, ona valaaulia lea o tamaiti o le vasega e toe faitau ia mau o loo lisiina i le siata e vaai ai mo le mea na faia e nei tagata ina ia maua ai se molimau. (Mo se faataitaiga, na mauaina e leoleo mamoe a latou molimau a o latou faataunuuina a latou galuega o aso faipea. Na mulimuli ia Simeona i le Agaga ma sa maua ai i totonu o le malumalu. Sa anapogi ma tatalo ia Ana.) Ia uunaia tamaiti o le vasega e taumafai ina ia ola i se ituaiga auala e mafai ai ona latou maua pe faamallosia a latou molimau.

Luka 2:40–52. E ui lava sa leiloa e matua o Iesu le mea sa i ai o Ia, ae sa Ia faia pea le finagalo o Lona Tama o i le Lagi. (35–40 minute)

Fesili atu i tamaiti o le vasega pe i ai se tasi o i latou na leiloa. Afai na i ai, ona fai atu lea ia i latou e faamatala mai o latou lagona ina ua latou iloaina ua leiloa. Afai e leai, ia fai atu ia i latou e manatunatu po o a ni lagona e i ai pe a leiloa. Fai atu ia i latou e manatunatu i le avea ai ma se matua ua leiloa sana tama.

- O le a sou manatu o le a se lagona e oo i se matua?
- Pe e te manatu o le a sili atu pe faaitiitia le popole pe afai e leiloa lau tama i lo outou vaiaai po o le leiloa a o outou i ai i se faigamalaga e mamao ese mai le fale?

Tuu atu i tamaiti o le vasega e faitauina le Luka 2:40–45 ma vaai ai po o ai na leiloa.

- O le a sou manatu i le lagona na oo ia Maria ma Iosefa ina ua leiloa ia Iesu?
- O fea atonu e o atu i ai ou matua e saili ai oe pe afai e te leiloa?
- O le a le mea e faaalua mai e le nofoaga e mafai ona maua soo i ai oe ona faaalua mai ai le ituaiga tagata e i ai oe?
- Faitau le Luka 2:46. O fea na maua ai e Iosefa ma Maria ia Iesu?
- Faitau le Mataupu Faavae ma Feagaiga e 109:12–13. E tusa ai ma nei fuaiupu, aisea ua avea ai pea le malumalu ma se nofoaga lelei e “saili i ai Iesu”?
- O le a le mea e faaali mai i le ituaiga tagata e i ai Iesu Keriso ina ua mauaina i totonu o le malumalu, e tusa lava pe faatoa sefululua ona tausaga?
- Faitau le Mataupu Faavae ma Feagaiga 101:22. E faapefea ona faatatau lenei fuaiupu i lenei tala?

Ia valaaulia tamaiti o le vasega e faitau le Luka 2:43–51 ma vaai ai mo faamaoniga o le maoae o le Faaola a o tamaitiiti o Ia. Fai atu i tamaiti o le vasega e mafafau i fesili nei:

- E tusa ai ma nei fuaiupu, o le a le lelei o Iesu i le avea ai ma se atalii?
- O le a se faamaoniga o loo i ai iina sa faatuatuaina o Ia e Ona matua?
- Faitau le Faaliliuga a Iosefa Samita o le Luka 2:46. O le a se mea e faaopoopo mai e nei fuaiupu i lo tatou malamalamaaga i le Faaola?
- O le a le faamaoniga o loo i ai iina ua uma ona silafia e Iesu po o ai o Ia?

Faitau le saunoaga lenei e uiga ia Iesu mai le Perofeta o Iosefa Samita:

“A o tamaitiiti lava o ia sa ia te Ia le atamai uma e manaomia e mafai ai e Ia ona pulea ma taitaia le malo o Iutaia, ma e mafai ona fefinuai ma fomai atamamai ma popoto o le tulafono ma le lagi, ma avea a latou teori ma mataupu e foliga mai o se mea faavalevatea e faatusatusa i le atamai sa Ia umia; ae sa nao Ia o se tamaitiiti, ma e leai sona malosi e puipuia ai o Ia lava; ma sa oo foi i le malulu, fia ai ma le oti” (*Teachings of the Prophet Joseph Smith*, 392).

Ia uunai tamaiti o le vasega e mulimuli i le faataitaiga a Iesu e ala lea i le usiusitai i le finagalo o le Tama Faalelagi, aemaise lava a o i ai i lo latou talavou. Ia talanoaina ma tamaiti o le

vasega nisi o auala e mafai ona tatou “i ai i le galuega a lo [tatou] Tama” i aso nei.

Luka 3 (tagai foi Mataio 1:1–16; 3; 14:3–5; Mareko 1:4–11; 6:17–20; Ioane 1:1–36). O le na ona auai i le Ekalesia e le aumaia ai le atoatoaga o faamanuiaga o le talalelei; e tatau ona tatou tausia ma le faamaoni a tatou feagaiga ina ia maua ai na faamanuiaga. (10–15 minute)

Fesili atu i tamaiti o le vasega:

- E toafia nisi o outou ua faalogo o outou o se augatupulaga filifilia ma na filifilia outou tou te o mai i aso mulimuli?
- O le a so outou talitonuga o le a le uiga o lena faamatalaga?
- O a tiutetauave e oo mai ona o le avea o outou ma se vaega o lenei augatupulaga?

Faitau le saunoaga lenei mai ia Peresitene Iosefa Filitia Samita:

“E mafai ona ou faapea atu nei ia i latou uma o e ua faagaloina le lalolagi ma auai i le Ekalesia, faapea ma tagata uma o le Ekalesia, o le na o le auai i le Ekalesia o le a le mautinoa ai ia le atoatoaga o faamanuiaga o le talalelei pe faamaonia ai le ulufale atu i le malo selesitila. A maea le papatisoga e tatau ona tatou tausia ia poloaiga ma tumau e oo i le iuga” (i le Conference Report, Oke. 1970, 7).

Fesoasoani i tamaiti o le vasega e vaai ona e talu ai e taua le auai i le Ekalesia, o le “filifilia” o le a le fesoasoani lea ia i tatou pe afai tatou te le faamaoni ma le agavaa. Fesoasoani ia i latou ia malamalama e le lava lo tatou toaaga i le Ekalesia. E ao foi ona tatou “toaaga i le talalelei.”

Ia faaali atu i tamaiti o le vasega o Iesu na fanau mai i le gafa o Aperaamo e ala lea i le iloiloa o tootoo o Lona gafa o loo i le Luka 3:23–38.

- Faitau le Kenese 22:15–18. Aisea na taua ai ia Iesu le avea ma se tasi e tupuga mai ia Aperaamo?
- Faitau le Aperaamo 2:9–11. O a faamanuiaga o loo avanoa mo i latou o e tupuga mai le gafa o le feagaiga?

Aoao tamaiti o le vasega faapea o tagata i taimi o Iesu sa le malamalama i le feagaiga a Aperaamo. Latou te manatu ona o i latou o le aiga o Isaraelu e otometi lava ona latou mauaina ia faamanuiaga a Aperaamo.


- Faitau le Luka 3:7–8. O le a le mea o loo aoao mai e nei fuaiupu e uiga i le le malamalama o tagata Iutaia?
- E mafai faapefea e le fuaiupu e 8 ona faatatauina i tagata o le Ekalesia i aso nei?
- O le a le mea e faaopoopo mai e le fuaiupu e 9 i lo tatou malamalamaaga i nei fuaiupu? (Afai tatou te le fua mai ni fua lelei e ala i le tausia o a tatou feagaiga, e tusa lava po o le a lo tatou gafa, o le a tatou le mauaina ia faamanuiaga o le talalelei ae o le a tulua i tatou i fafo.)

Ia valaaulia tamaiti o le vasega e faitau le Luka 3:10–22 ma vaai po o le a le mea e mafai ona tatou faia ina ia agavaa ai i le tiutetauave o le avefa ma “augatupulaga filifilia.”

Luka 4–6

O le Soifuaga o Iesu Keriso

O mea na tutupu i nei mataupu e foliga mai na tutupu lava i leni vaiatai



Faatomuaga

O le amataga o le galuega a Iesu Keriso o loo tusia i le Luka 4–6. O le taimi lea na valaauina ai e le Faola Ana Aposetolo, aoao atu ma faamalolo i le itu atoa o Kalilaia, ma faailoa atu agasala a tagata ma tu ma aganuu sese. O lona faamamafaina o le aai ma tagata agasala, faamagaloina o agasala, ma le musu e aoao atu ma faamalolo e tusa ai ma aganuu sese na faateia ai le toatele o taitai faalelotu i Ona aso. E ui i lenei mea, na toatele lava tagata sa iloina Lona paia ma le mana ma avefa ai ma Ona soo.

Suesue ma le agaga tatalo le Luka 4–6 ma mafaufau i mataupu faavae nei ae le'i sauniaina au lesona.

O Nisi Mataupu Faavae Tava o le Talalelei e Saili Iai

- E mafai ona tatou aloese mai faaososoga e ala i le mulimuli i faaitaiga a Iesu ma faalagolago i tusitusiga paia (tagai Luka 4:1–13; tagai foi Alema 11:23; Helamana 15:7–8).
- E tatau ona tatou lagolagoina o tatou taitai faalekalesia ma mulimuli i a latou fautuaga musuia (tagai Luka 4:14–30; tagai foi Eperu 13:17; MFF 1:14, 38).
- Na alolofa soo o Keriso ia te Ia ma sa naunau e tuuese uma mea a le lalolagi ae mulimuli ia te Ia (tagai Luka 5:1–11; 6:27–45).
- O i latou o e faatinoina le faatuatua, lotomaulalo, ma o mai ia Keriso e mafai ona aveeseina o latou tiga ma puapuaga (tagai Luka 5:12–13); e faamagaloina a latou agasala (tagai Luka 5:18–26); ma e faamanuina pe a latou matitiva, fia aai, po o le sauaina (tagai Luka 6:20–23).

Fautuaga mo le Aoao Atu

Filifili mai manatu nei, pe faaoga ou lava manatu, a’o e sauniaina ia lesona mo le Luka 4–6.

Luka 4:1–13 (tagai foi Mataio 4:1–11; Mareko 1:12–13). E mafai ona tatou aloese mai faaososoga e ala lea i le mulimuli i faaitaiga a Iesu Keriso ma le faalagolago i tusitusiga paia. (15–20 minute)

Fesili atu i tamaiti o le vasega: Afai e i ai se mea e tasi e manao i ai ina ia faamanuina ai le lalolagi atoa, o le a lena mea? Ia lisi tali i luga o le laupapa. Afai e leai se tasi na te ta’uina maia, ia uu i luga se pepa o loo i ai upu “Taofi Satani mai le Faaososoina o i Tatou” ma fesili atu: O le a se tele o le fesoasoani o le a i ai lenei mea i tagata? Faitau le Aperaamo 3:24–25 ma vaai mo le mafuaaga e tasi na faatagaina ai e le Alii ia Satani e faaososoina i tatou.

- Faitau le Luka 4:13. O le a le mea o loo aooina mai e lenei fuaiupu ia i tatou e uiga i le faaososoga?
- Faitau le 1 Nifae 22:26. O le a le mea e faatapulaaina ai le mana o Satani?

Faitau le saunoaga leni mai ia Elder James E. Faust:

“Ae ui i lea, e le tatau ona taofia i tatou i le fefe i le malosi o Satani. E leai se mana o Satani e mafai ona taofia i tatou vagana ua tatou faatagaina o ia. O ia o se tagata palaai, afai tatou te tumau o le a solomuli o ia. Na fautua mai le Aposetolo o Iakopo: ‘O le mea lea ia outou gauai ai i le Atua. Ia tetee i le tiapolo, ona sola ese ai lea o ia ia te outou’ (Iakopo 4:7). E le mafai ona ia iloa o tatou mafaufauga vagana ua tatou ta’u atu i ai. Ma sa faapea mai ia Nifae ‘aue e leai sana pule i loto o le nuu o e ua amiotonu (tagai 1 Nifae 22:26)’ (i le Conference Report, Oke. 1987, 43; po o le *Liahona*, Ian. 1988, 35).

Ia valaaulia tamaiti o le vasega e faamatala ia faaitaiga o taimi na fesoasoani ai o latou mafaufauga amiotonu po o amioga e taofia ai le mana o Satani.

Afai na e faaogaina le fautuaga e aoao atu ai mo le Mataio 4:1–11 (i. 25), ia faamanatu i tamaiti o le vasega le tala i le moli ‘aina ma fesili atu ia i latou mea na latou manatuina mai lena lesona e uiga i le taulimaina o faaososoga. Faitau le Luka 4:1–13 ma fesili atu: O le a le mea na faia e Iesu i nei fuaiupu e tetee atu ai i le faaososoga? Fai atu i tamaiti o le vasega e tomanatu i fesili nei:

- Pe ua e lelei nei la i le teenaina o faaososoga nai lo le mea sa e i ai i le masina ua tuana'i? i le tausaga ua tuana'i?
- O le a le mea na e maua ai le malosi e tetee ai ia faaososoga?
- O le a le mea e mafai ona e faia ina ia faaleleia ai le teteina o faaososoga i le lumanai?

Luka 4:14–32 (tagai foi Mataio 4:12; Mareko 1:14, 21–22; Ioane 4:3). E tatau ona tatou lagolagoina o tatou taitai faaleEkalesia ma usiusitai i a latou fautuaga. (25–30 minute)



Faali atu le ata o Iesu Keriso o loo lauga i totonu o le sunako i Nasareta (tagai faaopoopoga, i. 300). E aunoa ma le ta'uina atu o le mea o loo faaalua mai le ata, ia valaaulia ia tamaiti o le vasega e sailia ia mau mo faamaoniga i le mea sa i ai le Faola ma le mea sa ia faia.

- Mai le ata, o le a sou manatu, o a ni lagona o tagata sa faatasi ma Ia?
- O le a le mea e sili ona e fiafia i ai i le ata?

Fai atu i tamaiti o le vasega e faitau le Luka 4:16–21 ma vaai mo le fuaiupu lena o loo faaalua mai le ata.

- O le a le aai na tutupu ai nei mea? (tagai f. 16).
- O le a le sootaga i le va o le Faola ma nei tagata?
- O le a “le tusi a le perofeta o Isaia”?

Ia faailoa atu i tamaiti o le vasega faapea o le “Esaia” o le faaEleni lea o le igoa “Isaia.” Faasino i latou i le Isaia 61:1(1-2) e iloa ai le fuaiupu sa faitauina e Keriso. Vaevae ia mau nei i tamaiti o le vasega ma tuu atu ia i latou e sailia po o ai na faataunuina ia le valoaga a Isaia: Mataio 9:27–31; 11:5; Luka 5:18–24; Galuega 10:38.

Ia faamalamalama atu faapea o upu a Isaia na matuai malamalama ai tagata Iutaia o le faaMesia, ma sa vavalo i se Faola o le a oo mai. Faitau le Luka 4:22–24 ma fesili atu:

- Na faapefea ona tali atu tagata i le faasilasilaga a le Faola o Ia o le Mesia folafolaina?
- O le a sou manatu aisea na latou teenaina ai Lana molimau?
- Aisea atonu e faigata ai ona taliaina se tagata na outou tutupu a'e faatasi e avea o se taitai filifilia?
- E mafai faapefea ona faatatau lenei mea ia i tatou i aso nei?

Faali atu se ata o le perofeta o loo i ai nei. Ia valaaulia le vasega e faamatala mai ia uiga o le perofeta e tulaga ese lava i isi tagata, ma lisiina i luga o le laupapa. Ia faia foi se lisi o uiga e patino lava ia te ia ma lona valaauga. Ta'u atu i tamaiti o le vasega o le perofeta e tele lava auala e pei ai o isi tagata. Fesili atu:

- E faapefea ona avea lenei mea ma pogai e faigata ai i nisi tagata ona taliaina ana upu?
- Pe avea ea le faigofie po o le faigata o le mea e talosaga mai ai le perofeta e fai ma esesega i le auala tatou te faalogo atu ai ia te ia? Aisea?

Faitau le Mataupu Faavae ma Feagaiga 1:38 ma fesili atu i tamaiti o le vasega e fuafua pe faapefea ona faatatau lenei fuaiupu i o latou taitai i iunite (mo se faaitaiga o matua, epikopo, peresitene o le siteki). Ia fetufaai atu le saunoaga lenei mai ia Elder James E. Faust:

“O tagata o le Ekalesia . . . o e tumau i le faatuatua . . . latou te talia ma le fiafia le silisiliese o le Atua ma faalagolago i tusitusiga paia ma fautuaga a Ana auauna, o taitai o le Ekalesia. O nei taitai o le Ekalesia o tagata e i ai vaivaiga, e le atoatoa foi i lo latou atamai ma faaiuga latou te faia. Aua e leai se tagata e atoatoa i le lalolagi. Peitai o nei taitai faamaoni, loto mauualo, ma le agaga tatalo ua faia a latou galuega i le agaga faaKerisiano i le mea sili latou te mafaia. O le mea sili ona taua, ua umia e i latou le pule paia e mafai ai ona oo mai faamanuiaga sili o le faavavau i e latou te lagolagoina ma mulimuli ia i latou. O i latou o auauna moni a le Atua” (i le Conference Report, Oke. 1985, 8; po o le *Liahona*, Ian. 1986, 4–5).

- Faitau le Luka 4:25–32. O a faamanuiaga na le maua e tagata ona o o latou uiga na faaalua i aoaoga a le Faola? (Na tuua e le Faola i latou.)
- Aisea na le fiafia ai tagata o Nasareta ina ua faatusatusa e le Faola ia Isaraelu i le taimi o le fafine Sarefata ua oti lana tane ma Naamanu le lepela?

Toe iloilo le tala i le fafine Sarefata ua oti lana tane i le 1 Tupu 17 ma le tala ia Naamanu le Lepela i le 2 Tupu 5:1–14. Faaoga le faamalamalama leni mai ia Elder Bruce R. McConkie e fesoasoani ai i tamaiti o le vasega ia malamalama i le mafuaaga na siitia mai ai e le Faola nei tala:

“E mau le atamai o le filifilia e Iesu o ana faaitaiga! O nei perofeta uma anamua, sa le faamamaluina e o latou lava tagata, sa tuuina atu ia faamanuiaga silisili i luga o tagata ese. O lea o tagata Nasareta; o isi, ae le o i latou, na vaai i nei galuega ofoofogia” (*Doctrinal New Testament Commentary*, 1:162).

- O a ni auala tatou te tutu ai i se tulaga faaletonu i le le mauaina o faamanuiaga a le Alii pe afai tatou te le taliaina le Faola po o Ana auauna?
- Aisea o le a le fesoasoani ai lo tatou auai i le Ekalesia a le Alii ia i tatou pe afai tatou te le tausia Ana poloaiga?

Faamanatu atu i tamaiti o le vasega le autu ma uiga tulaga ese o le Talalelei a Luka (tagai itulau 75). Ia faailoa atu pe faapefea ona avea leni tala, lea e na o Luka e maua ai, o se

vaega taua o le molimau a Luka faapea o Iesu Keriso o le Faaola o tagata uma.

Luka 5:1–6:49 (tagai foi Mataio 4:18–22; 5–7; 10:2–4; Mareko 1:16–20; 3:13–19). Sa alofa ma mulimuli soo o Iesu Keriso ia te Ia ma ua naunau e tuuese mea a le lalolagi. (10–15 minute)

Fai atu i tamaiti o le vasega e mafaufau i se tasi latou te iloina sa auauna atu faamisiona pe o loo faamisiona nei. Fesili atu:

- Aisea na ositaulaga ai nei faifeautalai ina ia mafai ona auauna atu i le Alii?
- O le a se faigata o na osigataulaga e te manatu na oo i ai?

Fai atu i tamaiti o le vasega e faatusatusa le Luka 5:1–11 ma le Luka 5:27–28.

- O le a se mea e tutusa uma ai nei tagata i totonu o fuaiupu nei e lua?
- O le a se mea e tutusa ai i latou ma faifeautalai e te iloina?
- O a ni auala e faauigaina ai le avea ma soo o Iesu Keriso o le osia o ni osigataulaga i nisi o taimi?
- O a ni mea ua e tuueseina ina ia avea ai ma se soo o Iesu Keriso?
- E faapefea ona avea le “tuueseina” mea a le lalolagi ina ia mafai ona mulimuli ai i le Alii ma se faamanuiaga?

Faali atu se ata o Iesu Keriso ma talanoaina po o a ni tulaga e ono oo i ai i le avea ai ma se tasi o Ana tamaitiiti o le vasega. Faitau le Luka 6:17–19 ma fesili atu:


- Aisea na mananao ai tagata e pa’i atu ia te Ia?
- E faapefea ona tutusa le mea lenei ma le vaega o loo i le 3 Nifae 11:12–16?

Fai atu i tamaiti o le vasega e mafaufau i le malolosi o o latou manaoga ina ia i ai i le taimi e faatasi ai le Faaola. Tuu atu ia i latou ni nai minute e faitau lemu ai le Luka 6:20–49 ma ia mafaufau loloto po o a Ana aoaoga i nei fuaiupu o le a sili atu ona taua ia i latou a o latou taumafai e avea ma Ona soo. Ia faataga atu tamaiti o le vasega e fetufaai mai a latou molimau.

Luka 7–9

O le Soifuaga o Iesu Keriso

O mea na tutupu i nei mataupu e foliga mai na tutupu lava i lenei vaaitaimi



Faatomuaga

O le Luka 7–9 o loo molimau mai i le alofa ma le manatu mai o le Faaola. Sa Ia faamaloloina ma le agalelei ia e mama’i, toefaatuina tamaiti ma i le oti, faamagaloina ia tagata agasala na salamo, faafilemuina ia matagi, tuliese ia temoni, fafagaina le fia afe o agaga fia aai i meaai ma upu o le faaolataga, ma aoaoina ma saunia Ana Aposetolo. O nei mea na tutupu na taitaiina ai ia Luka e tusia e faapea na “matua ofo tagata uma i le vavega o le Atua” (Luka 9:43). O upu o le viiga “Ou te Tu ma Ofo” e foliga mai e talafeagai lelei pe a mafaufau i nei vavega:

*Ou te tu ma ofo i le alofa o Iesu,
Ma le leiloa le ala ua alofa ai ia te a’u. . . .
Ou te ofo i lona afio mai i luga
E laveai a’u se ua faalogogata,
Ma ua ia alofa i se ua pei o a’u nei,
Ua lava Ia na te faaola ma faapaia. . . .
E maeu lava, maeu naua!
(Viiga, nu. 107)*

A o e faitauina nei mataupu ia vaai pe faapefea ona fesoasoani nei vavega ia te oe ina ia malamalama lelei ai ma talisapaia le alofa o le Faaola.

Suesue ma le agaga tatalo le Luka 7–9 ma mafaufau i mataupu faavae nei ae le’i saunia au lesona.

O Nisi Mataupu Faavae Taua o le Talalelei e Saili Iai

- O Iesu Keriso e i ai le mana e faamalolo ai e mama’i, toefaatu mai ai e ua oti, pulea ai elemene, ma faamagaloina ai e ua agasala (tagai Luka 7:1–18, 36–50; 8:22–36, 41–56; 9:37–42). E mafai ona Ia tuuina atu le mana o Lona perisitua i luga o isi (tagai Luka 9:1–2).
- Pe a tatou salamo, ua tatou atinaeina se alofa loloto ma le loto faafetai mo lo tatou Faaola (tagai Luka 7:36–50; tagai foi Alema 36:20–21).
- O a tatou molimau e faatupulaia a o tatou faafailleina e ala i le faatuatua, ositaulaga, onosai, usiusitai, ma tetee atu i faaososoga (tagai Luka 8:4–18).
- O i latou o e “faamaimauina o latou ola” e ala lea i le osiatulagaina o o latou manaoga faaletagata ma mulimuli atu i le Atua o le a maua le ola e faavavau (tagai Luka 9:1–6, 23–27, 57–62; FIS, Luka 9:24–25; tagai foi Luka 17:31–33).
- O e amiotonu e filifilia e le Atua e mafai ona mauaina le anoanoai o asiasiga faalelagi (tagai Luka 9:28–36; tagai foi 1 Nifae 11:1–11; Mose 1:1–6; Talafaasolopito—Iosefa Samita 2:14–17).

Fautuaga mo le Aoa Atu

Filifili mai manatu nei, pe faaoga ni ou lava manatu, a o e sauniaina au lesona mo le Luka 7–9.

Luka 7:1–17 (tagai foi Mataio 8:5–13). E mafai ona tatou fesoasoani i isi e o mai ia Keriso e ala i le faatuatua, alofa, ma e auauna atu. (25–30 minute)

Ia iloilo ina faapuupuu fatasi ma tamaiti o le vasega le tala a le Tusi a Mamona i Aneti-Nifae-Liae (tagai Alema 23–25). Ta’u atu i tamaiti o le vasega faapea o nei tagata e maoae le faatuatua o e na aumaia ia Iesu Keriso e se vaega o faifeautalai o e sa alolofa ma auauna atu ia i latou. Ia valaaulia tamaiti o le vasega e faitau le Alema 27:4, ma fesili atu: E tusa ai ma lenei fuaiupu, o le a le fuaitau lea o loo faamatalaina mai ai le auala na tausia ai e Aneti-Nifae-Liae ia Amona ma ana soa faifeautalai? Tuu atu i tamaiti o le vasega e faitauina le Alema 26:11–14, 26–29 e vaai ai po o le a le mea na faia e nei faifeautalai na talafeagaia i ona ta’ua i latou o “agelu na auina mai le Atua.”

Tusi upu *faatuatua, alofa, ma le auauna atu* i luga o le laupapa. Fesili atu: Tou te talitonu sa umia e nei faifeautalai ia nei uiga e tolu? Aisea? Fesili atu i tamaiti o le vasega e faamatala atu se tagata sa malosi sona aafiaga i o latou olaga o e latou te manatu i ai o se “agelu.”

- Na faapefea ona suia e lenei tagata lou olaga po o le olaga o se isi tagata?
- Na faapefea ona faaalua e lenei tagata le faatuatua, alofa, ma le auauna atu?
- O le a se auala na faatinoina ai lena vaega i le uunaiga a lenei tagata ia te oe?

Ia valaaulia tamaiti o le vasega e faitau le Luka 7:1–17 ma vaai ai mo isi tagata na aumai ia Iesu Keriso. Fesili atu:

- O a vavega na tutupu i olaga o le auauna a le taitai o le toaselau ma le tama a le fafine ua oti lana tane?
- O a faamaoniga o le faatuatua, alofa, ma le auauna atu o loo e vaaia i nei tala?
- O a lagona na oo ia te oe e uiga i le Faola a o e faitauina nei tala?

Ia molimau atu i le alofa o le Faola ma e na o Lona mana ma lo latou faatuatua e mafai ona tutupu ai nei vavega.

- O a vavega na tutupu i olaga o le taitai o le toaselau ma le fafine ua oti lana tane?
- E faapefea ona ese nei vavega mai vavega na oo i le auauna ma le tama a le fafine?
- Afai o oe o le taitai o le toaselau po o le fafine ua oti lana tane, e faapefea ona aafia lou olaga i nei vavega?

Mafaufau e faitau atu i le vasega ia faamatalaga nei e faatatau i le alofa, auauna atu, ma le faatuatua pe tufatufaina atu foi:

Alofa ma le Auauna Atu

O le manatu alofa o se “lagona alofa lea i ootiaga o isi faatasi ai ma le naunau e faamamaina” (*Merriam-Webster’s Collegiate Dictionary*, 10th ed. [1993], “compassion,” 234). O le manatu alofa e uunaia ai

i tatou e tuuina atu le auaunaga i e matitiva ma e le tagolima. Afai tatou te mulimuli i le faataitaiga a Iesu ma auauna atu ia i latou o e o loo mafatia, o le a latou maua se faaola totoga ma faamanuiaga. Ae o i latou foi o loo auauna atu o le a mauaina ia faamanuiaga o le olioli, fiafia, faamalieina, ma le faamagaloina (tagai Mosaea 4:26). Afai e ao ona tatou pei o Iesu, o le auaunaga tatou te tuuina atu i isi e tataua ona uunaia e le alofa mama o Keriso. Na aoao mai ia Elder Dallin H. Oaks o le Korama a le Toasefululua:

“E oo lava i galuega sili ona faigata o le auauna atu—e pei o le tuuina atu o a tatou mea lelei e fafagaina ai e matitiva—e leai sa tatou mea e maua mai ai seiloga e uunaia la tatou auaunaga i le alofa mama o Keriso” (i le Conference Report, Oke. 1984, 16; po o le *Liahona*, Ian. 1985, 14).

Na aoao mai ia Elder Thomas S. Monson:

“I totonu o le Feagaiga Fou a lo tatou Alii, atonu e leai se isi tagata faaootia loto o se “tina faamanuiaina” nai lo le tala i le manatu alofa o le Matai mo le tina faanoanoa ua maliu lana tane i Naina. . . .

“E maeu le mana, e maeu le agalelei, e maeu le alofa na faaalua e lo tatou Matai ma lo tatou faataitaiga. O tatou foi, e mafai ona faamanuia atu pe afai tatou te mulimuli i lana faataitaiga mamalu. O avanoa o loo i soo se mea. E manaomia ni mata e vaai ai i tulaga e alofa i ai, o taliga e faalogo ai i aioiga filemu a se loto ua nutimomoia. Ioe, faapea ma se agaga ua faatumulia i le alofa lea e mafai ona tatou fesootei atu i ai e le gata o le vaai o mata po o le lagonaina o le leo, ae faapea foi i tulaga taualooa a le Faola, o le loto i le loto” (i le Conference Report, Oke. 1973, 29; po o le *Liahona*, Ian. 1974, 31).

Faatuatua

O le faatuatua o se mataupu faavae o le mana. E mafai e Iesu Keriso ona faia mea uma mo i latou o e faatuatua ia te Ia. Na faamalamalamaina mai e Elder John K. Carmack, o se sui o le Au Fitugafulu e faapea:

“e ui lava o le faatuatua e masani ona aofia ai ma le mafaufau lelei, ae o se mea e matua sili atu i lo lena. O le faatuatua e maua mai ai le fesoasoani faalelagi, ma o se faaalua lea o le au faatasi ma le ave ma soa faatasi ma le Alii. E oo lava i manatu ma upu e faagaoioia e le faatuatua, e oo mai e ui mai musumusuga a le Agaga Paia, ma o le malosi e faataunuu ai upu, e faagaoioia lea e le faatuatua e sau mai le Atua. . . .

“. . . O le faatuatua e le o se auupega faapitoa lava a le perisitua. Sa le umia e le taitai o le toaselau a Roma le perisitua, ae na ala atu i le faatuatua ona ia ole atu i le Alii ia faamaloloina lana auauna. Sa ia faaopoopo

atu foi e le agavaa o ia e maliu mai Iesu i lona fale, e ui lava o ia se tagata sa usiusitai i ai nisi i lana pule. Na ia faapea mai, ‘Tau lava ina oo mai sau fetalaiga, e malolo ai la’u auavana’ (Mataio 8:8). Sa ofo Iesu i lona faatuatua. ‘Ou te leiloa ia Isaraelu se faatuatua e faapena ona tele’ (8:10). . . .

“. . . E tele mea e mafai ona tatou aoaoina e uiga i le faatuatua . . . mai a tatou uo o isi faatuatua e pei o le taitai o le toaselau a Roma, aemaise lava mai a tatou fanau. E tusa po o le a le se auala tatou te aoaoina ai e faaoga le mana o le faatuatua, e manaomia ona tatou maua e faataunu ai tiute maoae ua tuuina mai ia i tatou” (i le Conference Report, Ape. 1993, 55–56; po o le *Liahona*, Iulai 1993, 53–54).

Ia valaaulia tamaiti o le vasega e tuuina mai ni faataitaiga o ni tagata latou te iloa i aso nei, o e pei o le auavana a le taitai o le toaselau ma le tama a le fafine ua oti lana tane, o loo moomia ni vavega i o latou olaga. Fesili atu:

- O a faamanuiaga o loo avanoa e ala i le faatuatua ma le mana o le perisitua ia i latou o o latou agaga o loo moomia le faamaloloina?
- O a nisi o auala e mafai ai ona tatou fesoasoani e tuuitia ia mafatiaga o isi?

Ia uunaia tamaiti o le vasega ina ia avea o ni “agelu” i olaga o isi e ala lea i le fesoasoani ia i latou ina ia o mai ia Keriso. Fai atu ia i latou e vaavaai faalelei mo i latou o e o loo le tagolima ona tuuina atu lea i ai o le auavana ma le alofa ma faatinoina le faatuatua mo i latou. Ia uunaia tamaiti o le vasega e tusi ni a latou aafiaga faaagelu” na oo i ai i totonu o a latou tusi o talaaga o le olaga, ma valaaulia i latou, pe afai latou te filifili i ai, e fetufaai mai i le vasega a o tutupu ia aafiaga i le vaega o totoo o le tausaga.

Luka 7:1–10; 8:26–56 (tagai foi Mataio 8:5–13, 28–34; 9:18–26; Mareko 5). E tatau ona tatou o mai ia Keriso ma fesoasoani i isi ina ia latou faia foi. (40–45 minute)

Tusi le faataoto leni i luga o le laupapa: *O le le fuafuaina e pei lava o le fuafua e le faia*. Fesili atu i tamaiti o le vasega:

- E te manatu e moni leni faaupuga? Aisea e moni ai pe le moni ai foi?
- E mafai faapefea e le tusitusia o fuafuaga ma sini ona fesoasoani ia i tatou e faataunuina ni mea i o tatou olaga?

Fai atu i tamaiti o le vasega e tusi se fuaiupu se tasi e faamatalaina ai a latou misiona po o sini i le olaga, ma valaaulia i latou e fetufaai atu mea na latou tusia. Faitau le faaupuga leni o le misiona a le Ekalesia, ma fai atu i tamaiti o le vasega e mafaufau po o le a le lelei o a latou misiona e faatusatusa i le misiona a le Ekalesia:

“Toe, uso e ma tuafafine, ua mamalu lava le misiona a le Ekalesia—o le valaau atu lea ia i tatou uma ia tatou o mai ia Keriso e ala i le talai atu o le talalelei, ma le faaatoatoaina o le au paia, ma le togiolaina o e ua maliliu. A o tatou o mai ia Keriso, tatou te faamanuia i o tatou olaga, ma olaga o o tatou aiga, faapea ma fanau a lo tatou Tama o i le Lagi, o e o loo soifua ma e ua maliliu” (Ezra Taft Benson, i le Conference Report, Ape. 1988, 98; faaopoopo le faatusilima; po o le *Liahona*, Iulai 1988, 85).

- O a faamanuiaga e tuuina atu ia i latou o e o mai ia Keriso? (tagai Moronae 10:30–34).
- E mafai faapefea ona e fesoasoani i lou aiga ina ia o mai i le Faola?
- E mafai faapefea ona e fesoasoani i au uo ina ia o mai ia Keriso?

Ia valaaulia tamaiti o le vasega ina ia faitauina ia tala nei e tolu: Luka 7:1–10; 8:43–48; ma le 8:41–42, 49–56, e saili ai ia tali mo fesili nei:

- O le a le mea o loo fesoasoani i tagata taitoatasi i fuaiupu nei ina ia o mai i le Faola?
- O le a le faamaoniga o loo i ai iina o tagata o loo i nei fuaiupu e tele lo latou faatuatua i le Faola?
- O a faamanuiaga e maua e i latou o e o mai ia Keriso?
- O le a le mea e sili ona faagaetia ai oe e uiga i tala taitasi?

A maea latou, ona talanoaina lea o fesili faapea ma lagona o tamaiti o le vasega e uiga i nei vavega a le Faola. Faamanatu atu i tamaiti o le vasega faapea e ui lava o tofotofoga masani ona tatou liliu atu ai i le Alii, ae o le faatuatua tele lava e oo mai ai vavega a Keriso. Ia molimau atu faapea o le mana o Keriso e faamalolo ma faamanuia ai o loo avanoa ia i tatou i aso nei.

Ia faaiuina i le faatusatusaina o nei tala i le tala o temoni. Ia faamalalama atu faapea a o finagalo Iesu ina ia tatou o atu ia te Ia, e taumafai lava Satani e faaleaga i tatou pe aveeseina i tatou mai ia Iesu. Tuu atu i tamaiti o le vasega e faitau le Luka 8:26–40.

- Na faapefea ona ese le olaga o leni tagata ina ua uma ona maliu mai le Faola ma tuliese ia temoni?
- E mafai faapefea ona e faatatauina leni tala i lou olaga?

Faitau le upusii leni mai ia Peresitene Ezra Taft Benson:

“E tatau ona tatou faamuamua le Atua i mea uma lava i o tatou olaga. E tatau ona muamua o ia. . . .

“Pe a tatou faamuamua le Atua, o isi mea uma lava o le a oo atu i o latou tulaga tatau po o le aveese foi mai o tatou olaga. O lo tatou alofa i le Alii o le a pulea ai lo

tatou alofa, mea e faia i o tatou taimi, sailia o mea tatou te fiafia i ai, ma le faamuamua o mea e tatau ona faamuamua i o tatou olaga” (i le Conference Report, Ape. 1988, 3; po o le *Liahona*, Iulai 1988, 4).

Fesili atu: O le a faapefea ona faamanuaina i tatou pe afai tatou te mulimuli i le fautuaga a Peresitene Benson?

Luka 7:17–35 (tagai foi Mataio 11:2–19). O Ioane le Papatiso o se perofeta maoae ma o le teuteuala mo Iesu Keriso. Na ia faamamafaina faapea e tatau i tagata ona tapuai i le Faola, ae le o ia. (20–25 minute)

Ta’u atu i tamaiti o le vasega: Mafaufau faapea o loo e i ai i se falelauasiga o se perofeta ma le Peresitene o le Ekalesia na maliu talu ai nei. I le taimi o le sauniga na musumusu atu ai se tagata e le auai i le Ekalesia e te masani ai, “Pe le o se mea faanoanoa ea le maliu o le taitai o le tou Ekalesia?” Fesili atu i tamaiti o le vasega pe faapefea ona latou tali atu i ai. A maea ona talanoaina nisi o tali, ona fesili atu lea pe aisea e talafeagai ai le tali leni: “Ioe e faanoanoa tele, ae pe le o se mea matagofie ea le toetu mai o Ia ina ua mavae le aso tolu!”

Ta’u atu i tamaiti o le vasega faapea e taua tele mo i tatou le manatuaina o Iesu o le taitai o Lana Ekalesia. O i latou o e o loo valaauina e auaina i totonu o le Ekalesia e le tatau lava ona latou aveesea le viiga po o le mamalu mai ia Iesu Keriso. Na faatuina e le Faola le faataitaiga e ala lea i le faaali mai ia i tatou le auala e tuuina atu ai ma le talafeagai le viiga ma le mamalu. Tuu atu i tamaiti o le vasega e faitauina le Mose 4:1–2 ma vaai ai i le auala o loo manao ai Satani i le mamalu e ese mai nai lo le Alo.

Ia valaaulia tamaiti o le vasega e faitau le Luka 7:17–23. Ta’u atu ia i latou o leni tala e faatatau i le taimi na faafalepuiiina ai ia Ioane (tagai Mataio 11:2). Ia tuuina atu nisi o fesili nei:

- O ai na auina atu i ai e Ioane ona soo e vaai i ai?
- Mai nei fuaiupu, o le a le mafuaaga na manao ai Ioane i ai latou ina ia o atu ia Iesu?
- O le a le aafiaga o vavega a Iesu i soo o Ioane?
- E faapefea ona fesoasoani leni mea ia te oe ia e malamalama ai i lagona o Ioane i le auina atu o ona soo?
- O le a sou lagona ia Ioane, i le iloaina lea o loo manao e na mulimuli atu ia te ia e avea ma soo o Iesu Keriso?
- O le a se mea e mafai ona tatou aoaina mai le faataitaiga a Ioane?

Ta’u atu i tamaiti o le vasega faapea na viia e le Faola ia Ioane ma molimau atu i lana misiona i totonu o le Luka 7:24–30. Fai atu i tamaiti o le vasega e faitau fuaiupu na ma vaai ai po o le a se isi mea na faagaetia ai i latou e uiga ia Ioane. Faitau le saunoaga a le Perofeta o Iosefa Samita e uiga i le mafuaaga na avea ai ia Ioane o se perofeta maoae (tagai i le fautuaga faapoopo e aoao atu ai mo le Mataio 11:1–19, i. 35).

Ia faailoa atu faapea, e ui lava i le silisiliese ma le maoae o Ioane ma Iesu, ae toatele lava tagata sa teenaina i laua. Tuu atu i tamaiti o le vasega e faitau le Luka 7:31–35. Na toe faaupuina e Elder Bruce R. McConkie le savali a le Faola i tagata i leni vaega i lana auala:

“E pei outou o tamaiti le mautonu o loo taalo i ni taaloga; afai tou te faia se faaipoipoga e tauemuina, e mumusu a outou uo e sisiva; afai tou te suia le taaloga i se solo o se maliu, e mumusu a outou uo e faavauvau. I le tulaga faapea, e na o mataupu faalelotu lava e taaalo ai. E pei o tamaiti faatautee ma le femoumuai, tou te tenaina ia Ioane aua foi na o mai faatasi o ia ma le malosi o le au Nasareta, ma sa ia teenaina a’u aua sa ou faaalua le mafanafana o amioga faaletagata lea e matagofie ai fesoataiga [fegalega-leaiga]” (i le *Doctrinal New Testament Commentary*, 1:263).



Luka 7:36–50. Afai tatou te iloaina lo tatou faalagolago i le Faola, salamo i a tatou agasala, ma mauaina le faamagaloga, o le a faatumulia i tatou i le filemu ma le alofa. (45–50 minute)

Ia talanoaina faatasi ma tamaiti po o le a le mea e ta’u o le aitalafu, ona tuu atu lea o nisi o fesili nei:

- O le a le mea e tele ina nofo aitalafu ai tagata? (O tali e mafai ona aofia ai ia fale, aoga, taavale.)
- O le a sou lagona pe afai o le tagata o loo e nofo aitalafu i ai ua faasaolotoina oe mai lena aitalafu?
- O a ni ou lagona o le a i ai pe afai o le a faasaolotoina oe e le tagata mai se aitalafu tele nai lo se mea laitiiti?

Ia valaaulia tamaiti o le vasega e faitau le Roma 3:23, ma fesili atu:

- O le a se mea o loo aoao mai e leni fuaiupu e uiga i le aitalafu?
- Aisea tatou te moomia ai ia Iesu Keriso e avea ma o tatou “totogi aitalafu” po o le Faola?
- O le a le tele o le aitalafu e te manatu ua i ai ia Keriso le mana e faamagaloga ai?

Faitau ma talanoaina le saunoaga leni mai ia Elder Boyd K. Packer:

“Afai e tumau lou manao ma ua e naunau e totogiina ‘mea uma lava’ [tagai Mataio 5:25–26], ua faalaeaogaina le tulafono o le toe totogiina. O lau matafaioi ua tuuina atu i le Alii. O le a ia foiaina au aitalafu.

“Ou te toe faapea atu, se’i vagana ai i latou o e ua faaseseina e le malaia, ae e leai se amioga, leai se mausa, leai se tetea, leai se solitulafono, leai se liliuese,

leai se moliaga e aloese mai le folafolaga ole faamagaloga atoatoa. O le folafolaga lena o le togiola a Keriso” (i le Conference Report, Set.–Oke. 1995, 23; po o le *Liahona*, Ian. 1995, 20).

Faitau faatasi ma au tamaiti o le vasega le Luka 7:36–50 ma talanoaina ia fesili nei a o outou faitauina:

- O a aitalafu ia o loo nofo aitalafu ai tagata o loo i le faataoto? (tagai f. 41–42).
- E faapefea ona ese lagona o le fafine agai i le Faaola mai ia Simona?
- O le a sou manatu aisea na eseese ai uiga faaalua o nei tagata e toalua ia Iesu?
- Na faapefea ona faalagolago uma i laua i le Faaola?
- O le a le faamanuiaga na mauaina e le fafine ona o lona iloaina o lona faalagolago i le Faaola? (tagai f. 47).
- O le a se mea o loo aoao mai e lenei mea na tupu e uiga i le mana o Iesu Keriso e faamama ai tagata mai le agasala?

Ia valaaulia tamaiti o le vasega e mafaufau e uiga i le tali tutusa o o latou olaga ma olaga o tagata o loo i lenei tala ma le auala na mafai ai ona avea fetalaiaga a le Faaola ma se puna o le faamoemoe mo i tatou uma taitoatasi. Faitau ia saunoaga nei pe tuuina atu ni kopi i tamaiti o le vasega e avea o ni pepa e tufatufaina atu. Ona talanoaina lea o se vasega.

Na aoao mai Elder Ronald E. Poelman, o se sui o le Au Fitugafulu:

“O le amataga ma le atoatoaga o le salamo e tau atu i le faamagaloga o le faatuatua lea ia Iesu Keriso, o ia o le ‘tusitala ma le taunuuga o lo [tatou] faatuatua’ (Moronae 6:4). O lo tatou faatutaua ia te ia i le avea ai ma Faaola ma Togiola e mafua ai ona tatou faanoanoa i a tatou soligatulafono, o se lotonutimomoia ma se agaga salamo, ma se lagona o le suesueina o le tagata lava ia. Ona mulimuli mai ai lea o se suiga i le amio ma se liliu atu i le Atua” (i le Conference Report, Oke. 1993, 114; po o le *Liahona*, Ian. 1994, 85).

Na faamatala mai e Elder Bruce R. McConkie, i le fafine o loo i le Luka 7:36–50, na tusia:

“O nei mea uma o le galuega ma le tapuaiga a se fafine faamaoni ma le naunautai o le sa agasala ae ua faamamaina nei; o le ua saoloto mai nei ma avega mamafatu o le tele o soligatulafono; o le ua savali nei i se olaga faafouina ona o ia lea na ia sogi atu i ona aao ma sa ia tuuina atu i ai le migao uma ma le alofa musuia lea e umia e lona tagata atoa.

“O lenei mea e tatau ona tatou iloa pe afai tatou te tagai mamao atu i le mea moni ua molioo mai e lenei faatasiga musuia i le fale o Simona le Faresaio. O se

tamaiti lenei sa agasala ae ua mama. E le’i faamagaloina ana agasala e Iesu—ua uma ona ia faia; na tupu ina ua ia talitonu ma sa papatisoina i lona suafa; na tupu ina ua ia salamo ma le faamoemoe atoa o lona loto ma tautino atu lona olaga ma soo se manava na te mauaina ina ia Faatupuina ai le Amiotonu. O loo tatou feagai ma se tagata liliu mai o le ua oo mai e sasaa atu, i le agaga o le loto faafetai ma le fiala, le faafetai o lona agaga ia te ia o le ua faasaolotoina o ia, ua faasaolotoina o ia i taimi ua tuanai, mai filifili o le pologa ma seoli.

“E leai ma se mea o nei mea ua iloa e Simona. O ia ma ona atalii, e le’i papatisoina; ma e pei o Nikotemo, o le matai i totonu o Isaraelu na te leiloaina e mafai e tagata ona toe fanauina, o Simona, i lona tulaga o loo i ai, na ia mafai i le tulaga faaleagaga ona faatupuina o se fafine sa mumu lona agaga ae o lea ua pei o le paepae o le kiona” (*Mortal Messiah*, 2:200–201).

Aoao atu i tamaiti o le vasega faapea e mafai ona tatou maua le faamagaloga mo a tatou agasala, e tusa lava po o le a le leaga, pe afai o le a tatou mulimuli i le faaitaiga a lenei fafine ma salamo faamaoni. Ia molimau atu o le faagasologa o le salamo tatou te maua ai se lagona talisapaia ma le alofa mo Iesu.

- O le a le mea na faia e lenei fafine na faaailoa atu ai lona loto faafetai mo le Togiola a Iesu Keriso?
- O le a se mea e mafai ona tatou faia e faali atu ai lo tatou alofa ia te Ia?

Ia faaiuina i le usuina o le “Ou te Tu ma Ofo” (*Viiga*, nu. 107). Fai atu i tamaiti o le vasega e fetufaai mai ni latou lagona e uiga i le Togiola a le Faaola ma faamatala mai po o a ni o latou lagona a o latou usuina le viiga.

Faaliga: Ia mautinoa ia aua ne’i faia se faaiuga a tamaiti o le vasega faapea e aoga ona latou agasala ina ia latou alolofa atili ai i le Faaola (tagai Roma 6:1–2). E tatau i tamaiti o le vasega ona malamalama i le taua o le atinaeina o se alofa mo Iesu Keriso e ala lea i le tausia o Ana poloaiga ma aloese mai le agasala. Ia uunai tamaiti o le vasega e aloese mai le agasala ae ia maua le lagona mautinoa e mafai ona faamagaloina atoatoa i tatou pe a tatou agasala pe afai tatou te salamo.

Luka 8–9 (tagai foi Mataio 8–10, 12–14, 16–18; Mareko 4–6, 8–9). O se taaloga toe iloilo e mafai ona malie ma malamalama ai. (45–50 minute)

O le Luka 8–9 o loo aofia ai tala atonu sa e aoaoina atu ia Mataio ma Mareko. Ia faaoga lenei gaoioiga e iloiloina ai mea e faaogaina a o faatumauiina pea le faaauuina o le molimau a Luka.

Ia faatulaga kesi po o nofoa i se lio tele lava po o se laina. I nofoa taitasi, faapipii se fesili faatupu manatu faatasi ma se mau mai le Luka 8–9 lena e fesoasoani e tali ai. Faanumera ia fesili, ma tuu atu i tamaiti o le vasega taitasi se fasi pepa ma

numera e talafeagai i ai ma se avanoa ia lava e tusi ai tali o fesili taitasi. Ia faia ni fesili e matuai luitauina ai lea e moomuia ai ona faaoga e tamaiti o le vasega le mafaufau, ae ia matuai manino ona faailoa mai le mau lea e mafai ona maua ai le tali ina ia aua ne'i tele se taimi o tamaiti e faaaluina ai e sue. Ia faaoga fesili e pei o nei:

1. Faitau le Luka 8:1–3. O le a sou manatu o le a le uiga o le faaupuga lea “e na auauna atu ia te ia i a latou mea”?
2. O le a le mea e faatusa i ai le fatu o loo i le faataoto i letagata lulu saito? (tagai Luka 8:11). O a nisi o auala e mafai ona e totoina ai lena fatu i lou olaga?
3. Faitau le Luka 8:22–25. E tusa ai ma nei fuaiupu, o a ni lagona na oo i le au soo lea atonu na le fiafia ai le Faaola?

Tuu atu i tamaiti o le vasega se minute e tasi e tali ai le fesili o loo faapipii i nofoa o loo latou nonofo ai. Ona tuu atu lea o se faailoilo mo tamaiti uma e agai atu i le isi nofoa ma faaalu ai se minute se tasi i le fesili o loo iina. Ia faaauau ai pea seia oo ina ua maua uma e tamaiti o le vasega le avanoa e tali ai fesili uma. Ona faasa'o faatasi lea o a latou tali o se vasega, faaalu le taimi e faamalamalama ai fesili ma tali na e sili ona taua i au tamaiti o le vasega po o fesili foi latou te iloina e sili ona luitauina ai i latou.

Luka 9:1–6, 10 (tagai foi Mataio 10:1, 5–42; Mareko 6:7–13, 30). Pe a tuuina mai ia i tatou ni tofiga, ua ia i tatou le matafai oi e lipoti atu ai mea ua tatou faia. (10–15 minute)

Tuu atu i tamaiti o le vasega e mafaufau i le tofiga po o se galuega sili ona taua na latou faia, ona tuuina atu lea o nisi o fesili nei ia i latou:

- O ai na tuuina atu ia te oe le tofiga?
- O le a sou manatu aisea na filifilia ai oe e mauaina le tofiga?
- O le a le lelei na e faataunuuna ai lau galuega?
- E mafai faapefea ona e iloina le popole o le tagata i le auala na e faataunuuna ai?

Faitau le Luka 9:2–5 ma fesili atu:

- O le a le tofiga na tuuina atu e Iesu i Ana Aposetolo?
- O le a le taua o lenei tofiga?
- Pe e te manatu sa fiafia Iesu i le lelei o le faataunuuna o a latou tofiga? Aisea?

Fai atu i tamaiti o le vasega e faitau le Luka 9:10 ma vaai ai po o le a le mea na faia e Aposetolo ina ua uma le latou tofiga.

Ia aoao atu tamaiti o le vasega faapea o loo i ai sa tatou galuega taua e lipoti atu ai po o le a le lelei o le faataunuuna o o tatou tofiga ia i latou o e na tuuina mai ia i tatou. Fesili atu:

- E faapefea ona tuuina mai e le Alii ia tofiga po o auaunaga ia i tatou? (E auala mai taitai o le Ekalesia, feagaiga paia, faaaliga i le tagata lava ia.)
- E faapefea ona tatou lipotia atu nei tofiga i le Alii?

- O ai isi tatou te lipoti atu i ai e tusa ma le faataunuuna o o tatou valaauga i le Ekalesia?
- E faapefea ona tatou lipotia o tatou tofiga i totonu o o tatou aiga?

Faitau le Faaaliga 20:12 ma fesili atu:

- O ai lea o le a tatou tutu ai i luma e tuuina atu i ai la tatou lipoti mulimuli o lo tatou olaga i lenei lalolagi?
- O le a se mea e te manao e lipoti atu i lea taimi?

Luka 9:46–56. Ua valaaulia i tatou e Iesu ina ia tatou faapalepale i isi. (15–20 minute)

Aumai ni ituaiga musika eseese i le vasega. Ia taina pese taitasi ma valaaulia tamaiti o le vasega e filifili le pese latou te fiafia i ai. Ia talanoaina pe faapefea ona faapei tagata o musika, e eseese uma lava. Faitau le 4 Nifae 1:17 ma fesili atu: O le a le mea o loo aoao mai e lenei fuaiupu i ni o tatou lagona e tatau ona i ai e faatatau i tagata o isi atunuu, tapuaiga, po o tulaga?

Tusi le upu *faapalepale* i luga o le laupapa ma talanoaina le uiga. Ia valaaulia tamaiti o le vasega e faamatala atu i le vasega se tagata e matuai faapalepale lava ma agalelei ia i latou e ese mai. Fesili atu:

- O le a se mea e faagaetia ai oe i lenei tagata?
- E mafai faapefea ona tatou aloese mai le le faapalepale?

Ia valaaulia tamaiti o le vasega e faitau le Luka 9:49–56.

- O le a se manatu o i latou o e faapalepale i isi i le tagata lea na tulieseina ia temoni i le suafa o Keriso po o tagata Samaria?
- O le a se manatu o Aposetolo i le tagata lea na tulieseina ia temoni?
- O le a sa latou vaai i tagata Samaria?

Fai atu i tamaiti o le vasega e toe faitau ia fuaiupu ma vaai ai mo uiga o le Faaola na faaaliga i le tagata na tulieseina ia temoni faapea ma tagata Samaria. Fesili atu: E te manatu sa fiafia le Faaola i uiga o Ona soo? Aisea na fiafia ai pe le'i fiafia ai?

Ia valaaulia tamaiti o le vasega e mafaufau e uiga i a latou amioga e faasaga i tagata o isi tapuaiga poo latou o e foliga mai o ni tagata agasala. Fai atu i tamaiti o le vasega e tusi i lalo ni o latou manatu i se fetalaiga a le Faaola pe afai e talanoa atu o Ia e faatatau i o latou uiga. Faitau ia saunoaga nei pe tuuina atu i tamaiti o le vasega o ni pepa e tufaina atu.

Na aoao mai ia Peresitene Gordon B. Hinckley:

“Ou te aioi atu i o tatou tagata i soo se mea ina ia ola ma le faaaloalo ma le talisapaia o i latou e le auai i la tatou Ekalesia. E matua manaomia tele le vafealoai ma le faaaloalo i ai latou o e e eseese talitonuga ma aoaoga. E le tatau ona tatou lagolagoina soo se aoaoga e faapea e sili le isi lanu i le isi lanu. O loo tatou ola i se lalolagi o eseese. E mafai ma e ao ona tatou

faaloalo ia i latou o e ona ni aoaoga atonu tatou te le talitonu i ai. E ao ona tatou ioe e puipuia aia tatau a isi o e ua itagia ona o o latou talitonuga.

“Ou te faamanatu atu ia te outou upu nei na saunoa mai ai Iosefa Samita i le 1843:

“Afai sa faaalua ua ou malie ia ou oti mo se “Mamona,” ua lava foi lo’u lototele ou te tautino atu ai i luma o le lagi, ua faapea foi ona ou saunia ou te oti i le puipuia o aia tatau a se Peresipeteriane, se Papatiso, po o se tagata lelei o soo se isi lava ekalesia; ona o lea lava mataupu e tasi o le mea e solia ai le aia tatau o tagata o le Au Paia o Aso e Gata Ai, o le a solia foi le aia tatau a tagata Katoliko Roma, po o soo se isi lava ekalesia’ (*History of the Church*, 5:498)” (i le Conference Report, Ape. 1995, 94–95; po o le *Liahona*, Iulai 1995, 71).

Na tusia e Elder Bruce R. McConkie:

“E ui lava e le ogatasi ma le Agaga moni o Keriso, ae o lenei ofo a Iakopo ma Ioane e le faapea e matuai matutui pe le loto faamagalō foi, e le faapea foi e moni sona faaleagaga, e pei ona foliga mai ai. Latou te iloa o le Atua o Isaraelu—o le Iesu lava lea o loo latou tutu ai i luma—na auina mai le afi mai le lagi i le olega a Elia ina ia faatalitonuina ai fili a le perofeta anamua. (2 Tupu 1.) Na latou iloa foi o le Atua alofa foi lava lea e tasi o le a susunuina e amioleaga i le afi i lona Afio Faalua Mai. (Malaki 4:1.) O le mea e moomia ona latou aoaoina e mo lo latou tisipenisione, i lalo o tulaga sa i ai i lona taimi (ma e mafai ona faatusatusaina i aso nei), o le savali o le talalelei e tatau ona agai i luma ma le alofa, onosai, uiga lelei, ma le faapalepale. Ae peitai, o lo latou ofo atu e suitulaga mo puapuaga na oo i ai lo latou Matai o se faailoga lea o le tele o lo latou faatuatua. O ai ni tagata ua liuaina i le amiotonu ma manumalo i la latou galuega e faamoemoe e auina mai e le Silisiliese se afi mai le lagi e puipuia ma faamaoniaina i latou?

“E oo lava i tagata sili ona faamaoni ma maua’i o nisi lava taimi e fesouaina ai i latou e le agaga o Satani nai lo le Agaga o le Alii. E ui lava latou te le malamalama i lona pogai, ae o Iakopo ma Ioane na aafia i le la talosaga atu e se agaga mai lalo ifo nai lo se Agaga mai luga” (*Doctrinal New Testament Commentary*, 1:440).

Ia uunaiina au tamaiti o le vasega e atuinaeina se faapalepale mo isi.

Luka 9:57–62. O le ositaulaga o se mataupu faavae taua lea o le talalelei. E tatau ona tatou naunau e osia soo se ituaiga taulaga ina ia

mulumuli ai i a Keriso ma o tatou loto atoatoa.
(15–20 minute)

Faitau atu le tala moni lenei e pei ona faamatalaina ai e Peresitene Gordon B. Hinckley, a o aveia ma se tasi o le Au Peresitene Sili:

“I le 1856 e silia ma le afe o le au paia, o nisi o i latou o o outou tuua, na fetai ai ma ni faigata a o latou sopoia fanua laugatasi e agai mai [i le Vanu o Sate Leki]. Ona o le tele o tulaga le talafeagai, na faafaigata ai ona latou amata. Sa latou afatia i le aisa ma le malulu i mauga mauualuluga o Uaiomi. O lo latou tulaga na faigata ona aloese mai ai se isi ma na feoti tagata i aso taitasi.

“Na maua le tala e Peresitene Iaga e tusa o lo latou tulaga fita ae o le a amataina le sauniga o le konafesi aoao ia Oketopa. Na ia valaauina loa i lea lava taimi ni vaega o taavale solofanua, ave taavale, ma uta ina ia faaolatia mai ai le Au Paia. Ina ua taunuu le vaega muamua ia Matini ma lana vaega, na le lava ni taavale solofanua e ave ai le au puapuagatia. Na faamalosi atu le vaega faaola ina ia faaauau pea le malaga..

“Ina ua latou taunuu atu i le vaiatafe e ta’u o Sweetwater ia Novema aso 3, na latou vaaia ni oga aisa o opeopea i le vaiatafe. E tusa ma tulaga na oo i ai le au malaga faapea ma lo latou vaivai, na foliga mai ai e faigata ona sopoia le vaiatafe. Na foliga mai o le a latou sopoia le oti pe a latou sopoia lenei vaiatafe aisa. O alii sa malolosi na nonofo ifo i lalo i le eleele ua to’ā ai le aisa, e faapea foi i fafine ma tamaiti. E toatele na le mafai ona faafeagai ma ia tulaga.

“Ma e ou te faitauina atu ia faamatalaga ia na tusia i tala faamaumau e faapea: ‘O alii talavou e toatolu e tai sefuluvalu tausaga le matutua, na o mai e laveai i le malaga; na maofa i latou na i ai, i lo latou vaaia o nei tama o latou sii ma ave tagata mamai uma ma sopoia le vai aisa tele. Sa matua faigata tele ia tulaga ma mea na oo i ai, ma i tausaga mulumuli ane na feoti uma lava tama ia ona na mafua mai i le malulu o le vai aisa na sopoia. Ina ua logo tala ia Peresitene Iaga e tusa ma lenei tulaga lototoa, na ia tagi e pei o se tamaitiiti, ma faapea ona tauina atu i le au paia e faapea, ‘o galuega sa faia e na tama, o le a mautinoa ai lava le maua e C. Allen Huntington, George W. Grant, ma David P. Kimball o se faaolataga e faavavau i le Malo Selesitila o le Atua, o lalolagi e leai se iuga.’” (Solomon F. Kimball, *Improvement Era*, Feb. 1914, p. 288.)” (i le Conference Report, Oke. 1981, 59–60; po o le *Liahona*, Ian. 1982, 78–79).

Fesili atu:

- O le a sou manatu i le osigataulaga a na alii talavou e toatolu?
- O le a se mea atonu na uunaiina ai i latou ina ia laveaiina na Au Paia?

- O le a sou manatu i le lagona na oo i le Au Paia ae le'i taunuu atu le au laveai?
- Ae a le taimi ina ua uma ona faasaoina i latou? O le a sou manatu o a ni o latou lagona na i ai agai i ai latou na laveaiina i latou?
- Afai e faasaoina i le faaletino e taua tele, ae o le a se taua tele o le faasaoina i le faaleagaga ma toe foi atu i lo tatou Tama o i le Lagi i le malo selesitila?

Fai atu i tamaiti o le vasega e faitau le Luka 9:23–25 e faapea foi i le Faliliuga a Iosefa Samita o le Luka 9:24–25 o loo i le faaopoopoga. O le a se taua “o le faasaoina” i nei fuaiupu?

Tusi le faaupuga *O Nisi Tulaga Manaomia Ina ia Faasaoina Ai i luga o le laupapa*. Fai atu i tamaiti o le vasega e faitau le Luka 9:26, 57–62 ma vaai ai po o le a le mea o loo aoao mai e nei fuaiupu e uiga i mea na faamoemoeina e Iesu mai Ona soo. Ia lisi mea na mauaina e tamaiti o le vasega i luga o le laupapa. Fesili atu: O le a faapefea ona fesoasoani le ausiaina o nei tulaga manaomia ia i tatou i le mauaina o le faaolataga?

Afai e manaomia, ia fetuفاai atu le faamalamalamaga leneni o le Luka 9:57–62 na saunia e Peresitene Marion G. Romney, o le sa avea ma se sui o le Au Peresitene Sili:

“Sa le'i sailia e Iesu pe valaauiina ia ni tagata e na ona talai atu. Na Ia finagalo ina ia latou iloaia o le mulimuli ia te ia o lona uiga o taumafaiga ma le osigataulaga. Na faamatalaina e Luka se tulaga sa 'matuai toatele ai le motu o tagata sa faatasi ma ia; ma sa ia faliu atu ma fetalai atu ia i latou,

“Afai e sau se tasi ia te au, ae le inoino i lona tama, ma le tina, ma le ava, ma le fanau, ma uso, ma tuafafine, e oo lava i lona ola, e le mafai ona fai o ia mo'u soo.

“O se le ave lona satauro, ma ua le mulimuli mai ia te au, e le mafai ona fai o ia mo'u soo.

“E faapea foi so outou e le lafoai ana mea uma, e le mafai ona fai o ia mo'u soo.” (Luka 14:25–27, 33.)

“I nei saunoaga e foliga mai e faatiga, ae le'i faapea na matuai faama'oti mai e Iesu le 'inoino sa'o o se tasi i se tasi o lona aiga . . . o se tulaga e avea ai ma soo.' Na Ia toe faamamafaina mai le 'sili atu o le tiute i le Atua nai lo mea faaletagata' po o faanaunauga faalelalogagi o i latou o e o le a avea ma ona soo. (James E. Talmage, *Jesus the Christ*, Salt Lake City: Deseret Book Co., 1976, i. 453.)” (i le Conference Report, Set.–Oke. 1978, 54; po o le *Liahona*, Nov. 1978, 38).

Ta'u atu i tamaiti o le vasega faapea o nisi taimi e mafai ai e a tatou alofaga ona faalavelave i mea tatou te faia lea e fesoasoani ai i le laveaiina o i tatou i le faaleagaga. Fesili atu:

- O a nisi o ou alofaga e te fiafia i ai pe a e le faataunuaina ou tiute (mo se faataitaiga, “ua tuai ona ou ala,” po o le “ua leiloa la'u meaaoga”)?

- O a ni alofaga na tuuina atu e alii e toatolu ia Iesu o loo i le Luka 9:57–61?
- Faitau le fuaiupu 62. Na faapefea ona tali atu Iesu i nei alofaga?
- O le a sou manatu o le a le mea na taumafai Iesu e aoao atu?

Na faamalamalama mai e Elder Howard W. Hunter, a o avea ma se tasi o le Korama a le Toasefululua:


“Ina ia eliina se alavai ia sa'o, e manaomia e le tagata o loo eliina le alavai le tilotilo sa'o ona mata i luma i le mea tonu o loo agai i ai. O le auala lena e tumau ai ona ia i se ala sa'o. Ae peitai, afai e fai ma tilotilo i tua le tagata o loo eliina i le mea sa i ai o ia, e matuai tele lava le avanoa e se ese ai o ia. O taunuuga o ni alavai fepiopioai ma le le sa'osa'o. Matou te valaauliaina i latou na o e ua avea ma tagata fou ina ia taulai atu la outou vaai i la outou sini fou ma ia aua ne'i toe tilotilo i tua i o outou faafitauli sa i ai muamua po o soligatulafono se'i vagana ua avea o se faamanatu i lo outou alualu i luma ma lo outou agavaa ma o outou faamanuiaga mai le Atua. Afai o o tatou malosiaga e le o taulai i tua o i tatou ae o luma o i tatou—i le ola e faavavau ma le olioli i le faaolataga—e mautinoa lava o le a tatou mauaina” (i le Conference Report, Ape. 1987, 19; po o le *Liahona*, Iulai 1987, 17).

- O a nisi o alofaga ua lauiloa i o tatou aso mo le le mulimuli ia Iesu?
- E mafai faapefea e alofaga ona faalavelave i lo tatou avea ai ma soo?

Faitau upu o le “Mulimuli Mai ia te Au” (*Viiga*, nu. 62), ma fai atu i tamaiti o le vasega e mafaufau pe mafai faapefea ona avea i latou ma ni soo lelei o Iesu Keriso e amata atu i le aso nei.

Luka 10–13

O le Soifuga o Iesu Keriso



Faatomuaga

Na molimau mai ia Elder Hans B. Ringger o le Au Fitugafulu: “O le faavae ma le moli taiala mo a tatou faaiuga uma o le talalelei lea a Iesu Keriso ma Lana savali i le lalolagi. O aoaoga a Keriso e tatau ona tofatuina i o tatou manao ina ia filifili le sa’o ma ia tatou moomoo e sailia le fiafia. O Lona soifuaga amiotonu e tatau ona atagia i a tatou mea e fai” (i le Conference Report, Ape. 1990, 31; po o le *Liahona*, Iulai 1990, 25).

I le Luka 10–13 na aoao atu ai le Alii i tagata faapea e tatau ona atagia atu i o latou olaga le amiotonu. Na Ia fesoasoani ia i latou ina ia latou iloa le taua tele o le mama o o latou loto, ia mama o latou mafaufauga, ma ia faamaoni le latou auaunaga. Na aoteleina e le Alii lenei aoaoga i nei upu ua lauiloa: “e te alofa atu i le Alii lou Atua ma lou loto atoa, ma lou agaga atoa, ma lou malosi atoa, ma lou manatu atoa; e te alofa atu foi i le lua te tuaoi ia pei o oe lava ia te oe” (Luka 10:27).

Ia suesue ma le agaga tatalo le Luka 10–13 ma mafaufau i mataupu faavae nei ae le’i sauniaina au lesonea.

O Nisi Mataupu Faavae Taa o le Talalelei e Saili Iai

- Afai tatou te teenaina ia le savali o le talalelei po o auauna a le Alii, o le a fesiligia i tatou i le faamasinoga a le Atua (tagai Luka 10:8–16; tagai foi MFF 84:74).
- A o faateleina o tatou faamanuiaga, e tatau foi ona faateleina lo tatou amiotonu. O lo tatou faasalaga o le a faateleina pe a tatou liliuese mai le Atua ina ua uma ona mauaina Ana faamanuiaga (tagai Luka 12:15–21, 42–48; tagai foi MFF 82:3–10).
- Ua poloaiina i tatou ina ia tatou alolofa ma auauna atu i isi ua matitiva, e tusa lava po o le a lo latou lanu, faatuatuaga, ituaiga, po o le vaega e i ai (tagai Luka 10:25–37).
- E tatau ona tatou faaoga lelei ia avanoa taua faaleagaga ae aua ne’i faalavelavea i mea e le taua (tagai Luka 10:38–42; tagai foi MFF 66:10).
- Na silafia e Iesu Keriso manatu ma gaoioiga lilo a tagata uma, na Ia fetuuina le pepelo (tagai Luka 11:37–54; 12:54–57; 13:14–16; tagai foi 2 Nifae 26:29–31).
- O le amiotonu e fuatiaina i o tatou faanaunaga ma mea e fai, ae le o le tofiga po o le tulaga i le Ekalesia (tagai Luka 10:25–37; 11:28, 42–48).

Fautuaga mo le Aoao Atu

Filifili mai se manatu nei, pe faaoga ni ou lava manatu, a o e sauniaina lesonea mo le Luka 10–13.

**Luka 10:1–37 (tagai foi Mataio 11:20–26).
E tatau ona tatou alolofa ma auauna atu ia i latou o e matitiva.** (40–45 minute)

Ia faia se tasi o mea nei ina ia faatulagaina ai se talanoaga o avanoa i aso taitasi e auauna atu ai i isi:

- Fai atu i tamaiti o le vasega e faamatala mai se taimi mulimuli na latou iloina ai se tasi o loo manaomia le fesoasoani ma le mea na latou faia e fesoasoani atu i ai.
- Ia valaaulia tamaiti o le vasega e fetufaai atu pe na faapefea ona auauna atu isi ia i latou talu ai nei lava.
- Ia faatupuina se tulaga e tuuina atu ai i tamaiti o le vasega le avanoa e auauna atu ai i se tasi. Ia maitauina le mea e tupu, ma talanoaina o se vasega ia taunuuga. (Mo se faaitaiga, tuu atu i se tamaiti o le vasega e faatoulu ana api ma ana pepa i luga o le palapala ma taumafai e piki i luga.)

Fesili atu:

- E faafia ona e vaai i se tagata o loo manaomia se fesoasoani?
- O le a sou lagona pe a e vaai i se tasi o loo moomia le fesoasoani?
- E faapefea ona e mafaufau po o le a le taimi e te fesoasoani atu ai i isi?

Ia valaaulia tamaiti o le vasega e fetufaai atu se faaitaiga o se taimi na alu atu ai se tasi e fesoasoani ia i latou. Fesili atu: O le a se lagona na oo ia te oe i lenei mea?

Tuu atu i tamaiti o le vasega e faitau le Luka 10:1–9 e vaai i ai i le auaunaga na tuuina atu e le au fitugafulu. Fesili atu:

- Aisea e aveia ai le galuega faatalai ma se auaunaga taua?
- Faitau ia fuaiupu 17–20. E tusa ai ma nei fuaiupu, o a faamanuiaga na maua e le au fitugafulu ona o se taunuuga o le latou auaunaga?
- Faitau fuaiupu 25–27. O le fea o poloaiga sili e lua e faataua i le auaunaga?
- Faitau le fuaiupu e 28. O a lagona e oo mai ia i latou o e auauna atu?
- Aisea e te manatu ai o le auauna atu o se mataupu faavae taua lea o le talalelei?

Na faailoa mai e le Faaola po o ai e tatau ona tatou auauna atu i ai ina ua Ia tuuina mai le faataoto i le Samaria agalelei. Faitau le Luka 10:30–33, ona fetufaai atu lea o manatu nei mai ia Peresitene N. Eldon Tanner, o le sa aveia ma sui o le Au Peresitene Sili:

“Se’i o tatou iloilo totoa lava le uiga o lenei tala.

“Muamua, sa maua e le Samaria le ‘alofa.’ Sa ia maua se uunaiga mai lona loto ina ia fesoasoani atu, aua foi sa nutimomoia lona loto ona o le tagata manua ma lona puapuagatia. O lenei lagona alofa e aumaia i loto o soo se tagata ua ootia i le Agaga o le Alii. O nei lagona alofa e tatau ona tatou lagonaina taitoatasi mo isi tagata. O le mea moni sa fetalai le Faaola o le a iloa Isaraelu osi feagaiga i le faaali atu lea o le alofa o le tasi i le isi. (tagai Ioane 13:35.)”

Faitau le Luka 10:34, ona faaauau ai lea o le faamalamalama a Peresitene Tanner, ma taofi pe a manaomia e talanoaina ni manatu ma ni lagona o tamaiti o le vasega:

“Lona lua, sa ‘alu atu’ le Samaria i le tagata manua. Sa le faatali o ia seia talosaga atu i ai le tagata puapuagatia, ae sa ia iloa le mea o loo manaomia ma alu atu loa e fesoasoani e aunoa ma le tau fesiligia. I lona viiga lauiloa o le ‘Se Tagata Mativa Faanoanoa’ (Viiga, nu. 16), sa fialia tele i ai le Perofeta o Iosefa, ua tatou iloa ai o le tau maua lea na folafola mai e le Faaola e le gata ina tatou maua ona o amioga o le agalelei, ae ona sa tatou faia i se tulaga faifai pea e aunoa ma le loto faapito.

“Lona tolu, sa ‘fusifusi i ona manua, liligi i ai le suauu ma le uaina’ e le Samaria. Na tuuina atu e le Samaria le tausiga mo le tagata puapuagatia ma faamalieina le fia inu. O lenei alofa le faatuaoina sa toe mafai ona faaolaina ai le ola o le tagata.

“Lona fa, sa tago le Samaria ma ‘faatietie ia te ia i lana lava manu’—o lona uiga, sa ia saunia le mea e malaga ai ma ‘taitai ia te ia i le ‘fale e tali ai malo,’ o nofoaga e maua ai se malologa ma le tausiga. O le sauniaina o lenei nofoaga talafeagai e mapu ai ina ia ona mautinoa ai le lelei o le tausiga mo le toe mauaina e le tagata puapuagatia o le malosi.

“Lona lima, sa ‘tausi ia te ia’ le Samaria. Ia manatua i le taimi o loo faigata ai lava le tulaga o le toe maua o le malosi e le tagata, sa lei tuuina atu e le Samaria le tausiga o le alii i nisi tagata, ae faaalu lona taimi ma lona malosi e faataunuu ai e *ia lava* le galuega fesoasoani. I se taimi na foliga mai e faafaigofie lava ona tuu atu le galuega e faauma e isi tagata; e taua tele le i ai o se faataitaiga malosi mo i tatou e pei o le Samaria agalelei.”

Faitau le Luka 10:35 ona faaauau lea o le faamatalaga a Peresitene Tanner:

“Lona ono, sa oo i le ‘taeoa . . . ona to ae lea o tenari e lua, ma avatu i le matai e ana le fale.’ sa ia faaogaina ana lava tupe, e le o se tupe a se isi, ma totogi ai galuega sa faia e lei mafai ona ia faia e ia lava. O lea la sa ia tuuina atu ana mea mo le tausia o e matitiva ma puapuagatia.

“Lona fitu, i le manao o le Samaria e galue mo lona foi ola, sa ia tau atu ai i le matai o le fale tali malo e ‘tausi ia te ia.’ I lea auala sa ia faaigaluega ai *isi* . . . e fesoasoani ma faaauaina le tausiga.

“Lona valu, sa folafola loa i ai e le Samaria ‘a i ai se mea e te toe faataunuu, ou te tau atu ia te oe pe a ou toe sau.’ O loo faaalai ai iinei le alofa! Na te le’i tuuina

se tapulaa i se mea e tatau ona gata mai ai lana fesoasoani. Ma, atonu e sili atu foi, sa le’i faamaamulu ai iina ma faagalo, ae sa matua tautino atu lava e toe foi mai ma vaai pe ua faia mea uma sa tatau ona fai” (i le Conference Report, Oke. 1977, 119–20; po o le *Liahona*, Mati 1978, 147).

Ia faauma i le faitauina lea o le Luka 10:36–37. Ia valaaulia tamaiti o le vasega e faitau i le “Samaria” i le Taiala i Tuisitusa Paia. Fesili atu:

- O le a se lagona o tagata Iutaia agai i tagata Samaria?
- E faapefea ona faaopoopo atu le iloaina o lona mea i le malosi o lenei faataoto?

Ia talanoaina faatasi ma tamaiti o le vasega mea e mafai ona latou faia ina ia avea ai ma “Samaria agalelei.” Faitau le saunoaga lenei mai ia Epikopo H. David Burton, le Epikopo Pulefaamalumu o le Ekalesia:

“O le avea ma Samaria Agalelei o se mea e pipisi. O le faia i le auala a le Alii e faalotomauualaloina ai e mauoa, e faaeaina ai e matitiva ma faapaia uma ai (tagai MFF 104:15–18). E fesoasoani le na te tuuina atu ia i latou e ala i le faasafuaina atu o ana mea e maua. O le na te taliaina i lona tulaga atoatoa, ona mafai ai lea e ia ona aapa atu e fesoasoani i isi.

“O le Samaria Agalelei e amata i le aiga a o aoaoina e matua a latou fanau i faataitaiga ma upu. . . . Tau ia ina ia tatou galulue punouai i mataupu faavae o le Avea ai ma Samaria Agalelei ma ia sili atu le manatu i le manaomia o le ‘alu ia, ma faapea ona fai.’” (i le Conference Report, Ape. 1997, 106, 108; po o le *Liahona*, Iulai 1997, 95–96).

Ia faaiuina i le usuina o le “Se Tagata Mativa Faanoanoa” (Viiga, nu. 16). Ia unaiina tamaiti o le vasega ina ia saili pea ni avanoa e auaina atu ai i isi.

Luka 10:38–42. E tatau ona tatou faaoga lelei ia avanoa taua faaleagaga ma aua ne’i o tatou faatagaina o tatou tagata ina ia faalavelaveina e mea e le taua. (10–15 minute)

Fai atu i tamaiti o le vasega e mafaufau faapea ua afio atu le Faaola i o latou fale mo se asiasiga puupuu.

- O le a faapefea ona e saunia mo Ia?
- O le a le mea sili e te manao e faia pe e te tautala atu ai i le taimi o Lana asiasiga?
- O le a le mea sili e te manao e suia ae le’i taunuu atu o Ia?

Fai atu i tamaiti o le vasega e faitau le Luka 10:38–42 ma faatusatusa i le mea na faia e Mareta ma Maria.

- O le a le “mea lelei” lea na filifilia e Maria?
- O le a se mea e mafai ona tatou aoaoina mai le mea na fetalai atu ai Iesu ia Mareta?

Faitau le saunoaga lenei mai ia Elder Dallin H. Oaks ma molimau atu ai i lona moni:

“O lenei mau e faamanatu atu ai i Mareta uma lava, o alii ma tamaitai, e le tatau ona faatumuina i tatou i fuafuaga ma mea faaletino ae tatou toilalo ai e faapelepeleina ia avanoa na e tupito ma faaleagaga” (i le Conference Report, Oke. 1985, 76; po o le *Liahona*, Ian. 1986, 61).

Faitau le saunoaga lenei mai ia Elder James E. Talmage:

“E le o i ai se faitioina o le naunau o Mareta e saunia faalelei; pe teenaina foi le vaega a Maria ia. E tatau ona tatou manatu faapea ane sa matuai pulunaunau ia Maria e fesoasoani atu ae le’i taunuu le Matai; ae o lea ua taunuu atu o Ia, sa ia filifili loa e mafuta faatasi ma Ia. Ana faapea e tuuaia o ia i le le amanaiaina o lona tiute, semanu e le faamalo atu ia Iesu i lana mea sa fai. E le’i finagalo o Ia e saunia ni meaai ma ni mea faaletino, ae o le tali malo o le auuso, ae le gata i lea o lo laua gauai atu i mea sa Ia fetalai i ai. E tele mea sa Ia tuuina atu ia i laua nai lo mea atonu sa mafai ona la tapenaina mo Ia. Sa alofa Iesu i le auuso uma e toalua faapea lo la tuagane,. O nei tamaitai uma e toalua sa faamaoni ia Iesu, ma sa tofu lava i la’ua ma le auala sa faaalua mai ai. O le faatinoga o le alofa o Mareta, sa popole i le auaunaga faaletino; o lona lava natura o le tali malo ma le agalelei. O Maria, e manatunatu ma e matele i le faaleagaga, na faaalua lea i lona naunau atu i le auaunaga o le faaumea ma le talileleia” (*Jesus the Christ*, 433).

Ia uunaia tamaiti o le vasega ina ia ola i se auala e mafai ai e le Agaga o le Faaola ona faatasi ma i latou i aso uma, ma saili se taimi i aso uma e tatalo ai, suesue ai tusitusiga paia, ma mafaufau loloto ai.

Luka 11:1–13 (tagai foi Mataiao 6:5–15; 7:7–12). Ua aoao mai e Keriso ia i tatou le auala e tatalo ai. (15–20 minute)

A maea loa lava le tatalo amata, ona fesili atu lea:

- Aisea e fai ai se tatou tatalo amata?
- Aisea tatou te manaomia ai mea na sa tatou tatalo atu ai?
- O a mea e tatau ona tatou tatalo atu ai? O a mea e le tatau ona tatou tatalo atu ai?
- Faitau le Luka 11:1. Aisea e taua ai le faaupuga “aoao mai ia te i matou i tatalo”?

- Faitau le fuaiupu e 2–4. O le a le mea na fetalai le Faaola e taua ona tatalo atu ai?

Mafaufau e tuuina atu ia fesili nei:

- O le a le mea tatou te ole atu ai e tai tutusa ma le tatalo atu mo le “mea e ai e tatau ma le aso”?
- E faafia ona tatau ona tatou ole atu mo le faamagaloga?
- Aisea e taua ai le tatalo atu ina ia aua ne’i taitaiina i tatou i le faaosoosoga i le lalolagi o loo tatou ola ai?
- Pe i ai nisi vaega o le tatalo ua aoaoina ai oe e le o tusia i nei fuaiupu?

Fai atu i tamaiti o le vasega e faitau ma le filemu ia faataoto o loo i le Luka 11:5–13. A maea ona latou faitau, ona fai atu lea ia i latou e tusi i lalo le mea sili ona taua sa latou aoaoina e faapea foi ma se fesili se tasi e uiga i le tatalo. Fai atu i ai e taua atu ia te oe mea na latou tusia. Faitau nisi o a latou tali, ma tali soo sa latou fesili e te lagonaina e manaomia i ai se tali. Ia uunaia tamaiti o le vasega ina ia vaai atu i le Alii mo tali i le auala e tautia ai pea a latou tatalo ina ia talafeagai ma le auala e aoga ai. Ia fetufaai atu le vaega lenei mai ia Elder L. Edward Brown, o se tasi o le Au Fitugafulu:

“O’u uso e ma tuafafine ma uo pele, ou te tuuina atu la’u molimau paia ia te outou faapea e fesootai mai le Alii ia i tatou taitoatasi. Ia aua, aua lava ne’i lolo atu i le manatu lea faapea e le manatu mai o Ia mo outou, ma e Na te le silafiaina outou. O se pepelo faasatani lena, ua fuafuaina e faaleagaina ai outou” (i le Conference Report, Ape. 1997, 109; po o le *Liahona*, Iulai 1997, 78).

Luka 11:37–54 (tagai foi Mataiao 23:1–36; Mareko 12:38–40). E tatau ona tatou malamalama ma aloese mai le pepelo. (20–25 minute)

Aumai i le vasega ni atigi pusa se lua ua afifiina faalelei. Tuu se mea manaia ma mama i totonu o se tasi o atigi pusa (e pei o se fugalaaui matala) ma se mea eleelea i totonu o le isi (e pei o se meaai ua mafu). Ia valaaulia se tamaitiiti o le vasega e filifili se tasi o meaalofo, ma tuu atu le isi meaalofo i le isi tamaitiiti o le vasega. A maea ona la tatalaina ia meaalofo, ona fesili atu lea:

- O le fea e sili atu ona taua, o fafo po o totonu?
- O le a le mea na taufaasese i le meaalofo leaga?
- E faapefea ona faapenei ia isi tagata?
- Faitau le Luka 12:1. O le a le upu o loo i lenei fuaiupu e faamatalaina lelei ai le meaalofo leaga? (Pepelo.)
- O le a le faauigaina o le “tagata pepelo”?
- E faapefea ona ese mai se tagata pepelo mai se tagata o loo taumafai e fai le mea sa’o ae ua faia ni mea sese ona o vaivaiga?

Tuu atu i au tamaiti o le vasega uma se fasi pepa o loo aofia ai ni mau nei e tolu (ave ese faaupuga o loo tusia ai):

- Luka 11:37–39, 46. O se tagata pepelo o se tagata lea e sailia sese o isi ma e le salamo.
- Luka 11:42–44. O se tagata pepelo e saili ina ia maua viiga o le lalolagi nai lo le auaua atu i le Atua.
- Luka 11:53–54; 12:54–57; 13:14–16. O se tagata pepelo e feliuia ia poloaiga ina ia sailia ai sese o isi o faia mea lelei.

Ia valaaulia tamaiti o le vasega e faitau a latou fuaiupu na tuuina atu i ai, mafaufau po o le a le uiga, ma talanoaina po o le a le mea o loo aoao mai ai e uiga i le pepelo. Tusi ia faauigaga e tolu i luga o le laupapa, ma tuu atu i tamaiti e faafetaui a latou fuaiupu i le faauigaga sao.

Ia tuu atu i nisi o tamaiti o le vasega ia fesili nei:

- O le a se lagona o le Faola e uiga i le pepelo?
- Faitau le Faaliliuga a Iosefa Samita o le Luka 11:52. O le a se malamalamaaga taua o loo faaopopo mai e lenei fuaiupu i lo tatou malamalama i le pepelo?
- O le a se mea e mafai ona tatou faia ina ia aua ai nei avea i tatou ma ni tagata pepelo i le auala o loo tatou ola ai?

Ia valaaulia tamaiti o le vasega e faitau filemu le Alema 5:15–21, ma fesili atu:

- E mafai faapefea e le manatuaina o nei fesili ona fesoasoani ia te oe ina ia aua ne'i pepelo?
- O a faamanuiaga e oo mai ia i latou o e e le pepelo?

Luka 12–13 (tagai foi Mataio 5:25–26; 6:19–34; 16:1–12; 23:37–39; 24:40–51; Mareko 8:10–21; 13:32–37). O le avea moni ma soo e moomia ai le naunau e aoaoina o tatou lagona ina ia tutusa o tatou manaoga ma manaoga o le Faola mo i tatou. (15–20 minute)

Faitau ia faamatalaga nei pe tuuina atu i tamaiti o se pepa e tufaina atu. Ia talanoaina faatasi o se vasega pe aisea e moomia ai nei tulaga e fa mo le avea ai ma soo.

O Nisi Uiga o le Avea Moni ma Soo

O aoaoga a le Faola i le Luka 12 e mafai ona faavasegaina i ni mea e tatau ona tatou faia ma mea e tatau ona tatou aloese mai le faia ina ia avea moni ai ma soo o Iesu Keriso. O nisi nei o uiga o le avea ma soo moni:

1. Aloese mai le pepelo (tagai Luka 12:1–3). O le pepelo o le faafoliga lea e faia pe talitonu i se mea ae o le mea moni lava o loo e faia pe talitonu foi i se isi mea (tagai foi 1 Korinito 5:7–8).
2. Tuu le faatuatua i le Atua ae le o le tagata (tagai Luka 12:4–9). O malosiaoga o le tagata e faatapulaaina, ae o loo i le Atua ia mana uma. O lea la e tatau ai ona tatou faatuatua i le vaavaaiga a lo tatou Tama Faalelagi, aua e silafia e Ia mea uma lava (tagai v. 7; FIS, Luka 10:9–12).
3. Aua le manao i 'oa o le lalolagi (tagai Luka 12:13–34). Na aoaoina e Iesu ona soo e tatau ona aloese mai le

matapeapea. O le faataoto o loo i fuaiupu e 16–20 o loo faaali mai ai lea tulaga. Na saunoa mai ia Elder James E. Talmage e faatatau i le tagata mauoa i le faataoto lenei:

“O ana fuafuaga mo le tausaga lelei o fua o ana faatoaga ma ana mea ua maua e le faapea e leaga, e ui lava atonu sa manatunatu o ia i ni auala e sili atu ona lelei e tufatufa atu ai ana faasiliga, e avea ma faaolatotoga i e matitiva. O lana agasala e lua ona vaega; muamua, na ia manatu i lana fale teu oloa o le autu lea o le puipua o le ola faigofie ma le faaloloto; lona lua, o lona lauolaola i mea faaletino na toilalo ai o ia e faailoa le Atua, ma ua oo lava i le faitaulia o tausaga ua pei lava o ana mea. I le taimi lava o lona olioli manatu faapito na taia ai o ia” (Jesus the Christ, 439).

4. Ia saunia mo le Afio Faalua Mai o le Alii (tagai Luka 12:35–59; FIS, Luka 12:41–57). O i latou o e atamamai e vaavaai mo le toe afio mai o le Faola.

Vaevae le vasega i ni vaega se fitu. Ia tofiaina atu i vaega taitasi se tasi o mau nei:


- Luka 12:1–12
- Luka 12:13–21
- Luka 12:22–31
- Luka 12:32–40
- Luka 12:41–48
- Luka 13:1–9
- Luka 13:24–35

Tuu atu i vaega e sailia mai ni tali i fesili nei i totonu o a latou mau. A maea, ona tuu atu lea i vaega taitasi e faailoa mai a latou tali i le vasega.

- O le a se mea o loo aoao mai e nei fuaiupu e uiga i le avea ai ma se soo o Iesu?
- Aisea atonu o le a faigata ai ia i tatou ona mulimuli i lenei aoaoga?
- O ai tou te iloaina na faia se faataitaiga lelei o nei aoaoga?
- O a faamanuiaga e te talitonu e oo mai i soo o e latou te faatinoina nei aoaoga?

Luka 14–15

O le Soifuaga o Iesu Keriso



Faatomuaga

O soo o Keriso e naunau e aoaiina o latou lagona i se tulaga ina ia tutusa ai o latou manaoga ma le Alii. O e mulimuli i le Faaola latou te faamuamua ina le malo o le Atua ma teenaina ia faatosinaga a le lalolagi pa'u. Ae ui i lea, tatou te pauu uma atu lava i le agasala po o le teenaina se vaega o le tuueseeseina mai le Atua.

O nisi taimi, o i latou o e ua o ese mai le Alii e teenaina e isi. I faataoto o le mamoe na se, tupe na leiloa, ma le atalii faamaimau oa, na aoao mai ai e le Faaola faapea nai lo le faagaloina o i latou o e ua leiloloa, e tatau ona tatou faia mea uma i lo tatou malosi ina ia faasaoina ma faamagaloina ai i latou (tagai Luka 15:3–32). Nai lo le muimui e pei o le au Faresaio ina ua talia e Iesu ia tagata agasala ma aai faatasi ma i latou (tagai Luka 15:2), e tatau ona tatou aafia i le galuega a le Atua ina ia “faataunuuna le faaofuina o le tagata i le tino ola pea ma le ola e faavavau” (Mose 1:39; tagai foi MFF 4; 15:6; 18:10, 13–16). A o e faitauina le Luka 14–15 ia maitauina le mauaina o se mea na leiloa ona o le popole tele o se tasi na tali atu i ai.

Suesue ma le agaga tatalo le Luka 14–15 ma mafauafau i mataupu faavae nei ae le'i sauniaina au lesonea.

O Nisi Mataupu Faavae Tava o le Talalelei e Saili Iai

- E sili atu ona filifili ia lotomauualalo nai lo le faamalasia ia lotomauualalo ona o o tatou tulaga (tagai Luka 14:7–11; tagai foi Alema 32:13–16).
- O soo o Keriso e naunau e usiusitai i Ana poloaiga ma faia ia osigataulaga (tagai Luka 14:25–33).
- E mafai ona leiloloa tagata i le faaleagaga ona o le tele o mafuaaga. O nisi e seese malie ese atu lava (tagai Luka 15:4), o nisi ua leiloloa ona o le le amanaiaina (tagai Luka 15:8), ae o nisi ua filifili lava e le usiusitai (tagai Luka 15:11–13).
- Pe a tatou fesoasoani i isi ia salamo, tatou te lagonaina le olioli ma e olioli foi le lagi (tagai Luka 15:4–10, 20–24, 32; tagai foi 2 Nifae 26:23–28; MFF 18:10–13).
- E le tatau ona tatou lotovale i faamanuiaga e maua e isi (tagai Luka 15:25–32).

Fautuaga mo le Aoao Atu

Filifili mai manatu nei, pe faaoga ni ou lava manatu, ao e saunia ia lesonea mo le Luka 14–15.

Luka 14. E sili atu ona filifili ia lotomauualalo nai lo le faamalasia ia lotomauualalo ona o o tatou tulaga. (20–25 minute)

Fesili atu i tamaiti o le vasega:

- O le fea o vaega nei e sili ona e manao ia maua ai sou nofoa i le pito lava i luma: o le suega siamupini o se taaloga e te fiafia lava i ai, o se konaseti o loo aofia ai le faaili e te fiafia

i ai, o se faaaliga a faaili laau, o se po o tufaga o faailoga mo tagata lauiloa i ata tifaga, po o se faaipoipoga a se aiga tupu?

- O le a le mea e sili atu ona faatosina ia te oe i le mafauafau e auai i lenei faatasiga?
- O a ni faamanuiaga e te ono mauaina mai le auai atu i ai?

Ia valaaulia tamaiti o le vasega e faitau le Luka 14:1, ma fesili atu:

- O le a le faatulagaga?
- O le a sou manatu e faapefea le siosiomaga?
- O le a sou manatu o a ni lagona ma ni manatu o isi malo valaaulia?
- Afai sa e i ai foi iina o se malo valaaulia, o le a faapefea ona faamanuiaina oe mai nei aoaoga a le Faaola?
- O fea e mafai ona tatou maua ai foi se tulaga faapea i lenei aso?

Ta'u atu i tamaiti o le vasega ia faamanuiaga taua e oo mai ia i latou o e usiusitai i aoaoga a Iesu Keriso. Faitau le Luka 14:1–6 ma vaai i ai mo le aoaoga muamua o loo tuuina mai ai.

- Na faapefea ona faamamafaina e le tagata na maua i le ma'i fula lenei tulaga? (*Faaaliga*: O le ma'i fula o se faamai lea e fulafula ai vaega o le tino.)
- O le a se mea o loo aoaoina mai e lenei vaega ia i tatou e uiga i gaoioiga e talafeagai mo le Sapati?

Fai atu i tamaiti o le vasega e suesue le Luka 14:7–11.

- O le a le fetalaiga a le Faaola e uiga ia i latou o e mananao e nonofo i nofoa sili?
- O a nisi o “nofoa” sili po o nofoaga e taumafai tagata ina ia iloa mai ai?
- O le a le mea o loo aoao mai e le fuaiupu e 11 ia i tatou e uiga i le lotomauualalo?

Ia faailoa atu i tamaiti o le vasega faapea, i nei fuaiupu na faaoga ai e Iesu se faataoto na tuuina atu e Solomona i tagata i ona taimi (tagai Faataoto 25:6–7). Na aoao mai e Keriso le ave o le olaga e pei o se tausamaaga o se faaipoipoga lea e tatau ona faia ai nei faaiuga. A o i ai i le faataoto o le filifiliga tonu lava o le “potu pito i lalo,” i le olaga o le filifiliga sao o le lotomauualalo lea. I le fuaiupu e 11, na aoteleina ai e Iesu le uiga atoa o le olaga faaletino e ave o se suega pe o le a o ese ai tagata mai le faamaualuga ma auauna atu ia te la ma le faamaualalo. Tuu atu i se tamaitiiti o le vasega e faitauina le upusii lenei mai ia Peresitene Gordon B. Hinckley:

“E masani ona fesili mai tagata ia te au po o le a le fuaiupu e sili ona ou fiafia i ai i tusitusiga paia. E tele fuaiupu ou te fiafia i ai, ma o se tasi lenei o na fuaiupu, ‘Ia e lotomauualalo; ona taitaiina ai lea o oe e le Alii lou Atua, ma tali atu i au talosaga’ (MFF 112:10). E maeu se folafolaga mo i latou o e savavali e aunoa ma le faamaualuluga, ia i latou o e savavali e aunoa

ma le faalialiavale, ia i latou o e savavali e aunoa ma le faasausili, ia i latou o e savavali ma le faamaualalo. 'Ia e lotomauualalo; ona taitaiina ai lea o oe e le Alii lou Atua, ma tali atu i au talosaga.' E maeu le malosi ma le matagofie o lena folafolaga" (*Teachings of Gordon B. Hinckley* [1997], 265).

Ia valaaulia tamaiti o le vasega e faitau le Luka 14:12–24, ma talanoaina ia fesili nei:

- O a ni auala e faapei ai lenei "talisuaga tele" o le talalelei?
- O a ni mea e faalavelaveina ai nisi tagata mai le "talisua faatasi ma le Alii"?
- O a nisi o alofaga masani ai e te faalogoina mai tagata o e e le mananao e taliaina ia aoaga o le talalelei?
- O le a sou lagona e uiga i le luitau a le Faaola ina ia tatou talai atu i e matitiva, i e mumutu, i e pipili, ma e tauaso?
- O ai nei tagata, ae o fea foi tatou te sailia i ai i latou?

Tuu atu i se tamaitiiti o le vasega e faitauina le faaliliuga lenei a Elder James E. Talmage:

"O tagata osi feagaiga, o Isaraelu, o malo faaloologia patino lava nei. Ua leva ona talosagaina i latou, ma o la latou lava galuega i le avea ai ma nuu o le Alii na malilie ai e avea ma tagata o le talisuaga. Pe afai o le a maea mea uma i le aso ua atofaina, o le a valaauina i latou e le Avefeau na auina mai e le Tama; sa i ai foi o la faatasi ma i latou. Ae o le popole i 'oa, o le manao i mea faaletino, ma le tuinanau i le olaga na lofia ai i latou; ma sa latou tatalo ina ia faanoiina i latou pe faailoa mai foi e le mafai ona latou auai mai po o le le o mai foi. Ona auina atu lea o le valaaulia i Tagata o Nuu Ese, o e sa vaai mauualalo i ai e matitiva i le faaleagaga, e pipili, e mumutu, ma tauaso. Ma mulimuli ane, e oo lava i tagata e leiloa le Atua sa i luga o le pa, ma tagata ese sa i faitotoa o le aai paia, o le a talosagaina e auai atu i le talisuaga. O nei talaiga e le'i faamoemoeina, o le a faagateteina ai, seiloga lava o se faatauanau atu ma le faamautinoa atu faapea o le a aofia ai i latou i malo valaaulia, o le a latou lagonaina le mumusu e o mai. O le tulaga o i latou o e na tuai mai, ina ua uma ona latou gauai atu muamua i mea sa latou loto i ai, o loo faailoa mai i fetalaiga a le Alii: 'Aua ou te fai atu ia te outou, E leai lava se tasi o ia tagata e na talaiina, e 'ai i la'u talisuaga nei.'" (*Jesus the Christ*, 452).

Ia faailoa atu i tamaiti o le vasega faapea e tasi le vaega na o mai ina ua valaauliaina, ae o le isi vaega e le'i o mai seia oo ina ua faamalositia (tagai f. 23). Faitau le Alema 32:13–16 ma fesili atu: Aisea e sili ai lou sau ina ua valaaulia oe nai lo le sau ina ua "faamalositia" oe?

Luka 14:25–33. O soo o Keriso e naunau e usiusitai i Ana poloaiga ma faia osigataulaga.

(15–20 minute)

Aumai ni nai oloa o loo pipii ai o latou tau i le vasega. Fesili atu:

- O ai e fuafuaina le tau o mea?
- O le a le mea e taugata ai isi mea nai lo isi?

Tusi le *O le Tau o le Avea ma Soo* i luga o le laupapa. Ia valaaulia tamaiti o le vasega e faitau le Luka 14:25–35, ma fesili atu:

- O a tau o le avea ai ma soo o Iesu Keriso?
- Aisea e maualuga ai le tau o le avea ma soo?
- Aisea e taua ai mo oe lou fuafua nei po o le a le tau e mulimuli ai i le Faaola i lou olaga atoa? Aisea?
- O le a le mea na fautua mai e le Faaola i le Luka 14:28–32 e faatatau i le tau o le avea ma soo?

Ta'u atu i tamaiti o le vasega o le avea moni ma soo e faamuamua ai le malo o le Atua nai lo isi mea uma. E pei ona faailoa mai e Elder John Taylor, a o avea ma se sui o le Korama a le Toasefululua, "O le malo o le Atua po o le leai o se mea" (i le *Journal of Discourses*, 6:21). Faitau le saunoaga lenei mai ia Neal A. Maxwell, o le sa avea ma Komesina o Aoga a le Ekalesia:

"O loo i ai se lagona faapitoa o le manaomia vave o loo molioo atu i totonu o tagata o le Ekalesia i soo se mea lea e faapea mai ai, e lemu, ae tagitagi mai pea—o le taimi lenei mo i tatou e filifili ai! E le na o le Atua lea o le a tauanau mai pea ina ia tatou filifili mo i tatou lava, ae faapea foi ia i latou o e o loo faalagolago mai ia i tatou, pe faaoga foi i tatou e avea o se vaega e faamaonia ai, e manaomia ma e tauaogaina ina ia iloa po o le fea le itu o loo tatou agai i ai. E leai se aoga e tu atu ai e avea ma faaola pe afai e le o se tagata aau se tasi. E leai se aoga e avea ai ma se taiala pe afai e tuua e se tasi lona tulaga ae femiomio faatasi atu ma le motu o tagata i le sailia o se isi auala, 'aua e leai lava se isi ala,' aemaise lava i se taimi e matuai tu ai lava se pioga i le ala o le lalolagi ma le ala sao ma le vaapiapi. E tatau i le soo ona tu e le gata i 'nofoaga paia' ae o mataupu paia ma ia 'le maluelueina.'

"I le oototoga, o mea e tutupu i o tatou taimi ma le tulaga leaga faaleagaga o loo i le lalolagi ua tupu mai ai foi ni tulaga lava ia e tasi na feagai ma le toatele o soo o e na mulimuli ia Iesu. Sa latou mulimuli atu ia te ia seia oo ina ua talai atu ia 'faamatalaga mamafa'—o aoaga faavae ia e le gata e matuai manaomia ai le talitonuga, ae o le faatinoga; o aoaga faavae o le a tulaga ese mai ai i latou mai le lalolagi. E finagalo le Alii ina ia iai se va—i amioga—i le va o i tatou ma le lalolagi, e le faapea ona tatou te le agalelei i tagata, ae o le mea tonu lava ona tatou te

alolofa ia i latou. Ona o le lalolagi ua tatau ai ia i tatou ona faapaiaina o tatou lava tagata. Ina ua feagai ia soo o Iesu ma lo latou taimi o le upumoni, na tusia e Ioane, 'Talu mai lena taimi o le toatele o ona soo na toe foi i tua, ma sa le toe savavali faatasi ma ia,' ona faliu lea o Iesu i e na totoe ma fesiligia i latou, 'Pe tou te fia o ese foi?' (Ioane 6:66–67.)" (*A Time to Choose* [1972], 39–40).

Ia fetufaai atu i tamaiti o le vasega lau tautinoga i le talalelei i le aveva ai ma se soo o Iesu Keriso.



Luka 15 (tagai foi Mataiao 18:12–14). Pe a tatou fesoasoani i isi ina ia salamo, tatou te lagonaina le olioli ma e olioli foi le lagi.
(45–50 minute)

Ia valaaulia ni nai tamaiti o le vasega e fetufaai atu ni mea na latou oo i ai ina ua leiloa se mea sa taua tele ia i latou.

- Na faapefea ona faigata lau taumafai ina ia sailia le mea sa leiloa?
- O a ituaiga lagona na oo ia te oe ina ua leiloa ia te oe se mea e sili ona taua?
- Pe na i ai se taimi na e leiloa ai po o se tasi foi o lou aiga?
- E faapefea ona ese ni lagona e oo ia te oe mo se tagata e leiloa mai ou lagona mo se mea na leiloa?
- Faitau le Mataupu Faavae ma Feagaiga 18:10–16. O le a le mea o loo ta'u mai e nei fuaiupu e uiga i le leiloa?
- O le a le mea e sili ona leaga, o le leiloa i le faaletino po o le faaleagaga? Aisea?

Tuu atu i tamaiti o le vasega e faitau le Luka 15:1–3, ma fesili atu:

- O a vaega o tagata na aoaoina atu i ai e Iesu ia nei faataoto?
- O a ni auala e mafai ai ona mafaufauina se tasi ua "leiloa"?

Ia uunaiina tamaiti o le vasega e manatua po o ai lea o loo aoaoina a o latou suesueina ia faataoto i le mamoe na se, o le tupe na leiloa, ma le atalii faamaimau 'oa. Fesili atu:

- E te iloina se tasi e te lagona ua "leiloa faaleagaga"?
- O a nisi o mafuaaga e teena ai e tagata le talalelei?

Ia valaaulia tamaiti o le vasega e tuu mai se faataitaiga pe mafai faapefea e se Au Paia o Aso e Gata Ai ona leiloa faaleagaga e aunoa ma le tuua o le Ekalesia.

Faitau le Luka 15:4, 8, 11–13 ma vaai ai mo mafuaaga eseese o mea taitasi na leiloloa ai o loo i ai i nei faataoto. Faitau le saunoaga lenei mai ia Peresitene Tavita O. Makei i le vasega, a o aveva ma se tasi o le Au Peresitene Sili pe tuuina atu foi o se pepa e tufatufaina atu:

"Na faapefea ona leiloa le [tamai mamoe o loo i le faataoto o le mamoe na se]? E le'i faatautee o ia. Afai e te mulimuli lelei i le faatusatusaga, sa saili lava e le tamai mamoe le mea e tausi ai o ia i se tulaga atoatoa ma faatulafonoina, ae masalo o lona le mafaufau i ai, po o le le mautonu, na ia mulimuli atu ai i faatosinaga a le fanua, o le lauusiusi o le vao seia oo ai lava ina ua alu ese atu ma le lafu ma ua leiloa ai.

"O lea o loo i ai i latou faapena i totonu o le Ekalesia, o alii talavou ma tamaitai talavou, o e ua o ese mai le lafu i ni auala atoatoa ma faatulafonoina. O loo latou sailia le faamanuiaina, faamanuiaina i pisinisi, faamanuiaina i galuega, ma e le umi ae latou le toe fiafia i le Ekalesia ma oo ai lava ina le toe fesootei ma le lafu; ua latou le iloa le ala o le faamanuiaina moni, atonu e le'i mafaufau i ai, atonu sa tau le mautonu, ae o nisi foi tulaga, atonu sa naunau lava i ai. Ua faataasooina i latou i le mea moni o le faamanuiaina. . . .

"I le tulaga [i le faataoto o le tupe na leiloa] o le mea na leiloa e le'i pa'u ia te ia lava lona leiloa. O le tagata ua faatuatua ina i ai le tuuina i ai o lena tupe, ua faatamala pe le popole foi, ua mafua ai ona leiloa. E i ai le eseese ou te manatu e fetuai mo i tatou i le afiafi lenei. O lo tatou luitau e le na o tupe, ae o agaga ola o fanau, autalavou, ma tagata matutua. . . . Atonu o loo i ai se tasi o loo fealualuai solo ona o se faamatalaga tuulafoai a se teineitiiti o lana tupulaga i le [polokalama a tamaitai talavou], . . . ma ua tuu atu o ia e le Peresitene . . . e alu, ma ua le toe tuitataoina o ia i le isi afiafi o le Aso Lua ma valaaulia o ia e sau. O se isi tagata atonu ua leiloa ona o le . . . le popole o le faiaoga o le Aoga Sa o le ua faamalieina lava i tagata e toasefululima sa i ai i lena taeao, nai lo le manatu i le toasefululima o e o loo taase solo ona o le le amanaiaina. . . .

"O le faataoto lona tolu o le atalii faamaimau 'oa, le 'atalii laitiiti,' ua ta'uina mai ia i tatou, e le'i lava lona matua i le faiga o lana faaiuga. Sa le fiafia o ia i le vaavaaiga malu a lona tama, ma sa sili atu ai ia te ia le alu ese mai le taitaiga lelei a lona tama. Sa matuai ma'oti lava lona manao i le mea e ta'ua o le saolotoga, o lea sa ia talosaga atu ai se'i alu e faataitai ona apaau. O lea na ia faapea atu ai, 'Lo'u tama e, ina aumaia ia o la'u vaega ma o le a ou alu.' Na tuuina atu i ai e le tama ia te ia lana vaega, ma ua faapea ona ia alu atu.

"O le tulaga lenei i le manao, o le filifiliga, le filifiliga mautu. O se tetee foi lenei i le pule. O le a le mea na ia faia? Na ia faaluina a na tupe i mea le aoga, na ia faama'imauiina lana vaega faatasi ma fafine talitane. O le auala lena o loo leiloloa ai i latou.

"O talavou o e ua amata ona faamalieina o latou tuinanau ma lagona ua agaigai atu i latou i le ala o le liliuese e pei lava ona mautinoa o le oso a'e o le la i sasae. Ou te le taofiofia mai le autalavou; ae soo se

alii po o se tamaitai ua amata ona uia le ala o le faaesea, o le ola le mama o le a faaeseeseina o ia lava mai le lafu e pei ona mulimuli mai o le pouliuli i le malamalama. . . .

“I tulaga faapea e laitiiti lava se mea tatou te mafaia ae na o le lapatai ma faaoleole atu seia oo ina iloa e le tagata ua liliuese, e pei o le atalii faamaimau ‘oa, i le taimi mulimuli ‘ona atamai ai lea o ia.” (David O. McKay, i le Conference Report, Ape. 1945, 120–23).

Fesili atu: O a mafuaaga o loo tuuina mai e Peresitene Makei i lenei saunoaga i le mafuaaga e leiloloa ai tagata? Ia valaaulia tamaiti o le vasega e fetufaa mai pe faapefea ona leiloloa tagata i aso nei ona o mafuaaga lava nei e tasi.

E tusa lava po o le a le mafuaaga e pa’u ese ai se tagata, na aoao mai e, Elder James E. Talmage:

“O le olioli . . . e matuai tele i le lagi i se agaga ae toe foi mai na leiloa, e tusa lava po o lea agaga e faatusaina i se tamai mamoe na alu mamao, po o se tupe na pa’u ese ona o le faatamala o se tausimea, po o se atalii foi na matuai mautinoa lava lona alu ese mai le fale ma le lagi. E leai se faamaoniga o le manatu faapea o se tagata agasala ua salamo e ao ona tuuina atu i ai le faamuamua nai lo se agaga amiotonu o le na teenaina le agasala. . . . O le tetee e pei o le agasala, o le tagata agasala e taua i le silafaga a le Tama, ona o lona salamo ma le toe foi mai i le amiotonu. O le leiloa o se agaga e matuai moni lava ma e matuai leiloa lava foi i le Atua. E tiga o ia, aua o Lona finagalo ina ia le fano se tasi” (*Jesus the Christ*, 461).

Fesili atu: O le a le finagalo o le Alii i o tatou lagona e faaali atu ia i latou o e ua leiloloa? Ia valaaulia tamaiti o le vasega e faitau le vaega o loo totoe o le Luka 15 e i latou lava ma faailoga pe tusi uma i lalo ia upu ma fuaitau e mafai ona latou mauaina lea e faaalai ai le popole, o mea na faia, ma uiga o i latou na i ai se mea na leiloa. A maea i latou, ona latou talanoaina lea po o le a le mea na latou mauaina. Fesili atu: O le a se mea e mafai ona tatou faia ina ia fesoasoani ai ia i latou o loo i le tatou aoga, uarota, po o le aiga ua leiloloa faaleagaga?

Ia valaaulia tamaiti o le vasega e mafaufau po o le a so latou lagona pe a latou toe mauaina se mea na leiloa. Toe faitau le Luka 15:5–7, 9–10, 20–27, 32 ma fesili atu: O a ni uiga o loo i ai i nei fuaiupu na sili ona faagaetia ai oe? Ia valaaulia tamaiti o le vasega e fetufaa atu ni mea na latou oo i ai e faatatau i le toe foi mai o se uo po o se tagata o le aiga i le talalelei. Ia molimau atu i le olioli e lagonaina i le galuega faafaifeautalai.

Ia faasino i le fuaiupu 28–30 ma faailoa atu faapea o nisi taimi e mafai ona i ai ni o tatou lagona e tai pei foi o le uso o le atalii faamaimau ‘oa. Fesili atu:

- Pe ua e faaloga ea i se tasi o faamatalaina mai na lagona?

- O le a se mea e te ta’uina atu i se tasi ua lagonaina le lotovale ia i latou o e ua salamo ma mauaina faamanuiaga silisili?

Faitau le faamatalaga lenei mai ia Elder Bruce D. Porter, o se tasi o le Au Fitugafulu:

“O le faataoto i le atalii faamaimau ‘oa o se faataoto o i tatou uma. E faamanatu mai ai ia i tatou, i ni tulaga, o i tatou o atalii ma afafine faamaimau ‘oa a lo tatou Tama o i le Lagi. E pei ona tusia e le Aposetolo o Paulo, ‘aia ua agasala tagata uma, ma ua le oo i le viiga mai le Atua’ (Roma 3:23).

“E pei o le atalii na sese i le faataoto a le Faaola, ua faapea foi ona tatou malaga atu i ‘se nuu mamao’ (Luka 15:13) ua tuueseeseina ai i tatou mai lo tatou aiga i le muai olaga. E pei o le faamaimau ‘oa, o loo tatou fetufaaaina se tofi paia, ae o a tatou agasala ua tatou lafoai ai se vaega o lena tofi ma tatou oo ai i le ‘oge tele’ (f. 14) o le agaga. E pei o ia, tatou te aoao e ala i tulaga faigata tatou te oo i ai lea e le toe aoga ai ia tuinanauga ma manaoga faalelalagi nai lo atigi mea o loo aina e puua. Tatou te mananao ina ia tatou toe faalelei ma lo tatou Tama ma toe foi atu i Lona afioaga. . . .

“I le faataoto o le atalii faamaimau ‘oa, e na o le atalii matua sa tumau le faamaoni i lona tama; i ana lava upu, ‘Ua leai lava sau poloaiga ua ou solia’ (Luka 15:29). E faapea foi, i le ata o le faaolataga ona leai se agasala ma se pona o le Uluai Alo na fanaua o le Tama. Ae peitai, e matuai taua lava se eseese. I le faataoto, na leaga le loto o le atalii matua i le faataliga o le toe foi mai o le faamaimau ‘oa. Ae peitai, i le ata o le faaolataga, o le Atalii Matua na *mafai ai* ona toe foi uma mai ia faamaimau ‘oa.

“Na auina mai o Ia e le Tama e togiola i Ona atalii ma afafine mai le nofo pologa. Na faatumulia le Ulumatua i le alofa. ‘Ou te faaolaina i latou ai mea uma latou te nonofo ai, ua latou fai ai le agasala, ou te faamamaina foi i latou’ (Esekielu 37:23). Na Ia faimalaga i le ala uma e saili ma aumaia i latou o faamaimau ‘oa i le aiga. Ma sa Ia mauaina ai i tatou o loo le lavava, fia aai, ma lotovavai. Na ia fafagaina ma faafeinu i tatou. Sa Ia mau faatasi ma i tatou ma ia fesui i a tatou avega. Ma i se faatinoga o le alofa silisili, na aveina ai e le Atalii Matua Lona lava tamaoiga ma Ia faasaoina i tatou taitoatasi. Ina ia mafai ona togiina uma la tatou aitalafu, ua noatia o Ia ina ia ositaulagaina Lona lava tamaoiga uma, ioe, o mea uma ua ia te Ia, e oo lava i sina mea itiiti.

“E i ai latou ua teenaina le togiola na ofoina mai. Ua saisaitia i le faamaualuga, ua sili ia i latou le pologa i le salamo. Ae o i latou o e ua taliaina Lana ofo ma faagalo o latou ala sese, e mauaina le faamalologa i Ona aao ma le saolotoga i Lana meaalofa. O nei mea o le a Ia toe taitaina atu ai i tatou i le Tama ma pese o le olioli e faavavau” (i le Conference Report, Set.–Oke. 1995, 16; po o le *Liahona*, Ian. 1996, 15).

E mafai ona tuuina atu lau molimau i tamaiti o le vasega faapea e tatau ona tatou taliaina ma le alofa i latou o e ua salamo ma toe foi mai i le talalelei.

Fai atu i se tamaitiiti o le vasega e usu le “Pele i le Leoleo Mamoe” (Viiga, nu. 135), pe usu faatasi o se vasega. Ia valaaulia ia tamaiti o le vasega e gauai atu i upu ma mafaufau loloto i le mea o loo finagalo ia Iesu tatou te faaali atu ia i latou o e ua se ese, e tusa lava po o a o latou mafuaaga.

Tuu atu i tamaiti o le vasega ia fesili nei e fai ma pepa e tufaina atu. Ia uunaiina i latou e manatunatu i fesili nei i le isi vaiaso o loo sosoo ai a o latou suesueina a latou tusitusiga paia. I se vasega i le lumanai, ia valaaulia i latou e fetufaai atu le musumusuga e mafai ona oo mai i le manatunatu i ai i nei fesili, suesue ma tatalo.

O le a lo Tatou Tiutetauave i le Avea ai ma Soo o Keriso ina ia Fesoasoani Atu i ou Uso ma Tuafafine?

O le Mamoe na Se (o i latou ua se ese)

- E ia i ni au uo ua se ese mai le Ekalesia?
- O le a se mea e mafai ona e faia ina ia taofiofia ai pea i latou i totonu o le lafu?

O le Tupe na Leiloa (o i latou ua le amanaiaina)


- Pe i ai ea ni tagata o le Ekalesia o loo moomia ona e aapa atu i ai pe mafai foi ona faamanuiaina mai lou manatu atu i ai?
- O le a se mea e mafai ona e faia ina ia faauo atu ai i tagata i sauniga a le ekalesia ma isi faatasiga?
- Pe sili atu ea lou taimi ma taumafaiga e faaaluina i ou tofiga faaleekalesia ma tagata ua valaauina oe e taitai ma e auauna atu i ai?

O le Atalii Faamaimau 'Oa (o i latou o e na matuai mananao e le ususitai i poloaiga)

- O le a se vave e te faauo atu ai i tagata agasala e toe foi mai i le lafu?
- Pe faigofie ea ona e iloaina le faia o tala e uiga ia i latou, po o le i ai o sou alofa faamaoni mo i latou?

Luka 16–18

O le Soifuaga o Iesu Keriso



Faatomuaga

Na aoao mai le Faaola faapea e avea i tatou ma soo moni i le malo o le Atua i le faapaiaina lea o o tatou olaga i le finagalo o le Tama Faalelagi. A o e suesueina le Luka 16–18, ia mafaufau i tautinoga na moomia mai e le Faaola mai Ona soo ma le auala e faatatau ai foi ia i tatou.

Suesue ma le agaga tatalo le Luka 16–18 ma mafaufau i mataupu faavae nei ae le'i sauniaina au lesona.

O Nisi Mataupu Faavae Tava o le Talalelei e Saili Iai

- Ua tuuina mai e le Alii ia i tatou mea uma tatou te umia ma malosiaga. Afai tatou te auauna ia te Ia, o le a tuuina mai e le Alii ia faamanuiaga silisili, ae afai e leai, o le a Ia aveeseina mea ua ia i tatou (tagai Luka 16:1–15; 18:18–30; tagai foi Luka 19:12–27; 2 Nifae 28:30).
- A mavae le oti o le a ulu uma atu tagata i le lalolagi o agaga, lea o loo taofia ai ia tagata amioleaga i le malaia (falepuipui o agaga) ae o tagata amiotonu e i le parataiso (tagai Luka 16:19–31; tagai foi Alema 34:32–34; 40:11–14).
- O i latou e le talitonu i le upumoni ona o upu a se perofeta o le a le talitonu foi i se vavega (tagai Luka 16:27–31).
- E tatau ona tatou faailoa atu le loto faafetai mo faamanuiaga ua tatou maua (tagai Luka 17:11–19; tagai foi Alema 7:23; MFF 59:7, 21).
- O i latou e tumau pea i le tatalo faamaualalo latou te mauaina faamanuiaga a le Alii (tagai Luka 18:1–8; tagai foi Alema 34:17–27).
- O se naunau e ositaulagaina mea uma ua tatou maua mo le malo o le Atua e fesoasoani lea e aumaia i tatou ia Keriso (tagai Luka 18:18–30; tagai foi Omina 1:26; Moronae 10:32–33).

Fautuaga mo le Aoao Atu

Filifili mai se manatu lenei, pe faaoga nisi o ou manatu, a o e sauniaina au lesona mo le Luka 16–18.

Luka 16:1–15. Ua tuuina mai e le Alii ia i tatou ia mea uma ma malosiaga, ma e tatau ona tatou faaogaina e fai ai Lana galvega. (35–40 minute)

Ia valaaulia se tamaitiiti o le vasega ua atinaeina se taleni e fetufaai mai i le vasega. E mafai ona faia lenei vaega e avea ma se vaega o le sauniga lotu. Fai atu i tamaiti o le vasega e mafaufau i fesili nei:

- O le fea mea e te fiafia i ai, po o gaoioiga e sili ona tele lou taimi e faaalu ai?
- E fia se aofaiga atoa o itula e te manatu ua e faaaluina ai i lou olaga?

Ia valaaulia ni nai tamaiti o le vasega e fetufaai atu a latou tali. Fesili atu:

- Aisea ua tele ai lou taimi ua faaaluina i lenei taleni po o lenei mea e te fiafia i ai?
- O a ituaiga faamanuiaga ua e mauaina ona o se taunuuga o le tele o le taimi ua e faaaluina i ai?
- Pe na fesoasoani ea ia te oe ina ia e latalata atu ai i le Atua i soo se auala?
- Pe i ai ni auala ua tosoeseina ai oe mai le Atua?

Ia valaaulia tamaiti o le vasega e faitau le Luka 16:1–7, ma fesili atu:

- O le a le mea na faaalu ai e le auauna o loo i lenei faataoto lona taimi e faia ina ua ia iloaina e ono le toe maua ai lona tofiga?
- E ui lava sa amioletonu le auauna, ae na faapefea ona tautala atu le tagata mauoa ia te ia i le fuaiupu e 8?
- O le a sou manatu o le a le mea na faia e le auauna amioletonu na agavaa ai o ia mo lenei viiga?
- O a ni auala e mafai ai e “fanau a lenei lalolagi” ona manatu e atamamai atu nai lo “fanau a le malamalama”?

Faitau le Luka 16:10–12 ma fesili atu: O le a se mea o loo aoao mai e lenei faataoto e uiga i lagona o le Atua ia i latou o e faataunuaina ma le faamaoni a latou galuega? Ia molimau atu i le taua o le galue ma le naunautai i se sini aoga ma le auala e mafai ai e le Atua ona faaaogaina le auaunaga a i latou o e mafai ona faatuatuaina e faalateleina Lana galuega.

Talu ai ona e fiafia le Atua i a tatou tautinoga, e iai nisi o sini e tatau ona matuai gauai atu i ai nai lo isi. Faitau le Luka 16:13–14 ma le Mataio 22:35–38 ma fesili atu:

- O fea e tatau ona faaautu i ai o tatou naunautaiga?
- Ona faapefea ona tali atu le au Faresaio i aoaoga a le Faaola?
- Faitau le Luka 16:15. O a mafuaaga o loo tuuina mai i lenei fuaiupu mo a latou amioga?

Fai atu i tamaiti o le vasega e faitau le Luka 16:19–25 ma vaai ai po o le a le mea o loo aoao mai e leni faataoto e uiga i le tuuina atu o o tatou taimi ma taumafaiga i mea a le Atua nai lo ‘oa o le lalolagi.

- E faapefea ona faatatau lenei lesonea i o tatou olaga?
- O a ni fautuaga o loo i ai lenei lesonea mo gaoioiga ma mea e fiafia i ai e ao ona tuuina atu i ai lou taimi?

Ia uunaiina tamaiti o le vasega e iloiloaina a latou gaoioiga. Fai atu i ai latou e manatunatu pe mafai faapefea ona faaaogaina a latou taleni ina ia fesoasoani ai i le fausiaina o le malo o le Atua ma auauna atu ai i isi. Faitau le Luka 16:13, ma toe faatusatusa i le Alema 39:12–14. E tusa ai ma nei fuaiupu, o le a le taua o le tamaoiga ma mea ua tatou maua pe a tatou oti? Ia molimau atu afai tatou te auauna atu i le Atua ae lo mamone (mea a le lalolagi), o lo tatou tau i o le a faavavau.

Faaliga: Aua ne’i faailoaina sao atu i tamaiti o le vasega faapea o le taimi e faaalu i mea e fiafia i ai, atinaeina o taleni, po o le auai i gaoioiga faafifaia, faapea ma isi mea o se taimi maimau lea. E manaomia e tamaiti o le vasega se faapaleniina o le amiotonu i o latou olaga.

Luka 16:19–31. A maea le oti ona ulu uma atu lea o tagata i le lalolagi o agaga, lea e o atu ai e amioleaga i le malaia (falepuipui o agaga) ae o e amiotonu e i le parataiso. O le Togiola a Iesu Keriso na sosoina ai le vanu sa i le va o le falepuipui o agaga ma le parataiso. (20–25 minute)

Vaelua lou potuaoga i le tuu ai lea o ni nofoa po o le faailoga foi i se mea faapipii po o se manoa. Ia valaaulia teine e nonofo i le isi vaega ae o tama e nonofo i le isi. Ia talanoaina pe faapefea ona tatou faavasegaina pe tuuvaegaina ia tagata i nisi o taimi e fuafua i o latou uiga masani.

- O a nisi o uiga e mafai ona tatou faaaogaina e faavasega ai tagata o le vasega? (Tausaga, maualuga, lanu o le lauulu, mea e fiafia i ai.)
- O a ituaiga vaega o loo i ai i la outou aoga?
- O ai e fuafuaina po o le fea vaega e te fetuai i ai?

Ta’u atu i tamaiti o le vasega e masani ona faavasegaina e tusitusiga paia ia tagata i ni vaega se lua: o e amioleaga ma e amiotonu. Ia talanoaina faapuupuu nei vaega e lua ma fesili atu:

- O le fea vaega e sili ona outou mananao tou te auai atu i ai? Aisea?
- O ai e fuafuaina po o ai i latou e amiotonu?
- O a ni auala e tuueseeseina ai e amioleaga mai e amiotonu?

Ia valaaulia tamaiti o le vasega e faitau le faataoto o loo i le Luka 16:19–31.


- O a faailoga na faaaoga e Iesu e aoao atu ai e uiga i le amioleaga ma le amiotonu?
- O le a le aoaoga faavae taua o loo aoaoina i le fuaiupu e 22–26 e faatatau i le amioleaga ma le amiotonu ina ua mavave ona la feoti? (E tuueseeseina i laua i le lalolagi o agaga.)

Faitau le Luka 16:26–31 ma fesili atu:

- O le a le mea na manao le tagata mauoa e faia e Lasalo mo ia?
- O le a sou manatu aisea na manao ai o ia i lona aiga ina ia faalogo i le talalelei?
- O a auiliiliga o lenei faataoto o loo faali mai ai na iu ina malamalama le tagata mauoa o a tatou mea e fai i lenei olaga e aafia ai le mea o le a tupu ia i tatou i le isi olaga?

Fesili atu: O le a le mea o loo faatatau i ai le “fatafata o Aperamo” o loo i le fuaiupu e 22? Faitau faatasi ma tamaiti o le vasega le Alema 40:11–12 e faali atu ai afai e feoti tagata amiotonu e taliaina i latou i le parataiso. Fesili atu: O le a le mea o loo faatatau i ai le “afi” o loo i le fuaiupu e 23? Faitau le Alema 40:13–14 e faailoa atu ai o e amioleaga e lafoina i fafo

i le pogisa, o se isi lea faaupuga o le falepuipui o agaga o loo i ai i nei fuaiupu (tagai 1 Peteru 3:19). Ia tusi i luga o le laupapa le ata lenei:



- Faitau le Luka 16:26. E i ai se auala e sosoo ai le vanu o loo i le va o le parataiso ma le falepuipui o agaga?
- Faitau le 1 Peteru 3:18–19. O le a le mea na faia e Keriso mo agaga i le falepuipui?

Tusi le ata lenei i tafatafa o le ata muamua, ma faamalamalama atu faapea o le Togiola a Keriso ua sosooina ai le avanoa o loo i le va o le parataiso ma le falepuipui o agaga.



Faitau atu i tamaiti o le vasega le Mataupu Faavae ma Feagaiga 138:29–30, 57–59. Ia molimau atu ona o le Togiola a Keriso, ua maua ai e tagata uma le avanoa e faalogo atu ai i le savali o le talalelei. Ia faamalamalama atu faapea o i latou e le mauaina le avanoa i le lalolagi o le a maua le avanoa e faalogo ai i le talalelei i le lalolagi o agaga ma mauaina ai sauniga o le faolataga e ala i sauniga e sui mo i latou ina ia mafai ona latou auai faatasi ma e amiotonu i le parataiso. Faitau le Alema 34:32–34 ma fesili atu:

- O le a le vaega o le a le mafai ona salamo ma faalogo i le talalelei i le isi olaga?
- Afai o le Togiola na sosooina le avanoa i le va o e amioleaga ma e amiotonu i le lalolagi o agaga, pe mafai ona ia sosooina le avanoa i le va o i latou i le taimi o le olaga faaletino? E faapefea ona sosoo?

Ia valaaulia tamaiti o le vasega e fetufaai atu ni mea na oo i ai lea na latou molimauina ai le suia o se tasi ma auai faatasi ma i latou o e o loo taumafai ina ia amiotonu.

Luka 17:1–10. O le usiusitai i poloaiga ma auauna atu i isi e fesoasoani ai ia i tatou e faateleina lo tatou faatuatua ma faataunuuna galuega faigata. (15–20 minute)

Fai atu i se tamaitiiti o le vasega e faatino atu se taleni na te le'i faaitaia muamua lava. (Mo se faaitaiga, fai atu i se tasi e leiloa ta piano e taina le piano mo le sauniga lotu, po o le fai atu foi i se tasi e le mafai ona faaluma mo le vasega e taumafai e faaluma mo le vasega.) Fesili atu:

- O le a le faigata o lenei galuega?
- Pe foliga mai e le mafaia ona e faia?
- Aisea e mafai ai e nisi tagata ona faia lelei le galuega ae le mafaia e isi?

A faapea foi i malosiaga faaletino, o le atinaeina o malosiaga faaleagaga e mafai ona matuai faigata lava. Fai atu i tamaiti o le vasega e faitau le Luka 17:1–4.

- E tusa ai ma nei fuaiupu, o le a le mea na manaomia mai e le Faaola mai Ana Aposetolo?
- Aisea e mafai ai ona avefa lenei mea ma se mataupu faavae e faigata ona ola ai?
- Faitau le fuaiupu e 5. O le a le mea na faatalitonuina ai le au Aposetolo latou te manaomia ina ia mafai ai ona latou usiusitai i le fautuaga a le Faaola?

Manatunatu i le tuuina atu o fesili nei:

- O le a le mea o loo aoao mai e fuaiupu e 6 ia i tatou e uiga i le mana o le faatuatua?
- O a ni luitau e feagai ma nisi tagata e mafai ona faatusaina i le lia'iina o se laau o le sukamina?
- E mafai faapefea e le mana o le faatuatua ona fesoasoani ia te oe e faatoilaloina ia luitau?

Ia faamalamalama atu i tamaiti o le vasega faapea na aoao atu e le Faaola i Aposetolo se faataoto ina ia fesoasoani ai ia i latou ia malamalama i le auala e faateleina ai lo latou faatuatua. E pei lava ona tatou faaitaia e tatou te atinaeina ai foi ia tomami ma taleni, pe a tatou usiusitai i mataupu faavae na aoao mai e le Faaola, o le a mafai ai ona tatou faateleina lo tatou faatuatua. Faitau le faataoto i le auauna le aoga o loo i le Luka 17:7–9 ma fesili atu:

- O le a le mea a le auauna o loo i le faataoto na fai?
- E mafai faapefea e le auauna atu ma le usiusitai ona faateleina lo tatou faatuatua?

Ia valaaulia tamaiti o le vasega e mafaufau i taimi i o latou olaga sa latou usiusitai ai pe tuuina atu foi se auaunaga. Fesili atu: O le a le mea e tupu i lou faatuatua i na taimi? Ia molimau atu a o tatou faatinoina lo tatou faatuatua i le Alii o Iesu Keriso, o le a tatou iloina ai o o tatou vaivaiga faaleagaga o le a avefa

ma o tatou malosiaga (tagai Eteru 12:27). Ia faailoa atu, a o faateleina lo tatou malosi, o le viiga o mea tatou te faataunu-uina e tatau ona avatu ia Iesu Keriso. Faitau le Luka 17:10 ma fesili atu: E faapefea ona fetau lelei le ulutala “aaua le aoga” mo le mea sa tatou talanoaina?

Luka 17:11–19. E taua le faailoa atu o le loto faafetai mo faamanuiaga ua tatou maua.

(25–30 minute)

Fai atu i tamaiti o le vasega e mafaufau po o le fea o vaega nei e sili ona faamatalaina ai lo latou faaaogaina o tusi faafetai: (a) Na ou tusia i le aso na ou maua ai se meaalofo, (e) Ou te masani ona ou faatuai ona tusi, (i) Ou te lagonaina le tausala a le leai lava se mea ou te faia, po o le (o) Ou te lagonaina lo’u fia tusia. Ia talanoaina a latou tali. Fesili atu:

- O le a se lagona pe a faailoa atu e se tasi le loto faafetai ia te oe?
- O a nisi o taga agalelei o le faafetai ua e mauaina?

Faitau le Luka 17:11–14 ma fesili atu:

- O le a le lepela? (O le upu *lepela* i totonu o le Tusi Paia atonu o loo faamatalaina ai ni faamai se tele e mafai ma atonu e le mafai foi ona aofia ai le lepela i ona po nei; tagai foi Taiala i Tusitusiga Paia, “lepela,”.)
- Aisea e faigata ai ona avea ma se lepela? (E le gata i le onosaia o auga o o latou ma’i, o lepela e manatu i ai e le mama i lalo o le tulafono a Mose. E tatau ona latou ola ese mai isi tagata, e ofuina ni ofu faapitoa, ma taulaga atu ina ia lapataia tagata i lo latou le mama ina ia aua ne’i pa’i atu se tasi ia i latou. Tagai Levitiko 13:44–46.)
- Mafaufau ia te outou lava i le tulaga o lepela o loo i le fuaiupu e 13–14. O le a se lagona e oo ia te oe pe afai o oe lea e tupu ai lenei mea? (Ia talanoaina faatasi ma tamaiti o le vasega le silisiliese o le alofa o Keriso.)
- Faitau le fuaiupu 15–19. O le a le taua o le faaali atu o le loto faafetai i le Alii mo o tatou faamanuiaga?

Faitau atu le vaega lenei mai ia Peresitene Tavita O. Makei:

“O le loto faafetai e loloto atu nai lo le faafetai. O le faafetai o le amataga lea o le loto faafetai. O le loto faafetai o le atoaga lea o le faafetai. O le faafetai e mafai ona aofia ai na o upu. O le loto faafetai e faaalua i gaoioiga” (“The Meaning of Thanksgiving,” *Improvement Era*, Nov. 1964, 914).

Fesili atu:

- O le a se mea ua faaopoopo atu e lenei aoaoga i lou malamalama i le mea na oo i ai le Faola ma lepela?
- E te manatu na lagonaina e lepela e toaiva le loto faafetai ae le’i faaalua? Aisea?
- O le a le faamaoniga o loo i ai iina na lagonaina e le lepela e toatasi le loto faafetai?

- Aisea e te manatu ai e taua tele o le lepela e toatasi lea na faaalua le loto faafetai o se Samaria? (O tagata Samaria e manatu le toatele o tagata lutaia e le mama, ae na taliaina e le Alii ia meaalofo amiotonu a Ana fanau uma.)
- Faitau le Mataupu Faavae ma Feagaiga 59:7, 21. O le a se mea na aoao mai e le Faola i nei fuaiupu e uiga i le loto faafetai?
- O lepela uma lava ua “faamamaina” (f. 14), ae o le a le faamanuiaga faapitoa na oo mai i le na loto faafetai i le fuaiupu e 19? (Na “faaolaina” o ia. Ia faamalamalama atu i tamaiti o le vasega o le upu *ola* i lenei fuaiupu e sau mai le upu Eleni lea e mafai foi ona faaliliuina o le “faaolaina.”)
- O le a se mea o loo aoaoina mai e le upumoni faapea o le lepela loto faafetai na faaolaina e uiga i le va o le faatuatua ma le loto faafetai?



Fai atu i tamaiti o le vasega e mafaufau e uiga i taimi na faamaloloina pe faamanuiaina ai i latou e le mana o le Faola.

- E faapefea ona tali tutusa Lona mana i lou olaga i nei lepela?
- O a ni auala e pei ai i tatou o lepela e toaiva?

Faitau atu i le vasega le saunoaga lenei mai ia Elder Spencer W. Kimball, a o avea ma se tasi o le Korama a le Toasefululua:

“O le le loto faafetai o se agasala tiga lea e faatupuina ai le toasa o le Alii. (tagai MFF 59:21.) . . .

“Ina ua faamaloloina e le Faola o lepela e toasefulu, ae na o le toatasi lava le na foi mai ma faafetai atu ia te ia, ma ua ia faailoa mai ai o le toaiva lea e tatau ona avea ma lesona aoga mo tagata uma ina ua ia fetalai mai, ‘E le’i faamamaina ea le toatinogafulu?’ (Luka 17:17.) Ua masani lava ona nofosala ai tagata matutua atoa foi ma le autalavou, i le le ususitai ma le le loto faafetai i lo tatou Tama Faalelagi o le ua foai mai ia te i latou mea uma. E toatele lava i latou ua le faaali atu lo latou loto faafetai, e ui atu ia latou galuega auauna atu, ia latou tatalo faaleaiga, i le totagiina o a latou sefuluui, atoa ma isi ala e tele o loo faamoemoe le Atua e faaali atu ai la tatou faafetai” (*O le Vavega o le Faamagalo Atu*, 60).

Ia uunaiina tamaiti o le vasega ia mafaufau ma le agaga tatalo pe ua lava ona latou faaali atu le loto faafetai i le Atua. Ia uunaia i latou e tuuina atu se tatalo i se taimi lea e mafai ai ona latou faaali atu na o le loto faafetai e aunoa ma le ole atu mo soo se faamanuiaga.

E tatau ona tatou faaali atu le loto faafetai e le gata i le Faola ae o i latou uma o e faamanuia ma fesoasoani mai ia i tatou.

Ia fai atu i tamaiti uma o le vasega e faaalaina ni nai minute e tusi ai se “tusi faafetai:” i se tagata o le aiga, uo, po o se tagata o le vasega. Ia uunaia tamaiti o le vasega e gauai atu i lagona latou te maua a o latou tusia a latou tusi faapea ma le taimi e auina atu ai. IA faaiuina le vasega i le usuina o le “Ua Tele Na Ou Maua, Ou Foai Ai” (*Viiga*, nu. 124) ma ta’u atu i tamaiti le olioli lea e maua mai le faailoa atu o le loto faafetai.

Luka 17:20–37; 18:1–14 (tagai foi Mataio 24:17–41; Mareko 13:15–16, 21). Talu ai ona tatou te le iloa le taimi tonu o le Afio Faalua Mai, o lea e tatau ai ona tatou saunia i o tatou olaga atoa. (20–25 minute)

Ae le’i amataina le vasega ia seti se uati e tatagi po o nisi uati tatagi ina ia faatatagi ae le’i leva ona amata le vasega. (Afai e le maua se uati tatagi, ona fai atu lea i se tamaitiiti o le vasega e ta se logo pe faia foi nisi mea e faapisapisao ai i ni nai minute talu ona amata le lesonea.) Ia amataina le vasega e pei ona masani ai, e aunoa ma le ta’ua o le uati tatagi. Ia talanoaina e tamaiti o le vasega ia mea o loo tutupu nei i le latou aoga, le nuu, le uarota, po o le paranesi i le tuuina atu i ai o fesili faapenei:

- O a ni mea taua o loo tutupu i tala fou?
- O a ni au fuafuaga lelei ua i ai mo le vaiaso?
- Pe i ai ea ni faasalalaga lelei po o ni faamatalaga e te manao e ta’u atu i isi?

A tatagi mai loa le uati, ona taofi uma loa lea o talanoaga. Ta’u atu i le vasega o le tatagi a le uati o le faatusa lea o le Afio Faalua Mai, ma fai atu ia i latou e manatunatu pe o le a faapei le olaga pe afai e tupu nei lava le Afio Faalua Mai. Faitau le Luka 17:34–37 ma le Faaliliuga a Iosefa Samita o le Luka 17:36–40 ma vaai ai po o le a le mea o loo aoaoina mai e nei fuaiupu e uiga i le faafuaseia o le Afio Faalua Mai. Ia tuuina atu fesili e pei o nei:

- Aisea o le a le saunia ai tagata uma mo le Afio Faalua Mai?
- O a ituaiga mea e faia e tagata pe afai o le a tupu?
- O ai e te manatu o le a sili ona ofo? Aisea?

Faitau le Luka 17:20–25, ona fetufaai lea ma tamaiti o le vasega ia le faamatalaga lenei mai ia Elder Bruce R. McConkie:

“O valoaga na mua’i ta’u mai ai mea e tutupu e faatatau i le Afio muamua ma le Faalua Mai o le Mesia na fenumiai i mafaufau o tagata Iutaia. Sa latou taumatemate sese faapea o lona afio muamua mai o le a avea ma se faaalua o le mana lea o le a faatafunaina ai malo uma o le lalolagi. O lea la, i le faavae ai o la latou mau i se manatu sese, faatasi ai ma nisi o faamatalaga faasausili, latou te moomia ai se tali i lenei fesili taufaifai: ‘Afai o oe o le Mesia folafolaina, e pei ona e ta’ua soo, o a fea la o le a faaalua ai lou mana, o afea o le a aveesea ai le pologa mai ia Roma, o afea tonu o le a oo mai ai le malo o le Atua?’” (*Doctrinal New Testament Commentary*, 1:539).

Faitau le Luka 17:26–33 ma fesili atu:

- O le a le mea ua tatou iloa e uiga i le Afio Faalua Mai o Iesu Keriso?
- O le a le mea o loo ta’u mai e le Faaola ia i tatou i nei fuaiupu? (E tatau ona tatou saunia pea aua o le a faafuaseia lava ona Ia oo mai.)
- Aisea e sili atu ai ona fesoasoani pe taua atu le savali ina ia saunia nai lo se savali e faaali tonu mai ai le taimi o le Afio Faalua Mai?


Na faaoga e le Faaola ia tala nei e aoao atu ai e uiga i Lona Afio Faalua Mai. Ia tuuina atu se vaai lautele puupuu o tala taitasi, ona vaevae lea o le vasega i ni vaega se fa ma tofi atu i vaega taitasi se poloka o mau o loo auina atu faatasi ai:

- Noa (Luka 17:26–27; tagai foi Kenese 6:11–21; 7:11–24)
- Lota (Luka 17:28–32; tagai foi Kenese 19:1–26)
- O le faataoto i le faamasino amioletonu (Luka 18:1–8)
- O le faataoto i le Faresaio ma le telona (Luka 18:9–14)

Tuu atu ia i latou e faitauina ia fuaiupu ma vaai pe faapefea ona aoao mai ia mau taitasi i le saunia mo le Afio Faalua Mai. Ia valaaulia vaega taitasi e fetufaai atu mea na latou mauaina.

Luka 19–21

O le Soifuaga o Iesu Keriso



Faatomuaga

A o e faitauina le Luka 19–21, ia mafaufau loloto i le fiafia e o faatasi ma le ulufale mai ma le manumalo o Keriso i Ierusalemia i le vaiaso faai'u o Lona soifuaga faaletino. Na toe tomanatu ia Elder Bruce R. McConkie i lenei vaaiiga i upu nei:

“‘Faauta,’ O Ierusalemia, le Aai Paia, aua ‘ua afio mai lo oe Tupu.’ Na malaga mai o ia mai Petania i le itu i sasae, lea sa ia nofo ai i lalo ananafi ma tausasami faatasi ma Lasalo, o le sa ia toe faatuina mai le oti; lea sa uuina ai e Maria i totonu o le fale o Simona le lepela lona ao ma sasaa le uu nato tautele i luga o ona aao—o faata’imuaga uma o lona maliu, lea o le a faataunuuna i se taimi o lenei vaiaso.

“Ia viia o ia o lo outou Tupu; ia faalogo i ana upu, aua e tonu o ia, ma o loo i ai le faolataga.’ Ia talia o ia o le ua Sa’o ma

Tonu, o lo outou Laveai—mai le oti, seoli, ma le tiapolo, faapea ma le to e le gata. Ia iloa o i latou uma o e talitonu ia te ia o le a faaolaina; o ia o lou Faaola; o ia e ala mai ai le faaolataga; o ia o le toetu ma le ola, e pei ona ia fetalai i ai” (*Mortal Messiah*, 3:338).

Ia suesue ma le agaga tatalo le Luka 19–21 ma mafaufau i mataupu faavae nei ae le'i sauniaina au lesonea.

O Nisi Mataupu Faavae Tava o le Talalelei e Saili Iai

- O le a faasaina e Iesu Keriso i latou o e saili ma mulimuli atu ia te Ia ma le faamaoni (tagai Luka 19:1–10).
- O le a toe afio mai le Alii i le lalolagi ma tauia i latou o e faia Lana galuega (tagai Luka 19:11–27; tagai foi 2 Nifae 28:30; MFF 60:2–3, 13).
- E tatau ona tatou tapuai ma viia ia Iesu Keriso, o ia o lo tatou Alii ma le Tupu (tagai Luka 19:28–40).
- Na valoia e Iesu Lona maliu ma le faatafunaina o Ierusalem ma lona malumalu (tagai Luka 19:41–48; 20:9–19; 21:5–24).
- I le taimi o le Afio Faalua Mai, o le a faatafunaina ai e le Alii e amioleaga ma faasaina e amiotonu (tagai Luka 21:25–36; tagai foi Luka 17:26–37; MFF 38:30; Mose 8:20–30).

Risasi Faaopopo

- “O le Vaiaso Mulimuli o le Soifuaga o le Faaola,” 283.

Fautuaga mo le Aoao Atu

Filifili mai manatu nei, pe faaoga ni ou lava manatu, ao e saunia lesonea mo le Luka 19–21.

Luka 19:1–10. O le a faasaina e Iesu Keriso i latou o e saili ia te Ia ma le faamaoni.

(25–30 minute)

Ae le'i amataina le vasega, ia tuu se ata o Iesu Keriso i le pito i luga o se fata po o luga o se meaafale umi i totonu o le potuaoga. Ia faatulaga le ata ina ia le mafai e se tasi ona vaai i ai e aunoa ma le a'e i luga o se kesi po o se nofoa. A amata le vasega ona tusi lea i luga o le laupapa le: *Na outou vaai i le ata?* Faamatala le ata, ta'u atu i tamaiti o le vasega faapea o loo i totonu lava o le potu, ma fai atu ia i latou e taumafai e sue.

A maea ona mauaina e se tasi le ata, ona valaaulia lea o tamaiti o le vasega e faitau le Luka 19:1–10. Fesili atu: E faapefea ona pei le tala ia Sakaio o le sailia o le ata o Iesu? Ia talanoaina ni mea e tutusa ai latou te mauaina.

Ta'u atu i tamaiti o le vasega faapea o tusitala o le Talalelei o loo aofia ai ia faataitaiga eseese o tagata o e sa sailia ma le faamaoni le Faaola. Tuu atu ia i latou e faitauina nisi

o faataitaiga nei: Mataio 2:1–2; 5:1; 8:1–2; Mareko 1:35–37; 5:24–28; Luka 2:15–16; 7:1–4. Fesili atu:

- Aisea e te talitonu ai sa matuai naunau lava tagata e latalata atu ia Iesu?
- O a nisi o faataitaiga faatusipaia o tagata na saili ina ia latalata atu i le Matai?
- O le a se mea e tutusa ai nei faataitaiga?
- O a faamanuiaga na ofoina atu e Iesu Keriso ia i latou o e o mai ia te Ia?
- O a faamanuiaga ua maua e tagata i o tatou aso e ala i le faia foi o osigataulaga faapea?
- O a ni gaoioiga i o tatou olaga o loo faaalua mai ai o loo tatou sailia le Faaola i aso nei?

Faamanatu atu i tamaiti o le vasega o Sakaio e puupuu ma e manaomia ona a'e i se laau ina ia vaai atu ia Iesu.

- O a isi taumafaiga na faia e Sakaio ina ia saunia ai e fetaiia ma le Faaola? (tagai f. 8).
- O a faamanuiaga na ia maua ona o ana taumafaiga? (tagai f. 9–10).

Faitau le Mataupu Faavae ma Feagaiga 93:1 ma fai atu i tamaiti o le vasega ta'u mai ni tulaga manaomia se lima lea o le a mafai ai ona tatou o mai ia Keriso.

- O fea o nei mea na faia e Sakaio?
- Pe e te mafai ea ona faia foi nei mea?
- O a mea e mafai ona taofia i tatou mai le o mai i le Faaola?

Faitau le Ioane 17:3 ma fesili atu: E tusa ai ma lenei mau, aisea e taua ai ona sailia ia Iesu Keriso? Ia molimau atu e mafai e tagata uma ona o mai ia Keriso, ma uunaiina tamaiti o le vasega ina ia faia se taumafaiga e saili muamua ai o Ia ona faia lea o le mea e moomia ona fai ina ia o mai ai ia te Ia.

Luka 19:11–27 (tagai foi Mataio 25:14–20). O le a toe afio mai le Alii i le lalolagi ma tauia i latou o e na faia Lana galuega. (25–30 minute)

Fai atu i tamaiti o le vasega e galulue ma le filemu i se galuega na e tuuina atu i ai a o e alu ese atu ma le potu. Faatalitali mo ni nai minute, ona toe foi lea ma talanoaina le faigofie po o le faigata ona faamaeaina le galuega na tuu atu ia i ae le o ia i se isi e vaia. (Atonu e te manao e tuu atu i ai se faitauga tusi po o se galuega tusitusi mai le Luka 18:15–41. O na mea sa aafia ai i fautuaga mo le aoaoina atu mo le Mataio 19:16–26 ma le Mareko 10 ma e le o toe ta'uaina, o lea atonu e aoga ai se toe iloiloia.)

Ia tuuina atu fesili e pei o nei:

- O le a le tele o se galuega na outou faia a'o o'u i ai i fafo o le potu?
- O le a le mea na faalavelaveina ai outou pe sa faigata foi?
- O le a so outou lagona pe afai e togiina lenei galuega?
- E mafai faapefea ona e faatusatusaina lenei mea i la tatou suega i le olaga faaletino?

Ia valaaulia tamaiti o le vasega e faitau le Luka 19:12–15 ma faatusatusa i le galuega lea sa leai se isi e vaavaaia. Fesili atu: O ai ae po o le a foi le mea e te manatu e mafai ona faatusa i ai vaega o le faataoto?

- o le aloalii
- o auauna
- o mina
- tagata o le nuu
- o le toe foi mai o le aloalii

Ia fetufaai atu le faaliliuga lenei a Elder Bruce R. McConkie o lenei faataoto:

“O Keriso o le aloalii lea; o le nuu mamao o le lagi; o le malo iina e tuuina atu ia te ia le mana uma . . . o i le lagi ma le lalolagi’ [Mataio 28:18]; ma lona toe foi mai ua folafolaina o le Afio Faalua Mai mamalu lea, pe a faatuina le malo i le lalolagi. O auauna e toasefulu o tagata ia o le Ekalesia sa ia tuuina atu i ai faamanuiaga i le faaletino, mafaufau, ma le agaga (mina) ina ia faaaogaina i lana galuega. O i latou o e na ta’ua o ‘tagatanuu’ o isi tagata ia o le lalolagi, o e ua gauai atu ia te ia ona o ia o le Atua o le lalolagi atoa, ae o e le’i taliaina lana talalelei ma o mai i lana lafu i le aveai ma auauna. Ua poloaiina ia auauna ina ia galulue i le tovine a le Alii seia oo i Lona toe foi mai. . . .

“Afai o le a toe foi mai le aloalii e faamasino le lalolagi, o le a ia tauia ana auauna e tusa ai ma a latou galuega. E le tutusa uma tulaga o le a maua e i latou i maota ua saunia; e i ai tikeri o le mamalu. O nisi o le a puleaina ia ni aai se sefulu, o isi e lima, ae o i latou o e sa faatamala e leai so latou tofi.

“O atamai e le faaaogaina e leiloloa; o malosiaga e faaaogaina sa’o e mafai ona faateleina seia oo ina maua le atoatoa. ‘O auauna uma lava o e sa maelega e ao ona matuai tauia; ma o le e faatamala e aveesea mai ai le malamalama, o malosiaga, ma atamai sa ia te ia.’” (Doctrinal New Testament Commentary 1:572–73).

A o i ai i le lalolagi, ua o ese mai le afioaga o le Atua, tatou te taufai taulimaina uma lava o tatou tiutetauave i ni auala eseese se lima. Faitau le Luka 19:16–27 ma fesili atu:

- O le a se mea o loo aoaoina mai e nei fuaiupu i le auala e tatau ona tatou faataunuuina ai o tatou tiute?
- O a tau i na tuuina atu e le aloalii i auauna na sa faamanuiaina?
- E faapefea ona faatusatusa ia nei tau i le galuega sa faia e auauna?

Tuu atu i tamaiti o le vasega e faitau le 2 Nifae 28:30 ma le Mataupu Faavae ma Feagaiga 60:2–3, ma fesili atu: O le a se mea e aoaoina mai e nei fuaiupu e uiga i le mea o loo faamoemoeina mai e le Atua mai ia i latou o e auauna atu ia

te Ia? Faitau le Luka 19:11 ma fesili atu: O le a le manatu sese lea sa i tagata e uiga i le afio muamua mai o le Mesia?

- O a ni auala e mafai ai ona fesoasoani lenei faataoto i tagata o le taimi o Keriso o e na manatu o Lona afio muamua mai o le a mamalu?
- O a manatu sese o loo i ai i tagata i aso nei e uiga i le Afio Faalua Mai o Keriso?
- E mafai faapefea e upumoni o loo aoaoina i lenei faataoto ona faasa’oina ia na manatu sese?
- O le a se mea e mafai ona tatou faia e faataunuuina ai faamoemoeaga o le Atua ma aveai ma ni auauna faamaoni?

Ia molimau atu faapea nai lo le matuai popole i le taimi o le a toe afio mai ai Keriso, e tatau ona tatou taulai atu i le aveai ma ni auauna atamamai ma tausia feagaiga ma poloaiga ua tatou maua mai ia te Ia.



Luka 19:28–48 (tagai foi Mataio 21:1–16; Mareko 11:1–18; Ioane 12:12–19). E tatau ona tatou tapuai ma viia Iesu Keriso, o lo tatou Alii ma le Tupu. (35–40 minute)

Faaali atu ni ata se tele o Iesu Keriso e te mafaia ia faataamilo i totonu o le potuaoga. Usu le “Ua Sili Oe” (Viiga, nu. 46) mo le sauniga lotu. Fai atu i tamaiti o le vasega e vaavaai i ata ma mafaufau i le Faaola a o latou pepese.

Ia aoao atu i tamaiti o le vasega faapea o le vaiaso e tasi a o lumanai Lona faasatauroina, na ulufale atu ai Iesu ma le manumalo i Ierusalem, ma sa viia o Ia e tagata o lo latou Tupu ma le Faaola. Faaali atu le ata o le Ulufale ma le Manumalo (Mataio 21:1–11) (nu. 62173). Faitau le Luka 19:28–40 ma mafaufau po o a ni lagona e oo mai pe ana faapea o loo i ai iina i lena aso.

- O fea e te manao e tutu mai ai?
- O le a sau tala e fai po o sau mea e fai a o Ia savali ane?

Tuu atu i tamaiti o le vasega se kopi o le siata o le “Ulufale Manumalo” mai le faaopoopoga e aveai o se pepa e tufaina atu (i. 282). Ia faamalalama atu o auililiga uma o le ulufale manumalo e faaopoopo atu i se molimau matagofie o le paia o Iesu Keriso ma Lana matafaioi o le aveai ai ma Tupu o Tupu. Fai atu i ni tamaiti o le vasega e faitauina ia upusii o loo i le koluma “Taa”, ona talanoaina lea faatasi o se vasega.

- O le a le mea na mafua ai ona taua tele lenei mea na tupu?
- O a ni auala e tali tutusa ai lenei mea ma le mea ua e iloa e uiga i le Afio Faalua Mai o Keriso?

I totonu o se vaiaso e tasi o le ulufale manumalo, e toatele tagata o Ierusalem na saili e faasatauro ia Iesu. Faitau le Luka 19:41–44 ma fesili atu:

- O a ni uiga na faaalua o le Faaola e faasaga ia Ierusalem ma ona tagata?
- O le a sou manatu aisea na Ia faaalua ai ia uiga?
- O le a se mea o loo aoao atu ia te oe e uiga i Lona alofa mo isi?

Ia faaiuina le vasega i le tuuina atu lea i tamaiti o le vasega le avanoa e faamamaluina ai le Faaola. Ia mafaufau i manatu nei:

- Ia valaaulia tamaiti o le vasega na e mananao e fetufaai mai a latou molimau ia Iesu Keriso i le vasega ina ia faia loa.
- Ia valaaulia tamaiti o le vasega e filifili se ata se tasi o le Faaola o loo faaalua. Tuu atu ia i latou e faamatala atu i le vasega le mafuaaga latou te fiafia i ai ma o latou lagona e uiga ia Iesu pe a latou vaai ia i.
- Fai atu i tamaiti o le vasega e filifili se viiga latou te fiafia i ai e uiga ia Iesu Keriso, ma usu nisi o pese ua latou filifilia.

Luka 20–21 (tagai foi Mataio 21–24; Mareko 11–13). I le vaiaso mulimuli o le galuega a le Faaola i le olaga nei na la aoao atu ai i aso uma i le malumalu. (10–15 minute)

Tusi le faaupuga *Maota o le Alii* i luga o le laupapa. Fesili atu:

- O fea e mafai ona maua ai lena faaupuga? (O upu “E Paia o le Alii—o le Maota o le Alii” o loo faaalua i malumalu i ona po nei.)
- O le a sou manatu aisea e taua ai malumalu taitasi o se maota o le Alii?

Ia faaalu sina taimi e talanoaina ai po o a ni mea e fiafia ai tamaiti o lau vasega i nisi o malumalu.

Faamanatu atu i tamaiti o le vasega e oo mai i le taimi na tusia ai mea o loo i le Luka 19, ua oo atu le Faaola i le vaiaso mulimuli o Lana galuega i le olaga nei. Faitau le Luka 19:45–48 ma fai atu i tamaiti o le vasega e vaai po o fea le vaega sa sili ona faaaluaina ai e le Faaola Lona taimi i le vaiaso lea.

- E mafai faapefea e le i ai i le malumalu ona faamanuiaina ma saunia le Faaola mo le mea o le a Ia feagai i le iuga o le vaiaso?
- O le a se mea o loo aoaoina mai e nei fuaiupu e uiga i le faamanuiaina o isi i Lona taimi a o iai i le malumalu?
- Na faapefea ona faaalua e le Faaola Lona faaaloalo mo le malumalu? (Na Ia tuliese ia tagata na fefaataua’i.)

Afai e te manao i ai, fai i tamaiti o le vasega su’e i le ata o le Malumalu o Herota, numera 4 i le vaega o ata o Taiala i Tusitusiga Paia, ma faamanatu atu ia i latou o se maota foi lea o le Alii. Fesili atu: Afai e te iloaina e toe tasi le vaiaso lea e te ola ai, o fea e te manao e faaalu ai lena vaiaso?

Ta’u atu i tamaiti o le vasega faapea e tele faataoto, tala, ma aoaoga faavae na aoaoina e Iesu Keriso i Lona vaiaso mulimuli lea o loo tusia i le Luka 20–21. Faamanatu atu ia i latou faapea ua latou suesueina le tele o nei tala i tusi a Mataio ma Mareko (tagai i fautaga mo le aoao atu mo le Mataio 21:18–22:46, i. 49–50; Iosefa Samita—Mataio, i. 51–52; ma le Mareko 12:41–44, . 69). Ta’u atu i tamaiti o le vasega faapea, ae tou te le’i suesueina le Togiola, maliu, ma le Toetu o Iesu Keriso mai le tusi o Luka (Luka 22–24), e te manao iai latou ina ia faitauina puupuu nisi o aoaoga mulimuli a le Faaola mai le Luka 20–21.

Ia valaaulia tamaiti o le vasega e faaalu se sefulu minute e filifili mai ai ni fuaiupu mai le Luka 20–21. Fai atu ia i latou e faitau nisi o nei aoaoga a o mafaufau i ai po o le a se tulaga e oo i ai pe a faapea o le Faaola lea e tuuina mai nei aoaoga i totonu o le malumalu. Ia valaaulia tamaiti o le vasega e fetufaai ma le vasega mea na latou aoaoina pe na lagonaina. Fai atu ia i latou e faamatala mai pe aisea latou te manatu ai e matuai taua tele le tuuina mai o le aoaoga i le vaiaso mulimuli o le Faaola.

Luka 22–24

O le Soifuaga o Iesu Keriso



Faatomuaga

I le saunoa ai i le Togiola ma le Toetu, na ta’ua ai e Peresitene Gordon B. Hinckley e faapea:

“E leai se mea se sili ona aafia ai uma tagata nai lo le oti, ma e leai se faamoemoe e sili atu ona susulu ma se faatuatua e sili nai lo le mautinoa lea o le tino ola pea. O le faanoanoa le taulau lena e o mai faatasi ma soo se oti, o le faavavau lena e sosoo mai ma le aveesea o se tasi e pele, e faaitiitia i le mautinoa o le Toetu o le Alo o le Atua i lena taeao muamua o le Eseta. . . .

“I le mafaufau loloto atu i le ofoofogia o le togiola na faataunuu e fai ma sui o tagata uma, na ta’u mai e le Perofeta o Iosefa Samita i ana lava upu uiga faamatala ma le matagofie:

“‘Ia alalaga olioli mauga, ma outou vanu uma ia tagi leotele; o outou sami uma e, ma elele matutu ta’u atu i mea ofoofogia a lo outou Tupu Faavavau! O outou vaiatafe foi ma alia, ma vai laiti, ina tafe ifo ia ma le fiafia. Ia vivii atu le vao ma laau uma o le fanua i le Alii; ma o outou papa mausali ina tagi olioli ia! Ia pepese faatasi le la, ma le masina ma fetuao, ma ia alalaga faatasi atalii uma o le Atua ma le olioli! Ia tautino atu foi foafoaga faavavau o lona suafa e faavavau, faavavau lava! O lena foi, ou te fai atu, faauta o le mamalu o le siufoga ua tatou faalogoina mai le lagi, o loo talai mai i o tatou taliga, le mamalu ma le faaolataga, ma le viiga, ma le tino ola pea, ma le ola faavavau; o malo, ma itumalo, ma pulega!’ (MFF 128:23)” (i le Conference Report, Ape. 1996, 91–92; po o le *Liahona*, Iulai 1996, 80).

O le Luka 22–24 o loo faamatalaina mai ai aso mulimuli o le soifuaga o le Keriso a o Ia naunau atu e faataunuuina le Togiola,

ma tuuina mai ai ni molimau a nisi o e na molimauina le Alii toetu. O loo latou tuuina mai ai se vaaiga o le olioli e oo mai ia i latou o e malamalama i le mamalu o le savali o le Toetu.

Suesue ma le agaga tatalo le Luka 22–24 ma mafaufau i mataupu faavae nei ae le'i saunia au lesonea.

O Nisi Mataupu Faavae Tava o le Talalelei e Saili Iai

- Tatou te aai i le faamanatuga ina ia manatua ai le tino ma le toto o Iesu Keriso, lea na Ia taulagaina mo i tatou, ma ia molimau atu ai ia te Ia o le a tatou tausia Ana poloaiga (tagai Luka 22:17–20; tagai foi 3 Nifae 18:1–12; MFF 20:77, 79).
- A o tatou liliu mai ia Keriso, e tatau ona tatou faamalosi atu i isi (tagai Luka 22:32; tagai foi Mosaea 27:32–37; MFF 81:5).
- E ui lava na teenaina e Peteru lona iloaina o le Faaola, ae na te le'i teenaina ai Lona paia. Na faia e Peteru se faaitaiga mo i tatou e ala lea i le salamo, ma avea ma se tagata ua matuai malosi i le faaleagaga, ma faamanuiaina le tele o olaga o le tele o tagata (tagai Luka 22:34, 54–62; tagai foi Galuega 4:1–33).
- Na gauai atu Iesu i le finagalo o le Tama Faalelagi. Na Ia naunau lava e puapuagatia i tiga, mafatiaga, ma le oti ina ia faataunuu ai Lana matafaioi i le ata o le faaolataga (tagai Luka 22:39–44, 63–71; 23:13–24, 33–46).
- E fesootai mai le Alii i Ana fanau i le tele o auala eseese, e aofia ai foliga vaaia o le tagata (tagai Luka 24:13–16, 33–52), asiasiga a agelu (tagai f. 23), o se lagona e pei e mu i totonu o o tatou loto (tagai f. 32), malamalama ma le olioli (tagai f. 32, 41), o tusitusiga paia (tagai f. 32, 44–45), ma lagona o le filemu (tagai f. 36; tagai foi MFF 6:23).
- O Iesu Keriso o le uluai tagata lea ua toetu (tagai Luka 24).

Risasi Faapoopo

- “O le Vaiaso Mulimuli o le Soifuaga o le Faaola,” 283.

Fautuaga mo le Aoao Atu

Filifili mai manatu nei, pe faaaoga ni ou lava manatu, a o e saunia au lesonea mo le Luka 22–24.



Ata Vitio o le Feagaiga Fou ata lona 8, “O le Faamanatuga” (11:32), e mafai ona faaaogaina e aoao atu ai le Luka 22:1–20 (tagai *Vitio Taiala o le Feagaiga Fou* mo fautuaga e aoao atu ai).

Luka 22:1–30, 39–53 (tagai foi Mataio 26:1–5, 14–54; Mareko 14:1–2, 10–49; Ioane 13:2, 18–30; 18:2–11). Na saili e luta se avanoa e faalata ai Iesu. (15–20 minute)

Tusi le upu *faalata* i luga o le laupapa ma fesili atu:

- O le a sou manatu o le a le uiga o lenei upu?

- O a nisi o upu e tutusa ma lenei upu? (Taufaasese, faa'ole'ole, taufaalata, maileia, faatau atu, solaese, faagutugutulu, solia le faatuatua.)
- Pe na faalataina ea oe? Afai na faalataina oe, o le a sou lagona na i ai?
- Na faapefea ona aafia ai oe i lagona, mafaufau, ma le faaleagaga?
- Aisea e faalata ai e nisi tagata ia isi tagata?

Tuu ni tupe siliva se tolusefulu i totonu o se taga. Ona tuu au lea o le taga i se tamaitiiti o le vasega ma fai atu ia te ia e faitau le Luka 22:1–3. Ona fai atu lea i le tamaitiiti o le vasega tuu atu le taga i le isi, ona tuu atu lea i le tamaitiiti lona lua o le vasega e faitauina ia fuaiupu e 4–6. Ia faaaau ai pea le faiga o lenei mea seia uma lelei ona faitauina e le vasega le Luka 22:1–30, 39–53. Ia talanoaina le tala a o latou faitau, e faaoga i ai ia fesili e pei o nei:

- O ai na faalataina Iesu?
- O le a le mea a le taga siliva e tolusefulu e fai i le tala? (tagai Mataio 26:15).
- O le a le mea na faia e le Faaola i lenei taimi o le faalataina sa sili ona faagaetia ai oe?
- Na faapefea ona faaalua i Ana mea na fai Lona alofa i Ona fili faapea ma Iuta?
- E mafai faapefea e Lana faaitaiga ona fesoasoani i taimi pe a faatiga pe faalata mai isi ia te oe?

I la outou talanoaga, ia faaoga soo se faamalalamamaga lenei e te iloaina e aoga tele:

- Na tusia e Elder Bruce R. McConkie e faapea:

“O Iuta lava na taulamua. Sa latou fono ma faitaulaga sili; na ia filifili e faalata lona Alii; na ia talosaga mo le tupe. O se faiga ua faia ma le loto i ai ma le naunautai” (*Doctrinal New Testament Commentary*, 1:702).

- E pei ona valoia e Sakaria, e faalataina e Iuta le Faaola mo tupe siliva e tolusefulu (tagai Sakaria 11:12; Mataio 26:15). O lenei aofaiga sa iloaina o le tau lea o se pologa i le tulafono a Mose (tagai Esoto 21:32) ma faaalua ai le maualalo tele o le manatu o Iuta ma faitaulaga sili sa i ai mo Iesu.
- O le tala a Luka e faitauina, “Ona ulutino ai lea o Satani ia Iuta” (Luka 22:3). Na tusia e Elder Bruce R. McConkie:

“E le mafai e Satani ona i ai se mana i agaga o tagata seiloga lava ua latou tuuina atu ia te ia. E faato'a gauai atu lava tagata ia te ia pe a latou faalogo atu i ana faaosoosoga. I nisi upu, o Iuta o se tagata agasala leaga ona o lona lava amioleaga, aua ua sili ia te ia ona ola i manatu o le lalolagi, aua sa 'sili lona alofa ia Satani nai lo le Atua.' Na matuai le 'mafaufau, faasoesa, ma faatiapoloa e ala i lana filifiliga [tagai Mose 5:12–13]” (*Mortal Messiah*, 4:15).

Ia faailoa atu pe afai tatou te le usiusitai i le Faaola pe le amanaiaina Ana aoaoga; ua tatou faalataina o Ia i se isi tulaga. Fai atu i tamaiti o le vasega e iloiloia le Luka 22:2–3, 5, ona fesili atu lea:

- O le a sou manatu o le a le mea na uunaiina ai nei tagata ina ia faalataina le Faaola? (Faamaualuga. Fefe ina ne'i aveesea le malosiaga, Satani, tupe.)
- E faapefea ona faatupuina e nei lava foi faosoosoga ia tagata ina ia le amanaiaina ia le Faaola ma Ana Aoaoga i aso nei?

Ia uunaia tamaiti o le vasega ina ia tetee i faosoosoga ma mulimuli i aoaoga a le Faaola.

Luka 22:7–20 (tagai foi Mataio 26:17–20, 26–29; Mareko 14:12–17, 22–25). Tatou te aai i le faamanatuga e manatua ai le tino ma le toto o Iesu Keriso, lea na ia ositaulagaina mo i tatou.
(25–30 minute)

Aumai se mea e sili ona taua ma pele ia te oe i le vasega. Faaali atu i tamaiti o le vasega ma faamalalalama atu pe faapefea ona avea e fai ma faamanatu o se mea e taua i lou olaga. Fesili atu:

- E i ai ni mea taua o loo e teuina?
- O fea e te teuina ai?
- O le a le umi talu ona i a te oe?
- E faafia ona e vaai atu i ai?
- O le fea e sili ona taua ia te oe, o le mea taua lea po o le mea na tupu o loo faamanatu mai ai? Aisea?

Ia faamalalalama atu i totonu o le Ekalesia o loo i ai ia faatusa po o faailoga lea e mafai ai e i tatou ona manatuina a tatou feagaiga ma faamalasia a tatou tautinoga ina ia tausia lelei. Ia valaaulia tamaiti o le vasega e faitau le Luka 22:7–16, ma fesili atu:

- O le a le mea taua na tupu i nei fuaiupu?
- E faapefea ona ese lenei Paseka mai isi paseka uma na muamua atu ai?

Ia valaaulia tamaiti o le vasega e mafaufau loloto i le taua o le Togiola i o latou olaga. Faitau le saunoaga lenei mai ia Elder Bruce R. McConkie:

“I le toetoe lava a atoa se meleniuma ma le afa talu ona tuuina mai e Ieova le Paseka ia Isaraelu, o ia lava sa faatasi ma tagata, sa saunia e faamanatuina le tausamaaga, ina ia faataunuuna ai le tulafono na tuuina atu ia Mose, ia avea ma Tamai Mamoe o le Paseka, o se tamai mamoe e le ila ma le pona o lona toto o le a tuuina atu ai i tagata uma le saolotoga faaleagaga ma aveesea ai ma le pologa i le agasala.

“O fuafuaga mo lenei Paseka mulimuli o le galuega a lo tatou Alii, o se Paseka ua lauiloa i le Ekalesia o le

Talisuaga Mulimuli, na faia e Peteru ma Ioane e pei ona faatonuina ai e Iesu. O le Talisuaga lava ia e tatau ona faia i le fale o se soo, aua ua iloa e nei soo e toalua le manao o le Matai ma o le afeafe aupito i luga sa avanoa.

“O le Paseka mulimuli lenei ua faamaoniaina. Na sosoo ai ma le taulagaina o Keriso e avea ma Tamai Mamoe o le Paseka o lenei sauniga anamua ua taofia ai isi faailoga uma (o faailoga na sa muai faailoa mai i le faamanatuga o le Talisuaga a le Alii) sa sailia le faamaonia ina ia faaogaina i tagata o le Alii. O lenei la, ua na o le pau le faamanatuga o le Paseka i se tulaga faaleagaga na o lea na tautala i ai Paulo: ‘Aua foi o Keriso la tatou paseka ua fasia mo i tatou: O lenei, aua tatou te faia le tausamiga ma le mea faafefete tuai, po o le mea faafefete o le loto leaga ma le amioleaga; a ia faia ma le mea e le faafefeteina o le loto lelei ma le faamaoni.’ (1 Korinito 5:7–8.)” (*Doctrinal New Testament Commentary*, 1:704–5).

Faitau le Luka 22:17–20.

- O a faailoga na faailoa atu e le Faaola i Aposetolo?
- O le a le fetalaiga a Iesu i le faamoemoe o Lona tuuina atu o nei faailoga?


Faaali atu se fasi falaoa ma se ipu vai. Fesili atu: Aisea ua talafeagai ai nei faailoga ona fesoasoani ia i tatou e manatuina le Togiola? Fai atu i tamaiti o le vasega e faitau ia tatalo o le faamanatuga mai le Mataupu Faavae ma Feagaiga 20:77, 79.

- O a folafolaga tatou te faia pe a tatou aai i le faamanatuga? (Tusi i lalo vaega na o loo ta'uina mai i le tatalo o le faamanatuga i luga o le laupapa.)
- O le fea e sili ona taua: o le areto ma le vai po o mea o loo faatusa i ai? Aisea?

Ia valaaulia tamaiti o le vasega e fetufaai mai pe faapefea ona latou taulai atu o latou manatu i le Faaola i le taimi o le faamanatuga. Fesili atu: O a mea e mafai ona tatou faia i le taimi lenei lea e fesoasoani ai ia i tatou ia manatua lelei a tatou feagaiga? (O tali e mafai ona i ai e aofia ai tatalo o le faamanatuga mai tusitusiga paia, toe tautino atu ina ia tausia a tatou feagaiga, mafaufau i upu o le viiga faamanatuga, ma tatalo mo le faamagaloga.) Ia molimau atu o le mana o le Togiola i o tatou olaga e faateleina a o tatou taumamafa ma le agavaa i le faamanatuga.

Luka 22:31–38, 55–62 (tagai foi Mataio 26:31–35, 69–75; Mareko 14:27–31, 66–72; Ioane 13:36–38; 18:15–18, 25–27). Pe a liua o tatou loto, e tatau ona tatou fesoasoani e faamalosi atu i isi.
(20–25 minute)

Tusi laina nei e tolu i luga o le laupapa:



Fesili atu i tamaiti o le vasega:

- O fea o laina nei e tolu o se faailoga sili lea o lo tatou alualu i luma faaleagaga po o lau tautinoga i le talalelei i lou olaga atoa? (Atonu e te manao e fuafua e fai atu i tamaiti o le vasega e tusi se laina latou te lagonaina e sili ona faailoa mai ai lo latou atinaeina faaleagaga.)
- O le a se mea e foliga mai o loo aafia ai lau tautinoga i le talalelei i ni vaitaimi eseese o lou olaga?
- O le a sou manatu aisea e le fetau ai pea lou alualu i luma faaleagaga ma lou alualu i luma faaletino?

Faitau le Luka 22:33.

- O le a se malosi po o le tautinoga a Peteru o loo i ai i lenei fuaiupu?
- E te manatu o i ai pea sona malosi e alualu ai i luma faaleagaga? Aisea e i ai pe leai ai foi?
- Faitau fuaiupu 31–32. O le a le mea na iloa e le Faola e uiga i le tautinoga a Peteru i le talalelei e le'i iloina e Peteru?
- O a ni auala e te manatu e faatatau ai le lapataiga ma le apoapoaiga a le Faola i fuaiupu 31– 32?

Fai atu i tamaiti o le vasega e faitau ia mau nei ma vaai mo ni malamalamaaga i le loloto o le liuaina o Peteru i vaega eseese o le olaga.

- Luka 22:34–38
- Luka 22:54–62
- Galuega 2:14, 37–40
- Galuega 3:1–7

Fesili atu:

- O le a se faamaoniga ua e vaai i nei mau e iloa ai na matuai malosi lava ia Peteruu i le faaleagaga i lona olaga?
- O le a sou manatu o le a se mea na fesoasoani ia te ia na malosi ai?

Faitau atu le vaega lenei mai ia Elder Bruce R. McConkie:

“O le *liuaina* e sili atu—sili mamao—nai lo le na ona suia o le talitonuga o se tasi mai le mea sese i le mea moni; e sili atu nai lo le taliaina o se faamaoniga o upumoni o le talalelei, nai lo le manaomiaina o se molimau. Ina ia liuaina o se suia lea mai se tasi tulaga i se isi tulaga, ma o le liuaina i le talalelei e aofia ai le suia o le tagata mai ona pa’u ma le tulaga faaletino i se tulaga o le avea ma se au paia.

“O se tagata ua liua o se tagata lea ua tuueseina le tagata o le lalolagi, ae gauai atu i uunaiga a le Agaga Paia, ma avea ma se au paia e ala i le togiola a Keriso le Alii.’ O se tagata faapea ua avea ma e pei o se tamaitiiti, ua faamaualalo, agamalu, lotomaualalo, onosai, tumu i le alofa, naunau e tuuina atu mea uma ua silafia e le Alii e tuuina atu ia te ia, e pei o se tamaitiiti ona gauai atu i lona tama.’ (Mosaea 3:19.) Ua avea o ia ma se tagata fou o le Agaga Paia: o le tagata tuai ua liua ma avea ma tagata fou. Ua toe fanaufouina o ia: sa oti faaleagaga o ia, ae ua toe tulai mai i se tulaga o le ola faaleagaga. (Mosaea 27:24–29.) I le liua moni, lea e moomia mo le faaolataga (Mataio 18:3), e suia ai e le tagata ua liua e le gata i ona talitonuga, ua tuuese ai uputuu sese o le taimi ua tuana'i ma taliaina le matagofie o talitonuga ua faaalua, ae na te suia lona ituaiga olaga atoa, ma o le natura ma le faatulagaina o lona lava tagata e suia vave lea e le mana o le Agaga Paia.

“O Peteru o le faaitaiga sili lea o galuega a le mana o le liuaina i agaga e talia maia. I le taimi o le galuega a lo tatou Alii i le olaga nei, sa maua ai e Peteru se molimau, na maua mai le Agaga, i le paia o Keriso ma le ata sili o le faaolataga lea sa ia Keriso. ‘O oe o le Keriso, le Alo o le Atua soifua,’ sa ia tali atu ai, a o tuuina atu ia te ia e le Agaga Paia le musumusuga. (Mataio 16:13– 19.) Ina ua pauu ese isi, sa tu atu pea ia Peteru ma le tulaga faaaposetolo, ‘Ua matou talitonu ma ua matou iloa o oe o le Keriso, o le Alo o le Atua soifua.’ (Ioane 6:69.) Na iloa e Peteru, ma o lona malamalama na oo mai lea i se faaaliga.

“Ae le'i liuaina ia Peteru, aua e le'i avea o ia ma se tagata foi o le Agaga Paia. O lea, e le'i lava ona maua e Peteru se molimau, ma o le po lava lena na pu'eina ai ia Iesu, na ia fetalai atu ai ia Peteru: ‘*Pe a liua mai oe, ona e faamalosi lea i ou uso.*’ (Luka 22:32.) O le taimi lava lea ina ua maea, ma e tusa lava po o le a lana molimau sa i ai, sa teena ai e Peteru lona iloina o Keriso. (Luka 22:54–62.) Ina ua mavae le faasatauroga, sa alu atu ai Peteru e fagota, sa toe valaauina mai ai e le Alii toetu i le galuega. (Ioane 21:1–17.) Mulimuli ane i le aso o le Penetekoso na maua ai le faaeega na folafolaina mai o le agaga; na avea ai ia Peteru ma aposetolo faamaoni uma ma ni tagata fou o le Agaga Paia; sa liua moni ai lava i latou; ma o taunuuga o a latou mea sa fai o le faamautuina lea o lo latou liuaina. (Galuega 3; 4.)” (Mormon Doctrine, 162–63).

Fesili atu:

- O le a se mea tatou te aoaoina mai lenei fuaitau e uiga ia Peteru?
- O le a se mea o loo aoaoina mai e lenei fuaitau ia i tatou e uiga i le liuaina?

- Toe faitau le Luka 22:32. O le a se lelei o le ola ai o Peteru i le luitau a Iesu?

Ia molimau atu i tamaiti o lau vasega i lo latou malolosi e alualu ai i luma faaleagaga i o latou olaga atoa. Faamanatu atu ia i latou faapea o i tatou uma e pei o Peteru, e tatau ona tatou faamalosi atu ia i latou o loo i o tatou tafatafa a o tatou latalata atu i le Alii.

Luka 22:39–46 (tagai foi Mataio 26:36–46; Mareko 14:32–41). Na usiutai Iesu Keriso i le finagalo o le Tama Faalelagi. Na la naunau e puapuga, mafatia, ma maliu ina ia faataunuuna ai Lana matafaioi i le ata o le faolataga. (30–35 minute)

Fai atu i tamaiti o le vasega e mafaufau i se taimi sa latou matuai vaivai ai lava, tiga, pe le lavava foi ma sa latou lagonaina ai le le fia tatalo, le le fia sau i le lotu, le le fia anapogi, ma le le fia auauna atu i isi.

- Na faapefea ona e faatoilaloina ia ou manaoga faaletino ina ia tausia ai poloaiga a le Atua?
- O le a se faigata sa i ai mo oe?
- O a ni faafaigata i lagona e mafai ona e mafaufau i ai lea e taofia ai i tatou mai le faia o le mea sa’o? (O tali e mafai ona i ai e aofia ai le fefe e fetufaai atu le talalelei, ita, ma le le manao e faamagalaga atu i isi.)

Faitau le Aperamo 3:24–25 ma vaai ai po o le a le mea o loo ta’u mai e nei fuaiupu e faataata i le faamoemoga o le olaga faalelalolagi. Fesili atu:

- O le a le uiga o le upu *tofotofa*? (Ia suesueina.)
- O le a le suega?
- O le a sou manatu aisea e taua ai ona suesueina i tatou?
- E faapefea ona fesoasoani leni suega ina ia faataunuuna ai le faamoemoga o le ata o le faolataga?

E tusa lava pe faigata pe tiga le olaga, e mafai lava ona tatou maua le malosi e faia ai le finagalo o le Atua e ala lea i le mulimuli i faaitaiga a le Faaola. Fai atu i tamaiti o le vasega e faitau le Luka 22:39–46, ma fesili atu:

- O le a le finagalo o le Atua mo Iesu Keriso (o le a le mea na Ia finagalo e faia le Faaola)?
- O le a se mea o loo aoaoina mai e nei fuaiupu e uiga i le faigata faaletino o le filifiliga a le Faaola ina ia mulimuli i le finagalo o le Tama Faalelagi? (tagai f. 44).
- O a avega faaleagaga na tauaveina e le Faaola i le taimi lea? (tagai foi Alema 7:11–13).
- O le a le fesoasoaniga na auina mai e le Tama Faalelagi ia Iesu i leni taimi sili ona faigata? (tagai Luka 22:43).
- O a ni auala e mafai ai e le Tama Faalelagi ona auina atu ia te oe se fesoasoaniga i taimi faigata ina ia fesoasoani ai ia te oe e tausia Ana poloaiga?
- E faapefea ona lagolagoina e le 1 Nifae 3:7 leni manatu?

Ina ia fesoasoani i tamaiti o le vasega e talisapaia le Togiola, ia faitau ma talanoaina ia fuaiupu nei: Ioane 10:17–18; 2 Nifae 9:7; Mosaea 3:7; Alema 34:10–14; Mataupu Faavae ma Feagaiga 19:15–20; 122:7–8.

Ta’u atu i tamaiti o le vasega na ositaulagaina le Faaola i leni auala ona o Lona alofa i le Tama faapea tatou uma taitoatasi. Ao faasolo ina loloto lo tatou alofa mo le Tama Faalelagi, o le a faapei foi i tatou o le Faaola, o le a sili atu ona tatou onosaia ia tiga faaletino ma faalelagona ma faia le finagalo o le Tama. Ia fetufaai atu soo se vaega o upusii nei e te lagonaina o le a fesoasoani i tamaiti o lau vasega e maua ai se talisapaia sili o le taulaga a le Faaola.

Na molimau mai ia Peresitene Iosefa Filitia Samita, a o avea ma Peresitene o le Korama a Aposetolo e Toasefululua:

“O lea ua tauave nei e le Alo o le Atua le avega o a’u soligatulafono ma a outou soligatulafono ma soligatulafono a tagata uma e taliaina le talalelei a Iesu Keriso. . . . Na ia tauaveina le avega—o la tatou avega. Ou te faapoopo atu i ai se mea leni; e faapea foi ia te outou. E faapea foi i tagata uma lava. Na ia aveina i ona luga e totogi ai le tau ina ia mafai ona ou sola ese—ina ia mafai ona outou sosola ese—mai le faasalaga ma tulaga o lo tatou taliaina o lana talalelei ma faamaoni ma tumau ai” (“Fall—Atonement—Resurrection—Sacrament” [lauga i faiaoga o aoaoga faalelotu, 14 Ian. 1961], i le *Charge to Religious Educators*, 2nd ed. [1982], 127).

Na molimau mai ia Elder James E. Talmage:

“O le tiga o Keriso i le togalaau e le mafuatiaina e le mafaufau le mea e gata mai, e le gata i le matuitui ae o le mafuaaga. O le manatu faapea na puapugatia o Ia ona o le fefe i le oti, e le taliaina. O le oti ia te Ia o se vaega ta’imua lea i le toetu ma le toe foi atu ma le manumalo i le Tama o le na ia Afio mai ai, ma se tulaga o le mamalu e sili atu nai lo le mea na Ia umiaina muamua; ma e le gata i lea, o Lona lava mana na ia ofo atu ai Lona ola. Na ia tauivi ma oi i lalo o se avega e leai se tagata ua ola i le lalolagi e mafai ona ia tauamoina. E le o le tiga i le faaletino, po o le tiga na o le mafaufau lava ia, lea na mafua ai ona puapugatia o Ia ma tafe mai ai le toto i puninii uma o le tino; ae o se tiga o le agaga lea e na o le Atua e mafai ona silafiaina. E leai se isi tagata, po o le a lava le silisili o ona mana po o le mafaufau e mafai ona onosaia, e mafai ona puapugatia faapea; aua o le a tiga ona itutino, ma o le a mafatia ai o ia. I lena itula o le tiga na faafetaiaina ai ma faatoilaloina ai e Keriso ia taufaamata’u uma na mafai e Satani, ‘le alii o leni lalolagi’ ona tuuina atu. O le tauiviga taufaafele i faaososoga i le taimi lava ina ua maea ai le papatisoga o le Alii na faaleagaina uma e leni tauiviga sili ma mana o le tiapolo” (*Jesus the Christ*, 613).

Na faamalamalamaina e Peresitene John Taylor:

“E ao ia Iesu ona aveeseina ia agasala i le taulagaina lea o Ia lava. . . . Ma a o tauaveina e Ia ia agasala a tagata uma, ma togiola mo agasala e ala i le taulagaina o Ia lava, o lea na oo mai ai i Ona luga le mamafa ma le tiga o augatupulaga uma, o le tiga e le mafaamatalaina na oo mai ona o lenei taulaga togiola lea na Ia tauaveina ai agasala a le lalolagi, ma puapuaga i Ona lava taunuuga ona o se tulafono e faavavau a le Atua na solia e le tagata. O Lona tiga tele, o Lona puapuaga e le mafaamatalaina, na iloa uma lava ina ua ia gauai atu i le poloaiga a Ieova ma tulaga manaomia o le tulafono.

“O puapuaga o le Alo o le Atua e le na o le mafatia i le oti faaletagata; aua e manatu i le tulaga na Ia faia i le saunia o se togiola mo agasala uma a le lalolagi sa Ia tauaveina ai le mamafa, o le tiutetauave, ma le avega o agasala a tagata uma, lea tatou te le gafatiaina. . . .

“O le oi ai i lenei avega mamafa, o lenei tofiga a le faamasinoga tonu, lea na tootuli ai tulivae uma, ma o le tiga na iloa ai le tafe mai o le toto i puninii uma o le tino, o lea sa Ia alaga atu ai faapea, ‘Lo’u Tama e, afai e mafai, ia aveese lenei ipu ia te au.’ Sa ia tauivi ma lea avega mamafatu i le vao, sa Ia tauivi ma mana o le pouliuli lea sa tau fetuleni atu ia te Ia iina; i Lona faamaualalo i mea uma, sa tumu Lona mafaufau i le tiga ma le mafatia, ma ua tuua na o Ia ma e foliga mai ua leai sona fesoasoani ma ua faagaloina, o lona mafatia na tafe mai ai le toto i pu ninii o Lona tino” (*Mediation and Atonement* [1882], 149–50).



Luka 22:41–23:25 (tagai foi Mataio 26:36–27:26; Mareko 14:32–15:15; Ioane 18:1–19:16). E ui lava sa teenaina o Ia, faalataina, ulagia, ma fetuuina, ae na naunau lava Iesu Keriso ina ia puapugatia ma togiola mo agasala a tagata uma. (40–45 minute)

Faali atu se ata o Iesu Keriso. Ia valaaulia tamaiti o le vasega e faitau le Isaia 53:3–10 e vaai ai mo upu ma fuaitau na e faamatalaina ai po o a mea na faia e le toatele o tagata i le Faaola, ma lisiina i luga o le laupapa. Ia faailoa atu i tamaiti o le vasega o le soifuaga o Keriso o se olaga e tumu i le auauna atu, alofa, faamagalaga atu, faamanuia, ma le faamalololo. Fesili atu: Manatu i mea uma ua Ia faia mo i tatou, o le a sou manatu aisea na toatele ai tagata sa toe faasagatau ia te Ia ma soona sauaina o Ia? Ina ia fesoasoani e tali lenei fesili, ia faitau le 2 Nifae 2:11, 27 ma le Mosaea 3:19, ma fai atu i tamaiti o le vasega e aumai ni o latou lava manatu. Ia fetufaai atu foi le saunoaga lenei mai ia Peresitene Brigham Young:

“O tagata amioleaga, o Satani, ma mana uma lava o seoli e inoino ma e faasagatau mai i soo se mataupu faavae paia lava e finagalo le Atua e tuuina atu i ana fanau” (*Discourses of Brigham Young*, sel. John A. Widtsoe [1941], 348–49).

Fai atu i tamaiti o le vasega e faitau le Luka 22:39–42 ma le Luka 23:20–25 ma vaai ai mo le upu *finagalo* i fuaiupu na. Fai atu i tamaiti o le vasega e faatusatusa le finagalo o Iesu Keriso i le loto po o manao o tagata. Fesoasoani i tamaiti o lau vasega ia talisapaia le alofa o Iesu mo tagata uma ma na ia filifili e togiola mo agasala a tagata uma, e ui lava e toatele na inoino ia te Ia ma e toatele o le a le taliaina le atoatoaga o faamanuia o le Togiola. Fesili atu:

- O a nisi o ou manaoga amiotonu?
- O a ituaiga tagata e foliga mai e tetee i ou manaoga amiotonu?
- E faapefea ona e faatoilaloina lenei tetee?

Ia molimau atu faapea e mafai ona tatou aoao ia iloa ona faatoilaloina ia mea faafeagai e ala lea i le mulimuli i le faaitaiga a Iesu Keriso. Ia valaaulia tamaiti o le vasega e faitau lemu le Luka 22:41–23:25. Fai atu i le afa o le vasega e vaai mo faaitaiga i le auala na mafatia ai Iesu, ae fai atu i le isi afa e vaai pe na faapefea ona faaalua le alofa o Iesu i tagata. Tuu atu ia i latou e fetufaai mea na latou mauaina ma talanoaina pe mafai faapefea ona tatou mulimuli i le faaitaiga a le Faaola.

Faitau le Alema 42:14–15. Ia faailoa atu, e mafai ona faapei i tatou o tagata na teenaina ia Iesu Keriso, i taimi tatou te faatiga ai ia te Ia i le filifilia lea o le agasala. Ia faailoa atu, talu ai ona o Lona alofa mo i tatou uma, ua Ia togiola ai mo a tatou agasala ina ia mafai ona faaolaina i tatou. Fesili atu: E faapefea ona aafia ai lou alofa i lo tatou Faaola i lenei mea?

Luka 23:13–56 (tagai foi Mataio 27:15–61; Mareko 15:6–47; Ioane 18:39–19:42). O le Faasatauroga o Iesu Keriso o se vaega o le fuafuaga o le fiafia a le Tama. (20–25 minute)

O se taimi lelei lenei e tuu atu ai i tamaiti o le vasega e suesue, mafaufau loloto, ma lagonaina le taua o le Faasatauroga o Iesu Keriso. Mafaufau i le taina musika paia ma le teuteuina o le potu i e auala faapitoa. A o taunuu atu ia tamaiti o le vasega, ia tofiaina i latou i se tasi o tagata nei: Parapa, Simona le Kurene, o se afafine o Ierusalem, o le pagota i le itu taumatau o Iesu, o le pagota i le itu tauagavale o Iesu, o se tagata o loo matamata atu, o se taitai, o se fitafita Roma, o le taitai o le toaselau, o se tagata e masani ia Iesu, Iosefa le Arimataia, o se tamaitai na sauniaina le tino o Iesu mo le falelauasiga.

Ia valaaulia tamaiti o le vasega faitau lemu le Luka 23:13–56 ma vaai faalemafaua i mea na tutupu mai le tulaga o le

tagata lea na tofiaina atu ia i latou. Fai atu iai latou e faitau ma le faaeteete, ia taulai atu i le savali, ma mafaufau loloto i lona taua. A maea, ona talanoaina lea o ni o latou manatu, e faaoga ai fesili e pei o nei:

- O a ni tulaga na tofiaina oe e te mafaufau i ai?
- O le a se mea na e aoaoina mai le faitauina o le tala mai le manatu o lenei tagata?
- O a ni ou lagona na i ai e uiga i le Faaola?
- O ai le tagata na sili ona e manao ina ia e avea faapei o ia i lona aso? Aisea?

Ia faaiuina i le usuina o le “Ou te Tu ma Ofo” (*Viiga*, nu. 107) ma faatagaina soo se tamaitiiti o le vasega e manao e tuuina atu a latou molimau ina ia faia loa.

Luka 24:13–35 (tagai foi Mareko 16:12–13). E fesootai mai le Alii i Ana fanau i le tele o auala eseese. (40–45 minute)

Ia fusi mata o nisi o tamaiti o le vasega. Faaali atu se ata o le Faaola e tau le masani ai, ma fai atu i isi tamaiti o le vasega e faamatala atu le ata ia i latou o loo fusi o latou mata. Fesili atu i tamaiti na sa fusi o latou mata:


- E mafai faapefea ona e iloa lelei atu le ata i lou mafaufau?
- O a ni tulaga le mautonu e te lagonaina mai le le mafai ona e faaogaina ou mata?

Tuu atu i se tamaitiiti o le vasega e le'i fusia mata e faitau leotele le Luka 24:1–16, ia faamamafaina le fuaiupu 13–16. Fesili atu:

- O le a sou manatu o le a le uiga “ua punitia o latou mata”? (f. 16; sa taofia i latou mai le iloaina o Ia.)
- E faapefea ona faatusatusa lenei mea na oo i ai nei alii e toalua i tamaiti o le vasega ia sa fusi o latou mata?

Ia valaaulia ia tamaiti o le vasega o loo fusi o latou mata e aveese loa ma faitau le Luka 24:31. Fesili atu:

- O le a le mea na iu lava na tupu i mata o nei alii e toalua?
- E te manatu e faatatau lenei mea i o latou mata faaletino po o mata faaleagaga? Aisea?
- Aisea e taua ai i tagata uma le “tatalaina o o latou mata” ina ia mafai ai ona latou “vaai” ia Iesu Keriso?



Tusi le ata o loo auina atu i luga o le laupapa ma fesili atu:

- E mafai faapefea ona tatalaina mata faaleagaga o tagata?
- O a ni auala o loo fesootai atu ai e le Tama Faalelagi le upumoni i Ana fanau?

Ta'u atu i tamaiti o le vasega faapea o le Luka 24 o loo lisiina mai ai nisi o auala o loo fesootai mai ai le Alii i Ana fanau. Tuu atu i tamaiti o le vasega e faitauina ia fuaiupu 13–35 e vaai ai mo auala eseese, ma lisi mea latou te mauaina i luga o le laupapa. O nei mea e mafai ona aofia foliga vaai o le tagata (tagai f. 13–16, 33–52), asiasiga a agelu (tagai f. 23), o se lagona e pei e mu i totonu o o tatou loto (tagai f. 32), malamalama ma le olioli (tagai f. 32, 41), o tusitusiga paia (tagai f. 32, 44–45), ma lagona o le filemu (tagai f. 36; tagai foi MFF 6:23). Fesili atu:

- O le fea o nei auala o loo faaogaina e le Tama Faalelagi e fesootai mai ai ia te oe?
- O faapefea ona fesoasoani na tulaga faaleagaga e oo ia te oe e tatalaina ai ou mata faaleagaga?

Luka 24:36–48 (Mau Tauloto, Luka 24:36–39; tagai foi Mareko 16:14; Ioane 20:19–23). O Iesu Keriso le uluai tagata na toetu. (20–25 minute)

Fesili atu i tamaiti o le vasega: O le a sou manatu o le a le savali aupito sili ona viia ua tuuina mai? A maea ona talanoaina nisi o a latou tali, ona aoaoina lea o i latou faapea o le toetu o Iesu o le savali sili lea ona viia o savali uma i tagata. Ia valaaulia i latou e faitauina ia mea o loo lisiina i lalo o le “toetu” i le Taiala i Tusitusiga Paia e fesoasoani ai e fuafauina pe aisea ua avea ai ma aoaoga faavae viia. Fesili atu:

- O a nisi o taimi e te mafaufau ai i le Toetu?
- O le a le vaega o le Toetu e sili ona faatosina ia te oe?
- O a ni fesili o loo ia te oe e uiga i le Toetu?

Fai atu i tamaiti o le vasega e faitau le Luka 24:36–48 ma vaai ai po oa mea o loo aoao mai e nei fuaiupu e uiga i tagata toetutu, e aofia ai foliga o tagata toetutu ma mea e mafai ona latou faia. Ia molimau atu o loo soifua Iesu Keriso ma talu ai ona o Ia o lea o le a toetutu uma ai i tatou. Faitau le 2 Nifae 2:8 ma le 3 Nifae 11:12–15, ma mafaufau e usu le “Ua Ou Iloa Lo'u Faaola” (*Viiga*, nu. 73).

O LE TALALELEI E TUSA AI MA LE FAAMATALAGA A IOANE

Tusitala: O le Talalelei a Ioane o se molimau mafana ia Iesu Keriso na tusia e se tasi o Ana auauna ma soo e sili ona faamoemoeina ma pele ia te ia. E pei o Mataio, o Ioane o se tasi o aposetolo i ulua'i Aposetolo e Toasefululua a le Alii ma avea ai o ia ma molimau faapitoa i gaoioiga ma aoaoga i lana Talalelei. O Ioane ma Iakopo o atalii o Sepetaio ma e pei o Simona Peteru, o ni fai faiva na tuua mea sa latou faia ae o ina ua valaauina i latou (Mareko 1:19–20; Luka 5:10–11). Sa faaigoa e Iesu le auso o Atalii o Faititili (tagai Mareko 3:17). O Ioane ma Iakopo o Aposetolo e toalua na tofia e Iesu e tauaveina ki o le au peresitene. *O Peteru, Iakopo ma Ioane na avea ma uso o le Au Peresitene o le Ekalesia i lo latou vaitaimi* (Joseph Fielding Smith, *Doctrines of Salvation*, comp. Bruce R McConkie, 3 vols. [1954-56], 3:152).

O le to'atolu lenei sa faatasi ma le Alii i le toe faatuina mai o le afafine o Iairo, o le [Mauga] o Liua, ma Ketesemane. I le molimau a Ioane, sa ia faapea ai o ia o se soo e pele ia Iesu. (Ioane 21:20; taga'i fo'i Ioane 13:23; 19:26; 20:2; 21:7). O le Tusi a Mamona ma le Mataupu Faavae ma Feagaiga o loo taua ai ia Ioane o se tali faaaliga ma se tagata e toefuataiina mai le perisitua i aso e gata ai (tagai 1 Nifae 14:18–27; Eteru 4:16; MFF 7; 27;12; 77; tagai foi i Taiala i Tusitusiga Paia, "Ioane, le atalii o Sepetaio."

O e o Loo Tusi i Ai: Na tusia e Elder Bruce R. Mc Conkie faapea, "O le Evagelia a Ioane o se faamatalaga mo le Au Paia; o le talalelei sili mo le Ekalesia, mo i latou ua malamalama i tusitusiga paia ma o latou uiga ma e ua faatauaina mea faaleagaga ma le faavavau" (*Mormon Doctrine*, 336).

Talaaga Faasolopito: E toaititi nisi ua auau faatasi i le vaitaimi tonu na tusia ai le Talalelei a Ioane. Pei ona tusia e se tasi o tagata aoaoina o le Ekalesia, E i ai manatu "lelei" ua faapea [o le faaiuga o le senituri muamua], ae peita'i e le lava le malosi ma le faatumauina o lea mau e aveesea ai le manatu atonu o se taimi muamua atu pei o le A.D. 35 i le 45?(C Wilford Griggs, "The Testimony of John," in *Studies in Scripture: Volume Five, the Gospels*, 111). E i ai nisi ua talitonu na tusia e Ioane lana evagelia i Efeso i le taimi ina ua maea le faatafunaina o Ierusalem.

Uiga Tulaga Ese: Mai le fa o Evagelia, e tele ni mea uiga ese o loo ta'ua e Ioane, pe tusa ma le 92 pasene e ese ai mai isi (taga'i "Taiala i Tusitusiga Paia," itulau 683). O siata i lalo o loo aotele atu ai le eseese o le tusi a Ioane mai isi Evagelia.


Mataio, Mareko, ma Luka	Ioane
Tulimatai atu i le misiona a Iesu i Kalilaia	Tulimatai atu i le misiona a Iesu i Iutaia
Faamamafaina ai o Iesu o le Alo o Tavita (o le Mesia)	Faamamafaina ai o Iesu o le Alo o le Atua
Faataua le faatuina o le Ekalesia ma lona perisitua	Faataua mea moni mo tagata o le Ekalesia

Faamamafaina le faasologa o mea na tutupu	Faamamafaina le savali faaleagaga mai i mea na tutupu
O fetalaiga a Iesu e masani ona pupuu	I le tele o taimi e aafia ai ia ni aoaoga uumi a Iesu.

Autu: Ua folafola mai e Ioane o le faamoemoega o le tusia o lana molimau "ina ia talitonu ai outou, o Iesu o le Keriso lava ia, o le Alo o le Atua; ina ia maua ai foi le ola i lona suafa e outou o e talitonu" (Ioane 20:31)

Ioane 1

O le Soifuaga o Iesu Keriso



Faatomuaga

O le molimau a Ioane na amata i se auala e ese mai i si tagata tusi Evagelia. O Ioane o loo tulimatai atu ana tusitusiga ia Keriso i le mua'i olaga, o le "Upu a le Atua" ma Le Foafoa paia, nai lo le talafaasolopito po o le gafa o Iesu, le Folafolaga o le fanau mai ma le fanau mai. Ua aoteleina e Ioane le tele o mataupu autu o loo faalauteleina i le tusi. O loo molimauina ai le paia o Iesu Keriso ma Lana matafaioi autu i le fuafuaga a le Tama Faalelagi.

Suesue ma le agaga tatalo le Ioane 1 ma mafaufau i mataupu faavae nei ae le'i saunia au lesone.

O Nisi o Mataupu Faavae Taa o le Talalelei e Saili Iai

- I lalo o le taitaiga a le Tama Faalelagi, na foafoaina ai e Iesu Keriso le lalolagi lenei atoa ai ma isi lalolagi (tagai Ioane 1:1–3; tagai foi Kolose 1:16–17; Eperu 1:1–3; Mose 1:33).
- E ui lava o Iesu Keriso o se tasi o le Aigaatua a'o le'i soifua mai o Ia i la le tino, e le'i mauaina uma e Ia le mana ma le mamalu a o tamaitiiti o ia, ae sa tuputupu a'e i le alofa tunoa seia oo ina mauaina e Ia le atoatoaga (tagai Ioane 1:14; tagai foi MFF 93:12–16).
- E faapei ona mauaina e Iesu le alofa tunoa, e faapena foi ona tatou tuputupu a'e faaleagaga se'ia tatou mauaina mea

uma o loo i lo tatou Tama (tagai Ioane 1:1–17; tagai foi MFF 93:1–22).

- O Iesu Keriso ma Lana talalelei o le malamalama ma le ola o le lalolagi (tagai Ioane 1:1–4; FIS, Ioane 1:1–4).

O Iesu Keriso o le Tamai Mamoe a le Atua ua ofoina mai o se taulaga mo agasala a le lalolagi (tagai Ioane 1:29, 32–34, 36, 41, 49).

Fautuaga mo le Aoao Atua

Filifili mai i aitia nei, pe faaaogaina ni a oe lava, a o e saunia au lesona mo le Ioane 1.



Ioane 1:1–3. O Iesu Keriso o se tasi o le Aigaatua ae le'i afio mai o Ia i le lalolagi

(15–20 minute)

Ave i le vasega se peisipolo (po o soo se ituaiga o polo taalo o loo faaaogaina i taaloga i le tou nuu) Fesili atu:

- E fia le tau o le polo lenei?
- E faapefea ona suia le tau o le polo pe a fai ua sainia ai igoa o ni tagata o se au taaalo siamupini i le lalolagi?
- E faapefea ona avea lou iloa o le talaaga o se mea e avea ma mea e faateleina ai lou faatauaina po o le talisapaiaina o lona tau.?
- Faamata e mafai ona faatatau lenei mataupu faavae i tagata faapea foi ma isi mea?

Ia faitau e le vasega le Ioane 1:1–3 ma su'e poo ai o loo faasino tonu i ai. Fesili: E faapefea i le iloaina o lona talafaasolopito ona faateleina ai lo tatou malamalamaaga i Lona taua?

Tuu i tagata o le vasega le suega (sa'o-sese) e fesoasoani ai ia latou malamalama i le silisiliese o le Alii i le mua'i olaga.

1. Na foafoaina e Iesu lenei lalolagi.
2. Na foafoaina e Iesu ni lalolagi e le mafaitauina
3. O Iesu o le ulumatua agaga na fanaua a le tatou Tama oi le Lagi.
4. O Iesu o se Atua ae le'i fanau mai o Ia i lenei lalolagi
5. O Iesu na faatuina le feagaiga ma Aperaamo
6. O Iesu o le Atua o Aperaamo, Isaako, ma Iakopo.
7. Na faaali atu Iesu ia Mose i le laau na mu.
8. Na fesoasoani Iesu i le fanauga a Isaraelu e sosola ese mai i Aikupito ma ia vaeluaina le Sami Ulaula.
9. Na tuuina atu e Iesu ia Tulafono e Sefulu ia Mose.
10. O Iesu o Ieova le Atua o le Feagaiga Tuai

Faasa'oina faatasi ma le vasega le suega (e sa'o uma ia faaupuga) ma talanoaina ni a latou fesili. Faitau le saunoaga lenei mai ia Elder James E. Talmage:

“Matou te faamaonia le pule faatusi paia i le matou mau o Iesu Keriso o le Atua, Le Foafoa, o le Atua na faaali atu Ia lava ia Atamu, Enoka, ma peteriaka ma perofeta uma a'o lumanai le taimi o le lolo se'ia oo mai lava ia Noa; o le Atua o Aperaamo, Isaako, ma Iakopo; o le Atua o Isaraelu o tagata ua tuu faatasi, ma le Atua o Efaraima ma Iuta ina ua maea le faatamaiaina o le malo o Eperu; o le Atua na faailoa atu Ia lava i perofeta mai ia Mose e oo atu ia Malaki; o le Atua o faaumauga o le Feagaiga Tuai; ma le Atua o le Au Sa Nifae. Matou te faamaonia o Iesu Keriso o Ia foi o Ieova, o Lē Faavavau lava Ia” (*Jesus the Christ*, 32).

Fesili i le vasega: O le a so outou manatu aisea ua filifilia ai e Le Foafoa e afio mai i le tino tagata o se pepe na fanau i se mea mau lalo pei o le fale povi? Faitau e tagata o le vasega le 1 Nifae 11:14–22 ma fetufaai o latou lagona e uiga i le alofa o le Atua pei ona faaalia i le fanau mai o Iesu Keriso.

Ioane 1–3. O suafa po o faalagiga o le Alii e aoao mai ia i tatou Lona Soifuaga ma Lana Misiona. (25–30 minute)

Aumai se falaoa, se matauila, se ipu malamalama o i ai ni vai ma se maa i le vasega. Fesili: E faapefea ona avea mea taitasi nei e fai ma faatusa o le soifua o Keriso? (E mafai ona e faaaogaina le Ioane 4:10–15; 6:48; 8:12; Ieremia 2:13; ma le Helamana 5:12 e faaali atu ai pe mafai faapefea e nei mea ona fai ma faatusa o Keriso.)

Faitau e le vasega le Ioane 1:1–3, 14; le Faaliliuga a Iosefa Samita o le Ioane 1:1–3, 14; ma le Mataupu Faavae ma Feagaiga 93:8–10, ma saili pe aisea ua faaigoa ai e Ioane Iesu Keriso “o le Upu.” (O ni tali talafeagai e aofia ai, ona o Iesu o le “avefeau o le faaolataga” [MFF93:8], ona o Ia e tu mo le talalelei, o Ia e faataunuuna le upu a le Tama, ma na Ia foafoaina le lalolagi i lalo o taitaiga po o le upu a le Tama. Faatonu tagata o le vasega ina ia faavavevave ona vaai i mataupu muamua e tolu o le Evagelia a Ioane ma su'e suafa o Iesu Keriso ma tusi i luga o le laupapa. (O le lisi lenei mo se fesoasoani ma e le o atoatoa)


- O le Malamalama (Ioane 1:4–9)
- O le Alo (Ioane 1:18, 34, 49)
- O le Perofeta (Ioane 1:21; taga'i foi i le Teuteronome 18:15)
- O le Alii (Ioane 1:23)
- O le Tamai Mamoe (Ioane 1:29, 36)
- O le A'oa'o po o le Rapi (Ioane 1:38, 49)
- O le Mesia po o le Keriso (Ioane 1:41)
- Faiaoga (Ioane 3:2)
- O le faatoafaiava (Ioane 3:29)

Ia uunaia tagata o le vasega e sailia suafa o Iesu a o latou aoaoina le Feagaiga Fou ma iloiloaina pe faapea e nei suafa taitasi ona a'oa'o mai e uiga i le soifuaga ma le misiona a le Faola.

Ioane 2–3

O le Soifuaga o Iesu Keriso

O mea na tutupu i nei mataupu e foliga mai na tutupu lava i lenei vaitaimi



Faatomuaga

O mataupu e 2–3 o le Ioane, e faailoga ai le faaiuga o tausaga o sauniuniga a Iesu a o le amataga foi lea o Lana misiona i nofoaga faitele. I se tausamaaga o se faaipoipoga i Kana i Kalilaia, na faataunuu ai e Iesu Lana vavega muamua i luma o tagata o le faaliliuina lea o le vai i le uaina. Ina ua maea lena, ona ia malaga atu ai lea ma lona aiga i Kapanauami ma o atu i saute i Ierusalem ma le Paseka. O iina, na Ia tutuli ese ai ia “tagata faatau tupe” mai le malumalu ma la tuua’iina i latou i le faia o le “fale o lona Tama ma fale faatau oa” (Ioane 2:14–16). E le’i leva, ae sailia e Nikotemo, o se Faresaio lauiloa ma se ta’ita’i o tagata lutaia, se avanoa e fetai’i ai ma le Faola. O mea moni uma na a’oa’o e Iesu i Lana misiona, e maofa fo’i pe a mafaufau loloto i upu na Ia faia i se tasi o Ana faatalanoaga muamua.

Suesue ma le agaga tatalo le Ioane 2–3 ma mafaufau i mataupu faavae nei ae le’i saunia au lesonea.

O Nisi Mataupu Faavae Tava o le Talalelei e Saili Iai

- E ala mai i Ana faataitaiga, na faasino mai e Iesu e tatau ona tatou ava ma usitai i o tatou matua faalelalolagi i le amiotonu (tagai Ioane 2:1–11; FIS, Ioane 2:4; tagai foi Esoto 20:12; Teuteronome 5:16; Ioane 19:26–27)
- O Malumalu o fale o le Alii e le tatau ona ulufale atu i ai se mea eleelea. O tatou tino e faapei foi o malumalu, ma e le tatau ona tatou faaleagaina i mafaufauga, upu ma amioga e le mama, (tagai Ioane 2:13–22; tagai foi 1 Korinito 6:19–20).
- O tagata taitoatasi uma ua tatau ai ma e mananao e ulu atu i le malo selesitila e tatau ona papatisoina ma maua le Agaga Paia. E tatau ona tatou fanau faaleagaga i la le Atua, ia suia mai i le tulaga pauu sa tatou i ai i le tulaga amiotonu ina ia tatou mauaina ai le malo o le Atua (tagai Ioane 3:1–8; tagai foi Mosaea 27:24–26; MFF 76:50–53).
- O ituaiga ma faailoga mai le Feagaiga Tuai o loo aoao mai ai e uiga ia Iesu Keriso ma le fuafuaga o le faaolataga (tagai

Ioane 3:14–15; tagai foi Numera 21:4–9; 2 Nifae 11:4; Helamana 8:13–15; Mose 6:62–63).

Fautuaga mo le Aoao Atu

Filifili mai i aitia nei pe faaaoaga ni a oe lava, a o e saunia lesonea mo le Ioane 2–3.

Ioane 2:1–11. E ala mai i Ana faataitaiga, na faasino mai e Keriso e tatau ona tatou ava ma usita’i i o tatou matua faalelalolagi i le amiotonu. (10–15 minute)

Fesili i le vasega:

- O a igoa e faasino i ou matua e te faaaoaina?
- O a auala e te faaalua ai le faaaloalo i ou matua?
- O a ni ou lagona pe a e faalogo o tautala le faaaloalo nisi i o latou matua?

Ia faitau e le vasega le Ioane 2:3–4 ma mata’ituina le faaaloalo o Iesu Keriso i Lona tina. Faasino tagata o le vasega i le suiga o le faapupulaga 4a o le Faaliliuga a Iosefa Samita ma fesili: E aafia faapefea i lenei suiga lo tatou malamalamaaga i le faaaloalo o Iesu i Lona tina? Fesoasoani i tagata o le vasega ina ia malamalama o Iesu Keriso na Ia faia se faataitaiga i le le faaalua lea o Sona le faaaloalo i Lona tina.

(*Manatua:* Aloese mai le taumatemate po o le su’eina fua po o le faaipoipoga a ai lea na faia i lea vaitaimi. Manatua fo’i e le o se vaega talafeagai lenei mo se lesonea i le Upu o le Poto. O le vavega o le faaliuaina o vai i le uaina na faia i le senituri muamua T.A, a o le Upu a le Poto na tuuina mai e le Alii i le 1833.)



Ioane 2:12–25. O mea na tutupu i le soifuaga ma le misiona a le Faola na i ai sona sao tava tele i le ata o le faaolataga. (25–30 minute)

Tusi le siata pei ona tuuina atu, i le laupapa ae aua nei tusia ai mau.

O Upu ma Gaoioiga a Iesu

1. Faaalia i Ana au faalogologo o Ia o le Mesia (tagai Luka 2:46–50).
2. A’oa’o ma tima’i Ana Aposetolo ma soo (tagai Ioane 1:40–51).
3. Faateleina Lona lauiloa (tagai Ioane 2:1–11).
4. Ua tupu tele le itagia o ia, ma oo ai i Lona Faasatauroina (tagai Ioane 2:13–21).

Faafefiloi mau ma tuu atu i tagata o le vasega. Ia faitau mau ma vaai pe ua faailoa mai faapefea i mau taitasi le saunia o Iesu mo le Togiola. Ia faafetaui faatasi ma le vasega ia mau i mea e fa na tutupu ma faaopoopo i le siata.

Talanoaina le avea o nei mea na tutupu ma mea na i'u ai i le oo atu o le Faaola i le togalaau i Ketesemane, o le Satauro, o le tuugamau ma Lona Toetu. Ia faamamafa atu i tagata o le vasega, o Iesu na afio mai i le lalolagi e faataunuaina le Togiola ma o mea uma na tutupu i Lona soifuaga e taula'i uma lava i le [Togiola].

Ia faamanino atu o le soifuaga atoa o Iesu na tuuina atu i le faataunuaina o le finagalo o le Tama Faalelagi (tagai Ioane 5:30). Fesili:

- O le a le faamoemoe o le tatou o mai i le fogaeleele?
- O a mea e mafai ona e faia nei e mafai ona fesoasoani ia te oe e faataunuaina ai lea faamoemoe?
- O a mea e mafai ona tatou faia e faataunuu ai la tatou misiona i o tatou olaga? (Salamo ona o a tatou agasala, suesue i tusitusiga paia, tausii i poloaiga, aoao e faalogo i le Agaga.)

Faamalosia i tagata o le vasega ia ola i ni olaga ina ia mafai ai ona latou talisapaia ma agavaa ai mo faamanuiaga o le Togiola a Iesu Keriso.



Ioane 3:5 (Mau Tauloto). E tatou ona tatou fananau i le faaleagaga i la le Atua, ia suia mai i lo tatou tulaga pauu i le tulaga o le amiotonu. (25 minute)

Tuu i luga se ata o se pepe faatoa fanau ma fesili:

- O le a le mea tatou te matua soona fialia ai i pepe faatoa fananau mai?
- O a ituaiga uiga e masani ona tatou faatusaina i ai ia pepe fou? (Mama, loto mama, lotomauualalo, faalagolago, alofa, fou mai i le afioaga o le Atua.)
- O e toe moomoo ea e toe fia mauaina nei uiga?
- O a itu e lelei ai le toe amata?

Faitau e le vasega le Ioane 3:3–7, ma fesili:

- E tusa ai ma nei fuaiupu, fai mai Iesu e mafai faapefea ona tatou toe amata?
- E te manatu, o le a le mea ua faaoga ai e le Alii le fasi faitau lea "toe fanau" e faamatala ai le papatisoga ma le meaalofo a le Agaga Paia?

Faamalamalama ina ua faaoga e le Faaola ia upu nei "toe fanau" ma le "fanau i le Agaga," sa Ia faatusatusaina le papatisoga ma le toe fanau faaleagaga i le fanau mai i la le tino (tagai foi i le Eperu 12:9; Mose 6:59–60). Afai e maua ai se fesoasoani, tusi le siata leni i le laupapa ma talanoaina faatasi ma le vasega. Fesili i le vasega pe mafai ona latou faoopoopo i le lisi.

Fanau Faaletino	Fanau Faaleagaga
Amataina o le tatou olaga faaletino	Tatou te amata se olaga fou ia Keriso.
Tatou te maua mai uiga faaletino ma le faalemafaufau atoa ai ma mea faaleolaga nei mai o tatou matua.	Ua avea Keriso ma o tatou Tama ma tatou te maua mai mea faaleagaga mai ia te Ia.
I le tele o aganuu, tatou te mauaina ia igoa o o tatou tama.	Ua tatou mauaina le suafa o Keriso.
E mafai ona pei i tatou o o tatou matua.	Tatou te amata agaigai atu e avea faapei o le tatou Tama oi le Lagi.

Valaaulia tagata o le vasega e faitau i le Alema 5:14 ma le Mosaea 5:2 ma saili ia suiga e o faatasi ma le toe fanauina. Afai e le afaina i tagata o le vasega, valaaulia i latou e molimau i suiga na tutupu i o latou olaga i le taimi o lo latou papatisoga po o le liliu mai.

Molimau atu i tagata o le vasega e tatau ia i tatou uma ona fanau i le Agaga. Faaali atu ia i latou le taua o lou papatisoga ma le aoga o le meaalofo a le Agaga Paia i lou olaga.

Ioane 3:8–13. E tatou ona tatou fanau i la le Agaga ina ia mafai ai ona tatou ulufale atu i le malo o le Atua. (25–30 minute)

Fai i tagata o le vasega e vaai pe mafaufau i auga o savili i aso matagi. Faitau e le vasega le Ioane 3:8 ma vaai pe faapefea ona faatusatusa le matagi ma le fanau i la le Agaga. Fesili: Na faapefea ona fetalai Iesu e tutusa? A manaomia, faaoga le ata ua tuuina atu e fesoasoani i la outou faatalanoaga.

O le Matagi
O le Agaga

**E le mafai ona tatou vaai i o tatou mata.
E mafai ona tatou faalogoina.
E mafai ona tatou vaai ona
auga po o aafiaga.
E mafai ona matua malu po
o le matua malosii foi.**

Faitau e le vasega le Ioane 3:9–10, ma fesili:


- O le a le mea na a'oa'iina ai ia Nikotemo ona ua ia le malamalama i mea na aoao atu e Iesu? (O ia o se tasi o ta'ita'i ma faiaoga o tagata ma ua tatau ona ia malamalama i ia mea moni.)
- O a ni auala atonu e mafai ai ona tatou le malamalama i auga o le Agaga Paia i nisi taimi?
- O a ni auala e maua ai e tagata a latou molimau e ala mai i le malosii o le Agaga Paia?

- O le a le mea e eseese ai le tali atu o tagata i le Agaga?
- Pe ua i ai ea se taimi ua e popole ai ina ua e le lagonaina le Agaga Paia e pei o isi tagata?
- O a ni au taga pe a lē tali maia au tatalo e pei ona e mana'o ai?

Molimau atu e ui ina faigata ona faamalamalama ia auga ma uiga o le Agaga e pei o le matagi, ae e moni lava. E mafai ona tatou fanau i la le Agaga pe a tatou mulimuli i le faataitaiga a le Alii.

Ioane 3:28–30 (tagai foi Mataio 3:11–15; Mareko 1:7–8; Luka 3:15–16. O le lotomauualalo ma le malamalamaaga o Ioane le Papatiso ia te ia lava na fesoasoani lea ia te ia e tulimatai atu ai i lana misiona o le molimau atu lea i le Faaola. (25–30 minute)

Tusi le ata lenei i le laupapa.



Faitau e le vasega le Ioane 3:28–30, ma fesili: E tusa ai ma nei fuaiupu, o le a le mea e faatusa i ai laina ia e lua? (O le laina o loo alu a'e i luga e faatusa lea i le lauiloa o le Faaola e tagata; o le laina o loo pau ifo e faatusa ia Ioane le Papatiso.)


Fai i le vasega e faitau le Ioane 1:19–36; 5:33–36; 10:41, ma fesili:

- O a ni faataitaiga o le lotomauualalo o Ioane le Papatiso o loo tatou va'ia i ia mau?
- O le a se mea e mafai ona e ta'u maia e faaali mai ai na iloa e Ioane ia lava?
- E faapefea i le loto mauualalo o Ioane ona fesoasoani ia te ia i lona tiute o le tai'ala a le Mesia?
- O a ni mea e mafai ona tatou aoao mai i faataitaiga a Ioane le Papatiso e fesoasoani ai ia i tatou i o tatou olaga?

Molimau atu e moni lava o le faaolataga e na o Iesu e maua ai. Faamalamalama atu na silafia lelei e Ioane lenei mea. Sa ia te ia le tiute taua o le avea ma taimua po o se teuteuala mo le Mesia, ae sa ia faamaualalo atu i le Alii. E tatau foi ona tatou faia.

Ioane 4–5

O le Soifuga o Iesu Keriso



Faatomuaga

Sa i ai se taimi na e matua fiainu ai lava, ma oo ai se lagona ia te oe e faamatuu atu uma au mea mo le mauaina o sina vai malu e faamalie ai lou fiainu? I le laueleele sa femalagaa'i ai Iesu, sa maua gata le vai ma avea o se mea sa tau ai ni taua mo le mauaina. Sa faaaogaina e Perofeta ia le faatusa o le vai e faamanatu atu ai i le punavai o le ola faavavau (tagai Isaia 8:6; 12:3, 44:3, 55:1; Ieremia 2:13; Sakaria 14:8). Na amataina le misiona faalauaitetele a Iesu i le vavega o le faaliliuina o le vai i le uaina (tagai Ioane 2:1–11). Na Ia aoao atu ia Nikotemo e tatau ona tatou fanau i le vai (tagai Ioane 3:1–7. Na Ia aoao atu i le fafine Samaria o Ia na te ofoina atu le “vaiola” e maua ai le “ola e faavavau” (Ioane 4:10, 14; tagai ff 5–14). O le tagata ma'i sa nofo i tafatafa o le vai na ia iloina o le faamalologa e le mai i le vai ae o le Faaola (tagai Ioane 5:1–15). Na faaali mai i le Ioane 4–5, le punavai e faamalieina ai i latou e fia feinu i le mea moni ma le amiotonu.

Suesue ma le agaga tatalo le Ioane 4–5 ma mafaufau i mataupu faavae nei ae le'i saunia au lesona.

O Nisi Mataupu Faavae Taua o le Talalelei e Saili Iai

- O le alofa ia Keriso ma le tausia o Ana tulafono, e pei lava o le inuina o se vaiola—e faafouina ma faaolaina ai i tatou ma oo atu ai i le ola faavavau (tagai Ioane 4; tagai foi Ioane 7:37–38; 1 Nifae 11:25; MFF 63:23).
- O le fetufaai o le talalelei ma isi e ui ina faafoliga e faigata, ae e maua ai e i tatou le fiafia ma fesoasoani ai ia tatou maua le ola e faavavau (tagai Ioane 4:6–10, 31–40).
- O le Faamasinoga ma le Toetu ua faataunuaina i le pule a Iesu Keriso (tagai Ioane 5:21–29)
- O i latou ua maliliu ae le'i faalogo i le talalelei o le a maua le avanoa latou te maua ai i le lalolagi o agaga (tagai Ioane 5:25–28; tagai foi 1 Peteru 3:18–21; 4:6; MFF 138:25–37).

O le faaaloalo o Keriso ma le usita'i i le tulafono o molimau o loo tautino mai ai lona paia (tagai Ioane 5:30–47; tagai foi Teuteronome 17:6; 2 Korinito 13:1).

Fautuaga mo le Aoao Atu

Filifili mai i aitia nei, pe faaaoga foi ni au lava, a'o e saunia lesona mo le Ioane 4–5.

Ioane 4–5. O le iloaina o nuu na savali ai Iesu e mafai ona fesoasoani ia i tatou e manatua ai Lona soifuaga. (20–25 minute)

Fesili i le vasega:

- E i ai ni nofoaga faapitoe e te faatauaina i lou olaga?
- Aisea e malolosi ai ni ou lagona i nisi o nofoaga?

Faamatala atu o le mea fo'i lea e tasi e mafai ona faamatala ai le misiona a Iesu i la le tino. Ia Sue e le vasega ia nofoaga nei i le faafanua e 4 ma le 5 o loo i le *Taiala i Tusitusiga Paia*:

- Vaitafe o Ioritana
- Ierusalem
- Kana
- Sukara
- Kapanaumi
- Vai o Petesa

Ia sailia e tagata o le vasega ia mea taua na tutupu i nofoaga taitasi pei ona taua i mau nei:

- Ioane 1:19, 23–28
- Ioane 2:1–11
- Ioane 2:13, 23–3:8
- Ioane 4:1–21
- Ioane 3:46–50
- Ioane 5:1–9

A mae'a ona talanoaina ia nofoaga ma mea na tutupu ai mo se taimi puupuu, ona faamatala lea, o le iloaina o mea sa femalagaa'i ai Iesu i Lana misiona i la le tino e fesoasoani ia i tatou e malamalama ai i Lona soifuaga.

Ioane 4:5–30, 39–42. O le a fafagaina i tatou e Keriso i le faaleagaga pe a tatou alolofa ia te la ma tautusi i Ana tulafono. (15–20 minute)

Aumai i le vasega se ipu malamalama ma se siofi malamalama o i ai se vai aisa. Uu i luga ma tofi se isi e sau e inu. Fesili: O le a le aoga o le vai i o tatou olaga? (E fesoasoani e maua ai le ola, e maua ai le lagona faafouina ma le malu, e faamalie ai le fiainu.) Faitau e le vasega le Ioane 4:5–30, 39–42 ma saili ia upu poo mea e faasino i le vai ma le fiainu, ma valaaulia i latou e fetufaa'i mai o latou manatu i mea na latou maua mai i le faitauina o mau pei on taua. (E mafai ona aofia ai ni tali, "itu

aso po ua ono" [tu tonu o le la —o se taimi vevela o le aso; f. 6], "vai eli" [f. 6], "inu" [f. 7] "vaiola" [f. 10], "leai se mea e utu [mai ai le vai]" [f. 11], "fiainu" [ff. 13–14], "puna i luga" [f. 14], "utu vai" [f. 28].)

Fesili:

- Aisea na le vave malamalama ai le fafine i le faatusa a le Faaola? (Sa fetalai Keriso i mea faaleagaga ae o loo mafaufau le fafine i mea faalelalolagi.)
- O le a sou manatu o le a se lagona na oo i le fafine ina ua ta'u atu e Iesu ana agasala? (tagai ff 17–18).
- E mafai faapefea e le vaiola na tuuina atu e Iesu ona aafia ai le olaga o le fafine?
- O le a le mea sa tataua ona ia faia e mafai ai ona ia inuina lenei vaiola?
- O le a le mea o loo ofoina mai e Keriso ia i tatou e pei o le vai? (Upumoni, toetu, faamagaloga o a tatou agasala pe a tatou salamo, Lona Agaga.)

Faamatala i le vasega o le vai o le ola lea, aemaise i tagata i tau vevela e pei o Palesitina. A leai se vai, e mate laau, manu ma tagata. Faamanino i ai o i latou e nonofo i le agasala pe latou te lē o maua foi le talalelei, e pei lava o lauelele vevela, fiafeinu ma leai se vai. Latou te manaomia le vaiola o le talalelei e toefuataiina lo latou ola faaleagaga.

Ioane 5:25, 27–30. O i latou e oti ae le'i faalogo i le talalelei o le a i ai le avanoa e maua ai i le lalolagi o agaga. (20–25 minute)

Fesili i le vasega:

- E i ai nisi o outou ua maluu se tagata tou te alolofa i ai?
- E mafai e se tasi ona faamatala mai ni lagona na oo i ai i le taimi o le maluu?

(*Manatua*: Faateete mo le oo atu i lagona e mafai ona aafia ai se isi.)

- E eseese faapefea le tiga o le maluu o se tagata e te alofa i ai pe afai e te iloaina o lea tagata na te le'i iloaina lava Iesu Keriso po o Lana talalelei foi?

Faitau e le vasega le Ioane 5:25–30

- E faapefea e nei fuaiupu ona fesoasoani e faamafanafanaina se tasi ua toesea sa pele ia te ia, aemaise pe afai o se tagata na te le'i iloaina le talalelei?
- E faamasinoina faapefea e ua maliluu i se tulaga talafeagai ai pe afai latou te le'i maua le avanoa e faalogo ai ma talia le talalelei?
- O le a le folafolaga a le fuaiupu e 25 i e ua maliluu? (O le a latou faalogo i le leo o le Alo o le Atua.)

O le a le uiga o le "faalogo i le leo o le Alo o le Atua"?

Atonu e te manao e faatusatusa leni fasi fuaitau i le MFF 1:37–38. Faamanino atu o le tatou faalogo i auauna a le Atua, e tutusa lava ma le faalogo ia te Ia.

Faitau le leoa le MFF 138:1–19, 29–31, 57. A mae’a ona fesili atu lea: E faapefea e lenei faaaliga ona aumaia le filemu i se tasi ua toesea se isi e pele ia te ia.?

Ia faia e tagata o le vasega se faasologa o mau i le faatusatusaina lea o mau i le lisi lenei i le lisi lona lua, o le lona lua i le lona tolu, ma faasolo atu ai se’ia oo i le faaiuga ma faatusatusa le mau mulimuli i le mau muamua.

- Ioane 5:25–30
- Isaia 24:22
- Isaia 25:8
- Isaia 42:7
- Isaia 61:1
- Peteru 3:18–21
- 1 Peteru 4:6
- Mataupu Faavae ma Feagaiga 138:1–19, 29–31, 57
- Mose 7:37–39

Faaiu i le fesili: O le a se mea e ta’u mai ia i tatou e uiga i le tatou Tama oi le Lagi, ina ua tatou iloa Na te saunia se auala mo i tatou uma e faalogo ma malamalama i le talalelei.?

Ioane 5:31–40. Na faaloalo ma usita’i Iesu i le tulafono o molimau (20–25 minute)

Ae le’i amataina le vasega, tuu se pinati po o se isi fualaau fai fatu e le’i aveesea lona pa’u i totonu o se taga pepa. Ta’u atu i le vasega o loo i totonu o le taga pepa se mea e le’i vaai muamua i ai ni mata o se tagata ola. Valaaulia se tagata faatuatua ina o le vasega e tilotilo i totonu o le taga pepa pe mo’i le mea sa e fai atu ai. (Afai e le o mautinoa lelei e le tagata, musumususu atu i ai o totonu o le pinati po o le fualaau fai fatu e le’i vaai muamua i ai ni mata o ni tagata ola.) Fesili i le vasega pe talitonu i le tagata o le vasega lea na tilotilo i totonu o le taga pepa. Valaaulia se i si tagata o le vasega e sau e tilotilo i totonu o le taga pepa. Ia faamautuina e le tagata lea le molimau a le tagata muamua. Fesili i le vasega pe toafia ua talitonu nei. Faaali atu le pinati po o le fualaau fai fatu ma faamatala atu o totonu o le pinati po o le fualaau e le’i vaai muamua i ai ni mata o se tagata ola. Fesili: Faamata e fesoasoani le avea o ni molimau e silia ma le tasi e faamautu ai le molimau?

(Manatua: Afai ua e faaaogaina le fautuaga mo le aoaoina atu i le Mataio 16:1–4 [itulau 41–42], o loo aofia ai se lesone faatino e tali tutusa, e mafai ona e faia se mea e faapei o lenei. Ia vave saunia se tagata o le vasega ae le’i faia le vasega na te tuuina maia se lipoti o se tala e ofo ai i le vasega. E mafai ona faapea o se mea na e aoaoina mai i se faasalalauga o talafou e le maua e le vasega se avanoa e faalogo ai i ai, pe o se mea mata’utia na tupu i le tagata na te le’i taua i se isi. Saunia se isi tagata o le vasega na te faamaonia le tala.)

Faitau e se tasi o le vasega ia le Teuteronome 19:15. Faamatala atu o le tulafono o molimau e mai anamua ma e tele fuaitau i tusitusiga paia o loo ta’ua ai (tagai Mataio 18:16; 2 Korinito 13:1; Eteru 5:4; MFF 6:28). Tusi le siata lenei i le laupapa e iloa

ai molimau o loo ta’ua e Iesu i le Ioane 5:31–40, ma aua le tusia se mea i le koluma o “Molimau”.

Mau Faatusatusa	Molimau
Ioane 4:25–26	O Iesu lava Ia
Ioane 5:33–35	Ioane le Papatiso
Ioane 5:36	Galuega a Iesu
Ioane 5:37	O Le Tama
Ioane 5:39	O Mau


Tofi se tagata o le vasega e faitauina leotele le mau muamua i le koluma “Mau Faatusatusa” ma tusia le molimau o loo taua. Tusi le tali i le koluma o “Molimau” ona toe tofi fo’i lea o se isi tagata o le vasega e faitaua le mau e sosoo ai seia mae’a le siata. Fesili:

- Ina ua fetalai mai le Faaola e su’esu’e i tusitusiga paia, o le a le mea o loo faasino i ai Lana fetalaiga? (O le Feagaiga Tuai.)
- Aisea na Ia manao ai e suesue tagata i le Feagaiga Tuai? (O perofeta o le Feagaiga Tuai na latou valoia le afio mai o le Faaola: tagai Iakopo 4:4–5.)
- O a nisi molimau o le Paia o Iesu e mafai ona e manatua? (Tali talafeagai, o matua, perofeta soifua, o le Agaga Paia, o le Malamalama o Keriso.)

Faai’u i le tuuina atu o lau molimau i le paia o Iesu Keriso.

Ioane 6

O le Soifuaga o Iesu Keriso



Faatomuaga

Manatunatu i le faasologa o mea nei na tutupu: sa mulimuli le motu o tagata i le perofeta i se nofoaga tuufua, na saunia e Ieova ni falaoa i se tulaga faavavega e taumamafa ai i latou, ua alu atu le perofeta na’o ia i le mauga, na laveaiina e le Alii. Ona soo a’o latou laasia le sami i se tulaga faavavega, sa muimui tagata ma fefinauai i latou lava ma faitoi i perofeta ma na tuuina atu e le perofeta se aoaoga e faamatala ai le uiga o nei mea na tutupu. O lenei faasologa e taua ai le Malaga Ese mai o Isaraelu mai i Aikupito. O loo ototoina ai fo’i ia mea na tuputupu i le Ioane 6. O le Evagelia a Ioane na faailoa mai ai o Iesu o le taiulu o se Malaga Ese fou, i le ta’itaieseina mai

lea o Ona soo mai le nofo pologa i le lalolagi, i tofotofoga i la le tino ma oo atu ai i le ola e faavavau.

Suesue ma le agaga tatalo le Ioane 6 ma manatunatu i nei mataupu faavae ae le'i saunia au lesona.

O Nisi Mataupu Faavae Tava o le Talalelei e Saili Iai

- E mafai e le Alii ona ia aumaia uma mea tatou te manana'o i ai (tagai Ioane 6:5–21; tagai foi Filipi 4:19).
- E pule Iesu Keriso i elemene (tagai Ioane 6:5–21; tagai foi Iakopo 4:8–9).
- Pei ona tatou ola i le faaletino i mea ai ma le vai, e faapena foi ona ofoina mai e Keriso ia i tatou ia le areto o le ola ma vai tatou te ola ai e faavavau (tagai Ioane 6:35–58, tagai foi Ioane 4:10–14; 7:37–39).
- E tatau ona tatou tetee atu i faaososoga o le tatou le fiafia i a'oa'oga ma tulafono a le Faaola, aua o Ia o le "Keriso, o le Alo o le Atua soifua" (tagai Ioane 6:60–71).

Fautuaga mo le Aoao Atu

Filifili mai i aitia nei, pe faaoga ni a oe lava, a'o e saunia lesona mo le Ioane 6.



Ioane 6. O Ioane 6 e faataata mai ai fo'i le mea lava e tasi e pei o le Malaga Ese mai i Aikupito ma le ata o le faaolataga.
(35–45 minute)

Faitau ia faamatalaga nei pe tusi foi i luga o le laupapa.

Na saunoa mai Elder Boyd K. Packer:

"O le fuafuaga e aoga lava le fai ma saga fai. Ona tumau ai lea ia i latou o le faamoemoega o le Olaga, le moni o le Togiola ma le pogai o tulafono" (*The Great Plan of Happiness* [lauga i faiaoga o mataupu faalelotu i le Mataupu Faavae ma Feagaiga/Talafaasolopito o le Ekalesia, Brigham Young University, 10 Aukuso. 1993], 3).

Na fesili ia Peresitene Ezra Taft Benson:

"O tatou faaogaina ea savali ma metotia mo le a'oa'oina atu o loo maua i . . . tusitusiga paia o le Toefuataiina e aoao ai lenei fuafuaga sili a le Atua e Faavavau?" (Lipoti Konafesi Ape. 1987, 106; po o le *Liahona*, Iulai 1987, 84).

Fesili i le vasega:

- Aisea e taua tele ai le aoao ma iloilo le ata o le faaolataga?

- O a ni mataupu faavae ua e aooina mai i au suesuega talu ai e uiga i le ata o le faaolataga, e taua ia te oe.?
- Pe e te talitonu ea o le aoao soo o se mea e fesoasoani ai tatou te manatuaina.?
- O le a se auala e sili atu ua e iloa mo le aooina atu o le ata o le faaolataga?
- O a metotia o loo faaogaina e tusitusiga paia e aoao mai ai le fuafuaga?

Faamalamalama e ui ina tuu sa'o mai e tusitusiga paia le aoaoga o le ata o le faaolataga, ae o loo aooina mai ai foi i se tulaga e lē tuusa'o maia e ala lea i le faaogaina o faatusa, po o "ituaiiga" ma "faataataga" (tagai Mosaea 3:15; Mose 6:63).

Faitau faavavevave e le vasega ia mau nei: Isaia 11:11, 15–16; Jeremia 16:12–15; Galuega 3:22–23; Roma 9:17; 1 Korinito 10:1–6; 1 Nifae 4:1–4; 3 Nifae 20:23. Fesili: O le a sou manatu aisea ua toatele naua ai perofeta e ta'ua le Malaga Ese [mai Aikupito] po o le Esoto anamua?

O mea nei na tutupu i le Malaga Ese [mai o le fanauga a Isaraelu mai Aikupito] o loo faatulagaina i taimi na tutupu ai. Ia tusia i luga o le laupapa i soo se faatulagana ma fai i le vasega e faatulaga i le faasologa sa'o.

1. Na mulimulita'i le motu o tagata Isaraelu i se perofeta i le vaomatua.
2. Na latou laasia le Sami Ulaula i se auala faavavega.
3. Sa muimui [soo] le motu o tagata.
4. Sa fafagaina e le Alii ia tagata i le manai mai le lagi.
5. Na alu a'e le perofeta i se mauga e aumaia ai le tulafono.
6. O le toatele o le fanauga a Isaraelu na fouvale i le Atua.
7. Na i'u ina taunuu atu Isaraelu, na ta'ita'ia e Iosua, i le nuu na folafolaina.

Ta'u atu i le vasega o le Ioane 6 e tele ni mea e tutusa ai ma le Malaga [a le fanauga a Isaraelu]. O le siata o loo avatu ai o loo lisiina ai nisi o ia mea. Ia faia se kopi malamalama e faaali i le masini poo se kopi e tufatufa o le siata o loo i tua o le tusi, e leai se mea o tusi ai i le koluma o le "Malaga Fou" (tagai itulau 289), ma faatumuina faatasi ma le vasega.

Malaga a Isaraelu mai i Aikupito	O Se Malaga Fou (Ioane 6)
Na taitaiina le fanauga a Isaraelu e le Atua i le vao i tafatafa o le Sami Ulaula (tagai Esoto 13:18).	Na mulimulita'i le motu o tagata ia Iesu a'o ia laasia le Sami i Kalilaia (tagai Ioane 6:11–2).
Na "alu a'e Mose i le mauga o le Atua" (Esoto 3:1; tagai foi f. 12; 19:1–3).	Na alu a'e Iesu i se mauga (tagai Ioane 6:3, 15).
Na faateleina e Ieova ia faailoga ma mea ofoofogia (tagai Esoto 7:3; tagai foi Esoto 7–11).	E toatele tagata na mulimuli ia Iesu ona o faailoga (tagai Ioane 6:2, 26, 30).

Na faatuina e le Alii le Tausamaga o le Paseka (tagai Esoto 12).	O le taimi lea o le Paseka (tagai Ioane 6:4).
Na tuuina atu e le Atua i le fanauga a Isaraelu le manai po o "areto mai le lagi" (Esoto 16:4 tagai ff 3–35; Teuteronome 8:3).	Na fafagaina e le Alii le motu o tagata i areto karite e lima ma i'a e lua (tagai Ioane 6:5–14. Na fetalai mai o Ia, "O a'u o le areto e alu ifo mai le lagi" (f. 41; tagai ff. 31–58).
Na ta'u atu e le Alii i tagata ina ia latou faaputuina tau lava o mea o loo latou manaomia i le aso ina ia aua ne'i maimauina se mea (tagai Esoto 16:16–30).	Na ta'u atu e Iesu i le au soo e faaputupu toe 'aiga ne'i i ai se mea e maumau (tagai Ioane 6:12).
Na folafola mai e le Alii o le a faatuina se Perofeta pei o Mose (tagai Teuteronome 18:15–18).	Na iloa e le motu o tagata o Iesu o le "perofeta lea" (Ioane 6:14).
Na lavea'iina e le Alii le fanauga a Isaraelu i le vaeluaina lea o le Sami Ulaula; sa savavali atu i luga o le lauelele matutu (tagai Esoto 14). O loo faamamafaina mai i le faamatalaga le pogisa ma le matagi (tagai ff 20–21).	Na savalia e Iesu le Sami o Kalilaia ma lavea'i le au soo mai le afa (tagai Ioane 6:16–21) O loo faamamafaina foi i lena faamatalaga le pogisa ma le matagi (tagai ff. 17–18).
Sa muimui le fanauga a Isaraelu i le Alii (tagai Esoto 15:24; 16:8; 17:3; Numera 11:4–6).	Sa muimui le motu o tagata i le Alii (tagai Ioane 6:43, 61, 66).
Na molimau mai Perofeta i le uiga ma le aoga o le Malaga (tagai Esoto 14:31–15:21; Numera 20:12; Teuteronome 4:33, 35; 6; 26:5–9; Isaia 51:9–16; 52:1–6; 1 Nifae 17; 2 Nifae 25:20; tagai foi MFF 136:22).	Na ta'utino atu e Peteru o Iesu o loo i ai "upu o ola e faavavau" Ioane 6:68; tagai ff. 66–69).

Fesili: E te manatu aisea ua aofia ai i le Ioane 6 le anoanoai o mea e faatusa i mea na tutupu i le Malaga? (Atonu o le auala lea e mafai ai ona taliaina e le au lutaia le Savali a Iesu ma fesoasoani latou te malamalama ai i le uiga o le latou talafaasolopito. Vavae le vasega i ni vaega se tolu ma tuuina atu i vaega taitasi se tasi o mau nei ma saili mea na tutupu i le Ioane 6 e ogatasi ma le Malaga ma pe mafai faapefea foi ona tatou faaogaina nei mau ia i tatou lava.

- Ioane 6:1–14 (Na mulimuli le motu o tagata ia Iesu i se nofoaga tuufua ma na Ia fafaga ia i latou i se auala faavavega. Pe a tatou mulimuli i le Faola ma Ana perofeta, ona tatou maua ai lea o meaai faaleagaga.)
- Ioane 6:15–21 (Na savali le Faola i luga o le sami e lavea'i Ona soo. A lutia i tatou i puapuaga, e na o Iesu Keriso e puna mai ai le filemu. E fesoasoani o Ia i la tatou malaga i le nuu folafolaina e faavavau.)
- Ioane 6:22–71 (O le aoaoga a Keriso i le areto o le ola na iloa ai le uiga o mea na tutupu. O upu a Keriso e taitaiina ai i tatou ma fesoasoani tatou te malamalama ai i le uiga o le olaga faaletino.)

Ia tofu faamatala mai e vaega taitasi i le vasega mea na latou mauaina.

Ia faitau leotele e se tagata le 2 Nifae 11:4 ma le Mose 6:63. E tusa ai ma nei fuaiupu, o a mea e molimau ia Keriso? Talanoaina pe faapefea ona feiāia'i nei fuaiupu ma le faiga

o le Malaga o loo i le Ioane 6. Ia faamalosiua i le vasega ina ia latou iloina le ituaiga ma ataata e molimau atu mo Iesu Keriso a o latou a'oa'o i mau.

Iane 6:5–14 (tagai foi Mataio 14:14–21; Mareko 6:34–44; Luka 9:11–17). Na auauna atu Iesu Keriso ona o Lona alofa i le Tama Faalelagi ma tagata uma. E mama o tatou faamoemoega pe a avea lo tatou alolofa i le Atua ma o tatou uso a tagata ma faatosinaga tatou te tausia ai tulafono. (15–20 minute)

Faamatala le tulaga faatusa lena e aoao ai: Na tuai ona ala ia Mele i se tasi taeao ma sa tatope le faiga o ona ofu mo le aoga. Sa le'i teuina lona moega ma o lona potu na pei na agi ai se asiosio. Ina ua foi mai o ia i le fale i le afiafi, sa ia vaaia ua uma ona teu lona moega ma ua mama foi lona potu. I luga o lona moega o loo taatia ai se tusi: "Le pele o Mele, Na e fo'i mai i lau tafaoga anapo ua leva le po ma ua ou iloa ua e matua vaivai lava. Ua uma ona ou faamamaina lou potu ma teu lou moega. Ou te faamoemoe sa manuia lena aso mo oe. Alofa, O lou Tina." Fesili:

- O le a se lagona e oo ia te oe pe ana fai o oe o Mele?
- Aisea e fai ai e se tina se mea faapea?
- Tusi le upu *Faaosofia* i luga o le laupapa ma fai i le vasega e ta'u mai po o le a le uiga o lena upu. Fesili:
- O a ni pogai e ala ai ona fai e tagata mea ua latou faia.?
- Faitau le Ioane 6:5–14. O le a sou manatu o le a le mea na fafaga faavavega ai e Iesu tagata e lima afe?
- Faitau le Ioane 6:22–26. E tusa ai ma upu a Iesu, o le a le mea na su'eina ai e tagata ia Iesu? (Talanoaina le eseese o faamoemoega o Iesu mai le motu o tagata)
- Faitau le Ioane 6:38. E tusa ai ma le fuaiupu lena, o le a le mea na faaosofia ai Iesu?

Faamatala i le vasega na faaosofia Iesu Keriso ona o Lona alofa i le Tama Faalelagi faapea foi Ona uso ma tuafafine agaga, a o le motu o tagata na faaosofia i latou i o latou mana'o i nisi meaai ma vaai i faailoga. Faamalamalama, e masani ona faaosofia tagata i mea eseese. Mo se faaitaiga, o le toatele o i tatou, tatou te o i le lotu, ae atonu e eseese foi mafuaaga e ala ai. Fesili: O le a sou manatu, o a ni mafuaaga e ala ai ona o tagata i le lotu? Tusi tali i le laupapa ma faavasegaina i mafuaaga faamoemoega latou te iloa e mama.

Fesili i le vasega pe o faamoemoega latou te faia ai mea lelei e ese mai i faamoemoega o Keriso. Fesili:

- O a mea e mafai ona tatou faia e faaleleia ai o tatou faamoemoega?
- O a ni faamanuiaga e maua e se tasi e mama ona faamoemoega?
- Molimau atu o le mama o o tatou faamoemoega, o le tele foi lea o lo tatou mulimuli ma avea atili e faapei o Keriso.



Ioane 6:32–51. O Iesu Keriso o le Areto o le Ola. (15–20 minute)

Aumai se falaoa i le vasega. Vavae ese se fasi falaoa ma tuuina atu i le vasega e vaavaai ma sogisogi i ai. Fesili: E mafai faapefea ona faatusaina Iesu i le falaoa po o le areto? Tusi tali i le laupapa. (O ni tali talafeagai e aofia ai, e mafai e [Iesu ma le falaoa] ona maua ai le malosiaga ma faamalie ai le fiaai; e maua le ola i ia mea e lua, o ia mea e lua o faamanuiaga mai le Tama Faalelagi; na soifua mai Keriso i Peteleema, lea pe a faauigaina o le “fale o areto.”)

Faitau e le vasega le Ioane 6:32–51 ma saili pe faapefea ona faatusaina e Iesu Ia lava i le manai po o le “areto mai le lagi.” Fesili:

- O a ni faamanuiaga o lenei “areto o le ola”?
- O a taunuuga o le teenaina o lenei areto?
- E faapefea ona faatusatusa le lē lava o meaai faaleagaga i le lē lava o meaai tatau faaletino?
- Faitau le Ioane 6:32–35, 44–51. E tusa ai ma nei fuaiupu, e faapefea ona tatou aai i le areto o le ola?
- Aisea na folafola mai ai e Iesu afai tatou te o mai ia te Ia ma talitonu ia te ia o le a tatou le toe fia aai pe fia feinu foi? (tagai f. 35).
- O le a le uiga ia te oe o le sau ia Keriso?

Faitau le faamatalaga lenei a Elder Bruce R. McConkie:

“Ua tatou oo mai nei i le aoaoga aupito maualuga o le lauga i le areto o le ola, e faasaoina tagata uma i le tau-mafaina lea o le tino ma inu i le toto o le Alo le Atua....

“O le areto o le ola, o le ola e faavavau, areto ola, o areto mai le lagi—o gagana ia na te faaaogaina e faasino ia te ia lava; ma ona o lona tino o le tino o aano ma le toto, ma o le aai i le areto mai le lagi, e tatau i tagata ona aai i lona tino, le tino ‘o le a ia tuuina mai mo le olataga o le lalolagi,’ o le tino o le a masoe i lana taulaga togiole e lē gata. O le iloaina o le uiga o upu a Iesu, ae matua le malamalama pe faapefea ona faaaogaina i le faaolataga ma galuega e tatau ona latou faia e maua ai le ola e faavavau, sa ‘fefinaua’i ai tagata Iutaia.’

“O le aai i le tino ma feinu i le toto o le Alo o le Atua, muamua, o le taliaina lea o ia i se tulaga atoatoa, e aunoa ma se masalosalo, o se alo totino i le tino o le Tama e Faavavau; ma lona lua, o le tausia lea o tulafono a le Alo e ala i le taliaina lea o le talalelei, auai i lana Ekalesia, ma tumau i le usitai ma le amiotonu seia oo i le iuga. O i latou, e aai i lona tino ma feinu i lona toto i le auala lea o le a maua le ola e faavavau, o lona uiga o faaeaina i le lagi pito maualuga i le lalolagi selesitila. I le taua o Isaraelu anamua, mo se faaitaitaiga, fai mai Paulo: *Na ‘aai uma i le mea e ‘ai e tasi faaleagaga, ma feinu uma i le vai e tasi faaleagaga; auā na latou inu i le Papa faaleagaga sa mulimuli atu ia te i latou, o lena Papa foi o Keriso lea.*’ (1 Kori. 10:3–4.)” (Mortal Messiah, 2:377–79).

Fesili:

- E mafai faapefea ona tatou manatuina a tatou feagaiga e o mai ia Keriso?
- Aisea tatou te faataunuuna ai le faamanatuga i vaiaso uma?

Faamatala tatou te aai i le areto o le ola i le taliaina lea o Iesu o le Keriso, auai i Lana Ekalesia, tausia o Ana tulafono, ma tumau i le amiotonu e oo i le iuga. A tatou faia lea, o le a tatou le toe fia aai ma fia feinu i ni mea faaleagaga. Peitai, e tatau lava ona tatou faamanatu pea i taimi uma a tatou feagaiga e ala lea i le aai i le areto ma inu i le vai o le faamanatuga. Faitau le Mataupu Faavae ma Feagaiga 20:77 ma fesili:

- O le a le mea tatou te folafola atu i le Tama tatou te lotu e fai pe a tatou aai i le faamanatuga?
- O le a le folafolaga e tuuina mai e le Atua?

Faitau ma talanoaina le faamatalaga lenei a Elder Melvin J. Ballard:

“O a’u o se molimau o loo i ai se agaga i le faataunuuna o le faamanatuga e faamafanafana i le agaga mai lava i le ulu se’i oo atu i vae; e te lagona ua faamaloloina manu’a o le agaga, ma ua aveesea foi le avega. O le mafanafana ma le fiafia e oo mai i le agaga e agavaa ma mana’o faamaoni e ‘ai i lenei meaai faaleagaga.” (Melvin J. Ballard—Crusader for righteousness [1966], 133)

Usuina le pese “A tatou Fetagofi i nei Faatusa: (Viiga nu. 98.) Faamalosiua i le vasega ina ia manatua pea le faamanatuga ma lona taua a’o latou fetagofi atu i ai i vaiaso taitasi.

Ioane 6:60–71. E tatau ona tatou lē faatausui i aoaoga a le Faola ma poloaiga. (20–25 minute)

Aumai se uaea valavala po o se faamamā i le vasega ma faaaoga e vaimama ai se oneone. Pe faafefiloi ni ilili ma le falaoamata ona faaaoga lea o se mea vaimama e tuueseese mai ai le falaoamata mai ilili. Faitau e le vasega le Ioane 6:66, ma fesili:

- E faapefea ona faatusatusa le lauga a le Faola i luga o le mauga e uiga i le areto i le faiga o le faamama?
- O le a sou manatu aisea na toatele ai le au soo o Iesu na tuua o Ia i le taimi lea?
- Faamata e te manatu o tagata e o ese mai le Ekalesia pe le toaaga i le lotu i aso nei, e mafua ona o le le lava o le malamalama pe le lava foi le naunau e ola ai i le talalelei?
- O a mea e faafaigata ai e nisi tagata ona ola i le talalelei i aso nei?
- O a mea e mafai ona tatou faia e faatoilalo ai faigata ma tumau faamaoni ai i a tatou feagaiga?


Faitau e le vasega le Ioane 6:67–69 ma saili pe faapefea ona tali Peteru i le fesili a le Faola, “Pe tou te fia o ese foi?” Ta’u

atu na mafai ona tali atu Peteru i le tali pei ona tali atu ai ona ua i ai lana molimau e ala i faaaliga (tagai Mataio 16:16–17). Faamalalalama e pau le mea e mafai ai ona tatou tali atu ma le malosi i le fesili a le Faola e pei o le talitonuga maumaututu o Peteru, pe afai e i ai ni a tatou lava molimau. O sea ituaiga o molimau e na o faaaliga e maua ai, ma o sea faaaliga e faatoa mauaina pe a usitai ma tatalo. Fai i le vasega e mafaufau, o se isi taimi o le a feagai ai ma ni tulaga faigata, pe faapefea la ona latou tali atu pe afai e fesili le Alii ia te i latou, “Pe tou te fia o ese foi?”

Usuina e le vasega le pese “Fa’aola e, ia Ou Alofa” (Viiga, nu. 150). Molimau atu o se tasi o faamoemoe autu o le ola faaletino o le tofotofoina lea. Faitau le Aperaamo 3:25 ma faamatala atu o le feagai ma lu’itau o le auala lea tatou te faaali atu ai i le Alii o le a tatou faia mea uma Na te faatonuina ai i tatou.

Ioane 7–8

O le Soifuaga o Iesu Keriso



Faatomuaga

O le Ioane 7–8 na faatinoina i le tautotogo i le tausaga lona tolu o le misiona a le Alii. E pei o Ona tagatanuu, sa fuafuaina e Iesu e auai i le Tausamiga o Fale Apitaga i Ierusalem. E i ai nisi o Ona uso ua manatu o le aso lea o se taimi lelei e maua ai se avanoa e fai ai e Iesu se tautinoga faalauaitele e tusa ai ma Lana Misiona paia (tagai Ioane 7:4). Na teena e Iesu le manatu ma tolopo ai Lona alu ese mo ni nai aso, ma alu ai i se auala faalilolilo aua o loo saili ta’ita’i Iutaia e founa Lona soifua (tagai Ioane ff. 8–13). “Ua oo atu i ona po e siitia ai o ia, ona matua faasaga atu lea o ia a maliu atu i Ierusalem” (Luka 9:51). E tatau ona toe aoao atu o Ia i Iutaia ma Perea a o le’i oo mai le faatumutumuga o mea e tutupu i Ketesemane ma Kolokota ae o le a le toe foi atu lava i le Kalilaia e pele ia te Ia seia mavae Lona Toetu.

Suesue ma le agaga tatalo le Ioane 7–8 ma manatunatu i mataupu faavae nei ae le’i saunia au lesona.

O Nisi Mataupu Faavae Tava o le Talalelei e Saili Iai

- Tatou te iloaina le moni o aoaoga a Iesu i le ola ai (tagai Ioane 7:14–17).
- O molimau ia Iesu Keriso e tatau ona faavae i le molimau a le Agaga (tagai Ioane 7:24–53; tagai foi Iakopo 4:8–11, 14–16).
- Nai lo le tatou faafiaamionu ma faasala i latou e agasala, e tatau ona tatou faamalosiauina ma le alofa i latou e lafoaia pe fultua i le agasala (tagai Ioane 8:1–11; tagai foi Mataio 7:1–5, MFF 58:43).
- A’o tatou sailia ma mulimuli i le mea moni, o le a faasa’olotoina mai i tatou i le pologa o le agasala ma sese (tagai Ioane 8:21–24, 31–36).
- Ina ia faaolaina, e tatau ona tatou taliaina ma mulimuli ia Iesu Keriso ma Ana perofeta soifua (tagai Ioane 8:33–39; tagai foi Mataio 23:29–31; Ioane 9:28–29).

Fautuaga mo le Aoao Atu

Filifili mai i aitia nei pe faaaogaina foi ni au lava, a’o e saunia lesona mo le Ioane 7–8.

Ioane 7:1–9. O le alofa ma le faatuatuaina e lagona e isi tagata mo i tatou e masani ona tuputupu pea pe a tatou ola ai pea i le talalelei. (10–15 minute)

Fesili i le vasega pe i ai se taimi ua masalomia ai i latou pe a latou ta’uina atu le mea moni i e latou te alofa i ai. Fesili: O le a sou faalagona?

Vavae le vasega i ni vaega se lua. Ia faitauina e se tasi o le vaega le Ioane 7:1–9 ma fai se aotelega mo le vasega. Ia faitau ma ootoo mo le vasega e le isi vaega le Talafaasolopito— Iosefa Samita 2:48–50. Fesili i le vasega e faatusatusa ia ni lagona na ia Iesu ma Iosefa Samita ona o le auala na tali atu ai o la’ua aiga ia la’ua molimau. Faitau le saunoaga lenei mai ia Elder Bruce R. McConkie:

“O se molimau i le paia o Keriso ma le mana laveai o lana talalelei e le mauaina fua ona o sootaga faaleaiga. E faatoa mauaina i le usiusitai o le tagata lava ia i le tulafono e faavavau o loo autu i ai. E toetoe o augatupulaga uma e i ai perofeta ma alii amionu ua lafoaia e o latou atalii ma afafine le faatuatua o o latou tama ma ua filifili e savavali i ala o le lalolagi.

“I le tele o taimi e ta’ua faapitoa ai atalii o Iosefa ma Maria o ‘uso’ o Iesu, e ui o i latou o ona uso latou te tina faatasi (Mataio 12:46; 13:55; Ioane 2:12; Galuega 1:14; 1 Korinito 9:5.) E ui sa ola faatasi i latou i le aiga e tasi ma sa mauaina se mafutaga lelei ma le alofa i lalo o le vaavaaiga a Iosefa ma Maria, e ui ina latou iloaina o aoaoga, misiona, ma vavega a Iesu, ae oo mai

lava i lena vaitaimi e le'i taliaina lava e tagata o lona aiga o ia o le Mesia. Ae peitai, o i latou uma na liliu i se taimi mulimuli ane (Galuega 1:14); o se tasi o i latou na taua e Paulo o 'Iakopo le uso o le Alii' (Kalatia 1:19), sa faapea e galue i le tofi paia o le au aposetolo; ma sa i ai fo'i ma se i si, o Iuta, na te taua ia lava o 'Iuta, le....uso o Iakopo' (Iuta 1), na tusia le tusi a le aposetolo o Iuta." (*Doctrinal New Testament Commentary*, 1:437)

Fesili: O le a se tou manatu e faapefea ona mauaina mulimuli e Iesu ia le faatuatuaga ma le talitonuga o Ona uso taufeagai?

Faamanino e i ai taimi e muimui ai le au talavou faapea e le talitonuina i latou e o latou matua po o isi foi tagata matutua. Fesili: E mafai faapefea ona tatou mauaina le faatuatuaga a i latou tatou te alofofa i ai? Faamalosiau i tagata o le vasega e faaalua lea lava agaga faamaoni ma le auunaga punouai i le talalelei o i latou olaga faapei ona faaalua e Iesu Keriso i Lona soifuaga.



Ioane 7:17 (Mau Tauloto). E mafai ona tatou aoaina le moni o aoaoga a Iesu i le ola ai (20–25 minute)

Valaaulia tagata o le vasega e vaai faalemafaufau i se uo ua fesiligia i latou pe mafai faapefea ona ia iloa o le tulafono o le sefulua'i o se tulafono moni a le Atua. Fesili: E faapefea ona e tali i se fesili faapena? Faitau e tagata o le vasega le Ioane 7:17 mo le tali (tagai foi i le Alema 32:26–42 ma le 1 Ioane 2:3–6)

Faitau le saunoaga lenei mai ia Elder Loren C. Dunn o se tasi o le Au Fitugafulu. Fesili i tagata o le vasega e mata'ituina ni auala patino o loo faaaogaina i le Ioane 7:17.

“Ua ou manatua ni alii talavou se to'alua na o mai e vaai a'u i ni nai masina ua te'a. Sa fautuaina mai e o la'ua taitai o le perisitua. Mai i le taimi na taunuu mai ai i la'ua i totonu o le ofisa, na amata ona la'ua fesiligia ma le faamaoni ia nisi o mataupu ma aoaoga faavae ma aiaiga o le Ekalesia. . . .

“Sa ou fesili atu i ai mulimuli, pe faamata o a la'ua fesili o ni faailoga o o la faafitauli ae le o le pogai. Pe lē o le la fesili moni ea pe moni le ekalesia pe leai? Pe o le Ekalesia ea lea a Iesu Keriso pe leai? Ma pe le o ta'ita'ia ea i faaaliga mai le lagi? Na ioe ia alii talavou atonu afai e la te mautinoaina tali o ia fesili, o le a mafai ai fo'i ona la malamalama i fesili atonu o le a tutupu a'e pea i o la loto. . . .

“Sa ou fesili atu i ai pe faamata la te fiafia pe a faia se faaitaiga mo se tolu masina. Sa la'ua tali mai o le a la taumafai, ae sa le'i naunau i la'ua e tautino mai i la'ua lava sei vagana ua la'ua iloaina le mea o loo ou mafaufau i ai.

“Mo le isi tolu masina, ia oulua auai i sauniga lotu uma ma faalogologo lelei i mea e tautalagia. . . .

“E mafai ona toe tauaata'i i o oulua olaga le tatalo, i le ao ma le po. . . .’

“Sa ou talosagaina pe....mafai ona aua le toe inupia, ulaula, ma faaaogaina fualaa faasaina....

“Sa ou fesili atu pe...mafai ona la ola i se olaga mama ma talafeagai ai ma mataupu faavae o le ola mama pei ona aoao mai e le Faaola. Na la tali mai o le a la faia. Na ou fautuaina loa e faia e i la'ua lava se la kalena mo le tolu masina mo le faitauina o le Tusi a Mamona mai le isi faavaa seia pa'ia le isi faavaa—faitau na o ni nai itulau i aso taitasi ma tatalo i faitauga uma ia fesoasoani mai le Alii ia i la'ua ina ia la iloaina pe moni le Tusi a Mamona ma pe mai fo'i ia te ia. Na la malilie i ai.

“...Na ou faaopoopo atu i ai, 'Afai ae sologa lelei mea uma, o le a oulua vaaia ni suiga e le'i faamoemoeina, pei o le tuputupu a'e o le malamalama ma le popole mo ou uso a tagata ma le faatauaina tele o isi tagata.' Na la taliaina le lu'itau ma o ese loa” (Lipoti Konafesi Aperila 1971, 106–7; po o le *Ensign*, Iuni 1971, 81–82)

Talanoaina pe faapefea ona faaaogaina ia mataupu faavae i le Ioane 7:17 i o outou olaga. Faamalosiau i tagata o le vasega ina ia latou taitoatasi ma vaai po o gafea o faaletonu o a latou lava molimau ma taumafai e faaoga lea lava suesuega i le tolu masina e galueaiina ai.

Ioane 8:1–11. Nai lo le tatou faafiaamionu ma faasala i e agasala, e tatau ona tatou faia ni faaitaiga e ala i le taumafai e faaitalo o tatou lava vaivaiga. (20–25 minute)

Ia tuu se maa lapo'a i luma o le vasega o loo tusia ai upu nei “o le maa muamua.” Faitau e le vasega le Ioane 8:1–11 ma vaavaai pe faapefea ona fetau se maa faapenei i le tala. Fesili:

- O le a le fetalaiga a le Alii e uiga i le togiina muamua o le maa?
- O le a sou manatu o le a le mea o loo taumafai le Alii e aoao mai i nei faiupu?
- Aisea e matuia tele ai le agasala o le faafiaamionu?
- E mafai faapefea ona tatou alo ese mai i le faafiaamionu?
- E mafai faapefea ona fesoasoani le vaaia pea o se maa faapea i luma o le faata e fai ai au teuga i taeao uma?

Tuuina atu i tagata uma o le vasega ni tama'i maa ma uuna'i i latou e tuu faaaliali i totonu o o latou potu. (Tuu le maa lapo'a i se mea e faigofie ona iloa ai i totonu o le potuaoga e avea ma faamanatu o lenei lesona i le vaiaso atoa.) Uuna'i tagata o le vasega ia aloese mai le agasala o le faamasino fua o isi ae ia avea ma ni faaitaiga i le taumafai lea e le aunoa e faaitalo a latou lava agasala.

Faamatala i le vasega o le aloese mai le faamasino atu ma le faitioina o isi, e le tutusa ma le faia o le agasala. Faitau le saunoaga lenei a Elder Spencer W. Kimball a o avea o ia ma se tasi o le Korama a le Toasefululua:

“E ui ina alofa le [Atua] i le tagata agasala, ae na te lē ‘taliaina pe faatagaina sina iota o le agasala.’ (MFF 1:31.) O le avea o i tatou o ni tagata agasala e mafai ona tatou talisapaia atili lona alofa ma le agalelei pe afai e faapea foi ona inoino i le agasala ma o le a uuna’ia ai i tatou e suia o tatou olaga e ala i le salamo” (The Miracle of Forgiveness, 59).

Na faaopoopo mai ia Elder Russell M. Nelson, o se tasi o le Korama a le Toasefululua e faapea:

“Na o’o mai se lagona ou te tautala i le mataupu o le onosai. . . o se uiga lelei e manaomia tele i lo tatou lalolagi fesoua’i. I le talanoaina la o lenei mataupu, e tatau ona tatou iloaina mai le amataga e i ai le eseese o le onosai ma le onosa’ia. O lou onosai ma le agamalu mo se tasi e le avea ai lena ma mea e maua ai e ia se faatagana e fai le mea sese, pe avea foi lou onosai e faatagaina ai oe e te onosa’ia lana mea sese. O le eseese lona e faavae ai se malamalama i lenei uiga lelei taua” (Lipoti Konafesi Aperila 1994, 90; Liahona, Iulai 1994. 73).


Toe faitau e le vasega le fuaiupu 11 ma saili pe o le a le lagona na oo ia Iesu e tusa ai ma le fafine ma ana agasala. Talanoaina ni fesili a le vasega e uiga i le alofa atu i o latou tuaoi ae inoino i le agasala. Fesiligia le vasega mo fautuaga pe faapefea ona faataunuaina lea tulaga ma tusi ia fautuaga i luga o le laupapa. Molimau atu o Iesu Keriso o lo tatou faataitaiga. Na ia taumamafa, faifai mea faatasi ma alofa i e agasala, ma sa Ia faamanino atu e le aunoa Lona inoino i le agasala.



Ioane 8:31–32. A o tatou sailia ma mulimuli i le mea moni, e faasa’olotoina i tatou mai le faapologaina e le agasala ma mea sese.

(20–25 minute)

Faitau e le vasega ma faatusatusa le Ioane 8:31–32 i le Ioane 8:34. Tusi le ata lenei i luga o le laupapa:



Fesili i i le vasega:

- E faapefea ona aafia tatou i le faaletino, faaleagaga, faalevafealoa’i ma le faalemafaufau ona o le agasala? (Lisi tali i luga o le laupapa.)
- E mafai faapefea e le upumoni ona faasa’olotoina mai i tatou i vaega e fa pei ona taua i luga?

Sa faalateleina mai e Elder Bruce R. McConkie le fuaitau “e tuusa’oloto foi outou e le upumoni,” e faapea:

“Sa’oloto mai le malosi leaga o mataupu faavae sese; sa’oloto mai le nofo pologa i manaoga ma tuinanau; sa’oloto mai noataga o le agasala, sa’oloto mai i mea leaga ma o aafiaga pi’opi’o uma ma lē sa’o, ma le malosi e taofiafia ai; sa’oloto e oo atu i le sa’olotoga e leai se gataaga ma olioli ai i lona atoatoaga, e na o tagata ua faaeaina” (Doctrinal New Testament Commentary, 1:456-57)

Fesili i le vasega pe i ai nisi ua a’oa’oina i le musika. (Manatua: Afai ua e faaaogaina le fautuaga mo le aoaoina atu o le Luka 17:1–10 [i.95], e mafai ona e faaaogaina se isi taleni mo lenei lesona faatino.) Afai e fesili se tasi: E faapefea i le aoaoina o le musika ona faaitiitia lou sa’olotoga. (O se tasi o tali o le aoaoina e mafai ona tele taimi e alu ai ma o le a le lava ai le taimi e faataunu ai isi mea tatou te mananao e fai). Valaaulia se tagata o le vasega e le tele sona malamalamaaga i le musika e taina i se laau faimusika se pese faigata ua e filifilia. Fesili i le vasega:

- E faapefea i le mauaina o le malamalamaaga i le musika ma le a’oa’oina o le taina o le musika ona faasa’olotoina le tagata?
- E faapefea i le le lava o le iloa ma le poto faapitoa ona faaitiitia le sa’olotoga?

Ina ia faamalalamaina atili lea manatu, ia taina se musika sa pue’ina pe valaaulia se tagata e matua lelei lana ta laau e taina se musika mo le vasega. Ia taina mo se taimi umi ina ia mafai ai ona maua ma lagona le matagofie o le musika. Fesili:

- O le a sou lagona pe a e faalogologo i se tasi ua tele se sa’olotoga e taina ai musika?
- E faapefea ona faatusatusa lea i le mauaina o le malamalama ma le ola i le talalelei? (Talanoaina a latou tali.)

Faamatala o le malamalama o le mana lea pe afai tatou te ola e tusa ai ma lena malamalama. O le lē iloaina o le mea moni e faaitiitia ai lo tatou sa’olotoga e ola i le talalelei. O le agasala ma le valea e noatia ai ma taofia i tatou mai le tulaga e mafai ona tatou oo atu i ai, ae o le usitai i le mea moni e maua ai e i tatou le sa’olotoga. Fesili: O a ni faataitaiga o auala e mafai ai ona tatou maua le sa’olotoga mai le mea moni?

Ioane 8:33–59. Na ta’utino manino mai e Iesu Lona lava paia. (20–25 minute)

Faamatala i le vasega o le Ioane 7–8 o loo ta’uina mai ai faafia e le Faaola Lona lava paia. Vaevae le vasega i ni vaega se fa.

Ia tofu vaega taitasi ma le poloka mau e faitau: Ioane 7:14–31; Ioane 7:32–53; Ioane 8:12–32; Ioane 8:33–59. Ia latou maitauina taimi taitasi e ta'utino mai ai e le Faaola po o ai Ia, ona valaaulia lea o i latou e lipoti mai i le vasega mea ua latou mauaina. Fesili: Aisea e te manatu ai na atili ona faalauaitela mai e Iesu lana molimau mo Ia lava ina ua tulalata atu o Ia i le iuga o Lana misiona?


Ia faitau e le vasega le Ioane 8:58 ma faatusatusa i le Esoto 3:14. Fesili i le vasega:

- O le a le taua o le folafolaga a Iesu i le Ioane 8:58?
- Aisea ua faaaoga ai e Iutaia ia maa e fasiotia ai o Ia?
- E aafia faapefea lou malamalama ia te Ia pe a e iloina o Iesu o Ieova, o le Atua o le Feagaiga Tuai?

Ta'utino atu o Iesu Keriso o Ieova, le Atua o Mose, Aperaamo, Isaako, ma Iakopo.

Ioane 9–10

O le Soifuaga o Iesu Keriso



Faatomuaga

Na fetalai mai Iesu, “O le faamasinoga, o le mea lea ua ou sau ai i le lalolagi nei; ina ia latou vaai o e le vaavaai, ia faatauasoina foi i latou o e vaai” (Ioane 9:39). O se tasi o tala uiga ese i tusitusiga paia e faapea o se alii na fanau mai e tauaso na sau e fia vaai ia Iesu le Alo le Atua, a o aoao o tagata Iutaia, ato ai ma le latou malamalama i tulafono a Mose, ua tauaso i latou ia te Ia (tagai Ioane 9). Ua fetalai mai Iesu, o le leoleo mamoe lelei e “muamua atu” i ana mamoe ona “mulimuli atu ai lea o mamoe ia te ia: aua ua latou iloa lona leo” (Ioane 10:4). O se mea uiga ese le avea o tagata ua ta'ua o le au tausii mea o le upu a le Atua ua latou pupuni o latou taliga ina ia lē faalogo i le Leoleo Mamoe Moni. E fesoasoani le Ioane 9–10 ia tatou malamalama i mea e tatau ona tatou faia ina ia lagona le siufofoga o Iesu Keriso.

Suesue ma le agaga tatalo le Ioane 9–10 ma mafaufau i mataupu faavae nei ae le'i saunia au lesona.

O Nisi Mataupu Faavae Taua o le Talalelei e Saili Iai

- O Iesu Keriso o le Malamalama o le Lalolagi. A tatou mulimuli ia te Ia, o le a faatumuina i tatou i le malamalama (tagai Ioane 9:5; tagai foi i le Ioane 12:36, 46; Moronae 7:16–19; MFF 50:24; 88:6–13, 67).
- O le gasegase ma faalavelave matuia o ni mea lē maalofia i le olaga, ae lē faapea o ni faailoga o le agasala. O ia mea e tatou te maua ai le avanoa e faaalai ai le faatuatua ma iloa ai le mana o le Atua i o tatou olaga (tagai Ioane 9:1–7, 30–38; tagai foi Ioane 11:1–4, 17–45).
- O Molimau e mafai ona amata o se mea itiiti ma e tuputupu pe a tausii lelei ma faafaileleina (tagai Ioane 9:11, 17, 35–38; tagai foi Alema 32:27–28, 41–42).
- O le mulimuli ia Iesu Keriso, o le a avea ai tatou ma ana mamoe aua o ia o le Leoleo Mamoe lelei e alofa ma tausii ia i tatou (tagai Ioane 10:1–15, 26–28; tagai foi Mosaea 26:21–28).
- Sa i ai foi isi mamoe a Iesu e ese mai i e sa faatasi ma Ia i Ierusalem. Na Ia asia i latou nei ina ua mavae ona Toetu mai (tagai Ioane 10:16; tagai foi 3 Nifae 15:11–16:3).
- E i ai le pule a Iesu Keriso i le oti ma e mafai ona ia soifua pea e faavavau, ae na Ia filifili e puapuagatia ma maliu ina ia faasa'olotoina i tatou mai le oti faaletino ma le oti faaleagaga (tagai Ioane 10:17–18; tagai foi Ioane 11:11–15, 23–26, 39–46; Luka 23:46; 2 Nifae 2:8–9).

O Iesu a o le'i mauaina Lona ola faaletino, o Ieova, ma o ia na aveaa ma Alo e To'atasi o le Tama i le tino (taga'i Ioane 10:22–42).

Fautuaga mo le Aoao Atu

Filifili mai i aitia nei, pe faaaogaina ni au lava, a o e saunia lesona mo le Ioane 9–10.

Ioane 9:1–5. O le gasegase ma faalavelave matuia o ni uiga lē maalofia i le olaga ae lē o ni faailoga o le agasala. (15–20 minute)

Fesili i le vasega pe faamata o le a le mea ua fananau mai ai nisi ma le lē atoatoa o tino po o mafaufau. (*Manatua*: Ia nofouta i lagona o ē i le vasega e le atoatoa le tino po o le mafaufau.) O tali atonu e aofia ai:

- Aua o le lalolagi pa'ū lenei ma le lē atoatoa
- O se tofotofoga mo lē ua lē atoatoa le malosi.
- O se tofotofoga mo isi tagata
- Ina ia faaalai ai e le Atua Lona mana i o tatou olaga.

Fai i le vasega e faitau le Ioane 9:1–5.

- E tusa ai ma nei fuaiupu, aisea e lē atoatoa le malosi o le tino po o le mafaufau o nisi i le olaga faaletino?
- O a mafuaaga na fautuaina ai e le au soo e faamalalama mai pe aisea na fanau mai ai le tagata o tauaso?

- O le a le fetalaiga a Iesu i le mafuaaga ua tauaso ai lenei alii? (Ia faamanino i le vasega atonu o lenei mafuaaga e lē faatatauina i tulaga lē atoatoa uma.)

Ia faitau atu faamatalaga nei e tolu i le vasega. Na tusia e Elder Neal A Maxwell, o se tasi o le Korama a le Toasefululua e faapea:

“O se aoaoga faavae lenei...o loo faamanatu mai ai ia te i tatou o tagata soifua, e lē o ia te i tatou faamatalaga uma. E tele ni taimi e tatau ai ona tatou taofiofi i faamasinoga ae faatuatuaina le Atua ne’i te’i ua sese le tatou faitau, e pei o soo o Iesu ina ua latou fesili e uiga i le tagata na fanau mai ua tauaso ma sa tuuina atu i ai e Iesu le tali: ‘E lei agasala lenei tagata, po o ona matua: ae peitai ina ia faaalua ai o galuega a le Atua ia te ia’ (tagai Ioane 9:1–3)” (*But for a Small Moment*[1986], 940.

E i ai foi se isi mea na toe tusia ai e Elder Maxwell, a o avea o ia ma se tasi o le Au Fitugafulu e faapea:

“E i ai tulaga faapitoa o tagata taitoatasi e i ai ia uiga lē atoatoa e le mafai ona tatou malamalama i ai. E pei o ia lea na ‘fanau mai o tauaso,’ o nisi e o mai e avatu ai le mamalu i le Atua. (Ioane 9:1–2.) E tatau ona tatou matua faaeteete i le tuua’ia o mafuaaga sese po o tau i sese i mea uma faapea. O loo i aao o le Alii ma e atoatoa lona alofa ia te i latou. O nisi o i latou o e sa manaomia auunaga i le olaga nei o le a i ai le auunaga i le lalolagi a sau—peitai e mo mafuaaga silisili” (*Things As They Really Are* [1978], 26).

Na saunoa mai Elder Boyd K Packer:

“E i ai pea lava pea i le olaga sina luutaga o i latou o ē o loo faamatalaina i tusitusiga paia e tauaso, pipili, mumutu, tutuli, maanuminumi, gugu, ma ē tinovale. Tatou te ta’ua o i latou ia e i ai ni tulaga faaletonu o le aoaoina po o fesootaiga, o ē e lē lelei le faalogo ma le vaai, o ē o loo i ai ni tulaga faaletonu o neura po o ponaivi po o musele foi. Tatou te ta’ua e le atoatoa le mafaufau po o lagona, e telegese le tuputupu a’e, ma gasegase o le mafaufau. O nisi ua mafatia i nisi o ia gasegase, ma o i latou uma lava e lē mafai ona faatinoina ni mea e aunoa ma se fesoasoani.

“...O le masani lava a matua e i ai fanau e lē atoatoa ona fesili faapea ia i latou lava: ‘O le a se mea sese na ta faia?’ O le manatu lava e faapea o mafatiaga *uma* i se isi faaupuga, o se taunuuga tuusa’o o le agasala, sa aoaoina talu mai aso anamua. O se aoaoga faavae sese lea. O lena fo’i manatu sa taliaina e nisi o le au soo muamua seia oo ina faasa’oina i latou e le Alii [tagai Ioane 9:1–3]. . . .

“E le tele se avanoa mo ni lagona o le tausalaina e faatatau i ē lē atoatoa le malosi o tino ma mafaufau. O nisi tulaga lē atoatoa o le tino ma le mafaufau atonu na afua mai i le faatamala po o le sauaina, a o nisi e afua mai le faalagolago tele o matua i fualaau ma isi mea faasaina. Ae o le tele lava o aafiaga e le mafua mai i mea pei ona ta’ua. E oo mai foi puapuaga ma faigata i ē ta’umamāina.

“O le faamoemoe autu na foafoaina ai le lalolagi, ma le tuuina i ai o le tagata e ola ai, e manaomia ai le galueaiina o le tulafono faanatura tusa lava po o a lagona o tagata. E tatau ona tatou galueaiina lo tatou faaolataga e aunoa ma le faamoemoe faapea e le aafia i tatou i le tulafono faanatura. O le tulafono faanatura, i taimi faapitoa, e mafai ona tuueseina i taimi o vavega. Ae o le tele lava o ē e lē atoatoa le malolosi o tino ma mafaufau, e pei o le tagata pipili i le vai o Petesa, e umi lava se taimi o faatalitali i le gaepu o le vai. . . .

“Afai e le mauaina se faamalologa i le olaga faaletino, o le a maua i le olaga a sau. E pei o le fanau mai o pepe lele matagofie (monarch butterfly) mai se piupa, e faapena foi le o mai o agaga [tagai MFF 138:17; Alema 40:23; 2 Nifae 9:13; 1 Korinito 15:19]....

“Afai e gata la tatou vaai i le olaga faaletino, e i ai nisi mea o le a le gafataulimaina ona ua foliga mai e matua lē talafeagai ma ua tumau. E i ai ia aoaoga faavae, afai e malamalama ai, o le a maua ai ni manatu ma lagona lelei e uiga i faafitauli e lē o maua se faamalamalama faamalieloto” (Lipoti Konafesi, Aperila. 1991, 6–8 pe o le *Liahona*, Iulai 1991, 7–9.

Faitau e le vasega le 1 Samuelu 16:7. Fesili: E tāua i se a le lē soona faia o ni tuuaiga taumatemate e uiga i le lē atoatoa o le tino? Faamalamalama o le fuafuaga a le Tama Faalelagi e sa’o ma tonu, ma e lē mafai ona tatou malamalama pea lava pea i mafuaaga o le mafatia ona o le papa’u o la tatou vaaiga faaletino. Faamalosiau i le vasega ina ia matua nofouta i tulaga lē atoatoa ma mafatiaga o isi.

Ioane 9:6–33. O le tala i le tagata tauaso na sau e vaai ia Iesu pe o le Alo o le Atua ua faali ai o molimau e tuputupu pea pe a tausia ma le faaeteete ma faafaileleina. (30–35 minute)

Fesili i le vasega pe latou te iloina se isi na liliu mai i le Ekalesia. Tofi se tasi o i latou e sau e faamatala le talaaga o le liliu mai o lena tagata. Fesili: Aisea e le malamalama ai i latou e liliu mai i le atoatoaga o le Talalelei a Iesu Keriso i se taimi e tasi?

Tuu atu i le vasega se kopi o le siata ua taua “O Se Tagata Na Fanau Mai o Tauaso” mai i tua o le tusi (itulau 281). Faitau ia faamatalaga mai i mau i le itu tauagavale ma maka i se tasi o koluma mulimuli e tolu po o ai na ia faia le faamatalaga. Faatonu i latou e sue poo ai tagata na tuputupu a’e faaleagaga ae o ai foi e leai.

Fesili i le vasega pe aisea na tuputupu faaleagaga ai isi a e le'i tuputupu faaleagaga isi. Ia faitau e le vasega ma maka ia mau nei: Moronae 7:16–19; Mataupu Faavae ma Feagaiga 42:61; 50:23–25; 88:6–13, 67; 93:26–27. Talanoaina faatasi ma le vasega ia mataupu faavae o le tuputupu a'e faaleagaga o loo maua i nei fuaitau. Fesili:

- E faapefea ona faaaogaina ia mataupu faavae o loo i nei fuaitau i le tagata na fanau mai o tauaso?
- Pe ua e maitauina ea nisi o nei mataupu faavae o faagaioia i lou olaga?

Ia faatagaina soo se tagata o le vasega e manao e fetufuai mai ni faaitaiga. Uuna'i le vasega e faaaogaina ia mataupu faavae pei ona faaaogaina e le tagata tauaso—ia talia ma ola i le mea moni ua faamanuiaina ai i latou, ma ia maua le malamalama sili atu ma le upumoni.



Ioane 10:1–5. O le mulimuli ia Iesu Keriso, o le Leoleo Mamoe Lelei, e avea ai i tatou ma Ana mamoe. (25–30 minute)

Ia taina i se laau pese se lipine o ni leo o ni tagata ma fai i le vasega e mate pe o leo o ai. (Pe fusi mata o nisi o le vasega ma taumafai e mate leo o isi i le vasega.) O le a i ai nisi latou te mateina vave ia leo nai lo isi. Fesili i le vasega:

- Aisea e faigofie ai i nisi ona vave iloa ia leo nai lo isi?
- E faapefea i le iloina o se tagata ona faafaigofie ai ona tatou iloina ia leo?

Faamatala e faapena foi le iloina o le leo o le Alii. Ia faamamafa o le tele o taimi, o le “leo” o le Alii e le o se leo e lagonaina a e o se “leo itiiti ma le filemu, o loo musumusu atu ma ‘ati i mea uma” (MFF85:6; tagai foi 1 Tupu 19:11–12; 1 Nifae 17:45).

Faitau e le vasega le Ioane 10:1–5, ma fesili: O le leo o ai e tatou ona tatou matua iloina ma le mautinoa i o tatou olaga faaletino? Faamatala, o le iloina ma le mautinoa o le Alii o le a maua ai le eseese i le tatou faalogo ma le mulimuli i Lona leo. Faitau e le vasega le Ioane 21:15–17, ma fesili:

- O ai na tofia e Iesu e avea ma “leoleo mamoe” a o toesea o Ia?
- O le a le mea na finagalo Iesu e faia e lenei leoleo mamoe?

Taina se lipine o lo o i ai le leo o le Peresitene o le Ekalesia ma fai i le vasega pe latou te silafia o le leo lea o ai? Faitau le MFF 1:37–38 ma fesili:

- E mafai faapefea ona tatou faatusaina le leo o le perofeta i le leo o le Leoleo Mamoe?
- O ai nisi e mafai ona avea ma leoleo mamoe o mamoe a le Alii i ona po nei?
- O a ni mea e manaomia ina ia avea ai o se leoleo mamoe lelei?

Faitau e le vasega le Esekielu 34:1–5 ma sailia le taua o le tausia o mamoe a le Alii.

Molimau e uiga i le taua tele o le iloina ma le faalogo i le leo o le Leoleo Mamoe atoa ai ma le taumafai e avea ma ituaiga mamoe e pei o Ia.



Ioane 10:1–28 (Mau Tauloto Ioane 10:16). O Iesu o le Leoleo Mamoe Moni o Isaraelu. (20–25 minute)

Ia faaali se ata o Iesu o se leoleo mamoe pe o se leoleo mamoe o loo ta'ita'iina ana mamoe. Valaulia le vasega e toe iloiloina le Ioane 10:1–28 ma sailia auala o loo avea ai Iesu Keriso o se leoleo mamoe. (Na te iloina igoa o Ana mamoe, Na te ta'ita'i i Ana momoe ma latou te mulimuli ia te Ia. Ua ia filifilia e tuuina atu Lona ola mo Ana mamoe, Na te puipui ia te ia, Na te faapotopotoina uma Ana mamoe.)

Sa faamatala e Elder John R. Lasater, o se tasi o le Au Fitugafulu se tala i se mea na tupu ia te ia e faaalai ai o le Leoleo Mamoe Lelei na te iloina Ana mamoe:

“I ni tausaga ua te’a, na ou maua ai se avanoa o se tasi o le aumalaga aloaia o le malo o Amerika na asiasi ai i le atunuu o Morocco. O se tasi o vaega o lenei asiasiga, sa valaulia i matou e malaga atu i se mea mamao i totonu o le toafa ma asiasia ni mea ua faatamaia. E lima ni taavale limosini uli na matou malaga ai i Morocco i se tulaga saomasoa tele. Sa ou i le limosini lona tolu ma sa fai sina mamao ese mai le taavale lona lua. A o matou aga’iga’i atu i le tumutumu o se maupuepue, sa matou vaaia le limosini sa i o matou luma ua faatafa i tua ma le auala. Ina ua matou latalata atu i ai, sa ou lagona ua tupu se faalavelave ma sa ou fautuaina le matou avetaavale e tu. Sa tumau pea ia te au le vaaiga na ou iloa atu i luma, mo le tele o tausaga.

“O se leoleo mamoe matua lava, na ofu i ofu na faaoga i ona po o le Faaola, sa tu i tafatafa o le taavale ma talanoa ma le avetaavale. Sa ou vaaia i ona tafatafa, ni mamoe laiti e le sili atu i le sefululima po o le luasefulu. Sa tupu se faalavelave. Ua taia i le taavale a le tupu se mamoe ma manu’a ai. Sa faamalalama atu i ai e le avetaavale le tulafono a le malo. Ona ua lavea le mamoe a le leoleo mamoe ma manu’a ai i le taavale a le tupu o lea e tatau ai ona sautuaselau le taui na te maua e tusa ma le tau o lana mamoe. Ae peitai i lea lava foi tulafono, e tatau ona fasi mate loa le mamoe ua manu’a ma tufa i le nuu. Sa vave ona toe fai mai la’u faamatala upu, ‘Ae o le a lē taliaina e le leoleo mamoe toeaina le tupe. Latou te lē taliaina lava.’

“Sa ou te’i ma ou fesili atu, pe aisea. Sa ia toe fai mai, ‘Ona o lona alofa mo ana mamoe taitasi.’ I le taimi lea, na ou vaaia ai le tago o lenei leoleo mamoe toeaina ma sii a’e le mamoe ua manu’a i ona lima ma tuu i se taga lapo’a i luma o lona ofu talaloo. Sa ia milimili lona ulu, ma tautū lava i le upu e tasi. Sa ou fesili pe o le a le uiga o le upu ma sa ia fai mai, ‘Oi, o loo ia ta’uta’u le igoa o le mamoe. O ana mamoe uma e tofu ma le igoa aua o ia o lo latou leoleo mamoe, ma o leoleo mamoe lelei latou te iloina a latou mamoe taitasi i o latou igoa’

“O le mea lava lea na fai e pei ona muai ta’u mai e la’u avetaavale. E le’i taliaina le tupe, ma sa o ese atu loa le leoleo mamoe ma lana lafu atoa i toafa matagofie o Morocco, faatasi ai ma le mamoe ua manu’a ua teu lelei i se tulaga saogalemu i le taga o lona ofu talalao” (Lipoti Konafesi, Aperila 1988, 86–87; pe o le *Liahona*, Iulai 1988, 74).

Faitau le Ioane 10:16 ma fesili: O ai isi mamoe a Iesu e ese mai tagata i le eria o Ierusalem? Faitau 3 Nifae 15:21; 16:1–3; 17:4 ma fai i le vasega e faatusatusa i le Ioane 10:16. Fesili:

- I le tele naua o mamoe i nofoaga eseese, e faapefea e le leoleo mamoe ona ia iloina mamoe taitasi? (tagai i le Ioane 10:14; tagai foi Luka 12:6–7; MFF 76:24; Mose 1:37–39).
- O a ni faamaoniga ua e vaai i ai i lou olaga e te iloa ai e silafia lelei oe e le Alii?

Molimau atu e silafia ma alofa le Atua ia i tatou taitoatasi.

Ioane 10:9, 11, 14, 36. O le faaupuga “O a’u” i le Evagelia a Ioane e tautino atu ai o Iesu o le Atua o le Feagaiga Tuai. (20–25 minute)

Fesili: Afai e te faia se tautalaga i se faalapotopotoga o ni tagata taua, e faapefea ona e mana’o e faailoa atu oe? Aise a?

Faitau e le vasega le Esoto 3:13–14. Fesili:

- O le a sou manatu aisea na tali atu ai faapea le Alii ia Mose?
- O le a le taua o fuaiupu “O A’U O LĒ OLA, O LOO OLA LAVA”?

Manatunatu i le faaagaina o le faamatalaga lenei a Elder Bruce R. McConkie e fesoasoani i le taliina o lenei fesili:

“O Keriso o le O A’U O LĒ SILI, o le O A’U O LĒ OLA, O LOO OLA LAVA, o lona uiga o LĒ Faavavau, o Le ‘mai le faavavau e o o atu i faavavau uma’ (MFF 39:1; Esoto 3:14), o le Atua e ‘mai le vavau e oo i le faavavau.’ (Salamo 90:2), o lona ala e faavavau ma e le fesuisuia’i pe suia fo’i. (1 Nifae 10:17–20) ‘E mai le vavau e oo i le faavavau e tasi lava ia, e lē i’u foi ona tausaga’ (MFF 76:4), aua o ia O LĒ OLA. Ina ua ia fetalai atu i tagata Iutaia, ‘Sa a’u i ai a o le’i i ai se Aperaamo’ (Ioane 8:58), e tutusa lava ma le faapea atu, ‘Sa a’u i ai a o le’i leai se Aperaamo, le Atua e Faavavau, o le “o ana gaoioiga e mai anamua, ma le faavavau.”’ (Mika 5:2.) *Mormon Doctrine.* 340)

Vaevae le vasega i ni vaega ma tuuina atu i ai se tasi pe o le sili atu fo’i o le fuaiupu “O a’u” mai le siata. Ia faitauina e vaega ta’itasi ia mau o loo tuuina faatasi ma saili pe na faapefea e Iesu ona ia faataunuuna ia faamatalaga. Ia lipoti mai ia vaega i le vasega ma talanoaina mea ua latou maua. (O loo aofia atu ai i le siata ni tali talafeagai)

O le faamatalaga, “O A’u”	Faataunuuna
“O a’u o le areto o le ola” (Ioane 6:35; tagai ff. 47–51).	Na tuuina mai e Iesu o la lava mo i tatou i le Togiola, ma o loo Ia fafagaina i tatou i le faaleagaga. O le a toetutu i tatou ona o la ma afai tatou te usitai ia te Ia o le a tatou maua le ola e faavavau.
“O a’u o le malamalama o le lalolagi” (Ioane 8:12).	O Iesu o le puna o mea moni uma. A tatou mulimuli i Ana upu ma faaitaiga, o le a tatou le tautevateva i le pogisa o le lalolagi.
“O a’u o le faitoto’a o mamoe” (Ioane 10:7; tagai ff. 8–10).	E puipuia tatou e Iesu pei o se leoleo mamoe i le faitoto’a o le pa o mamoe. E faapena fo’i ona le mafai ona ulu atu se isi i Lona Malo pe avea o se tasi o Lana lafu vagana ua ui atu ia te Ia.
“O a’u o le leoleo mamoe lelei” (Ioane 10:11; tagai ff. 8–10).	E taitai i tatou e Iesu Keriso. Na ia tuuina mai Lona ola mo i tatou i le Togiola. Na te silafia i tatou taitoatasi.
“O a’u o le Atalii o le Atua” (Ioane 10:36).	O Iesu o le Ulumatua o le fanau faaleagaga a le Tama (tagai MFF 93:21) ma o Ia o Lona Alo e Toatasi i la le tino (tagai Ioane 1:14). Ua na o Iesu, le Alo moni o le Atua, e mafai ai e le tagata ona mauaina le ola e faavavau (tagai Ioane 20:31).
“O a’u o le toetu, ma le ola” (Ioane 11:25).	O le Togiola a Iesu Keriso e mafai ai ona tatou manumalo i le oti faaleagaga. Na ia aumaia foi ia i tatou le meaalofa o le Toetu.
“O a’u nei le ala, ma le upumoni, ma le ola” (Ioane 14:6).	O Iesu Keriso ona pau lea o le ala i le Tama ma le puna o le upumoni. Na te aumaia ia i tatou le Toetu ma le ola e faavavau.
“O a’u o le vine moni” (Ioane 15:1 tagai f. 5).	Tatou te faalagolago ia Iesu Keriso mo le ola. O le mulimuli i Ana aoaoga o le a mafai ai ona fua mai.


Fesili i le vasega:

- O le a sou manatu o a le uiga o le fasifaitau “O a’u” e tusa ai ma e sa faalogologo ia Iesu.
- Faitau le Ioane 8:58. O ai na fetalai mai Iesu o ai Ia.?
- Na faapefea le tali atu a le au Iutaia? (taga’i f. 59)
- O le a se eseese e i ai ina ua iloa o Iesu o Ieova, o Lē Silisili o Ia, o le Atua o le Feagaiga Tuai?

Faamamafa i le vasega o Iesu o le Atua le Alo, o se tagata e paia, ae ua lē na o se tagata mata’utia. Fesoasoani ia latou malamalama e i ai le sootaga o le Feagaiga Tuai ma le Feagaiga Fou ma o lona sootaga e ala atu ia Iesu Keriso ma Lana talalelei.

Ioane 11-12

O le Soifuaga o Iesu Keriso



Faatomuaga

O loo ta'ua e Ioane e "tele isi faailoga" na faia e Iesu "e le o tusia i lenei tusi," ae "ua tusia nei mea, ina ia outou talitonu ai o Iesu o le Keriso" (Ioane 20:30-31). O le tele o tusitusiga a Ioane o loo faapitoa i vavega e fitu po o "faailoga": faaliliuina o le vai i le uaina i Kana (Ioane 2:1-11), faamaloloina o se atalii o se alii taua (Ioane 4:46-54), faamaloloina o se tagata pipili i Petesa (Ioane 5:1-9), faateleina o areto ma i'a (Ioane 6:1-14, savali i luga o le vai (Ioane 6:15-21), faapupulaina o le tagata na fanau mai o tauaso (Ioane 9:1-7), ma le toe faatuina mai o Lasalo (Ioane 11:38-44). O ia faailoga taitasi uma e i ai le faia'i le galuega a Iesu o le Faaola o tagata. Mo se faaitaiga, o Lona faaliliuina o vai i le uaina e faatusa lea i le toto na faamaligiina mo i tatou i le Togiola, o Lona faamaloloina o le tagata i le vai o Petesa e faamanatu mai ai ia i tatou o Keriso o le puna o le vaiola (tagai foi Ioane 4:10-14). O le toe faatuina mai o Lasalo e faaalai ai le pule a le Alii i le oti ma faatomua mai ai Lona Toetu. A'o le'i faia lenei vavega, na aoao mai Iesu, "O a'u o le toetu, ma le ola" (Ioane 11:25). Ina ua mae'a le tala ia Lasalo, ona taliu atu loa lea o Ioane i le vaiaso faai'u o le soifuaga o Iesu, lea na amataina i le uuina e Maria o vae o Iesu o se faailoga o Lona tanuga (tagai Ioane 12:1-9).

Suesue ma le agaga tatalo le Ioane 11-12 ma manatunatu i mataupu faavae nei ae le'i saunia au lesonea.

O ni Mataupu Faavae Tava o le Talalelei e Saili Iai

- E i ai le mana o Iesu Keriso e pulea ai le Oti (tagai Ioane 11:11-15, 23-26, 39-46).
- E silafia e Iesu o tatou vaivaiga ma malamalama i o tatou lagona (tagai Ioane 11:33-36).
- O le a faataunuuna faamoemoega o le Atua tusa lava pe lē naunau i ai i latou e auai (tagai Ioane 11:47-54).
- O mea e tatau ona pito maualuga lo tatou faamuamua o le alofa lea i le Atua (tagai Ioane 12:1-11).

- O Iesu o le Tupu na valoia ma ua leva ona faatalitali i ai (tagai Ioane 12:12-25; tagai foi Mataio 21:4-9; Mareko 11:7-10; Luka 19:35-38).

Fautuaga mo le Aoao Atu

Filifili mai i aitia nei pe faaaogaina foi ni au lava, a o e saunia lesonea mo le Ioane 11-12.

Ioane 11:1-17. E i ai le mana o Iesu Keriso e pule ai i le oti. (20-25 minute)

Fesili i i le vasega:

- O le a sou lagona pe afai e te ma'i tigaina i se nuu mamao, ma ina ua faalogo ou matua i se faamatalaga e uiga i lou ma'i ma faatoa mafai ona o mai ina ua mavae aso e lua?
- Faitau le Ioane 11:1-6. Aisea na alu vave ai Iesu i Petania ina ua Ia mauaina le tala i le ma'i o Lasalo?
- Faitau Ioane 11:4, 11, 15. E tusa ai ma nei fuaiupu, aisea na faatagaina ai e Iesu ia Lasalo e oti.?
- Faitau le Ioane 11:39-40. Aisea na umi ai ona faatali ia Iesu mo le faataunuuna o le vavega, ae ua leva ona Ia silafia le mea na te faia?

Mo se faapoopoga, na tuuina mai ai e Elder Bruce R. McConkie ni mafuaaga se lua:

"Aisea ua tuputupu a'e ai le aoaoina ma le faatauaina o manatu i lenei vavega mata'utia e tasi o lana misiona? E lua ni mafuaaga patino e tulai mai. (1) Ina ua latalata i le faaiuga o le misiona faaletino a le Alii, na ia toe tuuina atu lana molimau i se auala ina ia le mafai ona le toe talitonuina, i lona aveva ma Mesia, i lona aveva ma Alo paia, i le aveva o ia ma se Alo moni o le Atua; ma le (2) O le faatuina lea o se mau e faaalai ai mo taimi uma se tasi o ana aooga silisili: O ia o le toetu ma le ola, o ia e maua ai le tino ola pea ma le ola faavavau, ma o i latou e talitonu ma usitai i ana upu o le a le oti i la le agaga" (*Doctrinal New Testament Commentar*, 1:530-31)

Fesili: E faapefea i le faatauaina o lenei vavega ona aafia ai i latou e le talitonu? (O le a leai se mea latou te alofaga i ai i le teena o Iesu o le Alo o le Atua.)

Faitau le saunoaga lenei a Elder James E. Talmage:

"E leai se fesili e mafai ona tula'i mai e uiga i le maliu o Lasalo, aua o lona maliu na molimauina, o lona tino na saunia ma tanuina i le auala masani, ma sa taoto o ia i le tuugamau mo aso e fa. I le tuugamau, ina ua valaauina o ia e tula'i mai, sa toatele ni molimau sa i ai, o nisi o i latou o ni tagata Iutaia taua tele, o le

toatele e le fiafia ia Iesu, ma atonu o le a latou teena le vavega pe ana faapea e mafai ona latou teenaina. Ua viia le Atua ma o le paia o le Atalii o le Tagata, ua faamaonia” (*Jesus the Christ*, 496).

Uu i luga se fuamoa ma fesili:

- O le a le mea na muamua mai, o le moa po o le fuamoa? Faamatala atu o lenei fesili ua leva ona soalaupuleina ma e leai se tali maoti.)
- I mataupu faaleagaga, o le a le mea e muamua, o faailoga po o le faatuatua?
- Faamata aisea o le a le talitonu ai pea ia tagata lē talitonu na molimauina le toetu o Lasalo ae ua uma ona maua sea faailoga?
- O a faailoga e lagolagoina ai le talitonu ia Iesu Keriso i ona po nei?

Faitau ma talanoaina le MFF 63:9–12 e fesoasoani ai i le vasega ia malamalama o faailoga e le maua ai le faatuatua ae o fua na o le faatuatua. Fesili: O a mea e tatau ona atinaeina e le tagata ina ia maua ai le faatuatua?

Tuuina atu se molimau i faailoga o loo siomia ai i tatou, afai ae mata’ituina ma le faatuatua, o le a atina’e ai tatou i le faaleagaga.

Ioane 11. O le toe fautuina mai o Lasalo o se ituaiga o le maliu ma le Toetu o Iesu. (30–35 minute)

Ia fai i i le vasega e toe manatu faalemafaufau faapea ua toe foi i tua i le lima selau tausaga ua tuanai. Fesili:

E faapefea ona e faamatala atu i tagata o lena vaitaimi ia le faaaogaina o matauila eletise? (Ia taumafai se toatasi po o se toalua o le vasega e tali.)

- Faamata e faigofie ona faatino pe ana faapea e te avea se matauila e alu i le maa uila?
- Faamata e faafaigofie ona malamalama tagata i le mataupu faavae o le Toetu pe afai latou te vaaia ua toe fautuina mai Lasalo?

Faamatala i le vasega o Lasalo e le’i toetu ae ua toe aumaia i le tino ola faaletino. Peitai, o le vavega lenei ua faaalua ai o loo ia Iesu le mana e pule ai i le oti. Faitau e le vasega le Ioane 11:21–26, ma fesili:

- O le a le mataupu faavae sa taumafai Iesu e ta’u atu ia Mareta? (Tagai ff. 25–26).
- O le a se mea e mafai ona faia e Iesu e faapupula atu ai Lona pule i le oti?
- E mafai faapefea ona faatusatusaina le toe fautuina mai o Lasalo i le Toetu mai o Iesu Keriso?
- E faapefea ona eseese? (E toe oti foi Lasalo. O le tino toetu e le toe oti.)

- Manatunatu e faitau le saunoaga a Elder Bruce R. McConkie:

“O le faatuatua e toe faatu ai e ua oti i nisi taimi, o lona uiga, ua toe valaauina le agaga e toe nofo i le tino faaletino. (3 Nifae 7:19; 19:4; 4 Nifae 5; 1 Tupu 17:17–23; Mataio 9:18–26; Mareko 5:21–43; Luka 7:11–17, 22; 8:41–56; Ioane 11:1–46; Galuega 9:36–43; 20:9–12.) O ituaiga tagata faapena e pasi atu faalua i le oti faanatura po o le oti faaletino. I le taimi e talafeagai ai, o le a toe laulaututu tagata uma mai le oti ma ola i se tulaga ola pea. (Alema 11:41; 12:8.)” (*Mormon Doctrine*. 185–86).

Faamalamalama i le vasega o le toe fautuina mai o Lasalo o se ituaiga lava o le Toetu o Keriso. (Afai e te le’i faaaogaina ia fautuaga mo le aoaoina atu o le Ioane 6 [i. 114], atonu e mafai ona e toe iloiloina faatasi ma le vasega ia “ituaiga” o faailoga o lo o taua i tusitusiga paia e aoao ai i tatou e uiga i le Faaola. Faitau ma talanoaina faatasi ma le vasega le Mosaea 3:15 ma le Mose 6:63.) Tufa i le vasega le siata ma aua ne’i tusia ni mea i le koluma “O Mea e Talitutusa.” Faatonu e faitau mau o loo i isi koluma ma faatutumu avanoa. A mae’a ona talanoaina lea o mea na latou mauaina.

Ioane 11	Vaiaso Faa’u	O Mea e Talitutusa
Ioane 11:2	Ioane 12:3; 13:5	O le mulumuluina o vae
Ioane 11:4	Ioane 13:31	Viiga o le Alo o le Atua
Ioane 11:16	Ioane 20:24–29	Popolega o Toma i le maliu o Iesu
Ioane 11:25	Ioane 14:6, 19	Molimau a Iesu o Ia “toetu ma le ola.”
Ioane 11:33	Ioane 12:27–28	O le lagona o Iesu ua “ātu.”
Ioane 11:34	Ioane 20:2	Atugaluga i le mea o loo taoto ai le tino.
Ioane 11:36	Ioane 14:21–23	Taula’i i le alofa o Keriso.
Ioane 11:38–39	Ioane 19:41; 20:1	Aveese le maa mai le tuugamau.
Ioane 11:44	Ioane 20:5–7	Faamatalaga o ofu na tanu ai, ma le faamamafaina o le “solosolo” po o le ie na ufiufi ai fofoga.
Ioane 11:49–50	Ioane 18:13–14	O le valoaga a Kaiafa i le Togiola a Keriso.

Faa’u i le usuina o le “Ua Ou Iloa Lo’u Faaola” Viiga, nu. 73)

Ioane 12:1–11. O le tulaga aupito maualuga e tatau ona tatou faamuamaina o le alofa lea i le Atua. (20–25 minute)

Aumai i le vasega sau meaalofa na e maua e matua sili ona e faapelepele i ai. Faamalamalama le taua ma le uiga o lenei meaalofa. Fesili i le vasega:

- O le a se meaalofa lelei na e avatu i se tasi e te alofa i ai?

- O le a se mea e sili atu ai lenei meaalofa i lo isi na e tuuina atu?

Faamatala o le tau o se meaalofa e i ai taimi e le mafai ona faatusaina i ni tupe. Fesili: O le a le mea e matua taua ai se meaalofa? (O le mafauauga ma le alofa e o faatasi ma le meaalofa; i se tulaga e aloaia ai se tagata pe faamalie ai se manaoga.)

Faitau e le vasega le Ioane 12:1–9 ma sailia le tau o le taulaga a Maria. Faitau le saunoaga lenei a Elder James E. Talmage:


“O le u’uina o le ulu o se malo i le suauu masani o le aloaia po o le faamamaluina lea o ia; o le uuina fo’i o vae o le faaalua lea o le alofa e seasea ona faaalua ma le tulaga ese; ae o le u’uina o le ulu ma vae i le u’u nato tautele, ma le tele naua o le u’u na faaoga, o se aga lea o se faaaloaloga faatupu atonu e le mafai fo’i ona tuuina atu i ni tupu. O le mea na faia e Maria o se faaalua lea o lona alofa mutimuti vale: o se faailoga iloa o se loto ua tumu ma masuasua i le agaga tapua’i ma le alofa: (*Jesus the Christ* 512).

Talanoaina le aoga o le mea na faia e Maria.

- Aisea na le faatauina ai e Iuta le Sekara ia le taulaga a Maria e pei ona faatauina e Maria.
- O le a se tatou iloa ia Maria e tusa ai ma le mea na tupu?
- O le a se tatou iloa ia Iuta?
- O a ni uiga o Iesu na faaalua i le meaalofa a Maria?
- I lou lava manatu, o le a se tau o le meaalofa a Maria?
- Fai i le vasega e toe mafauau i a latou meaalofa. Fesili:
- E faapefea ona tatou fuafuaina se tau o se meaalofa?
- O le a le eseese o le tau e faia e le lalolagi mo meaalofa ma le tau e faia e le Alii?
- O a meaalofa tatou te tuuina atu i le Alii e ono le malamalama ai ma manatu mauualalo i ai isi?
- O a meaalofa e tuuina mai e le Alii e le malamalama ai le to’atele o le lalolagi?
- Aisea e faaalu ai e le Ekalesia le tele o taimi, le malosi ma risosi i le fausiaina o malumalu?
- O le a le mea e le mafai ai ona faaliliuina i tupe le tau o a tatou galuega e faia i le malumalu?
- O a ituaiga manatu, taulaga, ma le alofa e tuuina atu i le fausiaina ma le tapuaiga i malumalu?
- O a meaalofa silisili ua tuuina mai e le Atua mo i tatou?
- O a ni meaalofa taugata e mafai ona tatou tuuina atu mo lo tatou Faola?
- Uuna’i le vasega ina ia latou iloa le taua o le tau o meaalofa latou te tuuina atu ma taliaina.

Ioane 13–17

O le Soifuaga o Iesu Keriso



Faatomuaga

O le Ioane 13–17 na faataunuuina i le afeafe aupito i luga o le fale o le au soo ina ua mae’a le Talisuaga Mulimuli. O loo tusia ai ia upu ma gaoioiga a le Faola a o Ia saunia ona soo mo Lona faalataina ma le faasatauroina. Na ia faataunuuina ia le sauniga o le mulumuluina o vae o Ona soo. Na ia ta’u atu o Iuta o le a faalataina o Ia. I le faalateleina o tusitusiga o loo i ai nisi o aoaoga matua malolosi o Lana misiona, na Ia aoao atu ai Ona soo ina ia fealofani, o Fesoasoani e to’alua, o le tala faatusa i le vine ma ona lala, o sauaga o le a oo mai, ma le manaomia ona tatou faalagolago i le Agaga Paia. Ona Ia faia ai lea o se tasi o tatalo mata’utia o loo tusia mo Ona Aposetolo ma soo. O le a manuia i tatou pe a tatou taumamafa soo i upu o nei mataupu.

Suesue ma le agaga tatalo le Ioane 13–17 ma manatunatu i mataupu faavae nei a e le’i saunia au lesona.

O ni Mataupu Faavae o le Talalelei e te Sailia

- Na faasino mai e Iesu ia i tatou le auala e tatou te tautuaina ai isi ma le loto mauualalo (tagai Ioane 13:3–17; tagai foi Mataiao 20:26–27)
- Tatou te faaalua le tatou alolofa ia Iesu pe a tatou alolofa i isi e pei ona alofa mai o Ia ia i tatou (tagai Ioane 13:34–35; 15:12–14, 17), i le tausia lea o Ana poloaiga (tagai Ioane 14:15, 21, 23–240, ma le olioli i Lona toe foi atu i le Tama (tagai Ioane 14:28).
- O Iesu Keriso ma le Tama oi le Lagi o i lau’a o ni tagata mavaevae se toalua ma e tasi lo lau’a faamoemoe. Na aoao mai e Iesu e mafai ona tasi i tatou ma i Lau’a i le ala lava lea e tasi (tagai Ioane 14:5–11; 15:1, 16; 16:15, 27; 17:1–11, 15–26; tagai foi i le MFF 130:22).
- O le Fesoasoani muamua o le Agaga Paia, na te aumaia faamafanafanaga ma le filemu, aoao, molimau, fesoasoani ia i tatou ia manatuaina aoaoga a le Alii ma a’oa’i i e agasala (tagai Ioane 14:16–17, 26–27; 15:26; 16:7–14).

- O le Fesoasoani lona lua o Iesu Keriso, ma e sau se aso o le a Ia faaalua mai o Ia lava i e alolofa ma auauna ia te Ia (tagai Ioane 14:18–23; tagai foi MFF 88:67–68; 93:1; 130:3).
- O le Faaola o le Vine Moni a o tatou o lala. Tatou te maua mai le ola mai ia te Ia, ma e le mafai ona tatou faia se mea e tasi e aunoa ma Ia (tagai Ioane 15:1–11, 16; tagai foi Filipi 4:13; Alema 26:12).
- Sa i ai Iesu Keriso ma le Tama Faalelagi i le mua’i olaga. Na Ia afio mai i le lalolagi e faia le finagalo o le Tama, ma ina ua maé’a Lana misiona, sa Ia toe fo’i i le Tama, ma maua ai le atoatoaga o le mamalu (tagai Ioane 16:16, 27–33; 17:1–5; tagai foi Ioane 1:1–3; Galuega 7:55– 56).
- O Iesu Keriso o le tatou puluvaga ma o le tatou fautua foi i le Tama Faalelagi (tagai Ioane 17; tagai foi 1 Ioane 2:1; 2 Nifae 2:9–10; Mosaea 15:7–9; MFF 62:1).

Fautuaga mo le Aoao Atu

Filifili mai i aitia nei pe faaoga ni au lava, a o e saunia lesiona mo le Ioane 13–17.



Ioane 13:1–17. O Iesu o lo tatou faaitaiga i auala e auauna atu ai ma le lotomaualalo i isi. (25–30 minute)

Faaili ni ata o ni ta’ita’i iloga i alaalfaga po o le lalolagi. Fesili i le vasega:

- Aisea ua avea ai nei tagata ma ta’ita’i? (Ia faaautu le talanoaga i mataupu faavae mo taitaiga a e le o le polokiki po o tagata polokiki taitoatasi.)
- Afai o nei tagata ua le toe umia ia tulaga o le pule, faamata e te aloaia pea i latou o ni ta’ita’i? Aisea o le a aloaia ai po o le aloaia foi?
- O le a le eseese i auala e faatinoina ai e le lalolagi ma le Ekalesia ia taitaiga? (Talanoaina a latou tali)

Uu i luga se ata o le Faaola ma fesili pe aisea ua latou manatu ai o Iesu o se ta’ita’i. Tusi le upu *Taitaiga Faakeriso* i luga o le laupapa faatasi ai ma mau nei: *Mareko 10:42–44; Luka 22:24– 30; Ioane 13:1–17*. Faitau faatasi nei mau ma le vasega, ona fesili lea:

- O a mea na aoao mai e Keriso i nei mau e uiga i le taitaiga?
- O le a sou manatu aisea na mulumulu ai e le Faaola vae o Ona soo?

Faamanatu atu i le vasega na mulumuluina fo’i e Iesu vae o Iuta, tusa lava pe ua Ia mautinoa o le a faalataina o Ia e Iuta i se taimi lata mai (tagai Mataio 26:21–25; Ioane 13:23–30). Fesili: O le a le mea o loo aoaoina atu i lona faiga e uiga i le manatu o le Faaola i le auauna atu ma taitaiga?

Na saunoa Peresitene Tavita O. Makei e uiga i le mulumuluina e Iesu o vae o le au soo:

“O se faaitaiga maoae i na auauna taua, o e mulimuli ia Keriso! A i ai se sili ia te outou, ia avea o ia ma se aupito itiiti. Ua ia i tatou le matafaioi o le matua auauna atu i tagata o le Ekalesia, ma tuuina atu o tatou ola i le faaaluluina i luma o le malo o le Atua i luga o le fogaeleele” (Lipoti Konafesi, Aperila 1951, 159).

Fesili i le vasega:

- O le a le fautuaga a Peresitene Makei i le mea e tatau ona tatou faia e faalelei atili ai la tatou auaunaga?
- O le a le mea tatou te faia ina ia faaogaina ai le faaitaiga a le Faaola i o tatou olaga?
- O a ni faaitaiga o le auaunaga na faia lata mai e oe lava, lou aiga po o se tagata o le Ekalesia?
- Aisea e tatau ai ona tatou manatunatu o tatou o ni ta’ita’i po o ni tagata e mafai ona avea ma ta’ita’i?

Valaaulia le vasega ina ia tusi i se fasi pepa ia mea e ono mafai ona latou faia e auauna atu ai i isi. Tofi ni nai tagata e mananao e faamatala mai i le vasega mea na latou tusia. Uunai le vasega e faataunuu mea e tatau ona latou faia ma ia avea i latou ma taitai faa-Keriso.

Ioane 13:34–35; 15:8–13. E faaalua lo tatou alolofa ia Keriso i le alolofa atu lea i isi pei ona Ia alofa mai ia i tatou. (30–35 minute)

A’o le’i faia le vasega, ia saunia ni ituaiga meaalofa eseese e faaalua ai le alofa (mo se faaitaiga o meaalofa e manaomia e i ai ia mama faaipoipo, fualaau, o se pusa e foliga i se fatu (heart) e tuu ai ni lolé). Ia tuuina i se mea e faigofie e le vasega ona vaai i ai a’o ulufale mai i totonu o le potuoaoga. I le ogatotonu o ia meaalofa ia tuu ai se ata o Iesu o loo talalo i Ketesemane (Mataio 26:36–45) (aitema numera 80612) po o se ata tau talafeagai. Fai ni fesili faapea:

- E faapefea ona e faaalua le alofa i au uo, aiga ma ou tuaoi?
- E faapefea ona aoao atu e le lalolagi le faaalua o le alofa?
- O a ni faaitaiga na aoao mai ai e le Faaola le alofa?

Faamalamalama na aoaoina e Iesu Ona soo e uiga i le alofa i Ona itula mulimuli a o faatasi o Ia ma i latou.

Faitau e se tagata le Mataio 22:36–40. Faamalamalama, i le taimi mulimuli a o faatasi ia Iesu ma Ana Aposetolo i le olaga faaletino, na Ia toe faamamafaina ai le taua o nei poloaiga.

- Faitau le Ioane 13:34–35; 15:12, 17. E tusa ma nei mataupu, aisea ua matua faatauaina ai e le Alii le alofa?
- Faitau le Ioane 14:15, 21, 23. O le a se ala sili e faaalua lo tatou alolofa i le Atua?
- Faitau le Ioane 15:9–10. Na faapefea ona faia e Iesu le faaitaiga?

Ia faitau le leoa e le vasega le Ioane 15:13 ma mafaufau i lona uiga. Fesili: O a mea o loo aoao mai e mau o loo manaomia e le Faaola mai ia te i tatou? Faamalamalama, o le upu Eleni ua faaliliuina “tuuina mai” i le faaliliuga a le [King James Version] o le tusi paia, o le isi ona uiga o le “tuueseina.” Na tuueseina e Iesu Lona soifua faaletino ina ia tatou maua le ola e faavavau. O Iesu e le gata ina puapuagatia ma maliu ona o le faaalua o Lona alofa mo i tatou, ae na Ia soifua i Lona soifuaga mo i tatou ma le Tama Faalelagi. Na ia faaalua i le tele o taimi o loo Ia faia le finagalo o le Tama ae le o Lona lava finagalo. Fesili: Aisea ua manaomia ai e le Alii tagata o lo o mulimuli ia te Ia e tuuese o latou manaoga ae usitai ia te Ia ma auauna atu i isi? Ia toe faitau e le vasega le Ioane 15:12.

- E mafai faapefea ona tatou tuputupu a’e ona o lo tatou alolofa i isi tagata?
- E mafai faapefea ona tatou saga faaalua lo tatou alolofa atu i isi tagata?

Uunai le vasega e tatalo ina ia latou maua atili le alofa ma faaalua i se tulaga sili atu e ala i le auauna atu ma le faia o taulaga. E mafai ona faai’uina i le viiga “Ia Fealofani” (*Viiga*, nu. 195).



Ioane 14:15–17 (Mau Tauloto, Ioane 14:15). E faaalua lo tatou alolofa mo Keriso i le tausia o Ana poloaiga. (15–20 minute)

Tusi i luga o le laupapa, *Afai e te alofa ia te a’u o le a e_____*. Fesili i le vasega pe faamata e faapefea ona faatutumuina e tagata nei le fuaiupu o loo i luga: o se tina, se tuafafine, se uo, ma Iesu. Faitau e se tagata le Ioane 14:15, ma fesili:

- Mata o le a se auala e finagalo Iesu tatou te faaali atu ai lo tatou alolofa mo Ia?
- Aisea ua avea ai le usitai ma se tulaga e faaali atu ai le alofa?
- O le a le mea e ta’u mai pe a le usitai se tagata?

Talanoaina pe faapefea i a tatou gaoioiga i le tele o taimi ona faaalua sa’o o tatou lagona moni nai lo a tatou upu.

Faitau e le vasega le Ioane 14:16–27 ma sailia folafolaga na tuuina mai e Iesu ia i latou e alolofa ia te Ia. Tusi folafolaga i luga o le laupapa. Fesili: O a nisi faamanuiaga mai le Tama Faalelagi e faaalua ai Lona alofa mo i tatou.?

Tuuina atu ni pepa i le vasega e tusi ai a latou molimau po o lagona mo le Faaola ma mea o le a latou faia e faaali atu ai le alofa silisili mo Ia. Uuna’i i latou e faitau soo a latou tusi.

Ioane 14:15–26; 16:7–14. O le Fesoasoani Muamua o le Agaga Paia, o le e tuuina mai faamafanafanaga ma le filemu, aoao, molimau, faamanatu mai ia i tatou aoaoga a le Alii ma a’oa’i i e agasala. O le Fesoasoani Lona Lua o Iesu Keriso, o le a i ai se aso o le ia faaalua mai ai o Ia lava i e e alolofa ma auauna ia te Ia. (25–30 minute)

Fesili i le vasega: O le a se mea sa e matua fefe ai a o e laitiiti? Ia tuu le avanoa i le vasega e faamatala mai ai ma fesili atu ia i latou: Sa i ai se mea sa faamafanafana ai oe na e maua ai foi le filemu ina ua mavae le mea na tupu?

Faitau e le vasega le Ioane 14:15–26 ma sailia folafolaga o faamafanafanaga na tuuina atu e le Faaola i Ona soo. Fesili:

- Aisea e manaomia ai e le au soo ia faamafanafanaga?
- O a taimi tatou te manaomia ai se fesoasoani faapitoa pei o le Agaga Paia?
- O ai i latou ua agavaa e mauaina le Agaga Paia?

Faamalamalama o le Agaga Paia o nisi o taimi e taua ai o le Fesoasoani Muamua. Faitau e le vasega le Ioane 14:18–21, 23.

- E tusa ai ma ia fuaiupu, o ai e mafai ona faaigoa o le Fesoasoani Lona Lua? (Keriso.)
- O ai e mauaina le folafolaga o le Fesoasoani lona Lua? (O i latou e tausia poloaiga ma alolofa ia te Ia; tagai ff. 21, 23.)

Faitau le Mataupu Faavae ma Feagaiga 93:1, ma faamalamalama e avanoa le Fesoasoani lona Lua mo tagata uma o le Au Paia, ma o ia faamanuiaga faatoa mauaina pe afai tatou te faailoaina lo tatou faatuatua i mea uma. Faaoga uma po o ni vaega o le faamatalaga leni e fesoasoani ia te oe i le aoaoina atu e uiga i Fesoasoani e lua.

Na saunoa Elder Bruce R. McConkie e faatatau i le Ioane 14:15–26:

“O nei faamatalaga e uiga i Fesoasoani e lua o le faatumutumuga ma le pale o aoaoga a le Alo le Atua. E leai ni tusitusiga o se mea na ia fai mai ai e mafai ona matua aveeseina ai pupuni o le faavavau, ma tatalaina ai se faaaliga faamaoni o mamalu o le Atua. E faavae i le alofa, e fanau mai i le usitai, na folafola mai e Iesu i le au paia e mafai ona latou mauaina iinei i le olaga nei ia mea nei:

“(1) O le meaalofa ma le mafutaga faifai pea ma le Agaga Paia; o le faamafanafanaga ma le filemu o le galuega a le Agaga Paia e tuuina atu; o faaaliga ma le mana faamama lea o le a saunia ai tagata mo le mafutaga a atua ma agelu i le olaga a sau;

“(2) Asiasiga mai i le Fesoasoani Lona Lua, o le Alii o Iesu Keriso lava ia, o tagata ua toetutu ma faaatoatoaina o e o loo nonofo faatasi ma lona Tama i ona maota i luga; ma

“(3) O le Atua le Tama....o le a asiasi mai i le tino i tagata, siitia a’e lona nofoaga faatasi ma ia, pei ona i ai, ma faaali atu ia te ia mea lilo uma o lona malo” (*Doctrinal New Testament Commentary*, 1:735).

Na saunoa le Perofeta o Iosefa Samita e uiga i Fesoasoani e lua faapenei:

“E lua ia Fesoasoani o loo tautalagia. O le tasi o le Agaga Paia, o lea na tuuina mai i le aso o le Penetekoso, ma e mauaina e le Au Paia uma ina ua faatuatua, salamo, ma papatiso. O lenei Fesoasoani muamua po o le Agaga Paia e leai lava se isi ona aafiaga na o le pototo atoatoa. E sili atu le mamana i le faalauteleina o le mafaufau, faapupulaina o le malamalama, ma le teuina o le atamai i le pototo ua i ai nei. . . .

“O le isi Fesoasoani o loo talanoaina o se mataupu e tele sona taua, ma atonu e toaitiiti i latou o lenei augatupulaga e malamalama i ai. A faatuatua se tagata ia Keriso, salamo i ana agasala, ma papatisoina mo le faamagaloina o ana agasala ma mauaina le Agaga Paia, (i le faaee atu o lima), o le Fesoasoani muamua lea, ona ia saga faamaualalo ai lea i luma o le Atua, ma ia saga fiafi pea ma fiainu i le amiotonu, ma ola ai i upu uma a le Atua, ona le pine lea ae fetalai mai le Alii ia te ia, Atalii e, o le a faaeaina oe. A maea ona faamaonia o ia e le Alii, ma iloa e sogasoga le tagata e auauna atu ia te Ia i soo se mea, ona mautinoa ai lea e le tagata o lona filifilia ma, ma mauaina ai loa le avanoa e mauaina ai le isi Fesoasoani, pei ona folafolaina mai e le Alii, pei ona tusia i le molimau a Ioane, i le mataupu e 14, fuaiupu 12 e o o i le 27.

“Maitau fuaiupu e 16, 17, 18, 21, 23 . . .

“O lenei, o le a le isi Fesoasoani? O ia o le Alii o Iesu Keriso lava Ia; ma o le atoatoaga lea o le mea atoa; afai e mauaina e se tasi le Fesoasoani mulimuli lea, o le a ia mauaina le peresona o Iesu Keriso e fesoasoani ia te ia, pe faaali atu ia te ia mai lea taimi i lea taimi, ma na te Ia faaaliga fo’i le Tama ia te ia, ma o le a siitia lona nofoaga faatasi ma ia, ma o faaaliga o le lagi o le a tatalaina atu ia te ia, ma o le a aoaina fo’i o ia e le Alii, ma o le a ia mauaina le malamalamaaga atoa i mea lilo o le Malo o le Atua; ma o le tulaga ma le nofoaga lea na oo i ai le Au Paia anamua ina ua mauaina ia faaaliga matagofie—Isaia, Esekielu, Ioane i le motu o Patamo, Paulo i le lagi sautua tolu, ma le Au Paia uma sa faia le faamana-tuga ma le faapotopotoga atoa ma le Ekalesia a le Ulumatua: (*Teaching of the Prophet Joseph Smith, 149–51*)

Faamanatu atu i le vasega e tatau ona saunia i latou mo le Fesoasoani Lona Lua aua o le a ia faaaliga mai o Ia “ i lona lava taimi, i ona lava la, ma e tusa ai ma lona lava finagalo (MFF 88:68). E tatau ona tatou taulai atu i le taliaina ma le usita’ia o le Fesoasoani Muamua, aua o loo avanoa mo i tatou taitoatasi i le taimi lenei.

Faitau e le vasega le Ioane 14:26 ma le Ioane 16:7–14 ma sailia ni fesoasoani e ala mai i le meaalofa a le Agaga Paia. Ia lisi i luga o le laupapa ma talanoaina.

Fesili: E moomia ea e i tatou se lagona o le le amanaia po o le tuulafoa’ia a o tatou saili le fiafia ma le ola e faavavau? Faia se molimau e uiga i le filemu, olioli ma le faamafanafanaga e ala mai i le Agaga Paia.

Ioane 15:1–8. O le Faaola o le Vine Moni, a o tatou o lala. Tatou te maua mai le ola ia te Ia, ma e leai se mea tatou te mafaia e aunoa ma Ia.
(15–20 minute)

Aumai se mea e alu i le eletise ma se laau ola (plant) i le vasega. Ia ki le mea o loo faaoga ai le eletise ae le’i palakaina le palaka o le eletise. Fesili: Aisea e le o ola ai? Tusi se lala po o se laulaau o le laau. Fesili i le vasega i fesili nei:

- O le a le mea e mafai ai ona ola le laulaau po o le lala?
- O le a le mea o le a tupu pe a gagau ese mai le lala?
- O a auala e tutusa ai le laulaau ma le mea e alu i le eletise? (E manaomia e mea e lua ia se mea e faaola ai mo le faataunuuina o la faamoemoe.)
- E faapefea ona pei i tatou o le mea e alu i le eletise ma le laau. (Fesoasoani i le vasega ia latou iloa latou te manaomiaina se fesoasoani mai le Alii ina ia mafai ai ona faataunuu o latou faamoemoe.)
- Faitau e le vasega le Ioane 15:1–8. Fesili atu e ta’u mai le uiga o faailoga nei mai i le faataoto:
- O le vine (f.1)
- O le galue vine (f.1)
- O lala (f.2)
- O fua (f.2)
- Lala laau ua mago (f.6)

Fesili:

- O a ni lesonea tatou te aoao mai i lenei faatusatusaga?
- O a auala o loo tatou faalagolago ai pea i le Atua?

E mafai ona e filifili e faitau le saunoaga lenei a Elder John Taylor:

“O le avea ai ma se tagata o le Au Paia, ‘Ou te manatu ua ou malamalama i lo’u tiute, ma o loo lelei lava lo’u faataunuuina.’ Atonu e sa’o lena. A e vaai i se tama’i lala: e lanu meamata; o lo o tuputupu a’e lauusiusi ma o le ata lea o le ola. O lo o faia lana galuega o se vaega o le laau, ma e pipii atu i le ogalaau, lala ma aa. Peitai, mata e mafai ona ola le laau e aunoa ma lea lala? Ioe, e mafai. E le tatau ona lotofefete ma faalialia ma faapea mai, ‘E ese lo’u lanu meamata manaia, ma e maeu foi lo’u lauusiusi! ma e maeu foi lo’u maloloina! E maeu lo’u manuia! Ma o loo ou i ai i se nofoaga tonu ma o loo ou solosolo lelei pea.’ Ae mata e mafai ona e ola e aunoa ma aa? E leai: e te tauaveina lou tiute ma lou tulaga i le laau. E faapena foi i nei

tagata. A latou faia la latou pitolaau—a latou faalauteleina o latou valaauga, ola i le talalelei, ma savavali i le usiusitai i le Agaga o le Alii, o le a latou mauaina se vaega o lona Agaga o le a tuuina atu ia i latou e manuia ai i latou uma. A o latou maua le lotomauualalo, faamaoni, filiga, ma tausia tulafono ma poloaiga a le Atua, o le a latou tutu i o latou nofoaga tonu i le laau: e lauusiusi; o fuga, o fugalaau, laulaau ma mea uma o i ai ua lelei uma, ma avea ai i latou o ni vaega o le laau faatasi ai ma le avea o le laau” (in *Journal of Discourses*, 6:108).

Faitau e le vasega ma mafauafau i le lapataiga a le Tupu o Peniamina ia loto faafetai o loo i le Mosaea 2:19–25. Valaaulia le vasega e fetufaai mai o laotu mafauauga ma lagona e uiga i lenei savali.



Ioane 17. O Iesu Keriso o lo tatou puluvaga ma lo tatou fautua i le Tama oi le Lagi. (45– 50 minute)

Ia faatulagaina le vasega e pei o se potu faamasino, ma o mea nei e tatau ona i ai; se fu’a, o se tama’i samala laau, ma se Tusi Paia mo le tautoga. Filifili ni tagata se to’afa o le vasega e fai ma faamasino, se loaia mo le itu tagi, se loaia mo le itu tetee, ma le ua molia. Fai i le loaia o loo tu mo le itu tagi e matua su’esu’eina ni mea sese se tele e faasaga i le ua molia i le faia lea o ni fesili faigata pei o, “Ua i ai se taimi ua e pepelo ai?” “E i ai se taimi ua e faia ai se mea le sa’o?” “Ua i ai se taimi na e soliina ai le tulafono?” Fai i le loaia o loo tu mo le ua molia e talosaga mo le ua molia. Mo se faataitaiga, afai e ioe le ua molia i se mea ua sese, e tatau i le loaia o loo tu mo ia ona faailoa atu le tulaga na tupu ai nei mea ta’u atu fo’i o le ua molia ua salamo. Ta’u atu i le ua molia (ma ia mautinoa ua malamalama le vasega) o le mea o lo o fai nei e na o se faataitaiga ma o tali na te tuuina mai e le faapea o ni tali moni, ae tau ina ia faatino ai lagona o i le vasega pe faapefea ona tali se tagata ua aafia moni. Ia tuuina atu se lima minute e faata’ita’i ai i e ua tofia e faia le gaioioiga i se isi mea e ese mai le vasega ona toe o mai lea i le vasega mo le faataunuaina o le gaioioiga pe a mae’a.

Tusi le upu *Fautua* i luga o le laupapa ma fesili i tagata ole vasega e ta’u mai le uiga o lea upu. (O le fautua e pei o se loaia e tu mo se isi i se faamasinoga po o se isi lava mafuaaga.) Faitau e se isi le 1 Ioane 2:1 i le vasega, ona faitau lea e se isi i le vasega le MFF 62:1. Fesili: E faapefea ona avea Iesu Keriso ma o tatou fautua i le Tama Faalelagi?

Tusi i luga o le laupapa le upu *Puluvaga* ma fesili mo se faamalamalamaaga po o le uiga. (O le puluvaga o lona uiga o le toe faaleleia, fautuaina, pe talosagaina mo.) Faitau e se isi o le vasega le 2 Nifae 2:9–10, ma se isi e faitau le Mosaea 15:7–9. Fesili: O a mea e puluvagaina ai i tatou e Iesu i le Tama?

- Faamanatu i le vasega le gaioioiga sa faatinoina ma fesili:
- O le a sou manatu o ai e faasino i ai le o loo tu mo le ua molia?
- O ai e faasino i ai le loaia o le itu tagi? (Faamalamalama o se tasi o igoa o Satani o le “faasese” tagai i le Faaaliga 12:9–10.)
- O ai e faasino i ai le tagata ua molia? (Soo se isi o tatou)

Faamanatu atu e pei o le na molia i le gaioioiga faatino lea na fai nei, o tatou uma e agasala ma faia mea sese i o tatou olaga. O le tatou salamo ma le usita’i e mafai ai e le Faaoia, o le e leai sana agasala ma sa togiola i tatou, ona fautua mo i tatou i le Tama ma puluvagaina i tatou.

Faitau e le vasega le Ioane 17 ma sailia faailoga o le avea o le Alii ma puluvaga mo ona soo. Talanoaina mea na latou maua. Fesili: O le a sou lagona ina ua e iloaina o Iesu Keriso o le fautua mo i tatou ma lo tatou puluvaga. Ia faai’uina i le saunoaga lenei a Peresitene J. Reuben Clark Jr., o ia sa avea ma se tasi o le Au Peresitene Sili:

“O te talitonu e finagalo lo tatou Tama Faalelagi e laveai tagata uma lava o lana fanau. Ou te le talitonu e i ai sona faamoemoe e lafoai se tasi o i tatou. . . .

“...Ou te talitonu o lona amiotonu ma lona alofa o le a ia tuuina mai ai se taui silisili mo a tatou galuega, tuuina mai o mea uma na te mafaia ma faapea foi ona ia toe aveesea, ma ou te talitonu o le ia tuuina mai se faasalaga talafeagai e mafai ona ia tuuina mai” (Conference Report, Oke. 1953, 84).



Ioane 17:3 (Mau Tauloto). “O le ola e faavavau fo’i lenei, ia latou iloa oe le Atua moni e toatasi, atoa ma le ua e auina mai o Iesu Keriso lea.” (10–15 minute)

Faitau le Ioane 17:3 ma fesili: O le a sou manatu o le a le eseese o le iloaina o le Tama Faalelagi ma Iesu Keriso, ma le malamalamaaga ia i laua? Faitau le 1 Ioane 4:7–8; Mosaea 5:13; ma le MFF 132:21–24 ma talanoaina pe faapefea ona tatou mauaina se malamalamaaga sili atu i le Tama ma le Alo.


Fesoasoani i le vasega i le taulotoina o le Ioane 17:3 i le tusia lea o le mau i le

laupapa ma fai faatasi e le vasega. A mae’a ni nai taimi e fai faatasi ai, ona tape ese lea o ni nai upu tatala ma fai i ai e toe fai mai faatasi. Ia faifai ai pea i le faiga lea, seia mafai e le vasega ona tauloto atoa mai le mau e aunoa ma se fesoasoani mai le laupapa.

Ioane 18-21

O le Soifuaga o Iesu Keriso

O mea na tutupu i nei mataupu e foliga mai na tutupu lava i lenei vaitaimi



Faatomuaga

O mataupu mulimuli o le Ioane e maua ai e tatou se avanoa e mafaufau loloto ai i le faalataina o Iesu e Iuta ma le mataga o le faamasinoga o le Faaola. Ia mata'ituina ni uiga o lagona o le au Iutaia e tusa ai ma le pulega a le malo o Roma, ma mafaufau pe e faapefea e ta'ita'i o Iutaia ona latou uuna'ia Pilato e faataga le faasalaga o Iesu e ui ina ua ia iloa e leai se agasala a Iesu. Ina ua maea le taufaifai ma le faamasinoga le sa'o ma faiga mataga i lima o Herota ma Pilato, ona avatu ai lea o Iesu e faasatauroina i Kalevario i le mea o loo i ai le ulupoo. O i latou na pasi ane a o avatu o Ia i Kalevario na latou taufaifai ma tauemu ia te Ia ma fai atu, "Afai o oe o le Alo le Atua, alu ifo i lalo mai le satauro: (tagai Mareko 15:30). O Lona tino na tuuina i le tuugamau i le togalaau ma sa tu'i mauina. Ae peitai e le'i umi ona i ai iina. A o e faitau, mafaufau loloto i le fiafia sa oo ia Maria le Makatala ma le au soo ina ua latou iloa ua toetu le Alii o Iesu Keriso mai le oti ma o le a soifua pea e faavavau.

Suesue ma le agaga tatalo le Ioane 18-21 ma mafaufau i mataupu faavae nei ae le'i saunia au lesona.

O ni Mataupu Faavae Tava o le Talalelei e te Sailia

- Na faatagaina e Iesu Keriso Ona fili e pu'eina, sasa, ma faasatauroina o Ia ina ia maua e tagata uma le avanoa e faaolaina ai (tagai Ioane 18:1-14, 19-24, 36-37; 19:1-7, 17-18, 30; tagai foi 2 Nifae 2:6-9).
- O Lona puapuagatia ma le maliu, na faataunuuna ai e le Faaola mea uma na tuuina atu e le Tama na te faia (tagai Ioane 18:11-14, 28-40; 19:28-30; Ioane 4:34; Mosaea 15:5-7).
- O le malamalama pe o ai i tatou ma faamoemoega o lenei olaga, e mafai ai ona tatou maua le tulaga mautinoa ma le lototele e onosaia ai faigata (tagai Ioane 18:1-13; tagai foi Alema 14:9-13).
- Na valoia e Perofeta le Toetu ina ia tatou talitonu ai o Iesu Keriso o le Alo o le Atua (tagai Ioane 20; tagai foi Alema 33:12-22).

- O se talitonuga i le Toetu o Keriso e mafai ona maua mai i faamaoniga e pei o le tuugamau avanoa, mai le vaaia o le tino toetu o Keriso, po o le faalogoina foi o molimau a isi. O le talitonu e aunoa ma le vaai e sili atu lena i le Alii nai lo le talitonu ina ua vaai (tagai Ioane 20:8, 14-16, 18-20, 24-29; tagai foi Alema 32:16-18).
- E maua ni faamanuiaga sili e i latou e faamuamua le galuega a le Alii i o latou olaga (tagai Ioane 21:1-6, 15-17).

Fautuaga mo le Aoao Atu

Filifili mai i aitia nei pe faaogaina ni au lava, a o e saunia lesona mo le Ioane 18-21.



E mafai ona faaoga le *Vitio o le Feagaiga Fou 10*, "Fafaga A'u Mamoe" (11:47), i le aoaoina atu o le Ioane 21 (tagai *Taiala Vitio o le Feagaiga Fou* mo ni fautuaga).



Ioane 18-19. Na puapuagatia ma maliu Iesu ina ia mafai ai ona faaolaina tagata uma. E faateleina lo tatou alolofa ma le talisapaia o la pe a tatou aoao atili e uiga i Lana taulaga mo i tatou. (35-40 minute)

Fesili i le vasega e mafaufau i se mea e matua taua i o latou lagona (mo se faataitaiga o se mataupu faavae o le talalelei, o o latou aiga, o le Ekalesia, o se galuega po o a latou molimau). Fesili:

- O le a sou lagona ina ua tauemu ma faifai tagata i se mea e taua i lou olaga? Aisea?
- Faamata aisea ua tauemu ai ma faifai tagata i mea o loo e faatauaina?
- O a ni isi ituaiga o puapuaga tatou te feagai pea i le olaga nei?

Faitau e le vasega le Eperu 2:18 ma sailia po o ai ua feagai ma puapuaga uma o lenei olaga ma e mafai ona ia faamafanafanaina i tatou. Faamalamalama atu e mafai ona tatou a'oa'oina mea e tele e uiga i le onosa'ia o tofotofoga mai le soifuaga o le Faaola.

Ia tusi le fesili ma le mau leni i luga o le laupapa. Vaevae le vasega i ni vaega se fa ma tuu atu i ai fesili i vaega taitasi. Ia faaogaina e tagata o le vasega mau e sue ai tali. Uuna'i i latou e faaoga isi mau pe a mana'omia. A mae'a ona tofu lea o le vaega ma se sui e faitau le latou fesili ma faamatala mai le latou tali.

1. E faapefea ona silafia e Iesu le mea e ta'u o le tuua'iseseina, le malamalama, po o le faalataina? (tagai Ioane 18:1-13, 19-24).
2. E faapefea ona silafia e Iesu le lagona o le tuulafoaia po o le tuua toatasi? (tagai Ioane 18:15-18, 25-27; 19:25-30).
3. E faapefea ona silafia e Iesu le ave o ia ma se ua aafia fua ona o faamasinoga le sa'o ma sauaga faaletulafono? (tagai Ioane 18:28-40; 19:8-15).
4. E faapefea ona silafia e Iesu mea tau faama'i ma mafatiaga faaletino? (tagai Ioane 19:1-7, 16-24).

Ta'u atu i le vasega e le mafai ona tatou aoao atu ia Iesu e uiga i mafatiaga aua ua uma ona Ia silafia. Tofi se tagata e faitau le saunoaga lea a Elder Neal A. Maxwell:

“E moni, e le mafai ona tatou aoao atu ia te Ia soo se mea! Ae e mafai ona tatou faalogo ia te Ia. E mafai ona tatou alolofa ia te Ia, e mafai ona tatou faamamalu ia te Ia, e mafai ona tatou tapua'i ia te Ia! E mafai ona tatou tausia Ana poloaiga, ma e mafai foi ona taumamafa pe fiafia i Ana tusitusiga paia! Ioe, o i tatou o ē ua lotu galo ma fouvale e le faagaloina lava e Ia! O i tatou o Ana 'galuega' ma Lona 'mamalu,' ma e le faalavelaveina lava o Ia! (tagai Mose 1:39.)

Liahona, Ianuari 1982, 9).

- Faitau le Ioane 19:38–42. Na faapefea ona faaalua e Iosefa le Arimataia ma Nikotemo lo la faaaloalo i le Alii ?
- Faitau le Mataio 27:59–60. O a mea o loo ta'uina mai e nei fuaiupu e uiga i le gaua'i atu o Iosefa le Arimataia i le Faaola.?
- E mafai faapefea ona faaalua lo tatou gauai atu ia Iesu Keriso?

Faaiu i le usuina po o le faitauina o le “E I Ai Se Mauga Lanu Vao” (*Viiga*, nu. 108).

Ioane 18:1–13. O le malamalama po o ai i tatou ma faamoemoe o le olaga e mafai ai ona tatou maua le lototele e onosaia ai faigata.

(30–35 minute)

A o le'i amataina le vasega, faapipii se faaata i totonu i le pito i lalo o se atigipusa ona toe tapuni lea. Fai i le vasega o le asō o le a latou aoao ai e uiga i se tagata fou. Faamatala o totonu o le atigipusa o loo i ai se mea e faafaigofie ona iloa ai le tagata lea. Valaaulia se tagata o le vasega e tilotilo i totonu ina ia iloa ai le mea lea. Fai i le tagata lea e ta'u i le vasega po o ai le tagata fou. Fesili:

- E faapefea ona e iloaina o oe?
- E te iloaina o ai *moni* lava oe?

Tusi i luga o le laupapa le saunoaga lenei a Peresitene Thomas S. Monson:

“ E tatau lava ona tatou manatua po o ai tatou ma ituaiga tagata o loo faamoemoe le Atua e avea ai i tatou” (Lipoti Konafesi, Ape. 1994, 67; po o le *Liahona*, Iulai 1994, 50).

Fesili i le vasega:

- O ai moni lava i tatou?
- O a ituaiga tagata o loo faamoemoe le Atua e avea ai i tatou?
- E mafai faapefea ona fesoasoani lo tatou talitonu o tatou o atalii ma afafine moni o le Atua tatou te maua ai le malosi e fetaia'i ai ma tofotofoga o le olaga?

Ia faamanatu le tala i le faalataina o Iesu i le Ioane 18:1–9. Faitau e le vasega fuaiupu 10–13, ma fesili:

- O a mea na fetalai mai ai Iesu i nei fuaiupu e faaalua ai na Ia silafia o ia lava ma le mea na finagalo ai le Tama Faalelagi Na te faia?
- O le a le faailoga o loo i ai i nei fuaiupu e ta'u mai ai sa ia Iesu le lototele e talia ai lenei faamasinoga matautia?

Ia faitau e se tagata le saunoaga lenei a Elder Russell M. Nelson:

“A o faifai pea lou feagai ma le tele o filifiliga faigata i le olaga, ia manatua, o loo i ai se puipuga tele pe a e iloaina po o ai oe, aisea ua e i ai iinei, ma po o fea foi e te agai i ai” (Lipoti Koonafesi, Oct. 1990, 97: po o le *Liahona* Ianuari, 1990, 75).

I le itu tauagavale o le laupapa, tusi ai *Iesu Keriso* (Ioane 18:19–24, 28–37). I le itu taumatau tusi ai *Peteru* (Ioane 18:15–18, 25–27). Tofi le afa o le vasega e suesue ia mau o loo puipui i tafatafa o le suafa o Iesu, a'o le isi afa e suesue ia mau o loo i tafatafa o le igoa o Peteru. Fesili i le vaega muamua:

- O a ni faailoga na e mauaina i nei fuaiupu e ta'u mai ai na silafia e Iesu pe o ai Ia?
- Pe na faapefea ona Ia mauaina le malosi i lea malamalamaaga?

Fesili i le isi vaega ni fesili faapea e uiga ia Peteru. Fai nisi o fesili nei pe fai uma foi e fai ma vaega o se talanoaga a le vasega:

- E faapefea i tali a Iesu i e na latou tuua'ia o Ia ona faaalua ai na silafia lava e Iesu po o ai o Ia?
- Aisea na fanau mai ai Iesu?
- Aisea na pepelo ai Peteru e uiga i le la mafutaga ma le Faaola?
- E faapefea i mea na tutupu ia Peteru ona faaalua ai atonu na te le'i malamalama po o ai tonu lava o ia?
- O lea le mea o loo ta'u mai ia i tatou i le Luka 22:60–62 e uiga i se faaloga a Peteru ina ua mae'a ona ia faafitia faatolu le Faaola?
- O le a sau faaloga pe afai ua e iloa ua e le ausia le mea e te mafaia?
- E faapefea i le iloaina poo ai i tatou ona fesoasoani i le faafitauli o le le mafai ona faataunuaina?

Faaiu i le faitauina o le saunoaga lenei a Elder M. Russell Ballard pe fai ni kopi ma tufatufa i le vasega.

“O le taula'i atu ma ola i mataupu faavae o le fuafuaga a le Tama Faalelagi mo lo tatou fiafia e faavavau, o le a mafai ai ona tuu eseese i tatou lava mai le leaga o le lalolagi. Afai ae taulaina i tatou i le malamalamaaga moni po o ai i tatou, pe aisea o loo tatou i ai i lenei fogaeleele, ma poo fea e mafai ona tatou o i ai pe a mae'a lenei olaga faaletino, e le mafai e Satani ona

faamata'uina lo tatou fiafia i soo se ituaiga o faaososoga. Afai tatou te naunau e ola i le fuafuaga a le Tama Faalelagi, o le a tatou faaaogaina le saolotoga na aumai i le Atua e faia ai faaiuga e faavae i mea moni ua faaalua, ae lē o manatu o isi po o mafaufauga faaona po nei o le lalolagi" (Lipoti o le Konafesi, Ape. 1995, 30–31; po o le *Liahona*, Iulai 1995, 24).

Ioane 20:1–23 (tagai foi Mataio 28:1–10; Mareko 16:2–4; Luka 24:1–12, 36–49). O loo molimau Perofeta e uiga i le Toetu ina ia mafai ai ona tatou talitonu o Iesu Keriso o le Alo o le Atua.
(10–25 minute)

Tusi *Iopu 14:14* i luga o le laupapa. Fai i le vasega e faitau le mau ma tali le fesili e pei ona taua e Iopu. Fesili:

- E faapefea ona tatou mautinoa o le a toe ola pea i tatou?
- O le a se faailoga tatou te iloa na motusia noanoaga o le oti e Iesu Keriso ma toetu?

Faamatala na tusia e Ioane faailoga o le Toetu mai o Iesu Keriso ma e mafai ona tatou iloa i le aoaoina lea o lana molimau.

Tusi le Ulutala lenei i luga o le laupapa: *O le molimau a Ioane i le Toetu o Iesu Keriso*. Toe faamanatu ma le vasega le tala i le Ioane 20:1–10, ma sailia faailoga o le Toetu. Mafaufau e tuuina atu fesili faapenei:

- O ai tagata e toatolu na asia le tuugamau sa tanu ai Iesu?
- O a mea na latou mauaina i totonu o le tuugamau ?
- O le a le taua o le avanoa po o le gaogao o totonu o le tuugamau?

Pe o le gaogao ea o totonu o le tuugamau o se faailoga lea ua toetu Iesu Keriso? Aisea e ioe ai po o le leai foi?

I lalo o le ulutala ua uma ona tusia i luga o le laupapa ia tusia. *Sa gaogao le tuugamau*. Iloilo ma le vasega le Ioane 20:11–18, ma toe saili nisi faailoga o le Toetu. Fesili i ni fesili faapenei:

- O ai sa i ai i le tuugamau o Iesu i le taimi lenei?
- O ai lea na faapea Maria o le fai togalaau?
- O le a le molimau a Maria i le fuaiupu e 18?
- O le a le faailoga e faaopoopo atu ai lenei mea i le tuugamau gaogao e faatatau i le Toetu?

Faapoopo i le lisi i le laupapa *Na molimau Maria na ia vaai i le Alii*. Toe talanoaina ma le vasega le tala o loo i le Ioane 20:19–23 ma sailia nisi faailoga ma fesili i fesili faapenei:

- O ai na faapotopoto i se potu "ona o le fefefe ia Iutaia"?

Ina ua toetu mai ia Iesu, o a faailoga na ia tuuina mai e iloa ai o Ia? (Na la faaali ia i latou ona manu'a ma atonu na ia faatagaina i latou e fetagofi i ona manu'a: tagai Ioane 20:25: 3 Nifae 11:14–15.)

Tusi *Na vaai le Au Soo ma atonu na latou fetagofi i manu'a i lima ma le itu o Iesu*. Fesili:

- E faapefea e nei faailoga uma ona latou molimau atu i le Toetu mai o Iesu Keriso?
- E mafai faapefea i le molimau a Ioane ona faamalosia a tatou molimau?

Valaaulia se tagata o le vasega e faitau le saunoaga lenei a Peresitene Gordon B. Hinckley, a o aveia ia ma se tasi o le Au Peresitene Sili.

"I manumalo uma lava i le talafaasolopito o tagata, e leai lava se [manumalo] e sili atu, e leai se isi e i ai se aafiaga tele o le lalolagi, e leai se isi e faavavau lona taunuuga e pei o le manumalo o le Alii o le na faasatauroina, ma ua toetu mai i le uluai taeao o le Eseta" ("O Le Alo o le Atua." *Liahona*, Iulai 1988, 2).

Ioane 20:24–31. O le talitonu ia Iesu Keriso e aunoa ma le vaai o Ia e sili atu i le silafaga a le Alii na i lo le talitonu ina ua uma ona vaai.
(15–20 minute)

Faaali atu i le vasega se faafanua o le lalolagi. Faasino i se atunuu e le'i oo i ai le vasega. Fesili atu ia te'i latou pe ua latou mautinoa ma le moni o loo i ai pea lenei atunuu. Faaoga ia fesili nei i se talanoaga.

- E faapefea ona e iloaina o loo i ai lena atunuu?
- O le a le faia'a lenei fesili ma le fasi fuaitau, "o le vaai o le talitonu fo'i lea"?
- Aisea e taua ai i nisi taimi ona faalagolago i faamatalaga a isi o e na vaai."

Faitau e le vasega le Ioane 20:24–25 ma sailia uiga o Toma e faatatau i le Toetu o Iesu Keriso. Ia faatusa i uiga o Ioane i le Ioane 20:8. Fesili: O le a sou manatu aisea na le faalagolagoina ai e Toma ia upu a ona uso? Faateete ia aua nei faifai ia Toma ona o le le talitonu. Faamanatu i le vasega e le'i i ai lava se isi toetu talu mai le foafoaina o le lalolagi. Fesili: E mafai faapea i le manatu lea ona faafaigofie ai ona talitonu ia Toma?

Faitau le Ioane 20:25–29, ma fesili i fesili nei a o e faitau:

- O le a le tali a Toma ina ua ia vaai ma tago i manu'a o le Faaola i Ona lima ma le itu?
- O le a se mea taua moni na aoao atu e le Alii toetu ia Toma?
- O le a le mataupu faavae o le talalelei ua tatou atina'eina pe a tatou talitonu e aunoa ma le vaai?
- Faitau le Ioane 20:30–31. E tusa ai ma nei fuaiupu, aisea na tusitusia ai e Ioane nei mea na tutupu?

Usu pe faitau upu o le "UA TOE TU MAI O IA" (*Viiga*, nu. 111). Fesili i le vasega:

- O a faamanuiaga tatou te maua mai i le Toetu?
- O a ni aiaiga e fetai'a'i ma i tatou i oti pe ana le motusia e Iesu Keriso le noanoataga o le oti? (tagai 2 Nifae 7:8-9)
- O le a so outou lagona i le folafolaga o le Toetu?

Faitau le Mataupu Faavae ma Feagaiga 76:22–24 ma ta’u atu ua i ai tagata i ona po nei ua vaai ia Keriso i le tino toetu. Faamalosiau le vasega ia talitonu i molimau a tagata ia o Iesu Keriso ua toetu ma o loo soifua Ia e oo mai i le aso.

Ioane 21:1–6, 15–17. E oo mai faamanuiaga silisili ia i latou e ave le faamuamua i le galuega a le Alii i o latou olaga. (20–25 minute)

Tusi le saunoaga lenei a Elder Marvin J. Ashton, o se tasi o le Korama a le Toasefululua i luga o le laupapa ma aua le tusia se mea i le avanoa o loo i ai le upu *taimi*: “Tatou te alolofa i le mea tatou te tuu atu i ai le taimi, pe o le talalelei, Atua po o Auro” (Lipoti Konafesi. Ape. 1981, 31; po o le *Liahona*, Oke. 1981, 24)1. Valaaulia ia le vasega mo ni fautuaga po o le a se upu e talafeagai i le faatumuina o le fuaiupu. A ta’uina mai e se tasi le upu taimi, ona tusi loa lea i le avanoa ma fesili: Aisea tou te manatu ai ua moni lenei faamatalaga.?

Faitau e le vasega le Ioane 21:2–6 ma sailia pe na faapefea e Peteru ma le au soo ona faaogaina o latou taimi. Fesili i fesili faapenei:

- O le a le tulaga na i ai le latou fagotaga i le po atoa?
- O le a se lesonea e te manatu na taumafai le Faaola e tuuina atu ia i latou iina ua fetalai atu e togi le upega i le isi itu o le vaa?
- Faitau le Luka 5:4–11. Na faapefea ona tali atu ia Peteru, Iakopo ma Ioane i le taimi mulimuli na fetalai atu ai le Faaola? (Na latou tuua mea uma ae mulimuli ia Iesu)
- O le a se mea e mafai ona tatou faia e faaali atu ai lo tatou alolofa ia Iesu Keriso ma Lana talalelei.?

Faitau le Ioane 21:15–17.

- O le a sou manatu o le a le uiga o le fetalai lenei a le Faaola, “fafaga i a’u tama’i mamoe” ma le “fafaga i a’u mamoe”?
- O ai tama’i mamoe po o mamoe?

Faitau e se tasi o le vasega le saunoaga lenei a Elder Robert D. Hales:

“O le fafagaina o tama’i mamoe pe tusa lea ma galuega a faifeautalai i uso faatoa papatiso, o i latou ia e tatau ona faafaileleina ma tuu atu i ai le vaavaaiga mafana ma le faaumea i le aiga o le au paia. O le fafagaina o mamoe e mafai ona faasino i e ua matutua i le Ekalesia, o nisi ua malolosi a o nisi fo’i ua vaivai, ma e mana’omia le fesoasoani ina ia toe aumaia i le lafu” (Lipoti Konafesi, Aperila, 1977, 114; po o le *Liahona*, Me 1977, 83).

Na saunoa mai foi Persitene, Gordon B. Hinckley:

“Ona ua matua faatupula’ia pea tagata e liliu mai, o lea e tatau ai ia i tatou ona tatou faateleina a tatou galuega

e fesoasoani atu ai ia i latou. E tofu manaomia e i latou mea nei e tolu: o se uo, o se tiutetauave, ma le faafaileleina ‘i le afioga lelei a le Atua’ (Morona 6:4). O lo tatou tiute ma le matafaioi le tuuina atu o nei mea” (Lipoti Konafesi, Aperila 1997, 66; *Liahona*, Iulai 1997, 47).

Talanoaina ma le vasega pe faapefea ona latou faaoga lelei o latou taimi ma faaalua lo latou alolofa mo le Alii i le fesoasoani lea e fafagaina o Ana mamoe.

Ioane 21:18–24. Atonu o le a mana’omia e le Alii ia ni taulaga eseese mai i tagata taitoatasi. (15–20 minute)

Tusi se satauro i luga o le laupapa. Faitau e le vasega le Mataio 16:24.

- E tusa ai ma lenei fuaiupu, o le a le mea e tatau ona tatou faia ina ia faaolaina?
- O le a le uiga o le tauaveina e le tagata o le satauro?

Tusi tali i le isi itu o le satauro i luga o le laupapa. Faitau le faaliliuga o Iosefa Samita o le Mataio 16:26 ma fesili:

- O le a se mea ua faaopoopo e le fuaiupu lenei i lo tatou malamalamaaga e uiga i le tauaveina o le satauro?
- Faitau le Ioane 21:18–19. O le a le faauigaina e Peteru o le tauaveina o lona satauro?

Tusi le tali lenei i le isi itu o le satauro. Faamalamalama e tusa ai ma le mea na tupu ia Peteru, o le talosaga e “ave lona satauro, ma mulimuli mai ia te a’u” o se mea tonu lava na manaomia mai ia te ia. E tusa ai ma tu masani, na faasatauroina Peteru i Roma, e u i luga ona vae ae u i lalo lona ulu, e tusa ai ma lana lava talosaga aua ua ia manatua e le tatau ona faasatauroina o ia e pei o le Alii aua e le o agavaa o ia ina ia maliu e pei o le Alii.

Faamatala i le vasega o loo tuuina mai i le Ioane 21:20–24 se isi faaitaiga o le mulimuli i le Alii. Faamatala na mauaina e le Perofeta o Iosefa Samita se faamatalaga atoatoa e uiga i le mea na tupu i se faaaliga. Faitau e le vasega le Mataupu Faavae ma Feagaiga 7. Fai fesili pei o nei:

- O le a le mea na mana o ai Ioane?
- E faatusatusa faapefea i le mea na mana ai Peteru?
- O le a le lelei o nei talosaga taitasi?
- O a ni suiga sa tatau ona oo ia Ioane ina ia maua ai e ia lana talosaga? (Na tatau ona liua lona tino ina ia mafai ai e ia ona tumau ai pea i le lalolagi mo lona umi.)
- O a ni mea tatou te aoaoina mai i nei faaitaiga e lua e uiga i le mulimuli i le Faaola?

Molimau atu e tele auala e mafai ai ona tatou “tuuina atu o tatou ola” mo le Alii. O nisi ua tuuina atu o latou ola ma maliliu ai mo le talalelei. O isi ua tuuina atu o latou ola i le ola ai lea i mataupu faavae o le talalelei e aso taitasi. Uuna’ia le vasega e amo o latou satauro ma mulimuli i le Alii.

O GALUEGA A LE AU APOSETOLO

Tusitala: O Luka na tusia ia Galuega a le au Aposetolo (tagai i le faaulutala i le tusi a Luka i. 72). Na ia tusia ia Galuega o se tala faasolo o lana evagelia (tagai Luka 1:1–4; Galuega 1:1). I le evagelia a Luka na ia molimau ai i le fanau mai, le soifuaga, le maliu ma le Toetu o le Faaola. O le tusi o Galuega e faapoopo i ai galuega a Aposetolo a le Alii i le folafolaina atu o le savali o le talalelei i le lalolagi atoa. (tagai Galuega 1:1–8; tagai foi *Taiala i Tusitusiga Paia* “Galuega a le Au Aposetolo” “Luka.”

O E o Loo Tusi i Ai: Na tusi Luka i se tagata e igoa ia Teofilo atonu o se tagata taua i le malo o Roma. E ui o le Galuega, e pei o le tusi a Luka, e foliga o loo faapitoa mo se tagata e toatasi, o i latou uma e faitauina ma le mae’ae’a ia tusitusiga a Luka o le a mauaina se faateleina o lo latou malamalama i le talalelei.

Talaaga Faasolopito: O mea o loo faamatalaina i le Galuega na tutupu i totonu o se perioti pe tusa ma le tolusefulu tausaga a’o tuputupu a’e le Ekalesia ma oo atu i vaega o le lalolagi sa pulea e le malo o Roma. O le tusi e faapitoa i le talaiga a Peteru ma Paulo. O Luka sa avea ma soa a Paulo mo ni tausaga se tele ma o le tele o tusitusiga i le Galuega e faatatau i le femalagaa’i o Paulo i ana talaiga. Na faai’uina ia Galuega pe tusa o le T.A. 62 i se Tala i le talaiga a Paulo a o faafalepuipua o ia.

Autu: O le Galuega e 1:8 o le auivi atoa lena o le tusi o Galuega o loo faamatalaina ai ia galuega tala’i faaaposetolo i Ieruselema, (mataupu 1–7), Iutaia ma Samaria (mataupu 8–9) ma “itu pito i mamao o le fogaelele” (matupu 10–28).



O Aposetolo na latou faataunuuna a latou talaiga ina ua mae’a ona latou “mauaina le mana mai luga” (Luka 24:49), po o se isi faaupuga o le faaeina i ai le Agaga Paia. O se saunoaga lena i Peresitene Ezra Taft Benson, a o avea o ia ma Peresitene o le Korama a le Au Aposetolo e Toasefululua:

“Afai e i ai se savali ua ou ta’u atu soo i ou uso o le To’asefululua, o le logo atu lea o le Agaga le mea taua. O le mea e taulia o le Agaga. Ua ou le mautinoa pe ua faafia ona ou faia nei upu, ma ou te le vaivai ai i le faia pea—o le mea e sili ona matua taulia o le Agaga” (tautalaga i se semina mo peresitene o misiona, 3 Aperila. 1985, *Taiala mo Faifeautalai: Aoaoga mo Faifeautalai* [1988], 73).

Galuega 1–2

Faatomuaga

Mo se perioti e fasefulu aso, na asia ai e Keriso i lona tino toetu ia Lona Au Soo ma talanoa ma i latou “i mea e faatatau i le malo o le Atua” (Galuega 1:3). O uluai mataupu o le Galuega e fesoasoani i lo tatou malamalamaaga i le malosi na oo i olaga o ta’ita’i anamua o le Ekalesia e ala mai i le misiona a Keriso ma faatinoga a le Agaga Paia. O nei mataupu ua fofolaina mai ai le tala o le talaiga o le talalelei e Aposetolo ma lo latou faatuina o le Ekalesia i Ieruselema a’o saunia e le Alii ia avefeau e tala’i i le mau tagata ua fia faalogo.

Suesue ma le agaga tatalo le Galuega 1–2 ma manatunatu i mataupu faavae nei a’o le’i saunia au lesonea.

O ni Mataupu Faavae o le Talalelei e te Sailia:

- E toatele ni tagata o le Ekalesia anamua na molimauina le Alii i le tino toetu (tagai Galuega 1;1–3; Tagai foi i le 1 Korinito 15:5–8)
- O le a folafolaina atu le talalelei i “itu uma o le lalolagi” (Galuega 1:8) e ala atu i le mana o le Agaga (tagai Galuega 1:4–8; 2:14–47; tagai foi i le Mamona 9:22; MFF 1:4).
- I le toe Afio Faalua Mai, o le a toe afio mai ai Iesu i le auala lava e tasi pei ona ia tuua le lalolagi (tagai Galuega 1:9–11; MFF 45:44–52).
- O Aposetolo o e ua faauuina e avea ma molimau i le paia ma le mamalu o Iesu Keriso. O avanoa i le Korama a le Toasefululua e faatumuina pei ona faatonu mai e le Alii (tagai Galuega 1:15–26; tagai foi i le Galuega 4:33).
- O le meaalofa o le tautala i gagana o le meaalofa a le Agaga ma e fesoasoani i galuega faafaifeautalai (tagai Galuega 2:1–12; tagai foi MFF 46:24–26).

Fautuaga mo le Aoa Atua

Filifili mai i aitia nei pe faaogaina ni au lava, a o e saunia lesonea mo le Galuega 1–2.

Galuega 1–10. I le suesueina o le olaga o le Aposetolo o Peteru, o le a tatou mautinoa ai pe faapefea ona faatonuina e le Alii ia gaoioiga a le Ekalesia e ala atu ia Peteru. (20–25 minute)

O nisi o le vasega latou te manatuina Peteru o le na faafia faatolu le Faaola, ae galo ai le tele o mea silisili na faia [e Peteru].

O fautuaga mo le aoaoina atu ua fuafuaina e fesoasoani e aveesea ai soo se mafauaiga lē lelei i le faapupulaina atu lea o le auunaga mata'utia ma le ofoofogia a Peteru i le Alii pei ona tusia i le tusi o Galuega.

Fesili i le vasega:

- O le a le mea muamua e oo mai i lou mafauaiga pe a e manatunatu ia Peteru. (Tusi tali i le laupapa)
- E faapefea i nei mea na tutupu ona aafia ai ou mafauaiga ia Peteru?

Molimau atu i le maoae o Peteru, ma uuna'ia le vasega ina ia aoao atili e uiga ia Peteru a'o faia le lesona.

Ta'u atu i le vasega talu ai ona o le oti o Iuta le Sekara, o lea sa tatau ai loa ona faatumu le avanoa ua i ai i le Korama a le Toasefululua. Faitau le Galuega 1:13-16 ma sailia po o ai na faatonutonuina le filifilia o se Aposetolo fou. Fesili: O le a se mea tatou te aoaoina mai e uiga i le tulaga o Peteru i lenei faamatalaga?

Faitau e se tasi o le vasega ia le saunoaga lenei a Elder James E. Faust:

“O se faiga malosi ua uma ona faatulagaina mai anamua e lagolagoina ai le faasologa i le pule. Ina ua uma ona faasatauroina le Faaola, o Peteru i le avea ai ma aposetolo sinia, na avea ma peresitene o le Ekalesia. Talu mai lava i le toefuataiina mai o ki o le perisitua ia Iosefa Samita, o le ala lava lea e tasi o loo mulimulita'ia i le faasologa o e na mauaina lena tofi.” (*Reach Up for the Light* [1990], 22).

Tuuina atu i le vasega le siata ua taua “O Mea Na Tutupu i le Soifuaga o Peteru” mai le faaiuga (itulau 290). Faatumuina ma faasa'o e le vasega. (O tali, 1-G, 2-O, 3-M, 4-E, 5-U, 6-N, 7-A, 8-F, 9-L, 10-I.)

Valaaulia le vasega e talanoaina ia mea ua latou aoaoina e uiga ia Peteru ua faateleina ai lo latou faatauina o ia. Faai'u i le saunoaga lenei a Neal A. Maxwell, o le na avea ma se tasi o le Korama a le Toasefululua i se taimi na mulimuli ane.

“I lalo o le aafiaga i aoaoga a Keriso, na atina'eina ai ia Peteru mai le avea ma se tagata fai faiva e avea ma peresitene o le Ekalesia. Sa i ai se vaitaimi sa le maumanatu ai o ia ma maua i le fefe ae na avea o ia o se tagata matua le fefe i se mea” (“...A More Excellent Way”; *Essays on Leadership for Latter-day Saints* [1973], 38).

Galuega 1:1-3. E toatele tagata i le Ekalesia anamua na molimauina le Alii i lona tino toetu. (20-25 minute)

Tuuina atu le siata lenei i le vasega po o le tusia fo'i i luga o le laupapa ae faaavanoaina le vaega o loo tusia ai ia “Molimau”.

O Mau	O Molimau
Mareko 16:9-10; Ioane 20:11-14	Maria le Makatala, i tafatafa o le tuugamau
Mataio 28:1, 9	O Maria le Makatala, ma Maria i se mea i le va o le tuugamau ma Ierusalem.
Mareko 16:12; Luka 24:13-15	O soo e to'alua i le auala i Emau.
Luka 24:34; 1 Korinito 15:5	Peteru i Ierusalem po o le latalata ane i ai
Luka 25:36; Ioane 20:19	O Aposetolo e Toasefulu i Ierusalem
Mareko 16:14; Ioane 20:26	O Aposetolo e toasefulutasi i Ierusalem
Ioane 21	O Aposetolo i le Sami o Tiperia, i Kalilaia.
Mataio 28:16-17	O Aposetolo i luga o se mauga i Kalilaia
1 Korinito 15:6	O le usoga e lima selau i le taimi e tasi, atonu i se mea o Kalilaia
1 Korinito 15:7	Iakopo
Mareko 16:19; Luka 24:50-51	O Aposetolo e toasefulutasi, latalata i Petania

Fai i le vasega e mafauaiga faapea o loo i ai ni a latou uo ua faafaigata ona talitunuina le Toetu mai o Iesu. Faitau e le vasega ia le Galuega 1:1-3 ma sailia po o ai na faaali i ai le Alii ina ua mavae Lona Toetu mai. Fesili: Faamata o a mea e faasino i ai le “tele o mau ua mautinoa”?

Ia faatumuina e le vasega ia avanoa i le siata. Faamalamalama atu o nei mea na tutupu e uiga i le Toetu ua matua faamalalasia le moni ona o le tele ma le aloaia o molimau. Fesili:

- E mafai faapefea ona e faaogaina nei mau e fesoasoani i au uo ina ia latou talitonu i le Toetu?
- O le a sona aafiaga ai o lau lava molimau?

Mafauaiga i le usuina po o le faitauina o le “Ua Toe Tu Mai le Alii” (*Viiga*, nu. 112). Faamanatu i le vasega o le Togiola a Iesu Keriso ua mafai ai e i tatou taitoatasi ona toetu. Fesili: O le a se eseese e mafai ona faia ai i le tulaga e te ola ai i aso taitasi ina ua e iloa o le a e toetu?

Galuega 1:4-8; 2:1-21. O le a folafola atu le talalelei “i soo se itu o le fogaelele” e ala atu i le mana o le Agaga. (25-30 minute)

Uu i luga se moli (po soo se isi lava mea e maua ai se malamalama) ma fesili i tagata e mata'ituina ona foliga. Ia ki pe faaola fo'i le moli. Fesili:

- E faapefea ona faatusaina ia le moli e le o faolaina i tagata e le o i ai le Agaga Paia?
- E faapefea ona pei tagata ua i ai le Agaga Paia o le moli ua faolaina?

Faitau faatasi ma le vasega le Galuega 1:4–8 ma fesili:

- O le a le mea sa faatali i ai ia Aposetolo ae le'i amataina le latou talaiga o le talalelei?
- Aisea ua faatonuina ai e le Alii ia Aposetolo ia faatali se'ia latou mauaina le Agaga Paia?
- Faitau le Mataupu Faavae ma Feagaiga 42:14. Aisea e le mafai ai ona tatou aoao atu pe tala'i i le ala e tatau ai se'i vagana ua mauaina muamua le Agaga Paia?

Faitau le 2 Nifae 33:1 ma tofi se tagata e faamalamalama le uiga o leni fuaiupu e tusa ai ma le talaiga o talalelei ma le mana. Ia faitauina le saunoaga a Peresitene Ezra Taft Benson i le vaega o "Autu" o le faatomuaga i le Galuega (i. 140).

Faamanatu i le vasega na faatonuina e le Faola ia Aposetolo e faatali i Ierusalem se'i vagana ua faaeeina ia i latou le Agaga Paia. Faitau Galuega 2:1–13 ma fesili:

- O a ni faamaoniga e mafai ona e mauaina i nei fuaiupu e faailoa ai na mulimuli ia Aposetolo i faatonuga a le Faola?
- E faapefea ona faamatalaina e i latou e le malamalama i le Agaga Paia le liligi mai o le Agaga Paia i le aso o le Penetekoso?

Faailoa atu o le Galuega 2:14–36 o loo i ai ia uluai faamatalaga faalaua'itele a Peteru o lea o loo i ai ni faamaumauga. Faitau e le vasega ia fuaiupu 22–24, 32. Fesili:

- O le a le mafuaaga na musuia ai e le Agaga Paia ia Peteru e folafola atu leni savali?
- Aisea ua leai ai se isi lava savali e sili atu lona taua nai lo leni savali?

Faitau e le vasega le Galuega 2:37–47 ma sailia ia upu ma fuaitau e faaalai ai sa fesoasoani le Agaga Paia i le tala'iga a le au Aposetolo. Tusia mea na latou mauaina i le laupapa. Mafaufau i le tuuina atu o fesili nei:

- O a ni mea tatou te aoaoina mai i nei mea taua na tutupu i le Ekalesia i na ona po?
- O olaga o ai na faamanuiaina i le aafiaga a le Agaga Paia.?
- O a ni auala e mafai ai ona tatou mauaina ia faamanuiaga ma le mana o le Agaga Paia i ona po nei?
- O a ni mea e mafai ona tatou faia nei ina ia tatou mauaina ai le Agaga Paia a o tatou talanoa atu i isi tagata e uiga i le Ekalesia?



Galuega 1:15–26. O Aposetolo o molimau ua uma ona faauina i le mana o Iesu Keriso. O avanoa i le Korama a le Toasefululua e faatumu e pei ona faatonuina e le Alii. (40–50 minute.)

Ia taina se kaseti vitio o se Konafesi Aoao a le Ekalesia lata mai o loo faaalai ai le lagolagoina o le Au Pulega Aoao o le

Ekalesia (po o se ata o le Au Pulega Aoao o loo i ai nei). Fesili i le vasega mo ni o latou manatu ma ni malamalamaaga i le tofia o Aposetolo fou. Faailoa atu o loo faamalamalama mai i le Feagaiga Fou le faataitaiga sa faia ai i aso anamua.

Faitau e le vasega le Galuega 1:15–20, ma fesili:

- O a avanoa na i ai i le taimi o le liliuese ma le maliu o Iuta.?
- Faitau fuaiupu 21–22. O a tulaga manaomia sa faatuina e Peteru mo se tasi e tofia e avea ma Aposetolo fou? (E manaomia se tagata sa "feoai" ma Aposetolo ma na avea ma molimau a le Alii toetu).
- Faamata e mafai e se tagata o loo soifua nei ona i ai ia mea.?

Faamalamalama atu atonu e le'i feoa'i faatasi ia Aposetolo i ona po nei ma Aposetolo i na ona po ae tofu lava i latou taitoatasi ma se molimau faapitoa. Faitau le saunoaga leni a Elder Harold B. Lee:

"I ni nai tausaga ua te'a atu, ...na o mai ai ni faifea-utalai ia te a'u ma se fesili e faafoliga mai o se fesili faigata ia i la'ua. O se faifeau Metotisi talavou sa aamu ia i la'ua ina ua la ta'u atu e tatau ona i ai aposetolo i aso nei ina ia mafai ona i ai le ekalesia moni i luga o le fogaeleele. Na la fai mai sa faapea mai le faifeau: 'E te lua iloa ina ua latou fono e filifilia se tasi e faatumuina le avanoa ina ua maliu ia Iuta, na latou fai mai e tatau o se tasi sa feoa'i ma i latou ma sa avea ma molimau i mea uma e faatatau i le misiona ma le toetu o le Alii? E faapefea ona oulua fai mai e i ai a outou aposetolo, pe a fai o le fua lena o se aposetolo?'

"Ma na faapea atu nei alii talavou: 'O le a se ma tali?' Na ou faapea atu ia i la'ua: 'Ia lua toe fo'i atu ma avatu fesili nei e lua i le lua uo faifeau. Muamua, na faapefea e le Aposetolo o Paulo ona ia mauaina ia mea e tatau ai ona valaauina o ia o se aposetolo? E le'i iloa e Paulo le Alii: e le masani lelei ai fo'i. E le'i feoa'i foi o ia ma Aposetolo. E le'i avea o ia ma se molimau i galuega a le Alii po o se molimau foi i le toetu mai o le Alii. Na faapefea ona ia mauaina lana molimau e avea ai ma aposetolo. O le fesili lona lua e te lua fesili i ai: E faapefea ona ia iloa o aposetolo o loo i ai nei latou te le'i mauaina lena molimau?'

"Ou te molimau atu ia te outou o i latou ua i ai le valaauga o le aposetolo e mafai ma ua latou iloa le moni o le misiona a le Alii" ("Born of the Spirit," Seminary and Institute faculty, Brigham Young University, 26 Iuni, 1962, 13)

Faitau e le vasega le Galuega 1:23–26 ma sailia po o ai na filifilia e avea ma Aposetolo fou. Talanoaina ia fesili nei:

- Na faapefea le tofiaina o Matatia?
- O le a le ki e tatau ona umia lea o loo faaalai mai i le fuaiupu e 24?

- Aisea e taua ai lena mea?

Ia faitauina e le vasega le saunoaga lenei a Peresitene Gordon B. Hinckley:

“O loo toe faaalua mai i se vaega taua ma le uiga ese na faatuina e le Alii e uiga i le puleaina o lana Ekalesia. Peitai o lena filifiliga e ao ina lagolagoina—o lona uiga, ia taliaina ma faamaonia—e tagata o le Ekalesia. Ua tulaga ese lava lenei lona taualumaga i le ekalesia a le Alii. Ua le i ai se sailiili mo se tofi, leai se tauva mo ni tulaga, leai ni kemupeni e faasalalau atu ai uiga o se tagata. . . . I lalo o le fuafuaga a le Alii, o i latou ua i ai le tiute e filifilia tofiga, ua pulea i le fesili autu e tasi e faapea, ‘O ai ua finagalo i ai le Alii?’ E to’ā le tai ma e i ai le faautautaga. Ma e i ai foi le tele o talosaga ina ia maua ai le faamaoniga a le Agaga Paia ua sa’o le filifiliga” (Lipoti o le Konafesi, Ape. 1994, 73; po o le *Liahona*, Iulai 1994, 71).

Fesili: O le a le mea pito i taua lava e tatau o na mata’ituina i le filifiliga ma le faauuina o se Aposetolo fou? Faitau le Mataupu Faavae ma Feagaiga 107:23 ma ta’u atu i le vasega o Aposetolo i ona po nei ma aso anamua o molimau faapitoa a Iesu Keriso.

Aumai i le vasega ni kopi se tele o le mekasini o le *Liahona*. Vaevae le vasega i ni vaega laiti ma tuuina atu i ai ia kopi ta’itasi o le *Liahona*. Fai i le vasega e su’e ia saunoaga a le Usoga ma saili ia molimau mo Iesu Keriso. A mae’a ni ni minute ona fetufaa’i lea o o latou manatu. Fesili: O le a le tatou matafaioi i le taliaina o Aposetolo?

Galuega 3–5

Faatomuaga

I le Galuega 3–5, o loo faaalua le faatonutonuina e Aposetolo o gaoioiga a le Ekalesia i Ierusalem i lalo o le musumusuga a le Agaga Paia. O Peteru o le Aposetolo sinia faatasi ai ma Ioane na faamaloloina e mama’i ma pipili, talai le talalelei, ma sa faafeagai ma le lē fefe ma ta’ita’i faalelotu a sa lutaia, faia faailoga ma mea ofoofogia i luma o tagata ma molimau atu i le paia ma le mamalu o Iesu Keriso. O se saunoaga lenei a Elder Spencer W. Kimball a o avea ma uso o le Korama a le Toasefululua, e faamatala ai Peteru, “o lenei peresitene maoae o le ekalesia,” o se tagata e “mata’utia lona faatuatua, e lē solomuli lana taitaiga, e lē maluelue lana molimau, e lē mafaatusatusaina lona lototele, ma e leai se tuaoi o lona malamalama” (*Peter, My Brother*, Brigham Young University Speeches of the Year [13 Iulai 1971]).

Suesue ma le agaga tatalo le Galuega 3–5 ma mafaufau i mataupu faavae nei a’o le’i saunia au lesona.

O Nisi Mataupu Faavae Taua o le Talalelei e Saili Iai

- O faamalologa e auala mai i le faatuatua ma le pule o le perisitua (tagai Galuega 3:1–16; tagai foi Iakopo 5:14–15; Alema 15:8).
- O faifeautalai e faamanuiaina e tatau ona malolosi, e le fefefe ma e loto totoa a o fetai’i ma le fili (tagai Galuega 4:13–21, 31; 5:17–33, 40–42).
- O le matafaioi a le Au Paia o le vaai lea o isi tagata (tagai Galuega 4:32–37; tagai foi Galuega 2:44–45; Mosaea 18:8, 21; 4 Nifae 1:2–3; Mose 7:18).
- O le pepelo i taitai o le Ekalesia e tutusa ma le pepelo i le Alii (tagai Galuega 5:1–11; tagai foi Iakopo 7:9–19).
- E oo mai lava le taimi e manumalo ai le mea moni i le sese (tagai Galuega 5:34–39; tagai foi Tanielu 2:34–35).

Fautuaga mo le Aoao Atu

Filifili mai i aitia nei pe faaogaina ni au lava, a o saunia lesona mo le Galuega 3–5.

Galuega 3:1–16. O faamalologa e ala mai i le faatuatua ma le mana o le perisitua. (25–30 minute)

Ia faia se faatusa o se siaki e miliona tala. Faaali atu le “siaki” i le vasega ma fesili:

- O le a le mea e sili atu ona e manaomia, o le siaki e miliona tala po o le pupula o ou mata? Aisea?
- E sili atu ia te oe le mauaina o le siaki e miliona tala po o lou savali? Aisea?
- Faitau le Galuega 3:1–11. O le a le mea na ofoina atu e Peteru i le tagata pipili e sili atu lona taua nai lo le tupe?
- Faitau ia fuaiupu 12–16. O le a le mea e mafai ai ona faataunuuna ia faamalologa faapenei?

Talanoaina ma le vasega ia ni mea na tutupu e uiga i faamalologa na ala mai i le faatuatua ma le mana o le perisitua, po o le fesili i le vasega pe i ai ni a latou lava faamatalaga e uiga i faamalologa e ala mai i le faatuatua ma le mana o le perisitua.

Faamatala o faamalologa faapenei o ni ituaiga faamalologa faaleagaga. E le gata i le faamaloloina o i tatou e le Alii mai o tatou ma’i faaletino ma tulaga lē atoatoa o le tino, ae Na te mafai ona ia ofoina mai faamagaloga ma le malosia e mafai ai ona tatou faato’ilaloina o tatou vaivaiga ma faafitauli o le olaga. Toe faitau le Galuega 3:2–8, ma fai fesili e pei o nei:

- O ai o loo umia le tofiga o Peteru i le Ekalesia i ona po nei?
- A tatou faatusaina ia le faamalologa e Peteru o le tagata pipili i le faamalologa faaleagaga, o ai tatou te faatusa i ai le tagata pipili?
- O le a le uiga o le upu “pulatoa” i le fuaiupu e 4?

E faapefea e perofeta i o tatou taimi ona “pulatoa” i le autalavou? (O se tasi o faaitaiga o le tamaitusi o le *Mo le Malosi o le Au Talavou*.)

- O le a le uiga o le upu *naunau mai* i le fuaiupu e 5? (Sa ua’i atu le tagata ia Peteru ma Ioane.)
- E faapefea ona faaogaina lena i faamalologa faaleagaga? (E tatau ona tatou faalogo ma usiusita’i i perofeta o loo i ai nei ma i si ta’ita’i o le perisitua.)
- O le a se mea e mafai ona tatou aoao mai le tago atu o Peteru i le lima o le tagata ma faatu i luga?

Faitau e le vasega le saunoaga lena a Perisitene Harold B. Lee:

“Ua ou vaai nei faalemafaufau i se mea sa i le mafauafau o le tagata [pipili]. ‘Pe e le’i iloa ea e lena tagata o a’u ou te le’i savali lava? O lea ua ia faatonuina a’u ou te savali.’ Ma e le’i faamuta ai iina ia faamaumauga a le tusi paia. E le’i lava ia Peteru le na’o le faatonu o le tagata e savali ae na ‘tago atu i lona lima taumatau ma faatu ia te ia i luga.’ (Galuega 3:7.)

“Ua e mafai ona e iloina le ata o le na agaga lelei, le ta’ita’i sili o aposetolo ma ona aao i luga o tauau o lena tagata ma faapea atu, ‘O lena, le tagata lelei e, ia loto tele, o le a ou savali faatasi ma oe. Ia ta savavali faatasi, ona mafai ai lea ona e savali aua ua e mauaina faamanuiaga mai le pule a le Atua ua tuuina mai ia i matou, o ana auauna.’ Ona oso ai lea o le gagata ma le olioli.

“E le mafai ona e sii a’e se isi agaga se’i vagana ua e tu i se mea e maualuga a’e i lo o le mea o loo i ai o ia. E tatau ona e mautinoa pe afai o le a e lavea’iina le tagata, o loo e faia se faaitaiga i le mea e tatau ona ia faia. E le mafai ona e tutuina se afi i se agaga o se isi se’i vagana o loo mumu se afi i lou lava agaga. (Lipoti Konafesi. *Aperila*, 1973, 178; poo le *Liahona Mati* 1973, 123).



Galuega 4:32–37. E i ai le tiutetauave a le Au Paia mo le tulaga solo o tagata taitoatasi. (25–30 minute)

Amataina le vasega i le tuuina atu o fesili i le vasega e uiga i mataupu muamua e lua o le Galuega (ia e vave saunia ni fesili se sefululima i le luasefulu ae le’i amataina le vasega). Ia tuuina atu ni tau i pei o lole mo tali ua sa’o. Faaauau pea seia mauaina e nisi ia ni tau se tele ae mauaina e nisi ni tau laiti pe o le leai fo’i. Fesili:

- Pe tatou te fuaina ea le tatou tamaoiga e faatatau i oa faalelalolagi ua tatou maua pe o le sili atu o mea ua tatou mauaina nai lo isi?
- E faapefea ona uuna’ia e le lalolagi lena ituaiga amioga?

Faitau e le vasega le Galuega 2:44–45; 4:32–37, ma fesili: O a mea a tagata o le Ekalesia sa latou faia i a latou oa faalelalolagi i le vaitaimi o Peteru? Faitau le Mataupu Faavae ma Feagaiga 78:5–6.

- O le a le taua o le fesoasoania’i o le Au Paia o Aso e Gata Ai ia latou mea faaletino?
- O le a le uiga o le “ua tuu tele a latou mea uma lava”?
- O le a le ta’uga o lena tulafono i ona po nei? (O le tulafono o le faapaiaga.)
- O a mea tatou te faia e fesoasoani ai i isi i mea faaletino? (O tali e aafia ai le totogiina o le sefulua’i ma taulaga, auai i gaoioiga fesoasoani, su’eina o galuega, tuuina atu po o le fesoasoani i galuega alofa)

Faatepa i tau i tufa i le amataga o le vasega. Fesili i le vasega: Tou te mananao e tuu faatasi uma a outou tau ma faasoasoa ina ia tutusa lelei? Aisea e lelei ai ae aisea foi e leai ai? Talanoaina ia mataupu e laga. Faitau le saunoaga lena a Perisitene Ezra Taft Benson:

“O mea uma ua tatou mauaina o mea ia a le Atua; ma e tatau i le Alii ona valaau mai ia te i tatou mo soo se mea ma a tatou meatotino uma, aua o Ana mea. . . .

“...O le tulafono o le faapaiaga o le tulafono mo le mauaina o le malo selesitila. O le Atua le Tama e Faavavau, o lona Alo o Iesu Keriso, ma e paia latou te tausia lena tulafono. O le tulafono e faavavau. O le faaaliga mai le Atua i lana Ekalesia i tisipenisione lena. E ui ina e le’i faataunuuna i lona atoatoaga i ona po nei, e tatau i le Au Paia uma ona ola ai i lona atoatoa ina ia maua ai le tofi faaselesitila. O outou le autalavou i ona po nei o loo o outou tausia se vaega o lena tulafono maualuga i le totogiina lea o le sefulua’i, taulaga anapogi, faia o misiona, ma faia saofaga o tupe, auauna atu, ma taimi” (A Vision and a Hope for the Youth of Zion,” i le *1977 Devotional Speeches of the Year* [1978], 74–75)

- O a polokalama o loo i ai nei a le Ekalesia o loo faaaliga ai mataupu faavae o le faapaiaga?

E faapefea i le polokalama a le uelefea a le Ekalesia ona tatou maua ai se avanoa tatou te tausia ai le tulafono o le faapaiaga?

Ia taitoatasi ona mafauafau ia le vasega i se tagata e mafai ona latou fesoasoani taitoatasi i ai e ala atu i galuega ma ta’u mai ni fuafuaga mo le ofaina atu o lena fesoasoani.

Galuega 5:1–11. O le pepelo i ta’ita’i o le Ekalesia o le pepelo fo’i lea i le Alii. (10–15 minute)

Ia faitau feauaua’i e le vasega le Galuega 5:1–11. Fesili: O a ni lesonea tatou te aooina mai i lena tala? (E le mafai ona tatou pepelo i le Atua: O taunuuga o le pepelo atonu o le a vave

maua; e tatou te toe malaia lava i a tatou gaoioiga) Faitau e le vasega ia le saunoaga lenei a Peresitene Gordon B. Hinckley:

“I le tatou taimi, o i latou e le faamaoni o le a lē oti e pei o Anania ma Safaira ae o le a oti se mea o i totonu ia i latou. O le a mafaufau pea i ai, o le a le lelei le faalogona, ua leai se faaaloalo ia te ia lava ma ua oti fo’i ma le faamaoni” (Lipoti Konafesi, Ape. 1976, 91; po o le *Liahona*, Iulai 1976, 61).

Fesili: E tusa ai ma lenei saunoaga a Peresitene Gordon B. Hinckley, o a ni taunuuga o le pepelo? Ia fetufaa’i ni faamatalaga i ni tagata ua iloa e le vasega sa aoaoina le taua o le faamaoni atoatoa i le Alii, taitai o le Ekalesia, ma i si.

Galuega 5:34–39. E oo mai le taimi e manumalo ai le mea moni i le mea sese. (10–15 minute)

Tufa atu i le vasega ia ni nusipepa pe o ni mekasini fou pe lata mai. Ia matamata i ai ma mata’ituina le tele o le agasala ma le sese o loo i le lalolagi. Fesili: O le a sou mafaufau o le a se faalogona a tagata e uiga i le olaga nei pe afai e talitonu o le tulaga lava lea o le a i ai le lalolagi?

Faitau e le vasega le Galuega 5:34–39, ma fesili:

- O le a le talitonuga o Kamalielu i le tauvaga i le va o le moni ma le mea sese?
- E mafai faapefea i lenei malamalamaaga ona fesoasoani ia i tatou e maua ai se faamoemoe i se lalolagi ua tumu i le agasala ma sese?

Na aoao mai e Peresitene Hugh B. Brown:

“E mafai ona e faamaonia o le a i’u ina manumalo le amiotonu. O le a manumalo lava le mea moni. Ua faatulagaina ma ua faatuina le Ekalesia. O le malo o le Atua e le toe faato’ilaloina” (in Conference Report. Oct. 1961, 87)

Galuega 6–7

Faatomuaga

A o faatupulaia pea ia tagata o le Ekalesia, na valaauina e Aposetolo ia se to’a fitu e fesoasoani ia i latou ma pulea ia mana’oga faaletino o le Au Paia i Ierusalem. O Setefano o se tasi o le to’afitu lea, e “tumu i le faatuatua ma le mana” ma o se na faia ia ni mea mata’utia ma ni vavega i luma o tagata” (Galuega 6:8). O nisi o Iutaia sa latou tuuaia Setefano i le aoaoina fai mai o Keriso “o le suia ia aganu na tuuina mai

e Mose ia i latou” (fuaiupu 14). Sa teena e Setefano i luma o le au fononua i lona faamanatuina atu lea ia te i latou o le perofeta moni sa le taliaina lava e Isaraelu. Na ia molimau atu “pei o outou tama, ua faapea fo’i outou” (Galuega 7:51) ma faapea atu ua latou teena le Alo o le Atua. Na vaai Setefano i se faaaliga ma sa ia molimau atu na ia i le Atua le Tama ma Iesu i lona itu tamataua. Sa itagia ia Setefano ma tu’imaaina e tagata, ma avea ai o ia ma tagata muamua o le Ekalesia ua maliu faamaturu.

A o e faitauina ia le Galuega 6–7 ia mata’ituina ia uiga o ta’ita’i anamua o le Ekalesia na agavaa ai i latou e tala’iina le talalelei. Ia mata’ituina ia le faaaogaina e Setefano o le tala faasolopito o Isaraelu e aoaoina ai i ta’ita’i Iutaia e uiga ia Iesu Keriso.

Ia suesue ma le agaga tatalo, le Galuega 6–7 ma mafaufau i mataupu faavae nei a’o le’i saunia au lesonea.

O Nisi Mataupu Faavae Taua o le Talalelei e Saili Iai

- O ta’ita’i o le Ekalesia e faaaogaina le mataupu faavae o le tufatufaina atu ina ia mauaina ai ia manaoga o tagata ma faataunuaina ai ia le galuega a le Alii (tagai Galuega 6:1–7; MFF 107:23, 33–35).
- O tagata e auauna atu i le Ekalesia e tatau ona faamaoni, maua i le ola faaleagaga, ma aoaoina (tagai Galuega 6:3; MFF 4:5–6)
- O e faamaoni e maua le fiafia i faamanuiaga a le Atua i le olaga faaletino faapea le oti (tagai Galuega 6:5–7: 60).
- O i latou o e amiotonu sa sauaina i talafaasolopito, ae e maua faamanuiaga e i latou o e tumau (tagai Galuega 6:9–15; 7:22–36, 51–60).
- O e e fiafia i le agasala e faafaigata ia i latou le mea moni (tagai Galuega 7:54; 1 Nifae 16:1–2).

Fautuaga mo le Aoao Atu

Filifili mai i aitia nei pe faaaogaina ni au lava, a o e saunia lesonea mo le Galuega 6–7.

Galuega 6–12. E taitaiina e le Tama Faalelagi Lana galuega e ala atu i Ana Aposetolo. (30–35 minute)

Vaai se tagata (po o se matua po o se taitai o le perisitua) e sau i le amataga o le vasega ma faia se faaaliga e uiga i se gaoioiga o le a faia i se taimi o i luma. Ia ta’uina atu e le tagata le aso, taimi, le mea e faataunu ai ma isi lava mea e mana’omia. A mae’a ona aumai lea o se isi tagata ma faia lava le faaaliga lea e tasi ae sui ia isi mea pei o le aso, taimi, le mea e faia ai ma isi mea e mana’omia. A mae’a fo’i lea, ona aumaia fo’i lea o se isi tagata lona tolu e faia lava le faaaliga lea e tasi ma ia iai ni suiga mai i faaaliga muamua e lua.

Fesili: O fea le faaaliga o le a e talitonu i ai? Aisea? Ta'u i le vasega o le faaaliga muamua e sa'o. Fesili:

- E faapefea i tulaga faapea ona le maua ai se tonu e tasi?
- A tuu mai i le talalelei, o ai e sili ona fautuaina i tatou?
- E mafai faapefea ona aafia i tatou i le faalogo atu i isi tagata?

Talanoaina faafitauli e maua i le faalogo i savali sese.

I le Galuega 6–12 ua tatou vaaia ai le faatonutonuina e le Alii o Peteru, le Peresitene o le Ekalesia, ina ia ave le talalelei i nuu ese, se suiga e le'i iloaia e le toatele o le Au Paia. Faamatala o suiga faapea e tatau ona ui mai i le perofeta soifua, ma e tatau i tagata o le Ekalesia ona i ai le faatuatuaga i upu a le perofeta.

Vaevae le vasega i ni vaega se tolu ma tuuina atu e aoaoina e le isi vaega le Galuega e 6, o le isi le 10 a o le isi o le 11 ma sailia ni faatonuga na tuuina atu e le Alii i le Au Paia e ala i Ana Aposetolo. Ia latou lipoti maia mea latou te mauaina. (E mafai ona aofia ai le tofiaina o alii e toafitu e tausia fafine ua oti a latou tane, o le faaaliga ia Peteru ina ave le talalelei i Nuu Ese, ma lona toe faamatalaina o lona faaaliga i le Ekalesia.)

Ia faamautinoa atu i le vasega o loo fetalai mai pea le Alii i Lana Ekalesia i ona po nei e ala mai i Ana perofeta ma aposetolo, ma e mafai ona tatou faalagolago i a latou upu. Ia talanoaina se vaega o se tautalaga e te fiafia i ai mai se Konafesi. Uuna'ia le vasega e aoa o se *Liahona* o se Konafesi lata mai ma mata'ituina ia mea o loo fai mai ai ia perofeta ma aposetolo ia i latou.

Tuuina atu i le vasega ni kopi o le saunoaga lenei ma faitauina faatasi.

Na saunoa mai ia Peresitene Harold B. Lee:

“A e mana’o e te iloa le mea e finagalo le Alii e iloa e le Au Paia ma mauaina lana taitaiga ma faatonuga mo le isi ono masina, ia e mauaina se kopi o le tualumaga o lenei Konafesi ona ia te oe lea o le upu aupito lata mai a le Alii mo le Au Paia” (Conference Report, Oke. 1973, 168; *Ensign*, Ianuari 1974, 128).

Na saunoa mai Peresitene Ezra Taft Benson:

“Mo le isi ono masina, o le *Liahona* mo Konafesi e tatau ona tuu faatasi ma isi tusitusiga faavae e fa ma ia faaogaina soo. E pei ona fai mai ai la'u uo ma le uso o Harold B. Lee, e tatau ona tatou faaogaina ia saunoaga i Konafesi e 'ta'itaia ai le tatou savali ma upu i le isi ono masina. O ni mea taua na ua finagalo le Alii e faaali mai i tagata i ona po nei' (Conference Report, Ape. 1946, 68)” (Lipoti Konafesi, Ape. 1988, 97; po o le *Liahona*, Iulai 1988, 84).

Galuega 6:1–6. E manaomia e taitai o le Ekalesia ia tagata agavaa o le Ekalesia e fesoasoani atu i manaoga o isi. (15–20 minute)

Tofi se tagata o le vasega e uuina i luga ni mea mo oe. Tuu i ai ni mea e pei o se penitala, o se tusi, o se teipi, o se seleulu, ma isi mea seia pa'u se mea i le tagata pe tuu foi i lalo e ia.

Faaali atu i le vasega se ata o se perofeta o loo soifua mai nei po o se Aposetolo. Talanoaina le mata'utia o matafaioi o loo tauaveina e nei ta'ita'i o le Ekalesia. Fesili:

- O ai e tali i ai ia le Au Pulega Aoao o le Ekalesia?
- Faamata o le a le mea o le a tupu pe afai latou te le amanaiaina o latou valaauga?
- E fesootai faapefea lenei mea ma le autu o le lesona?

Faitau le Galuega 6:1–6 ma mata'ituina ia faafitauli sa feagai ma ta'ita'i o le Ekalesia anamua.

- Sa faapefea ona foia e ta'ita'i o le Ekalesia ia faafitauli?
- O ai na valaauina e fesoasoani atu i Aposetolo mo le vaaia o fafine ua oti a latou tane? (Ia sue e le vasega ia igoa o alii e toafitu ma tusi i luga o le laupapa.)

Faitau e se tagata o le vasega ia le saunoaga lenei a Elder Bruce R. McConkie:

“O le galuega na tuuina atu ia i latou e pau i le vaega o mataupu faaletino e masani ona faataunuuina e le Perisitua Arona, ae avanoa ia aposetolo e feagai ma mea faigata o o latou tiute faa-Mekisateko” (*Doctrinal New Testament Commentary*, 2:65)

Fesili:

- O a ni lu'i faapea o loo feagai ma i tatou i ona po nei?
- E faapefea e le au Perisitua Arona ona tausia ia fafine ua oti a latou tane?
- E faapefea ona faamamaina ia le avega a ta'ita'i o le Ekalesia pe afai e faia ma le faatuatua ia galuega a i latou e umia le Perisitua Arona.

Tofi se tagata o le vasega e faitau le Galuega 6:3 ma fesili:

- O a uiga sa mana'omia e Aposetolo i le sailia o alii e to'afitu?
- E faapefea i nei uiga ona fesoasoani i le faaagavaaina o i tatou e auauna atu i le Ekalesia i ona po nei?

Faitau le Galuega 6:7–8 ma saili ni faamaoniga o nei valaauga sa musuia. Fesili: O a ni auala e mafai ai ona faamanuiaina e e umia le perisitua ia fafine ua oti a latou tane ma le Ekalesia atoa.

Galuega 6:5–7:60. O e faatuatua e olioli i faamanuiaga a le Atua i le olaga nei faapea ma le oti. (20–25 minute)

Fai i le vasega e manatu faapea ua lapataia mai i latou o le a oti. Fesili: Afai o le a e tusia lava e oe se molimau mo oe lava i lou falelauasiga, mata o a mea o le a e tusia? Mo se fesoasoani i la outou talanoaga, fai ni fesili faapea:

- E faapefea ona e mana’o ia manatua pea oe?
- E manatua faapefea oe i lou ola i le talalelei ma le faamaoni?

Faitau e le vasega le Galuega 6:5–8 ma mata’ituina pe faapefea lenei tagata o Setefano. Fesili: Faamata o se a sou manatu ia Setefano pe ana faapea ua e vaai i mea mata’utia ma le ofoofogia ma vavega na ia faia.

Faitau e le vasega le Galuega 6:9–15. Fesili:

- O le a le mea sa le fiafia ai nisi i galuega a Setefano?
- O a ni faamaoniga e mafai ona e tuu maia sa faamanuia e le Atua ia Setefano a’o faataunuuna lana misiona faigata?
- O le a le mea na faia e tagata e molia ai ia Setefano ma avatu o ia i luma o le fono a le au fautua?

O le Galuega e 7 o se faamatalaga a Setefano lava ia sa faia i luma o ta’ita’i Iutaia e tetee ai i moliaga faasaga ia te ia. Ia faailoa atu i le vasega sa ta’u atu e Setefano ia se vaega o tala-faasolopito o Isaraelu, e faaalua ai le teena e Isaraelu o Mose ma perofeta. Faitau e le vasega le Galuega 7:51–53, ma fesili: O a tuuai’iga e tolu na faia e Setefano e faasaga i taitai o Iutaia? (Ua latou loto maaa ma teena le musumusuga a le Agaga Paia; sa latou teena ma fasiotia Lē Amiotonu, o Iesu Keriso; sa latou mauaina le tulafono a Mose ae latou te le’i ola ai.)

Faitau e le vasega ia le Galuega 7:54–60, ma fesili:

- O le a le tali a ta’ita’i o Iutaia i nei tuuai’iga?
- Sa faapefea ona lagolagoina e le Atua ia Setefano a’o tuuina atu lana molimau?
- O le a le mea o loo ta’uina mai i lenei faaaliga e uiga i le agavaa o Setefano?
- O a ni faailoga e mafai ona e tuuina mai e iloa ai na tumau Setefano i le faatuatua se’ia oo i le iuga?
- A faapea o le a e tusia se molimau i le maliu o Setefano, o a upu o le a e faaagaina?



Galuega 7:55–56 (Mau Tauloto). O le Aigaatua e to’atolu tagata mavaevae.

(10–15 minute)


Fesili: E faapefea e tagata o le lalolagi ona faamatalaina ia le Aigaatua? Faitau e le vasega le saunoaga lenei a Elder Dalin H. Oaks:

“E toatele ia Kerisiano e teena ia le manatu e faitino le Atua atoa ai ma le avea o le Aigaatua o ni tagata mavaevae. Latou te talitonu o le Atua o se agaga ma o le Aigaatua e na’o le tasi le Atua. O manatu nei o faailoga ia o le pau ese atu ua ta’ua o le Liliuese Tele.

“Tatou te mautinoa o manatu ua faaali mai e nei faaupuga e leai so latou autu faaleagaga e pei o ‘le Atua o se mea lilo’ ma ‘le mealilo o le Tolutasi Paia’ e mafua mai i manatu ma filosofia Faaeleni. O nei manatu faafilosofia na suia ai ia le faakerisiano i seneturi muamua ona ua mavae le malilili o Aposetolo.....

“O le taunuuga o le faatumauina lea e nisi o talitonuga faavae o faa-Kerisiano, lea e ta’u mai ai se Aigaatua e toatasi le tagata, ma o lea tagata po o le Atua ‘e leai sona tino, poo o ni itu tino po o ni lagona.’ (Liahona, Iulai 1995, 84–85).

Faitau le Galuega 7:55–56. Tusi se ata i luga o le laupapa pei o lenei ata:



Faitau faatasi ma le vasega le Mataupu Faavae ma Feagaiga 130:22 ma faamalamalama o le Au Paia o Aso e Gata ai e talitonu o le Aigaatua e tolu lava ma le tino. Tuuina atu i le vasega ni nai minute e su’eina ai ni mau e ta’u mai ai o le Tama, le Alo ma Agaga Paia o ni tagata mavaevae se tolu (tagai i aoaoga ma fautuaga a Mataio 3:16–17, itulau. 24). Fesili:

- O le a sou lagona i lou iloa e mafai ona tatou tatalo i lo tatou Tama i le Lagi, o i tatou o lana fanau, ma e faafofoga mai ma tali mai i tatalo?
- E fesoasoani faapefea lo tatou iloa o Iesu o se tagata tatou te mulimuli ai i Ana faaitaiga?
- Aisea e toatele ai matua e tautia tautia ni tala faamaumau po o ni tusitusiga i a latou fanau? (O se tasi tali ona e alolofa ia latou fanau ma mananao ia iloa e fanau i latou.)
- Aisea e te manatu ai ua faaalua mai e le Tama Lona natura i Lana fanau? (tagai Ioane 17:3).

Faitau e se tagata o le vasega le saunoaga lenei a Elder Dalin H. Oaks:

“Faatasi ai ma le tele o isi Kerisiano, tatou te talitonu i le Aigaatua o le Tama, le Alo ma le Agaga Paia. Ae peita’i tatou te molimau atu o nei tagata e to’atolu o le Aigaatua o ni tagata mavaevae se to’atolu. Tatou te molimau atu fo’i o le Atua le Tama e le o se agaga ae o ia o se tagata ua faapaiaina e i ai sona tino, e pei o lona Alo toetu o Iesu Keriso” *Liahona*, Iulai 1995, 84).

Galuega 8–9

Faatomuaga

I le Galuega 8–9 ua tatou iloa ai le amataga o le misiona a Ekalesia Kerisiano anamua. I tua atu o le taimi lea sa tala’ia ai le talalelei e faifeau i le tagata Iutaia i Ierusalema ma Iutaia. O Filipino o se tasi o alii na filifilia e fesoasoani i Aposetolo sa tala’i i tagata e le o ni Isaraelu moni i Samaria ma Kasa (tagai i le *Taiala i Tusitusiga Paia* faafanua 4). A o e aoaoina le mataupu e 8, saili ia uluai mataupu faavae ma sauniga o le talalelei sa aoaoina ma faaaogaina.

O mataupu fo’i nei o loo faamatala mai ai ia le liliu o Saulo, o se tasi o misionare ta’utaua ua soifua mai. O Saulo o le na fai e le Alii e “tauaveina lo’u igoa i Nuuese, ma tupu ma le fanauga a Isaraelu” (Galuega 9:15), o le tagata lava e tasi lea na toe faaigoaina o Paulo o le na tusia le tele o tusi i le Feagaiga Fou. Ia mata’ituina lona suiga e uiga i le sauaina o le Au Paia ina ua liua o ia, ma lona malosi i le folafolaina atu o le talalelei a Iesu Keriso.

Suesue ma le agaga tatalo le Galuega 8–9 ma manatunatu i mataupu faavae nei a e le’i saunia au lesonea.

O Nisi Mataupu Faavae Tava o le Talalelei e Saili Iai

- E faatagaina e le Alii ia Ona tagata ina ia tofotofoina mo le faataunuuina o Ana fuafuaga (tagai Galuega 8:1–4)
- E faatonutonuina e le Alii ia galuega a le Ekalesia (tagai Galuega 8:5–40)
- O loo i ai ni galuega mo i tatou taitoatasi mai le Atua mo Lona malo (tagai Galuega 9:1–22).
- O le mulimuli ia Keriso e mana’omia ai le faia o taulaga (tagai Galuega 9–16; 2 Korinito 11:23–33).
- O Alii e umia ma le agavaa le perisitua a le Atua e vaeluaina i ai le mana o Iesu Keriso (tagai Galuega 9:32–43).

Fautuaga mo le Aoao Atu

Filifili mai i aitia nei, pe faaaogaina ni au lava, a o e saunia lesonea mo le Galuega 8–9.

Galuega 8:1–4. E faatagaina e le Alii le tofotofoina o Ona tagata e faataunuu ai Ona faamoemoega. (30–35 minute)

Tago e fusi se tasi o ou lima ona e sau lea i le vasega. Fesili i le vasega e mafaufau i ni mafatiaga ua aafia ai i se manu’a tiga ma ua le mafai ai ona faaaogaina lona lima mo ni vaiaso. Fesili:

- O a ni mafatiaga matuia o le a oo i ai ona o lenei manu’a?
- O le a se mea lelei o le a maua mai ai? (O ni tali talafeagai ai, o le aoaoina lea e tusitusi i le isi lima, mauaina lea o se lagona mo i latou o e o loo mafatia i le tino, o le feiloai atu lea i se foma’i poo se tausima’i e fia malamalama i le talalelei.)

Faitau e se tagata o le vasega ia le Galuega e 8:1–4 ma mata’ituina ia tofotofoga na faafeagai ma tagata o le Ekalesia. Fesili: O le a se lelei na oo i ai ona o nei tulaga faigata? (O i latou na faataapeapeina i nuu mamao na latou talalaiina le talalelei i nuu na oo atu i ai.)

Faamalamalama atu o Filipino o se tasi na talaiina le talalelei ina ua faataapeapeina i latou mai i Ierusalema. Faitau faatopetope e le vasega le Galuega e 8:5–13, 26–40 ma saili ni faailoga i le alualu i luma o le galuega a Filipino. Faitau le Galuega 1:8 ma fesili: E faapefea i lenei faataapeapega ona faataunuuina e le Ekalesia ia le tulafono na tuuina mai e le Alii toetu?

Faamatala atu ni tofotofoga po o ni mea faigata na tupu ia te oe ae faaiu ane ua avea ma faamanuiaga. (Pe faaaogaina se faaitaitaiga mai tusitusiga paia e pei o Nifae ma lana āū lea na gau le 1 Nifae 16:18–32.) Uuna’ia le vasega ina ia aua le loto vaivai pe a tutupu ni mea leaga ia i latou ae mata’ituina mea lelei e mafai ona maua mai i ia mea na tutupu. Fesili pe i ai nisi o le vasega e i ai ni mea faapea na tutupu ia i latou ma faamatala i le vasega.

Galuega 9:1–22. E tofu tatou taitoatasi ma galuega na tuuina mai e le Alii tatou te galulue ai i Lona malo. (20–25 minute)

Ta’u atu i le vasega e manatunatu mo ni nai minute faapea o le a sau se tagata i le vasega, ma na te mafai ona tali soo se fesili lava e uiga i le Ekalesia, peitai, e na o le lua lava fesili e mafai ona latou fesili ai. Talanoa pe o a fesili o le a latou fesili ai.

Faitau e le vasega le Galuega 9:1–6 ma saili ia fesili na fesili atu ai Saulo i le Alii ina ua faaali atu le Alii ia te ia.

- O le a le taua tele o fesili a Paulo ia te ia lava?
- O le a le taua tele o nei fesili mo i tatou?

Faamanino atu e tatau ona tofu maua e i tatou taitoatasi se molimau ia Iesu Keriso mo i tatou lava. E tusa ai ma le fesili lona lua a Paulo, faitau le saunoaga lenei a Perisitene Ezra Taft Benson, a o avea o ia ma Perisitene o le Korama a le Au Aposetolo e Toasefululua:

“E leai lava se isi fesili taua e tatau ona fesili ai pea lava pea se tasi nai lo le fesili na fesili ai ia Paulo: ‘Le Alii e, se a le mea e te finagalo i ai ou te faia?’ [Galuega 9:6.] Ma e leai se isi tali e sili atu nai lo le tali na ia mauaina: ia alu i e ua faatagaina e le Alii e aumai ai faatonuga” (*God, Family, Country; Our Three Great Loyalties* [1974], 162).

Fesili: O le a le mea e tatau ona e faia ina ua e mauaina se tali mai le Alii? Faitau Galuega 9:7–22, ma mafaufau e fesili atu i fesili nei:

- O le a le mea na oo ia Paulo ona o lenei faaaliga?
- O le a se faailoga o loo i ai na usita’i ia Saulo i le tali na ia mauaina?
- O le a le mea na ta’u atu e le Alii ia Anania e uiga ia Saulo na saunia ai o ia e fetai’i ma lenei tagata sa faasaua i le Ekalesia?
- Na faapefea ona faamanuiaina Saulo ina ua ia usita’i ma faalogo i le tali i le fesili a le Alii?
- O a ni faamanuiaga tatou te mauaina pe afai tatou te faia le mea na faia e Saulo?

Fesili i le vasega:

- E faapefea ona tali mai le Alii ia tatou fesili i ona po nei? (O ni tali e aofia ai ni mau, o le Agaga Paia, tatalo, matua, ta’ita’i o le perisitua, faamanuiaga faapeteriaka.)
- O le a le mea o le a tupu pe afai o le a tatou teena ia tali na tuuina mai e le Alii ia i tatou?
- O le a le taua tele o le tausia o tulafono a o tatou naunau e su’eina le mea o loo finagalo ai le Alii tatou te faia?

Galuega 9:16. O Soo o Keriso e tatau ona latou naunau e ositaulaga. (15–20 minute)

Faaii i le vasega ni ata se lua po o se tolu o ni tagata ua latou faia ni mea taua mo le nuu (e pei o se foma’i, se tina, se faiaoga). Mo ata ta’itasi, fesili: O a ni taulaga na faia e nei tagata e avea ai i latou ma ni tagata alualu i luma? Fesili: E faapefea ona faamanuiaina isi i a latou taulaga?

Faitau le Galuega 9:16 ma le 2 Korinito 11:23–28 ma mata’ituina po o a mea na oo ia Saulo (Paulo) ona o le galuega a Keriso. Ta’u atu i le vasega o le mulimuli ia Keriso e mana’omia ai lo tatou ositaulaga i mea uma ma o soo o le tele o taimi e valaauina ai ia onosa’ia mea e tele. Fesili: Aisea na faia ai e Paulo nei taulaga?

Fai mai ia Polika Iaga e uiga i le Perofeta o Iosefa Samita:

“O Iosefa, semanu e le mafai ona faaatoatoaina, e tusa lava pe e soifua o ia i le afe tausaga, pe a na fai e lē oo ia te ia ni sauaga. Afai na ia soifua i ni tausaga se afe, ta’ita’i i ona tagata ma tala’i le Talalelei e aunoa ma ni sauaga, e le mafai ona faaatoatoaina o ia i le tolusefulu iva o ona tausaga” (*Discourses of Brigham Young*, 351).

Fesili:

- O a ni aafiaga na o’o i le Perofeta o Iosefa Samita ona o sauaga, mafatiaga ma taulaga?
- E mafai faapefea ona tatou taulimaina puapuaga ma taulaga pe a oo mai?
- E mafai faapefea ona faamanuiaina isi ia tatou taulaga?
- Faitau le Roma 8:35–39 ma mata’ituina pe faapefea e Paulo ona faataunuaina ni taulaga mata’utia. Fesili:
- O a auala eseese e faaali mai ai le “alofa o Keriso.”?
- Na fesoasoani faapefea lea ia Paulo?
- E mafai faapefea ona fesoasoani ia i tatou?

Galuega 9:32–43. O Peteru sa i ai le mana o Keriso ma o loo i ai lea mana i le Ekalesia i ona po nei. (15–20 minute)

Fai i le vasega e tapuni a latou tusi paia. Tuu atu i ai se faailo e tatala ai a latou tusi paia ma su’eina se faamatalaga e uiga i le faaogaina o le perisitua e faamanuiaina ai le olaga o se isi. Ia fetufaa’i ia faamatalaga ma mau ua latou maua ma isi o le vasega.

Vaelua le vasega i ni vaega se lua. Tuu atu e faitauina ma faatusatusa ia le Galuega 9:32–35 ma le Mareko 2:1–12 e se tasi o vaega. O le isi vaega ia faitau ma faatusatusa le Galuega 9:36–43 ma le Luka 7:11–17. Ia faaogaina ia fesili nei po o se vaega e fesoasoani i la outou talanoaga:

- O ai na faia vavega i le tala o loo maua i le Mareko ma le Luka?
- O ai na faia vavega i tala o loo i le Galuega?
- O ai na maua mai ai e Peteru le mana o le perisitua?
- O ai na toefuataiina mai lenei mana i le laueleele i ona po nei? (Peteru, Iakopo ma Ioane: tagai i le MFF 128:20).

Fesili pe i ai se isi o le vasega ua faamanuiaina ona o le mana o le perisitua. A leai se isi, faamatala atu se mea na tupu i lou lava olaga. Molimau atu o le pule po o le mana o le perisitua a Keriso o loo ia te i tatou i le Ekalesia i ona po nei.

Galuega 10–12

Faatomuaga

Na fetalai atu Iesu i Ana Aposetolo “O atu ia outou i le lalolagi uma, ma tala’i atu le talalelei i tagata uma lava” (Mareko 16:15). O le tusi o Galuega o loo faaalua ai le faataunuaina e Aposetolo galuega paia. O le au Iutaia sa i nuu mamao ma tagata o nuu ese na latou faalogo o loo talaiina le talalelei i le latou lava gagana i le aso o le Penetekoso (tagai Galuega 2:1–12). O Nikolao o se tasi o le to’afitu na valaauina e tausia faafine ua oti a latou

tane o se tagata tala’i mai i Anetioka (taga’i Galuega 6:5). Na papatisoina e Filipo ia ni tagata se to’atele i Samaria ma se tagata mai i Aitiopo (tagai Galuega 8:6–7, 12, 26–40) Sa valoia e Anania o Saulo o le a talaiina Keriso “i luma o tagata o Nuu Ese” (Galuega 9:15). Na tuuina atu e le Alii ia Peteru se faaaliga e faaali atu ai o le “Alii e le faailoga tagata” ae “o le mata’u ia te ia i nuu uma lava, ma fai le amiotonu ua talia i latou e ia” (Galuega 10:34–35), tusa lava pe o fea le atunuu. Ua fiafia ma olioli le Ekalesia i lenei faaaliga, e faapea, “Ua foaiina atu e le Atua i nuu ese le salamo e ola ai” (Galuega 11:18). O nei mea na tutupu na amata ai le galuega faamisionare a Paulo i Nuu Ese.

A o e aoao i le Galuega 10–12, ia mata’ituina le liliuga o Konelio ma mafaufau pe o le a le uiga o le le faailogaina o se tagata e le Atua.

Suesue ma le agaga tatalo, le Galuega 10–12 ma mafaufau i mataupu faavae nei ae le’i saunia au lesona.

O Nisi Mataupu Faavae Tava e le Talalelei e Saili Iai

- E faaaliga e le Atua Lona finagalo e ala mai i Ana perofeta (tagai Galuega 10:9–6; 11:1–9; tagai foi i le Tautinoga Tonu 1; Tautinoga Tonu 2).
- O le Tama oi le Lagi o se Atua e le alofa faapito; Na te ofoina atu le faaolataga mo tagata uma. (Galuega 10:34; 2 Nifae 26:33; MFF1:35).
- O Aposetolo o ni molimau faapitoa mo Iesu Keriso (tagai Galuega 10:36–43; Galuega 4:33; MFF 107:23).

Fautuaga mo le Aoao Atu

Filifili mai i aitia nei pe faaogaina ni au lava, a o e saunia lesona mo le Galuega 10–12.



E mafai ona faaogaina le *New Testament Video* 11, “Long-Promised Day” (8:35) i le aoaoina o le Galuega 10 (tagai i le *New Testament Video Guide* mo nisi fautuaga).



Galuega 10. E faaaliga e le Atua Lona finagalo e ala atu i Ana perofeta. (25–30 minute)

Faaali atu i le vasega se ata o le Faola ma se ata o le perofeta o loo soifua mai nei. Faamalamalama atu o loo taitaiina e Iesu Lana Ekalesia i ona po nei e ala mai i faaaliga e pei ona Ia faia i taimi o Aposetolo anamua.

Mo se faataitaiga i le taitaiina e le Alii o Lana galuega e ala mai i faaaliga i perofeta, ia faitau e le vasega le Mataio 10:5–6, ma fesili:

- O le a le mea o lo o taua mai e lenei mau e uiga i le galuega faafaifeautalai?
- E mafai e le Alii ona ia tuuina mai ni faatonuga eseese e uiga i galuega faafaifeautalai i taimi eseese? Aisea?

- Faitau le Galuega 10:44–48. O le a le suiga na i ai le galuega faafaifeautalai i lea vaitaimi? (Na papatisoina tagata o Nuu Ese)
- E faapefea i lenei suiga ona aafia ai le misiona a le Ekalesia?

Faitau faatasi ma le vasega ia le Galuega 10:1–35 ma mata’ituina pe faapefea ona tuuina atu lenei suiga. Fesili:

- Na faapefea ona saunia e le Alii ia Konelio, o se tagata o nuu ese, e taliaina le talalelei?
- Sa faapefea ona saunia e le Alii ia Peteru?
- O le a se aafiaga o le Ekalesia ona o le faaaliga na tuuina atu ia Peteru?

Faamanino atu o le faaaliga lenei e mafai ona faatusatusa i le Tautinoga Tonu 2 i le Mataupu Faavae ma Feagaiga. E pei o le faaaliga ia Peteru i le faatonuina o tagata o le Ekalesia i na ona po e avatu le talalelei i tagata o nuu ese, o lenei faaaliga i ona po nei e auala mai ia Peresitene Spencer W. Kimball ua mafai ai e le Ekalesia ona faalateleina ia galuega faafaifeautalai ma faamanuiga o le malumalusa i le lalolagi atoa.

Ia faitau le saunoaga lenei a Elder Harold B. Lee

“Afa i e i ai se mea e ese mai le mea ua uma ona tuuina mai e le Alii, o le a ia tuuina atu i lana perofeta....Sa ou fai atu, ‘Pe tou te manatu ea o le a ui mai ni faatonuga mai le Alii i lana fanau i se auala faatamilo a o lea e i ai lana perofeta i luga o le lauelele. O le mea lena o loo i ai lana perofeta ma a i ai se mea e fia tuuina mai i le Ekalesia, na te tuuina atu i Peresitene’” (“The Place of the Living Prophet, Seer and Revelator,” lauga na tuuina atu i faiaoga o mataupu tau le Ekalesia, 8 Iulai 1964, i le *Charge to Religious Educators*, 2nd ed. [1982], 109).



Galuega 10. O le Tama Faalelagi e le o se Atua e alofa faapito; Na te ofoina atu le faaolataga i tagata uma. (10–15 minute)

Fai i lau vasega e mafaufau faapea ua oo i le faai’uga o le kuata ma o le a tuuina atu o latou togi. Fai i tagata aupito uumi e to’alua o le vasega e tutu i luga ma ta’u atu i ai ua la mauaina ia ni togi e aupito mauaululuga.

Faatutu i luga le isi to’atolu e pito uumi ma ta’u atu i ai o latou ua latou mauaina ia togi e pito atu i ai. Ta’u atu i le vaega o loo totoe o le vasega ua latou mauaina ni togi feololo.

Fesili: Faamata e sa’o ma amiotonu lea ituaiga o le togiina o pepa? Aisea? Faamanino atu, ina ia faia le mea moni ma le sa’o o togi e tatau ona ta’uina mai le mea o loo fia mauaina ma e tatau ona mauaina e tagata uma le avanoa e mauaina ai se togi e sili atu. A fai e na’o e e uumi e mauaina ia togi mauaululuga, e mafai ona tatou faapea e fai mea faapito le faiaoga.

Toe iloilo faatasi ma le vasega le tala ia Konelio i le Galuega 10. Faitau e le vasega ia le Galuega 10:34–35. Fesili: O le a le uiga o le le faailoga tagata o le Atua? Faamalamalama atu

o le mauaina o faamanuiaga mai le Tama Faalelagi e le faalagolago i le ituiga o tagata, le nuu, le aiga, le aganuu po o le tamaoaiga. E mauaina uma e tagata ia faamanuiaga mai le Tama Faalelagi i le ususita'i i Ana tulafono.

Faitau e le vasega le 2 Nifae 26:33 ma le Mataupu Faavae ma Feagaiga 130:20, ma fesili: O le a le faia a nei mataupu ma le le fai mea faapito o le Tama Faalelagi? Faitau le Ioane 3:16–17 ma molimau na mafatia ia Iesu Keriso mo tagata uma, ma o i latou uma e o mai ia te Ia i le ususita'i e maua ai le faolataga i le malo o le Atua.

Galuega 13–14

Faatomuaga

O le Galuega e 13–14 o loo faamatala mai ai le malaga muamua faamisionare a Paulo i Nuu Ese. O le soa a Paulo o Panapa, ae o Ioane ma Mareko na latou o faatasi i le amataga o le tala'iga. O lenei tala'iga na i'u i le faatuina o lala o le Ekalesia i nofoaga e matua mamao ma Ierusalem. Na ulu atu ia Paulo i taulaga e lē o i ai ni tagata o le Ekalesia ma o le tele o tagata e le'i faalogo ia Iesu Keriso. Peitai, ina ua alu ese o ia, sa tele ni lala o le Ekalesia ua ola (*Taiala i Tusitusiga Paia*, faafanua 6). Tatou te iloa i nei mataupu le filiga o Paulo e tala'i le talalelei i tagata uma tusa lava pe o a o latou tulaga po o tofiga. E masani ona tala'i muamua i le au Iutaia, o le to'atele sa le taliaina lana savali, ona tala'i ai lea i tagata o Nuu Ese. A o e faitau, ia mata'ituina ia uiga o Paulo na avea ai o ia o se faifeautalai maoae.

Suesue ma le agaga tatalo, le Galuega 13–14 ma mafaufau i mataupu faavae nei ae le'i saunia au lesona.

O Nisi Mataupu Faavae Tava o le Talalelei e Saili Iai

- O faigata ma faafitauli e o faatasi ma le tuputupu a'e o le Ekalesia (tagai Galuega 13:6–12, 50; 14:1–7, 19–20).
- O nisi tagata ua latou talia ma le fiala le upu a le Atua ina ua faalogo i ai, a'o isi ua teena (tagai Galuega 13:43–52).
- Atonu e tatau ona tatou taliaina faaosoosoga ma tiga e tatou te ulu atu ai i le malo o le Atua (tagai Galuega 14:22; Mataio 10:22; MFF 121:7–8).

Fautuaga mo le Aoao Atu

Filifili mai i aitia nei, pe faaoga ni au lava, a o e saunia lesona mo le Galuega 13–14.

Galuega 13–14. O Paulo o se faataitaiga e mafai ona tatou mulimuli ai pe a tatou faia ia galuega faafaifeautala'i. (20–25 minute)

Sii lima o le vasega o loo faamisiona ni o latou uso, tuafafine po se isi lava tagata o le latou aiga. Fesili atu ia i latou e ta'uina mai ni lu'i e faafeagai ma faifeautalai i nisi o taimi. Fesili: E faapefea i nei lu'i ona aafia ai le galuega a le faifeautalai i le fetufaa'iina atu o le talalelei i isi?

Fai i le vasega e su'e le *Taiala i Tusitusiga Paia* faafanua 6, ma mata'ituina le malaga muamua a Paulo i lana tala'iga. Fesoasoani i le vasega ina ia malamalama i mea faigata ma le fita na o o ia Paulo i lana malaga muamua e tala'i i le talanoaina lea o fesili nei:

- E tusa ai ma le faafanua, pe tusa o le a le mamao na malaga ai Paulo?
- Mafaufau i le taimi ma auala o loo tusia i le faafanua. Faamata sa faapefea ona femalaga'i ia Paulo...O a ni mea na ia faaogaina?
- O a ni faigata ma ni faafitauli na faafeagai ma faifeautalai i ia vaiataimi?
- O a auala o loo faaogaina e faifeautalai i ona po nei?
- O a ni faigata e ono feagai ma faifeautalai i ona po nei?

Ta'u atu i le vasega e mafai ona aoao e avea ma ni faifeautalai lelei i le faaogaina o le faataitaiga a Paulo. Vaevae le vasega i ni vaega se lua. Aoao e le isi vaega le Galuega e 13 a'o le isi le Galuega e 14, ma mata'ituina ia tali i fesili nei:

- E faapefea i galuega faifeautalai ona tai tutusa le galuega faafaifeautalai i le taimi o Paulo ma galuega faifeautalai i ona po nei?
- O a mea e mafai ona tatou aoaoina mai i faataitaiga a Paulo e fesoasoani ai ia i tatou ia avea ma faifeautalai lelei?

Talanoaina mea na mauaina e vaega ta'itasi ma tusia ia mataupu autu i luga o le laupapa. Uuna'i le vasega e saunia e auauna atu i le Alii i le mulimuli lea i faataitaiga a Paulo.

Galuega 13:6–12, 49–14:7, 19–27. O faigata ma faafitauli e o faatasi ma le tuputupu a'e o le Ekalesia. (20–25 minute)

Ia tusi le fuaitau lenei i luga o le laupapa

“O taimi uma lava e te kikiina ai le 'talitonuga Mamona' e te kikiina i luga; e te lē kikiina lava i lalo. Ua faatonuina e le Alii E Ona le Malosi Uma?”
(Brigham Young, *Discourses of Brigham Young*. 351).

Fesili:

- O le a sou manatu o le a le uiga o lenei fuaitau?
- O le sou manatu o le a le meae foliga mai ai e i ai pea lava le faasagatau mai i le tuputupu a'e o le Ekalesia?
- Vaevae le vasega i ni vaega se tolu. Ia tofu le vaega ma poloka mau taitasi nei (Galuega 13:6–12; 13:49–14:7; 14:19–27.) ma su'e tali o fesili nei:

- O le a le pogai o le faasagatau o loo ta'ua i nei fuaiupu?
- E faapefea ona lagolagoina e le Alii i latou e tala'ia Lana talalelei?
- Aisea e lagolagoina ai e le Alii i latou?

Faitau le Mataupu Faavae ma Feagaiga 35:13–14 faatasi ma le vasega ma mata'ituina ia folafolaga e tuuina mai e le Alii ia i latou e tala'ia ma le faatuatua Lana talalelei. Fesili: E faapefea ona faaaogaina nei folafolaga e faifeautalai? Faamanino atu e i ai taimi e le mafai ai e faifeautalai ona foia e faasagatau mai ae e i ai taimi e savavali ese mai ai (taga'i Galuega 13:49–52). Valaaulia le vasega e tuuina mai ni faataitaiga o ni mea ua latou iloa na fesoasoani ai le Alii i faifeautalai e foia ni faiga faasagatau mai ia te i latou.

Galuega 13:6–8, 43–50; 14:4, 19–20. O nisi tagata ua latou talia le upu a le Atua ma le fiafia ina ua faalogo i ai, a o isi ua teena ma faasagatau atu i ai. (15–20 minute)

Fesili i le vasega: A o aoaoina tagata i le talalelei, o le a sou manatu o le a le mea e talia ai e isi le savali ae teena e nisi?

Ta'u atu i le vasega na tala'i e Paulo ma ana soa le talalelei i ni tagata se to'atele. Sa talia e nisi o le mea moni, ae sa teena fo'i e isi. Faitau e le vasega le Galuega 13:6–8, 43, 45, 48, 50; 14:4, 19–20 ma mata'ituina ia upu po o ni fuaitau e faasino i le taliaina ma le teenaina o le talalelei. Ia fetufaa'i mea na maua e le vasega.

Vaevae le vasega i ni vaega se lua. Ia faitau e le vaega muamua le Ioane 7:17; 14:15; Eperu 11:24–26; ma le Mataupu Faavae ma Feagaiga 93:36–39 ma mata'ituina pe aisea ua taliaina ai e nisi le talalelei. Faitau e le isi vaega le Mareko 7:9 ma le 1 Nifae 2:11–12; 16:2–3 ma mata'ituina pe aisea ua teena ai e nisi le talalelei. Talanoaina mea na mauaina e le vasega.

Faitau le Mosaea 3:19 ma fesili: E tusa ai ma lenei fuaiupu, o a ni uiga o tagata ua malamalama ma usiusita'i i le mea moni. Uuna'ia le vasega ia sailia ia uiga.

Galuega 15

Faatomuaga

O le Galuega e 15 o se faamatalaga i se fonotaga taua a le Ekalesia na faia i Ieruselema pe tusa o le T.A. 50 ae le'i malaga ia Paulo i lana malaga faatalai lona lua. O ta'ita'i o le Ekalesia na auai i le fonotaga po o le Konafesi e aafia ai ia Peteru, Iakopo, Paulo, Panapa ma Tito. E to'atele ia ni tagata na papatisoina ina ua faalogo i le talaiga a Paulo ma Panapa. O nisi o tagata o le Ekalesia o i latou o ni tagata sa Iutaia sa popole ona o nisi o alii na liliu mai e le'i peritomeina i latou. Na valaauina e ta'ita'i o le Ekalesia le fonotaga i Ieruselema ina ia talanoaina ai pe tatau ona faamalosia ia tagata o Nuu

Ese ona usita'ia pea le tulafono a Mose. A o e aoao i le Galuega, ia mata'ituina aafiaga o uiga o tagata ona o a latou aganuu ma lagona, e i ai ni taimi e le o gatasi ai ma aoaoga a ta'ita'i o le Ekalesia.

Ia suesue ma le agaga tatalo, le Galuega 15 ma mafaufau i mataupu faavae nei ae le'i saunia au lesona.

O Nisi Mataupu Faavae Taua o le Talalelei e Saili Iai

- E taitaia e le Alii Lana Ekalesia i le faaalua lea o Lona finagalo i Ana perofeta (tagai Galuega 15:6–29; tagai foi Aмоса 3:7; MFF 21:4–5).

Fautuaga mo le Aoao Atua

Filifili mai i aitia nei, pe faaaogaina ni au lava, a o e saunia lesona mo le Galuega 15.



Galuega 15. E taitaiina e le Alii Lana Ekalesia i le faaalua o Lona finagalo i Ana perofeta.

(20–25 minute)

Fai i le vasega e faitau le mataupu faavae o le faatuatua e iva. Faamalamalama atu a mana'omia e le Tama oi le Lagai e faaali mai se mea i le Ekalesia atoa, na te Ia faaali mai e ala mai i perofeta. Fesili: E mafai ona e manatuaina se faaaliga lata mai na tuuina mai e le Alii i le Ekalesia e ala mai i le perofeta? (O ni tali e mafai ona aofia ai le Ta'utinoga Tonu 2 [1978], "O le Aiga: O le Folafolaga i le Lalolagi" [1995], ma le faai'uga e fausia ia malumalu laiti [1997].)

Fai i le vasega e su'e le Galuega 15. Faamalamalama atu o le mataupu leni o loo faailoa mai ai le faaalua o le finagalo o le Alii i ta'ita'i o le Ekalesia anamua faapea ma ona po nei. O nei ta'ita'i latou te aoao ia tagata ma fesoasoani ia malamalama ma usiusita'i.

Faitau le Galuega 15:1–6 faatasi ma le vasega ma fesili:

- O a mea na aiaia i le fono tele a le Ekalesia? (Pe mana'omia le peritomeina mo le faaolataga.)
- Aisea na faigata ai i Kerisiano Iutaia ona faamatuu atu nisi o tulafono a Mose?
- O a ni aganuu faaanamua atonu e aveva ma faafitauli i tagata o le Ekalesia i ona po nei?

Faitau e le vasega ia le Galuega 15:7–21 ma mata'ituina ia tulaga na faia e Peteru, Panapa, Paulo ma Iakopo i le fono tele? Fesili:

- O le a le taua o le molimau a Peteru na tuuina atu i le fono tele?
- O ai na finagalo e talai le talalelei i Nuu ese?
- O a ni faailoga na tuuina mai e Peteru ua talia e le Atua ia tagata o Nuu Ese ona o le faatuatua e aunoa ma le peritomeina.?

Faitau faatasi ma le vasega le Galuega 15:22–35 ma manatunatu e fesili i fesili faapenei:

- Aisea na avea ai le peritomeina ma mea fita i le Ekalesia i lena vaitaimi?
- Na faapefea e ta'ita'i ona logo atu i tagata o le Ekalesia o le peritomeina ua le toe moomia?
- E faapefea i ta'ita'i i ona po nei ona logoina atu ia faai'uga ma fautuaga i tagata o le Ekalesia?
- O le a le tatou matafaioi e tusa ai ma fautuaga ma faatonuga a ta'ita'i o le Ekalesia?
- O le a le mea e mafai ona tatou faia pe a tatou le malamalama i mea o loo tuuina mai e o tatou taitai e fai?
- O le a le mea e tatau ona tatou faia pe afai tatou te le auai i mea o loo ta'uina mai e taitai o le Ekalesia tatou te faia? (Mo ni fesoasoani mo se tali, tagai *The Teachings of the Living Prophets* [Religion 333 student manual, 1982], chapters 8–11; ma Dallin H. Oaks, "Criticism," *Ensign*. Fepuari, 1987, itulau 68-73.)

Faai'u i le toe faamanatu atu i le vasega e le mafai ona taitaia tatou e perofeta a le Alii i ni auala sese (tagai "Excerpts Three Address by President Wilford Woodruff Regarding the Manifesto," e sosoo ma le Ta'utinoga Tonu 1 i le Mataupu Faavae ma Feagaiga). Ta'u atu i le vasega e tatau ona tatou mulimuli ma le agaga tatalo i fautuaga a le perofeta soifua ma lagolagoina o ia i soo se auala.

Galuega 16–18

Faatomuaga

Ina ua maua le faaiuga e le toe faaogaina le tulafono a Mose e tagata o Nuu Ese na liliu mai, na malaga ai loa ia Paulo i lana malaga talai lona lua i Nuu Ese (tagai *Taiala i Tusitusiga Paia* faafanua 6) O le soa a Paulo i le taimi lea o Sila. O le Galuega e 16–18 e faapitoa i tagata, nofoaga ma mea na tutupu a o i ai ia Paulo. O le talaiga lena a Paulo na faai'uina i le Galuega 18:22, ma o le talaiga o lana malaga faatalai lona tolu e amata i le fuaiupu 23. Ia mata'ituina ia metotia na faaogaina e Paulo na avea ai o ia ma faifeautalai maoae.

Ia suesue ma le agaga tatalo, le Galuega 16–18 ma manatunatu i mataupu faavae nei ae le'i saunia au lesonea.

O Nisi Mataupu Faavae Tava o le Talalelei e Saili Iai

- E tatau ona faaeteete ma faaaloalo faifeautalai i aganuu a tagata o loo latou talai i ai (tagai Galuega 16:1–3; 21:16–26; Mataupu Faavae o le Faatuatua 1:11).

- O avanoa e talai ai le talalelei i le tele o taimi e maua faafuase'i (tagai Galuega 16:9–33)
- E tatau ona tatou aoaoina atu le talalelei mai i tusitusiga paia i le mana o le Agaga (taga'i Galuega 17:2, 22–31; 18:4, 19; Galuega 19:8; MFF 42:12–14).
- O tatou o fanau uma a lo tatou Tama Faalelagi, ma na te filifilia poo afea ma o fea fo'i tatou te fananau mai ai i le fogaelele (tagai Galuega 17:24–28).

Fautuaga mo le Aoao Atu

Filifili mai i aitia nei pe faaoga ni au lava, a o e saunia lesonea mo Galuega 16–18.

Galuega 16:1–18:22. I le malaga talai lona lua a Paulo na ia toe asia ai paranesi tuai o le Ekalesia ma faatuina nisi paranesi fou. (5 minute)

Su'e e le vasega ia le *Taiala i Tusitusiga Paia* faafanua 6 ma mata'ituina le ala na uia e Paulo i lana malaga lona lua. Fesili:

- E tusa ai ma le faafanua, faamata o le a le mamao o le mea na malaga ai Paulo?
- E a pe a faatusatusa i lana malaga muamua? (Atonu toetiiti faaluaina.)

Ta'u atu i le vasega o le malaga lena a Paulo na ia toe asia ai ia paranesi o le Ekalesia na ia faatuina i lana malaga muamua ma toe faatuina ai fo'i nisi paranesi fou i vaega e le'i oo atu i ai le savali o le talalelei.

Galuega 16:1–3. O faifeautalai e tatau ona faaeteete ma faaaloalo i aganuu a tagata o loo latou aoaoina. (10–15 minute)

Fesili i le vasega: O a ni tu ma aganuu a nisi tagata e ese mai ia tatou tu ma aganuu? (O ni tali e aofia ai, meaai, ma tulafono, lavalava, va ma tagata) Faamalamalama atu e tatau i faifeautalai ona latou aoao i lagona ma eseese o tu ma aganuu a isi tagata ma a latou lava tu ma aganuu ina ia aua nei i ai se feteena'iga ma e o loo latou aoaoina atu i ai le talalelei. Faitau e le vasega le Galuega 16:1–3, ma fesili:

- O ai le faifeautalai o loo taua i le fuaiupu 1 o le "ia" (Paulo; tagai Galuega 15:40.)
- O ai na tofia e Paulo e avea ma ana soa? (Timoteo.)
- O le a le aganuu faaIutaia e le'i faataunuuina e Timoteo? (E le'i peritomeina o ia, atonu ona o lona tama o le Eleni.)
- O le a le mea na faia e Paulo i le tulaga lea? Aisea? (Na ia peritomeina ia Timoteo ina ia mafai ona taliaina o ia e le Au Iutaia o e o le a latou aoaoina.)
- E faapefea ona tatou iloa na faia e Paulo lena mea ona o le aganuu ae le o mafuaaga faalelotu? (Galuega 15:1–11).

Taamilo i le vasega ma fesili mo nuu o loo talai ai ia se uso, tuafafine, poo se uo. Valaaulia i latou latou te aoaoina le aganuu

a lea atunuu. Ta'u atu i ai i ni nai aso o i luma o le a moomia ai i latou latou te faamatalaina ituaiga o aganuu a ia atunuu latou te manatu e taua mo le malamalamaaga a faifeautalai.

Galuega 16:9–33. O avanoa e aoaoina ai le talalelei i le tele o taimi e maua i taimi faafuase'i. E tatau ona tatou sauni i taimi uma e fetufaa'i le talalelei. (15–20 minute)

Ta'u atu se tulaga na oo ia te oe (pe faia fo'i e se tasi o le vasega) e faafuase'ia ai ona e mauaina se avanoa e talai ai le talalelei. Talanoaina se mea atonu e tupu pe ana fai e te le o sauni. Fesili: O ai e mafai ona avea ma molimau o le talalelei a Iesu Keriso? Faamalamalama i le vasega e tatau ona avea i tatou ma "molimau a le Atua i taimi uma, i mea uma" (Mosaea 18:9).

Faitau e le vasega ia le Galuega 16:9–15 ma mata'ituina ia mea na tutupu na maua ai e Paulo le avanoa e talai ai le talalelei ma papatisoina tagata, ma fesili:

- O le a le mea na faafuase'i ai nei mea na tutupu?
- O a ni faailoga e mafai ona e tuuina mai e faaalai ai na saunia lava Paulo?

Faitau lemu e le vasega ia fuaiupu 16–33 ma saili ni tali mo fesili lava ia e tasi. Ona fesili lea:

- O le a se mea ua tatou aoao mai i mea na tutupu ia Paulo?
- O le a se mea e te mafaia ona fai nei e fetufaa'i ai le talalelei, i le avea o oe ma se faifeautalai po o se tagata o le Ekalesia.?

Faitau e se tagata o le vasega le saunoaga lenei a Elder L. Tom Perry, o se tasi o le Korama a le Toasefululua.

"I le tele o taimi ou te faafeiloa'ia le au perisitua talavou o le Ekalesia a o matou i ai i fonotaga e faia i nuu eseese o le lalolagi ma ou fesili atu i ai i le fesili lenei, 'Faifeautalai i le lumana'i? Ou te iloaina le fiafia i o latou lafofoga ma ioe mai. Ona ou faamalosi atu lea ia i latou e amata nei ona sauni mo lena galuega sili.

"O a ni sauniuniga e mana'omia mo lenei auunaga matagofie? O le mea muamua ma le aupito taua, o loo mana'omia e le Alii ia tatou faia. O loo faamoemoe o Ia ina ia tatou auai i le fausia o Lona malo. O loo faamanatuina mai pea lava pea e o tatou perofeta, e tatau i alii malolosi uma ma agavaa ona saunia i latou e galulue faamisiona.

"O au sauniuniga e aofia ai lou nofo i luma o lau epikopo ma ta'u atu ia te ia o loo e agavaaa e avea ma faifeautalai. O le a e mafanafana i le lua faatalatalanoaga ma le epikopo pe a fai o ia o sau uo" (Lipoti Konafesi, Ape, 1991, 52; po o le *Liahona*, Iulai 1991, 39).

Galuega 17:1–18:8. E tatau ona tatou aoao atu mataupu faavae o le talalelei mai i tusitusiga paia e ala mai i le mana o le Agaga. (20–25 minute)

Tusi i luga o le laupapa: *Na saunoa mai le Perofeta o Iosefa Samita, "E le mafai e se tagata ona talai le talalelei e aunoa ma _____."* Tofi tagata o le vasega e faatumu i upu o loo misi. Faamalamalama atu i le vasega e tele ni tali talafeagai e sa'o ai le faamatalaga a e o loo e su'eina ia upu patino. Tusi a latou tali i luga o le laupapa i lalo ifo o le fuaiupu ma fesili pe aisea ua sa'o ai le fuaiupu e tusa ai ma a latou tali. A tuuina mai ia upu sa'o ona faatumu ai lea o upu o loo misi ma faitauina e se tagata le fuaiupu atoa faapea:

"E tatau i tagata uma ona talai le talalelei i le mana ma le musumusuga a le Agaga Paia; ma e le mafai e se tagata ona talai le talalelei e aunoa ma le Agaga Paia." (*Teachings of the Prophet Joseph Smith*, 112).

Faitau le Mataupu Faavae ma Feagaiga 42:6–7, 12–13 ma fesili:

- E tusa ai ma nei fuaiupu o a mea e tatau e faifeautalai ona latou aoao atu?
- E tusa ai ma fuaiupu 13–14, e faapefea ona aoaoina ia mataupu faavae o le talalelei mai i tusitusiga paia?

Faamalamalama atu o Paulo o se faaitaiga lelei lea o le mulimuli i lenei faiga paia o le aoaoina o le talalelei. Faitau e le vasega ia mea na tutupu i Tesalonia (Galuega 17:1–4), Perea (Galuega 17:10–12), Atenai (Galuega 17:16–18, 32–34), ma Korinito (Galuega 181–8). (E mafai ona fesoasoani le sue vave o taulaga i le *Taiala i Tusitusiga Paia* faafanua 6.) A o faitau le vasega, ia latou sailia foi ma tali i fesili nei:

- O a ituaiga tulaga na aoaoina atu ai e Paulo le talalelei?
- Na faapefea ona aoao atu ia Paulo? (Na ia aoao atu mai i tusitusiga paia.)
- O a ni faailoga e faailoa ai na aoao atu ia Paulo e ala atu i le mana o le Agaga Paia?
- O le a se taunuuga o le aoao atu o le talalelei e ala atu i le mana o le Agaga?
- O le a se mea e mafai ona tatou aoaoina mai i faaitaiga a Paulo?
- Manatunatu i le valaaulia o se faifeautalai ua mae'a sana misiona i le vasega e faailoa mai pe faapefea i le faaogaina o lenei mataupu faavae ona fesoasoani i le liliu mai o tagata i le Ekalesia.

Galuega 17:22–28. O tatou uma o fanau a le Tama Faalelagi, ma Na te filifilia po o afea ma o fea fo'i tatou te fananau mai ai i le fogaelele. (15–20 minute)

I lana malaga talai lona lua, sa aoaoina ai e Paulo ia le au popoto i Atenai se mataupu faavae taua. Tusi i luga o le laupapa ia se ata o se pulelaa ma tusia ai upu nei "Mo le Atua E Le Iloa." Fesili:

- O a ni faigata atonu tatou te mauaina a o taumafai e tapua'i i se atua e le iloa?

- E faapefea i le tapua'i i se Atua e le iloa ona aafia ai lo tatou malamalamaaga i le talalelei?
- E faapefea i le tapua'i i se Atua e le iloa ona aafia ai lo tatou faatuatua?

Faitau e le vasega le Galuega 17:22–23, ma fesili:

- Aisea ua faapea mai ai ia Paulo latou te tapuai ma le “lē malamalama” i se atua e le iloa?
- Afai e le iloa le Atua, e faapefea ona tatou iloa ina le auala e tapua'i ai ia te Ia?
- O a mea na fai mai ai ia Paulo o le a ia faia mo i latou?
- Tusi fesili nei ma tuuina atu i le vasega pe tusi fo'i i luga o le laupapa. Aoao i le Galuega 17:24–29 ma tali fesili:

1. O ai na faia le laueleele ma “mea uma o i ai”? (tagai f. 24).
2. O le a le mea na folafola atu e Paulo e faatatau i mea e manaomia e le Atua mo tapuaiga? (tagai ff. 24–25).
3. O a mea e tuuina mai e le Atua moni ia i tatou taitoatasi?
4. E faapefea e atunuu uma o le lalolagi ona avea ma “toto e tasi”? (tagai 2 Nifae 2:19–20).
5. O a mea e lua na fuafuaina e le Atua ae tatou te le'i fananau mai? (tagai f. 26).
6. A fai o le a tatou sailia le Atua, aisea o le a mafai ai ona tatou mauaina o Ia? (tagai f. 27).
7. O le a le tatou faiā ma le Atua? (tagai ff 28–29).
8. E faapefea i le iloa ina o nei mataupu faavae ona fesoasoani ia i tatou e tapua'i ai i le Atua i le auala talafeagai?

Talanoaina ia faamanuiaga e oo mai i o tatou olaga e ala mai i le avea o i tatou ma fanau a le tatou Tama o i le Lagi. Fesili: O a o tatou matafaioi pe a tatou iloa ina poo ai i tatou?

Galuega 18:23–28. Na tele taimi na alu ma nofoaga na asia e Paulo i lana malaga talai lona tolu nai lo isi ana malaga muamua. (5 minute)

Su'e e le vasega le *Taiala i Tusitusiga Paia* faafanua 6 ma mata'ituina le ala na uia e Paulo i lana malaga lona tolu. Fesili:

- E tusa ai ma le faafanua, e tusa o le a le mamao na malaga ai ia Paulo?
- E faapefea ona faatusatusa lea i isi ana malaga?

Faamanino i le vasega e le gata ina mamao le mea na malaga ai ia Paulo ae tele fo'i le taimi (e tusa ma le 4 tausaga) na alu ai nai lo isi ana malaga tala'i.

Galuega 19–20

Faatomuaga

O le malaga talai lona tolu a Paulo o se molimau lea i lona tagata ma lona faamaoni i le galuega a Keriso. O le Galuega e 19 o loo i ai ni faamatalaga e uiga ia Paulo i Efeso. A o i ai o ia iina, na ia aoao atu, papatiso, faamalolo ma'i, ma taulimaina taulaitu Iutaia ma na vave ona sola ese mai i sauaga a tagata tapua'i a Tiana. O nei mea uma na tutupu e molimau i le mana o le Agaga Paia a o faaogaina e ala atu ia Paulo. O le mataupu e 20 o loo faalia ai lona toe faatuina mai o se alii na oti i Teroa ma fautuaina ia taitai o le Ekalesia i Meleto. Na ia tuuina atu i nei taitai o paranesi i Efeso se aoaoga a Iesu e le'i maua i se isi lava tusitusiga paia: “E sili le manuia o le na te foai atu, i le manuia o le na te talia mai” (Galuega 20:35).

Suesue ma le agaga tatalo le Galuega 19–20 ma manatunatu i mataupu faavae nei a o le'i saunia au lesona.

O Nisi Mataupu Faavae Taa o le Talalelei e Saili Iai

- O faamalologa e taunuu e ala atu i le pule o le perisitua ma le mana o le faatuatua (tagai Galuega 19:11–20; 20:7–12).
- Na muai iloa ina e Paulo le liliuese mai le Ekalesia na faatuina e Iesu (tagai Galuega 20:28–32).

Na aoao mai e Iesu e sili le manuia o le na te foai nai lo le na te talia mai (tagai Galuega 20:33–35).

Fautuaga mo le Aoao Atu

Filifili mai i aitia nei pe faaogaina ni au lava a o e saunia lesona mo le Galuega 19–20.

Galuega 19:11–16; 20:7–12. O faamalologa e ala mai i le pule o le perisitua ma le mana o le faatuatua. (20–25 minute)

Fesili i le vasega:

- O a ni faailoga e mafai ona e tuuina mai e iloa ai na tutupumoni lava vavega?
- O le a sou manatu e faapefea ona tutupu vavega?

Toe faamatala le tala leni mai le talafaasolopito o le Ekalesia i ona po nei. Ina ua tutuli ese le Au Paia mai i Misuri, sa latou tolauapi i autafa o le vai o le Misisipi, ma sa taia ai i latou i ma'i ogaoga. I se tasi aso, na tula'i ai i luga le Perofeta o Iosefa Samita mai lona moega, ma faapotopotoina nisi o uso o le Au Paia ma latou agai atu e faamalolo le tele o tagata na mafai

ona faaee atu i ai o latou lima. Faitau e se tagata le saunoaga lenei na tusia e Peresitene Iosefa F. Samita:

“I le tulaga lea, na o atu le Perofeta ma le usoga mai lea fale i lea fale, ma faamalolo i e mamai ma toe faatula’i mai i latou mai le gutu o le tuugamau. Ao faia ia faamalologa sa i ai se alii e le o se tagata o le Ekalesia sa ia molimauina ia vavega mata’utia sa faataunuuna, ona ia aoi atu lea i le Perofeta la te o e faamalolo lana fanau e to’alua o loo matua mama’i. Sa le’i mafai ona alu le Perofeta, ae peita’i sa ia fai atu o le a ia auina atu se tasi e faamalolo i lana fanau. Na ia tago i laga taga ma aveane ai se solosolo silika ma tuu atu ia Elder Uilifoti Uutilafi ma talosagaina ina ia alu atu e faamalolo i tamaiti. Na ia fai atu ia Elder Uutilafi e solo mata o tamaiti i le solosolo silika ona malolo ai lea. Na faapea ona faia e Elder Uutilafi ma sa malolo ai ia tamaiti” (*Essentials in Church History*, 27th ed. [1974], 224).

Manatunatu i le talanoaina o fesili nei:

- O le a le pule na faaaogaina e Iosefa Samita i ana faamalologa?
- O le a se lagona e oo ia te oe pe ana faapea o oe o Uilifoti Uutilafi?
- E i ai se mana i soo se mea poo ni lavalava?
- O le a se vaega a le solosolo i le faataunuuna o lenei vavega?

Fai i le vasega e faitau le Galuega 19:11–12 ma sailia ni mea e talitutusa ma mea na tutupu i ona po o le Perofeta o Iosefa Samita. Faitau le faamalalamalama lenei mai ia Elder Bruce R. Mc Conkie:

“O faamalologa e ala mai i le mana o le faatuatua: e leai se mana poo se pule i soo se mea poo lavalava, tusa lava pe o ni mea a Paulo, Iesu poo se isi. O sauniga ma ituaiga mea eseese e mafai ona faaaogaina e fesoasoani i le faateleina o le faatuatua” (*Doctrinal New Testament Commentary*, 2:169).

A mana’omia, faamanino atu o isi mea na faaaogaina fo’i i le auala lava lea e tasi i tusitusiga paia: feanuga ma palapala (tagai Ioane 9:6–7, ofu o Iesu (tagai Mataio 9:20–22), ma le ata o Peteru (tagai Galuega 5:15–16).

Faamalalamalama atu o le faatuatua i le Alii e mana’omia i le faataunuuna o faamalologa. Faitau e le vasega le Galuega 19:13–16 ma mata’ituina poo o le a se isi elemene taua e manaomia. Fesili:

- O le a le mea sa manatu le fanau a Seva e tatau ona faia e tutuli ese ai agaga leaga?
- Aisea na le faataunuuna ai i le na ona faaaogaina o le suafa o Iesu?

- Aisea na iloa ai e agaga leaga na o Iesu ma Paulo ae le iloa isi tagata?
- Aisea e taua ai le i ai o le pule o le perisitua e faamalolo ai i le suafa o Iesu? (tagai MFF 63:60–62).

Faitau faatasi ma le vasega le Galuega 20:7–12. Molimau atu o faamalologa e faataunuuna e ala atu i le pule o le perisitua ma le mana o le faatuatua.



Galuega 20:29–30. Na muai iloa e Paulo le liliuese o tagata mai i le Ekalesia na faatuina e Iesu Keriso. (30–35 minute)

Tape moli i totonu o le potuaoga. Uu i luga se mea lanu moana malosi ma se isi e uliuli. Fesili i le vasega pe latou te iloina ia lanu o mea. E pei ona faigata ona iloa ituaiga o lanu i le pogisa, e faapena fo’i le faigata o le iloina le upumoni faaleagaga pe afai e tape moli o faaaliga. Na valoia e Paulo ma isi Aposetolo i aso anamua ia lea pogisa faaleagaga.

Faitau e se tasi le Galuega 20:28–30, ma fesili:

- O le a le tala a Paulo i le mea o le a tupu i le Ekalesia pe a toesea o ia?
- O ai ia “luko saua” ma tagata “tautala i mea faapiopio”?
- E faatusa faapefea i luko ia tagata latou te aoao atu mataupu faavae sese?
- E faapefea i mataupu faavae sese ona faamalepeina le lafu a le Faola?

Tusi le upu *Liliuese* i luga o le laupapa. Ta’u atu i le vasega o le uiga o le “liliuese” o le tuulafoaina lea o ona talitonuga faalelotu poo le alu ese mai i le mea moni. O le upu lea ua faaaogaina nei e faatatau i mea na tutupu i le Ekalesia i po anamua. Na talanoaina e Paulo ia le Liliuese i le tele o taimi i ana tusitusiga.

Ia maka e le vasega le Galuega e 20:28–30 ma tusi ai ia mau nei i autafa o ia fuaiupu: 1 Korinito 11:18; Kalatia 1:6–8; 2 Tesalonia 2:1–3; 1 Timoteo 1:5–7; 4:1–3; 2 Timoteo 3:1–7; Tito 1:10–16. Faitau faatasi ma le vasega ia mau taitasi nei ma mata’ituina ia mafuaaga ma uiga o le Liliuese po o le “pau ese.”

Faamalalamalama atu na pau ese le Ekalesia mai le mea moni ina ua maliliu ia Aposetolo faatasi ai ma le taliaina o mataupu faavae sese. E le o na’o o le liliuese ese a tagata *mai* le Ekalesia ae o le liliuese o le Ekalesia. Ona o leni liliuese, i totonu o se vaitaimi puupuu talu ona faatuina le Ekalesia e Keriso, na aveesea ai le Ekalesia moni ma ua le toe maua ai i le fogaeleele. I le senituri lona sefuluono sa taumafai ai ni tagata lotu i Europa e toe faasa’o le faaletonu ua tulai mai talu le Liliuese. O leni mau sa faaigoaina o le Toefaafouina. Peitai e na o se Toefuataiga e mafai ai ona toe faafoisia mai upumoni ma le pule na leiloa. O Iosefa Samita o le perofeta na amata ai e le Tama Faalelagi leni Toefuataiina.

Faamalalamalama atu o ni mafuaaga na amata ai le liliuese o le Ekalesia anamua o loo avea fo’i ma mafuaaga o le liliuese *mai* le Ekalesia i ona po nei. Faitau e le vasega ia le saunoaga leni o Peresitene Gordon B. Hinckley:

“Talu ai o le galuega moni lenei a le Alii, o le a i ai fo’i ma le faafeagai. O le a i ai latou, atonu e to’atele o le a taufaasese e upu suamalie poo le logoleleia ma o latou uiga faafiapoto e faasalalauina ma taumafai e faaleagaina le faavae o loo faatuina ai lenei galuega. O le a puupuu sina taimi e lauiloa ai i latou. Atonu o le a puupuu foi se taimi e taliaina ai i latou e tagata lē talitonu ma le masalosalo ma le au faitio. Ae o le a mou atu foi i latou ma galo atu ai e pei lava foi o ia ituaiga i aso ua mavae” (*Liahona*, Iulai 1994, 60).

“E i ai lava i nisi le uiga o le faatu’iese. E i ai i latou e tafetafea solo i le su’eina o fiafiaga o le lalolagi ae fulitua i mea tau le Alii. Ou te iloa fo’i o nisi ua manatu e le afaina pe a tuutuu teisi i lalo o latou tulaga faatonuina, atonu e na o ni nai mea iti lava. O lea faiga, o le a latou lē maua ai le uiga aupito taua o le naunautai i lenei galuega. Mo se faataitaiga, latou te manatu o le solia o le Sapatu o se mea e le taua. Ua latou lē o i a latou fonotaga. Ua oo ai ina latou faitio. Ua latou muimui. E lē umi lava ae o latou faapeapea atu ma le Ekalesia.

“Na folafola mai e le Perofeta o Iosefa Samita, ‘O le mea e i ai le masalosalo, e le i ai foi se mana o le faatuatua’ (*Lectures on Faith* [Salt Lake City: Deseret Book Co., 1985], i. 46).

“Ou te valaaulia soo se tasi ua tafea ese ina ia toe fo’i mai i le faavae malosi ma le malo o le Ekalesia. O le galuega lenei a le Silisiliese. O lo tatou aga’i i luma e faalagolago lea ia i tatou lava. Ae o le a lē mafai ona taofia ai le alualu i luma le Ekalesia.” (*Liahona*, Ianuari 1996, 72).

Talanoaina ma le vasega ia ni mafuaaga o le liliuese o tagata taitoatasi. Fesili: O le a se mea e mafai ona tatou faia e faafoia ai?

Galuega 21–23

Faatomuaga

O le talaaga o le malaga talai lona tolu a Paulo i tagata o Nuuese na faai’uina i le Galuega 21:16. I le tusa ma le sefulu tausaga o malaga talai e tolu a Paulo, na ia malaga ai mo le afe ma afe o maila ma na ia molimau atu mo Iesu Keriso “i luma o tagata o Nuuese...ma le fanauga a Isaraelu” (Galuega 9:15). O le Galuega 21:17–23:35 o loo faamaumau ai ia mea na tutupu i le faai’uga o nei talaiga ma lona tu i luma o Filiki le kovana o Roma i Kaisareia. Na ta’u atu i ai e Paulo lona liliuina ma isi taimi na talanoa atu ai le Alii ia te ia. Na faai’uina ina ua taofia ia Paulo i le fale faamasino o Herota

i Kaisareia e faatali ai le faamasinoga i luma o Filiki. Ia mata’ituina le loto toa o Paulo ao avea ma faifeautalai ma lona atamai e faaogaina soo se avanoa e aoao atu ai le talalelei e tusa po o le a le faigata o tulaga sa i ai.

Ia suesue ma le agaga tatalo le Galuega 21–23 ma manatunatu i mataupu faavae nei ae le’i saunia au lesona.

- E mafai e faifeautalai ona folafola atu le talalelei i se auala silisili pe a saunia lelei i latou (Galuega 21–28; MFF 4; 11:21–22).
- O le mulimuli i musumusuga a le Agaga Paia, e tusa lava pe tele mai fili o le lalolagi, e maua ai le taitaiga, puipuiga, ma le mafanafana (tagai Galuega 21:4–15; 31–40; 22:1–23; 23:11, 16–22).
- O le o mai ia Keriso e mana’omia ai le tumau ma le atoatoa ia te Ia ma Lana talalelei (tagai Galuega 21:10–14; Omniae 1:26).
- E tatau ona tatou onosa’i ma malamalama i tagata fou liliu mai a o latou aoao le talalelei (tagai Galuega 21:20–25; Galuega 15:6–35).
- E i ai taimi e fesoasoani mai ai le Alii ia i tatou e ala mai i galuega a isi tagata (tagai Galuega 23:11–31).

Fautuaga mo le Aoao Atu

Filifili mai i aitia nei, pe faaogaina ni au lava, a o saunia lesona mo le Galuega 21–23.



E mafai ona faaogaina le *New Testament Video* vaega 12, *O Paulo—O Se Ipu Filifilia* (11:20), e aoao atu ai le Galuega 21–28 (tagai *New Testament Video Guide* mo fautuaga e aoao atu ai).



Galuega 21–28. Na saunia e le Alii ia Paulo e molimau mo la i le lalolagi. (20–30 minute)

Fesili i le vasega e manatunatu i koleniga e faia e tagata taaalo ina ia avea ai ma ni tagata taaalo sili o le lalolagi. Talanoaina le faavasegaina o sauniuniga o a latou koleniga, mai i le aoaoina o muai laasaga o le taaaloga e oo atu i tausaga e tele o faataitaiga, aoaoina, ma toe aoao, koleniga ia malosi, tauvaga ma le saga faaleleia seia oo ina ia avea ma ni tagata taalo e sili i lana taaloga.

- E faapefea ona faatusatusa ia se faifeautalai i se tagata taalo ua matua atoatoa le lelei?
- O a laasaga o sauniuniga e manaomia mo le aoaoina e avea ai ma se faifeautalai?
- Faamalamalama e le’i avea ia Paulo ma Aposetolo ma faifeautalai a le Alii i Nuuese i se taimi e tasi. Na saunia e le Alii o ia mai lea taimi i lea taimi a o laitiiti.
- Faitau le Galuega 9:6. O le a le mea na ta’u atu e le Alii ia Saulo na te faia?
- Faitau le Galuega 9:15–16. O le a le mea na ta’u atu e le Alii ia Anania e uiga i Lona faamoemoe i le valaauina o Saulo i le galuega?

Tusi fesili nei i luga o le laupapa

1. O le a le galuega a Paulo? (tagai Galuega 18:3)
2. O a gagana na mafai ona tautala ai Paulo? (tagai Galuega 21:37–40).
3. O fea na fanau ai ia Paulo? (tagai Galuega 21:39)
4. O ai le faiaoga a Paulo? (tagai Galuega 22:3)
5. O se tagatanuu o fea ia Paulo? (tagai Galuega 22:25–29).
6. O le a le aoaoga faalelotu a Paulo? (tagai Galuega 26:4–5)

Ia su'eina e le vasega ia tali ma tusi i luga o le laupapa.

Talanoaina pe faapefea i nei mea ta'itasi ona fesoasoani e saunia ia Paulo e aveva ma Aposetolo ma faifeautalai. Faamalamalama atu o i tatou fo'i e tatau ona sauniuni mo o tatou valaauga i le Ekalesia. Talanoaina ia fesili nei:

- E mafai faapefea ona tatou iloina le mea o loo finagalo le Alii tatou te faia?
- O ai e mafai ona fesoasoani ia i tatou i le faataunuuina o a tatou matafaioi?
- O a ituaiga sauniuniga e tutusa mo le to'atele o i tatou?
- O a ituaiga sauniuniga atonu e eseese mo i tatou taitoatasi?
- E faapefea ona fesoasoani aoaoga aloaia ia tatou sauniuniga?
- Pe ua tatou saunia ea ma le atoatoa mo valaauga a le Ekalesia? Aisea pe aisea foi ua leai ai?
- E mafai faapefea ona tatou fesoasoani i isi ia maua ma saunia mo lo latou lumana'i i le Ekalesia?

Faitau ma talanoaina le saunoaga lenei a Elder Neal A. Maxwell:

“E le amataina e le Atua i le fesili e uiga i lo tatou gafatia, ae na o le tatou avanoa, ma afai loa tatou te faamaonia lo tatou faatuatuaina, ona ia faateleina ai lea o lo tatou tatou faamaoni, na te faateleina lo tatou agavaa!” (“It’s Service, Not Status, That Counts” *Ensign*, Iulai 1975, 7).

Galuega 21:1–17. A tatou mulimuli i musumusuga a le Agaga Paia, o le a taitaia, puipuia ma faamafanafanaina i tatou. (25–30 minute)

Ia ta'u atu se mea na tupu ia te oe na e mauaina ai le taitaiga a le Agaga Paia. Valaaulia le vasega e faapea ona faamatala mai mea na tutupu ia i latou. (Fautua atu i ai e faaeteete mo mea e paia ma mea e patino lava ia i latou. Fesili: Aisea i nisi o taimi e faigata ai ona mulimuli i musumusuga a le Agaga?

Faitau e le vasega le Galuega 20:22–25, ma fesili: O a ni taunuuga na iloa e Paulo o le a oo mai pe afai na te mulimuli i le faatonuga a le Agaga e alu i Ierusalem?

Fesili i le vasega e mafaufau faapea ua mauaina se valaauga e faia se misiona ma le mautinoa afai ae alu atonu o le a le mafai ona toe fo'i mai i le aiga ma uo. Fesili:

- O le a le mea o le a faigata ai ona talia se valaauga faapea?

- O a ni auala o le a tofotofoina ai lou faatuatua?
- E faapefea ona tutusa lena ma le mea na oo ia Paulo?
- Faitau le Galuega 20:36–38. O le a le mea na faia e Paulo e uiga i lea valaauga?

Faitau le Galuega 21:1–17. Talanoaina nisi o fesili nei pe o fesili uma foi:

- O a ni lagona o uo a Paulo i lana filifiliga e alu i Ierusalem? (tagai ff. 4, 10–12).
- Aisea i nisi o taimi e taumafai ai uo e taofi oe mai le faia o le mea ua e manatu e tatau ona e faia?
- A tupu se mea faapea o le a sou lagona?
- O le a le tali a Paulo i ana uo?
- O le a le mea e ta'u mai ai i lena mea e uiga i le molimau a Paulo?
- O a ni auala e mafai ai ona tatou mulimuli i faaitaiga a Paulo?
- O a ni uiga na faaalua e uo a Paulo e tusa ai ma lona faamaoni? (tagai f. 14)
- Ua i ai se mea e te iloa sa tu atu ai sau uo mo le mea moni, ma fesoasoani ai lea mea ia te oe e mulimuli i le Alii? (Valaaulia nisi o le vasega e fia faaalua ni manatu i lenei mataupu)

Faitau i tagata o le vasega ia le faamatalaga lenei a William Law, o se tagata failotu i le senituri e sefuluvalu:

“Afai ua e le filifilia le Malo o le Atua, e leai se suiga i le faaiuga i le mea ua e filifilia.” (Neal A Maxwell. *The Smallest Part* [1973], 1).

Molimau atu i le taua o le mulimuli i le Alii pe o le a lava le tete mai o isi tagata?

Galuega 21:16–26. E tatau ona tatou onosa'i ma malamalama i tagata fou e liliu mai a o latou aoaoina le talalelei. (20–25 minute)

Faaali i le vasega le faafanua o le lalolagi ma talanoaina ni fesili faapenei:

- E eseese faapefea aganuu i le lalolagi? (Iloiloina se nuu se tasi pe lua fo'i)
- E tusa ma le fia tagata e liliu mai i le Ekalesia i tausaga taitasi? (tagai i lipoti faaletausaga o loo i le *Liahona* o Iulai).
- O le a le talaaga faalelotu o nei tagata faatoa liliu mai?

Fesili i le vasega:

- O a ni lu'i e faafeagai ma tagata mai i isi Ekalesia e liliu mai i le Ekalesia? Faamanino atu e tele ia mafaufauga, mataupu faavae, talitonuga ma faiga e tatau ona lafoa'i ina ia mafai ai ona mauaina i le atoatoa le talalelei a Iesu Keriso.
- O a ia aoaoga ma gaoioiga o le Ekalesia e te manatu e faafaigata i tagata fou e liliu mai ona faamasani ai? Aisea?

Faitau e le vasega le Galuega 21:16–20, ma fesili:

- O fea na oo i ai ia Paulo i ana malaga tala’i?
- O le a le lagona o Iutaia ua auai i le Ekalesia i Ierusalema e uiga i le tulafono a Mose?

Faitau ia fuaiupu 21–26 ma fesili:

- O le a le mea na faia e Paulo ona o lona faaaloalo i lagona o tagata Iutaia na liliu mai i ona taimi?
- E mafai faapefea ona tutusa o latou lagona ma lagona o tagata o le Ekalesia i ona po nei?
- O le a se mea tatou te aoao mai i le faaitaiga a Paulo?

Faitau e se tasi o le vasega le faamatalaga lenei a Peresitene Gordon B. Hinckley:

“O le mea e faalemanuia, o le le onosa’ia ma le lē faaaloalo o tagata i manatu o isi i le tele o taimi. Ua tatau ona tatou taumafai e faia ni uiga o le onosa’i ma le faaaloalo mo talitonuga ma aia tatau a isi. E tatau ona tatou faateleina le agaga o le felagolagoma’i i le va o tagata i le latou feagai ai ma isi ma faasaga i talitonuga ma faiga a isi. E mafai ona tatou le talitonu i tagata ae le o le fefinaua’i. E mafai ona tatou le talitonu e aunoa ma le sii a’e i luga o lou leo ma maua i le ita ma le mana’o e taufaaleaga i le isi. E tatau ona tatou aoao e faia faapea. E . . . tatau ona tatou faata’itaia i se agaga e sili atu e pei o Keriso i o tatou olaga, o le fealofani, ma faia i tagata uma e tusa lava po o ai latou te tapua’i i ai pe faapefea fo’i ona latou tapua’i, ae aua ne’i aafia ai fua ia aia tatau a isi”
Teachings of Gordon B. Hinckley, 666-67

Fesili: O le a sou lagona i lenei faamatalaga? Fai i le vasega e mafaufau i se tagata i le latou uarota, siteki, po o le aoga ua faatoa liliu mai i le Ekalesia po ua toe toaga mai i le lotu.

Fesili: O le a le mea e te faia e faaali atu ai lou onosa’i ma le alofa i lenei tagata? Lisi tali i luga o le laupapa ma uuna’ia le vasega e mulimuli i a Paulo i le faaaloalo lea i lagona o tagata faatoa liliu mai.

Galuega 23:11–31. O nisi o taimi, e faataunuaina ai le finagalo o le Alii e auala atu i gaoioiga a isi tagata. (20–25 minute)

Fai i le vasega e manatunatu o i latou o ni tagata aoga o loo fia mauaina ni togi lelei i le aoga. Fesili: O ai e mafai ona fesoasoani mai ia te a’u i le mauaina o ni togi lelei? (O ni tali e mafai ona aofia ai matua, faiaoga, uo.)

Ta’u atu i le vasega sa i ai ni tagata sa fesoasoani ia Paulo i le faataunuaina o mea na finagalo ai le Tama Faalelagi mo ia. Ia faitau auuaa’i le vasega i le Galuega 23:11–31. A’o latou faitau, malolo ma talanoaina ia fesili pei o nei:

- O le a le mea na finagalo le Alii e faia e Paulo? (tagai f. 11).
- O a ni fuafuaga na faia e taofia mai ai ia Paulo i le faia o le finagalo o le Alii? (tagai ff 12–15).

- O ai na fesoasoani ia Paulo ua mafai ai ona ia faataunuaina le finagalo o le Alii?

Fesoasoani i le vasega ina ia malamalama e i ai taimi e fesoasoani ai isi tagata ia i tatou i le faataunuaina o le mea o loo finagalo i ai le Alii tatou te faia. Atonu e te manao e faaoga ia fesili faapenei:

- E faapefea e isi tagata ona fesoasoani ia i tatou e sauni mo se misiona?
- E faapefea e isi tagata ona fesoasoani ia i tatou e fiafia i tusitusiga paia?
- E faapefea ona fesoasoani isi tagata ia i tatou e auauna atu?

Faamanino atu o nisi o taimi e faaoga ai e le Alii isi tagata e fesoasoani ia te Ia i le taliina o a tatou tatalo. Mo se faaitaiga, a tatou tatalo mo se fesoasoani mo se malamalamaaga i mataupu faavae o le talalelei, e Na te musuia se faiaoga e talanoaina lena mataupu faavae i le lesona. Valaaulia le vasega mo ni faamatalaga i ni mea faapea na tutupu i o latou olaga.

Faamanatu atu i le vasega e mafai fo’i ona faaogaina i latou e le Alii e fesoasoani i isi tagata e faataunuaina ai mea e finagalo le Alii latou te faia. Uuna’i le vasega e sauniuni e fesoasoani i soo se taimi e valaau mai ai le Alii.

Galuega 24–26

Faatomuaga

Na faafalepuipui Paulo i Kaisareia. A o i ai i le falepuipui, sa ia le fefe ma sa ia ta’u sa’o atu lona tetee i luma o Filiki, Feso ma Akeripa ma na i’u ai i le avatu o ia e faamasinoina e le Kaisara i Roma. O iina na ia maua ai le avanoa e faataunuaina ai le misiona na tuuina atu e le Alii ia te ia e tauaveina le molimau mo Iesu “i luma o Nuuese, ma tupu” (Galuega 9:15). Mata’ituina ia gaoioiga a Paulo e faaali mai ai ia i tatou lona faaaloalo i tulafono o le malo.

Ia suesue ma le agaga tatalo le Galuega 24–26 ma manatunatu i mataupu faavae nei ae le’i saunia au lesona.

O Nisi Mataupu Faavae Taua o le Talalelei e Saili Iai

- Matou te talitonu i le ususitai i tupu, ma peresitene, ma isi ta’ita’i faalemalo ma le usita’ia o tulafono (tagai Galuega 24–26; Mataupu Faavae o le Faatuatua 1:12)
- O i latou e i ai molimau i le mea moni e tatau ona fiafia e molimau mo Iesu Keriso, tusitusiga paia, ma upu a perofeta soifua (tagai Galuega 24:10-21; 25:8–11; 26:2–29).
- O tagata ola uma o le a toe tutu mai nai le oti (tagai Galuega 24:15; Alema 11:43–44).

Fautuaga mo le Aoao Atu

Filifili mai i aitia nei, pe faaaogaina ni au lava, a o e saunia lesona mo le Galuega 24–26.

Galuega 24–26. O ai lea? (15–20 minute)

O le taaloga lenei faalemafaufau o le a fesoasoani i le vasega e faamasani ai i tagata autu o loo i le Galuega 24–26. Tusi le siata lenei i luga o le laupapa. Ia ufiufi ia sikuea taitasi i se fasi pepa e leai se mea o tusia ai. O le autu o le faafetauia lea o igoa i faatusatusaga o tagata po o mea na latou faia ma tautala i ai. Valaaulia se tasi o le vasega e filifilia ni sikuea se lua (1-E ma le 3-O). Ia susu'e ma tuuina atu se taimi i tagata e su'e ai i le Galuega 24–26 ni mea o ta'ua ai tagata tatoatasi. Afai e tutusa ia sikuea, ona aua lea nei toe ufiufia. A leai, ona toe ufiufi lea ae sau se isi e piki nisi sikuea se lua. Faaauau seia uma ona susu'eina ia sikuea.

	A	E	I	O
1	Tutilo	tuafafine o Akeripa	Feso	Na faailoa atu e Tutilo ia Paulo ia _____.
2	Taitai o Roma	Paulo	tuua'ia Paulo o se "ta'ita'i o le ituaiga o Nasareta"	"O se mea ititi ona e faaliliuina lea o a'u e fai ma Kerisiano."
3	Akeripa	Filiki	Lusia	kapeteni sili
4	"Aua na le faia faalilolilo lenei mea."	Perenike	tauaveina le tulaga o Filiki o se kovana	Kaisara

Tali:

Tutilo=tuua'ia Paulo o se "ta'ita'i o le ituaiga o Nasareta" (tagai Galuega 24:1–5)

tuafafine o Akeripa=Perenike (Galuega 25:13; Taiala i Tusitusiga Paia, "Herota.")

Feso=tauaveina le tulaga o Filiki o se kovana (Galuega 24:27)

Na faailoa atu e Tutilo ia Paulo ia _____ =Filiki (Galuega 24:1–3)

Taitai o Roma = Kaisara (tagai Galuega 25:10–12; 26–32)

Paulo="Aua na le faia faalilolilo lenei mea" (tagai Galuega 26:26)

"O se mea ititi ona e faaliliuina lea o a'u e fai ma Kerisiano" = Akeripa (tagai Galuega 26:28)

Lusia = Kapeteni sili (tagai Galuega 24:7)



Galuega 24:10–21; 25:8–11; 26:2–29.
O i latou e i ai molimau i le mea moni e tatau ona fiafia e molimau mo Iesu Keriso, tusitusiga paia, ma upu a perofeta soifua.
 (30–35 minute)

Fai i le vasega e mafaufau faapea o loo o ma sana uo le lotu i se isi atunuu. Sa i ai ni nusipepa iina ua latou lomina ni mea e le moni e uiga i le Ekalesia, ma ua fesili lau uo mo se faamalamalama. Talanoaina ma le vasega ni fesili e pei o nei:

- O le a le mea pito i sili ona faigata e tusa ai ma lenei mea ua tupu? Aisea?
- O le a sou mafaufau o le a le mea o le a faafaigata ai e nisi tagata o le Ekalesia ona tu mo le Ekalesia i taimi faapena?
- Ana mafai ona lua talanoa ma le ta'ita'i o lenei atunuu mo se luasefulu minute, o le a sau tala o le a fai atu e uiga i le Ekalesia?

Faitau faatasi ma le vasega ia le "valaauina e tala'i," i le Galuega 26:12–18. Fesili:

- O ai na valaaulia Paulo e tala'i atu i ai le talalelei?
- O le a le savali na avatu e Paulo?
- E tutusa faapefea le savali a Paulo ma savali o loo tatou tauaveina i ona po nei?
- Faitau faatasi ma le vasega le Galuega 24:10–21; 25:8–11; 26:2–29 ma tali ia fesili nei:
- O le a le mea sa aoao atu e Paulo?
- E faapefea ona ia aoao atu?
- O ai sa ia aoaoina?
- O anafea na aoao atu ai?
- O a ni ona uiga na faaalua i le tala'iga o le talalelei?

Fesili i le vasega: O le a se mea e mafai ona tatou maua mai ia Paulo e uiga i le tumau ia tatou molimau ia Iesu Keriso? Talanoaina a latou tali. Faitau e se tasi o le vasega le saunoaga lenei a Elder Dalin H. Oaks:


"O le a le uiga o le 'tumau i le molimau mo Iesu'? O le mea moni o le tausia lea o ana tulafono ma auauna atu ia te ia. Ae faamata e le aafia ai fo'i ia le tuuina atu o le molimau ia Iesu Keriso, lo tatou faaola ma le Togiola, i e talitonu faapea foi i latou e le talitonu? Pei ona aoao atu e le Aposetolo o Peteru i le Au Paia i ona taimi, e tatau ona tatou 'faapaiaina le Alii le Atua i o tatou loto: ma saunia e tuuina atu se tali i taimi uma e fesiligia ai i [tatou] mo le faamoemoe o loo ia i [tatou]' (1 Peteru 3:15)" *Liahona*, Ianuari 1991, 33).

Uuna'ia le vasega e aoao atu le talalelei i isi tagata.

Galuega 27–28

Faatomuaga

Ina ua mae'a ia tausaga e lua na falepuipui ai i Kaisareia, na avatu ai Paulo i Roma e faamasino e Kaisara. Na latou o atu i Roma i se vaafaila faatasi ma le i si 276 pagota ma seila. Na iloa e Paulo o le a i ai se faalavavale o le a tupu ma fautuaina ia seila e malolo latalata i Lasea se'i te'a le taumalulu. Na le taliaina e le fitafita le fautuaga a Paulo, ma na i'u ai ina tuta'ia ma malepe le vaa i le nuu o Melita. Sa musuia ia Paulo e faamalosia atu i le pasese o le a faasoina i latou uma (tagai Galuega 27:21–26). A o i ai i luga o le nuu o Melita, na faamaloloina e Paulo i latou na mama'i ma na uina o ia e se gata oona ma e le'i afaina. Ina ua taunuu atu i Roma, na nofo pea o ia o se tagatanuu ma na leoleoina o ia e se fitafita. Na ia tala'ia le talalelei mo le isi lua tausaga, mo le faataunuuina o le folafolaga a le Alii (tagai Galuega 23:11). O i e gata ai le tusi a Galuega.



Aoao i le agaga tatalo, le Galuega 27–28 ma manatunatu i mataupu faavae nei a e le'i saunia au lesona.

O Nisi Mataupu Faavae Taua o le Talalelei e Saili Iai

- O le usita'ia o fautuaga a perofeta e maua ai e i tatou le puipuiga ma le saogalemu (tagai Galuega 27).
- O le faafetaia'ia o faigata ma le loto tele e mafai ai ona faamalosia o tatou tagata. O le faatuatua i le Atua e maua ai e i tatou le loto tele. (tagai Galuega 27:13–28:10).
- Na tala'i muamua ia Paulo i le au Iutaia ona sosoo ai lea ma tagata o Nuuese (tagai Galuega 28:23–28).

Fautuaga mo le Aoao Atua

- Filifili mai i aitia nei pe faaaogaina ni au lava, a o e saunia lesona mo Galuega le 27–28

Galuega 27. O le usita'i i fautuaga a perofeta e maua ai le puipuiga ma le saogalemu.

(20– 25 minute)

Faitau le tala leni i le amataga o le vasega:

“Ia Ianuari 1975, i se po pouliuli, ma le timu i Tasmania, na tutu'iina ai e se lagisi e 7,300-tane ni pou se lua o le Auala Laupapa o Tasmania e sosoo ai ia Hobart, Tasmania ma pitonuu i sasa'e i le isi itu o le ava. E tolu ni vaega o le auala laupapa na pauu. O se aiga Ausetalia e igoa ia Ling sa laasia luga o le auala laupapa ina ua faafuase'ia ona pepe ia moli. I le na lava vaitaimi na pasia ai i latou e se taavale saosasoa ma latou leiloa atu ai. Na tu malosi ia Murray Ling i le taofi o le taavale ma sesee ai ma tu loa pe tusa o le iata mai le si'ui o le auala laupapa' (Stephen Johnson, “Over the Edge!” *Readers' Digest*. Nov. 1977, 128).

“Na o ese mai ia Murray ma lona aiga mai le latou taavale ma logoina ia isi taavale i le mea ua tupu i luma atu. A o ia talotalo atu ona lima mo le faasoina o taavale, sa seu ese se taavale mai ona tafatafa ma pau loa i lalo' (itulau 128). O le taavale lona lua na tu ae o le taavale lona tolu na alu atu ma so'a le taavale a Ling i le siui o le auala laupapa.

“E le'i pine ae agai mai se pasi o loo tumu le pasese i le mea o loo tu ai Murray e aunoa ma se amana'iaina o le talotalo a Murray. I sana taumafaiga mulimuli ma le le popole i lona lava saogalemu 'na ia tamo'e ai i autafa o le pasi i le faamalama a le ave pasi. “O loo pau ese se vaega o le auala laupapa,” o lana faataio atu lea' (i. 129). Na seu ese le pasi ma tu loa ma faalagolago i puipui o le auala laupapa. E to'atele ni tagata na faaolaina” (Spencer J. Condie, *Liahona*, Ianuari 1994, 17).

Ta'u atu i le vasega e faapena le tulaga na oo i ai ia Paulo e pei o le tamaloa i luga o le auala laupapa. Faitau le Galuega 27:9–26, ma fesili:

- O a ni faigata na oo i ai le pasese a le vaa ina ua le faalogo le fitafita ia Paulo?
- O le a le mea tatou te aoao mai i lenei mea na tupu?

Faaua le tala i le faitauina e le vasega o fuaiupu 27–44. Fesili:

- Na faapefea ona faasaoina mai ia Paulo a o avea o ia ma se perofeta?
- O le a le mea e aoao mai i lenei mea e uiga i le tuuina atu o le faatuatuaga i mea e saunoa mai ai ia perofeta?

Talanoaina ma le vasega ia le “auala laupapa na pau,” po o faigata tatou te fetai'a i le olaga. Fesili:

- O ai ua tuuina mai e le Alii e lapataia i tatou e uiga i faigata o i le lumana'i?
- O le a le mea na fautuaina ai i tatou e perofeta lata mai nei?
- O le a le mea o le a tupu pe afai tatou te filifili e aua le faalogo i perofeta?
- O le a le mea e tupu pe a tatou faalogo ma usita'i?

Faitau le saunoaga lenei a Elder Spencer J. Condie, o se tasi o le Au Fitugafulu:

“Ua ou faafetai i nei Uso ua tatou lagolagoina e avea ma perofeta, tagata vaai, ma tali faaaliga o e ua lapataia i tatou i ala laupapa e le tataua ona tatou laasia” (*Liahona*, Ianuari 1994, 17).

Uuna'ia le vasega e faalatele le lagona lava lea e tasi mo perofeta soifua ma ia usita'ia ma le faateete a latou fautuaga.

Galuega 27:13–28:10. O le taulimaina o faigata ma le lototele e mafai ai ona faamalolosia o tatou tagata. O le faatuatua i le Atua e maua ai e i tatou le loto tele. (25–30 minute)

Fesili: O a ni faigata e feagai ma tagata i o latou olaga? (O tali e aofia ai, gasegase, toesea o e ua pele, popolega ona o mataupu tau galuega.) Faitau ma le vasega ia le Galuega 27:13–15 ma mata'ituina ia faigata na feagai ma Paulo a o malaga atu i Roma. Fesili: E faapefea ona tatou faatusatusaina lea i faigata poo “afa” i o tatou olaga?

Faitau ma le vasega ia le Galuega 27:16–44 ma mata'ituina ia uiga o Paulo na avea ma mea na saogalemu ai mai i nei faalavelave, ma lisi i luga o le laupapa. E aofia ai mea nei, loto tele, (tagai ff. 21–24), faamoemoe (tagai ff. 22, 25), faatuatua i le Atua (tagai ff. 30–31, faaoga lelei o le mafaufau ma lona tulaga gafatia o le faafilemuina o isi (tagai ff.33–36). Talanoaina pe faapefea i nei uiga o Paulo ona fesoasoani ia i tatou e foia ai ia “lu'i ma faigata.”

Aumai ni u'amea siisii mea mamafa i le vasega ma fai i se tagata o le vasega e siina le u'amea i luga mai i autafa o lona puimanava e oo atu i luga o ona tauau), pe valaaulia se tasi o le vasega e faia ni faamalosi tino nofo i luga, [push ups]. Faamalalalama atu e tutupu ma malolosi ia musele i le latou mafai lea ona sii ina o mea mamafa. Fesili:

- E faapefea ona faatusatusa ou uiga ma le tuputupu a'e faaleagaga i le tutupu a'e o musele?
- O le a le mea e oo ia i tatou pe a mafai ona tatou faafoia ia faigata i o tatou olaga?

Tusi i luga o le laupapa 2 *Korinito* 1:3–4; 4:8–9, 17; *Filipi* 3:8; 4:13. Valaaulia le vasega ia faitauina ia mau ma tali fesili nei:

- O a ni uiga o Paulo na faaaliga e uiga i lu'i o lona olaga?
- O a ni mea tatou te mafai ona aoao mai ia Paulo i le feagai ai ma o tatou lu'i?
- E faapefea i le sese o o tatou lagona e faatatau i lu'i o o tatou olaga ona aafia ai ia o tatou uiga?
- E mafai faapefea ona tatou faalateleina se uiga faaaliga i le taulimaina o tofotofoga o le olaga?

Faitau e se tasi o le vasega ia le molimau lenei a Elder Richard G. Scott, o se tasi o le Korama a le Toasefululua.

“E naunau le Alii i lou tuputupu a'e faaletagata ato ai ma lou atina'eina. O le a faavavevave ona faataunuu pe a e naunau e taliaina o Ia e ta'ita'ina oe i mea e aafia ai lou tuputupu a'e ma mea uma o le a lua feagai, pe e te fiafia i ai pe leai. A e faalagolago i le Alii, ona ua e malie e tuuina atu lou loto ma lou mafaufau e tutotonu i Lona finagalo, pe a e fesili atu e ta'ita'ia oe e le Agaga e faia Lona Finagalo, o le a e mauaina le fiafia tele ma faataunuuina i le atoatoa mai i mea na tutupu i le olaga faaletino. Afai e te fesiligia mea uma e faatonuina ai oe, pe tatū ou vae i soo se luitau lē manuia, ua e faafaigataina e oe lava le faamanuiaina o oe e le Alii” (*Liahona*, Iulai 1996, 25).

Faitau e le vasega le Galuega 28:10, ma fesili:

- E faapefea i le malosi faaleagaga ma uiga o Paulo pei ona faaali mai i nei fuaiupu ona maua ai le avanoa e faamanuiaina ai isi?
- O a ni auala e mafai ai ona tatou faatagaina le Alii e fesoasoani mai ia i tatou e avea ma faamanuiaga i isi fo'i tagata?

O LE TUSI A LE APOSETOLO O PAULO I ROMA

Na tusi leni
Tusia i le taimi
leni

Ulua'i malaga faafaifeautal'ai (Galuega 13-14)	Malaga lona lua faafaifeautal'ai (15:36-18:22)	Malaga lona tolu faafaifeautal'ai (Galuega 18:23-21:15)	Faafalepuipiina i Kaisareia ma Roma (Galuega 21:16-28:31)	E oo atu i le faafalepuipiina lona lua i Roma
--	--	---	---	---

E tusa o le T.A. 47-50 50-53 53-57 57-62 62-65

Tusitala: Ua faailoa mai e le Aposetolo o Paulo ia lava e faapea o ia na tusia le tusi i le ulua'i laina o le Tusi i Tagata Roma.

O E o Loo Tusi I Ai: O leni tusi sa tusia i tagata o Nuu Ese faapea ma le Au Paia Iutaia i Roma.

Talaaga Faasolopito: Sa tusia e Paulo leni tusi pe tusa o le T.A. 57 a'o i ai o ia i Korinito, a'o sauni e malaga atu i lana malaga mulimuli i Ierusalema. Sa ia auina atu leni tusi e saunia ai le Au Paia mo lona asiasi atu i Roma.

Uiga Tulaga Ese: O le Tusi a Roma o le tusi sili lea ona faatulagaina lelei o Tusi na tusia e Paulo ma atonu o le tusi lea e sili ona faaalua ai mataupu faavae i le Feagaiga Fou. O lea tusi o loo faasino tonu ia Iesu Keriso o le faapogai o le faaolataga e ala lea i le aoao mai o le auala e lafoa'i ai agasala ma suia i se olaga fou. O loo faamamafa mai foi i le Roma le taua o le savali i le Agaga ae le o le tulafono.

Autu: Sa tusi atu Paulo i le Au Paia i Roma e saunia ai i latou mo lana malaga, ae peitai o le mea sili ona taua o le tuuina atu lea o lana faamatalaga faa-aposetolo e uiga i le ata o le faaolataga mo tagata uma. E agasala i tatou uma, o le aoaoga lea a Paulo. Peitai o le faatuatua ma le usiusita'i i le Alii o Iesu Keriso, e mafai ai ona faaolaina i tatou uma e ala i Lona mana ma le alofa tunoa. I le faalateleina o leni autu sa faamatalaina ai e Paulo mataupu faavae e pei o le agasala ma le amiotonu, o le faatuatua ia Keriso ma galuega o le amiotonu, ta'uamio-tonuina, ma le filifilia. Sa aoteleina e Paulo le autu o leni tusi ina ua ia tusi atu e faapea:

“Aua ou te le ma i le tala lelei ia Keriso; aua o le mana lava lea o le Atua e ola ai i latou uma o e faatuatua, e muamua le Iutaia, atoa ma le Eleni.

“Aua ua faaalua mai ai le amiotonu a le Atua i le faatuatua, ina ia faatuatua ai, pei ona tusia, E ola le tagata amiotonu i le faatuatua” (Joseph Smith Translation, Roma 1:16-17).

Roma 1-3

Faatomuaga

O le Roma 1-3 o loo faamamafa mai ai o Iesu Keriso, ae le o le tulafono a Mose, o le faapogai lea o le amiotonu, ma o tagata uma e amiotonu e ala i le faatuatua ia te ia.

Ia suesue ma le agaga tatalo le Roma 1-3 ma mafauafau i mataupu faavae a'o le'i saunia au lesonea.

O Nisi Mataupu Faavae Taua o le Talalelei e Saili Iai

- O le Talalelei a Iesu Keriso e mafai ai ona maua e tagata uma le faaolataga (tagai Roma 1:16; ia tagai foi i le 2 Nifae 26:27-28, 33).
- Pe a fouvale ma tetee tagata i le Atua, ua aveesea e i latou i latou lava mai le Agaga Paia, ma o le a tuuina atu e le Atua i latou lava e mafatia i taunuuga atoatoa o a latou agasala (tagai Roma 1:21-32; tagai foi i le Mosaea 2:36-37; MFF 1:33).
- E amiotonu le faamasinoga a le Atua, ma e tauia tagata taitoatasi e tusa ma ana galuega lelei ma lona usiusita'i i tulafono o le talalelei (tagai Roma 2:1-16; tagai foi i le Luka 12:47-48; MFF 82:3).
- E manaomia e le amiotonu le faia o galuega lelei, ae le na o le talai atu o le amiotonu (tagai Roma 2:21-29; ia tagai foi i le Roma 10:1-4; 2 Nifae 31:5).
- E leai se tasi ua ola atoatoa i le tulafono. E faato'a mafai ona amiotonu i tatou e ala i le faatuatua ia Iesu Keriso, o se mea lea o le a mafai ai ona uuna'i i tatou e tausia Ana poloaiga (tagai Roma 3:9-26; ia tagai foi i le Alema 22:14; Moronae 6:4).

Fautuaga mo le Aoao Atu

Filifili mai i aitia nei, pe faaaogaina ni a oe lava, a o e saunia au lesonea mo le Roma 1-3.



New Testament Video vaega 13, “O Le Aoaoa Faavae o le Alofa” (13:07), o nisi ia o mea e mafai ona faaaoaga i le aoaoina atu o le Roma 2-5. Vaega 14, “Faatuatua ma Galuega” (8:18), e mafai foi ona faaaoaga i le aoaoina atu o le Roma 2-5; ae ui i lea, atonu e te filifili e faaaoaga leni vitio e aoao atu ai le Iakopo 2. (tagai *New Testament Video Guide* mo ni fautuaga e aoao atu ai.)

Roma 1:1. O le tusi o le Roma o le ulua'i tusi lava lea o le vaega o le Feagaiga Fou ua ta'ua “O Tusi,” o loo aofia ai ni tusi na tusia e Aposetolo anamua. (15-20 minute)

Fai i le vasega e ta'u mai se Misiona ua valaaulia ai se tasi o le latou aiga po o ni uo. Fesili atu: O le a le igoa o le Misiona o loo i ai lo tatou nuu, uarota, po o le paranesi? Ia ta'u i tagata o le vasega e faapea o Misiona ta'itasi e aofia ai ni nofoaga eseese se tele ma atonu o loo galulue faifeautal'ai i ni uarota, Paranesi, taulaga, aai, po o ni atunuu i taimi o a latou misiona. Ia fai i le vasega e taga'i i le “faafanua numera 6, *Taiala i Tusitusiga Paia.*”

- Ana faapea e valaauina Paulo i aso nei e galue i nei nofoaga, o le a le igoa o le “misiona” ua e manatu o le a faaali mai i lana tusi valaau e faamisiona?

- O a nofoaga na “siitia atu” i ai o ia?
- O le a le pogai ua e manatu ai o le a faigata mo ia?
- Pe mafai ea ona e iloa ni tulaga e tutusa ai igoa o nisi o aai sa galue ai Paulo ma igoa o tusi i le Feagaiga Fou? O le a le pogai ua mafua ai ona faapea?

Ia fai i le vasega e su’e ane i le “O Igoga ma le Faasologa o Tusi Uma i le Feagaiga Tuai ma le Feagaiga Fou” o loo i luma o a latou Tusi Paia. O le faaaogaina o faamatalaga e uiga i le auala e faatulaga ai le Feagaiga Fou ua faatulagaina lea mai le “O Se Faatomuaga I Le Feagaiga Fou” (tagai itulau 6), ia fai i le vasega e tusi faamatalaga i le faasologa o itulau e tusa ai ma le siata o loo i lalo:

O IGOGA FAASOLOPITO O TUSI PAIA UMA I
LE FEAGAIGA TUAI MA LE FEAGAIGA FOU,

ATOA MA MATAUPU O I AI

O LE FEAGAIGA TUAI.

O matagaga o i ai		O matagaga o i ai	
O le Kenece. O le tusi muamua a Mose	50	O le tusi a le Fallanga	12
O le Etoa. O le tusi e lua a Mose	40	O le Pea e Salomona	8
O le Levitika. O le tusi e tolu a Mose	37	O le tusi a Iaina	66
O le Numera. O le tusi e fa a Mose	36	O le tusi a Ieremia	52
O le Teuteronece. O le tusi e liua a Mose	34	O le Atega a Ieremia	5
O le tusi a Iosua	24	O le tusi a Ezekeia	48
O le tusi i Faamasino	23	O le tusi a Tasielu	12
O le tusi ia Ruta	4	O le tusi a Hosea	14
O le tusi muamua a Samuela	31	O le tusi a Iosiu	3
O le tusi e lua a Samuela	24	O le tusi a Amosa	9
O le uluai tusi i Tupu	22	O le tusi a Opetaina	1
O le tusi e lua i Tupu	25	O le tusi a Iona	4
O le tusi muamua o tala i nofoaga a tupu	59	O le tusi a Mika	7
O le tusi e lua o tala i nofoaga a tupu	36	O le tusi a Natana	3
O le tusi a Etera	10	O le tusi a Sapekuka	3
O le tusi a Neemia	13	O le tusi a Sefania	3
O le tusi ia Eeeta	10	O le tusi a Haka	2
O le tusi a Iogiu	42	O le tusi a Sakaria	14
O le tusi o Sallamo	150	O le tusi a Malaki	4
O Faatoa	31		

O LE FEAGAIGA FOU.

O matagaga o i ai		O matagaga o i ai	
O le eragala na tusi a Matala	23	O le uluai tusi a Paulo ia Timotee	6
O le eragala na tusi a Mareko	19	O le tusi e lua a Paulo ia Timotee	4
O le eragala na tusi a Luka	24	O le tusi a Paulo ia Tito	3
O le eragala na tusi a Ioane	27	O le tusi a Paulo ia Filemoni	1
O le tala i le galuega e le au Aposetolo	29	O le tusi a Paulo ia Eperu	13
O le tusi a Paulo i Roma	16	O le tusi a Iakopo	5
O le tusi muamua a Paulo ia Korinto	16	O le tusi muamua a Petera	5
O le tusi e lua a Paulo ia Korinto	12	O le tusi e lua a Petera	5
O le tusi a Paulo ia Kalatia	6	O le tusi muamua a Ioane	5
O le tusi a Paulo ia Efezo	6	O le tusi e lua a Ioane	1
O le tusi a Paulo ia Filipi	4	O le tusi e tolu a Ioane	1
O le tusi a Paulo ia Kolose	4	O le tusi a Iofa	1
O le tusi muamua a Paulo ia Tesalonia	5	O le tusi a Iofa	1
O le tusi e lua a Paulo ia Tesalonia	3	O le Pasaiga	22

Ia faamatala atu i le vasega le pogai ua ta’ua ai le tusi a Roma se’ia oo i le Eperu o Tusi a Paulo. Ia ta’u atu ia i latou o le Roma o le Tusi muamua i le Feagaiga Fou ae peitai e le o le ulua’i tusi lea na tusia e Paulo. Ia talanoaina po o a Tusi na tusia e muamua atu i le Roma.

Roma 1–3 (Mau Tauloto, Roma 1:16). Ua agasala tagata uma ma e manaomia se Faola. O le talalelei a Iesu Keriso e maua ai le faaolataga i fanau uma a le Tama Faalelagi.
(30–35 minute)

Ia fai atu i tagata o le vasega e manatu e faapea o loo o le vasega i se malaga i le penisula ua ta’ua o le Yucatan Penninsula i Mekisiko. Na valaaulia i latou e faaalu le fa aso e faatasi ai ma

se vaega o tagata e suesue i mea e eli mai lalo o le elelee ma o se vaega lea o loo suesue i mea ua faaleagaina o se nuu anamua o le Tusi a Mamona. Ina ia saunia mo lenei malaga, ia fai atu i le vasega e tusia le faasologa o mea o loo ta’ua i lalo e amata mai i le mea sili ona aoga se’ia oo ifo i le mea e faale aoga; moliuila, mea e tutuli ai iniseti, suo, seevae lelei, mea e faamama ai vai, vaa faaola, naifi faamoe, pusa e tuu ai vailaau. A uma ona tusia e le vasega a latou faamatalaga, ia faapea atu, “Oi, pe sa ou ta’u atu ea o le a tatou malaga i se vaa ma o le a goto lena vaa i le Vaifagaloo o Mekisiko?” Fesili atu:

- Pe avea ea le ta’u atu o lena faamatalaga ma mea e sui ai lau faatulagana o mea sili ona aoga i le malaga? Pe faapefea? (Atonu o le a mananao le toatele e tusia le vaa faaola i le pito i luga o a latou lisi.)
- Pe aisea ua outou manatu ai e taua tele le vaa faaola i le taimi muamua?

Ia tusia le faamatalaga o loo i lalo a Peresitene Ezra Taft Benson i luga o le laupapa po o le tufa atu foi o ni pepa o loo tusia ai i tagata o le vasega:

“E pei lava ona le manaomia e se tagata le meaai se’iloga ua fiaai, ua faapea foi ona ia le manaomia le faaolataga a Keriso se’i vagana ua ia iloa le pogai na te manaomia ai Keriso.

“E leai se tasi ua lava lona iloa i le pogai e manaomia ai e ia Keriso se’i vagana ua malamalama ma talia le mataupu faavae o le Pa’u faapea ma lona tulaga ua oo i tagata” (*Liahona*, Iulai 1987, 85).

Ia faitau atu lenei faamatalaga i le vasega ma talanoa e uiga i fesili o loo i lalo:

- O le a se mea e masani ona faamuamua e tagata i a latou lisi o mea e faamuamua nai lo le faaola? Aisea?
- Pe faapefea ona faatusaina le malamalama e uiga i le tatou vaa o le a goto ma se malamalama e uiga i le Pa’u?
- Pe mafai faapefea i le malamalama i le tulaga o lo tatou pa’u le ona suia o tatou lagona e uiga i le faaola?
- Pe ua faapefea ona avea lo tatou vaa faaola e pei ona ta’ua i la tatou tala e pei o le faaola?
- O le a sou lagona i le tulaga o le a i ai le lalolagi pe ana fai e malamalama tagata o loo i ai i latou i se tulaga pa’u ma o loo ola i se lalolagi pa’u? (Atonu e te mana’o e faaoga le 1 Nifae 10:6; Mosaea 16:4; ma le Alema 34:9 e faaali atu ai le auala o loo faamalalama manino ai e le Tusi a Mamona lenei mataupu ma fesoasoani ia i tatou ia iloa ai o loo i ai i le Tusi Paia.)

Ia ta’u atu i tagata o le vasega sa taumafai le Aposetolo o Paulo e fesoasoani atu i le Au Paia i Roma ina ia malamalama i le mataupu faavae o le Pa’u ma lona aafiaga i tagata uma lava. Ia faitau e i latou le Roma 1:14–17. Fesili:

- O le a se lagona sa i ai ia Paulo e uiga i le talalelei?
- O le a sou manatu i le pogai ua ia maua ai lea manatu?

Ia ta' u atu i tagata o le vasega o le Roma 1–3, o loo faamanatu atu ai e Paulo i le Au Paia e faapea o le talalelei a Iesu Keriso ua na o le pau lea o le faamoemoega o le faaolataga mo tagata Iutaia po o Nuuese. Sa aoao atu e Paulo ua ta' u amiotonuina i tatou i le mana o Iesu Keriso ma o lenei mana (po o le alofa tunoa) ua tuuina atu ia i latou ua i ai le faatuatua ia te Ia (tagai Roma 3:24–31). Ia fesili atu i tagata o le vasega i fesili o loo i lalo ma ia faaaoga mau o loo i ai e fesoasoani ai ia i latou i le taliina o nei fesili:

- Aisea ua manaomia ai le faaola e tagata o e mumusu e talia le Atua? (Sa faamatala mai e Paulo e faapea o le a to'atama'i le Atua ia i latou o e mumusu e talitonu ia te Ia ae o loo moli-mau mea uma na ia faia i Lona mana; tagai Roma 1:18–23.)
- Aisea e manaomia ai foi le faaola e tagata o e talitonu i le Atua? (Sa ta'ua mai e Paulo e faamasinoina tagata uma ia latou galuega ma e le faailoga tagata le Atua; tagai Roma 2:1–16; ia tagai foi i le 1 Nifae 17:35.)
- Aisea ua manaomia ai foi le Faaola e tagata Iutaia, o e na manatu o le a faasaoina i latou i le tulafono a Mose? (Sa lapata'i atu Paulo e faapea o le na o le tausia o le tulafono a Mose e le faaolaina ai i latou. Talu ai ona e leai se tasi e mafai ona ola atoatoa i tulafono, o le mea lea e faafanoina ai tagata uma i le tulafono; tagai Roma 2:16–3:23.)
- Aisea ua foliga mai ai ua manatu nisi tagata i le Ekalesia i aso nei e faapea o le na ona avea ma se tagata o le ekalesia o le a faasaoina ai i latou?
- O le a le mea o loo aoao mai i tusitusiga paia e uiga i lona talitonuga? (tagai Mataio 7:21).

Ia mafaufau e uiga i le faaiuina o lau lesone i lenei saunoaga a Peresitene Spencer W.Kimball:

“O le misiona a le ekalesia i ona tagata o le tuuina atu lea o mataupu faavae, polokalama, ma le perisitua i ona tagata e mafai ai ona latou saunia i latou lava mo le faaeaina. O lo tatou alualu i luma, i tagata taitoatasi ma le ekalesia, o le a iloa lea i le auala e tulimata'i atu ai ma le faatuatua olaga o tagata ina ia ola i le talalelei i totonu o le aiga. . . .ona mafai ai lea ona tatou malamalama e sili atu ona taua tagata nai lo polokalama, ma o polokalama a le ekalesia e tataua ona lagolagoina ai i taimi uma ma ia le alu ese mai le manatu o gaoioiga o le talalelei e faaautu i le aiga” (“Ola i le Talalelei i le Aiga,” *Liahona*, Oketopa 1978, 101).

Roma 1:18–32. Pe a fouvale tagata ma tetee i le Atua, ua tu'uese e i latou i latou lava mai le Agaga Paia, ma o le a faatagaina i latou e le Atua e mafatia i taunuuga o a latou agasala.
(25–30 minute)

Ia tape moli o loo i lo outou potu o le vasega ma ia ki se moliuila. (Atonu e te mana'o e vave ufiufi faamalama ina ia matua pogisa pe a e tapeina moli.) Ia fai atu i tagata o le

vasega ina ia manatu o le malamalama o le faatusa lea o le uunaiina po o le mafuta mai o le Agaga o le Alii.

Ia tape ma toe ki le moliuila i ni nai taimi a'o talanoaina nisi o fesili nei:

- O a nisi o mea e fai po o mafaufauga e mafua ai ona alu ese se tagata mai le Alii?
- O le a le mea e tupu ia i tatou i le faaleagaga pe a tatou o ese?
- O le a le mea e oo i o tatou olaga pe a agasala?
- O le a se lagona pe a le mafuta mai le Agaga o le Alii?
- Pe aisea ua avea ai le pogisa ma se faataitaiga lelei o le le maua o le Agaga? (Tagai Mataio 6:22–23).
- Pe aisea ua e manatu ai ua foliga mai e sili i nisi tagata le pogisa nai lo le malamalama? (Tagai MFF 10:21).

Ia ki moli o le potu o le vasega, ma ia faitau ma talanoaina nisi o mau nei: 2 Nifae 26:10–11; Mosaea 2:36–37; Mataupu Faavae ma Feagaiga 1:31–35. Ia fai atu i tagata o le vasega e faitau le Roma 1:24, 26, 28 ma ia sailia fasi fuaitau e faamatala mai ai le auala e faatagaina ai e le Atua tagata e o ese mai Lona Agaga (“tuuina atu i latou e le Atua,” “tuuina atu i latou e le Atua i mana'o e maasiasi ai”). Ia faamatala atu e le mafai ona mau pea le Agaga i tagata amioleaga. E le faapea ua le faaalua ai le le i ai o le alofa i le Atua ae peitai o le iuga lava lea e masani ona oo i amioga agasala a tagata (tagai Ioane 15:10; MFF 95:12). Ia fai atu i tagata o le vasega e faitau ma le le lea le Roma 1:21–32. Fesili:

- O a agasala e mafai ona e ta' u maia e taitaiina atu ai tagata ia o ese mai le Alii?
- O le a le leaga o ia agasala?
- Aisea ua taatele ai nei agasala i le lalolagi i aso nei?
- O a galuega amiotonu ua avea ma mea e ese ai mai agasala o loo faamatalaina i le Roma 1?
- Pe aisea ua avea ai le ola amiotonu ma mea e aumaia ai le Agaga o le Alii i o tatou olaga i se tulaga faateleina?

Ia toe tape tasi moli ma ia ki le moliuila i au mau. Ia molimau atu e faapea o loo aoao mai tusitusiga paia ia i tatou e uiga i le faamoemoe ma le malamalama ua tuuina mai e Iesu Keriso e taitaiina ai i tatou ia o ese mai le agasala.

Roma 4–6

Faatomuaga

Sa tusia e Elder Jeffrey R. Holland, a'o avea ma Fitugafulu, se faamatalaga e faapea: “O le togiola a Iesu Keriso na mua'i fuafuaina ma o le pule faitalia a le Alo Pele e To'atasi o le Atua. Sa ia ofoina mai lona soifua, e aofia ai ma lona tino ma le toto mama ma sa ia te Ia le naunauta'i faaleagaga e avea ma togiola (1) mo le tulaga ua oo mai ona o le Pa'u o Atamu i tagata ola

uma ma (2) ona o agasala faaletagata a i latou uma ua salamo, mai ia Atamu se'ia oo mai i le iuga o le lalolagi. Ua talitonu le Au Paia o Aso e Gata Ai o se mea moni lava lenei mea, ma o le faavae taua, o le mataupu faavae autu, ma o se tulaga silisili lava lea o le faaalii o le alofa paia i le ata o le faaolataga. Sa saunoa mai le Perofeta o Iosefa Samita e faapea 'o mea o loo e faatatau i la tatou tapuaiga ua na o ni mea faaopoopo' i le togiola a Keriso ([*Teachings of the Prophet Joseph Smith*], p.121)" ("Atonment of Jesus Christ," in Daniel H.Ludlow, ed., *Encyclopedia of Mormonism*, 5vols.[1992],1:82–83).

I le Roma 4–6 o loo tautino mai ai e Paulo e faapea e maua le ta'u amiotonuina e ala i le faatuatua ia Iesu Keriso ona o Lona mana togiola. Sa sii mai e Paulo le faaitaiga a Aperaa mo sa faamatala mai ai le mataupu faavae o le Pa'u e fesoasoani ai i le faamalalamaina o lenei mataupu. Sa talanoaina foi e Paulo le sauniga o le papatisoga. O le suesue i lenei sauniga faapea ma lona faailoga e mafai ai ona tatou malamalama i laasaga e tatau ona tatou uia ina ia maua le olioli i faamanuiaga atoatoa o le Togiola.

Ia suesue ma le agaga tatalo le Roma 4–6 ma ia mafafau i mataupu faavae o loo i lalo a'o saunia au lesona.

O Nisi Mataupu Faavae Tava o le Talalelei e Saili Iai

- O le faatuatua ia Iesu Keriso e aofia ai le faaalii o lo tatou talitonuga ma le alofa mo le Alii e ala i le tausia o Ana poloaiga (tagai Roma 4; ia tagai foi i le Ioane 14:15; Iakopo 2:14–19).
- O le faaolataga e le na o le faatuatua ma le usiusita'i e maua ai ae o le alofa o le Alii e ala i le Togiola. O Keriso e mafai ai ona maua e i tatou le faamagaloga ma ta'u amiotonuina po o le faamamaina (tagai Roma 5; tagai foi i le Kalatia 2:16; 2 Nifae 10:24).
- O le papatisoga o le faatusa lea o le maliu, tanumia, ma le Toetu o Iesu Keriso. O le faatusa foi lea o le maliu ma le tanumia o a tatou agasala ma le toe fanaufouina a'o tatou osi feagaiga e mulimuli i le Faaola (tagai i le Roma 6:1–13; ia tagai foi i le Mosaea 27:24–26; MFF 76:50–52).

Fautuaga mo le Aoa Atu

Filifili mai i aitia nei, pe faaagaina ni a oe lava, a o e saunia au lesona mo le Roma 4–6.



Roma 4–5. Afai tatou te faaalii le faatuatua i le Alii e ala i le tausia o Ana poloaiga, o le a la tuuina mai ia i tatou le meaalofa o le Ola e Faavavau. (45–50 minute)

Ia faaali atu se ipu malamalama o loo i ai ni vai aisa malulu. Ia fai atu i tagata o le vasega e manatu o loo i ai i latou i le toafa ma ua matua fia feinu lava. I luga o se mauga o loo i ai lenei ipu vai o le faaolataga. Fesili atu: O le fea o mea nei e faaola ai

lou olaga: O lou talitonuga e faapea o le a faaola oe e lena vai, o lau taumafaiga e tolotolo atu i luga o le mauga e aumai le vai, po o le inumia o le vai o loo i le ipu malamalama? Ia tuuina atu e faaali mai e tagata o le vasega o latou manatu. Aua ne'i faia sau faamatalaga e uiga i le sa'o o a latou tali. Ia fesili atu:

- Pe ua mafai faapefea ona faatusa lenei tulaga i lo tatou mana'omia o le faaolataga faaleagaga?
- O le a le mea e mafai ona faatusa i ai le vai? (O le Togiola, o le alofa tunoa ma le alofa o Iesu Keriso; tagai Ioane 7:37.)
- O le a se mea e mafai ona faatusa i ai le taumafai e tolotolo atu i le mauga? (Salamo, tausia poloaiga.)
- O le a se mea e mafai ona faatusa i ai le talitonu i le mana faaolaina o le vai? (Faatuatua, talitonuina.)
- O le a se mea e mafai ai ona faaolaina lou olaga?

Ia ta'u atu i le vasega o loo i ai i le vai le malosi po o le mana e faaola ai o tatou olaga. Peitai e tatau ona maua e i tatou le talitonuga e faapea o le a faasaoina i tatou e le vai ina ia mafai ai ona tatou taumafai e fe'aei a'e i le mauga. E tatou ona tatou fe'aei a'e i le mauga e aumai le vai. E tatau foi ona tatou inumia le vai ina ia faasaoina ai i tatou. O tulaga foi lava ia e manaomia i le Talalelei. O le Togiola a Iesu Keriso e maua ai e i tatou le faaolataga. Peitai ina ia aoga atoatoa Lana Togiola i o tatou olaga, e tatau ona tatou maua le faatuatua i le Alii ma ia faia mea na te manaomia.

Ia faamatala atu e faapea e pei lava ona tatou manaomia le vai pe a tatou matua fia feinu, ua faapea foi ona tatou manaomia se faaola e faalelei ai tulaga e oo mai ona o le agasala ma le oti. Faitau le Roma 5:12–14 ma fesili atu:

- Aisea ua manaomia ai se faaola mo tagata uma?
- O a ni auuala ua afaina ai i tatou uma ona o le Pa'u o Atamu?
- Pe to'afia tagata e agasala? (Tagai Roma 3:23).

Ia fai atu i tagata o le vasega e faitau le leoa le Roma 5:15–20 ma ia faailoga upu o le oti ma le agasala i taimi uma e tau ai i ai. Ia faitau le Roma 5:21 ma ia sailia pe mafai faapefea ona manumalo mai le agasala ma le oti. Afai e lava le taimi, atonu foi e te manao e faaali atu nisi o mau o loo i lalo o loo faaalii ai le pogai tatou te manaomia ai le faaola: 1 Nifae 10:6; 2 Nifae 9:21; Alema 12:22; Eteru 12:27; Mataupu Faavae ma Feagaiga 20:19–25.

Ia faamatala atu e pei lava ona i ai le talitonuga o le a faasaoina i tatou e le vai ma oo ai ina tatou sailia, ua faapea foi ona tatau ona tatou maua le faatuatua i le Alii o Iesu Keriso. O le faatuatua moni e uunaiina ai i tatou e tausia poloaiga a le Atua ina ia mafai ai ona tatou selesese i le togiola. Faitau Roma 4:1–3 ma ia saili i ni fuitau e faaalii ai ia i tatou sa i ai ia Aperaa mo le faatuatua. Fesili atu:

- Aisea ua e manatu ai na filifilia e Paulo Aperaa e ave a o se faaitaiga o le faatuatua?
- O a ni mea e mafai ona e manatua mai le olaga o Aperaa na faaalii ai le taitaiina o ia e lona faatuatua e faia mea amiotonu?

Ia fai atu i tagata o le vasega e faitau le Roma 4:17–25 ma ia sailia nisi faamaoniga o le faatuatua o Apereamo atoa ma galuega. Fesili atu: Pe aisea ua outou manatu ai na ala ai ona tusia i lalo nei faamatalaga auiliili e uiga i le olaga o Apereamo? Faitau le Iakopo 2:14–18; 2 Nifae 25:23; ma le faaliliuga a Iosefa Samita o le Roma 4:16, ona talanoaina lea o isi mea e uiga i le faatuatua ma galuega lelei. Ia tuuina atu le faamatalaga o loo i lalo a Elder Neal A. Maxwell, o se uso o le korama a le Toasefululua:

“Afai e leaga lona faamatalaina, o lona uiga o le a le gata ina maua e le faatuatua se talitonuga laitiiti ae o le a faigata foi ona fafagaina ma faateleina.

“E tele vaega patino o le faatuatua. E taua vaega taitasi. Sa aoao mai Peresitene Polika Iaga e tatau ona tatou maua le ‘faatuatua i le suafa [o Iesu], o ona uiga, ma le togiola. . . o le faatuatua i lona Tama ma le ata o le faaolataga.’ Ua na o lea le faatuatua, o le tala lea a Polika o le a maua ai i taimi uma ma se tulaga tumau le usiusita’i i tulaga manaomia o le Talalelei.” (*Lord, Increase Our faith* [1994], 2).

Ina ia fesoasoani i tagata o le vasega ina ia maua ai atili lo tatou faalagolago i le Faola, ia faamatala atu o le faatuatua lava ia o se meaalofa mai le Atua. E faapea foi le malosi e mafai ai ona faia galuega lelei. (Tagai i le *Taiala i Tusitusiga Paia* “alofa,”) O lona uiga, e le mafai ona tatou maua le talitonuga e manaomia ina ia manao i le vai, e le mafai foi ona tatou savavali atu i luga o le mauga agai i le vai, pe ana leai Iesu Keriso. Ia faamatala atu o le vai o le faatusa lea o le fesoasoani mai le lagi na tuuina mai e le Atua e ala i le togiola. O lenei meaalofa e maua ai e i tatou le mana e manaomia e salamo ai, tausia poloaga, ma avea ai faapei o le Atua.

Ia inu se vaega o le vai aisa. Ia molimau atu e faapea e le na o loo tatou faatuatua po o galuega lelei e mafai ona faasao ai i tatou. O le faatuatua ma galuega o ki ia e tatala ai le faitotoa i le faaolataga, ae peitai faato’a oo mai le faaolataga e ala ia Iesu Keriso (tagai Mosaea 3:17; Alema 38:9; Mose 6:52). Ia fai atu i tagata o le vasega e faitau i le Roma 5:1–11 ma ia saili po o le a le auala na aoao atu ai Paulo i le Au Paia e faapea e maua le faaolataga e ala i le Togiola ma le alofa tunoa o Iesu Keriso.

- O le fea o fuaitau a Paulo ua sili ona faagaetia ai oe?
- Pe ua mafai faapefea i le maua o se malamalama sili atu ona loloto e uiga i le Togiola ona fesoasoani ia i tatou e alofa ai i le Faola?

Ia faamanatu atu i tagata o le vasega e faapea e ui lava ina sa finagalo malie Iesu i le mua’i olaga e avea ma o tatou Faola, e le’i faapea sa tatau ona maluu o Ia mo i tatou. O lea galuega o se galuega alofa. Ia usu le viiga “Ou te Tu ma Ofo” (Viiga numeru 107) ma ia fai atu i tagata o le vasega e mafaufau i le taua o ia upu.

Roma 6. O le Papatisoga o le faatusa lea o le maliu, tanumia, ma le Toetu o Iesu Keriso. E avea foi ma faatusa o le maliu ma le tanumia o a tatou agasala atoa ma lo tatou fanaufouina a’o tatou osi feagaiga e mulimuli atu i le Faola. (35–40 minute)

Ia tofi se tasi o le vasega e faitau atu i le vasega le faamatalaga o loo i lalo mai le lauga a Elder Henry B. Eyring, o se uso o le Korama a le Toasefululua:

“E mafai ona manatua e i tatou uma taimi i o tatou olaga na tatou faalogoina ai se uunaiga ina ia faia e sili atu nai lo le mea sa i ai, ia oo a’e i se mea e sili atu ona maua. Atonu na oo mai lenei lagona i le taimi lava lea na oo mai ai ia i tatou se manatu ‘e tatau ona i ai se mea e sili atu ona lelei i le olaga nai lo lenei.’ A’o le mea e faanoanoa ai, o loo i ai foi ni taimi tatou te lagona ai e pei ua tatou fiu. Ona oo mai ai lea o le manatu e pei o le ‘atonu o lenei lagona o le faanoanoa o le uiga tonu lava lea o le olaga. Atonu e tatau ona ou aoao e ola ma lenei mea [lagona faanoanoa]. E foliga mai o le lagona lena e maua e isi tagata uma.’ . . .

“Peitai o tagata uma ua ou iloa lelei, aemaise o tagata e sili ona lotu vaivai ma sili ona faanoanoa, o le a latou ta’u maia ia te oe e i ai se taimi i o latou olaga, atonu na o le tasi le mea latou te manatua, na latou lagona ai lena uunaiga agai i luga, o le manatu lea atonu e i ai se mea e sili atu ma maua atu” (*Covenants* [Faesaite OAE mo tagata talavou matutua ua o i le Kolisi, 6 Setema 1996], 1).

Ia fai atu i tagata o le vasega e mafaufau i taimi na oo ifo ai ia i latou ni lagona o le lotu vaivai po o le faanoanoa e pei ona faamatalaina e Elder Eyring. Ia valaau atu i nisi e fia talanoa i le auala na latou taulimaina ai ia lagona. Fesili atu: O le a le mea na e faia na maua ai le faamoemoe?

Ia valaauina tagata o le vasega e faitau i mau o loo i lalo ma ia saili le to’afilemu ma le faamoemoe o loo maua ai: Isaia 40:30–31; Mosaea 4:6–7; Moronae 10:32–33. Ia fesili atu: O le mana o ai e mafai ai ona faaatoatoaina i tatou ma maua le faaolataga? Ia faamatala atu i tagata o le vasega e faapea o le to’atele o tagata sa tusi atu i ai Paulo sa talitonu pea i le tulafono a Mose ma sa le malamalama ua faataunuuna lea mea e le Togiola. Sa manaomia e i latou se tasi e aoaoina i latou e faapea e mafai ona latou faatoilaloina le agasala e ala ia Iesu Keriso, ae le o le tulafono. Ia faitau e tagata o le vasega le Roma 6:8–23 ma ia tagai po o le a le mea sa aoao atu e Paulo e uiga i le agasala ae po o ai foi e fesoasoani ia i tatou ina ia manumalo i ona aafiaga.

Sa faaauau le faamatalaga a Elder Eyring e faapea:

“E sili atu mea e faia e le Tama Faalelagi nai lo le faatagaina o oe e lagona lena uunaiga agai i luga. Ua ia

saunia se auala e oo a'e ai maualuga – e toetoe lava e sili atu i le mea e mafai ona tatou manatu i ai—e le na o o tatou lava mana, o ni mana ia e le lava, ae auala i le mana o le Togiola a Lona Alo, o Iesu Keriso. . . .

Sa le gata ina saunia e lo tatou Tama Faalelagi se Faaola ma se Talalelei a Iesu Keriso, lea o loo aoao mai ai ia i tatou le faamoemoega o le olaga ma tuuina mai ia i tatou poloaiga, ae sa ia saunia foi feagaiga e mafai ona tatou osia ma Ia. O ia feagaiga sa ia saunia ai ni sauniga e mafai ai ona ia faailoa mai mea na ia folafola mai pe osi feagaiga foi e fai ma mafai ai e i tatou ona faailoa mea na tatou folafolaina pe osi feagaiga e fai” (Covenants, 1).

Ia molimau atu tatou te maua le mana o le Togiola i o tatou olaga a’o tatou faia ma tausia feagaiga paia.

Ia faamatala atu i tagata o le vasega e faapea ua aoao mai e le Roma 6:1–2 ia i tatou ina ia liliuese mai a tatou agasala. Ia faitau e i latou le fuaiupu 3–7 ma ia iloa ai le ulua’i sauniga ma le feagaiga e faatagaina ai i tatou e faia lea mea. Ia faaali atu i tagata o le vasega se suo pe tusi se ata o lea mea i luga o le laupapa. Ia aoao atu e faapea o le papatisoga o se taimi lea tatou te osifeagaiga ai ina ia “tanumia” a tatou agasala ma lo tatou natura agasala ma ua tatou maua ai le mana e “tanumia” ai a tatou agasala e ala i le Togiola a Iesu Keriso. Ia talanoaina nisi o fesili nei:

- O le a se mea e faatusa i ai le papatisoga? (Maliu, tanumia, ma le Toetu; tagai MFF 128:12– 13.)
- Afai o le papatisoga o se taimi lea tatou te osifeagaiga ai ina ia “tanumia” pe le toe faia ai a tatou agasala, pe aisea ua taua ai lo tatou papatisoina e ala i le faatofu?
- O a isi mea o le soifuuga o Keriso ua faatusa i ai le papatisoga? (O Lona Maliu, tanumia, ma le Toetu.)
- Pe ua faapefea ona sili atu ona lelei o tatou olaga pe afai tatou te filifili e lafoa’i ese o tatou tagata agasala ma papatisoina?
- Faitau i le Mataupu Faavae ma Feagaiga 20:68–69; Mosaea 18:8–10. E tusa ai ma nei fuaiupu, o a nisi o folafolaga tatou te faia i le papatisoga?

Ia mautinoa ua malamalama tagata o le vasega e tusa lava pe ua faatusa le feagaiga o le papatisoga i le tulaga o le mafai ona tatou mama mai le agasala, ae le mafai ona fufulueseina e le papatisoga a tatou agasala. O le papatisoga o se taimi lea ua tatou ta’utino atu ai le avefa ma tagata mama ma savali i se olaga fou, o se taimi tatou te saunia ai e maua le mea foa’ifua o le Agaga Paia. O le mana e faamamaina ai o le Agaga Paia e faato’a mama ai i tatou mai le agasala. Atonu e fesoasoani le faamatalaga lenei a Elder Bruce R. McConkie o le na avefa ma uso o le Korama a le Toasefululua:

“E le faapea e tuuina atu agasala i le vai o le papatisoga, e pei ona tatou gagana ai faafaatusa, ae ina ua tatou maua le Agaga Paia. O le Agaga Paia o le Atua na te aveesea mea leaga ma aumaia i tatou i se tulaga o le amiotonu. E mama i tatou pe afai tatou te maua moni le faaaumea ma le mafutaga a le Agaga Paia. O lona uiga la o le agasala ma mea leaga ma le tiapolo e susunuina mai o tatou agaga e pei o le faia e ala i le afi” (A new witness for the Articles of Faith, 290; ia tagai foi i le 2 Nifae 31:17; Moronae 6:4; 8:25–26).

Roma 7–8

Faatomuaga

Ina ua faataunuuna e Iesu Keriso le tulafono a Mose, sa suia le feagaiga tuai i le tulafono o le talalelei. Sa taumafai Paulo e faatauanau i latou o e sa pipii pea i le tulafono ma sauniga a Mose ina ia o ese mai lea tulafono ma ia talia atoatoa le talalelei a Iesu Keriso, o le feagaiga fou lea (tagai Eperu 9:15). O loo i ai i le Roma 7–8 se faatusatusaga o se fafine o le ua le toe noatia i le tulafono i lana tane pe a oti o ia. O loo ta’ua ai le mea moni e faapea o le Au Paia e le toe noatia i le tulafono a Mose ina ia uma ona faataunuuna e Keriso. Ona molimau lea o Paulo e faapea o i latou o e faatauaina le talalelei ma talia ona feagaiga e avefa i latou ma suli faatasi ma Iesu Keriso ma maua mea uma o loo i ai i le Tama Faalelagi.

Ia suesue ma le agaga tatalo le Roma 7–8 ma ia mafaufau i mataupu faavae nei a’o saunia au lesona.

O Nisi Mataupu Faavae Tavaa o le Talalelei e Saili Iai

- O le Togiola e maua ai e i tatou le mana e manumalo ai i le agasala; o le auala lea e avefa ai i tatou ma tagata fou, o fanau ua toe fanaufouina faaleagaga a le Atua (tagai Roma 7:14–25; 8:1– 14).
- E leai se mea e mafai ona tuueseeseina ai soo moni o Keriso mai le alofa o le Tama ma le Alo (tagai Roma 8:11–39; tagai foi MFF 122:9).

Fautuaga mo le Aoao Atu

Filifili mai i aitia nei, pe faaaogaina ni a oe lava, a o e saunia au lesona mo le Roma 7–8.

Roma 7. Na faataunuuina le tulafono a Mose ia Iesu Keriso ma suia ai i le tulafono o le Talalelei.

(10–15 minute)

Ia fai atu i tagata o le vasega e ta'u mai ni tulafono a le aiga e tatau ona latou tausia. Ia tusia se lisi o ia tulafono i luga o le laupapa, ona talanoaina lea o fesili nei:

- O ai na faia nei tulafono?
- Pe aisea ua e lagona ai e tatau ona e usiusita'i i ia tulafono?
- O a tulafono atonu e fetau i tamaiti laiti ae le fetau i tagata matutua?
- Pe ua mafai faapefea ona avea tulafono ma faamanuiaga i o tatou olaga?

Ia ta'u atu i tagata o le vasega e faapea e pei lava ona o le a oo mai se taimi o le a le tausia ai e i latou tulafono a o latou matua e pei ona faatutuina mo lo latou aiga, e faapea foi ona oo mai se taimi e le toe faamoemoeina ai e ola Isaraelu i le tulafono a Mose. Ia faamanatu atu i tagata o le vasega e faapea i totonu o le Tusi a Roma, o loo tautala atu ai Paulo i tagata o e o loo pipii pea i tu ma aga o le tulafono a Mose. Ia valaauina tagata o le vasega e faitau le Roma 7:1–6 ma ia saili le faatusatusaga sa faaoga e Paulo e faaali atu ai i tagata ua le toe noatia i latou i le tulafono a Mose. Ia mafaufau e uiga i le faaogaina o le faamatalaga o loo i lalo a Elder Bruce R. McConkie:

“O Paulo o se tagata poto tele i lona faia o ni faamalamalama e oo atu ai ana aoaoga o le talalelei i totonu o le aiga. I totonu [o le Roma 7:1–6] ua ia faatusaina ai le faamaoni o tagata Isaraelu i le tulafono a Mose ma le faamaoni o se ava i lana tane. O le umi lava e ola ai lana tane, e noatia ai se ava ia te ia, e tatau ai ona usiusita'i i ana tulafono, ae afai e faatasi atu o ia i se isi, e avea o ia ma se tagata mulilua. Peitai afai e oti le tane, e le mafai ona toe faatonuina e ia ni mea e fai a le fafine, ma o le a saoloto o ia e faaiipoipo atu i se isi tagata; o le a le toe saisaitia le fafine i le ua maluu.

“Ua faapea foi Isaraelu ma le tulafono. O le taimi lava e olaola ai le tulafono, ma ua faamamafaina, ua faapea foi ona faaiipoipo atu Isaraelu i lea tulafono ma e tatau ona usiusita'i i ai. Afai e pipii atu Isaraelu i isi atua, pe mulimuli i isi lotu, e avea lea ma mulilua. Peitai o le taimi nei ua faataunuuina le tulafono; ua le toe i ai; ua mate leni tulafono ia Keriso; ma ua faaiipoipo atu Isaraelu i se isi, o Iesu Keriso, o le e ona tulafono o le talalelei e tatau nei ona usiusita'i i ai” (*Doctrinal New Testament Comentary*, 2:253–54).

Ia valaau atu i tagata o le vasega e faitau le Mosaea 13:27–30 ma le Alema 34:9–13, ma ia fesili atu:

- Aisea na tuuina atu ai e le Atua ia Isaraelu le tulafono a Mose?
- Pe aisea ua e manatu ai o nisi o tagata Iutaia i ona po o Paulo atonu sa faaauau pea ona pipii atu i le tulafono?

- O a mea na tutupu na faataunuuina ai le tulafono a Mose?

Ia faamatala atu o le Roma 7:7–25 o loo tali ai Paulo i nei fesili ma ua faamamafaina ai le mea moni taua e faapea o le tulafono o le talalelei ua suia ai nei le tele o vaega o le tulafono a Mose. Ia faamanino atu e tele suiga i le Roma 7 i le Faaliliuga a Iosefa Samita o loo faamanino mai ai leni mataupu faavae. Ia uunaiina tagata o le vasega e suesue i le faaliliuga a Iosefa Samita pe a faitau i le Roma e 7 pe a faia suesuega a le tagata lava ia.

Roma 8. O le Togiola e mafai ai e i tatou ona maua le mana e faatoilaloina ai lo tatou mafui atu i le agasala; ona avea ai lea o i tatou ma tagata fou, o fanau toe fanauina faaleagaga a le Atua. (35–40 minute)

Ia talanoaina faatasi ma le vasega le uiga o le upu *tofi*. Ia talanoa e uiga i se auala e mafai ai ona tatou maua mea faitino, amioga, ma meaalofo faaleagaga. Ia faaalua atu pe talanoa foi e uiga i nisi o mea taua, amioga, poo ni meaalofo ua e maua mai ou augatama. Ia tuuina atu fesili nei:

- O le uili a ai e tatau ona aofia ai oe?
- O le a le mea e tasi e sili ona e manao ina ia e maua? Aisea?
- O a uiga lelei po o amioga a e na e tupuga mai ai o loo ua e faamoemoe e maua?

Faitau le faamatalaga leni:

“Ua manatu le Au Paia o Aso e Gata Ai o Iesu Keriso o le Atalii Faaleagaga Ulumatua lea o le Atua le Tama ma o le Pele e Toatasi na fanaua a le Tama i la le tino. Talu ai ona o leni tulaga muamua, ua mafua ai ona avea o Ia ma suli o le Tama. Ona o le usiusita'i atoatoa i le finagalo o le Tama, ma ua alualu i luma mai lea mea i lea mea e ala i le usiusita'i i le talalelei ma ona sauniga atoa ma le saunia o le Togiola e le gata, o le ala lea ua avea ai Iesu ma Faola o tagata uma ma ua avea foi ma suli i mea uma ua i ai i le Tama. O i latou e talia Iesu Keriso e avea ma o latou togiola, salamo ia latou agasala, usiusita'i i sauniga o le talalelei, ma ola usiusita'i ma le lotu i ai ma avea le Agaga Paia ma o latou ta'iala, e mafai foi ona avea i latou ma suli o le Atua ma suli faatasi ma Iesu Keriso. I le faavavau, e mafai ona latou maua le mea moni e tasi, mana, poto, mamalu, ma le faaeaina e pei ona sa i ai i le Atua le Tama ma le Alo (tagai MFF 84:38)” (“Heirs,” in *Encyclopedia Mormonism*, 2:583).

Ia fai atu i tagata o le vasega e faitau le Mataupu Faavae ma Feagaiga 84:33–40 ma saili le mea ua folafola mai i le tautoga ma le feagaiga a le perisitua. Faitau i le Roma 8:15–19 ma saili mo le mataupu faavae o le tofi. Ia talanoaina nisi o fesili nei:

- O le a le mea na aoao mai e Paulo e uiga i le avea o i tatou ma e e ulu atu i le malo o le Tama Faalelagi?

- O le a le uiga *Ava*? (“Tama.” Sa faaoga lenei suafa e Iesu Keriso ma tagata anamua o le Ekalesia e avea ma suafa paia ma le silisiliese mo le Tama Faalelagi).
- O le a se mea o aoao atu ia te oe e uiga i le upu *Ava* e uiga i le alofa o le Tama Faalelagi ia i tatou?
- O le a se mea ua aoao mai i le fuaiupu 17 e tatau ona tatou fai ina ia avea ai ma suli faatasi ma Iesu Keriso?
- Mai le fuaiupu 18, pe ua faapefea ona e manatu o faamanuiaga o le avea ma suli o le Atua ua faatusaina lea i tulaga manaomia?

Sa tuuina mai e le Perofeta o Iosefa Samita le faamatalaga o loo i lalo e uiga i le suli faatasi:

“O le maua o le mana e tasi, le mamalu e tasi ma le faaeaina e tasi, seia oo ina e taunuu atu i le tulaga o se Atua, ma e afio a’e i le nofoalii e i ai le mana e faavavau, e pei o i latou o e na muamua atu”
(*Teachings of the Prophet Joseph Smith*, 347)

Sa saunua mai Elder Bruce R. McConkie e faapea:

“O se tagata e suli faatasi o ia lea na te maua le tulaga tutusa ma isi suli uma e aofia ai le Suli Autu o le Alo lea. O suli taitasi ua tofu ma le tulaga tutusa ma le vaega o mea uma. Afai e iloa e se isi mea uma, ua faapea foi ma isi tagata uma. Afai e i ai i se tasi le mana uma, ua faapea foi i latou uma o e ua avea ma suli faatasi ma Ia. Afai e maua e se tasi le atulaulau, ua faapea foi ona tutusa ma e ua tuuina atu i ai le suli” (*Mormon Doctrine*, 395).

Ia molimau atu e moni lolafolaga a le Tama Faalelagi ma e moni lava e mafai ona tatou maua mea uma ua ia te Ia. E mafai foi ona fesoasoani mau nei: Kalatia 3:26–29; 4:1–7; Mataupu Faavae ma Feagaiga 50:26–28; 88:107.

Ia fai atu i tagata o le vasega e mafaufau e uiga i le mauaina o mea uma ua i ai i le Tama Faalelagi. Ia fesili atu:

- O le a sou manatu i le uiga o lea mea?
- O le a sou manatu i le mea o le a e naunau e fai e agavaa ai mo lena ituaiga o tofi?
- O le a se auala e te manatu e tatau ona tatou faaoga i ai lena tofi?
- O le a le mea na fai e le Faola e agavaa ai mo le avea ma Suli Autu o le Tama?

Ia tusia fesili o loo i lalo i luga o le laupapa:

- O le a se auala tatou te agavaa ai e avea ma suli faatasi ma Iesu Keriso?
- O le a se lagona o le Atua e uiga ia i tatou? O le a le faia a Ia ma i tatou taitoatasi?
- Aisea ua e manatu ai na ia saunia se avanoa mo i tatou taitoatasi e avea ai ma suli faatasi ma Lona Alo o Iesu Keriso?
- O a ni faamanuiaga o le a oo mai i o tatou olaga a’o tatou taumafai e avea ma tagata agavaa mo le mauaina o mea uma ua i ai i le Tama Faalelagi?

Ia vaevae le vasega i ni vaega se lua. Ia tofi se tasi e su’e le Roma 8:1–14 ae su’e e le isi le Roma 8:28–39. Ia saili e i latou tali i fesili ma ia saunia e ta’u mai po o a fuaiupu na fesoasoani ia i latou e maua ai le tali. Ia talanoaina faatasi ma le vasega mea na latou maua.

Ia faaiu i le usuina o le pese “O A’u Se Atalii o le Atua (*Viiga*, numera184). Ia tuuina atu lau molimau o i tatou moni lava o le fanau faaleagaga a le Tama Faalelagi. E mafai ona tatou fo’i atu e mau faatasi ma Ia i se aso ma maua mea uma ua ia te Ia.

Roma 9 - 11

Faatomuaga

O i tatou o le fanau a le Atua, ma sa tatou mau faatasi ma ia a’o le’i o mai i tatou i le lalolagi. Sa ia foafoaina i tatou i Lona faatusa ma tuuina mai ia i tatou taitoatasi le mana ma le malosi e avea ai e faapei o Ia. Ina ia avea e pei o le Atua o le ola lea e faavavau.

Sa aoao mai Elder M. Russell Ballard, o se uso le Korama a le Toasefululua, e faapea:

“A’o le’i foafoaina le lalolagi, sa ola i tatou uma e avea ma fanau faaleagaga a lo tatou Tama Faalelagi. I se tulaga masani o le avea ma tofi sa tatou maua i le amataga o lo tatou olaga uiga ma amioga a lo tatou Tama Faalelagi. O i tatou o Lana fanau faaleagaga. O nisi o uiga o loo i ai i lo tatou Tama Faavavau, ua faapea foi ona tatou maua. O le tulaga ua oo nei i ai o ia e mafai foi ona tatou oo i ai. (Mo se malamalamaga faaleagaga e uiga i lenei manatu taua faamolemole taga’i i le Galuega 17:29 ma le Roma 8:16.)” (*Our Search For Happiness: invitation to understand the Church of Jesus Christ of Latter Day Saints* [1993], 70).

Sa faamatala mai e Bruce R. McConkie e faapea:

“O le taleni po o le atamai sili ona taua e mafai ona maua e le fanau faaleagaga a le Tama o le taleni lea o le faaleagaga. O le to’atele o i latou o e na maua lenei taleni sa filifilia, a’o le’i fananau mai i latou, ina ia o mai i le lalolagi i le tulaga o le avea ma aiga o Isaraelu. Sa mua’i faauuina i latou ina ia maua

faamanuiaga sa folafola atu e le Alii ia Aperaamo ma lana fanau i o latou augatupulaga uma. O lenei mua'i faauuina o se filifiliga . . . e ui lava ina faaolaina tagata uma i le ususita'i, ua iloa e nisi e sili atu ona faigofie le talitonu ma ususita'i nai lo isi. Ona i ai lea o le manatu, e pei ona sa aoao e Iesu, e faapea ua iloa e ana mamoe lona leo ma o le a latou le mulimuli atu i faatosinaga leaga a le lalolagi" (*A New Witness for the Articles of Faith*, 512–13).

I le Roma 9–11 sa aoao atu ai e Paulo le mataupu o le filifilia, po o le mua'i faauuina. Sa malamalama e na faalogologo ia Paulo i le mataupu o le mua'i olaga ma sa latou iloa le pogai na avea ai Isaraelu ma nuu o le feagaiga a le Atua. Sa faamanino e Paulo e faapea o le mataupu o le mua'i faauuina ua le ese lava lea ma le avanoa e maua e Nuuese o le avea lea ma tamafai i le aiga o Isaraelu ma maua atoatoa faamanuiaga ma folafolaga o le talalelei.

Ia suesue ma le agaga tatalo le Roma 9–11 ma ia mafaufau i mataupu faavae o loo i lalo a'o le'i saunia lau lesona.

O Nisi Mataupu Faavae Tava o le Talalelei e Saili Iai

- I le mua'i olaga sa mua'i faauuina (filifilia) nisi o tagata e fananau mai i le aiga o Isaraelu ma maua faamanuiaga faapitoa ma tiute tauave i lenei olaga (tagai Roma 9:1–5, 11, 23; 11:2, 5; ia taga'i foi i le Jeremia 1:5; Efeso 1:3–5).
- O le avea ma se tasi o le aiga o Isaraelu e faaletaua lea se'i vagana ua talitonu se tagata ma ususita'i i le Alii (tagai Roma 9:31–33; 10:1–4, 16, 21; 11:1–10, 25).
- O i latou o e faamaonia i latou lava o ni Isaraelu faaleagaga ma avea ma fanau filifilia a le Alii o i latou ia e talia ma mulimuli ia Keriso (tagai Roma 9:6–8, 15, 24–26, 30; 10:5–13, 17–20; 11:1–5, 17–28; ia tagai foi i le 2 Nifae 30:2).
- O i latou o le aiga o Isaraelu o e teteie ia Keriso latou te le maua o latou faamanuiaga na folafola mai. Ona ofoina atu lea e le Alii o le talalelei ma ona faamanuiaga i Nuuese faapea foi ma tagata o Isaraelu o loo salalau ai. Afai e teena e nei tagata aoaoga a Iesu Keriso, o le a le maua foi e i latou faamanuiaga o le talalelei (tagai Roma 10:12–13, 20; 11:11–13, 17–22; tagai fo'i i le Iakopo 5:3, 7, 17).

Fautuaga mo le Aoao Atu

Filifili mai i aitia nei, pe faaaogaina ni a oe lava, a o e saunia au lesona mo le Roma 9–11.

Roma 9–10. I le mua'i olaga, sa mua'i faauuina (filifilia) nisi tagata e fananau mai i le aiga o Isaraelu ma maua faamanuiaga faapitoa ma

tiutetauave. O le faataunuina o nei faamanuiaga e faalagolago lea i lo latou naunau e mulimuli ia Iesu Keriso. (40–45 minute)

Ia ta'u atu i tagata o le vasega e te mana'o e filifili se tasi o i latou na te maua se tau faapitoa. Ia faamatala atu o le a e faaaogaina se tasi o auala e tolu e faia ai lau filifiliga: (1) O le se'i lea o lona igoa mai se pepa, (2) o se palota, po o (3) o se filifiliga e faavae i le mea sili ona lelei ua faia. Ia fesili atu i tagata o le vasega po o le fea auala latou te mananao ina ia e faaoga ma pe aisea foi.

Faitau le Aperaamo 3:23 ma saili le mea na mua'i faauuina ai Aperaamo na te faia. (O se ta'ita'i.) Fesili atu: Pe e te manatu ea sa filifilia Aperaamo i se se'i, se palota, pe ona o lona faatuatua? Aisea? Faitau le Alema 13:3–4 e fesoasoani i tagata o le vasega ina ia malamalama ao filifiliga a le Atua e faavae i le faatuatua

Ia ta'u atu i tagata o le vasega i le Roma 9–11 o loo faauuau ai ona aoao atu Paulo e uiga i le mataupu o le mua'i faauuina e pei ona sa amata ona ia talanoaina i le mataupu 8. Ia faamatala atu o nei mataupu o loo i ai ni mea taua se tolu:

1. I le mua'i olaga, sa mua'i faauuina nisi tagata ina ia fananau mai i le aiga o Isaraelu ma maua faamanuiaga faapitoa ma tiutetauave i lenei olaga.
2. Ina ia maua faamanuiaga na mua'i faauuina i ai e tatau lava ona tatou talia ma mulimuli ia Iesu Keriso.
3. O Nuuese (o i latou ia e le tupuga mai ia Isaraelu) e mafai ona latou maua faamanuiaga uma a Isaraelu e ala i lo latou talia o Iesu Keriso ma ususita'i i le talalelei.

O le lua o nei mea taua o loo faamatalaina i lenei fautuaga mo le aoaoina atu. O le manatu lona tolu o le a faamatalaina i le fautuaga mo le aoaoina atu mo le Roma 11:11–22. Ia tusia nei faamatalaga i luga o le laupapa, po o le tusia foi o faamatalaga taitasi i se pepa lautele a'o le'i oo i le taimi ma ia faaali atu ia pepa a'o e talanoaina mea taitasi.

Faitau atu le mea muamua i tagata o le vasega (po o le faaali atu o le pepa muamua) ia faitau e tagata o le vasega le Roma 9:1–5 ma ia faailoga upu o le *tamafai*, *mamalu*, *feagaiga*, ma *folafolaga*. Ia fesili atu:

- E tusa ai ma le fuaiupu e 4, o ai ua folafolaina atu i ai nei faamanuiaga? (O Isaraelu.)
- Aisea ua outou manatu ai na filifilia i latou?

Ia faamatala atu o Isaraelu, e pei foi o lona tama matua o Aperaamo, sa mua'i faauuina e maua feagaiga ma folafolaga o le talalelei. Ia valaauina se tagata o le vasega e faitau atu le faamatalaga a Elder M. Russell Ballard faapea ma Bruce R. McConkie i le faatomuaga i le Roma 9–11 (i. 170). Faitau le Roma 9:9–14 ma fesili atu:

- O le a le igoa na sui i ai le igoa o Iakopo? (Isaraelu: tagai f.6; ia tagai foi i le Kenese 32:28.)
- O avea faapefea Iakopo ma se faaitaiga o nisi na latou maua se faamanuiaga sili ona o lo latou faatuatua i le mua'i olaga?
- Pe ete manatua ea o loo aoao mai tususiga paia o lenei mea o se mea sa' o po o se mea sese?
- Po o le a le tali a Paulo e uiga i le fesili e faatatau i le sa' o o le Atua? (Tagai f.14).

Ia faitau atu le saunoaga o loo i lalo a Peresitene Harold B.Lee:

“O i latou e fananau mai i gafa o Iakopo, o le na ta'ua mulimuli ane o Isaraelu, ma lona aiga, o e na ta'ua o le fanau a Isaraelu, ua fananau mai i latou i se gafa sili ona taua nai lo le gafa o i latou ua fananau mai i le lalolagi e avea o ni tagata ola.

“O nei tau i uma sa foliga mai na folafolaina, pe na mua'i faauuina, a' o le'i faia le lalolagi. O le mea moni atonu o nei mea na iloa i le ituaiga olaga sa tatou ola ai i lona lalolagi o le mua'i olaga faaleagaga. Atonu e fesiligia e nisi nei manatu le mautinoa lelei, peitai i lea lava foi taimi o le a latou talia e aunoa ma se fesili le talitonuga o i tatou taitoatasi o le a faamasinoina pe a tatou tuua lenei lalolagi e tusa ma mea lelei na ia faia i le taimi a' o tatou ola i lenei olaga faaletino. Pe ua le talafeagai ea lo tatou talitonu o mea na tatou maua iinei i lenei lalolagi na tuuina mai ia i tatou taitoatasi e tusa ai ma a tatou amio a' o lei o mai i tatou iinei?” (Liahona, Iuni 1974, 5).

Ia faitau atu le mea lona lua mai le laupapa po o le faaali atu o le pepa lona lua). Fai atu i tagata o le vasega e faitau mai le Roma 9:7, ona fesili atu lea:

- Aisea na le faamaoni ai nisi o tagata na tupuga mai ia Aperamo i a latou feagaiga?
- O le a le uiga o le faamatalaga a Paulo i le fuaiupu e 6?
- Aisea ua le avea ai le avea ma se tasi o le aiga o Isaraelu ma mea e mautinoa ai ua maua e se tagata le faamanuiaga selesitila?

Faitau atu le Mataupu Faavae ma Feagaiga 64:35—36 ma saili po o le a le mea e tupu ia i latou o e fouvale. Ta'u atu i tagata o le vasega e faapea o le faatuatua i le mua'i olaga, folafolaga mua'i faauuina, po o le fanau mai i se gafa faapitoa, e le faapea o le a mau ai le faaolataga. E le'i tuuina mai e le Atua ni faamanuiaga faapitoa ina ia mafai ai ona manatu nisi ua sili i latou i lo isi tagata.

E tele mau o loo aoao mai ai lenei mataupu faavae. Atonu e te manao e suesue ma talanoaina nisi o ia mau faatasi ma tagata o lau vasega (tagai MFF 121:34; Ioane 8:39; 2 Nifae 30:1–2). E tatau ona e tofia i tagata o le vasega vaega eseese o le talanoaga latou te faitau atu leotele i le vasega.

Ia molimau atu na aoao atu e Paulo lenei mataupu faavae ina ia “faaolaina” Isaraelu (Roma 10:1). Ia fesoasoani atu i tagata o le vasega ina ia latou iloa o i latou o ni tagata o le aiga o Isaraelu ma o se nuu o le feagaiga. Ona o lenei mea ua faamoemoe ai le Alii ia latou faia se galuega tele ma ua manaomia ina ia latou tausia Ana poloaiga (tagai MFF 82:10). Ia fai atu i tagata o le vasega e faitau le Roma 10:1–3, 9–18 ma ia saili i tiutetauave ua ia i latou faapea ma le aualea e mafai ai ona latou faatupuina atili le faatuatua. A maea ona latou faia lea mea, ia valaau atu ia i latou e faaali mai mea na latou maua.

Afai e lava le taimi, atonu e te manao e usu le pese “Isaraelu, Ua Valaau Mai Le Atua” (Viiga, numera 6). Ia fesili atu i tagata o le vasega:

- O le a se savali ua e aoaoina mai upu o lenei viiga?
- Pe mafai faapefea ona e faatinoina le savali i lenei viiga i lou olaga?
- Pe mafai faapefea ona avea le malamalama i mataupu faavae o loo maua i le Roma 9–10 ma se faamanuiaga i lou olaga?
- O le a faapefea ona suia lou olaga ona o se taunuuga o mea na e aoaoina i le aso nei?

Roma 11:11–22. Ina ua teena Keriso e le nuu o Isaraelu, sa le maua e i latou o latou faamanuiaga na folafola mai. Ona ofoina atu lea e le Alii o le talalelei ma ona faamanuiaga i Nuuese.

(40–45 minute)

Manatua: O lenei fautuaga mo le aoaoina atu o se faaauuga o le fautuaga ua tuuina atu mo le Roma 9–10. Ua tatau ona uma ona e tusia mea taua e tolu mai lona lesonea i luga o le laupapa po o se pepa lautele.

Ia faamanatu mea taua e tolu o loo i luga o le laupapa ma ia faitau le mea lona tolu (pe faaali atu i le pepa lautele lona tolu). Ia mafaufau tagata o le vasega e uiga i faamanuiaga faapeteriaka aemaise o o latou lava faamanuiaga. Fesili atu: O le a se mea ua e manatu o le upu sili lea ona taua i totonu o se faamanuiaga faapeteriaka? Ia talanoaina a latou tali. Ia talanoaina le upu pe afai o loo i luga o le laupapa ma fesili atu: Pe aisea ua avea ai lenei upu ma se upu taua i se faamanuiaga faapeteriaka? (O faamanuiaga e faalagolago lea i lo tatou faatuatua; e le faapea e te'ite'i lava ua maua.) Faitau le Mataupu Faavae ma Feagaiga 130:20–21 ma ia sailia le ala e faamanuia ai e le Atua Lana fanau. Ia fesili atu:

- O le a se mea e ono mafai ona puipuia ai se tagata po o se vaega o tagata mai le agavaa mo faamanuiaga a le Alii, e ui lava ina sa mua'i faauuina i latou mo le maua o ia faamanuiaga?
- Pe ua faapefea ona avea le fuaitau a Paulo “e le o Isaraelu i latou uma lava, e le o le fanau foi i latou uma” (Roma 9:6) ma mea e lagolago ai lenei mataupu?
- Pe ua faapefea ona teena e nisi tagata o latou faamanuiaga?

- O a faaososoga ua taatele e ono le maua ai faamanuiaga o le talalelei?

Ia fai atu i tagata o le vasega e faitau mai le faamatalaga o loo i lalo a Elder Richard G.Scott o le Korama a le Toasefululua:

“O le tausia o poloaiga e le o se mea faigata pe afai e te faia ma le loto i ai atoa ma le ‘loto momomo ma le agaga salamo.’ Afai e usiusita’i i ai, o na feagaiga e aumaia ai le fiafia ma le olioli. E aumaia ai le faamoemoega i le olaga. E feagai ma puapuaga pe afai e faaoga le filifiliga saoloto e fai ai ni filifiliga e le talafeagai ma ia feagaiga. Ia suesue i mea e te fai i ou taimi avanoa, o se taimi lea e te saoloto ai e pulea. Pe e te iloa ea ua faaautu lea mea i mea e sili ona manaomia ma sili ona taua? Pe e te faatumulia foi lea taimi e aunoa ma le malamalama lelei i ai i mea le aoga ma gaioiga e le taua pe fesoasoani ai foi ia te oe i le faataunuuina o le faamoemoega ua e sau ai i le lalolagi? Ia mafaufau e uiga i se vaaiga umi o le olaga, e le na’o le mea o le a tupu i le aso nei po o a taeao. *Aua e te fiu gofie i le mea sili ona e manaomia i le olaga ona o se mea ua e manatu e te mana’o i ai i le taimi nei*” (Liahona, Iulai 1997, 54).

Ia tuuina atu lau molimau e uiga i le taua o le agavaa i taimi uma ina ia e maua faamanuiaga ua uma ona folafola mai i le aiga o Isaraelu.

Sa aoao atu Paulo e faapea o le toatele o Isaraelu o e na mua’i faauuina na teena o latou faamanuiaga e ala i le le usiusita’i (tagai Roma 9:31–33; 10:1–3, 16–21; 11:3–10). Fai atu i tagata o le vasega e faitau le Roma 11:11–13 ma ia saili po o ai o le a amata i le taimi nei ona ia maua le talalelei ma ona faamanuiaga. Ia faitau faavave e tagata o le vasega le Roma 11:25–31 ma ia saili i le pogai ua oo mai ai le taimi mo Nuuese e amata ai ona maua le talalelei. Faitau le saunoaga o loo i lalo a Elder Iosefa Filitia Samita, o le na avea i lea taimi ma se tasi o le Korama o le Toasefululua:

“Sa faapea ona aoao atu le talalelei i le augatupulaga o le vaeluaga o taimi. Sa muamua ona ofoina atu i tagata Iutaia ma ina ua latou teena le talalelei, ona aveina atu lea i Nuuese ma sa faavaeina Paranesi o le Ekalesia ia te’i latou. I lea augatupulaga o loo tatou ola ai, o loo ua faataunuuina ai lenei valoaga a lo tatou Alii. Ina ua toefuataina mai le talalelei e ala ia Iosefa Samita, na muamua ona oo mai i Nuuese ma i le faagasologa o le selau ma le luasefulu tausaga ua te’a sa talai atu le talalelei i malo o Nuuese. E le’i faapea na tele se taimi na talai atu ai i tagata Iutaia, ma e na o ni nai tagata na latou talia. A’o tautala atu i le Au Paia i Roma, sa saunoa atu Paulo ‘ua faamaaina loto

o isi Isaraelu, seia oo ina ulufale mai le atoatoa o Nuuese.’– Roma 11:25” (*The Restoration of All Things* [1945], 163–64).

Ia fesoasoani atu i tagata o le vasega ina ia malamalama o Nuuese (o i latou ia e le lavea i le aiga o Isaraelu) e mafai ona latou maua faamanuiaga e tasi e pei foi o Isaraelu. Ona o lo latou talia o Iesu Keriso ma le usiusita’i i le talalelei, o le mea lea e mafai ai ona avea i latou ma tamafai o le aiga o Isaraelu ma avea ma suli atoatoa. Ina ia faamalamalama lenei manatu, atonu e te manao e te sau ma aumai se lala laau lapoa ma se lala laau laititi i le vasega. Ia ta’u atu i tagata o le vasega o le faapipiina faatasi o lala, o le aumaia lea o se lala mai se tasi laau ma faapipii i lala o se isi laau. Ia faataitai atu mo le vasega le auala e faapipii ai se lala laau e ala i le tipi faasasa o lala e lua ma taai i se fasi ieie e pei ona faaalua i le ata:



Ia talanoaina nisi o fesili nei:

- Pe o le a avea ea le lala ua faapipii ma se vaega o le laau e pei lava o le tulaga sa i ai muamua le laau? (Ioe.)
- Afai e maua e le lala autu ana meaai mai aa, o fea e maua mai ai e le lala ua faapipii atu ana meaai? (E maua foi mai aa.)
- O le a le taimi ma o le a foi le pogai e faaoga ai e le faitogalaau le faapipiina o lala?
- O a mea e lelei ai se laau ona o le faapipii i ai o isi lala? (E faapoopoina ai le lapoa ma mafai ai ona maua ai atili ni fua po o ni fua e sili atu ona lelei.)
- O a mea e lelei ai se lala e faapipii mai i se laau? (O le a avea ma se vaega o le laau.)
- Fai i le vasega e faitau le Roma 11:14–24. Ia ta’u atu ia i latou e mafaufau pea e uiga i laau faapipii a’o latou faitau i lea mau. Fesili atu:
- O le a se faiga faaleagaga ua faatusatusa e Paulo i le faapipii o laau? (O le avea lea o Nuuese ma tamafai i le aiga o Isaraelu.)
- Mai mea ua e aoaoina e uiga i le fefaapipii a’i o laau, pe o le a faapefea ona aoga i Nuuese le avea o i latou ma tamafai i le aiga o Isaraelu?

- Pe ua e iloa ea se eseesea i le va o faamanuiaga o i latou o e ua avea ma tamafai ma faamanuiaga o e moni e tupuga mai ia Isaraelu? (Ia faamatala mai e i latou a latou tali.)
- Pe ua faapefea ona avea lenei faiga o le avea ma tamafai ma mea e faaalua ai le alofa tele o le Alii mo Ana fanau uma?

Ia ta'u atu i le vasega o Iesu Keriso o le aa lea o le laau o loo ua tatou faapipii atu i ai (tagai Faaaliga 22:16). Ia molimau atu o le vaega sili ona taua o le mataupu o le avea ma tamafai o le mafai lea ona maua e soo se tagata, e tusa lava pe na fanau mai i le aiga o Isaraelu pe leai, ona maua meaa ma le malosi mai le Alii. Afai latou te talia ma mulimuli ia Iesu Keriso, o le a avea i tatou ma tamafai i Lona aiga, ma o faamanuiaga silisili a le Alii o le a maua lea e i latou e avea o se vaega o le feagaiga.

Roma 12–16

Faatomuaga

Talu ai ona ua maea ona talai atu e uiga i mataupu faavae o le mua'i faauuina, filifilia, ma le avea ma tamafai i le Roma 9–11, sa faaiuina ai e Paulo lana Tusi e ala i le uuna'ia o le Au Paia ina ia tumau i le faamaoni ma le faatuatua ina ia mafai ai ona selesele i faamanuiaga atoatoa o le feagaiga.

A'o lauga atu ia i latou o e ua iloa faamanuiaga o le avea ai ma tagata o le aiga o Isaraelu, sa faamatalaina e Elder Bruce R. McConkie e faapea:

“O le malamalama e uiga i nei upumoni ofoofogia e tuuina mai ai i luga o i tatou se avega e sili atu ona mamafa nai lo avega ua faatietie atu i soo se isi tagata ina ia mulimuli ia Keriso— ia amoina lana avega i o tatou luga, ia tausia ana poloaiga, ma ia faia i taimi uma mea e malie ai lona finagalo. Afai tatou te alolofa ma auauna atu ia te ia, o le a tatou usiusita'i i tuleiga a aposetolo ma perofeta o loo ua ia auina mai e faali mai ma aoaoina lana afioga ia i tatou” (*Liahona* Novema 1974, 72).

Sa aoao mai Paulo o loo i ai i le aiga o Isaraelu le tele o tiutetauave. O nei tiutetauave e aofia ai le ola e avea o ni Tagata Paia, mulimuli i fautuaga a taitai, tausia o poloaiga, alo ese mai le fevaevae'a'i, talia o le amiotonu, faaumea e le tasi le tasi, faapea ma le lotogatasi e ala i le aloese mai le leaga.

Ia suesue ma le agaga tatalo le Roma 12–16 ma ia manatunatu i mataupu faavae o loo i lalo a'o le'i saunia au lesona.

O Nisi o Mataupu Faavae O Le Talalelei e te Sailia

- O le alofa tunoa o leAtua o le fesoasoani lea na te tuuina mai ia i tatou e ala i Lona alofa ma le alofa mutimutivale. O le mana lea e mafai ai ona tatou faia galuega o le

amiotonu ma maua le ola faavavau (tagai Roma 12:6; 15:15; tagai foi Galuega 15:11; 2 Nifae 25:23).

- A'o le'i faia le galuega i la le tino a Iesu Keriso, sa ia poloaiina Ona soo latou te osia taulaga i manu e avea ma auala e tulimata'i atu ai i Lana Togiola. O le vaitaimi nei ua ia poloaiina i tatou ina ia ofoina atu e i tatou i tatou lava e avea ma “taulaga ola” e ala i le tuuina atu e i tatou o o tatou lava ola i le usiusita'i ma le ositaulaga (tagai Roma 12:1–3, 9–18; tagai foi i le 3 Nifae 9:19–20; Moronae 10:32).
- Ua tofu tagata o le Ekalesia ma meaalofo faaleagaga eseese. Ua pei i tatou o vaega o le tino o se tagata, ua soosoo faatasi e maua ai le mea atoa. E tatau ia i tatou taitoatasi ona fesoasoani atu ia tatou taleni e aunoa ma lo tatou manatu e sili atu lo tatou taua nai lo isi (tagai Roma 12:3–8, 13–18).
- Afai tatou te alolofa moni i tagata uma lava, o lona uiga o loo tatou faataunuuna le tulafono a le Atua (tagai Roma 13:8–10; tagai foi i le Mataio 22:36–40; 2 Nifae 31:20).
- E le tatau ona tatou faamasino atu nisi ae tatau ona tatou galulue i le avea o i tatou lava ma ni tagata amiotonu. E tatau ona tatou fesoasoani atu ma faaumea e le tasi le tasi, aemaise lava i latou e foliga mai e vaivai i le faatuatua (tagai Roma 14:1–21; 15:1–7).
- E tatau ona tatou aloese mai tagata o e aoao atu mataupu faavae sese ma faatupu le fevaevae'a'i i le Ekalesia. O tagata faapena o loo aoaoina e i latou i latou lava, e le o le Atua (tagai Roma 16:17–18).

Fautuaga mo le Aoao Atu

Filifili mai i aitia nei, pe faaogaina ni a oe lava, a o e saunia au lesona mo le Roma 12–6.



Roma 12–16. Ua faaolaina i tatou i le alofa tunoa ina ua uma mea tatou te mafai ona fai (tagai 2 Nifae 25:23). Ua faaalua i mataupu mulimuli i le Roma e faapea o galuega o le amiotonu e matua taua lava i le fuafuaga o le talalelei. (30–35 minute)

Tusi i luga o le laupapa le upu *faaolaina* ma ia fesili atu:

- O le a le uiga o le upu faaolaina?
- Pe to'afia outou ua manatu ua faaolaina?

Ta'u atu i le vasega o le upu *faaolaina* e masani ona faaoga i talanoaga e uiga i mea tau lotu. Ia fai atu ia i latou e faitau mai le Roma 10:9–10. Ia faamatala atu e to'atele tagata Kersiano lelei latou te sii maia ia fuaiupu e avea ma faamaoniga e faaalua ai ua “faaolaina” i latou aua ua latou faaalua ma le loto faamaoni pe tautino mai foi o Iesu Keriso o lo latou Faola.

Sa faamanino mai e Elder Dallin H.Oaks, o se tasi o uso o le Korama a le Toasefululua, o le fesili “pe ua faaolaina ea oe?” e mafai ona avea ma se fesili e faaletonu ai mafaufau o tagata

o le Ekalesia ona ua faauigaina sese e tagata mai isi lotu lea fuaitau e faapea o lona uiga ua faaolaina:

“A o faaoga e le Au Paia o Aso e Gata Ai upu *faaolaina* ma le *faaolataga*, o loo i ai le tusa o le ono o uiga eseese o lenei upu. E tusa ai ma nisi o i latou ia, ua mautinoa lava—ua faaolaina i tatou. O isi, o le faaolataga e tatau ona ta’ua o se mea e tupu i le lumana’i (mo se faataitaiga, 1 Korinito 5:5) po o se tulaga e faalagolago i le lumana’i (mo se faataitaiga, Mareko 13:13). Peitai i nei uiga uma, po o ituaiga o faaolataga, o le faaolataga o loo i ai lea ma e ala ia Iesu Keriso” (tagai *Liahona* Iulai 1998, 69).

O uiga e ono e pei ona ta’ua e Elder Oaks o loo lisi lea i lalo. Ia faitau ma talanoaina uiga taitasi, ma ia faaoga mau o loo i ai ma faamatalaga sii mai le lauga a Elder Oaks:

1. Ua faaolaina i tatou mai le oti faaletino (tagai Alema 11:43–44).

“O le mea muamua, ua faaolaina tagata uma i la le tino mai le oti e ala i le Toetu o Iesu Keriso. ‘Aua faapei ona oti uma ia Atamu, e faapea foi ona faaolaina uma ia Keriso’ (tagai 1 Korinito 15:22).”

2. E mafai ona faaolaina i tatou mai le agasala e ala i le ususita’i i tulafono ma sauniga o le talalelei pe afai o le a tatou tumau e oo i le iuga (tagai Iakopo 2:14–17; MFF 14:7; Mataupu Faavae o le Faatuatua 1:3).

“E tusa ai la ma le faaolataga mai le agasala atoa ma taunuuga o le agasala, o le tali i le fesili o le pe ua faaolaina ea i tatou pe leai, o le ioe, peitai e i ai tuutuuga.’ Ua faapea mai la tatou mataupu faavae lona tolu o le faatuatua o lo tatou talitonuga:

“Matou te talitonu e faaolaina tagata uma lava i le togisala a Keriso pe a tausia poloaiga ma sauniga o le Talalelei. . .

“. . .Tatou te tautino atu o le faamamaina mai le agasala e ala i le togisala a Keriso e faalagolago lena i le faatuatua o le tagata agasala, e faaalua lena i le ususitai i le poloaiga a le Alii ia salamo, ia papatisoina, ma ia maua le Agaga Paia (tagai Galuega 2:37–38). . . . Peitai o le a lē faasaoina [i latou e talitonu] sei vagana ua mae’a lo latou olaga faletino ma le salamo manaomia, o le faamaoni, o galuega auauna atu, ma tumau e oo i le iuga.”

3. E mafai ona faaolaina i tatou e ala i le “toe fanaufouina” (tagai Ioane 3:3–5; Mosaea 27:24–26).

“Sa toe fanaufouina i tatou ina ua tatou ulu atu i se feagaiga ma lo tatou Faaola e ala i le fanaufouina i le vai ma le Agaga faapea ma le tauaveina i o tatou luga o le suafa o Iesu Keriso. E mafai ona tatou faafouina lena toe fanaufouina i sapatiti taitasi pe a tatou aai ma feinu i le faamanatuga. “Ua faamaonia e le Au Paia o i latou ua toe fanauina i lenei ala ua fanauina faaleagaga o ni atalii ma afafine o Iesu Keriso. . . ma ni matua fou faaleagaga ma le faamoemoega i se tofi mamalu [Mosaea 5:7; 15:9–13; 27:25].”

4. E mafai ona faaolaina i tatou mai le valea e ala i le malamalama o le Talalelei (tagai Ioane 8:12.)

“O se uiga lona fa o le faaolaina o le laveaiina lea mai le pogisa o le valea e uiga i le Atua le Tama ma Lona Alo o Iesu Keriso ma le faamoemoega o le olaga ma le taunuuga o alii ma tamaitai. Ua faailoa mai e le talalelei ia i tatou e ala i le misiona a Iesu Keriso ua tuuina mai ai ia te i tatou lenei faaolataga. ‘O a’u o le malamalama o le lalolagi,’ na aoa mai e Iesu: ‘o lē mulimuli mai ia te a’u, e le savali o ia i le pouliuli, ae ia te ia le malamalama o le ola’ (Ioane 8:12; tagai foi Ioane 12:46).”

5. E mafai ona faaolaina i tatou mai le oti faalua (tagai 1 Korinito 15:40–42; Faaliga 2:11).

“I Tagata o le Au Paia o Aso e Gata Ai, o le faaolaina e mafai foi ona faauigaina o le faaolaina po o le faasaoina mai le oti lona lua (o lona uiga o le oti mulimuli faaleagaga) e ala lea i le mautinoa o se vaega o le mamalu i le olaga a sau (tagai 1 Korinito 15:40–42). E pei lava ona oo i tagata uma le Toetutu, ua faapea foi ona matou ta’utino atu o tagata uma o e na soifua mai i lenei lalolagi – se’i vagana ni nai tagata toaitiiti [tagai MFF 76:40–43]—ua mautinoa o le a latou maua le faaolataga i lea tulaga.”

6. E mafai ona faaolaina i tatou e ala i le maua o le faaeaina (tagai MFF 76:52–60).

“O upu *faaolaina* ma le *faaolataga* o loo faaaogaina foi e faaalua ai le faaeaina po o le ola e faavavau (tagai Aperaamo 2:11). O lea tulaga ua ta’ua i nisi taimi o le ‘atoatoaga o le faaolataga’ (Bruce R. McConkie, The

Mortal Messiah, 4 vols. [1979-81], 1:242). O lenei faaolataga e manaomia ai nisi mea e ese mai le salamo ma papatisoina e se tasi ua i ai le pule tatau o le perisitua. E manaomia ai foi le osia o feagaiga paia, e aofia ai le faaipoipoga e faavavau, i maota o le Atua atoa ma le faamaoni i na feagaiga e ala i le tumau se'ia oo i le iuga. Afai tatou te faaaogaina le upu *faaolataga* e faapea o lona uiga o le 'faaeaina,' o lona uiga e le tatau i soo se isi o i tatou ona faapea atu ua 'faaolaina' i tatou i le olaga faaletino. O lona tulaga mamalu e mafai ona mulimuli mai pe a uma le faamasinoga mulimuli" (tagai (*Liahona*, Iulai 1998, 69-71).

Ia toe faamanatu faatasi ma tagata o le vasega uiga e ono o le upu *faaolaina*. A'o e faitauina atu mea taitasi, ia fai atu i tagata o le vasega e mafaufau pe ua faaolaina i latou e tusa ai ma lona uiga.

Ia ta'u atu i tagata o le vasega o mataupu mulimuli o le Roma, o loo ta'ua ai e Paulo ni tulaga e manaomia ina ia agavaa ai mo le faaolataga. O loo i ai poloaiga e tatau ona tatou mulimuli i ai, o sauniga ia e tatau ona tatou maua, ma auala e tatau ona faafoliga ai o tatou olaga ina ia faaolaina i le malo o le Atua.

Ia vaevae tagata o le vasega i ni vaega se lima ma ia tofia vaega taitasi e faitau le mataupu mai le Roma 12-16. Ia faitau feauaua'i e vaega taitasi fuaiupu e sefulu ma le fa mai la latou mataupu ua tofia e faitau ma ia saili poloaiga, sauniga, po o se fautuaga sa ta'ua mai e Paulo e tatau ona mulimuli i ai le Au Paia. Ia valaau atu ia i latou e ta'u mai mea na latou maua i le vasega. Ia mafaufau e uiga i le tuuina atu o fesili o loo i lalo:

- O a ni fuaiupu ua faagaetia ai lou loto? Aisea?
- O le a se mea ua e aoaoina e tatau ona avea ma se mea taua mo le faatinoina ina ia faaolaina ai?
- O le a se suiga e oo i le lalolagi pe ana faapea e ola tagata uma e tusa ma le fautuaga a Paulo?

Roma 12:1-18. A'o le'i faia le galuega a Iesu Keriso i le olaga faaletino, sa ia poloaiina Ona soo ina ia osia taulaga i manu e avea ma auala e tulimata'i atu ai i Lona Togiola. Ua poloaiina i tatou e le Alii i aso nei ina ia tuuina atu e i tatou i tatou lava e avea "taulaga ola" e ala i le tuuina atu o o tatou ola i le ususita'i ma le auauna atu. (30-35 minute)

Ia aumaia ni maa, laau, ma se afitusi i le vasega. Fesili atu:

- Pe faapefea ona faaaoga nei mea pe afai tatou te osia se taulaga i ona po o le Feagaiga Tuai? (E faia ai se fata faitaulaga ma faamumu se afi.)
- O le a se mea taua e le o i ai? (O se manu.)

Faitau le Esoto 12:5 ma ia saili i tulaga e tatau ona i ai se manu o le a osi ai le taulaga. Fesili atu: Na faapefea ona aoaoina tagata i taulaga e osia i manu, e uiga i le afio mai o Iesu Keriso?

Faitau atu le faamatalaga o loo i lalo a Elder M.Russell Ballard:

"O loo i ai ni faamoemoega e faavavau se lua o le tulafono o le taulaga e tatau ona tatou malamalama i ai. Sa faatino nei faamoemoega ia Atamu, Aperaamo, Mose, faapea ma Aposetolo o le Feagaiga Fou, ma e faataatau foi ia mea ia i tatou a'o tatou talia ma ola i le tulafono o le taulaga. O ia faamoemoega autu e lua o le tofotofoina lea o i tatou ma faamaonia e i tatou i tatou lava ma fesoasoani ia i tatou ia o mai ia Keriso" (*The Law of Sacrifice* [address to Religious Educations Symposium on the New Testament, Brigham Young University, 13 Aukuso 1996],1).

Ia talanoaina faatasi ma lau vasega le faamatalaga a Elder Ballard. Ia faitau mai e se tagata o le vasega le faamatalaga o loo i lalo mai le lauga lava lea e tasi a Elder Ballard:

"A'o faaauau pea le faamoemoega autu o le tulafono o le faitaulaga e avea ma ala e tofotofoina ai ma fesoasoani ia i tatou ia tatou o mai ia Keriso, e lua suiga sa faia ina ua mavae le taulaga a Keriso. Muamua, o le sauniga o le faamanatuga na suia ai le sauniga o le taulaga; ma lona lua, o lenei suiga na suia ai le faia o taulaga i le manu a le tagata i le tagata lava ia. O lona uiga, sa suia le taulaga mai le taulaga lava ia i le tagata o loo faia le taulaga" (*Law of Sacrifice*, 5; ia tagai foi i le 3 Nifae 9:19-20; MFF 59:8,12).

Fai atu i tagata o le vasega e faitau mai le Roma 12:1-2 ma ia ta'u mai e i latou ni auala e talafeagai ai nei fuaiupu ma le faamatalaga a Elder Ballard. Ia talanoaina fesili nei:

- O le a sou manatu i le uiga o le "tuuina atu o outou tino i le Atua, o le taulaga ola, ma le paia, ma le malie" (f.1)?
- O le a se taulaga o loo e osia ina ia avea ai oe ma taulaga paia ma le malie i luma o le Atua?
- Pe ua faapefea ona avea na taulaga ma se tofotofoga?
- Pe ua faapefea ona fesoasoani nei mea ia te oe i lou alu atu ia Keriso?

Ta'u atu i tagata o le vasega e faapea o le Roma 12:9-21 e aofia ai le tele o fuaitau o loo faamatalaina ai taulaga e mafai ona tatou osia ina ia avea ai ma se mea malie i le Atua. (O faataitaiga mai le fuaiupu 9 e aofia ai le "aua ne'i faatagaalofa" ma le "inoino i le leaga.") Ia tusia fuaiupu taitasi i se isi pepa ese ma ia tuuina atu e tofu le tagata o le vasega ma le pepa. Ia faitau mai e tagata o le vasega a latou fuaiupu, mafaufau i lona uiga, ma ia mafaufau i se mea e tasi e mafai ona latou faia e ola lelei ai i lona mataupu faavae. Ia fai atu i ni tagata o le vasega e ta'u mai a latou fuaiupu ma manatu i le vasega.

Faitau ma talanoaina faamatalaga sii o loo i lalo mai le lauga a Elder Ballard:

“A’o tatou ositaulagaina o tatou manaoga faapito, auauna atu i lo tatou Atua ma isi, o le a avea ai atili i tatou e pei [o le Alii], sa aoao mai e Elder Russell M.Nelson [o se uso o le Korama a le Toasefululua] se faamatalaga e faapea:

“O lo o poloaiina pea i tatou ina ia ositaulaga, ae le faia i le faamaligiina o toto o manu. O lo tatou lagona aupito i mauuluga e uiga i le ositaulaga e faataunuaina lea a’o avea i tatou lava ma tagata e sili atu ona paia.

“Ua tatou faia lenei mea e ala i lo tatou usiusita’i i poloaiga a le Atua. O le faia faapea, ua fusia faatasi ai le tulafono o le usiusita’i ma le ositaulaga. . . .a’o tatou usiusita’i atu i nei mea ma isi poloaiga, e oo mai se mea matagofie lava ia i tatou. . . .e oo ina paia i tatou – [e avea atili] e faapei o lo tatou Alii!”
 (“Lesona mai ia Eva,” *Liahona*, Ianuari 1988, 84). . . .

“Nai lo le manaomia e le Alii o se manu po o se saito a se tagata, a ua finagalo nei le Alii ia tatou tuuina atu a tatou mea uma e mama. O se faiga sili atu ona mauuluga o le tulafono o le ositaulaga; e pa’i atu i le agaga o le tagata. Ua faamatalaina e Elder Neal A. Maxwell lenei mea e faapea: ‘O le mea moni e uiga i le faitaulaga o le tagata e le o le tuuina lea o le manu i luga o le fata faitaulaga. A’o le tuuina o le manu o loo i o tatou loto i luga o le fata faitaulaga ma faaumatia!’ (*Liahona* Iulai, 1995, 90). . . .

“O le ositaulaga o se faailoga lea o le alofa mama. O le tele o lo tatou alofa i le Alii ma o tatou uso a tagata e mafai ona iloa i le mea o loo tatou loto e faitaulaga ai mo i latou” (*Law of Sacrifice*, 3, 5–6).

Ia fai atu i tagata o le vasega e fuli a latou pepa ma tusi ai i tua se taulaga a le tagata lava ia ua latou manatu ua finagalo le Atua latou te faia ina ia fesoasoani i le faalatalataina atu atili o i latou ia te Ia. Ia uunaiina i latou ina ia faia lona taulaga i vaiaso e tele o loo sosoo ai ma ia ole atu i le Alii mo le malosi e fai ai lea mea. Ia mafaufau i le fai atu i tagata o le vasega e ta’u mai ni mea na latou fai faapea foi ma ni molimau i le vasega i se aso mulimuli ane.

Ia mafaufau e uiga i le tuuina atu i tagata taitoatasi o le vasega o se kopi o le faamatalaga o loo i lalo na tusia e Elder Ballard:

“O le taulaga ua manaomia e le Alii mai ia i tatou o le lafoa’i lea atoatoa mai ia te’i tatou lava o le ‘tagata o le lalolagi’ ma uiga leaga uma e tusa ma lea mea. Afai tatou te tuuina atu atoatoa i tatou lava i le Alii, o lona uiga o le a ia faia se suiga uiga ese ia te’i tatou ma o le a avea i tatou ma se tagata fou, ta’u amiotonuina,

faapaiaina, ma toe fanaufouina ma o le a faaalua Lona faatusa i o tatou mata (tagai Mosaea 5:2; Alema 5:14; Mose 6:59–60).

“E pei lava ona i ai i mea uma, sa faaalua e lo tatou Alii ma le Faola le faataitaiga silisili o le faitaulaga. Sa faamautuina i Lona soifua ma Lana galuega se faataitaiga mo i tatou e ao ona tatou mulimuli i ai. O lana misiona paia o le faaiuina lea i se galuega silisili o le alofa e pei ona sa ia tuuina atu ai Lona ola mo le Togiolaina o i tatou. O le osia o le taulaga ia te ia lava, na ia saunia ai se auala mo i tatou mo le faamagaloina o a tatou agasala ma toe foi atu i le afioaga o lo tatou Tama. . . .

“. . . .O le mataupu faavae o le ositaulaga o se tulafono a le Atua. Ua tatau ona tatou malamalama i ai ma aoao atu ma faatinoina. Afai e avea ma mea ua faigofie na’ua le avea ma se tagata o lenei Ekalesia, o le a avea molimau ma se mea papa’u, o le a le o ifo aa o le molimau i le elele e pei ona sa latou faia i ona po o o tatou augatama. Ia tuuina atu e le Atua ia te outou se malamalama e uiga i le tulafono o le taulaga ma o lona mea o lo o ia i tatou i aso nei. E matua taua lava lo tatou malamalama i lea mea, ia aoao atu, ma ia ola ai” (M.Russell Ballard, *The Law of Sacrifice*, 9–10).

Roma 12:3–8;16:17–18. Ua tofua tagata o le Ekalesia ma meaalofa faaleagaga. Ua pei i tatou o vaega o se tino, ua sosoo faatasi e maua ai se mea atoa. E tatau ia te’i tatou taitoatasi ona tuuina atu a tatou taleni e aunoa ma le manatu ua sili atu ona taua i tatou i lo isi. (30–35 minute)

Ia faaoga soo se lesona faatino po o lesona uma o loo i lalo e faaalua ai i tagata o le vasega o vaega taitasi e manaomia ina ia maua ai le mea atoa:

- Ia aumaia se paso i le vasega ma ia talanoaina le taua o vaega taitasi o lea paso. Afai e i ai se vaega e misi, o le a le atoatoa le paso.
- Ia aumaia se ata o se au taaalo sili ona fiafia i ai (po o le talanoa fo’i e uiga i lea au). Ia talanoa e uiga i le taua o tagata taaalo taitoatasi mo le faamanuiaina o taumafaiga a le au.
- Ia aumaia se meaai na e saunia i le fale. Ia faaali atu i tagata o le vasega le fua po o le faiga o lea meaai, ma ia talanoa e uiga i le taua o lea mea o loo faia ai lea meaai ma o ia vaega uma e tatau ona i ai.

Ia ta’u atu i tagata o le vasega e faapea sa faaoga foi e Paulo se isi faatusatusaga ina ia faaalua ai o tagata taitoatasi o le Ekalesia e taua, e ui lava ina eseese taleni ma tiutetauave ua ia i tatou. Ia fai atu i tagata o le vasega e faitau mai le Roma 12:3–5 ma ia saili le faatusatusaga sa faaoga e Paulo. Fesili atu:

- Aisea ua e manatu ai o le tino o se tagata o se faatusatusaga lelei lea e aoao atu ai lenei mataupu?
- Pe o le a le taua o ou mata, fatu, taliga, lima, po o le faiai mo le gasologa lelei o lou tino?
- Pe ua faapefea e na vaega o lou tino ona faalagolago le tasi i le tasi?

Ia fesoasoani atu i tagata o le vasega ina ia iloa le ala ua faatatau ai lenei faatusatusaga i tagata o le Ekalesia. Ia faamatala atu ua i ai i tagata taitoatasi le eseese i malosiaga, meaalofo, ma vaivaiga, ae peitai ua poloaiina i tatou ia tasi (tagai MFF 38:27). Ia fai atu i tagata o le vasega e faitau mai le Roma 12:6–8 ma ia saili mo ni meaalofo na ta'ua e Paulo o loo i ai i tagata o le Ekalesia. (O loo mafai ona maua se lisi sili atu ona atoatoa i le 1 Korinito 12:4–12; Moronae 10:8–23; ma le MFF 46:11–29.)

- Pe mafai faapefea ona faamanuiaina isi tagata o le Ekalesia i meaalofo na ta'ua mai e Paulo?
- Faitau le Mataupu Faavae ma Feagaiga 46:12. O le a le pogai e tasi ua tuuina ai e le Atua nei meaalofo ia i tatou?
- Aisea tou te manatu ai o loo finagalo o Ia i tagata uma ia aoga ia i latou faamanuiaga na ia tuuina atu i tagata o le Ekalesia?

Afai e lava se taimi, ia mafaufau e uiga i le valaauina o tagata o le vasega e ta'ua mai mea e malolosi ai ua latou maitauina i tagata o le latou vasega faapea ma ni auala e mafai ona latou faaoga ai ia meaalofo e faamanuia atu ai i isi. O lenei faiga o le a mafai ai ona faamalosi tagata o lau vasega i le faaleagaga ma fesoasoani ia i latou i le fausia o le galulue faatasi ma le lotogatasi i lau vasega.

Roma 13–15. E tatau ona tatou alolofa atu i isi ae aua tatou te faamasinoina o i latou a ia galue i le ave a i tatou lava ma ni tagata amiotonu. E tatau ona tatou fesoasoani ma faaumea e le tasi le tasi, aemaise lava i latou o e atonu e sili atu ona vaivai i le faatuatua. (30–35 minute)

Ia fetufaa'i ni faataitaiga o taimi na e tagai ai o auauna le tasi tagata o le vasega i le isi. Ia valaauina tagata o le vasega e faaali mai ni manatu faapena. Fesili atu:

- O le a se lagona na e maua ina ua auauna atu se isi ia te oe?
- O le a se lagona ua e manatu na maua e le tagata na e auauna atu i ai?
- O le a se lagona na oo ia te oe e uiga i le tagata na auauna atu ia te oe?
- Pe na faapefea ona suia lau molimau ma le va ma le Alii ona o lenei mea?

Ia molimau atu o loo i ai se malosiaga tele i le alofa atu ma le auauna atu o le tasi i le tasi, ma o le auauna atu e mafai ona tatou fesoasoani atu ai i isi e o mai ia Iesu Keriso.

Faitau le Mataiao 5:43–47 ma fesili atu: O ai na poloaiina ai e le Faaola i tatou ina ia alolofa atu i ai ma auauna atu? Ia ta'ua atu i tagata o le vasega o loo i ai i le Roma 13–15 se fautuaga sili ona lelei e uiga i le ala e mafai ai ona tatou mulimuli i lenei aooga a le Faaola. Ia tofia tagata o le vasega i se vaega o mau nei: Roma 13:8–14; 14:10–23; 15:1–7; po o le 15:13–18. Ia fai atu ia i latou e faitau filemu ia tusi, ma ia saili po o a mea o loo fai mai i le mau e uiga i le auauna atu i isi. Ia talanoa faatasi i mea na latou maua, ma ia faaoga fesili o loo i lalo pe afai e manaomia:

- O le a se mea na sili ona faagaetia ai oe i fuaiupu na e faitauina?
- O le a se mea na aoao mai e nei fuaiupu ia te oe e uiga i le alofa ma le auauna atu i isi?
- Pe mafai faapefea ona e faatinoina nei aooga i lou olaga?
- Pe mafai faapefea ona suia le Ekalesia po o lau aoga pe afai e mulimuli tagata uma i lenei fautuaga?
- Pe mafai faapefea e le Ekalesia po o lau aoga ona suia pe afai e te mulimuli i lenei fautuaga?

Ia faaauu lenei faiga o le faitauina o se mau ma ia tuuina atu ni fesili se'ia oo ina uma fuaiupu ua e manatu e sili ona talafeagai ma tagata o lau vasega.

O LE TUSI MUAMUA A LE APOSETOLO O PAULO I KORINITO

O lenei tusi
na tusia i lenei
taimi

O le ulua'i malaga faafaifeautalai (Galuega 13-14)	O le malaga lona lua faafaifeautalai (Galuega 15:36-18:22)	O le malaga lona tolu faafaifeautalai (Galuega 18:23-21:15)	O le faafalepuipuiina i Kaisaraia ma Roma (Galuega 21:16-28:31)	E oo i le falepuipuiina lona lua i Roma
--	--	---	---	---

E tusa o le T.A. 47-50 50-53 53-57 57-62 62-65

Tusitala: O Paulo na tusia le 1 Korinito (tagai 1 Korinito 1:1-2;16:21). Ua uma ona ia tusia se isi tusi i le Au Paia i Korinito (tagai 1 Korinito 5:9). O le mea e leaga ai e leai sa tatou faamaumauga o le tusi muamua.



O E o Loo Tusi I Ai: Sa faatu e Paulo le Ekalesia i Korinito i lana malaga lona lua faafaifeautalai i le tusa o le T.A. 50. A'o i ai o ia iina, sa ia maua se faaaliga na faatonuina ai o ia e lauga faalauaitetele atu ma ia aunoa ma le fefe i tagata na saunia e le Atua e talia le talalelei (tagai Galuega 18:1, 9-11). Sa nofo o ia iina i le tausaga ma le afa e talai le Talalelei ma faatu le Ekalesia. Ae ui i lea, na fevaevae'i le Au Paia i Korinito ma ua latou tuu faatasi ni talitonuga ma ni sauniga faapaupau ma nisi o mataupumoni o le Talalelei ma sauniga sa aoao atu e Paulo ia te'i latou. Sa i ai le atugaluga tele ia Paulo mo le Au Paia i Korinito, o le mea lea ina ua oo mai ia te ia ni manaoga ma talosaga patino, sa tali atu o ia e ala i le tusia o lenei tusi mo i latou.

Talaaga Faasolopito: O Korinito o se aai o loo tu i se laueleele vaiiti e sosoo ai le nuu tele o Eleni ma le penisula e ta'ua o Peloponesia (tagai le "Taiala i Tusitusiga Paia faafanua 6." O lenei nofoaga filifilia ua faatagaina mo tulaga faapisinisi, le au fai filosofia, ma lotu mai Sasa'e ma Sisifo. Sa taatele le ifo i tupua i Korinito. Sa tapua'i tagata i malumalu e sefulu ma le lua i le aai atoa lava. Sa faia ni sauniga faapaupau i totonu o le malumalu o Aphrodite, ma sa uunaiina e o latou taitai le faia o ni amioga le mama. Sa tusi atu Paulo i nei tagata mai Efeso a'o faia lana malaga lona tolu faafaifeautalai i le tausaga T.A. 55-57 (tagai 1 Korinito 1:3-8; *taiala i Tusitusiga Paia*, Tusi a Paulo).

Uiga Tulaga Ese: Sa faamatala e Paulo ni mea se tele ma ni mataupu faavae i le 1 Korinito o loo tulaga ese ai lenei tusi. Sa ia aoao e faapea o le tino o se malumalu lea mo le Agaga Paia (tagai 1 Korinito 6:19), sa ia tuuina atu ni faatonuga e faatatau

i le avea ma faifeautalai faapea ma le faaiipoipoga (tagai 1 Korinito 7), sa ia faamatala meaalofa a le Agaga (tagai 1 Korinito 12:1-12), sa ia talai foi e uiga i le ola mama (ia tagai 1 Korinito 13), ma sa ia molimau e uiga i le mataupu o le Toetu ma le Papatisoga o e ua oti (tagai 1 Korinito 15).

Autu: Sa faamalosia atu Paulo i le Au Paia i Korinito ina ia lotogatasi. Sa ia aoao atu e mafai ona ausia lea mea e ala i le talalelei a Iesu Keriso, le faatosinaga a le Agaga Paia, ma le tulaga o le matua faaleagaga o tagata taitoatasi.

1 Korinito 1-4

Faatomuaga

O le Tusi Muamua a Paulo i tagata Korinito o se leo o le lapataiga. Sa oo mai tala e uiga i fevaevaeaiga ma misa ia te ia e ala i tagata o sa Keloe, ma sa tonu ia te ia o le a ia faasa'oina le Au Paia e ala i le aoao atu e tatau ona latou lotogatasi i le mulimuli ia Iesu Keriso. Sa faamanatu atu e Paulo ia i latou ua "faapaiaina ia Keriso Iesu" (1 Korinito 1:1-6) i latou e ala i le talalelei.

Ia suesue ma le agaga tatalo le 1 Korinito 1-4 ma ia mafaufau i mataupu faavae o loo i lalo a'o le'i saunia au lesona.

O Nisi Mataupu Faavae Tavae o le Talalelei e Saili Iai

- E tatau ona lotogatasi tagata o le Ekalesia ma alo ese mai le fevaevaea'i (tagai 1 Korinito 1:9-13; ia tagai foi Efeso 2:19-22; 4:11-14; MFF 38:25-27).
- Ua filifilia e le Atua tagata lotomaulalo e talai le talalelei e ala i le mana o le Agaga Paia (tagai 1 Korinito 1:17-31; 2:4-5; ia tagai foi MFF 1:18-20, 23).
- O le poto o le Atua e sili atu nai lo le poto o le tagata ma e faato'a mafai ona aoaoina e ala i le Agaga Paia (tagai 1 Korinito 2:1-14; ia tagai foi i le Mosaea 3:19).
- Ua atiina'e le malamalama o le talalelei i le faavae o Iesu Keriso ma e tuputupu a'e i lea fuaiupu ma lea fuaiupu (tagai 1 Korinito 3:1-15; ia tagai foi i le 2 Nifae 28:30).

Fautuaga mo le Aoao Atu

Ia filifili mai aitia o loo i lalo pe faaoga ni au lava, a'o e saunia lesona mo le 1 Korinito 1-4.



E mafai ona faaaogaina i le aoaoina atu o le 1 Korinito 3-6 le *New Testament Video Vaega 15*, "The Body is a

Temple” (6:48), (tagai *New Testament Video Guide* mo fautuaga o le tuuina atu o aoaoga).

1 Korinito 1:1–13. E tatau ona lotogatasi tagata o le Ekalesia ma aloese mai le fevaevae’i.
(15–20 minute)

Ia talanoaina nisi o fesili o loo i lalo faatasi ma tagata o le vasega:

- Pe i ai ea se taimi na e i ai i se vasega o le Ekalesia po o le Korama na sili atu ai ona tusaafia nisi tagata o le vasega nai lo isi?
- O le a le foliga mai o lea tulaga mo tagata o e ua le amanaia?
- O le a le mea e tupu i le vasega po o le Korama atoa ona o lea mea?
- Pe faapefea ona aafia le auauna atu o tagata o le vasega po o le Korama i le Ekalesia?

Ia faitau mai e se tagata o le vasega le Mataupu Faavae ma Feagaiga 38:25–27 ma ia fesili atu pe ua faapefea ona faatatau lenei mau i le talanoaga. Ia faamatala atu talu ai ona sa i ai i tagata o le Ekalesia i Korinito se faafitauli i le mataupu o le fevaevae’i, o le mea lea na tatau ai ia Paulo ona faamanatu atu ia i latou e finagalo le Alii ia faia mea lelei e le tasi i le tasi. Ia fai atu i tagata o le vasega e faitau mai le 1 Korinito 1:10–13; 3:3. Fesili atu:

- O le a le mea ua aoao mai i nei fuaiupu e uiga i le lotogatasi?
- O le a se aafiaga o le fevaevae’i o tagata o le Ekalesia i le galuega faafaifeaualai?
- Aisea ua avea ai le fevaevae’i, lotoleaga, ma le feteena’i ma mea e faigata ai ona ola i le talalelei? (Tagai 3 Nifae 11:29).
- Pe mafai faapefea e tagata o le Ekalesia ona lotogatasi i mataupu faavae?
- O a nisi auala e mafai ai ona tatou lotogatasi i le tulaga o le avea ma Ekalesia?

Ia fai atu i tagata o le vasega e faitau mai le 1 Korinito 1:2–9 ma saili po o ai e faapaiaina i tatou, valaauina i tatou e avea ma Au Paia, ma tuuina mai le alofa tunoa. Fesili atu: O le a le mea na fai e Iesu Keriso o loo i ai le mana e suia ai ma faalotogatasi i tatou? (Sa ia saunia le Togiola.) Ia fai atu i tagata o le vasega e faitau mau o loo i lalo ma ia ta’u mai po o le a le mea o loo aoao mai i nei mau e uiga i le lotogatasi:

- Mataupu Faavae ma Feagaiga 61:8. (O le a fesoasoani le salamo e saunia ai i tatou ina ia lotogatasi ma isi tagata.)
- Mose 7:18. (E tatau ona tatou lotogatasi ina ia atiinaeina ai Siona.)
- Ioane 17:20–23. (Sa tatalo Iesu Keriso mo le lotogatasi ma ua finagalo ia tasi Ona soo.)
- 1 Korinito 1:9–10. (E tatau ona lotogatasi i tatou ma fusia faatasi i o tatou talitonuga.)

Ia faitau le faamatalaga o loo i lalo a Peresitene Marion G. Romney, o le sa avea ma se tasi o le Au Peresitene Sili:

“O le ala e maua ai le lotogatasi o lo tatou aoao lea i le finagalo o le Alii ona faia lea. . . .o le mana o le Ekalesia mo le faia o mea lelei i le lalolagi nei e faalagolago lea i le tulaga ua tausia ai e i tatou, tagata o le Ekalesia, lenei mataupu” (*Liahona*, Iulai 1983, 28).

Ia talanoaina faatasi ma tagata o le vasega se mea e mafai ona latou fai e fesoasoani ai e aumaia le lotogatasi e sili atu ona tele i vasega ma Korama o le Ekalesia. Ia fesili atu:

- Po o i ai ea ni tagata ua e iloa o e ua masani lava ona le amanaia pe tuulafoa’i e o latou tagata?
- O a ni mea patino e mafai ona e faia e fesoasoani ai ia i latou?
- O le a se mea e faatupuina ai le lotogatasi i ou tagata i le aoga po o tagata o lou aiga?

Ia fai atu i tagata o le vasega e tusi i lalo se sini e uiga i le “lotogatasi” o le a latou galulue i ai i le vaiaso a sau.

1 Korinito 1:17–31. Ua filifilia e le Atua tagata lotomauualalo e talai le talalelei e ala i le mana o le Agaga Paia. (15–20 minute)

Ia talanoaina fesili o loo i lalo:

- Afai e manaomia e le Ekalesia le auina atu o se sui i se talanoaga taua faatasi ma nisi o taitai iloga o isi lotu, pe e te ioe ea ina ia auina atu e i latou se polofesa lauiloa o le Iunivesite po o se tagata talavou o le vasega? Aisea?
- O a ni malosiaga e i ai i le polofesa i le faatusatusa atu lea i le tagata o le vasega?
- O a ni malosiaga atonu e i ai i le tagata o le vasega ae e le o i ai i se polofesa?
- Pe mafai faapefea ona avea malosiaga o le polofesa ma fesoasoani?
- Pe mafai faapefea ona latou faalavelave i le ala?

(*Manatua*: Ia aua le faaaogaina lenei talanoaga e faitiaina ai tagata aoaoina. O “mea vaivai o le lalolagi” e faatatau lea ia i latou o e, e tusa lava po o le a le tulaga po o le aoaoina, e lava le lotomauualalo e faalagolago ai i le Agaga Paia.)

Faitau le 1 Korinito 1:25–27 faapea ma le saunoaga a Elder Bruce R. McConkie o loo i lalo:

“Fesili: Pe ua faapefea ona avea mea vaivai o le lalolagi ma mea e faamaina ai mea malolosi?

“Tali: O le lotu moni e le o se tulaga o le atamai po o le tulaga mauualuga faalelalolagi po o le lauiloa, ae o se tulaga o le faaleagaga; ma e le vaivai i latou ae malolosi i mea faaleagaga” (*Doctrinal New Testament Commentary*, 2:316).

Fesili atu i tagata o le vasega: Pe faapefea ona avea lea mea ma mea e suia ai lau filifiliga i le va o le polofesa ma le tagata o le vasega?

Ia faitau e tagata o le vasega le 1 Korinito 1:17–31 ma saili fuaiupu o loo faaalua ai le pogai e filifilia ai e le Atua mea vaivai o le lalolagi. Ia talanoa i mea ua latou maua. Ia faamatala atu o mea vaivai o le lalolagi o tagata ia o e lotomauualalo, e le o le tulaga o le lauiloa i mea o le lalolagi, le aoaoina e tusa ai ma mea o le lalolagi. O i latou o e e faatatau i ai lenei faamatalaga o “tagata vaivai” e sili atu lo latou faalagolago i le Atua nai lo latou lava atamai. Talu ai ona o lena faalagolago i le Alii ua mafai ai ona faaoga i latou e “faafememea’i e popoto” (ia tagai foi MFF 35:13).

Faitau le Mataupu Faavae ma Feagaiga 1:18–20, 23 ma ia saili mo e e filifilia e le Atua e talai le talalelei i aso e gata ai. Ia fesili atu:

- O ai ua e iloa mai le talafaasolopito o le Ekalesia po o ona po nei o le ua valaauina e fai le galuega a le Alii peitai o se sa ta’ua o se tagata vaivai i manatu o le lalolagi? (O tali e mafai ona tuuina mai e aofia ai le perofeta o Iosefa Samita, Peresitene Gordon B.Hinckley, ma isi Perofeta o aso e gata ai, o faifeautalai o le Ekalesia, taitai o uarota ma paranesi.)
- Aisea e ono ta’ua ai oe o se tagata faatauva po o le vaivai?
- O le a se mea e tatau ona e faia e avea ai oe ma se auupega malosi i aao o le Alii?

Ia tautino atu i tagata o le vasega e manaomia e le Alii i latou ina ia lotomauualalo ma agamalu ina ia mafai ai ona Ia faalagolago ia i latou e faia Lana galuega i le lalolagi i aso nei.

1 Korinito 2. O le poto o le Atua e sili atu lea nai lo le poto o le tagata ma e faato’a mafai ona aaoaina e ala i le Agaga Paia. O le pogai lea o le malamalama o loo taitaiina ai lelei i tatou e ala i lenei olaga ma faaauu ai i le mamalu selesitila. (20–25 minute)

Ia e sau ma aumai ni kopi o le tusi telefoni a lo outou atunuu i le vasega. Ia tusia i ni pepa eseese ni faamatalaga o ni faafitauli o loo manaomia ai le fesoasoani a se tagata atamai (mo se faaitaiga ua le ola lau taavale, faato’a faate’a oe ma lau galuega, ua faalogoina e lau tama le tiga o le fatafata). Ia tuuina atu fasi pepa i tagata o le vasega ma fai atu ia i latou e filifili po o fea e te alu i ai mo se fesoasoani e ala i le saili i le tusi telefoni. Fesili atu:

- O ai le tagata na tonu ia te oe e faafesoota’i? Aisea?
- Pe aisea ua taua ai le avea o le tagata o le a e alu i ai mo se fesoasoani ma se tagata atamai tele i le fo’ia o lou faafitauli?

Ina ia fesoasoani i tagata o le vasega ina ia malamalama o le Atua e pogai mai ai le malamalama e taitaiina ai i tatou i le mamalu selesitila, ia talanoaina fesili nei:

- Pe e te fesili atu i le Atua i le ofu e te ofu ai i aso taitasi? Le mea e te ai ai i le aoauli, po o le fesili atu fo’i mo tali sa’o i au meaoga? Aisea po o le aisea e le faapea ai?

- O ai e te alu atu i ai mo tali i nei fesili?
- O a ituaiga o faamatalaga e tatau ona tatou ole atu ai i le Atua?

Faitau 1 Korinito 2:1–5 ma ia saili i mea na faavae ai le faatuatua o Paulo. Fesili atu:

- O a ni auala ua tatou faaogaina ai lo tatou faatuatua i nisi taimi “ina ia le i ai lo outou faatuatua i le poto o le tagata”?
- Pe aisea ua tatou faatagaina ai i nisi taimi lo tatou faatuatua e fai lenei mea?
- Pe mafai faapefea ona tatou o ese mai le le faia o lenei mea?

Faitau 1 Korinito 2:9–10; Mataupu Faavae ma Feagaiga 1:38;18:33–36 ma ia saili mo ni auala e faailoa mai ai ia i tatou le siufofoga o le Alii. Fesili atu: Pe mafai faapefea e le lagona o le siufofoga o le Atua ona fesoasoani ia i tatou ia atiina’e i le faavae o Keriso?

Faitau 1 Korinito 2:11–16 ma talanoaina nisi o fesili o loo i lalo:

- Aisea ua e manatu ai e taua le saili o le Agaga o le Alii e taitaia ai o tatou olaga?
- O le a le pogai e faigata ai i se tasi ona aoao upumoni faaleagaga?
- O le a se auala e mafai ai e le tagata faaletino ona aloa’ia lelei le talalelei?
- Pe mafai faapefea ona tatou maua le “afioga a Keriso”? (Ia tagai foi i le 2 Nifae 32:2–3).

Ia faitau le faamatalaga o loo i lalo a Elder Iosefa Filitia Samita ma molimau atu e uiga i lona faamaoni:

“Ua na o le fesoasoani lava a le Agaga Paia, ma le usiusita’i i mataupu faavae o le Talalelei, o le a mafai ai e se tagata ona maua le malamalama o le upumoni atoatoa. O lona uiga, o i latou o e o le a le ogatasi o latou olaga i mea uma ma le Soifuaga Paia; o i latou ia o le a le fetuutuuna’i o latou olaga e ala i le faatuatua ma le salamo ma le usiusita’i i tulafono paia uma lava, o le a le mafai ona i ai i se tulaga e malamalama ai i le upumoni i lona tulaga atoatoa” (Doctrines of Salvation, 1:298).

1 Korinito 3:1–15, 21–23. O le malamalama o le Talalelei e atiinae lea i le faavae o Iesu Keriso ma e tuputupu a’e i lea fuaiupu ma lea fuaiupu. (20–25 minute)

Faali atu i tagata o le vasega se ipu malamalama e tumu i le susu faapea ma se fasi aano o manu. Fesili atu:

- O le fea o ia mea e te fafagaina ai se pepe? Aisea?
- O le a se mea e ono tupu pe afai e te fafaga se pepe i se aano o manufasi?
- O le a se mea e mafai ona saunia e le susu se’ia oo ina mafai e se tamaitiiti ona ai i se aano o manufasi?

Ia fai atu i tagata o le vasega e faitau mai le 1 Korinito 3:1–2 ma ia saili po o ai na faatusatusaina e Paulo i le Au Paia i Korinito. O le a sou manatu i le uiga o le fuaitau “tama meamea ia Keriso” (f.1)?

Ta’u atu i tagata o le vasega e mafai ona faatusatusa le susu i se malamalamaga autu o le talalelei ma le aano o manufasi i se malamalamaga sili atu ona tele e uiga i le talalelei. Ia fai atu i tagata o le vasega e mafaufau faapea o i latou o faifeautalai o loo aoao atu i se tagata lotu ese, ma fesili atu:

- Aisea ua taua ai le aoao muamua atu o mataupu autu o le talalelei nai lo le upumoni e sili atu ona loloto o le talalelei?
- O le a se tulaga leaga e ono oo mai pe afai tatou te muamua ona aoao atu i tagata mataupu faavae loloto?
- O le a se mea e saunia e mataupu faavae autu o le talalelei mo tagata o e o loo aoao e uiga i le Ekalesia?

Faitau le 2 Nifae 28:30 ma fesili atu: Pe faapefea ona aoao atu e le Alii lana fanau? A’o e faitau i le faamatalaga o loo i lalo a Elder Bruce R.McConkie, ia valaauina tagata o le vasega e saili le auala tatou te maua ai se malamalamaga e uiga i mataupu faavae o le talalelei i aso nei:

“O le malo faalelalogi o le Atua o se aoga lea e aoao ai Lana Au Paia i mataupu faavae o le faaolataga. O nisi o tagata o le Ekalesia ua aoaoina i vasega o tamaiti laiti; o isi ua oo atu i le faauuina ma e mafai ona faia sailiiliga a le tagata lava ia e tusa ma mea loloto ma le natia. E tatau i tagata uma ona aoao i lea fuaiupu ma lea fuaiupu, o lea foi mataupu ma lea mataupu” (*Doctrinal New Testament Commentary*, 2:324; ia tagai foi i le MFF 78:17–18; Alema 12:9– 11).

Ia fai atu i tagata o le vasega e faitau le 1 Korinito 3:3–15 ma ia saili mo se faamaoniga e faapea o tagata o Korinito sa avea pea e pei ni tamaiti o e e manaomia le susu. Fesili atu: E tusa ai ma nei fuaiupu, o le a le faavae e tatau ona atia’e ai le malamalama o le talalelei? Ia faitau lena faamatalaga a Elder Bruce R.McConkie:

“Sa faataatia e Paulo, ‘e pei o se autu o tufuga e potu,’ le faavae mo le Ekalesia i Korinito e uiga ia Keriso ma lana taulaga togiola. Ua faapea foi, i ona po nei, sa saunoa mai Iosefa Samita: ‘O le mataupu faavae autu o la tatou lotu o le molimau lea a aposetolo ma perofeta, e uiga ia Iesu Keriso, na ia maluu, na tanumia, ma toetu mai i le aso lona tolu, ma afio a’e i le lagi; o isi mea uma e faatatau i la tatou lotu ua na o ni mea faaopoopo i ai.’ (*Teachings [of the Prophet Joseph Smith]*, p.121.)” (*Doctrinal New Testament Commentary*, 2:235).

Fesili atu:

- O le a se mea e mafai ona e faia e avea ai le Faaola ma faavae o lou olaga?
- Pe mafai faapefea ona e atia’e i lena faavae?

1 Korinito 5–7

Faatomuaga

A’o le’i tusia le 1 Korinito, sa tusia e Paulo se tusi muamua i le Au Paia i Korinito (tagai 1 Korinito 5:9). Sa faamatala e Elder Bruce R.McConkie e faapea:

“Sa tusia e tagata fevaevae’i o le aulotu i Korinito se tali [i lena tusi muamua], e faaalai ai lo latou le malilie i nisi o mataupu faavae a le Aposetolo ma ua tuuina mai ai ni fesili auiliili e uiga i ana aoaoga. Ona o lea, o le naunauta’i ma le agaga maeleleaga moni faaaposetolo, na tusia ai e Paulo se tusi lona lua, ua faapaiaina ma ua ta’ua o le Korinito Muamua, na tali atu ai i mea sa ta’ua mai e i latou o e na le fiafia ia te ia ma faalauteleina ai atili aoaoga o le tusi muamua.

“O le mea e leaga ai, ua tatou le iloa le mea na ta’ua e Paulo i lana ulua’i tusi i tagata Korinito, po o la latou tali foi ia te ia. Na pau le mea ua mafai ona tatou maua o lana tali atu lea i le tali mai. O le mea lea, ua na o ni nai faamatalaga ua tatou maua e uiga i ni vaega o le mataupu sa latou talanoaina” (*Doctrinal New Testament Commentary*, 2:309–10).

Ona o le maua o lena malamalamaga, ua faigofie ai ona maua le pogai ua sese ai le manatu o nisi e uiga i tusitusiga a Paulo, ae ui i lea, a’o e faitau ma le faaeteete i le 1 Korinito 5–7 ma saili mo mataupu faavae o le talalelei, o le a e maua. I nei mataupu sa faamatala ai e Paulo ni mataupu faavae e faatatau i le faaipoipoga, pulea o amio i le Ekalesia, fesili faaletulafono, noataga o le agasala, ma le galuega faafaifeautalai.

Ia suesue ma le agaga tatalo le 1 Korinito 5–7 ma ia mafaufau i mataupu faavae o loo i lalo a’o le’i saunia au lesona.

O Nisi Mataupu Faavae Tauga o le Talalelei e Saili Iai

- E sili atu ona faigofie le ola amiotonu pe a tatou faifai mea faatasi ma tagata amiotonu (tagai 1 Korinito 5; 6:15–17; ia tagai foi i le Kalatia 6:1).
- Ona o le Togiola, ua mafai ai e le Alii ona avea i tatou ma ni tagata paia (tagai 1 Korinito 6:9– 12, 19–20; 7:23–24; ia tagai fo’i i le Alema 22:14; MFF 60:7).
- E le tatau ona tatou faaleagaina o tatou tino, aua o malumalu paia ia o o tatou agaga (tagai 1 Korinito 6:19; tagai foi Roma 12:1; 1 Korinito 3:16–17; Mosaea 2:37; Helamana 4:24; MFF 89:18–21).

Fautuaga mo le Aoao Atu

Filifili mai aitia o loo i lalo pe faaoga ni au lava, a’o e saunia au lesona mo le 1 Korinito 5–7.

1 Korinito 5. E taua tele le filifili o uo o loo ola i le Talalelei. (15–20 minute)

Faali atu i tagata o le vasega se faatanoa o fualaau aina o loo i ai se fualaau ua pala. Ia talanoaina le tulaga aafia o fualaau aina o loo lelei ona o lea fualaau ua pala. (O le a salalau atu le tulaga faaleagaina o le fualaau pala i fualaau lelei.) Faitau le 1 Korinito 5:1 ma ia saili i le amioleaga o nisi o tagata i Korinito.

- Pe faapefea ona faatusatusa le faitaaga i le “fualaau aina ua pala”?
- Faitau le fuaiupu 2–5. O le a le mea na manao Paulo e fai ina ia puipuia ai le Au Paia?
- Pe faapefea ona avefa ma faamanuiaga i tagata amiotonu le aveesea o tagata agasala mai ia i latou?

Faitau le faamatalaga o loo i lalo a Elder Neal A. Maxwell:

“Aua le faifai mea faatasi ma tagata faitaaga—e le faapea ona ua e lelei na’ua mo i latou peitai, e pei lava ona tusia e C.S. Lewis ona ua le lava lo outou lelei. Ia manatua o tulaga leaga e mafai ona tauanauina ai tagata lelei e fai. Sa i ai ia Iosefa se manatunatuga lelei faapea foi ma le lelei o ona vae e sola ese mai ai i le ava a Potifara (“The Stern But Sweet Seventh Commandment,” in *Morality* [1992], 29).

Faitau le 1 Korinito 5:6–8 ma faamatala o le mea faafefeteina o le mea lea ua ta’ua o le fefete (yeast). Fesili atu:

- Pe aisea ua avefa ai le tulaga o le mea faafefeteina i se falaoa ma se faaitaitaiga lelei o le agasala?
- O le a se mea e te manatu e faatatau i ai le fuaitau “o se mea faafefete itiiti, e faafefeteina ai le palugafalaoa uma lava?”
- Pe faapefea ona faatatau leni faatusatusaga i le faatanoa o fualaau aina? (O le mea faafefeteina e fefete atoa ai le paluga, e pei lava o siama i le fualaau pala e mafai ona faaleagaina ai le fualaau lelei. Ua faapea foi tagata agasala e le salamo e mafai ona faatosinaina i latou o loo latou faifai mea faatasi ina ia agasala.)

Ia faitau e tagata o le vasega le 1 Korinito 5:9–13 ma ia saili mo ituaiga o tagata e mafai ona i ai sa latou faatosinaga leaga. Fesili atu:

- O le a se mea e mafai ona tatou fai e alo ese ai mai faatosinaga a i latou o e faia le agasala?
- Pe mafai faapefea ona tatou fesoasoani atu ia i latou o e faia le agasala e aunoa ma le pisia ai o i tatou lava?

Faitau mai le itulau e 9 o le tamaitusi, *Mo Le Malosi o Le Au Talavou* e uiga i le taua o le maua o ni uo lelei. Ia faamalosi atu i tagata o le vasega ina ia faautauta i la latou filifiliga o uo ina ia tele se avanoa latou te maua e ola ai i le Talalelei. Ia faamatala atu e faapea e le o le uiga o leni mea o le alo ese mai ia i latou e le o ni tagata o le Ekalesia. Ia faamamafa atu i tagata o le vasega ua ia i latou se tiute o le fesoasoani atu i isi e ala i la latou faaitaitaiga faapea foi ma le talaiina atu o le talalelei.



1 Korinito 5–6. Ina ia maua le olioli i leni olaga, e tatau ona tatou tausua i tatou lava ia mama ma agavaa mo le mauaina o le Agaga o le Alii. (30–35 minute)

A’o le’i taunuu mai tagata o le vasega, ia faagasu solo kesi ma nofoa, ia fuli i lalo nisi nofoa, ia faasalalau solo tusi i luga o le fola, ia faafao le mea e tuu ai lapisi, ma isi mea. Pe a oo ina amata le vasega, ia fesili atu: O le a se lagona na outou maua ina ua ulufale mai i se potu o le vasega ua leveleve solo faapea? Aisea? Ia fai atu i tagata o le vasega e toe faatulaga lelei nofoa. Ia fesili atu: O le a se lagona ua e maua ina ua tatou i ai i se fale faatulaga lelei, matagofie, ma tausua lelei? Ia talanoaina a latou tali.

Faitau le 1 Korinito 6:19 ma fesili atu:

- Pe faapefea ona talafeagai leni mau ma le potu gasu?
- Afai o o tatou tino o ni malumalu, pe faapefea la ona tatou tausua?
- O le a se mea e mafai ona “gasu,” “eleelea,” pe “lē faatulagaina lelei” o tatou tino?
- O a nisi auala ua faatatau ai le aoaoga faatino ma leni fuaiupu i o tatou tino?

Ia faamatala atu i tagata o le vasega e uiga i tagata o Korinito (tagai i le talaaga faasolopito o loo i le faatomuaga o le 1 Korinito, itulau 174). Ia faamatala atu sa matua faamanuiaina taumafaiga a Paulo i le faaliliuina o le Au Paia i Korinito mai a latou agasala ma aumaia i latou ia Iesu Keriso. Ae ui i lea, ina ua alu ese Paulo mai Korinito, sa ia iloa e toatele i latou na toe liliu i o latou ala sa masani mai ai. Ia faamatala atu sa tusia e Paulo le 1 Korinito e a’oa’ia ai le Au Paia ma uunaiina i latou ina ia tumau ma le le mafaagaetia i le faatuatua.

Ia faitau tagata o le vasega i le 1 Korinito 5:1–6:8 ma ia saili i le tele o agasala sa faia e tagata Korinito, ma ia tusia se lisi o ia agasala i luga o le laupapa. Fesili atu: O le fea o ia tofotofoga ua tatou faafeagai i aso nei? Ia faaauu le faitauina o le 1 Korinito 6:20. Fesili atu: Pe mafai faapefea ona tatou tausua i tatou lava ia agavaa mo le maua o le Agaga Paia a’o tatou ola i se lalolagi agasala?

Ia faaali atu se mea e mama ma pa’epa’e (e pei o se solosolo, se ata o se teine faaipoipo, po o se pepa mama), ma ia fesili atu: O le a se mea e ta’u mai ia i tatou i le lanu pa’epa’e? Ia faaali atu se faatanoa e tumu i elele. Ia valaauina se tagata o le vasega e faaleelea ona lima i le elele, ona tuuina atu lea i le tagata o le vasega le mea mama ma le pa’epa’e na te umia. Fesili atu i le vasega: O le a sou lagona pe a e tagai atu ua elelelea lea mea? Ia faatusatusa leni gaoioiga ma le Au Paia i Korinito o e na avefa ma ni tagata le mama, ma ia faamalamalama atu i tagata o le vasega e mafai ona tula’i mai lea lava tulaga i aso nei. Fesili atu:

- O a ituaiga o mea e faaleelea ai i tatou?
- O le a se mea e tausua ai lo tatou mama?

Ia faamatala atu o agasala autu sa faia e le Au Paia i Korinito o faiga feusua’i lē mama. Faitau 1 Korinito 6:19–20 ma le 7:23 ma fesili atu:

- O ai e ana i tatou?
- Pe faapefea ona faatatau lea tulaga i o tatou tino ma o tatou agaga?
- O a ni auala ua umia ai e le Atua i tatou?
- Talu ai ona o i tatou o a Ia lea ma talu ai fo'i ona o o tatou tino o malumalu ia e mau ai le Agaga Paia, o le a se tulaga e tatau ona tatou ola ai?

Ia faitau faamatalaga o loo i lalo ma ia fai atu i tagata o le vasega e fautua mai po o le a se auala ua faatatau ai ia i latou le talanoaga.

Sa saunoa mai Peresitene Stephen L.Richards, o le na avea ma uso o le Au Peresitene Sili, e faapea:

“Ua manatu nisi. . .ua ia i latou le saolotoga e fai ai le mea latou te loto i ai. E foliga mai ua latou manatu ua ia i latou le filifiliga saoloto e faia ai i o latou olaga se mea latou te loto i ai. E tatau ona aoao atu ia i latou upu a le Alii e faatatau i le olaga. O le olaga o se mea taua, ‘aia ua faatauina outou i le tau. . . .’ (1 Korinito 6:20)” (In Conference Report, Apr.1956, 85).

Sa faapea mai Peresitene Iosefa Filitia Samita:

“O le alofa silisili, ma ona faamanuiaga o loo i ai, e pei ona tuuina mai ia i tatou e ala i le faasatauroga, mafatiaga, ma le Toetu o Iesu Keriso ua le oo i ai lo tatou malamalamaga o le tagata faaletino. E le mafai ona tatou toe totogi atu. Ua faatauina i tatou i se tau e le mafai ona tatou faatusalia - e le faatauina i se auro po o se ario poo ni maa taua, ‘a o le toto taua o Keriso, pei o lo le tamai mamoe e le pona lava.’ (1 Peteru 1:19)” (In Conference Report, Apr. 1966, 102).

Sa aoao mai Elder Jeffery R. Holland, o se uso o le Korama e Toasefululua, e faapea:

“Sa mafatia Keriso ona o agasala ma faanoanoaga ma tiga e oo i isi tagata uma, e faapea foi i le faamagaloina o a tatou agasala uma, pe afai tatou te usiusita'i i mataupu faavae ma sauniga o le Talalelei sa Ia aoaoina atu (tagai 2 Nifae 9:21–23)” (In Conference report, Oct.1995, 88; po o le *Liahona*, Ianuari 1996, 70).

Faitau le Mataupu Faavae ma Feagaiga 93:36–37. Ia molimau atu o le le usiusita'i ma le le mama o le faapogai lea o le pogisa ma le le maua o le Agaga. A'o avea i tatou ma tagata usiusita'i ma mama, e mafai ona nofo ia i tatou le Agaga Paia ma tuuina mai ia i tatou se malamalamaga e sili atu.

1 Korinito 7. Sa tali e Paulo fesili faigata e uiga i le faaiipoipoga. (10–15 minute)

Tofi ni tagata se to'atolu o le vasega e o mai i luma o le vasega. Ia tofia i latou ta'itoatasi i mea nei e fai: O se tagata ua sefulu ma ona tupu ona tausaga le matua o loo saunia mo se misiona; o se faifeautalai faamisiona; ma se faifeautalai nofo fua ua luasefulu ma le lima ona tausaga. Ia tuuina atu fesili o loo i lalo ma ia fai atu i tagata taitoatasi o tagata e to'atolu o le vasega e tali atu i fesili nei:

- Pe e te manatu ea ua oulua feiloa'i ma le tagata o le a oulua faaiipoipo i se aso?
- O le a le tele o le taimi e te faaaluina i le mafaufau e uiga i le faaiipoipoga?
- O le a le vave o le taimi ua e manatu o loo finagalo ai le Alii ia te oe ina ia faaiipoipo?

Ia fesoasoani atu i tagata o le vasega ina ia iloa o tali i fesili e uiga i le faaiipoipoga atonu e faigata ma e faalagolago lava lea i tulaga o loo i ai le tagata ia. Ia faamatala atu o le 1 Korinito 7:1–24 o loo i ai ni fesili faaeteete gata e uiga i le faaiipoipoga. O le fuaiupu e 25–40 o loo faatatau tonu lava ia i latou o loo avea ma faifeautalai po o le faia o isi galuega o le perisitua o loo manaomia ai le tele o le taimi e o ese ai mai le aiga.

Faitau le 1 Korinito 7:1, 7–9, 27, 32–34, 38. Ia fesili atu i tagata o le vasega:

- O le a se tulaga e ono faigata ai ona malamalama i nei fuaiupu?
- Pe foliga mai ea o nisi o ia fesili e le talafeagai ma o tatou talitonuga e faatatau i le faaiipoipoga?

Ina ia fesoasoani i tagata o le vasega ia malamalama i nei tusitusiga a Paulo, tagai i le Faaliliuga a Iosefa Samita ole 1 Korinito 7:1–2, 5, 26, 29–33 i le *Taiala i Tusitusiga Paia*. Ia faamalamalama atu o se faamanuiaga tele le maua o se fesoasoani valo'ia e malamalama ai i fuaitau faigata o tusitusiga paia.

1 Korinito 8–11

Faatomuaga

O le fuafuaga mo le maua o le fiafia e aofia ai faatonuga e faatatau i le mea e tatau ona tatou fai e avea ai e faapei o le Atua. Ua faamatalaina e le tele o aoaoga a Paulo ni mataupu faavae taua se tele e uiga i le Atua ma Lana fuafuaga. O se tasi o faatusatusaga na faaaoaga e Paulo e aofia ai se tagata taalo o le na avea le aoaoina lelei o ia ma mea na ia manumalo ai i le tau (tagai 1 Korinito 9:24–27). E tatau ona pulea lelei i tatou e pei o tagata taaalo ina ia maua ai le pale “e le pala lava” (f.25), o le tau lea o le ola e faavavau (tagai 2 Timoteo 4:7–8; MFF 14:7).

Aoao ma le agaga tatalo le 1 Korinito 8–11 ma mafaufau i mataupu faavae o loo i lalo a’o le’i saunia au lesona.

O Nisi Mataupu Faavae Tava o le Talalelei e Saili Iai

- O le faataitaiga leaga a se tagata e mafai ona avea ma mea e tausui i isi (tagai 1 Korinito 8:1–13; ia tagai foi Alema 4:10; 39:11).
- E ui lava ina ua ausia e le toatele le tulaga o se atua, ae e na o le tasi lava le Aigaatua ua tatou tapua’i i ai (tagai 1 Korinito 8:4–6).
- O Iesu Keriso o le Atua o Isaraelu ma o le Papa faaleagaga o loo fesoasoani mai ia i tatou (tagai 1 Korinito 10:1–14; ia tagai foi i le Helamana 5:12).
- E tatau ona i ai le faaipoipoga faasesitila ina ia faaeaina ai (tagai 1 Korinito 11:11–12; ia tagai foi MFF 131:1–4).
- O le faamanatuga e faato’a mafai ona avea o se faamanuiaga tele ia i tatou pe afai tatou te fetagofi atu i ai ma le agavaa (tagai 1 Korinito 11:23–30; ia tagai foi 3 Nifae 18:28–32).

Fautuaga mo le Aoao Atu

Ia filifili mai aitia o loo i lalo pe faaoga ni au lava, a’o e saunia au lesona mo le 1 Korinito 8–11.

1 Korinito 8. Talu ai ona e faamasinoina e tagata lotu ese le Ekalesia ona o amio a ona tagata, ua mafai ai fo’i ona avea la tatou faataitaiga ma mea e aafia ai isi tagata. (20–25 minute)

Ia tuu se mea lapoa e ono lavea ai i le faitotoa o lou potu o le vasega. Fai i tagata o le vasega e savavali faataamilo po o le laa foi i luga o lea mea. Afai e taumafai se tasi e aveese, ia faatagaina i latou e faia lea mea. Ia talanoaina fesili e pei o nei:

- Pe sa faapefea ona avea le mea na faalavelave i le faitotoa ma mea na faigata ai ona o mai i le vasega i le aso nei?
- O le a se taumafaiga na manaomia e aveesea ai lea mea?

Faitau le Alema 4:10 ma fesili atu:

- Afai tatou te faatusatusa le faitotoa o le potu o le vasega i le faitotoa o le Ekalesia, o le a se mea e faatusa i ai le mea o loo faalavelave i le faitotoa?
- Faitau le Alema 39:11. O le a se aafiaga na i ai i le faataitaiga a Korianetona i isi tagata?
- Pe mafai faapefea ona tatou alo ese mai le aafia i faataitaiga leaga a isi tagata?

Faitau le 1 Korinito 8:1–6 ma ia saili mo ni faafitauli sa lauga atu ai Paulo. (O le taumafalia o meaai na ofoina atu mo tupua ua ta.) Fesili atu:

- Mata o le a se foliga e vaai i se tagata o le Ekalesia e vaai atu ua ai e se isi tagata se mea na te iloa e faasaina?

- O a ni auala e ono oo ai le ita i tagata lotu ese ona o mea le amiotonu e faia e isi tagata o le Ekalesia i aso nei?
- O a ni mea ua faasaina e faaoga e nisi tagata o le Ekalesia e ono taofia ai tagata ua sili atu ona vaivai o le Ekalesia po o se tagata lotu ese mai le aoao atili e uiga i le talalelei?

Ia faitau e tagata o le vasega le 1 Korinito 8:7–13 ma ia saili mo le mea na foia ai e Paulo le faafitauli. Fesili atu:

- O le a se mea sa saunoa mai ai Paulo e sili ia te ia le fai na i lo le faatiga i se uso? Aisea?
- O le a le mea e sili atu ona taua: O se mea e foliga mai e manuia ai i tatou po o se mea e manuia ai le Alii ma Lona malo?
- E mafai faapefea ona tatou mulimuli atili i le agaga o aoaoga a Paulo?



1 Korinito 9:24–10:14. O le maua o le fesoasoani a le Alii e mafai ai ona tatou manumalo i o tatou tino ma saunia ai mo se tofi e faavavau. (15–20 minute)

Ia saili se tagata taalo lelei o loo i totonu o la outou vasega po o le faaali atu o se ata o se tasi. Ia talanoaina faatasi ma le vasega po o le a le mea e manaomia ina ia avea ai ma se tagata taalo lelei atoa ma tau e oo mai mai le pulea lelei ma le aoaoina. Faitau 1 Korinito 9:24–25 ma fesili atu:

- O ai ua faatusa i ai e Paulo se tagata taalo? (O i latou ia o loo saili e ola i le talalelei ma maua le ola e faavavau.)
- O le a le mea e manaomia mo se tagata Kerisiano moni ina ia alualu ai i luma?
- O ai e mafai ona ia maua le tau e ofoina mai e le Atua mo i tatou?

Ia faitau le faamatalaga o loo i lalo a Elder M.Russell Ballard:

“Se’i ou faamatala atu le pogai e tatau ai ia te outou alii ma tamaitai talavou ona tausia a outou feagaiga ua uma ona outou osia ma le Atua. I le mua’i olaga a’o le’i tuua e i tatou le afioaga o le Tama Faalelagi, sa Ia lapataiina ma fautuaina i tatou e uiga i mea fou tatou te faia i le olaga faaletino. Sa tatou iloa o le a maua e i tatou taitoatasi se tino o aano ma ivi. Talu ai ona sa le avea muamua i tatou ma ni tagata faaletino, o le mea lea sa le maua ai e i tatou se avanoa e feagai ai ma faaososoga o le ola faaletino. Peitai sa silafia e le Tama Faalelagi ma malamalama i lea tulaga. Sa Ia poloaiina i tatou ina ia pulea o tatou tino faaletino ma ia tatou avea ia tino faaletino ma mea e usiusita’i i o tatou agaga. E tatau i o tatou agaga ona manumalo i faaososoga faaletino o le a feagai ma o tatou tino i se lalolagi faaletino. O le manumalo faaleagaga i faatosinaga a Satani e oo mai lea ia i tatou e ala i le tausia o poloaiga a lo tatou Alii, o Iesu Keriso” (Liahona, Iulai 1993, 6).

Ia fesili atu: Pe faapefea ona faatatau lenei faamatalaga i le faatusatusaga a Paulo sa fai i le tagata taalo?

Ia vaevae le vasega i ni vaega se fa ma ia tuuina atu i vaega taitasi mau o loo i lalo e susesue i ai:

- 1 Korinito 10:7; Esoto 32:6–8, 17–20
- 1 Korinito 10:8; Numera 25:1–9
- 1 Korinito 10:9; Numera 21:1–9
- 1 Korinito 10:10; Numera 16:41–50

Ia toe faamatala mai e vaega taitasi le tala mai ia latou mau ua tofia i ai ma ia faamatala le faaososoga sa feagai ma le fanauga a Isaraelu. Ona talanoa lea o le vasega i fesili o loo i lalo:

- O le a se faamaoniga o loo i ai e ta'u mai ai na le i ai i le toatele o tagata Isaraelu le pulea e le tagata o ia lava?
- Pe mafai faapefea ona avea le pulea o le tino ma mea e fesoasoani ai ia te'i latou?
- O a ni faigata ua i ai i tagata e tusa ma le feagai ma faaososoga o le tino i aso nei?
- O le a se mea e mafai ona tatou fai e fesoasoani ai i tatou ia i tatou lava?
- O a ni auala e mafai ona fesoasoani mai ai le Alii?

Faitau le 1 Korinito 10:1–4 ma ia saili i le auala na taitaiina ai le fanauga a Isaraelu i aso anamua. Ia fesili atu:

- O ai le Papa?
- O le a le mea e ai ma le vai faaleagaga na Ia saunia? (tagai Esoto 16:15; Numera 20:7–11).
- O le a le mea ua Ia saunia i aso nei? (Tagai 1 Korinito 10:16–17).

Ia tautino atu ona o leTogiola, o lea e mafai ai ona tatou maua le ola e faavavau pe afai tatou te tausia a tatou feagaiga. (Atonu e te manao e faaoga le faamatalaga o loo i ai i Fautuaga mo le Aoa Atua mo le 1 Korinito 10:13 ma uunaiina tagata o le vasega ina ia manumalo i o latou tino ina ia mafai ona latou maua le tau.)



1 Korinito 10:13 (Mau Tauloto). Talu ai ona o le alofa o le Atua ia i tatou, o le mea lea ua la saunia ai se auala mo i tatou e alo ese mai ai mai faaososoga ma onosaia o tatou tofotofoga. (5–10 minute)

Ia talanoa ma tagata o le vasega e uiga i le mana o le tiapolo ma ia fesili atu: Pe faapefea ona mailei i tatou e Satani i le agasala? Ia faaoga nisi fesili e pei o ia o loo i lalo:

- Pe mafai ea e Satani ona uunai oe ia e agasala?
- Pe mafai faapefea e Satani ona manumalo pe faatosinaina i tatou?
- O a ni auala poto na te faaoga e maileia ai oe ina ia agasala?

Faitau le faamatalaga o loo i lalo a le Perofeta o Iosefa Samita:

“O tagata uma lava o e faitino o loo ia i latou le mana e manumalo ai ia i latou e le o i ai ni tino. E le o i ai i le tiapolo se mana e manumalo ai ia i tatou ma e faatoa mafai pe a tatou faatagaina o ia” (*Teachings of the Prophet Joseph Smith*, 181).

Fesili atu: O le a se mea e faapoopo atu i lou malamalamaga e uiga i le mana o Satani e faatosina ai i tatou ina ia agasala?

Faitau atu i tagata o le vasega le vaega muamua o le 1 Korinito 10:13 (e oo i le fuaitau “e sili i se mea ua outou lavatia”). Fesili atu: Pe ua faapefea ona faamaonia e lenei mau le faamatalaga a Iosefa Samita? Ia molimau atu ua ia i tatou le mana e manumalo ai ia Satani.

Ia faitau le tala o loo i lalo mai ia Peresitene Boyd K.Packer, le sui Peresitene o le Korama a le Toasefululua:

“Ua faamatalaina se tala e uiga i se tupu o le na filifili ni ave taavale se lua e fai ma ana ave taavale. Sa ia faatonuina i la'ua uma e ave lana taavale agai i lalo i se ala tafato ma taamilomilo mai lalo o se tafato maualuga.

“Sa sau aga'i i lalo le ave taavale muamua, ma sa pipii latalata lava i autafa o le tafato. Sa faaalua e le ave taavale lona lua le talenia tele ma le poto. Sa alu saosaoa aga'i i lalo o le mauga, ma sa latalata lava le taavale i nisi taimi i luga o augutu o le ala ma o le mea lea sa sosolo ai i luga o pito o le tafato ia vaega o pa'u o le taavale.

“Sa poto tele lenei tupu, ma sa ia filifili ma le poto le tagata muamua e fai ma ave taavale o lana taavale. Ua sili ona lelei le tausisi pea i le pito saogalemu o mea” (*Liahona*, Iulai 1996, 20).

Ia fesili atu i tagata o le vasega: E tusa ai ma lenei tala, o le a se auala lelei e alo ese ai mai le mana o Satani?

Ia faitau mai e se tagata o le vasega le 1 Korinito 10:13. Fesili atu: O le a le mea ua faapoopo mai e le vaega mulimuli o lenei fuaiupu i lo tatou malamalama? Sa faaauau e le Perofeta o Iosefa Samita lana faamatalaga e faapea:

“O le taimi lava tatou te tetee ai i soo se mea mai le Atua, e manumalo le tiapolo ia i tatou” (*Teachings of the Prophet Joseph Smith*, 181).

Fesili atu: O le a se mea tatou te aoao mai i lenei mea?

Ia fesoasoani atu i tagata o le vasega ina ia malamalama pe a tatou faatemutemu i faaososoga e alu ese le mana mai ia

i tatou e teena ai. O le a se mea ua aoao mai i le 1 Korinito 10:14 e uiga i le teena o le faaososoga? Ia valaauina tagata o le vasega e faitau le Alema 13:27–28 ma ia saili i le auala e mafai ai ona tatou manumalo ia Satani. Ia ta'u atu lou manao ina ia tau mamao ese tagata o le vasega mai le tiapolo ae le o le gauai atu i le faaososoga. Ia talanoaina le faamatalaga o loo i lalo mai ia Elder Neal A. Maxwell:

“Ua faamaonia mai e le Atua ia i tatou e i ai pea lava pea se ala e sola ese ai mai le tiapolo, ma/po o le le/ma faaososoina ai foi tatou i se mea e sili atu i lo se mea tatou te mafaia. O lenei mea moni, e pei ona sa ta'u mai e perofeta eseese i lea augatupulaga ma lea augatupulaga, e taua ia i tatou; o le saga ta'uina mai pea faaperofeta e faamautinoa ai” (*Things As They Really Are*, 88).

Ia faamatala atu e faapea e le o le uiga o lenei mea e mafai ona tatou faatupuina faaososoga i o tatou olaga ae faamoemoe i le Atua na te faaolaina i tatou. E fesoasoani lo tatou Tama ia i latou o e loto maualalo ma i ai le agaga tatalo (Alema 13:27–29). Sa tuuina mai e Elder Maxwell lenei tulaga e filifili i ai:

“A o le faaososoga, o le tele lava o taimi o loo i ai se ala manino e sola ese ai, ae peitai o le puipuia—e le o le maileia i se isi tulaga—o se mea mautinoa lea ma o se vaega o le maua o le faatuatua e lava lelei” (*Not My Will But Thine* [1988], 75).

Sa saunoa mai Peresitene Siaoasi A. Samita, o le na avea ma se uso o le Au Peresitene Sili, e faapea:

“O loo i ai se laina o le tuaoi ua uma ona faamatala lelei mai e uiga i le va o le mea e pule ai le Alii ma le mea e pule ai le tiapolo. Afai o le a e tumau i le itu a le Alii o lea laina, e le mafai ona oo mai le fili iina e faaososoina oe. O loo saogalemu atoatoa oe pe afai e te tumau i le itu a le Alii o lena laina. Ae peitai. . . afai o le a e sopo'ia le isi itu a le tiapolo o le laina, o loo ua i ai oe i le vaega e pule ai, ma ua e i ai i lona mana, ma o le a galue i le faaumatiaina o oe e ala i le tausia o oe mai le toe sopo ane i le mea o loo i ai le saogalemu” (In George Albert Smith, in Conference Report, Oct. 1945, 118).

1 Korinito 11:23–30. A'o fetagofi i tatou ma le agavaa i le faamanatuga, o le a faamagaloina i tatou mai a tatou agasala ma o le a faaleleia e le Alii o tatou agaga. (20–25 minute)

Ia fesili atu i tagata o le vasega pe afaina faatusa e faaoga e fai ai le faamanatuga. Ia ta'u atu ia i latou o loo ta'u mai i tusitusiga paia o le areto ma le uaina o mea ia e tatau ona fai ai le faamanatuga ae peitai e masani lava ona tatou faaogaina le vai ae le o le uaina. I taimi faafuase'i po o taimi e le maua ia mea, e mafai ona faaoga se mea talafeagai lelei e sui ai. Mo se faataitaiga, sa faaoga i nisi taimi pateta po o pa'u o pateta e fai ai le faamanatuga e le Au Paia o Aso e Gata Ai i Europa i le taimi o le Taua Lona Lua a le Lalolagi (see Ezra Taft Benson, in Conference Report, Oct. 1952, 120).

Faitau le 1 Korinito 11:23–26 ma le Mataupu Faavae ma Feagaiga 27:2. Fesili atu:

- O le fea e sili ona taua, o mea tatou te faaoga e fai ai le faamanatuga po o le auala e saunia ai i tatou mo le fetagofi atu e aai ma feinu i le faamanatuga? Aisea?
- Aisea tatou te aai ai i le faamanatuga?

Faitau le Mataupu Faavae ma Feagaiga 20:77 ma ia saili feagaiga tatou te osia pe a tatou fetagofi atu i le faamanatuga, ma ia tusia ia mea i luga o le laupapa. Ia talanoaina ma tagata o le vasega le auala e mafai ai ona tatou tausia atili a tatou feagaiga. Fesili atu:

- O le a le taua o le manatua o le tino o Iesu?
- O le a le taua o le manatua o Lona toto?
- Pe mafai faapefea e faatusa o le faamanatuga ona tuuina mai ia i tatou le faamoemoe?
- Pe tatau faapefea i le manatua o nei mea ona aafia ai o tatou olaga?

Ia tautino atu le taua o le faamanatuga, ma ia faamalamalama atu ona pau lava lea o le sauniga tatou te faia mo i tatou lava e sili atu nai lo le faatasi. Faitau i le 1 Korinito 11:27–31 ma ia saili mo mea na lapataiina ai i tatou e Paulo ina ia alo ese ai. Sa aoao mai Elder Iosefa Filitia Samita e faapea:

“O le fetagofi atu i nei faatusa e aofia ai ni sauniga sili ona paia i le Ekalesia” (*Doctrines of Salvation*, 2:339).

Ia faamatala atu ua i ai i le faamanatuga le mana e fesoasoani ai ia i tatou i le faaatoatoaina o o tatou olaga pe afai tatou te fetagofi atu i ai ma le mama. Sa faamatala e Elder Malvin J. Ballard, o le sa avea ma se tasi o le Korama a le Toasefululua, e faapea:

“Afai tatou te salamo ma le faamaoni ma tuuina e i tatou i tatou lava i se tulaga tatau, o le a faamagaloina i tatou, ma o le a oo mai le faamalologa faaleagaga i o tatou agaga. . . . o le a e lagona manu'anu'a o le agaga ua faamaloloina, ma aveesea le avega mamafa. Ona oo mai ai lea o le to'afilemu ma le fiafia” (“The Sacramental Covenant,” *New Era*, Jan. 1976, 8).

Sa saunoa mai Elder John H. Groberg, o se tasi o Fitugafulu, e faapea:

“O le a le uiga o le fetagofi atu i le faamanatuga ma le lotomama? Pe faapefea ona tatou iloa ua tatou le mama?

“Afai tatou te mananao ia alualu i luma (o lona uiga ia salamo) ma e le o i lalo o se faasalaga a le perisitua, o lona uiga la, i lo’u manatu, ua agavaa i tatou. . . .

“Ae ui i lea, afai tatou te mumusu e salamo ma alualu i luma, afai tatou te le manatua o ia ma tasi i ana poloaiga, o lona uiga la ua tatou taofia lo tatou alualu i luma, ma o le mea lena e ta’ua o le faasalaina o o tatou agaga.

“O le faamanatuga o se mea lea e faia e le tagata lava ia, ma o i tatou o e ua malamalama i lo tatou agavaa pe leai fo’i” (*Liahona*, Iulai 1989, 40; tagai foi i le 3 Nifae 18:27–29).

Ia talanoaina fesili nei:

- Pe faapefea ona tatou iloa ua tatou fetagofi atu i le faamanatuga ma le mama?
- O le a le mea e tupu ia i latou o e fetagofi atu i le faamanatuga ma le le mama?
- O le a le faamanuiaga e maua e i latou o e e fetagofi atu ma le mama?

Ia toe tuuina atu lau molimau e uiga i le paia o le faamanatuga atoa ma le mana e mafai ona maua ai i o tatou olaga. Ia uunaiina tagata o le vasega ina ia latou maua lena mana i le taimi e sosoo ai latou te fetagofi atu ai i le faamanatuga e ala i le faatinoina o mataupu faavae o loo talanoaina i le lesona.

1 Korinito 12–14

Faatomuaga

Sa aoao atu Paulo i le Au Paia i Korinito e uiga i le mataupu o le lotogatasi e ala i le ta’u atu ia i latou o le meaalofa o le Agaga Paia. Sa ia ta’u atu ia i latou ua tuuina mai e le Atua ia i tatou nei meaalofa e le gata ina ia faamanuia ai o tatou olaga taitasi a ia tuuina mai ai foi ia i tatou le avanoa e faamanuia ai e le tasi le tasi (tagai 1 Korinito 12:1–12). O meaalofa uma a le Agaga e maua mai lava faapogai e tasi, o le Agaga Paia lea. Sa faatusatusa e Paulo nei meaalofa i vaega o le tino. E galulue saoloto vaega taitasi ae ua galulue i se galuega e tasi. Ua faapea foi le aualea e tatau ai i tagata o le Au Paia ona faaoga a latou meaalofa e faamanuia ai e le tasi le tasi ma

avea ai ma tagata e tasi. Sa aoao atu Paulo e uiga i meaalofa a le Agaga o le faatuatua, faamoemoe, ma le alofa, ma o le mea sili o le alofa lea. Sa ia faamanatu atu i le Au Paia afai latou te le maua le alofa, o le a leai se aoga o isi meaalofa uma.

Aoao ma le agaga tatalo le 1 Korinito 12–14 ma ia mafaufau i mataupu faavae nei a’o le’i saunia au lesona.

O Nisi Mataupu Faavae Tavaa o le Talalelei e Saili Iai

- O le malamalama e faapea o Iesu o le Keriso e oo mai lea i se faaaliga e ala i le Agaga Paia (tagai 1 Korinito 12:1–3).
- O loo i ai le tele o meaalofa a le Agaga ua tuuina mai e faamanuiaina ai le Au Paia (tagai 1 Korinito 12:4–31).
- E tatau ona tatou saili ia maua le alofa, le alofa mama o Keriso, ina ia mafai ai ona tatou faaoga ma le tatau meaalofa uma a le Agaga (tagai 1 Korinito 13; ia tagai foi i le Moronae 7:45–48).

Fautuaga mo le Aoao Atu

Filifili mai aitia o loo i lalo, pe faaoga ni au lava, a’o e saunia au lesona mo le 1 Korinito 12–14.



1 Korinito 12–14. E faaali mai ma molimau mai le Agaga Paia o Iesu o le Keriso; o le agaga lea o le valoaga. E faamanuiaina foi o tatou olaga e le Agaga Paia e ala i isi meaalofa a le Agaga. (35–40 minute)

Ia fai atu i se tagata o le vasega na te taina se pese i le piano po o se isi lava laau fai faili ma ia faaoga na o le tasi le ki po o le nota. Po o le tusia e se tagata o le vasega o se fuaiupu i luga o le laupapa e faaoga ai se upu e tasi. Ia faitau e tagata o le vasega le 1 Korinito 12:1–4, ma fesili atu:

- O le a se mea o faamatala mai i lena mau e mafai ona faatusatusa i ki o se piano po o upu o se fuaiupu?
- E tusa ai ma le fuaiupu e tolu, o le a se malamalamaga taua e maua e se meaalofa a le Agaga?
- O a nisi o meaalofa a le Agaga?

Ia vaevae tagata o le vasega i vaega e tolu ma ia tofia vaega taitasi i se tasi o mau o loo i lalo: 1 Korinito 12:4–11; Mataupu Faavae ma Feagaiga 46:11–26; Moronae 10:8–19. Ia fai atu ia i latou e:

1. Faia se lisi o meaalofa a le Agaga.
2. Filifili pe aisea ua tuuina mai ai meaalofa.
3. Filifili pe mafai e tagata uma ona maua se meaalofa e tasi.
4. Tusi se lisi o ni faataitaiga se tele e mafai ona latou tusia o ni tagata ua faamanuiaina i meaalofa a le Agaga.

Ia lipoti mai e vaega taitasi, ma faatusatusa ma talanoaina mea na latou maua. Ia fesili atu i tagata o le vasega pe aisea ua latou manatu ai ua faamatalaina auiliili meaalofo i tusi eseese o tusitusiga paia.

Fesili atu: Pe o i ai ea nisi meaalofo e ese mai meaalofo ua tusia i nei mau? Faitau le faamatalaga o loo i lalo a Elder Marvin J. Ashton, o le sa avea ma se uso o le Korama a le Toasefululua:

“Se’i tatou talanoaina nisi o nei meaalofo faale-amanaia: o le meaalofo o le ole atu; o le meaalofo o le faalogo-
logo; o le meaalofo o le lagona ma faaoga se leo
itiiti; o le meaalofo o le mafai ona tagi; o le meaalofo
o le alo ese mai le fevaevaea’i; o le meaalofo o le ioe
gofie; o le meaalofo o le alo ese mai le tautu i upu; o le
meaalofo o le saili po o le fea le mea amiotonu; o le
meaalofo o le le faamasino atu; o le meaalofo o le
tulimata’i atu i le Atua mo se taitaiga; o le meaalofo
o le avea ma soo; o le meaalofo o le tusia o isi tagata;
o le meaalofo o le mafai ona manatunatu lelei; o le
meaalofo o le tuuina atu o tatalo; o le meaalofo o le
tuuina atu o se molimau malosi; ma le meaalofo o le
maua o le Agaga Paia” (*Liahona*, Ianuari 1988, 23).

Fesili atu: Pe aoga ea meaalofo uma? Faaali atu i tagata o le vasega se mea faitino po o se mea taalo e alu i maa. Ia faamalamalama atu le auala e gaoioi ai. Ave ese maa ma faapea atu o le a le galue i le taimi nei. Ia faitau e tagata o le vasega le 1 Korinito 13:1–3 ma ia saili mo mea e manaomia mo le faagaioia o meaalofo faaleagaga. Fesili atu:

- Pe faapefea ona avea le alofa e pei o se maa moliuila?
- Aisea ua e manatu ai o le alofa o se meaalofo sili lea ona taua a le Agaga?

Ia fai atu i tagata o le vasega e faitau mai le 1 Korinito 13:4–7 ma ia tusia se lisi o mea taua e fitu e faamatalaina ai le ala e faaalua ai le alofa atoa ma mea taua e valu e faamatala ai le mea ua le o i ai le alofa. Fesili atu: Pe mafai faapefea e lou olaga ona suia pe afai e avea nei vaega taua o le alofa ma se vaega o lou natura?

Faitau le uiga o le alofa e pei ona i ai le *Taiala i Tusitusiga Paia* atoa ma le faamatalaga leni a Elder Bruce R. McConkie:

“Mai i uiga uma o le amioatua ma le atoatoa, o le alofa o le mea sili lea ona manaomia. O le alofa foa’i e sili mamao atu nai lo le alofa, e sili mamao atu lava; o lea mea o le alofa lea e faavavau, o le alofa atoatoa, o le alofa mama o Keriso lea e tumau e faavavau. O le alofa lea ua faaautu i le amiotonu ma o le ua i ai lea mea e le o i ai se faamoemoe po o se manaoga se’i vagana o le manuia faavavau o lona lava agaga faapea ma agaga o i latou o loo mau ma ia.” (*Mormon Doctrine*, 121).

Faitau le Mataio 22:34–40. Ia faamatala atu “o le tulafono ma le au perofeta” (f. 40) e faatatau lea i vaega o le Feagaiga Tuai. Fesili atu:

- Afai e faaautu tulafono ma le au perofeta uma i poloaiga e lua, o le a la le faia i le va o tusitusiga paia ma le alofa?
- Faitau le Moronae 7:46–48. O le a se auala ua faamatala ai e Mamona le alofa o Keriso?
- E tusa ai ma lana faamatalaga, pe faapefea ona tatou maua le alofa o Keriso?

Ia faamalamalama atu i tagata o le vasega o le tatalo mo le alofa o Keriso ua le ese lava lea ma le tatalo mo isi faamanuiaga–tatau foi ona tatou galulue malosi mo le mauaina o nei faamanuiaga. Fesili atu: O le a se isi mea e mafai ona tatou fai e atiinae ai le alofa o Keriso? (Atonu e aofia i tali le tuuina atu o le galuega fesoasoani, faitaulaga mo isi, ma le ususita’i i poloaiga; tagai 1 Ioane 5:2–3.)

Faitau le 1 Korinito 13:8–13 ma fesili atu: Pe ua faapefea ona faatusaina le atiinae o le alofa o Keriso e pei o le tuputupu a’e mai le laitiiti? Ia uunaiina tagata o le vasega ina ia saili le alofa o Keriso, o le meaalofo sili lea ona taua a le Agaga.

1 Korinito 12:13–31. E taua tagata uma o le Ekalesia i le Alii ma Lana Ekalesia. (15–20 minute)

Ia tuu i luga o se laulau po o se isi mea malo se faaputuga itiiti o viliga penitala po o le eleele mago. Tofi se tagata o le vasega e sau i luma, ma ia tuuina atu i ai se tuaniu e tasi mai se salu e salu ai le faaputuga. Fesili atu:

- Pe o faapefea ona aoga lelei lau salu?
- O le a le umi o le taimi e manaomia e faamaea ai le galuega?
- O le a se mea e fesoasoani i lea tulaga?

Ia tuuina atu i le tagata o le vasega se salu mo’i e faamaea ai le galuega. Ia tusia vaega eseese o se salu. (O le au, ma tuaniu.) Fesili atu:

- O le a le taua o vaega eseese o le salu mo le faia o le galuega?
- Faitau le 1 Korinito 12:13–18. O le a se mea na faatusa e Paulo i tagata o le Ekalesia?
- O a vaega o le tino na faatatau i ai lana faamatalaga?
- O a vaega tatou te mananao e faaoga e aunoa ma ia mea? Aisea?
- O le a se mea na aoao atu e Paulo? (Tagai MFF 84:109–110).
- Pe ua faapefea ona faatusatusa leni aoga i se salu?

Faitau le 1 Korinito 12:19–23 ma fesili atu: O ai sa faatatau i ai le faamatalaga a Paulo a’o talanoa o ia e uiga i vaega ua sili ona vaivai po o le sili ona faale-amanaia? (Atonu o i latou ua lagona e le aoga i latou pe le agavaa i totonu o le Ekalesia, po o i latou e faaleiloga o latou tiute.) Ia faitau le saunoaga leni a Peresitene Gordon B. Hinckley:

“O lenei Ekalesia e le o se ekalesia a lona Peresitene. O lona ao o le Alii lea o Iesu Keriso, o lona suafa ua tauaveina e i tatou taitoatasi i o tatou lava luga. O loo tatou galulue faatasi ai i lenei galuega sili. Ua tatou i ai iinei e lagolagoina lo tatou Tama i Lana galuega ma Lona mamalu, ‘ia faataunuaina le faaofuina o le tagata i le tino ola pea ma le ola e faavavau’ (Mose 1:39). O lau galuega e taua tele i le tulaga o lou lava tiutetauave e pei foi o la’u galuega i lo’u tulaga. E leai se valaauga i lenei Ekalesia e faatauavaa pe itiiti foi lona tau. O i tatou uma lava i le faataunuaina o o tatou tiute e aafia ai olaga o isi tagata. O i tatou uma taitoatasi e tusa ai ma o tatou tiute, na fetalai mai le Alii:

“O lea, ia faamaoni ai; ia tumau i le tofiga ua ou tofia ai oe; ia fesoasoani i e vaivai, ia si’i a’e lima o loo tautau i lalo, ma faamalosi tulivae vaivai’ (MFF 81:5)” (*Liahona*, Iulai 1995, 78.)

Ia faitau e tagata o le vasega le 1 Korinito 12:24–27. Ia tusia e tagata taitoatasi o le vasega se tusi e tuuina atu ai se fautuaga i se uo o loo i lona mafaufau o le ua ia faaali mai lona maua o ni lagona e faalētaua le Ekalesia. Ia ao mai tusi ma ia faitau atu nisi o ia tusi.

1 Korinito 15–16

Faatomuaga

Ua faaiuina e Paulo le 1 Korinito e ala i le molimau atu e uiga i le moni o le Toetu o Iesu Keriso ma ua ia ta’ua ia lava ma isi o ni molimau (tagai 1 Korinito 15:3–9). O le Toetu o Keriso na tatalaina ai faitotoa o le oti ma mautinoa o le a toe tu a’e tagata mai le tuugamau (tagai f.19–27). O le a faamasinoina tagata uma lava ma maua se tau e tusa ma lo latou faamaoni (tagai f.33–42). Tagai i le 1 Korinito 15:53–58 mo le molimau ma le folafolaga ua tuuina mai e le Alii i tagata uma (e mafai ona aveesea le tui o le oti e ala i le faamoemoe atu i se toetu mamalu). Ua uunaiina e Paulo le Au Paia ina ia maua le faatuatua ma le alofa e avea ma tulaga o la latou amio (tagai 1 Korinito 16:13–14, 22–24).

Ia suesue ma le agaga tatalo le 1 Korinito 15–16 ma mafaufau i mataupu faavae o loo i lalo a’o le’i saunia au lesona.

O Nisi Mataupu Faavae Taua o le Talalelei e Saili Iai

- O le a toe tutu tagata fai tino uma lava ma maua le tino ola pea, o tino ia ua faaatoatoaina (tagai 1 Korinito 15:19–26, 42–57; ia tagai fo’i i le Alema 11:43–45).
- Sa faia papatisoga mo e ua oti i aso anamua ma ua faaauuina i aso nei (tagai 1 Korinito 15:29; ia tagai foi i le MFF 128:11–16).
- E mafai ona tatou maua se tasi o malo e tolu o le mamalu e ala i lo tatou faatuatua ma le mana o le Togiola (1 Korinito 15:35–42; ia tagai foi i le MFF 76).
- Sa tatou tumau ma le faatuatua e ala i le tausia o a tatou feagaiga i o tatou olaga atoa (tagai 1 Korinito 15:58; 16:13–24).

Fautuaga mo le Aoao Atu

Ia filifili mai aitia o loo i lalo, pe faaoga ni au lava, a’o e saunia au lesona mo le 1 Korinito 15–16.



1 Korinito 15. O lo tatou faatuatua atoa ma le mana o le Togiola, e mafai ai ona tatou maua se tasi o malo e tolu o le mamalu.
(30–35 minute)

Tusi le upu *oti* i luga o le laupapa. Fesili atu i tagata o le vasega:

- O le a se mea e te popole tele i ai e tusa ma le oti?
- O ai le tagata sili ona oulua vavalalata ua oti?
- O le a se auala na avea ai le oti o lenei tagata pele ma se mea tiga ia te oe?
- Pe na faapefea ona uma le tiga po o le “tui” o le oti o lenei uo pele?

Faitau le 1 Korinito 15:1–4 ma ia saili mo le savali o le faamoemoe. Ia faamatala atu sa aoao atu Paulo i le Au Paia i Korinito, o nisi o ia tagata sa teena le talitonuga i le Toetutu. Sa taumafai o ia e faasa’o lo latou le talitonu i lana molimau.

Vaevae le vasega i ni vaega se fa ma ia tofia ni vaega taitasi mau e fa o loo i lalo: 1 Korinito 15:5–11; 15:12–26; 15:35–42; ma le 15:42–50. Ia faitau mai e vaega taitasi a latou mau ma ia sailia ni faamatalaga e uiga i le Toetutu. Ia ta’u mai e i latou o latou lagona, ma ia tusia i luga o le laupapa. Ia fesili atu:

- O le a se faamaoniga na iloa ai ua toetu Iesu?
- O le a le “toe fili” e faaumatia e le Toetutu?
- O a ituaiga tino o le a maua i le Toetutu?

Ia faamatala atu ma talanoaina le faamatalaga a Elder Iosefa Filitia Samita o loo i lalo:

“I le toetutu o le a i ai ituaiga eseese o tino; o le a le tutusa tino uma. O le tino e maua e se tagata o le a iloa ai lona tulaga i le olaga a sau. O le a i ai tino faalelagi, tino faalelalolagi, ma tino telesitila, ma o nei tino o le a eseese e pei lava o tino o loo iinei. . . . *O nisi o le a latou maua tino faaselesitila o loo i ai mana uma o le faaeaina ma le faatuputupula’ia e faavavau.* O nei tino o le a susulu e pei o le la e pei lava o le tino o lo tatou Faaola, e pei ona faamatalaina e Ioane. O i latou e ulufale atu i le malo faaterasitila o le a i ai ni tino faaterasitila, ma o le a lē susulu e pei o le la, ae o le a sili atu ona mamalu i latou nai lo tino o i latou o e e maua le mamalu telesitila” (*Doctrines of Salvation*, 2:286–87).

Ia faamatala atu e faapea e ui lava ina o le a toetutu tagata uma ona o Iesu Keriso, o le a i ai pea le tui o le oti. Ia saili e tagata o le vasega “le tui o le oti” e pei ona ta’ua i le 1 Korinito 15:55-56. Fesili atu: Pe mafai faapefea ona tui i tatou e le agasala? Faitau le lapataiga a Peresitene Spencer W.Kimball, e faapea:

“Ua faapea mai Paulo, ‘o le tui o le oti o le agasala lea,’ o lona uiga afai e oti tagata ia latou agasala, o le a mafatia i latou i le faasalaga e pei ona faamatalaina ma o le a latou maua se mamalu e itiiti ifo i afioaga o le a oo mai (1 Korinito 15:56)” (in Conference Report, Oct.1978,109; po o le Ensign Nov.1978, 72; ia taga’i foi i le MFF 42:44–48).

Fesili atu: O le a se mea e tatau ona tatou fai e alo ese ai mai le tui o le oti? Ia faaiu lau faamatalaga i le faitauina o le molimau lenei a Peresitene Gordon B.Hinckley:

“O le tuga o le oti ua aveesea i le filemu o le ola e faavavau. . . .soo se taimi lava e oo mai ai le lima malulu o le oti, e sulua i le faanoanoa ma le pogisa o lena itula le manumalo o le tagata o le Alii lea o Iesu Keriso, ma o Ia le Alo o le Atua, o le ona le mana le maausia ma le faavavau na faatoilaloina ai le oti. . . . o ia o lo tatou mapusaga, o lo tatou toomaga e toatasi, pe a ufitia i tatou i le pogisa o le oti a’o alu a’e le agaga ma tuua na o le tino” (in Conference Report, Apr.1996, 92; po o le *Liahona*, Iulai 1996, 73).

Ia molimau atu ua tatalaina e Iesu le faitotoa e tau atu i le mamalu selesitila mo i latou e agavaa.



1 Korinito 15:20–22 (Mau Tauloto). O le a toetutu tagata uma e ala i le Togiola a Iesu Keriso. (10–15 minute)

Ia faamauulu lou lima i se totini lima ina ia faataitai atu ai le manatu e faapea o le agaga e maua ai le ola i le tino faaletino. Ia aveese lou lima mai le totini lima e faataitai atu ai le manatu e faapea e taatia le tino e leai se ola pe a leai se agaga. I le Toetutu o le a toe faatasia le tino ma le agaga, ma o le a le toe oti pe toe tuu eseeseina.

Ia tuuina atu i tagata o le vasega le suega puupuu lenei:

Mai tagata o loo i lalo, o ai o le a le toetu?

A. Kaino

E. Hitila

I. Iuta le Sekara

O. Lamana ma Lemuelu

Ia fai atu i tagata o le vasega e faitau le 1 Korinito 15:20–22 ina ia iloa ai le tali sa’o. Fesili atu: O le a le uiga o le fuaitau “faapolopolo o e ua momoe”? (O Iesu Keriso o le ulua’i tagata lava lea na toetu.)

Ia faaali atu i tagata o le vasega le ata O le tanuga o Iesu (Mataio 27:57–60, Ioane 19:38–42) (Nu. 62180). Ia tusi lou lima i le fugalaau ma fesili atu:

- O le a sou manatu i le pogai na tusia ai e le tusiata se fugalaau i lenei ata e faaalai ai le oti?
- O le a le vaitaimi o le tausaga na toetu ai Iesu? (Tautotogo.)
- Pe ua faapefea ona avea lenei mea ma se faailoga taua o le Toetutu?

Ia faaiu e ala i le faitauina o le saunoaga lenei a Peresitene Iosefa F.Samita:

“O tagata uma lava o e ua fananau mai i le faatusa o le Atua o le a Toetutu nai e ua oti. . . .e ala i le mana o Iesu Keriso. E le afaina pe sa tatou faia mea lelei po o mea leaga, pe sa tatou atamamai pe valelea, pe sa tatou nofo pologa pe sa’oloto, o le a toe tutu a’e tagata mai le oti” (“the Second Death,” in Brian H.Stuy, ed., *Collected Discourses: Delivered by President Wilford Woodruff, His Two Counselors, the Twelve Apostles, and Others*, 5 vols. [1987–92], 4:224–25).

Ia talanoaina le mana na mafai ai e Iesu ona faataunuuiina le Toetutu o e ua oti (tagai Efeso 1:17, 19–20; 1 Peteru 1:20–21). Ia fai atu i tagata o le vasega e faamatala mai le ala ua avea ai lo latou malamalama e uiga i le mataupu faavae o le Toetutu ma mea e maua ai e i latou le agaga faafetai mo le Faaola.



1 Korinito 15:29 (Mau Tauloto) E mafai ona tatou fesoasoani atu ia i latou o e ua oti ina ia maua le faaolataga e ala i le papatisoina mo i latou. (10–15 minute)

Ia fesili atu i tagata o le vasega e ta'u mai se sauniga o le Ekalesia e leai se isi lava ekalesia o faia ae peitai o loo ta'u manino mai lava e le Tusi Paia. Ia faitau e i latou le 1 Korinito 15:29 mo le tali. Fesili atu:

- O le a se mea e ta'u mai i lenei fuaiupu ia i tatou e uiga i le Ekalesia a Iesu Keriso i le taimi o Paulo?
- Aisea tatou te faia ai papatisoga mo e ua oti?

Ia faitau e tagata o le vasega mau o loo i lalo ma saili mo tali i le fesili mulimuli: Ioane 3:5; 1 Peteru 3:18–20; 4:6; Mataupu Faavae ma Feagaiga 124:28–31. A maea ona faitauina mau, atonu e te manao e tuuina atu faamatalaga o loo i lalo. Sa saunoa mai perofeta o Iosefa Samita:

“O tagata uma ua papatisoina ma ua avea ma tagata o le malo ua ia te ia le aia e papatiso ai mo i latou o e ua mavae atu; ma o le taimi lava e usiusita'i ai a latou uo i le tulafono o le Talalelei iinei, o i latou ia o e e galulue mo i latou, o loo i ai auaua a le Alii iina e faasaolotoina i latou” (*Teachings of the Prophet Joseph Smith, 367*).

Sa saunoa mai Elder Iosefa Filitia Samita e faapea:

“O le faaolataga mo e ua oti sa malamalama i ai tagata i ona po o le Ekalesia Kerisiano anamua, ma sa faia ni papatisoga mo e ua oti se'ia oo mai i le T.A. 379, o le taimi lea na vavao ai e le Aufono a Karefasi le toe faia o lenei sauniga faapea ma le 'faapotopotoga paia' mo e ua oti” (*Doctrines of Salvation, 2:163*).

Fesili atu:

- O fea e fai ai nei sauniga paia o le papatisoga?
- O le a le mea e tatau ona tatou faia ina ia tatou agavaa ai mo le ulu atu i le malumalu?

- Pe faapefea ona saunia e i tatou i tatou lava?
- O le a le mea e tatau ona fai e i latou o loo i le lalolagi o Agaga ina ia aoga ai mo i latou le sui papatisoga?

Afai o i ai i lau vasega ni tagata ua ulu i le malumalu mo le papatisoina o e ua oti, ia valaauina i latou e faamatala atu le lagona sa latou maua e uiga i lenei mea.



1 Korinito 15:40–42 (Mau Tauloto). O le a tatou maua se tasi o mamalu e tolu e tusa ai ma a tatou galuega i lenei olaga. (10–15 minute)

Ia mafaufau tagata o le vasega e faapea e i ai se uo ua fesili mai ia i latou pe sao uma atu i le lagi po o seoli tagata. Ia valaau atu i tagata o le vasega ina ia tusia se tali i lenei fesili ma ia tuuina atu pogai mo a latou tali. Ona fesili atu lea mo ni tagata e ofo mai e faitau a latou tali.

Faitau le 1 Korinito 15:40–42 (E aofia ai ma le Faaliliuga a Iosefa Samita o le fuaiupu 40) ma ia fai atu i tagata o le vasega e ta'u mai vaega o mamalu e tolu. Ia tusia ni koluma se tolu i luga o le laupapa ma ia tusia i koluma taitasi ulutala nei: Selesitila, Teresitila, ma le Telesitila. Ia tusia le mau Mataupu Faavae ma Feagaiga 76:50–70 i lalo o le Selesitila, 76:71–80 i lalo o le Teresitila, ma le 76:81–90 i lalo o le Telesitila. Ia faitau e tagata o le vasega nei mau ma saili mo tagata o e o le a o atu i malo taitasi o le mamalu. Ia valaauina i latou e auaua'i e o atu i luga o le laupapa e tusi mea na latou maua. Ia latou vaseina igoa o nei tagata ia latou tusitusiga paia pe afai latou te manaomia.

Ia mafaufau i le faaali atu o ni moli eseese se tolu, e tofu le moli ma le matauila e eseese le malolosi (e pei o le fasefulu, onosefulu, po o le selau uati). Ia faapogisa le potu, ma ia faamumu auaua'i moli taitasi, ma ia fai atu i tagata o le vasega e tagai i le eseese o le mumu. Ia faamalamalama atu na faataitai lelei atu e Paulo le eseese o le malosi ma le olioli o loo i ai i malo taitasi. Ia molimau atu afai o le a tatou osia ma le faamaoni ma tusia a tatou feagaiga, o le a maua e i tatou le fiafia silisili i le malo selesitila.

O LE TUSI E LUA A LE APOSETOLO O PAULO I KORINITO

O le Tusi na
tusii i lenei
taimi

Malaga muamua faafaifeautalāi (Galuega 13–14)	Malaga lona lua faafaifeautalāi (Galuega 15:36–18:22)	Malaga lona tolu faafaifeautalāi (Galuega 18:23–21:15)	Faafalepuipiina i Kaisareia ma Roma (Galuega 21:16–28:31)	E oo i le faafalepuipiina lona lua i Roma
---	---	--	---	---

E tusa 47–50 50–53 53–57 57–62 62–65
o le T.A.

Tusitala: Sa tusia e Paulo le 2 Korinito e avefa ma tusi e faamanatu atu ai ana fesootaiga sa faia talu ai (tagai i le faatomuaga i le 1 Korinito i. 00 [174]; 2 Korinito 1:1;10:1).

O E o Loo Tusi i Ai: Sa tusia e Paulo le 2 Korinito i tagata lava e tasi o le Ekalesia e pei ona sa ia lauga atu i ai i le 1 Korinito (tagai 2 Korinito 1:1), faapea foi i le Au Paia sa nonofo i Akaia. O Akaia o se nofoaga lea i Roma e aofia ai Eleni atoa (tagai “*Taiala i Tusitusiga Paia* faafanua 6.”). Sa tupu a’e se tulaga o le le malilie o le Au Paia i Korinito ona o mea na tu’uaiina ai i latou e aoa pepelo. Sa tusi atu Paulo e tali atu ai i nei tu’uaiga ma ia toe faamalosi atu ai i le Au Paia i lo latou faatuatua.

Talaaga Faasolopito: E le’i umi lava se taimi talu ona mavae le tusia e Paulo o le 1 Korinito, sa ia auina atu lana uo mamae o Tito i se asiasiga i Korinito ina ia iloa ai pe na faapefea ona talia e tagata lana tusi (tagai 2 Korinito 7:13, 15). A’o faatali Paulo mo le toe fo’i mai o Tito, sa tula’i a’e se tetee i Efeso e tetee ai i ana aoaoga (tagai Galuega 19), o le mea lea na sola ai o ia i Make-tonia (tagai 2 Korinito 1:8–11). Ina ua toe feiloa’i i laua ma Tito (tagai 2 Korinito 7:6), sa iloa ai e Paulo tala o mea na tutupu i Korinito.

Sa ulufale atu aoa sese i le Ekalesia iina ma sa taumafai e faaseseina nai tagata vaivai mo le maua mai ai o se tupe. Sa tu’uaiina e nei aoa Paulo ona o le ave o tupe sa faaputupu e fesoasoani i tagata o le Au Paia o e sa mafatia i le mativa i Ierusalema. Sa masalomia foi e i latou lenei pule a se Aposetolo. Ina ua uma ona faalogologo atu i mea sa popole ai Tito, o lea sa tusi atu e Paulo i le tusi e pei ona ta’ua o le 2 Korinito i se taimi o le T.A. 55–57 (tagai *Taiala i Tusitusiga Paia*).

Uiga Tulaga Ese: Sa sili atu faamatalaga sa faamatala e Paulo e uiga i lona lava ola i lenei tusi nai lo se isi lava tusi (tagai 2 Korinito 11–12). Na ala ona ia faia lea mea ona ia tali atu ai i tagata faitio i Korinito o e na fesiligia lana pule i le talalelei faapea fo’i ma lona faamaoni i le galuega o le talalelei.

2 Korinito 1–3

Faatomuaga

Sa amata e Paulo le 2 Korinito e ala i le tali atu i mea na popole ai ta’ita’i sese o e na latou faaogaina sese le pule i le Au Paia i Korinito. A’o e faitau i le 2 Korinito 1–3 ia iloa o lona tali atu i e na faitio ia te ia, na mafai ai e Paulo ona aoa atu i tagata

i Korinito o le talalelei e sili mamao atu lea nai lo aoaoga a e ua fai ma ona fili.

Ia suesue ma le agaga tatalo le 2 Korinito 1–3 ma ia mafaufau i mataupu faavae o loo i lalo a’o le’i saunia au lesona.

O Nisi Mataupu Faavae Taa o le Talalelei e Saili Iai

- E faamafanafanaina e le Atua i tatou i taimi o puapuaga, ma e fesoasoani foi lea ia i tatou i le faamafanafana atu i isi (tagai 2 Korinito 1:3–7; ia tagai foi MFF 81:4–6).
- E tatau i tagata o le Ekalesia ona alofa ma faamagalō e le tasi le tasi (tagai 2 Korinito 2:1–11).
- O le uiga moni o le faaleagaga e maua lea mai le ola i le talalelei ma mulimuli i faatosinaga a le Agaga Paia, ae le o le na ona faataunuunuina o mea ua tofia i ai tatou (tagai 2 Korinito 3:1–18).

Fautuaga mo le Aoao Atu

Ia filifili mai aitia o loo i lalo pe faaoga ni au lava, a’o e saunia lesona mo le 2 Korinito 1–3.

2 Korinito 1:1–11, 21–22; 2:1–11. E faamafanafana e le Atua i tatou i taimi o puapuaga, ma o le a mafai ai e i tatou ona faamafanafana atu i isi. (30–35 minute)

Ia talanoaina faatasi ma tagata o le vasega mea na tutupu i o latou olaga na mafua ai ona maua le faanoanoa, mafatiaga, po o le le to’afilemu. Fesili atu:

- O le a le mea na faia e isi tagata e faamafanafana ai oe?
- Pe faapefea ona faamafanafana e le Agaga Paia tagata i taimi o faanoanoaga? (tagai Ioane 14:16–18, 26–27).

Faitau le 2 Korinito 1:1–4 ma ia saili po o ai na te auina mai le Agaga Paia ae po o le a fo’i le pogai. Fesili atu: O le a le mea e finagalo le Tama Faalelagi tatou te fai pe a tatou maua le faamafanafanaga mai le Agaga?

Ia faamatala atu i tagata o le vasega le tala moni o loo i lalo sa faamatala e Spencer J. Condie, o le na valaauina mulimuli ane i le Fitugafulu. Sa maliu se tina talavou ina ua fanau, ma sa tuua na o lana tane ma tamaiti e to’afa. Sa lagona e le to’atele o e na auai i le sauniga o lona maliu le faanoanoa tele ona ua faatagaina e le Atua le oo mai o lea puapuaga i lenei aiga talavou. I le faaiuga o le sauniga sa tula’i a’e le tane ma alu atu i le pulelaga:

“‘Ua ou lagona lo outou faanoanoa ma le atugaluga,’ o lana tala lea na tuuina atu ma le filemu, ‘peita’i o loo i ai se mea e tatau ona ou ta’u atu ia te outou e faamafanafanaina ai outou. I le itula muamua ina ua mavae

le maliu o lo'u to'alua sa ou le iloa pe mafai faapefea ona ou onosa'ia lenei mea—pe mafai faapefea ona ou ola e aunoa ma ia. Peita'i sa faatumulia a'u i se agaga lelei ma le filemu, ma sa ou maua e amata mai i lea taimi le agaga mautinoa o le a lelei mea uma. Aua ne'i popole mai ia i matou, o le a manuia lava i matou.'

“Sa oo ifo i le faapotopotoga lenei lava agaga faamafanafana e tasi. Sa fo'i atu tagata uma i o latou aiga ma le faamafanafanaina” (*Liahona*, Mati 1981, 40).

Fesili atu i tagata o le vasega:

- O ai na faamafanafanaina tagata i lenei tala?
- Pe ua faapefea ona faatusaina lenei mea i le mea na faia e le Faaola mo i tatou taitoatasi?
- O le a le pogai tou te manatu ai e faamafanafana e le Atua i tatou i taimi o puapuaga ae le na o le aveesea o puapuaga?

Faitau le 2 Korinito 1:7 ma saili mo le folafolaga na tuuina mai ia i latou o e mafatia.

- O le a le uiga o le upu *faamafanafanaina*? (Faamaise, faanā, mapu mai se mafatiaga.)
- Pe ua faapefea ona fesootai le fuaiupu e 7 ma le fuaiupu 3–4?
- O a ni auala e mafai ona tatou faamafanafana ai i isi?

Faitau le fuaiupu 8–11 ma ia saili pe na faapefea ona mafai e le Au Paia i Korinito ona aumaia le faamafanafanaga ia Paulo. Fesili atu: Pe mafai faapefea ona avea le tatalo mo se aupega malosi mo le aumaia o le faamafanafanaga ia i tatou lava ma e ua tatou mau faatasi?

Ia faamatala atu i tagata o le vasega sa tapē le igoa o se tasi tagata i Korinito mai le ekalesia ona o le faitaaga (tagai 1 Korinito 5:1–6) ma sa matua a'oa'iina o ia e tagata sa i ai iina. Sa tusi atu Paulo e faapea ua lava puapuaga ua maua e lea tagata. Faitau le 2 Korinito 2:6–8 faatasi ma tagata o le vasega ma ia fesili atu:

- O le a le mea na fautua atu Paulo i le Au Paia e fai?
- Aisea na matua taua ai lo latou faamagalaga atu ma le alolofa i lenei tagata?
- Afai latou te le faamafanafana atu ma faamagalaga ia te ia, sa saunoa mai Paulo e mafai ona oo o ia i se tulaga “tofatumo-anaina o ia i le tiga matua tele” (f.7). O le a se mea ua outou manatu e faataatai i ai lenei mea?

Ia faitau e tagata o le vasega le 2 Korinito 2:9–11 ma saili le tulaga mata'utia o loo i ai i le lē faamagalaga atu. Fesili atu:

- O ai e manumalo ia i tatou pe afai ua tatou le faamagalaga atu?
- O le a se ala o le a malo ai Satani?

Ia fautua atu ina ia faatusatusa e tagata o le vasega le 2 Korinito 2:7–11 ma le Mataupu Faavae ma Feagaiga 64:9–10. Ia faitau le Mataupu Faavae ma Feagaiga 64:9 ma ia fesili atu: Pe aisea ua avea ai ma agasala e sili atu ona tele le musu e faamagalaga atu i isi? Ia faamatala atu le faamatalaga lenei o loo i lalo:

“Pe afai o le a i ai i tatou i le tulaga o le lē faamagalaga atu o o tatou uso a tagata, o lona uiga o loo tatou taumafai e taofia lona alualu i luma e tau atu i le faaolataga. O lenei tulaga o se tulaga faatiapolo ma o le lagona o loo ia i tatou e le tusa ma le finagalo o Keriso. O loo tatou taumafai ina ia taofia le alualu i luma o le tagata ma aveesea mai ia te ia faamanuiaga o le faamagalaga atu o le Togiola. O lenei talitonuga o loo filogia faatasi ma ni manatu ua fuafua e faaumatia le agaga o le tagata” (Leuan G. Otten and C. Max Caldwell, *Sacred Truths of the Doctrine and Covenant*, 2 vols. [1993], 1:314).

Fesili atu i tagata o le vasega:

- Pe mafai faapefea ona avea le le faamagalaga atu o se tagata ua fasioti tagata ma se agasala sili atu ona tele nai lo le fasioti tagata?
- Pe ua mafai faapefea ona avea le le faamagalaga atu o se tagata mulilua po o se tagata saua i tamaiti ma se agasala sili atu ona tele nai lo le mulilua po o le saua i tamaiti?

I lona tulaga o le tetele, o agasala e pei o ia e sili atu ona leaga, ae peitai afai tatou te le faamagalaga atu ua tatou faaleagaina lo tatou lava tagata. Ia ta'u atu i tagata o le vasega ua faaaoaga e Satani se agaga lē faamagalaga atu e avea ma se auala e faatupuina ai le fevaevae'i i le va o tagata.

Ia faaiu i le faamatalaga a Elder Bruce R. McConkie e uiga i le alofa:

“O le alofa faamaoni mo ona uso a tagata o se faailoga lea o le tagata paia moni. E aofia ai le faanoanoa mo mea ua latou mafatia ai, ma lagona le alofa mo i latou, ma faaalua le agalelei ia i latou” (*Mormon Doctrine*, 152).

2 Korinito 3:6, 17–18. “E a le tusi e fasioti, ae a le Agaga e faaola.” (10–15 minute)

Ia faamatala atu i tagata o le vasega sa maua e Polika Iaga ia Fepuari, 1847, se miti e uiga i le la talanoaga ma le perofeta o Iosefa Samita. Sa ta'u atu e Poliga Iaga ia Iosefa Samita sa ia manao e faatasi ma ia, peitai sa ta'u atu e le perofeta ia te ia e tataua ona faatali mo sina taimi. Sa fesili atu Polika Iaga pe i ai se savali na te fia tuuina mai mo le au uso. Ia faitau atu i tagata o le vasega le faamatalaga o loo i lalo, na aumaia mai le tusi o le talaaga o le soifuaga o Polika Iaga. Aua le faitauina upu o loo faatusilima ae ia fai atu i tagata o le vasega e mate mai po o le a le upu o loo misi. (Atonu e te manao e tusia le fuaiupu i luga o le laupapa ma ia tusia se laina avanoa e sui tulaga ai upu o loo faatusilima.)

“Sa savali mai Iosefa ia te a’u, ma sa foliga mai e popole, ae sa faaalua lona fiafia, ‘ia ta’u atu i tagata ia lotomauualalo ma faatuatua, ma ia mautinoa ua *tausia le Agaga o le Alii.*”

Fai atu i tagata e ta’u mai po o le a le mea na saunoa mai ai le perofeta ia Poliga Iaga. Ia faitau e i latou le 2 Korinito 3:6 mo se fesoasoani. O le taimi lava e ta’u mai ai e i latou le tali sa’o, ia fesili atu: Aisea ua taua ai le tausia o le Agaga? Ia talanoaina a latou tali, ona faaauau lea o le faitauina o le faamatalaga mai ia Poliga Iaga e uiga i le mea na ta’u atu e Iosefa Samita ia te ia i le miti:

“. . . Ta’u atu i le au uso ina ia faaavanoa pea o latou loto mo le talitonuga maumaututu, ina ia oo mai le Agaga Paia ia i latou, o le a saunia o latou loto e talia. E mafai ona latou iloa le Agaga o le Alii mai isi agaga uma; o le a musumususu atu le filemu ma le olioli i o latou agaga; o le a aveesea ai le agaga o le tiapolo, inoino, fevaevaea’i faapea ma mea leaga uma mai o latou loto; ma o le a na o le tasi le mea latou te naunau i ai o le faia lea o mea lelei, aumaia le amiotonu ma atia’e le malo o le Atua. Ia ta’u atu i le au uso afai o le a latou mulimuli i le Agaga o le Alii o le a sa’o le mea latou te o atu i ai. Ia mautinoa ua ta’u atu i tagata ina ia tausisi pea i le Agaga o le Alii” (*Manuscript History of Brigham Young, 1846-2847*, ed. Elden J. Watson [1971], 529-30; italics added).

Toe taga’i i le 2 Korinito 3:6. Fesili atu:

- O le a le uiga o le fuaitau “e a le tusi e fasioti, a e a le Agaga e faaola”?
- O a ni faaitaiga? (Auai i le lotu po o le Seminare ona ua faamalosi o e ou matua, o le anapogi e aunoa ma se tatalo po o se faamoemoega.)

Ia faitau e i latou le 2 Korinito 3:17-18, ma ia saili mo faamanuiaga e lua e maua mai i le ola i le agaga o le tulafono. Ia talanoaina le saolotoga e sili atu o le tagata lava ia e maua mai i le ola e tusa ai ma le Agaga.

Ia faaiuina lau faamatalaga e ala i le faitau atu o le saunoaga lenei a Peresitene Ezra Taft Benson:

“O le Agaga o se mea lea ua sili ona taua i lenei galuega mamalu” (*The Teachings of Ezra Taft Benson* 198).

2 Korinito 4-7

Faatomuaga

I le tulaga o faitioga mamafa, sa puipuia e Paulo lona agaga faamaoni i le avea ma auauna a le Alii (tagai 2 Korinito 5:11-6:18). Sa ia faamanatu atu i le Au Paia e faapea o mafatiaga faalelalolagi o se mea noa lea i le faatusatusa atu i le mamalu faavavau (tagai 2 Korinito 4:17). A’o e faitau i le 2 Korinito 4-7 ia saili mo le faamatalaga a Paulo e uiga i mea taua e iloa ai tagata moni o loo auauna i le talalelei a Iesu Keriso (tagai 2 Korinito 6:4-7).

Ia suesue ma le agaga tatalo i le 2 Korinito 4-7 ma ia mafaufau i mataupu faavae o loo i lalo a’o le’i saunia au lesonea.

O Nisi Mataupu Faavae Taua o le Talalelei e Saili Iai

- O mafatiaga faalelalolagi o se mea noa lea i le faatusatusa atu i le mamalu e faavavau o loo faatali mai mo e faatuatua (tagai 2 Korinito 4:15-18).
- O le Togiola e mafai ai e i tatou ona avea ma ni tagata fou i le Alii (tagai 2 Korinito 5:14-21; ia tagai foi i le 2 Nifae 10:23-25).
- E le tatau ona tatou auai pe ioe atu ia i latou o e ua talitonu ma faatinoina ni manatu e tetee i le Talalelei (tagai 2 Korinito 6:14-18).
- O se tagata e i ai le tiga e tusa i le Atua mo agasala o se tasi lea ua ia iloa ua ia faatiga i le Atua ma ua manao ina ia salamo. O i latou o loo i ai le faanoanoa faalelalolagi o loo mananao pea ina ia agasala ma o le a le salamo (tagai 2 Korinito 7:8-11; tagai foi Alema 42:29-30).

Fautuaga mo le Aoa Atua

Ia filifili mai aitia o loo i lalo pe faaoga ni au lava, a’o e saunia lesonea mo le 2 Korinito 4-7.



E mafai ona faaoga faamatalaga o le *New Testament Video* Vaega 16, “Godly Sorrow Leads to Repentance” (9:10), i le aoaoina atu o le 2 Korinito 7 (tagai *New Testament Video Guide* mo fautuaga e tuuina atu ai aoaoga).



2 Korinito 6:16-7:1, 8-10. O le tiga e tusa i le Atua e maua lea mai le iloa ua tatou faatiga i le Atua ma taitai atu ai i le salamo faamaoni. (20-25 minute)

Tusi le fuaitau *tiga e tusa i le Atua* ma le *tiga faalelalolagi* i luga o le laupapa. Ia fesili atu i tagata o le vasega po o le a le eseesega i le va o ia mea e lua. Ia fai atu i tagata o le vasega e mafaufau i tulaga e lua o loo i lalo ma ia faalogologo ina ia iloa ai po o le a le ituaiga faanoanoaga o loo i ai: I se faatalanoaga mo se pepa

faataga o le malumalu, sa ta’u atu ai e se tamaitai talavou ni agasala na ia faia i aso ua mavae i lana Epikopo. O nei agasala sa lava lo latou leaga ma o le mea lea ua teena ai e le Epikopo le faia o se pepa faataga, ma ua faamatala atu i lea tamaitai e tatau ona ia faatali se’ia salamo atoatoa. Sa oo le le fiafia i lenei tamaitai, ma ua faapea mai ua uma ona salamo aua ua le toe faia e ia se tasi o ia agasala talu mai se taimi umi ua mavae. Sa oo le ita tele ia te ia ona ua uma ona aveina atu tusi valaaulia o le faaipoipoga ma ua uma fo’i ona aveina atu tusi o le aiga o le faaipoipoga. Ua faapea mai lea tamaitai o le a le mafai e ia ona feagai ma fesili e tele ato ma le maasiasi ona o le tolopoina o fuafuaga o lana faaipoipoga. Ua faamatala atu e le Epikopo e faapea o le na o le taofia o le agasala e le o le salamo atoatoa lea ma ua ia faapea atu i le tamaitai ina ia amata ma le faamaoni le faasologa o mea e fai e faaalai ai le salamo faamaoni. Fesili atu i tagata o le vasega:

- O le a sou manatu i le lagona na maua e lea tamaitai talavou i lea taimi i le faatalanoaga?
- Aisea ua talafeagai ai mo se epikopo le taofia o le faia o se pepa faataga i se tulaga faapenei?

Faitau 2 Korinito 7:8–10. Ia faamatala atu na tala’i atu Paulo i tagata Korinito ina ia salamo i lana tusi na avatu muamua i ai. Fesili atu: E tusa ai ma le faamatalaga a Paulo, o le a le eseesega i le va o le tiga e tusa i le Atua ma le tiga faalelalagi? Ia faaali atu se pepa lautele po o se pepa malamalama e faaali atu i se masini (overhead transparency) o loo tusia ai le faamatalaga o loo i lalo a Peresitene Ezra Taft Benson:

“E le faapea o se mea e le taatele le maua o ni alii ma ni tamaitai i le lalolagi o e ua lagona le faanoanoa mo mea sese ua latou faia. O nisi taimi ua mafua lea tulaga ona ua avea mea latou te fai ma mea e faatupuina ai ia i latou po o e ua pele le faanoanoa tele. O nisi taimi ua mafua lo latou faanoanoa ona ua maua i latou ma faasalaina mo mea na latou faia. O ia lagona faalelalagi ua le aofia ai le ‘tiga e tusa i le Atua’ (2 Korinito 7:10).

“O le tiga e tusa i le Atua o se meaaloa a le Agaga. O le iloa loloto lea ua avea a tatou mea e fai ma mea ua faatiga ai i lo tatou Tama ma lo tatou Atua. O lo tatou malamalama lea ua avea la tatou mea ua fai ma mea ua faatupuina ai le mafatia tele i le Faola, o le na ia le iloa se agasala, po o se agasala sili. Ua avea a tatou agasala ma mea ua faatupuina ai ia te ia le tiga ma na maligi ai le toto mai pu laiti uma lava o le tino. O lenei mafatiaga o le mafaufau ma le agaga ua ta’ua i Tususiga Paia e faapea o le ‘loto momomo ma le agaga salamo’ (MFF 20:37). O lea agaga e matua manaomia lava a’o le’i maua le salamo moni” (The Teachings of Ezra Taft Benson, 72).

Ia talanoaina fesili o loo i lalo:

- Aisea e tatau ai i se tagata ona lagona le tiga e tusa i le Atua ina ia salamo ai faamaoni?
- Faitau Alema 42:29. Pe ua faapefea ona faamatala mai i le Alema e faapea o a tatou agasala o le a aafia ai i tatou?
- Aisea ua le lava ai le na o le taofia o le agasala?

Faitau le faamatalaga o loo i lalo i tagata o lau vasega:

“Ina ia aoga, e tatau ona faatautu le salamo i le va o le tagata ma le Atua. . . .

“O le salamo faamaoni o le tulaga lea e maua pe a lagona e le tagata le faanoanoa loloto e faapea ua ia faatiga i le Atua e ala i le solia o ana tulafono ma lona le ususita’i. Ua faanoanoa o ia ona o le se ese mai le Atua faapea foi ma le agasala ua ia aumaia i lona olaga. . . . talu ai ona o le salamo e manaomia ai loto momomo ma le agaga salamo, o lona uiga e leai se mea e itiiti ifo o le a maua ai se to’afilemu mautu” (Robert J. Matthews, “The Doctrine of the Atonement: The Revelation of the Gospel to Adam,” in Robert L. Millet and Kent P. Jackson, *Studies in Scripture: Vol.2, the Pearl of Great Price* [1985],124).

- Pe ua mafai faapefea ona avea le manatu popole e uiga i lo tatou lava maasiasi ma mea e le maua ai le tiga e tusa i le Atua?
- Faitau Iakopo 4:6. Pe faapefea ona avea le mitamita ma mea e puipuia ai i tatou mai le lagona o le tiga mo a tatou agasala?

Atonu e te manao e faaiu e ala i le tuuina atu o lau molimau e faapea o le tiga e tusa i le Atua ua ia aumaia oe ia vavalalata ma le Tama Faalelagi ma ua fesoasoani ia te oe ina ia maua le faanoanoa moni i le salamo.

2 Korinito 8–9

Faatomuaga

Talu ai ona sa tuuaina Paulo mai lona aveina atu o ni tupe ma faaputupu mo le Au Paia i Ierusalem, o le mea lea na ia auina atu ai Tito ma isi uso e to’alua e ao mai tupe sa totoo (tagai 2 Korinito 8:16–24). Sa ia talosagaina le Au Paia i Korinito ina ia foai ma le loto i ai, “aua e alofa le Atua i le foai ma le loto malie” (2 Korinito 9:7; tagai foi i le 8:1–15).

Aoao ma le agaga tatalo le 2 Korinito 8–9 ma ia mafaufau e uiga i mataupu faavae o loo i lalo a’o le’i saunia au lesona.

O Nisi Mataupu Faavae Tava o le Talalelei e te Sailia

- E tatau ona tutusa le Au Paia i mea faalelalolagi (tagai 2 Korinito 8:13–15; tagai foi i le MFF 78:6–7; 82:17–19).
- O le Au Paia moni ma faamaoni latou te foai atu a latou mea i e matitiva (tagai 2 Korinito 8:12–15; tagai foi i le Iakopo 2:17–19).
- E alofa ma faamanuia e le Atua i latou e foai atu ma le agaga fiafia (tagai 2 Korinito 9:6–7; ia tagai foi i le Moronae 7:8).

Fautuaga mo le Aoao Atu

Ia filifili mai aitia o loo i lalo, pe faaaoga ni au lava, a’o e saunia lesona mo le 2 Korinito 8–9.

2 Korinito 8–9. O le Au Paia moni ma le faamaoni latou te foai atu ma le fiafia a latou mea i e matitiva e tusa ai ma mataupu faavae o le talalelei. (20–25 minute)

Ia valaauina se tagata o le vasega e sau i luma o le potu. Fesili atu: Afai e i ai se tupe, o le a se mea e te faatauina? O le taimi lava e filifili ai e le tagata o le vasega se mea, ia tusia se siaki [e lē se siaki mo’i] mo le aofa’i o le tau o lea mea (pe faaaoga tupe mea taalo) ma tuuina atu ia te ia. Ia valaau atu i se isi tagata o le vasega e sau e tu atu i le mea o loo i ai le tagata muamua o le vasega i luma o le potu, ma ia fesili atu i le vasega ina ia mafaufau faapea ua faato’a oo mai lava se mala i le aiga o lenei tagata o le vasega. Na mu lo latou fale talu ai nei ma ua leai se mea o totoe ma e leai foi se inisiua na latou faia. Ia fesili atu i le tagata na e tuuina atu i ai le siaki:

- Pe mafai faapefea ona e fesoasoani atu i lenei aiga puapuagatia?
- O le a le faigata o le tulaga o le tuuina atu o le tupe o loo i ai i le siaki? Aisea?
- O ai o loo sili ona manaomia le tupe?

Ia valaauina tagata o le vasega e faamatala mai ni tulaga na latou oo i ai o loo faaalai ai tagata o loo manatu mamafa i isi tagata?

Faitau 2 Korinito 5:7 ma ia saili po o a tulaga e mafai ai ona ola i le talalelei.

- Pe aisea e manaomia ai le faatuatua ina ia mafai ai ona foai atu ia i latou o loo manaomia le fesoasoani?
- Pe mafai faapefea ona tatou foai atu i e o loo manaomia le fesoasoani i aso nei?

Ia faitau le faamatalaga o loo i lalo a Elder Bruce R. McConkie e faapea:

“O nisi o tofotofoga e oo mai ona o le olaga faaletino o le tagata e aofia ai le pupu o lona loto i tupe, o lona

naunau i oa, lona mana’o e fia maua le pule, faato-sinaga, ma le faafaigofieina o mea uma ona ua ia maua se oa tele. Ae ui i lea, ‘pe afai e gaua’i o ia i galuega alofa a le Agaga Paia, ma ua tu’u ese le tagata o le agasala, ma ua avea o ia ma tagata amiotonu ona o le togiola a Keriso le Alii’ (Mosaea 3:19), ona avea ai lea o ia ma se tagata e ola i se tulafono maualuga. E le toe avea o ia ma tagata e pule ai le tupe; o lona naunauga o le faia lea o mea lelei ma faia le amiotonu; e avea o ia ma tagata e foa’i atu ma le agaga fiafia” (Doctrinal New Testament Commentary, 2:435).

Ia fai atu i tagata o le vasega e faitau le 2 Korinito 9: 7, ma fesili atu:

- O le a se mea ua aoao mai e lenei mau e uiga i le foa’i atu?
- Pe ua faapefea ona finagalo le Alii ina ia tatou foa’i atu?

Ia faamatala atu e faapea sa fai atu Paulo i le Au Paia i Korinito ina ia fesoasoani ia i latou i Ierusalem o e ua le faamanuiaina. Ia faitau e i latou le 2 Korinito 8:14–15, ma fesili atu: Pe na faapefea ona manaio Paulo e faataunuua lenei mea?

Ia tuuina atu le saunoaga lenei a Peresitene Marion G.Romney:

“Ua fetalai mai le Alii o Ia na faia le lalolagi; . . . e lē o sou po o sa’u foi ma o Ia e pule ai. E tusa lava po o le a le tele o mea e pei o fanua ma isi mea ua tatou maua, e le o ni mea a i tatou. O ia mea o Ia lava e pule ai” (in Glen L.Rudd, *Pure Religion* [1995], 291).

Ia faamanatu atu i tagata o le vasega o mea uma o loo i le lalolagi e a le Alii ia (tagai MFF 104:12–18), o lona uiga e tatau ona tatou tufatufa atu ma le agaga fiafia mea ua tatou maua e tusa ma Ana mataupu faavae o le tausia o e matitiva. Ia faitau e i latou le 2 Korinito 9:6 ma saili mo le folafolaga na faia e le Alii ia i latou o e foa’i atu ma le loto malie (tagai foi i le Luka 6:38). Ia faamalosi atu i tagata o le vasega ina ia totogi atu e le aunoa tupe mo le taulaga anapogi e ese mai le togiina o a latou sefulua’i.

2 Korinito 10–13

Faatomuaga

I le amata mai i le aso na liua ai a’o i ai i le ala i Tamaseko (tagai Galuega 9:1–9), sa faamaoni Paulo i le Faola ma Lana galuega. O le fasia ma tau’aia i maa, tuuina i le falepuipui ma teena, o le lutia i faigata ma mafatiaga faaletino, sa tuuina atu ma le fiafia e ia mea uma na ia maua i le Alii (tagai 2 Korinito 11:23–31). Sa ia faia ia mea ma lana molimau maumaututu o mea uma e le

taua pe a faatusatusa atu i le “silisili ese o le poto i la Keriso Iesu lo’u Alii” (tagai Filipi 3:8). E ui lava i ona mafatiaga ma mea faigata ae sa le tu’ua e le Atua Paulo e aunoa ma le faamafanafanaga. Sa maua e Paulo mea faali’ali’a ma faaaliga (tagai 2 Korinito 12:1–4) na avea ai o ia ma tagata malosi i le talitonuga o le a faamalosia o ia e le Atua i lona vaivai (tagai 2 Korinito 12:7–10).

Aoao ma le agaga tatalo le 2 Korinito 10–13 ma ia mafaufau i mataupu o loo i lalo a’o le’i saunia au lesona.

O Nisi Mataupu Faavae Tava o le Talalelei e Saili Iai

- E tatau ona tatou pulea o tatou mafaufauga (tagai 2 Korinito 10:3–5; ia tagai foi i le Faataoto 23:7).
- E mafai e Satani ona suia ia lava i se agelu o le malamalama ina ia faasese ai. O i latou o e mulimuli ia te ia atonu e faataga faapea o ni auaua o le malamalama mo lea lava faamoemoega e tasi (tagai 2 Korinito 11:7–17; tagai foi i le Alema 30:50–53).
- E tuuina mai e le Alii ia i tatou mea vaivai e mafai ai ona tatou lotomauualalo. E tatau ona tatou faia mea uma e mafai ona tatou faia e manumalo ai mai o tatou vaivaiga a’o tatou ole atu i le Alii mo se fesoasoani (tagai 2 Korinito 12:7–10; tagai foi i le Iakopo 4:7; Eteru 12:27).

Fautuaga mo le Aoao Atu

Ia filifili mai aitia o loo i lalo, pe faaoga ni au lava, a’o e saunia lesona mo le 2 Korinito 10–13.

2 Korinito 11–13. E tuuina mai e le Atua ia i tatou le vaivai ma faigata e faalotomauualaloina ai i tatou; o le a la fesoasoani mai ia te’i tatou ina ia tatou onosa’ia. (20–25 minute)

Ia faaali atu i le vasega se mea matuitui aupito sili ona tele e mafai ona e maua. Fesili atu:

- Pe o le a le tulaga o le a i ai pe a tui lou itu i lenei mea matuitui?
- Pe o le a faapefea ona aafia ai oe pe afai o le a lē mafai ona toe se’i ese?
- O le a le tulaga e i ai pe a e ola ma lena mea?

Faitau 2 Korinito 12:7 ma ia saili i mea na oo ia Paulo. Fesili atu: O le a le “mea matuitui i le tino”? Sa saunoa mai Peresitene Poliga Iaga a’o ia faia se faamatalaga e uiga i nei fuaiupu, e faapea:

“E maua e i tatou se agaga mama ua nofo i totonu o le tino o le tagata ma o le agaga lea na te uunaiina le tagata i taimi uma ina ia faia mea lelei, ia faia mea mama, ia faamaoni ma paia; o nei mea uma ua

faapogai mai lena agaga o le mama e pei ona sau ai lenei agaga. Ma o le agaga leaga e oo mai ona o le solitulafono e pei ona i ai i lenei tino, o loo feteena’i ma lenei agaga mama, o loo taumafai e manumalo ai, ma o loo taumafai i lona mana uma ina ia faatoilaloina lenei agaga. . . . o le taua lenei na ta’ua e Paulo a’o talanoa e uiga i le ‘mea matuitui i le tino,’ ma o le uiga o lea mea o le agaga o loo finau ma le tino, ma o loo tetee le tino i le agaga” (in *Journal of Discourses*, 18:258).

Ia valaau atu i tagata o le vasega e talanoaina ituaiga o “mea matuitui” ua uma ona tatou ta’ua i le aso nei.

Faitau Eteru 12:27 ma ia saili folafolaga a le Atua. Faitau 2 Korinito 12:8 e iloa ai pe na ole atu Paulo ina ia aveese ona puapuaga. Faitau le fuaiupu 9 ina ia iloa ai le auala na tali mai ai le Alii i lana talosaga. Fesili atu:

- Aisea ua e manatu ai e le’i aveesea e le Alii mea matuitui na feagai ma Paulo?
- Talu ai ona o faigata ma mafatiaga o se vaega lea o le olaga, o le a le aafiaga o ia mea i le agaga o le tagata?
- O le a le tele o le masani o Paulo i puapuaga?

Ia fai atu i tagata o le vasega e faitau mai le 2 Korinito 11:23–27. Atonu latou te mananao e vase puapuaga na oo ia Paulo. Fesili atu:

- O le a le tele o le talitonuga o Paulo i le Talalelei?
- O le a se faamaoniga o loo mafai ona maua mo lau tali?
- O le a se mea e te manatu na tuuina atu ai ia Paulo le malosi e onosai ai?
- Pe mafai faapefea ona tatou lagona lea lava malosi e tasi i o tatou olaga?

Faitau 2 Korinito 12:10 ma ia sailia po o le a se lagona na i ai ia Paulo e uiga i ona mafatiaga.

O mafatiaga o Paulo na faamalosia ai lona faatuatua ia Keriso. Faitau le 2 Korinito 13:5, 9 ma fesili atu:

- Pe mafai faapefea ona tatou iloiloina lo tatou lava faatuatua?
- O le a se auala e avea ai o tatou vaivaiga ma mea e malosi ai lo tatou faatuatua?

Ia faamatala atu le saunoaga lenei a Elder Neal A. Maxwell:

“E pei lava o soo se tagata e saili i le tulaga paia, sa faapea foi ia Paulo ona ‘gaua’i i mea uma ua silafia e le Atua e tatau ona faatiga ai o ia’ (Mosaea 3:19)” (*All These Things Shall Give Thee Experience*, 31).

Ia tautino atu afai tatou te lotomauualalo ma aoao e faalagolago i lo tatou Atua, o le a lava lo tatou malosi e onosa’ia ai tofotofoga, o sauaga po o vaivaiga o le tino.

O LE TUSI A LE APOSETOLO O PAULO I KALATIA

O le Tusi na
tusii i lenei
taimi

Ulua'i Malaga faafaifeautalai (Galuega 13-14)	Malaga lona lua faafaifeautalai (Galuega 15:36-18:22)	Malaga lona tolu faafaifeautalai (Galuega 18:23-21:15)	O le faafalepuiipiina i Kaisaraia ma Roma (Galuega 21:16-28:31)	E oo i le faafalepuiipiina lona lua i Roma
---	--	---	---	--

E tusa 47-50 50-53 53-57 57-62 62-65
o le T.A.

Tusitala Ma E Na Tusi i Ai: Sa tusia le Kalatia e le Aposetolo o Paulo ma ua tusia faatatau i le “ekalesia i Kalatia” (Kalatia 1:2). E le o manino mai pe na tusia e Paulo lenei tusi i le Au Paia i le vaega i saute po o le vaega i matu o Kalatia. Sa papatiso e Paulo ma faavaeina le Au Paia i le itu i saute i le taimi o le malaga muamua faafaifeautalai ma le Au Paia i matu i le taimi o lana malaga lona lua faafaifeautalai (tagai *Taiala i Tusitusiga Paia* faafanua 6).

Talaaga Faasolopito: Afai na tusia e Paulo le tusi o Kalatia mo le Au Paia i saute, atonu na ia tusia lea tusi i le amataga o le 48 T.A. Ae ui i lea, o mea e tutusa ai le faatulagaga ma le ala na tusia ai lenei tusi atoa foi ma le tusi a Roma ua latou lagolagoina le faaiuga e faapea na tusia lea tusi i le vaitaimi o le malaga lona tolu faafaifeautalai, pe tusa o le T.A. 57.

Autu: Sa le fiafia Paulo ina ua ia iloa ua oo aoga sese i olaga o e na liliu mai i Kalatia. E to'atele na teena aoga o le Togiola ma ua toe fo'i i le mulimuli i le tulafono a Mose. Sa tusi atu Paulo e faamalosia atu ai i le Au Paia ina ia toe fo'i i le tulafono mauulaga o le talalelei. Sa ia aoga atu o le na ona i ai o galuega e le lava lea e faaolaina ai se tagata, ae peita'i e tatau ona tatou faalagolago i lo tatou Faaola o Iesu Keriso.

Kalatia 1-2

Faatomuaga

Sa ofo Paulo ina ua toe liliu ese tagata na liliu mai i Kalatia mai le ola ia Keriso ae tausisi atu i le tulafono ua le toe aoga. Pe ua sili ea ia i latou le faaoga o le tulafono tuai a Mose i lo le saolotoga o le tulafono fou a Keriso? I le Kalatia 1-2, ia maitau o le mea na faamamafaina e Paulo o le faatuatua ia Iesu Keriso o le faavae lea e maua ai le ola fou.

Ia suesue ma le agaga tatalo le Kalatia 1-2 ma ia mafaufau i mataupu faavae o loo i lalo a'o le'i saunia au lesona.

O Nisi Mataupu Faavae Tava o le Talalelei e Saili Iai

- Ua na o le tasi lava le talalelei a Iesu Keriso. Na faaalii mai e le Atua e auala mai i perofeta ma aposetolo (tagai Kalatia 1:1-2:9; tagai foi i le Efeso 2:20; 4:5, 11, 13; MFF 1:13).
- Ua ta'uamionuina i tatou e ala i le faatuatua ia Iesu Keriso (tagai Kalatia 2:16-21; tagai foi i le Roma 3:20-24, 28; Mosaea 13:27-28; MFF 20:29-30).

Fautuaga mo le Aoga Atu

Ia filifili mai aitia o loo i lalo, pe faaoga ni au lava, a'o e saunia lesona mo le Kalatia 1-2.

Kalatia 1:1-2:10. Ua na o le tasi lava le talalelei a Iesu Keriso. Ua aaoaina lenei talalelei e ala i faaaliga mai le Atua e ala i perofeta ma aposetolo. (15-25 minute)

Ia fai atu i tagata o le vasega e ta'u mai po o a tulaga faatonuina ina ia faauu ai mai le aoga. Ia talanoaina tulaga manaomia e pei o le auai, vasega e manaomia, suega, ma isi mea. Fesili atu: Aisea ua faia ai e aoga ia tulaga manaomia?

Ia faitau le saunoaga o loo i lalo a Elder Boyd K. Packer, o se tasi o le Korama a le Toasefululua:

“I ni nai vaiaso ua mavae sa ou toe fo'i mai i la'u malaga i Asia faatasi ma Peresitene [Gordon B.] Hinckley. Sa matou talanoa ma se tasi o le pasese o le na faapea mai e tau atu lotu uma i le lagi. Pe faafia ona outou faalogo i lena mea - o le talitonuga lea e uiga i le tutusa o auala e tau i le lagi?

“Ua latou faapea mai o le mea moni e le sili a'e le tasi lotu nai lo le isi, ua na ona eseese. E i ai le taimi o le a tuu faatasia ai ia talitonuga. O le mea lea, e le afaina le auai o se tasi i se lotu e pei fo'i ona i ai i se isi lava ekalesia.

“E ui ina foliga mai e lelei lenei talitonuga, ae le'e o se mea sa'o.

“... Se'i o tatou faapea ane e faagaioia aoga i lea talitonuga, e ave ai tulaga o loo pulea ai aoga taitasi o se auala ese e tau atu i le tipiloma e tasi. E tusa lava pe e te su'esu'e pe leai, pasi i suega pe leai, o le a tuuina atu i tagata uma le tipiloma e tasi - o le tipiloma lea ua latou filifilia.

“E aunoa ma le agavaa, e mafai e se tasi ona filifili le tipiloma o le ave ma se loia, se inisia, po o se foma.

“O le mea moni e te le tuuina atu oe lava e taoto i se foma'i e faauu mai i lena ituaiga o aoga!”

Ia fesili atu i tagata o le vasega pe aisea o le a le mafai ai e le ituaiga o aoga e pei ona faamatalaina ona saunia i latou mo la latou galuega ua filifilia. Sa faaiuina le saunoaga a Elder Packer e faapea:

“E le faapena ona fai. E le o le auala lena e faia ai - e le faia faapena ia aoga, e le faia foi faapena i le faaleagaga. O loo i ai sauniga taua e pei foi ona i ai o vasega manaomia. O loo i ai tulaga faatonuina ua uma ona fuafua mo le agavaa. Afai tatou te teena ia tulaga, alo ese mai ai, pe le faia foi, o le a le mafai ona tatou ulu atu faatasi ma i latou o e na faamaeaina aoaoga” (*Liahona*, Ianuari 1986, 64).

Ia tautino atu i tagata o lau vasega ua na o le tasi lava le talalelei moni i luga o le fogaelele o loo i ai aoaoga uma, sauniga, ma feagaiga tatou te manaomia e toe fo’i atu ai i le Tama Faalelagi ma ola e pei o Ia i Lona malo. Ia ta’u atu i tagata o le vasega sa malamalama le Aposetolo o Paulo i lenei mataupu faavae ma sa taumafai o ia e faamatala atu i le Au Paia (tagai Efeso 4:5, 13).

Ia faitau ma talanoaina mau o loo i lalo atoa ma fesili e faatatau i ai faatasi ma tamaiti. Atonu latou te mananao e vase lalo o tali i nei mau.

Kalatia 1:6-9	Pe fia ea talalelei moni o loo i ai? Pe aisea e avea ai le aoao atu o fuafuaga eseese o le talalelei ma faafitauli matuia i le faatuatua o se tasi?
Kalatia 1:10	Pe aisea ua avea ai aoaoga a tagata ma mea e masani ona malie i nisi nai lo aoaoga a le Faola?
Kalatia 1:11-12	Sa aoaoina e Paulo le tele o mea e uiga i le Talalelei mai tususiga paia faapea fo’i ma le taimi na aoaoina ai o ia i mea tau lotu i le taimi a’o avea o ia ma se tamaitiiti, ma e le masalomia le talanoa atu i tagata o le Ekalesia ina ua mavae lona liliu. O le a le pogai ua e manatu ai sa faapea mai Paulo na aoaoina o ia i le talalelei “e ala i le faaali mai o Iesu Keriso”? (tagai Galuega 9:4- 6). E taua faapefea faaliga i le aoaoina o le talalelei?

Ia faamatala atu o Paulo o se tagata fou ua liliu mai i le talalelei o le na aoaoina le talalelei ma le mautinoa atoa ma le mana. Sa manao o ia ia iloa e taitai pulefaamalumu o le mataupu faavae sa ia aoao atu e mautu ma e faaautu ia Iesu Keriso. Faitau le Kalatia 2:1-2, 9 ma fesili:

- O ai na lauga atu i ai Paulo i Ierusalem? (Afai ua tatau ai, ia faitau mai e tagata o le vasega le Ioane 1:40-42 ina ia iloa ai o Kefa o Peteru lava lea.)
- Pe na faapefea ona tali atu Peteru, Iakopo, ma Ioane i aoaoga a Paulo?
- Pe aisea ua taua ai lo latou aoaoina o le talalelei e tasi?

Faitau le Mataupu Faavae ma Feagaiga 1:30. Ia fai atu i tagata o le vasega e faamatala mai le lagona o loo ia i latou ina ua

iloa ua toefuata’i mai e le Faola, e ala i faaaliga i perofeta ma aposetolo, le Ekalesia moni e tasi na i ai i le lalolagi i le vaitaimi o Paulo.

Kalatia 2:9-14. O le lotogatasi o Aposetolo ua maua ai se faaitaiga o le malosiaga mo tagata o le Ekalesia. (15-20 minute)

Ia saunia ni penitala fou se sefulu ma le tolu, po o ni fasi laau e faapena le lapopoa, faapea fo’i ma ni nai pa’u meme’i. Ia fai atu i se tasi e ofo mai e sau e gau lua se penitala (po o se fasi laau). Ia fusi faatasi penitala o loo totoe i le pa’u ma ia valaau atu i se tasi e sau e taumafai e gagau lea fusi penitala. Fesili atu:

- Pe aisea ua faigata ai ona gagau ia penitala pe afai e tuufaatasi? (Ia mautinoa ua malamalama i latou o le malosi o le penitala e tasi e faaopoopoina pe a tuufaatasi penitala e tele.)
- Faitau le Kalatia 2:9. Pe aisea na taua ai le maua e Paulo ma Panapa o le “lima taumatau o le faatasiga” (o le talia ma lagolagoina) o Peteru, Iakopo, ma Ioane?
- Pe faapefea ona avea le lotogatasi o ta’ita’i o le Ekalesia ma mea e manuia ai le galuega o le aoao atu ma le taita’ia o le talalelei?

Ia faamatala atu ina ua alu atu Peteru i Anetioka, sa aai faatasi ma Nuuese. Sa suia lena lagona ina ua taunuu mai se vaega o le Au Paia Iutaia, o e na manatu e le tatau ona faifai mea faatasi ma Nuuese, faatasi ma le Aposetolo o Iakopo (tagai Kalatia 2:11-12). Faitau le Kalatia 2:13-14 ma fesili atu:

- O ai na mulimuli i le faaitaiga a Peteru ina ua tu’ua e ia e na liliu o nuuese ma alu atu e aai faatasi ma tagata o le Ekalesia Iutaia?
- O le a se tali atu a Paulo e tusa ma lea mea na fai e Peteru?
- Aisea na taua ai le i ai o se talitonuga e tasi ia Peteru ma Paulo e uiga i lenei mea?
- Pe faapefea ona vaivai le Ekalesia pe afai e feeseesea’i taitai e uiga i le mataupu o Keriso?

Ia faamatala atu le saunoaga a Bruce R. McConkie e uiga i lenei eseese:

“Sa manao Peteru e faamalie le tulaga ua oo i ai ona o lona fefe ne’i fa’amanuaina e ia loto o tagata Iutaia o e e le’i matua liliu moni ma sa pipii pea i le tulafono a Mose. . . . o le mea mautinoa lava, ana fai ua tatou maua le faamatalaga atoatoa, semanu ua tatou maua se faamatalaga e uiga i le toe liliu o Peteru ma faia mea uma i lona mana po o lona malosi i le uunaia o le Au Paia Iutaia ina ia talitonu o le tulafono a Mose ua faaunuuna ia Keriso ma ua le toe aoga i se isi po o se Iutaia po o se nuuese” (*Doctrinal New Testament Commentary* 2:463-64).

Faitau le saunoaga a Peresitene Gorden B.Hinckley e uiga i le galulue faatasi o le Au Peresitene Sili ma le Korama o Aposetolo e Sefululua:

“E eseese tagata uma. Ua faatatau lea faamatalaga i talaaga eseese ma tomai. Ua tatou talanoa i ni auala e faaleleia ai ma faamalosia le galuega. I le amataga o lenei talanoaga, atonu e i ai ni manatu eseese. Peitai a’o le’i faaiuina le talanoaga, o le a i ai le lotogatasi, ma e le faia se isi lava mea. Ua fetalai mai le Alii lava Ia o lea lotogatasi e matua tatau lava” (In Conference Report, Oct. 1992, 79; po o le *Liahona*, Ianuari 1993, 62).

Fesili atu i tagata o le vasega: O le a se mea e mafai ona tatou aoaoina mai le lotogatasi o Aposetolo a le Alii? Ia molimau atu e mafai ona tatou maua le malosi sili i le lotogatasi ma o tatou taitai ma uso o le Ekalesia.



Kalatia 2:16–21. Ua ta’uamiotonuina i tatou e ala i le faatuatua ia Iesu Keriso. (20–25 minute)

Ia tusia le faamatalaga lenei i luga o le laupapa: *Faasa’olotoina mai le faasalaga ona o le agasala ma ua mama.* Ia faitau lemu tagata o le vasega i le Kalatia 2:16–17; 3:11, 24 ma ia saili mo le upu *ta’uamiotonuina*. Ia maitau e ta’u faaono lea upu. Ia valaauina tagata eseese o le vasega e faitau leotele mau, ma ia suia le faamatalaga o loo i luga i le faamatalaga o le upu *ta’uamiotonuina*. Fesili atu:


- O le a le mea e ta’uamiotonuina ai se tagata?
- O le a se mea e le ta’uamiotonuina ai se tagata?

Ia ta’u atu i tagata o le vasega le autu o le tusi a Kalatia mai le faatomuaga (itulau 202). Ia talanoaina fesili o loo i lalo:

- Pe aisea na avea ai aoaoga a Paulo e uiga i le ta’uamiotonuina ma se savali taua mo le Au Paia i Kalatia? (Sa teena e i latou le faatuatua ia Iesu Keriso ma faamamafaina galuega o le tulafono a Mose.)
- Aisea ua avea ai le ta’uamiotonuina ma se mataupu faavae taua e ao ona tatou malamalama i ai? (Atonu tatou te mafuli tele i le faamamafaina o a tatou galuega ae faatamala ai i lo tatou faatuatua ia Iesu Keriso ma Lona mana e ta’uamiotonuina ai i tatou.)

Sa aoao mai Paulo e le mafai ona ta’ua i tatou o ni tagata mama pe afai e na o a tatou taumafaiga. E ta’uamiotonuina i tatou “i le faatuatua ia Iesu Keriso” (Kalatia 2:16). Ae ui i lea ua tatou iloa fo’i o galuega o le amiotonu e taua tele lava lea mo le tuputupu a’e faaleagaga o i tatou (tagai Roma 2:13; Iakopo 2:17–18).

Ina ia fesoasoani i tagata o lau vasega ina ia malamalama i le faia i le va o le faatuatua ma le usiusita’i, ia toe faaali atu le faatulagaga o loo i lalo i luga o le laupapa, ma ia tuuese upu o loo i ai i puipui. Ia faamatala atu le auala e gaioi ai se afi moli eletise e alu i le vai. (O le vai e tafe i paipa i lona itu i lalo na te taaviliina le afi moli, ona maua mai ai lea o le eletise e alu atu i fale uma ma faamanuaina ai olaga o i latou e faaogaina.) Ia tusi le upu tatou i le afi moli. Ia faamatala atu talu ai ona e le mafai e le afi moli ona maua le eletise i le na o ia, ua le i ai fo’i ia i tatou le malosi e ta’uamiotonuina ai a tatou lava galuega. Ua tatou manaomia le mana o le Togiola a Iesu Keriso. Ia fesili atu i tagata o le vasega po o fea tonu e pogai mai ai le malosi e taavili ai le eletise. (O le vai o loo tafe.) O le a se mea na te faaliliuina le malosi o le vaitafe e maua mai ai le eletise e mafai ona tatou faaogaina? (O le afi moli.)



Ia faamatala atu i tagata o le vasega o lo tatou faatuatua ia Keriso e maua ai le mana o le Togiola o le Faaola. Ia tusi i le pe’ape’a *faatuatua ia Iesu Keriso* ma ia tusi i le vaitafe o loo i tua o le faatanoa vai le upu *Togiola a Iesu Keriso*. Ia valaauina tagata o le vasega e vaavaai atu i le faatulagaga ma filifili po o le a le mea e tatau ona tatou fai ina ia mafai ai ona tafe atu le vai i pe’ape’a. (E tatou ona tatou faaavanoaina paipa ma ia aua nei poloka.) Ia faamatala atu ina ia maua le mana o le Togiola e tatau ona tatou faaavanoaina a tatou paipa e ala i lo tatou usiusita’i ma le salamo. O le a avea lea ma mea e tafe mai ai i o tatou olaga le mana o le Togiola ma avea ai i tatou ma tagata agavaa. Ia tusi i paipa e alu ai le vai le upu *usiusita’i ma le salamo* ma ia tusi i le fale le upu *agavaa o le tagata lava ia*.

Ia faitau faatasi ma tagata o le vasega le Kalatia 2:20. Ia fesili atu: Pe mafai faapefea ona tatou “ola ai lava i le faatuatua i le Alo o le Atua” ma ia tusia pea a tatou paipa ia avanoa ina ia mafai ona tatou maua le mana o le Togiola i o tatou olaga? Faitau 2 Nifae 25:23. Ia molimau atu afai tatou te faia mea uma tatou te mafaia e usiusita’i ai ma salamo, o le a mafai e le mana o le Togiola ona faamamaina i tatou ma mafai ai e i tatou ona toe fo’i atu i le Tama Faalelagi.

Kalatia 3–6

Faatomuaga

O lesona tatou te aoaoina i le aoga e saunia ai i tatou ina ia malamalama i mea moni sili atu ona taua o se aoaoga mauualuga. Talu ai ona o nei lesona e aoga, o le mea lea o le a le faamalieina ai tagata aoga e tumau i le tulaga e tasi. Sa faatusatusa e Paulo le tulafono a Mose i se taitai tama o le na ia saunia Isaraelu e o mai ia Keriso ma le tulafono mauualuga o le talalelei. A’o e faitau i le Kalatia 3–6, ia saili mo faamanuiaga silisili o le tulafono o le talalelei.

Aoao ma le agaga tatalo le Kalatia 3–6 ma ia mafaufau i mataupu faavae o loo i lalo a’o le’i saunia au lesona.

O Nisi Mataupu Faavae Taua o le Talalelei e Saili Iai

- Sa tuuina le tulafono a Mose e saunia ai Isaraelu mo Iesu Keriso (tagai Kalatia 3:17–25; Faaliliuga a Iosefa Samita, Kalatia 3:19–20; tagai foi i le Mosaea 13:30–33).
- E avea i tatou ma atalii ma afafine o Iesu Keriso pe a toe fanaufouina i tatou (tagai Kalatia 3:26–4:7; tagai foi i le Mosaea 5:7; MFF 11:30).


Fautuaga mo le Aoao Atu

Filifili mai manatu nei, pe faaoga ni ou lava manatu, a’o e saunia lesona mo le Kalatia 3–6.



E mafai ona faaoga le faamatalaga o le *New Testament video* Vaega 17, “O le Tulafono o le Seleselega” (3:10), i le aoaoina atu o le Kalatia 6 (tagai le *New Testament Video Guide* mo fautuaga o le tuuina atu o aoaoga).

Kalatia 3:17–25. Sa tuuina mai le tulafono a Mose e saunia ai Isaraelu mo Keriso. (30–35 minute)



Ia aumaia se uila e i ai ni uili laiti e pipii i uili i tua i le vasega po o le tusia o se ata o se uila faapea i luga o le laupapa. Ia saunia pepa lautetele e lua, o le tasi e tusi ai upu *Tulafono a Mose* ma le isi e tusi ai upu *Talalelei a Iesu Keriso*. Ia faamatala atu i tagata o le vasega e to’atele tamaiti e iloa tietie i se uila e ala i le faaogaina o uili faapoopoo e le tumau ua ta’ua lea o uili e aoao ai. Fesili atu:

- Pe aisea e aoga ai nei uili e fesoasoani pe a aoao e tietie i se uila?
- O le a le umi o le taimi e te tu’ua ai nei uili i le uila?
- Pe faapefea ona suia lou atamai e tietie ai i se uila pe a aveese nei uili e aoao ai?

Ia faitau e tagata o le vasega le Mose 5:58–59 ma le Kalatia 3:8 ma ia saili mo le umi o le taimi na i ai le talalelei i le lalolagi. Ia faitau e i latou le Mosaea 3:14 ma le Kalatia 3:19 ma ia saili le pogai na tuuina atu ai i le fanauga a Isaraelu le tulafono a Mose ae le o le tulafono mauualuga o le talalelei. Ia faamatala atu sa manao le Aposetolo o Paulo ia malamalama le Au Paia i Kalatia o faamanuiaga o le talalelei e sili lea i lo manuia e maua mai le tulafono a Mose.

Ia tusi le siata i luga o le laupapa, ma ia faaavanoa le koluma mo le “Ioe/Leai” (vagana le ulutala). Ia fai atu i tagata o le vasega e faitau mai fuaiupu taitasi ma ia filifili pe o faaalii i le mau le mea o loo aoao mai e lea lava mau. Ia tusi le tali i le koluma “Ioe/Leai”.

Fuaiupu	Faamatalaga	Ioe/Leai
Kalatia 3:19	Sa tuuina mai le tulafono a Mose i ni tagata amiotonu.	(Leai)
Kalatia 3:19	Sa faamoemoe le tulafono a Mose ina ia tumau e oo i le faavavau.	(Leai)
Faaliliuga a Iosefa Samita, Kalatia 3:20	Na iloa e Apereamo o le a afio mai Iesu Keriso.	(Ioe)
Kalatia 3:21	O le tulafono a Mose na aveese ai le tulaga manaomia mo le Faaola na folafola mai.	(Leai)
Kalatia 3:22	E agasala tagata uma lava: E manaomia e tagata uma Iesu Keriso ma Lana Togiola.	(Ioe)
Kalatia 3:23	O le tulafono a Mose, pe a na o ia, e taofia ai le tuputupu a’e faaleagaga.	(Ioe)

Ia faitau e tagata o le vasega le Kalatia 3:24–25. Ia talanoaina le faatusatusaga a Paulo, ma ia faaogaina fesili e pei o nei:

- O le a le ta’ita’i tama o loo ta’ua i leni faatusatusaga? (O le tulafono a Mose.)
- O ai tagata o le vasega? (O le aiga o Isaraelu.)
- O a ituaiga o avega mamafa e tuuina e ta’ita’i tama i luga o tagata o le vasega? (Suega, o meaaoga e fai i le fale.)


- Pe mafai faapefea ona faatusaina ia avega mamafa i le tulafono a Mose? (O loo aofia i lenei tulafono mea e faasa ona ai; e pei o le tulaga manaomia i sauniga ma taulaga; ma isi mea.)
- O le a le umi o le taimi e manaomia ai e tagata o le vasega se ta'ita'i tama?
- Pe ua mafai faapefea ona faapei lea tulaga o le tulafono a Mose? (Ina ua afio mai le Faaola, sa ia faataunuaina le tulafono ma suia vaega i le tulafono maualuga o le talalelei.)

Ia toe tepa tagata o le vasega i le uila o loo i ai uili laiti e aoao ai. Ia faaali atu ia i latou pepa lautetele e lua ma ia fai atu ia i latou e ta'u mai po o le fea vaega o le uila e sili ona faatusaina i le tulafono a Mose (uili e aoao ai) ae o le fea vaega e sili ona faatusa i le talalelei a Iesu Keriso (o le uila e aunoa ma uili laiti).

Ia faamamafa atu o le tulafono a Mose o se tulafono lelei. Na tuuina mai e le Faaola (tagai 3 Nifae 15:5). O le taimi lava e malamalama ai le tulafono a Mose ma usiusita'i i ai, sa faapea ona saunia tagata mo le afio mai o le Faaola (tagai 2 Nifae 25:24–25). Ia faitau le Mosaea 13:32 ma fesili atu: O le a se mea na le malamalama i ai tagata Iutaia ma aoao mai le tulafono? (E maua le faaolataga e ala ia Iesu Keriso.)

Ia talanoa e uiga i lo tatou ono faia o lea lava mea sese e tasi e pei ona sa faia e tagata Iutaia anamua pe afai o le a tatou le ilo le taua o Iesu Keriso i o tatou olaga. Faitau le Iakopo 7:10–11; Mosaea 13:33 ma ia fesili atu: E tusa ai ma nei fuaiupu, e mafai faapefea ona tatou aoao e uiga ia Iesu Keriso? Ia uunaiina tagata o le vasega e faaauau pea ona mulimuli i le Faaola e ala i le suesue i tusitusiga paia ma le gaua'i atu i upu a perofeta o aso nei.

Kalatia 5:16–25. O le ola agavaa mo le mauaina o le Agaga Paia e aumaia ai meaalofo a le Agaga i o tatou olaga. (10–15 minute)



Ia faaali atu ni fualaaui aina eseese se lua e maua mai i ni laau. Ia fesili atu i tagata o le vasega po o a laau e maua ai ia fua. Ia tusi i luga o le laupapa laau mai ata o loo i ai, ae aua ne'i tusia igoa o fualaaui aina po o laau. Faitau le Kalatia 5:19–23.

Ia fai atu i tagata se to'alua o le vasega e o mai i le laupapa. Ia tusia e se tagata o le vasega le igoa o le laau muamua e ona fua o loo tusia i le fuaiupu 19–21. Ia tusia e le isi tagata o le vasega le laau lona lua o loo i ai fua mai le fuaiupu 22–23. A'o tusia e tagata e to'alua o le vasega igoa o fua, ia tuuina atu i isi tagata e to'alua o le vasega ni lomifefiloi ma ia fai atu ia i laua e saili ni upu faigata mai le laupapa. Ia talanoaina ni fua e le vasega, ma ia valaau atu i tagata o le vasega o loo i ai lomifefiloi pe a manaomia.

Fesili atu:

- O le a le igoa e tatau ona tusia i laau taitasi? (*galuega a le tino* ma *fua o le Agaga*.)
- Aisea ua filifilia ai e le to'atele o tagata galuega a le tino peitai o nei galuega e mafai ona faatamaia ai i latou?
- Faitau le Kalatia 5:16. Pe mafai faapefea ona tatou olioli i fua o le Agaga ma tetee atu i galuega a le tino?

Ia faamamafa atu o uunaiiga a le Agaga Paia e taitaiina ai i tatou ina ia faia mea e aumaia ai fua o le Agaga i o tatou olaga. Faitau Kalatia 5:25 ma ia fesili atu i tagata o le vasega po o le a le uiga o lea mea. Sa tuuina mai e Peresitene Iosefa F.Samita, o le na avea i lea taimi ma Peresitene o le Korama a le Toasefululua, se isi malamalamaga ina ua ia saunoa mai:

“E leai se mea e sili atu ona taua i olaga o tagata o le Ekalesia na i lo le maua o le meaalofo o le Agaga Paia” (*Answers to Gospels Question*, Comp. Joseph Fielding Smith Jr., 5 vols. [1957–66], 2:114).

Ia tautino atu i le avea o i tatou ma tagata o le Ekalesia ua papatisoina ua tatou maua le mea foa'i fua o le Agaga Paia. I le tausia o a tatou feagaiga o le papatisoga, e mafai ai ona tatou tetee atu i galuega a le tino ma agavaa ai mo le maua o le Agaga. O lenei mea o le a aumaia ai le olioli i fua o le Agaga Paia i o tatou olaga.

Kalatia 6:7–10. E faatatau le tulafono o le seleselega i mea uma tatou te fai. (15–20 minute)

Ia tusi upu o le *totoina* ma le *seleseleina* i luga o le laupapa ma ia faamatala mai e tagata o le vasega nei laasaga autu e lua o le faia o togalaau. Atonu e te manao e faaali atu i tagata o le vasega ni fatu e masani ai i latou ma ia fai atu ia i latou e ta'u mai le laau o le a tupu mai i fatu taitasi. Fesili atu: O le a le tele o le foliga mai, pe a tatou totoina le isi ituaiga fatu, ona tupu a'e ai lea o se isi ituaiga o laau? Aisea?

Ia vaevaeina le vasega i ni vaega se fa. Ia tusia fuaiupu taitasi o le Kalatia 6:7–10 i luga o pepa taitasi ma tuuina atu le pepa e tasi i vaega taitasi. Ia valaauina vaega taitasi ina ia latou faia se fuaiupu e faia ai se aotelega o la latou fuaiupu. Ona tusia lea e se tagata e to'atasi mai nei vaega taitasi la latou fuaiupu i luga o le laupapa, ma ia faaavanoa upu autu. Ia faitau faatasi mai e le vasega le Kalatia 6:7–10 ma ia faatumu upu o loo avanoa.

Faitau le Kalatia 6:7, ona talanoaina lea o le tulafono o le seleselega ma le ala e faatatau ai i le olaga. (O le tulafono o le seleselega o lo tatou seleseleina lea o mea tatou te lulu.) Ia faitau e tagata o le vasega le fuaiupu 8, ma fesili atu: O le a so outou manatu i le uiga o le lulu i la le tino ma le lulu i la le agaga? Ia valaauina tagata o le vasega e faamatala mai faamanuiaga ua latou seleseleina e ala i lo latou lulu i la le agaga. Atonu e aofia i nei mea mea e fai e pei o le faitau i tusitusiga paia, auauna atu, anapogi, po o le faaaliga o le onosa'i.

I le olaga tatou te iloa ai i nisi taimi le tulaga e foliga mai e le lavea i le tulafono o le seleselega. Ia faitau e tagata o le vasega le Kalatia 6:9 ma le 3 Nifae 27:11, ona talanoaina lea o le auala e faaaliga ai i fuaitau "o ona po e tatau ai" ma le "i nai aso" le manatu e faapea e leai ni tulaga e alo ese ai mai lena tulafono. E ui lava ina foliga mai e faatuai le tulafono, ae o le a faataunuaina lava e tusa ma le taimi ua finagalo ai le Alii. Ia tuuina atu i tagata o lau vasega tala e mafafau i ai o loo i lalo ma ia talanoaina e i latou le ala e talafeagai ma le tulafono tulaga taitasi:

- E totogi e Kalaka se sefulua'i atoatoa ma e le foliga mai e tele ni tupe na te teuina. Sa maua e Toma lea lava totogi e tasi e pei ona sa maua e Kalaka ae sa le totogi e ia se sefulua'i. E sili atu ona tele meatotino faaletino sa ia maua.
- E faamaoni Simi, e suesue ma le agaga naunauta'i, ma e maua e ia ni togi feololo i le aoga maualuga. E kopi Taiana

i lana vasega ma e maua e ia ni togi maualuluga. Talu ai ona o togi o lea tamaitai o Taiana e pei ona sa ia maua o le mea lea na maua ai e ia se sikolasipi e alu atu ai i le Kolisi.

Ia faamatala atu le saunoaga lena i Elder Spencer W. Kimball, a'o avea ma se tasi o le Korama a le Toasefululua:

"Atonu e ola lelei le tagata amioleaga mo se taimi, e mafai foi ona foliga mai e tele ni mea e maua e le tagata tetee i ana amioga le tonu, ae peitai e oo mai le taimi o le a faamasinoina ai tagata uma lava i luma o le nofoa faamasino, ma o le a faamasinoina tagata uma lava 'e tusa ma a latou amio' (Faaaliga 20:13). E leai se tasi o le a sao mai ai. I lena lava aso e leai se tasi o le a sao mai le faasalaga mo ana lava mea na fai, ma e leai se tasi e faapea o le a na le maua faamanuiaga e tusa ma ana galuega. . . .o le a i ai le faamasinoga tonu atoatoa. (tagai Mataio 25:31-46.)" (O Le Vasega o le Faamagalo Atu, mataupu 20).

O LE TUSI A LE APOSETOLO O PAULO I EFESO

O lenei Tusi sa
tusua i lenei
taimi

Malaga Muamua faafaifeautalāi (Galuega 13–14)	Malaga lona lua faafaifeautalāi (Galuega 15:36–18:22)	Malaga lona tolu faafaifeautalāi (Galuega 18:23–21:15)	O le Faafalepuipuiina i Roma (Galuega 21:16–28:31)	E oo i le faafalepuipuiina lona lua i Roma
---	--	---	---	--

E tusa 47–50 50–53 53–57 57–62 62–65
o le T.A.

Tusitala ma E o Loo Tusi i Ai: O Efeso o le tusi na tusia e Paulo ma sa faatatau i le Au Paia i Efeso, o se aai taua lea i le itu i sisifo o Asia Itiiti (ua ta’ua i aso nei o Eleni). O Efeso, e pei ona i ai i se fesoota’iga autu o ala o fefaataua’iga, sa avea ma nofoaga tutotonu o faiga pisinisi (tagai i le “*Taiala i Tuisitusiga Paia* faafanua 6.” Sa faaaoga e Paulo lenei nofoaga autu mo lana misiona mo le tusa o le tolu tausaga.

O le tusi a Efeso sa tusia i tagata sa liliu mai o nuuese o e na avea ma tagata ua uma ona papatisoina o le Ekalesia, e le o tagata ia o e na liliu ese mai le talitonuga Iutaia ma o i latou ia sa ola muamua i le tulafono a Mose. O loo tusia le Tusi i se tulaga faalauaitele ma e leai ni tagata patino o ta’ua, o le mea lea atonu ai sa auina atu i le tele o au lotu i lea nofoaga.

Talaaga Faasolopito: I le faagasologa o le malaga lona tolu faafaifeautalāi a Paulo, e tusa e tolu tausaga sa ia faaalaina i Efeso. O lea aai o le mea lea sa tu ai se malumalu ta’uta’ua o Tiana. Sa matua faamanuiaina lava le misiona a Paulo i le liliuina o tagata mai le ifo i tupua i le tapua’i atu lea ia Iesu Keriso ma o le mea lea na faatupuina ai e tagata fai pisinisi o le aai o e sa faatauina faatusa o lupe ona o le tulaga e ono oo i ai a latou pisinisi (tagai i le Galuega 19:21–41). Atonu sa tusia e Paulo le tusi a Efeso i le faagasologa o lea taimi muamua na tuuina ai o ia i le falepuipui i le tusa lea o le T.A. 60–62.

Uiga Tulaga Ese: O loo faamatalaina i le tusi o Efeso ni mataupu taua o le talalelei. O nisi o ia mataupu o le mua’i faau’uina, Toefuataiga i aso e gata ai, faapea ma le Agaga Paia o Folafolaga. O loo faamatala foi i le Efeso le taua o perofeta ma aposetolo, faatulagaga o le Ekalesia, ma fegalegaleaiga i totonu o le aiga.

Autu: E pei foi ona i ai i aso nei, e eseese ituaiga o tagata o le Ekalesia i ona po o Paulo. Sa faamanatu atu e Paulo ia i latou le malosi e fusua ai faatasi e maua mai le faatulagaga o le talalelei e faavae i perofeta ma aposetolo, ma o Iesu Keriso o le faavae lava lea. Sa ia fautua atu i tagata o le Ekalesia ina ia lotogatasi i le mataupu, amiotonu, ma le olaga i totonu o le aiga.

Efeso 1–3

Faatomuaga

E tuuina mai e Iesu Keriso ia i tatou faamanuiaga taua o le talalelei ina ia faaalaina ai Lona alofa tele ia i tatou. O le mataupu

faavae o le mua’i faauuina, le alofa o Iesu Keriso, ma faaaumeaina i le talalelei o nisi ia o faaitaiga o lenei alofa.

Ia suesue ma le agaga tatalo le Efeso 1–3 ma ia mafaufau i mataupu faavae o loo i lalo a o le’i saunia au lesona.

O Nisi Mataupu Faavae Taua o le Talalelei e Saili Iai

- Sa mua’i faauuina e le Tama Faalelagi nisi o Lana fanau latou te faia nisi o tiutetauave ma faamanuiaga o lenei lalolagi. Tatou te maua nei valaauga ma faamanuiaga e tusa ma lo tatou faatuatua (tagai i le Efeso 1:3–12; tagai foi i le Ieremia 1:4–5; Alema 13:3; Aperaamo 3:23).
- E faaolaina i tatou i le alofa tunoa o Iesu Keriso e ala i lo tatou faatuatua ia te Ia (tagai Efeso 2:1–10; tagai foi i le 2 Nifae 10:24; Moronae:32–33).
- O i latou e o mai ia Keriso ma Lana Ekalesia e avea ma tagata fou, ua lafoa’i i ala o le lalolagi (tagai Efeso 2:1–3, 11–22; tagai foi i le Efeso 4:1–7, 11–24; Mosaea 5:2; Alema 19:33).

Fautuaga mo le Aoa Atu

Filifili mai aitia o loo i lalo, pe faaaoga ni au lava, a o e saunia au lesona mo le Efeso 1–3.

Efeso 1:3–12. I le mua’i olaga sa mua’i faauuina e le Tama Faalelagi Ana fanau faatuatua latou te maua nisi o tiutetauave ma faamanuiaga faapitua i luga o lenei fogaelele. Ina ia faataunuuna o tatou valaauga sa mua’i faauuina ma iloa faamanuiaga na folafola mai, e tatau ona tatou tumau i le faatuatua. (15–20 minute)

Faaali atu se ie po o se ie ufi moega pe faatautau mai luga o le taualuga. Ia fai atu i tagata o le vasega e manatu ifo o le ie ufi moega o le pupuni lea e galo ai e i tatou mea ma e vavae ese ai le mua’i olaga mai le olaga i le lalolagi. Ia mafaufau i latou faapea e mafai ona latou laa atu i le pupuni ma manatua mea sa fai i le mua’i olaga. Ia fesili atu po o a mea latou te fia iloa e uiga ia i latou lava, ma ia tuu atu le avanoa ia i latou e faaali mai ai ni nai manatu. Ia faamatala atu e ui lava ina atonu tatou te le iloa ni mea auiliili se tele e uiga i lo tatou mua’i olaga, o loo i ai se mataupu taua e tasi ua tatou malamalama i ai. Ia fai atu i ni tagata o le vasega se to’atolu e faitau leo tele mai mau o loo i lalo ma ia faia se aotelega mo le vasega po o le a le mea o loo a’oa’o mai e mau taitasi: Ieremia 1:4–5; Galuega 17:24, 26; ma le Aperaamo 3:23.

Tusi le upu *mua’i faauuina* i luga o le laupapa. Ia fai atu i tagata o le vasega e talanoaina lona uiga. Atonu e sili pe a tuueseeseina le upu ma mafaufau i ona vaega e lua: *mua’i* ma le *faauuina*. Pe a mavae se talanoaga puupuu, ia tuuina atu lenei uiga: “O le filifilia e le Atua i le mua’i olaga o Lana fanau faaleagaga

mo le faataunuaina o ni misiona faapitoa i le faagasologa o o latou olaga faaletino.” Ia fai atu i tagata o le vasega e ta’u mai ituaiga o misiona atonu e mua’i faauuina se tasi e fai. Ia faamanatu atu ia i latou ina ia toe su’e ane i mau e tolu sa faitau e tagata o le vasega.

Ia faitau atu le manatu lenei mai le Perofeta o Iosefa Samita:

“O tagata uma o e ua umia se valaauga e ta’u atu i tagata o le lalolagi sa faauuina i lena lava faamoemoega i le Fono Autu o le lagi a o le’i faia lenei lalolagi. Ou te manatu sa faauuina a’u i lenei lava tofiga i le Fono Sili” (*Teachings of the Prophet Joseph Smith, 365*).

Filifili, faitau, ma talanoaina fuaiupu mai le Efeso 1:1–12. Atonu e te manao e faaoga nisi o faamatalaga ma fesili o loo i lalo:

Efeso 1

f.1	Ia maitau po o ai na tusi atu i ai Paulo. O le a le tele o le talalelei na a’oa’o atu i nei tagata? (I le avefa ai ma tagata o le Au Paia atonu o loo i ai ia te i latou se malamalama e uiga i mataupu faavae autu o le talalelei.) Atonu o se mea lelei lea e faamamafa atu ai e faapea o le Tusi atoa a Paulo sa tusia i tagata o le Ekalesia.
ff. 2–3	O le a le mea o loo ta’u mai e nei fuaiupu ia i tatou e uiga i le malamalama o Paulo e uiga i le natura o le Atua le Tama ma le Alii o Iesu Keriso?
f.4	O le a le fuaitau o loo faamatala mai ai e uiga i le mua’i faauuina? O le a le mea ua mua’i faau’uina i ai i tatou ina ia oo i ai?
ff. 5, 11	Afai tatou te tausia a tatou feagaiga, o le a le faamanuiga sili ua folafola mai ia i tatou?


Ia tautino atu i tagata o lau vasega e faapea a o latou auuina atu ma le faatuatua i Le Ekalesia a Iesu Keriso o le Au Paia o Aso e Gata Ai, o le a tuuina i latou e le Tama Faalelagi i soo se mea lava e tatau ona latou i ai ina ia mafai ai ona faataunuaina valaauga ua mua’i faauuina i ai i latou. Ia faaiuina i le molimau lenei ma le fautuaga mai ia Peresitene James E. Faust o le Au Peresitene Sili:

“I totonu o lenei tapeneko ma e o loo faalogologo mai i lenei po, o loo i ai le afe ma afe o ni ta’ita’i o le a i ai o le Ekalesia o e na valaauina mai le lalolagi ma filifilia e le Alii a o le’i faavaeina le lalolagi, e pei ona sa faamatalaina e Aperamo. . . . Ou te talitonu ua aumaia e le Alii agaga faapitoa o e na faaagaaga a o le’i faia le lalolagi ina ia malolosi ma totoia i lenei vaitaimi faigata o le talafaasolopito o le lalolagi. . .

“Ou te faamalosi atu ia te outou ma lo’u loto atoa . . . ina ia agavaa ma ia faamaoni” (*Liahona, Ianuari 1996, 50*).

Efeso 2:1–10. E faalaina i tatou i le alofa tunoa o Iesu Keriso e ala i lo tatou faatuatua ia te ia.

(25–30 minute)



Tusi le ata o le faatulagaga i luga o le laupapa. Ia iloilo e tagata o le vasega le ata, ma fesili atu:

- O a mea taua e tatau ona i ai mo i tatou ina ia maua ai le ola e faavavau? (Mea uma.)
- O a ni mea na maua ona o le tagata. (Na aumaia e o tatou ulua’i matua, o Atamu ma Eva, le Pau e tusa ai ma le fuafuaga a le Atua.)
- O a ni mea ua maua ona o le Faaola?

Ia faamatala atu o mea uma o le faaolataga ua maua ona e auuina mai ia Iesu Keriso. E le mafai ona tatou alualu i luma i le ola e faavavau e aunoa ma le Faaola. Ia faitau e tagata o le vasega le Efeso 2:4–6 ma ia saili mo upu e faamatala ai le fesoasoani ua saunia e lo tatou Faaola. Ia faitau e i latou le fuaiupu e 5, 7–8 na ua saili mo upu taua o loo mafai ona maua i fuaiupu uma e tolu.

Ia faitau le uiga o le “alofa tunoa” e tasi le parakalafa o loo i le *Taiala mo Tusitusiga Paia* ma ia tusia i luga o le laupapa mea taua o le alofa tunoa. Fesili atu: O le a le mea e tatau ona tatou fai ina ia mafai ai ona maua mea taua o le alofa tunoa.? (Ia faaalaina le faatuatua, salamo, fai le mea sili tatou te mafaia e tausia ai poloaiga.) Faitau le Efeso 2:8–9 ma ia faamamafaina le manatu e faapea o le alofa tunoa o se meaalofa. Ia fesoasoani atu i tagata o le vasega ina ia malamalama, e tuuina mai e le Alii meaalofa uma mo i tatou e le mafai ona tatou maua mo i tatou lava. Ia fai atu ia i latou e toe vaavaai i le ata, ma ia fesili atu:

- Pe aisea e le mafai ai ona faalaina i tatou e aunoa ma Lona alofa tunoa?
- E le gata i meaalofa o loo i ai i le ata, o a isi faamanuiga e tuuina mai e le Faaola mo i tatou e ala i Lona alofa tunoa? (Atonu e aofia le ola maloloina, o tali o tatalo, ma le fesoasoani i le olaga i aso taitasi.)

Ia faitau mai e tagata o le vasega le Helamana 14:13 ma ia faatusatusa lea mau ma le Efeso 2:8. Fesili atu: O le a se mea ua faaopoopo mai e le Tusi a Mamona i lo tatou malamalama e uiga i le faalaina e ala i le alofa tunoa e ala i le faatuatua?

Faitau le Efeso 2:10 ma ia talanoaina galuega lelei ua poloa'iina e le Atua e tatau ona tatou fai.

Ia faamalamalama atu e faapea e faia e le Faola le tele o mea mo i tatou i aso taitasi. Pe a aunoa ma Iesu Keriso, e le mafai ona avea i tatou e faapei o le Tama Faalelagi. E mafai ona tatou faaalua le agaga faafetai ia te Ia e ala i le faailoa atu o Lona aao i o tatou olaga. Ia faaiuina e ala i le usuina o le pese "Ou te Tu ma Ofo" (*Viiga*, nu. 107), ma ia mafaufau faapitoa lava i le alofa tunoa o Iesu Keriso e pei ona faamatalaina.

Efeso 4–6

Faatomuaga

Sa faaiuina e le perofeta o le Tusi a Mamona o Moronae lana tala faamaumau e ala i lana valaau, "Ioe, o mai ia ia Keriso, ina ia faaatoatoaina outou e ia, ma ia teena e outou le amio lē tonu uma" (Moronae 10:32). E faapea foi le fautuaga a Paulo e pei ona i ai i le afa lona lua o le Efeso. Sa ia aoao mai e mafai ona o mai le Au Paia ia Keriso ma faaatoatoaina ia te ia e ala i le avea ma tagata e tasi i mataupu faavae a le Faola, usiusita'i i ta'ita'i ua valaauina mai luga, mulimuli i le faataitaiga a Iesu Keriso i o tatou aiga, ma le faaaogaina o le ufi fatafata na tuuina mai e le Atua e avea ma puipuiga mai osofaiga a Satani.


Ia suesue ma le agaga tatalo le Efeso 4–6 ma ia mafaufau i mataupu faavae o loo i lalo a'o le'i saunia au lesona.


O Nisi Mataupu Faavae Tava o le Talalelei e Saili Iai

- Ua valaauina e le Alii aposetolo, perofeta, ma isi taitai o le Ekalesia e fesoasoani i le faaatoatoaina ma le faalotogatasia o le Au Paia "tagai Efeso 4:1–16; ia tagai foi i le MFF 84:109–110; 107:13–25; Mataupu Faavae o le Faatuatua 1:6).
- E avea ulugalii ua faaiipoipoina ma tagata e tasi pe afai e alofa le tane i lana ava i le auala e pei ona alofa ai Keriso i le Ekalesia ma a o mulimuli le ava i lana tane i le amiotonu (tagai Efeso 5:22–33; tagai foi i le 1 Korinito 11:3, 11–12; MFF 42:22).
- E tatau ona tatou "oofu i ofutau atoatoa mai le Atua" ina ia mafai ai ona puipuia i tatou i la tatou taua e faasaga ia Satani ma e mulimuli ia te ia (tagai Efeso 6:10–18; tagai foi MFF 27:15–18).

Fautuaga mo le Aoa Atu

Filifili mai aitia o loo i lalo, pe faaoga ni au lava, a'o e saunia lesona mo le Efeso 4–6.

 O le *New Testament Video* Vaega 18, "O le Ofutau atoatoa mai le Atua" (14:29), e mafai ona faaoga i le aoao atu o le Efeso 6:10–18 (tagai i le *New Testament Video Guide* mo fautuaga i le tuuina atu o aoaoga).

 **Efeso 4:1–16 (Mau Tauloto, Efeso 4:11–14). Ua valaauina e le Alii aposetolo, perofeta, ma isi taitai o le Ekalesia e fesoasoani i le faaatoatoaina ma le faalotogatasia o le Au Paia.** (20–25 minute)

Ia faaali atu se piano i lau vasega. Ia fesili atu i tagata o le vasega pe aisea ua tele ai ki o le piano. Ia alu ane se tasi o le vasega na aoaoina i mea tau musika na te filifilia po o le fea ki e sili ona taua. Ia oomi faatele. Fesili atu:

- Pe aisea e le malie ai i le faalogo le oomi na o le ki e tasi?
- O a ki e mafai ona tatou le faaaogaina?

Ia faamamafa atu e taua ki uma peitai e mafai ona faaoga i pese eseese. Faitau le Efeso 4:1–6. Ia faamatala atu i tagata o le vasega o le talalelei ua faatusaina lea i se piano. O le papatisoga o le isi lea ki e tasi, o le faatuatua ia Keriso o le isi lea ki, o le maua o se malamalamaga sa'o e uiga i le Aigaatua o le isi fo'i lea. O le piano atoa lava e maua ai le o gatasi o mataupu faavae o le talalelei e manaomia mo le faaeaina.

Ia tusia le faatulagaga o ki o le piano o loo i lalo i luga o le laupapa. Ia tusia ai upu *taimai* o le *Ekalesia*, *Faamoemoega*, ma le *Manaomia se'ia oo ina tatou oo atu i le pito i luga*, a ia aua le tusia isi upu.

Taitai o le Ekalesia	Faamoemoega	Manaomia Se'ia oo Ina Tatou
Aposetolo	• E faaatoatoa ai le Au Paia	• Lotogatasi i le faatuatua ma le iloa lelei o Iesu Keriso
O e e folafola le Talalelei	• E faia ai le galuega a auuuna	• Faaatoatoaina (e pei o Iesu Keriso)
Aoa	• Ia atiina a'e ai le tino o Keriso (Au Paia)	
Perofeta		
Leoleo		

Ia faitau mai e tagata o le vasega le Efeso 4:11–13. Ia vaevae le vasega i ni vaega se tolu. Ia fai atu i le vaega muamua ia saili mai ta'ita'i o le Ekalesia o loo faamatalaina. Ia saili e le vaega lona lua faamoemoega o nei taitai. Ia filifili e le vaega lona tolu po o le a le umi o le taimi o le a manaomia ai e i tatou nei taitai i le Ekalesia a le Alii. A'o fesoasoani mai nei vaega e tolu, ia faatumu le vaega o loo totoe o le faatulagaga i luga o le laupapa. (Atonu e te manao e faamatala nisi o nei tofiga mo tagata o le vasega. O e folafola le talalelei o peteriaka ia; vaai *Teachings of the Prophet Joseph Smith*, 151. O aoao o epikopo ia ma peresitene o siteki; vaai *Doctrinal New Testament Commentary*, 2:510.)


Fesili atu: O ai o nei ta'ita'i e mafai ona le i ai? Ia faamatala atu i tagata o le vasega e faapea e pei lava ona manaomia e i tatou

ki uma o le piano, ua faapea foi ona tatou manaomia ta'ita'i uma o le Ekalesia e pei ona ta'ua e Paulo. Ia faitau mai e ni tagata o le vasega le Efeso 4:14 ma ia saili i le mea e ono tupu pe afai tatou te le maua nei taitai. Ia fai atu i tagata o le vasega ina ia tusia le savali o lenei fuaitau ia latou lava upu, ma ia valaauina nisi o i latou e ta'u mai i le vasega mea ua latou tusia.

Ia tautino atu o le faatulagaga o le Ekalesia a le Alii e fesoasoani lea ia i tatou ia avea ma tagata atoatoa ma faapei o Keriso. Ia fai atu i tagata o le vasega e ta'u mai ni faaitaiga o fautuaga na latou maua ma mulimuli i ai mai perofeta, aposetolo, peresitene o le siteki, epikopo, peteriaka, po o aoao.



Efeso 6:10–18. E tatau ona tatou “oofu i ofutau atoatoa mai le Atua” ina ia puipuia ai mai osofaiga a Satani. (25–30 minute)



Ia tusia se ata o le fitafita Roma i luga o le laupapa mo le faaogaina i se taimi mulimuli ane.

Ia aumaia i le vasega ni mea e puipuia ai le tagata, e pei o se pulou malo o le tagata fau fale, o se ufimata i taimi o le peisipolo, o se mea e titina ai afi, o se ofu tele mafiafia, po o ni seevae mamafa e malo luma i tamatamaivae, pe tusia ia mea i luga o le laupapa. Ia fai atu i tagata o le vasega e faamatala mai pe faapefea ona maua se puipuiga mai i nei mea.

Ia faaali atu le ata o le fitafita Roma. Ia tusia fesili nei i luga a'e o le ata: *Po o tatou faia ea se taua?* Ia tuuina atu se avanoa i tagata o le vasega e talanoaina ai faapuupuu lenei fesili. Ia su'e ane e tagata o le vasega a latou tusi pese. Ia tuuina atu ia i latou ni minute se lua po o se tolu e sailia ai e i latou ni viiga e mafai ona latou maua o loo ta'ua ai se taua, ma ia tusia igoa o a latou pese i luga o le laupapa. (O faaitaiga atonu e aofia ai le “Autau a Keriso,” nu. 153 ma le “Ua Tauto tatou i le Taua,” nu. 157.) Fesili atu:

- O ai o loo tatou tau? (Satani; vaai Faaaliga 12:7–11.)
- O le a le tele o le potu masani o le fili i lenei taua?

Ia faitau ma talanoaina le Efeso 6:10–12. Ia faamalalama atu e le tatau ona tatou manatu mama i le taua o loo tau e Satani e faasaga ia i tatou (tagai Faaaliga 12:17; MFF 76:28–29). E inoino o ia ia i tatou ma o le a ia faia soo se mea e mafai ona ia fai ina ia avea ai i tatou ma tagata faanoanoa (tagai 2 Nifae 2:18). Sa lapatai mai Peresitene Harold B.Lee e faapea:

“O la tatou fetauiga sili ona leaga i le olaga e le o se taua lea ma tagata o loo avea ma o tatou fili” (*Stand Ye in Holy Places*, 330).

Ia fesili atu: Pe ua lava ea lo tatou malosi e puipuia ai i tatou lava mai ia Satani e aunoa ma se fesoasoani? Ia molimau atu e le o tu'ua i tatou na o i tatou lava e le Alii i lenei taua.

Ia alu ane se tagata o le vasega i le laupapa. A'o e faitau atu le Efeso 6:13–17, ia tusia e le tagata o le vasega igoa o vaega taitasi o le ofutau o le fitafita ma ia tusia le ofutau faaleagaga e pei ona sa aoaoina e Paulo.

Ofutau Faaletino	Ofutau Faaleagaga
Fusi po o le fusi pa'u	upumoni
ufifafafata	amiotonu
seevae	o le talalelei o le filemu
talita	faatuatua
pulou tau	faaolataga
pelu	o le afioga a le Atua

Ia fesili atu i tagata o le vasega pe mafai ona latou ta'ua maia vaega e fa o le tino e puipuia e le ofu tau. Ia aoao atu ia i latou le mea e faatatau i ai vaega taitasi. Atonu e te manao e faaopoopo atu nei faailoga i lau ata.

ulu	mafaufauga
loto	lagona po o amioga
sulugatiti	ola mama ma le legavia
vae	sini ma le itu o loo tatou agai atu i ai

Ina ia fesoasoani i tagata o le vasega ia malamalama i le auala e puipuia ai i tatou i nei vaega taitasi, ia mafaufau i le tuuina atu o fesili e pei o nei:

- O le a se mea o i ai i la tatou mataupu o le faaolataga e mafai ona taitaia ai o tatou manatu? (tagai MFF 121:45).
- Pe mafai faapefea ona taitaia o tatou lagona ma amioga ma pulea e le amiotonu? (tagai Alema 18:12).
- O a upumoni o le talalelei e puipuia ai lo tatou legavia?
- Pe mafai faapefea e le talalelei ona faatonutonuina le ala tatou te ui ai?

Fesili atu: Pe faapefea ona avea le faatuatua ia Iesu Keriso ma mea e puipuia ai i tatou mai ia Satani? Ia talanoaina pe faapefea ona avea le afioga a le Atua (o le pelu a le Agaga) ma mea e puipuia ai i tatou mai osofaiga a Satani.

Faitau atu le Efeso 6:18 ma ia fai atu i tagata o le vasega e ta'u mai le igoa o le vaega mulimuli o le ofutau. (Tatalo.) Ia

faamamafa atu e faapea o le aveesea o soo se vaega o le ofutau e mafai ona vaivai ai la tatou puipuiga. Ia faamatala atu le fautuaga a Elder Spencer W.Kimball, a’o aveia ma se tasi o le Korama a le To’asefululua:

“E matua faigata lava i le tiapolo ona ulu atu i se faitoto’a o loo tapuni. E foliga mai e leai sana ki mo faitoto’a e loka. Peita’i afai e fai sina āva laitiiti o se faitoto’a, e monomono atu i totonu lona tamatama’ivae, ona sosoo ai lea ma lona alofivae, ma sosoo atu ai ma lona vae atoa ma lona tino ma lona ulu, ma oo ai lava ina uma atu lona tino i totonu. . . .

“. . . E matua aveia lelei lava Lusifelo ma pule pe afai e gaua’i atu se tasi i lana faatauanaui mai. Ona le umi ai lea ae pogisa atoatoa lona mafaufau ola, ua faatitino atoatoa le mana o le tiapolo, ma tapunia ai le faitotoa i le faaolataga seia oo ina toe tatalaina e ala i le salamo faamaoni” (*O le Vavega o le Faamaoalo Atu*, mataupu 16).

Sa a’oa’o mai Peresitene Gordon B. Hinkley e faapea:

“O loo faaauau pea le taua. E pei lava ona sa i ai i le amataga. . . . O se taua faifai pea. . . . E le mafai ona tatou eleelea ma faamoemoe e fesoasoani mai le Silisiliese. . . .

“E le tatau ona outou faia ni mea o le a faavaivaia ai outou mafaufau ma o outou tino. O nei mea e aofia ai fualaau oona, alakaholo, ma tapaa. E le tatau ona outou aafia i ni gaoioiga o le ola le mama. E le tatau ona outou faia nei mea ma agavaa ai e aveia ma au tau o le galuega a le Alii. . . .

“. . . O loo tatou galulue i se taumafaiga tele ma le faavavau e faatatau i agaga o atalii ma afafine o le Atua. E le o faia’ina i tatou. O loo tatou manumalo. O le a faaauau pea ona manumalo i tatou pe afai o le a tatou faatuatua ma faamaoni. E mafai ona tatou faia. E tatau ona tatou faia. O le a tatou faia” (*Liahona*, Ianuari 1987, 45).

Ia fai atu i tagata o le vasega e ta’u mai ni taimi na latou lagona ai le puipuiga a le ofutau o le Atua.

O LE TUSI A LE APOSETOLO O PAULO I FILIPI

O lenei Tusi sa
tusia i lenei
taimi

Ulua'i malaga faafaifeautalai (Galuega 13–14)	Malaga lona lua faafaifeautalai (Galuega 15:36–18:22)	Malaga lona tolu faafaifeautalai (Galuega 18:23–21:15)	Faafalepuipuiina i Kaisareia ma Roma (Galuega 21:16–28:31)	E oo i le faafalepuipuiina lona lua i Roma
---	---	--	--	--

E tusa 47–50 50–53 53–57 57–62 62–65
o le T.A.

Tusitala ma E o Loo Tusi i Ai: O le Filipi sa tusia e Paulo i tagata o le Ekalesia i le aai o Filipi i le faagasologa o le taimi muamua na tuuina ai o ia i le falepuipui i Roma (tagai i le Filipi 1:1, 7, 13, 16; tagai foi i le Galuega 28:14–21).

Talaaga Faasolopito: Sa i ai Filipi i le itu i sasa'e o Masetonia (Eleni i matu) i luga o se ala tele autu e sosoo ai Roma ma Asia (tagai faafanua 6 o *Taiala i Tusitusiga Paia*). O le aai muamua lava lea i Europa na talia le talalelei. O se tamaitai e suafa ia Litia ma lona aiga o ulua'i tagata lava ia na faaliliuina e Paulo iina (tagai Galuega 16:9–15). Pe tusa o le sefulu tausaga talu ona mavae lana asiasiga muamua faafaifeautalai i Filipi, sa tala'i e Paulo le talalelei a o ave'a o ia ma pagota i Roma. Sa auina atu e tagata Filipi, ina ua faalogo i le tulaga ua i ai Paulo, le tagata e igoa ia Epaferoti e momoli atu ni meaalofa mo ia. Sa faatonuina o ia e faatasi pea ma Paulo ma fesoasoani ia te ia pe afai e manaomia. Peita'i ona o se ma'i na fai a oti ai o ia o le mea lea na faamalosi ai Epaferoti e toe fo'i atu i lona aiga (tagai Filipi 2:25–27). Sa auina atu e Paulo lenei tusi e faafetai atu ai ma fautuaina le Au Paia i Filipi i le tusa lea o le T.A. 60–62 (*Taiala i Tusitusiga Paia*, Tusi a Paulo).

Autu: “O lenei Tusi o se tusi o le faauoga, tumu i le alofa, to'afilemu, ma fautuaga lelei ma le fiafia. O le tusitusiga e aupito maua ai le fiafia o tusitusiga uma a Paulo, aua o tagata Filipi o tagata aupito sili lea ona pele i lona lotu i le faatuatua. . . .

“ . . .Ua mafai ai e i tatou ona tatou malamalama i mea na ia manatunatu i ai ma fesootaiga ma lona Matai. Tatou te matauina lona agaga i le vaega mulimuli o lona soifua a o faataunuina ma le onosa'i ia te ia le atoatoa o lana galuega” (J. R. Dummelow, ed., *A Commentary on the Holy Bible* [1936], 969).

Filipi 1–4

Faatomuaga

Sa tusia e Bruce R. McConkie e faapea: “O le Filipi. . . o se faamatalaga malie lea ma le lelei o loo faamatalaina ai ni mataupu faavae o le talalelei. Ua matua tamaoiga lava la tatou Tusi Paia ona ua i ai lea tusi” (*Doctrinal New Testament Commentary*, 2:525). Sa aoao e Paulo tagata o Filipi ina ia ola i se olaga Kerisiano ma le lototele e ala i le faamualaloina

e i latou o i latou lava (tagai Filipi 2:1–4), ma ia galulue mo lo latou lava faaolataga (tagai Filipi 2:12), ma ia tulimata'i atu i le sini o le ola e faavavau (tagai Filipi 3:13–14). Sa ia faalototele atu ia i latou i le upumoni ma e mafai ona latou “faia i le faamalosi mai o Keriso” (tagai Filipi 4:13).

Aoao ma le agaga tatalo le Filipi 1–4 ma ia mafaufau i mataupu faavae o loo i lalo a'o le'i saunia au lesona.

O Nisi Mataupu Faavae Tava o le Talalelei e Saili Iai

- E mafai ona tatou maua le filemu ma le olioli e ala i le talalelei e tusa lava pe feagai i tatou ma puapuaga (tagai Filipi 1:12–26; tagai foi i le MFF 122:5–9).
- Pe a toe afio mai le Alii, e to'otuli tulivae uma ma ta'uta'u atu e laulaufaiva uma o Iesu Keriso o le Alii (tagai Filipi 2:9–11; tagai i le Isaia 45:23; Roma 14:11).
- E tatau ona tatou galulue i lo tatou lava saolotoga ma ia faalagolago i le Togiola a Iesu Keriso (tagai Filipi 2:12–13; tagai foi 2 Nifae 25:23; Mamona 9:27).
- E leai se tau'i faalelalolagi e mafai ona faatusatusa i le faamanuiaga o le malamalama ma auauna ia Iesu Keriso (tagai Filipi 3:7–14).

Fautuaga mo le Aoao Atu

Filifili mai manatu o loo i lalo, po o le faaoga o ou lava manatu, a'o e saunia lesona mo le Filipi 1–4.

Filipi 1:12–26; 3:8–14; 4:4–13. E mafai ona aumaia e le talalelei le olioli i taimi o puapuaga pe afai tatou te iloa e leai se tau'i faalelalolagi e mafai ona faatusalia i le malamalama ma le auauna atu ia Iesu Keriso. (30–35 minute)

Ia mafaufau tagata o le vasega e faapea ua tuuina i latou i le falepuipui ona o se solitulafono latou te le'i faia. Fesili atu:

- O le a le ituaiga o lagona e te manatu o le a e maua i lona tulaga?
- Pe i ai ea se taimi na ta'usalaina ai oe i se mea sese e te le'i faia?
- O le a le lagona na ia te oe e tusa ma lea tuuaiga sese?

Tusi tali a tagata o le vasega i luga o le laupapa. Ia faitau e tagata uma o le vasega le Filipi 1:7, 13, 16 ma ia saili mo upu autu e faamatala ai le tulaga na oo ia Paulo. Ia tusia mea na latou maua i luga o le laupapa. Ia faamatala atu na tuuina Paulo i le falepuipui i Roma ona o lona talitonu i le talalelei. Ia faitau mai e tagata o le vasega le Filipi 1:12–26 ma ia saili upu e faamatala ai le lagona na oo ia Paulo a'o i ai o ia i le falepuipui, ma ia tusia ia upu i tafatafa o le lisi muamua.

Ia talanoaina mea e tutusa ai ma mea e eseese ai lisi e lua. Fesili atu: Pe aisea ua e manatu ai na maua e Paulo le lagona e pei ona sa ia maua?

Ia faitau e tagata o le vasega le Filipi 3:7–14 ma ia saili mo nisi o auala na matua malosi ai le faatuatua o Paulo. Fesili atu:

- O le a le mea na le toe faia e Paulo ina ia mulimuli ai ia Keriso?
- O le a le tulaga na ia maua?
- Aisea ua malilie ai nisi tagata e mafatia i le “lē aoga o mea uma lava” ona o Keriso?
- Pe mafai faapefea ona tatou faatupuina lena faatuatua e tasi?

O le a fesoasoani le gaioiga o loo i lalo i tagata o le vasega e malamalama ai po o le a le mea na aoa e Paulo mai puapuaga na feagai ma ia. Tufa atu i tagata o le vasega se pepa o loo i ai se faatulagaga o loo iinei ma ia faafeiloi tali.

Filipi 1:12	Talu ai ona o mea na tutupu ia te a’u, ua aveia lea ma mea ua alualu ai i luma le talalelei.
1:19	Ua ou iloa o lenei mafatiaga o le a fesoasoani i lo’u faaolataga.
3:10	Ona o lenei mea e mafai ona ou iloa ai Keriso ma le mana o le Toetu.
3:13–14	E faagalo e a’u mea faigata o taimi ua tuanai ae tulimatai atu mo le lumanai.
4:11	Ua ou iloa ona malie i soo se tulaga lava (tagai foi Alema 29:1–6).
4:12	Ua ou iloa ona lotomauualalo ma maua mea e tele mai le Alii.
4:13	E mafai ona ou faia soo se mea aua ua faamalosi a’u e Keriso.

Ia faasa’o le pepa na tufa atu ma ia talanoa i le auala e mafai ona fesoasoani ai nei mataupu faavae i tagata o le vasega a’o feagai i latou ma o latou lava tulaga faigata.

Faitau Filipi 4:4–10 ma ia saili i le auala e mafai ai ona tatou tumau i le filemu i le taimi o puapuaga ma faigata. Ia mafaufau i le faitauina atu o le faamatalaga lenei a Elder Milton R.Hunter, o le na aveia ma se uso o le Aufono Sili a Fitugafulu:

“Sa fetalai mai lo tatou Faaola i se perofeta o aso nei e faapea: ‘. . . o le faia galuega o le amiotonu o le a maua ai lona tau, o le filemu lea i lenei lalolagi, ma le olaga e faavavau i le lalolagi a sau.’ (MFF 59:23.)

“O le filemu e pei ona tautalaga i lenei faaaliga o aso nei o le filemu lea e maua mai le loto fuatiaifo e mama. O lena le filemu e maua pe afai tatou te mama i le Atua ma tagata” (in Conference Report, Oct. 1966, 40; tagai foi i le Mosaea 2:15; 4:3; MFF 135:4).

Ia uunaiina tagata o le vasega ina ia ola i le faaitaiga a Paulo. Ia molimau atu e mafai foi e i tatou, e pei fo’i o Paulo, ona maua le olioli i o tatou puapuaga ma faamanuiaina i le filemu i lenei olaga e ala i le talalelei a Iesu Keriso.

Ia faamatala atu i tagata o le vasega o loo i ai ni to’atuga i le mauaina o lenei filemu. Sa faamatala mai e Elder James E. Faust, o le na aveia i lea taimi ma se uso o le Korama a le Toasefululua, e faapea:

“O se tasi o pogai o le leaga o le faaleagaga o o tatou tagata ona o le toatele na’ua o tagata latou te le iloa pe popole e uiga i le mea e sa’o ma le mea e sese. E tele na’ua mea ua ta’uamiotonuina i le fuafua faatatau i le tatau ma le maua o le tupe ma oloa. I se taimi e le’i mamao atu, o na tagata ma faalapotopotoga o e na i ai le lototele e tutu atu ma lauga atu e tetee i le mulilua, le faamaoni, fevaevaeaiga, petipetiga, ma isi ituaiga o mea leaga e masani lava ona ula i ai tagata. E tele mea e iloa gofie e sese, e tusa lava pe le tusa ai ma le tulafono pe leai. O i latou o e naunau e mulimuli atu i mea leaga o le lalolagi e le mafai ona latou iloa le ‘manuia mai le Atua, o loo silisili lava i mea uma e manatu i ai’ (Filipi 4:7) (*Liahona*, Iulai 1992, 5).

Filipi 2:2–16. E tatau ona faia la tatou vaega i le galueaiina o lo tatou lava faaolataga, ma faalagolago i le Togiola a Iesu Keriso. (20–25 minute)

Ia faasino atu i tagata o le vasega se kesi, nofoa, po o isi mea e mamafa na’ua mo le sii a’e e se tagata e toatasi. Ia fai atu i se tagata o le vasega e alu atu e sii lena mea i tua o le potu. Ia valaauina se isi tagata e fesoasoani. Fesili atu:

- Pe mafai faapefea ona faatusaina lenei mea i le maua o le faaolataga?
- Pe mafai ona faasao e i tatou i tatou lava?
- O ai tatou te mananao e fesoasoani mai ia i tatou?

Ia faitau e tagata o le vasega le Filipi 2:12. Fesili atu: Afai o Iesu Keriso o le pogai autu lea o lo tatou faaolataga, o le a se mea tou te manatu na faatatau i ai le tala a Paulo ina ua ia fautuaina le Au Paia ina ia “galulue. . .ina ia faaolaina outou”?

Ia tusia ulutala e lua i luga o le laupapa: *O a tatou galuega ma galuega a Keriso*. Ia faitau mai e tagata o le vasega le Filipi 2:5–11 ma le Mose 1:39 ma ia saili mo upu e faamatalaina ai le galuega a Keriso, ma ia tusia a latou tali i lalo o le ulutala *galuega a Keriso* i luga o le laupapa. Fesili atu:

- O le a le galuega a Keriso?
- O le a le vaega o Lana galuega ua maea? (O le Togiola.)

Ia molimau atu ua saunia e Iesu Keriso lo tatou faaolataga e ala i Lana Togiola ma o le taimi nei e tatau ona tatou faia mea o loo manaomia ina ia faaolaina ai.

Ia faitau e tagata o le vasega le Filipi 2:13–16; Mamona 9:27–29; ma le Mataupu Faavae ma Feagaiga 11:20 ma ia sailia upu e faamatalaina ai la tatou galuega, ma ia tusia a latou tali i lalo o le ulutala *o a tatou galuega* i luga o le laupapa. Ia talanoaina auala e mafai ona tatou faataunuaina ai nei galuega i o tatou olaga.

Ia faamatala atu sa aoao atu e Paulo e faapea ua uma ona faia e Keriso le Togiola, ma na pau lava le mea o loo totoe tatou te faia o le tapua'i atu lea ia te Ia ma tausii Ana poloaiga (tagai Filipi 2:5–13). Sa saunoa mai Elder Bruce R. McConkie e faatatau i le galuega e tatau ona tatou faia e faapea:

“Ina ia maua mo i tatou lava le mana faamamā o lona toto, e tatau ona tatou talitonu ia te ia faapea ma lona Tama, ia salamo mai a tatou agasala, ma ia osifeagaiga i le vai o le papatisoga o le alofa atu ma auauna atu ia i la'ua i aso uma o lo tatou ola, ona maua lea o le mea foa'ifua o le Agaga Paia.

“A maea lea. . . e tatau ona tatou savavali i le malamalama, tausii poloaiga, ma faatoilaloina le lalolagi. O le ata lea o le faaolataga mo tagata uma i augatupulaga uma lava. O le fuafuaga lena na faali mai i lea augatupulaga ma lea augatupulaga ina ia mafai ai e le tagata ua pa'u ona galueaiina lona faaolataga faatasi ma le mata'u ma le gatete i luma o le Alii (tagai Filipi 2:12)” (*Liahona*, Mati 1980, 40).

Ia molimau atu e uiga i le moni o lenei aoaoga.

O LE TUSI A LE APOSETOLO O PAULO I KOLOSE

O lenei Tusi na
tusia i lenei
taimi

Malaga muamua faafaifeautalāi (Galuega 13–14)	Malaga lona lua faafaifeautalāi (Galuega 15:36–18:22)	Malaga lona tolu faafaifeautalāi (Galuega 18:23–21:15)	Faafalepuipuiina i Kaisareia ma Roma (Galuega 21:16–28:31)	E oo i le faafalepuipuiina lona lua i Roma
---	---	--	--	--

E tusa o le T.A. 47–50 50–53 53–57 57–62 62–65

Tagata Tusitala ma E o Loo Tusi i Ai: Sa tusia e Paulo le Kolose i le faagasologa o le taimi muamua na tuuina ai i le falepuipui i Roma ma o le tusi na tusi atu “i le Au Paia i Kolose o le au uso faamaoni.” (Kolose 1:2; tagai Kolose 1:1; 4:3, 10, 18; tagai foi Galuega 28:16–31). Sa fuafua foi ina ia faitau e le Au Paia i Laotikaia (tagai Kolose 4:16).

Talaaga Faasolopito: O Kolose (faapea ma Aai tetele e tuoiaone o Iarapoli ma Laotikaia) o se aai alualu i luma i mea tau pisinisi i Asia ititi (tagai i le faafanua 8 i le *Taiala i Tusitusiga Paia*). E le o faaalua mai i le tala faamaumau le auala na faailoa atu ai le talalelei i tagata Kolose. O loo ta’ua e Paulo se tagata e igoa ia Epafara e faapea “o le auauna faamaoni a Keriso” (tagai Kolose 1:7–8). Atonu na liliu lenei tagata i le talaiga a Paulo i Efeso i le faagasologa o le malaga lona tolu a Paulo faafaifeautalāi (tagai Galuega 19:10). Ua i ai le talitonuga e faapea na aveina atu e Epafara le talalelei i lona aiga i Kolose ma sa salalau atu ai i lona vaega atoa. Ae ui i lea, e pei lava ona sa olaola le talalelei, sa faapea foi le lotu i lutaia ma le talitonuga o Eleni. Sa aoao atu lenei talitonuga sese i au lotu o le Au Paia. Sa asiasi atu Epafara, ina ua le mafai ona taulimaina faateleina o le talia e le to’atele o le Au Paia o lotu sese, ia Paulo i Roma mo se fautuaga e tusa ma le auala e faaleleia ai lea tulaga tau faamata’u. Sa tusia e Paulo lenei tusi i se vaitaimi pe tusa o le T.A. 60–62 (tagai *Taiala i Tusitusiga Paia*, “Tusi a Paulo”).

Autu: O le faamoemoe o le talitonuga sese sa talaiina o le faaitiitia lea o le tulaga lauiloa o Iesu Keriso. Sa faasa’o e Paulo lenei manatu sese e ala i le aoao atu e faapea o Keriso o le faatusa lava lea o le Atua, o Ia o Le na Foafoaina lenei lalolagi, o le Ao o le Ekalesia, o le ulua’i tagata na toe tu mai, o se tasi o le Aigaatua, o le Togiola, ma o le “faamoemoe o le talalelei, na outou faalogologo i ai” (tagai Kolose 1:15–23).

Kolose 1–4

Faatomuaga

O aso nei o loo i ai ni faitioga faatuputupula’ia i le lalolagi e uiga i le paia o Iesu Keriso. Ua ta’ua le Faaola e le to’atele o tagata e faapea ua na o se aoao ta’uta’ua po o se tagata faamalolo ma’i po o se perofeta. Ua ta’ua o Ia e le to’atele o tagata e faapea o ia o se tagata e le talafeagai a’o tuputupu a’e atili i latou i le faalelalolagi po o le faalagolago i lo latou lava atamai. Pe a aunoa ma se malamalamaga sa’o e uiga i le Alo o le Atua po

o le talitonu fo’i i ana aoaoga, e faifai malie lava ona seeseese atu lo latou faatuatua i tulaga faigata o le olaga. E ui lava i nei mea uma, o loo faaaauu pea ona talai e perofeta mea lelei o le talalelei. E pei fo’i o Paulo ua latou aoao atu ma le lototele le mea moni e uiga ia Iesu Keriso, “o le faamoemoe i le manuia” (tagai Kolose 1:27).

Aoao ma le agaga tatalo le Kolose 1–4 ma ia mafaufau i mataupu faavae o loo i lalo ae le’i saunia au lesona.

O Isi o Mataupu Faavae Tava o le Talalelei e te Sailia

- Ua togiolaina i tatou e ala i le toto o Keriso, o le Ulumatua a le Tama ma o Lē na Foafoaina mea uma lava (tagai Kolose 1:12–20; tagai foi i le Ioane 1:1–4; MFF 88:1–13).
- O le atiina’e i luga o le faavae o Iesu Keriso, tatou te aloese ai mai le taitaiina sese i aoaoga taufaasese (tagai Kolose 2:6–23).
- Ina ia aveia ma ni tagata fou ia Keriso, e tatau ona tatou faatoilaloina le tiapolo ma atiina’e uiga amiotonu (tagai Kolose 3:1–16; tagai foi i le Mosaea 3:19).
- O le i ai o fegalegaleaiga amiotonu i le aiga o se mea taua lea i le fuafuaga a le Alii mo le fiafia (tagai Kolose 3:17–21).

Fautuaga mo le Aoao Atu

Ia filifili mai aitia o loo i lalo, pe faaoga ni au lava, a’o e saunia lesona mo le Kolose 1–4.

Kolose 1:12–23. E togiolaina i tatou e ala i le toto o Keriso. O le usiusita’i i le talalelei e mafai ai ona tatou faaopoopoina lo tatou faatuatua ia Iesu Keriso ma aloese ai mai le taitaiina sese.
(20–25 minute)

Ia faaali atu se laau o loo toto i totonu o se apa e toto ai laau po o se ata o se laau ma ia talanoa po o le a le mea e maua ai le malosi ma le ola lelei o lea laau. Ia tusi i luga o le laupapa lenei fuaiupu e le’i maea: *O le loloto o le alu ifo o aa, o le .* Ia faauma e tagata o le vasega le fuaiupu. (O tali e mafai ona tuuina mai e aofia ai le “malosi fo’i lea o le laau” po o le “matau foi lea o le laau.” Fesili atu: O le a se faatusatusaga faaleagaga e mafai ona tatou iloa mai lenei faamalalamamaga?)

Tusi i luga o le laupapa: *Ou te iloa o Iesu o le atalii o se kamuta, o se aoao sili, o se taitai lelei, o se perofeta.* Ia fesili atu i tagata o le vasega pe ua latou talitonu e moni lea mea. Ia ta’u atu i tagata o le vasega o le a e saili i se isi molimau mai tusitusiga paia. Faitau Kolose 1:12–23 ma ia talanoaina nisi o fesili o loo i lalo:

- O a upu ma fuaitau mai le molimau a Paulo e uiga i le Faaola o loo sili ona faagaetia ai oe?
- O a ni eseese i le va o lenei molimau ma le molimau o loo tusia i luga o le laupapa?

- O le fea molimau e loloto le oo ifo o ona aa?
- O le a se mana e mafai ona oo mai i lou olaga pe afai e te maua se molimau e sili atu ona loloto? Aisea?

Ia ta'u atu i tagata o le vasega i ona po o Paulo sa i ai ni tagata o e na manatu o Iesu Keriso ua na o se tasi o le au agelu. Sa teena e nisi Lona soifua mai i la le tino, lona tagata, ma lana Togiola. Sa faasa'o e Paulo ia manatu. Ia faamatala atu i o tatou lava aso o loo i ai ni tagata o e ua manatu o Iesu Keriso o se tagata noa. Fesili atu:

- O le a se mea e mafai ona tatou fai e mafai ona tatou faamalamalama ai lenei tulaga o le le malamalama e uiga i le Faaola?
- O le a se mea e mafai ona tatou fai e oo ai i se tulaga o le tuuina atu o se molimau e pei o le molimau a Paulo?

Faitau Kolose 2:6–10 ma ia saili mo mea taua na tuuina mai e Paulo e uiga i le ala e maua ai lenei molimau. Ia tusia nei mea i luga o le laupapa (atonu e aofia i nei mea le “ia savavali ai outou o ia te ia” [f.6]; ia “mauaa outou ma ia atiina’e ia te ia” [f.7]; ia “faatumuina i le faatuatua” [f.7]; ia “faaatoaina outou ia te ia” [f.10]). Ia talanoaina le uiga o mea ta’itasi ua e tusia i luga o le laupapa. Fesili atu:

- O le a le mea ua ta’u mai i le fuaiupu 8 e mafai ona tupu ia i tatou pe afai e le “maua’a” ia Keriso?
- O le a se mea e mafai ona tatou fai e avea ai ma ni tagata “maua’a” i le Faaola?

Ia faamatala atu le faamatalaga o loo i lalo a Elder Joseph B.Wirthlin, o se uso o le Korama a le Toasefululua:

“O Iesu Keriso e sili atu na i lo se aoao ta’uta’ua ma se tagata poto i mafaufauga. . . I le avea ma se vaega o le fuafuaga, sa ofo atu Iesu e togiola mo agasala a tagata uma ma tauave le mafatiaga mo ia agasala, ma faamalieina ai le tulafono o le faamasinoga tonu pe afai e salamo tagata. . . .

“Sa ia ofoina atu fo’i lona soifuaga faaletino, sa faasatauroina, ma ua avea ma faapolopolo o e momoe, ma ua saunia le toetu moni o fanau uma a lo tatou Tama o i le lagi. . . O ia o lo tatou Puluvaiga i le Tama ma o lo tatou Faaitaiga i mea uma. O lona agalelei ma le alofa ia te’i tatou e le oo i ai lo tatou malamalama” (*Liahona*, Ianuari 1995, 78).

Ia faamatala atu i tagata o le vasega a’o tatou malamalama i mea uma e faia e Iesu Keriso mo i tatou, e tatau ona avea ma mea e uunaiina ai i tatou e tapua’i ma mafuta ma ia. Sa saunoa mai Peresitene Howard W.Hunter e faapea:

“O le a le tele o le taimi tatou te mafaufau ai i le Faaola? O le a le loloto a’o le a fo’i le tele o lo tatou faafetai ma lo tatou foliga i lona olaga? O le a le tele o le avea o ia ma tagata autu i o tatou olaga?” (*Liahona*, Iulai 1993, 58).

Sa fautua mai Elder Neal A.Maxwell e faapea:

“Ia avea lou agaga faafetai. . . ma mea e faaalua ai lou taumafai ina ia avea, i lea uiga lelei ma lea uiga lelei, ma ia saga faaopoopoina atili ai le faapei o Iesu (tagai 2 Nifae 27:27). O le ola faapea, o le a avea ai o tatou olaga ma se tulaga o le na ona i ai o se agaga faafetai ia Iesu, po o le manatu foi ua na o ia o se tagata lelei. Ae peitai, o le a avea o tatou olaga e mafuta atu ia Iesu e faaalua lea i lo tatou faataitai ia te ia!” (*Liahona*, Ianuari 1994, 23).

Ia uunaiina tagata o le vasega e mulimuli i lenei fautuaga ina ia mafai ai ona tumau le mausali o a latou molimau e uiga ia Iesu Keriso.

Kolose 3:5–25. Ina ia avea ma ni tagata fou ia Keriso, e tatau ona tatou faatoilaloina le tiapolo ma faatupuina ni uiga amiotonu. (15–20 minute)

Ia aumaia i le vasega ni ofutino se lua (po o isi lavalava e faigofie ona faamaulu ma toe aveese). Ia tusi nisi o uiga e le lelei e pei ona tusia i le Kolose 3:5–9 i luga o se pepa, ma ia faapine i tua o se tasi o ia ofutino. Ia tusia i se isi pepa nisi o uiga lelei o loo ta’u mai i le Kolose 3:10–17, ma ia faapine i le itu i tua o le isi ofutino. Ia tautau ofutino i luma o le vasega i se ala e natia ai ia lisi mai le vasega. Faitau le Kolose 3:1–4 ma fesili atu:

- E tusa ai ma nei fuaiupu, o a mea e tatau ona tatou saunia i ai?
- Pe mafai faapefea ona tatou saunia?

Ia faamatala atu e faapea o le a toe afio mai Keriso o le a faaalua i o tatou tagata le ala sa tatou ola ai i o tatou olaga, ma o le a ia silasila mai ia i tatou i le tulaga moni ua tatou i ai (tagai Alema 5:14; Moronae 7:48).

Ia faitau mai e tagata o le vasega le Kolose 3:5–9 ma ia saili mo mea e tatau ona tatou lafoa’i. Ia faamatala uiga o upu e faigata ona malamalama i ai e ala i le faaogaina o se lomifefiloi. Ia liliu le ofutino muamua. Fesili atu:

- O le a se fautuaga e te tuuina atu i se tagata o loo i ai nei amioga?
- O le a le faigata o le maua o nei uiga?
- O le a le faigata e aveesea ai? Aisea?
- Pe faapefea ona e aveesea ia mea?
- Aisea e te manao ai e aveese ia mea?

Faitau le Kolose 3:10–17 ma ia saili mo mea e tatau ona tatou faia. Ia tusi ia mea i luga o le laupapa ma ia talanoaina mea taitasi. Ia liliu le isi itu o le ofutino lona lua. Fesili atu:

- O le a se mea e te ta’u atu i se tagata o loo i ai nei uiga?
- Pe o le a le faigata o le maua o nei uiga?
- O a faamanuiaga e maua i le faia o ia mea?

Ia tufa atu i tagata o le vasega se pepa ma ia tusia ai e i latou a latou lava lisi o mea ua latou mananao e aveesea ma mea e faia.

O LE TUSI MUAMUA A LE APOSETOLO O PAULO I TESALONIA

O lenei tusi sa tusia i lenei taimi

Malaga muamua faafaifeautalai (Galuega 13–14)	Malaga lona lua faafaifeautalai (Galuega 15:36–18:22)	Malaga lona tolu faafaifeautalai (Galuega 18:23–21:15)	Faafalepuipiina i Kaisaria ma Roma (Galuega 21:16–28:31)	E oo i le faafalepuipiina lona lua i Roma
---	---	--	--	---

E tusa 47–50 50–53 53–57 57–62 62–65
o le T.A.

Tusitala Ma E o Loo Tusi i Ai: O le tusi a 1 Tesalonia sa tusia e Paulo mo le Ekalesia i Tesalonia (tagai 1 Tesalonia 1:1). Ua talitonu le toatele o le Tusi muamua lava lea a Paulo.

Talaaga Faasolopito: Na amata le ekalesia i Tesalonia i le malaga lona lua faafaifeautalai a Paulo. O le taimi lava na tu’ua ai e ia Filipi, sa taunuu o ia i Tesalonia o se aai autu ma o se nofoaga tutotonu o fefaatauaiga i le itu i matu i sisifo o le sami ua ta’ua o le Sami Aiseane (tagai le *“Taitala i Tusitusiga Paia*, faafanua 6). I Sapati sosoo e tolu sa lauga atu o ia e uiga i le talalelei a Iesu Keriso i sunako o tagata Iutaia ma sa manuia ana taumafaiga (tagai Galuega 17:1–4). Ae ui i lea, o nisi o tagata Iutaia le talitonu, “ua mataua i latou,” sa faapotopoto e i latou se vaega tetee o e na taumafai e faoolima ia Paulo ma ana soa ma soo se tagata sa alolofa ia te’i latou (tagai Galuega 17:5). Sa malie Paulo, ona o le popole i le saogalemu o tagata fou na liliu mai, e alu ese atu (tagai Galuega 17:10). Sa faaauau e ia lana malaga faafaifeautalai ma ina ua oo atu i se isi mea sa toe auina mai e ia o Timoteo i Tesalonia e faamalosia le Ekalesia faato’a faatu (tagai 1 Tesalonia 3:1–3). Sa toe faatasi atu mulimuli ane Timoteo ia Paulo i Korinito e lipoti atu le tulaga o le Ekalesia i Tesalonia (tagai Galuega 18:5). Sa tusia e Paulo lenei tusi mai Korinito i le tusa o le T.A. 50–51 e fautuaina le Au Paia i Tesalonia e uiga i mea na atugalua ai e pei ona sa lipoti mai e Timoteo.

Autu: Sa tusia e Paulo lenei tusi e faamalosi atu ai i tagata Tesalonia ina ia ola i ni olaga agavaa i le saunia mo le afio mai o le Alii, ma aveesea ai o latou atugaluga e uiga i tagata o o latou aiga o e na oti e aunoa ma se malamalama e uiga i le talalelei.

1 Tesalonia 1–5

Faatomuaga

E pei lava ona tauivi i nisi taimi tagata o le Ekalesia i aso nei ma tu sese, sa faapea foi ona galulue le Au Paia i Tesalonia ma le i ai o se malamalama e le atoatoa e uiga i le Toetu. Sa popole i latou ona nei le maua e tagata faatuatua o le Ekalesia o e na maliluu faamanuiaga e tasi e pei ona sa maua e i latou o e na ola se’ia oo i le Toe Afio Mai. Sa tautino atu e Paulo ia i latou o na tagata uma “o le a aumaia e le Atua faatasi ma ia e o momoe ona o Iesu” (1 Tesalonia 4:13–14). A’o e faitauina, ia saili mo se fautuaga i se auala e mafai ona tatou saunia ai mo le Afio Mai Faalua, ma ia manatua “o le aso o le Alii e pei o le

gaoui i le po” (1 Tesalonia 5:2).

Aoao ma le agaga tatalo le 1 Tesalonia 1–5 ma ia mafaufau i mataupu faavae o loo i lalo ae le’i saunia au lesona.

O Nisi Mataupu Faavae Taa o le Talalelei e Saili Iai

- O i latou o e talia le talalelei a Iesu Keriso ua i ai se tiutetauave o le taitai atu o isi i le Talalelei (tagai 1 Tesalonia 1:6–10; tagai foi i le MFF 88:81–82).
- O auauna faamaoni e ola ma aoao le talalelei i le amiotonu (tagai 1 Tesalonia 2:1–10).
- E maua e faifeautalai le mamalu ma le olioli ia i latou e liliu mai i le Alii ma Lana Talalelei (tagai 1 Tesalonia 2:11–20; tagai foi MFF 18:10–16).
- O le faapaiaina e maua lea i le Togiola ma le gaua’i atu i le finagalo o le Tama Faalelagi (tagai 1 Tesalonia 4:1–7; tagai foi i le Helamana 3:35).
- O le Au Paia a le Atua o e oti i le faatuatua o le a toetutu mai i le Afio Mai Faalua o Iesu Keriso (tagai 1 Tesalonia 4:13–18; tagai foi MFF 45:44–46).
- O le Au Paia moni e tataua ona saili mo faailoga e mua’i oo mai a’o le’i oo mai le Afio Mai Faalua (tagai 1 Tesalonia 5:1–10; tagai foi Iosefa Samita—Mataio 1:46–55).

Fautuaga mo le Aoao Atu

Filifili mai aitia o loo i lalo, pe faaoga ni au lava, a’o e saunia lesona mo le 1 Tesalonia 1–5.

1 Tesalonia 1:6–2:20. O auauna moni e ola i le talalelei ma aoao atu lea lava talalelei i se ala amiotonu, ma maua le olioli o i latou o e talia le savali. (20–25 minute)

Ia fai atu i tagata o le vasega e mafaufau i le tulaga leni: Pe a uma ona talia o se lu’i e aumaia se uo lotu ese i le Ekalesia, e te alu atu ma le fefe i se tasi ua e manatu atonu e sau. Ua teena e lau uo le valaau. Ina ua e fesili atu po o le a le pogai, ae faamatala mai e lau uo afai e aoao atu e lau Ekalesia i tagata ina ia ola i le ala o loo e ola ai, o lona uiga atonu e le o se ekalesia lelei lea.

Ia talanoaina nisi o fesili nei:

- O le a se lagona e oo ia te oe pe afai e tupu leni mea?
- O le a sau tala e fai?
- Aisea ua taua ai le ola i lau lotu pe afai ua e faamoemoe e talai atu i isi?
- Afai e mafai ona e toe tusia leni tulaga, o le a se faaiuga e te manao e tusia ai?

Ia faitau e tagata o le vasega le 1 Tesalonia 1:6–10 ma ia saili mo ni faaitaiga o le ala e ola ai i le talalelei. Ia tusi a latou tali i luga o le laupapa ma talanoaina. Fesili atu:

- Pe faapefea ona faatusaina le avea ma se faaitaiga lelei i le aoga, i le aiga, po o le lotu i le faia o se misiona?
- O le a le uiga ia te oe o le fuaitau “o faifeautalai tagata uma”?

Ia faitau e tagata o le vasega le 1 Tesalonia 2:5–12 ma ia tusia i lalo uiga o se faifeautalai lelei. Ia ta’u mai e i latou mea na latou maua. Fesili atu:

- O le fea o nei uiga o loo ia te oe i le taimi nei?
- O le fea uiga e te manao ina ia faaleleia?

Afai e manaomia, ia toe faatulagaina e tagata o le vasega le tulaga e pei ona sa ta’ua i le amataga o le vasega ma ia faaoga ai se tagata o loo i ai na uiga.

Ia fai atu i tagata o le vasega e faamatala mai se tagata na ia faia se suiga lelei i o latou olaga. Fesili atu:

- Aisea na mafai ai e lenei tagata ona maua lea suiga?
- O le a se lagona o loo ia te oe e uiga i lenei tagata?

Ia faamatala atu o faifeautalai ua uma mai a latou misiona e masani lava ona latou faamatalaina le olioli e maua i le talai atu o le talalelei i isi. Ia molimau atu i tagata o le vasega e mafai ona latou maua lea lava olioli e tasi ma le lotu malie i le taimi nei lava. Faitau 1 Tesalonia 2:17–20 ma ia saili mo upu e faamatala ai lagona o Paulo e uiga i le Au Paia i Tesalonia. Ia faatusatusa na fuaiupu i le Mataupu Faavae ma Feagaiga 18:10–16. Ia fesili atu:

- Aisea na matua tele ai le olioli ma le alofa e pei ona faaalua i le 1 Tesalonia 2:17–20?
- Pe mafai faapefea ona tatou maua lea lava olioli?

Ia faamalosi atu i tagata o le vasega ina ia avea ma se faatosinaga lelei mo se tasi i lenei vaiaso.

1 Tesalonia 5:1–23. O le Au Paia moni e saunia mo le afio mai o le Alii e ala i le vaavaai mo faailoga na valoia mai atoa ma le ola i le Talalelei. (20–25 minute)

Ia valaau atu i tagata o le vasega e vavalo mai i le aso tonu o le a fanau ai la latou tama ulumatua. Fesili atu: Aisea ua faigata ai ona iloa le taimi sa’o o le a fanau mai ai se pepe? Faitau 1 Tesalonia 5:1–3 ma ia saili mo le auala na faamatala ai e Paulo lenei mea i le faatusatusa atu i le Afio Mai Faalua. Fesili atu:

- O a isi mea sa faaoga e Paulo e faamatala ai le Afio Mai Faalua?
- O le a le mea ua avea ai nei mea ma faatusatusaga lelei?
- O ai o le a te’i i Lona afio mai?

Faitau le 1 Tesalonia 5:4–5 ma ia saili po o ai o le a te’i ae o ai foi e lē te’i.

Ia tusia ni koluma se lua i luga o le laupapa, o le tasi ulutala o le tagata o le malamalama ma le isi o tagata o le pogisa. Ia saili e tagata

o le vasega i le 1 Tesalonia 5:6–11 mo ni uiga o ia tagata taitasi. Ia tusia nei uiga i luga o le laupapa i le koluma e tatau i ai ma ia talanoaina ia uiga e le vasega. Ia faitau atu le saunoaga lenei a Elder Robert D.Hales o le Korama a le Toasefululua:

“O le ola i poloaiga tatou te faia ai le finagalo o le Atua; e avea i tatou ma *tagata e tasi* i le faamoemoe faatasi ma le Tama ma le Alo. A *tasi* i tatou ma le Atua, ua tatou savavali i le malamalama faaleagaga. O lo tatou naunau e tausia poloaiga tatou te faatagaina ai le Agaga Paia e mau ma i tatou. O le a tuuina mai ia i tatou le meaalofa o le mau o faaaliga a le tagata lava ia. O le malamalama faaleagaga lea e puipuia ai i tatou ma avea ai ma se moli, e taitaiina ai i tatou i ala amiotonu. E aveesea ai le pogisa a le tiapolo. E matua malosi lenei malamalama ma e susulu atu e tusa lava pe tatou te pauu ifo i se lua uliuli o le agasala e loloto ma matua pogisa ma o le mea lea tatou te talitonu ai e leai se malamalama faaleagaga e mafai ona au atu i ai lana susulu (*Liahona*, Iulai 1996, 39).

Fesili atu i tagata o le vasega:

- Pe aisea o le a tete’i ai nisi tagata i le afio mai o le Alii?
- O le a le mea o le a tupu ia i latou? (Ia talanoaina tali a tagata o le vasega.)

Faitau le Mataupu Faavae ma Feagaiga 106:4–5 ma ia saili i le mea e mafai ona tatou fai e avea ai i tatou ma tagata o le malamalama. Fesili atu:

- O le a le uiga o le “fusua o outou sulugati”? (Saunia, po o le amata.)
- Pe faapefea ona tatou faia lenei mea?

Sa fautua mai Paulo o se tasi o auala e saunia ai o le faaleleia lea o lo tatou va ma le Atua ma tagata. Ona ia ta’uina mai ai lea o ala patino e fitu e fai ai mea taitasi. Ia vaelua le vasega. Ia tofi le isi afa o le vasega e faitau i le 1 Tesalonia 5:12–15 ma ia fai atu ia i latou ina ia tusia ni auala se fitu e mafai ai ona faaleleia e le Au Paia lo latou va ma o latou uso a tagata. Ia tofi le isi afa o le vasega e faitau le 1 Tesalonia 5:16–22 ma ia fai atu ia i latou e tusia ni ala se fitu e mafai ai e le Au Paia ona faaleleia lo latou va ma le Atua. Ia tusia mea e sefulu ma le fa i luga o le laupapa ma ia talanoaina pe a manaomia.

Faitau 1 Tesalonia 5:23 ma ia saili mo le faaalua e Paulo o le faamoemoe mo le Au Paia i Tesalonia. Fesili atu:

- Pe mafai ona outou manatua se tasi faamanuiaga e sili atu ona taua?
- Pe aisea ua taua tele ai lenei faamanuiaga?
- Pe faapefea ona avea le faia o nei mea e sefulu ma le fa ma mea e fesoasoani ai ia te outou ina ia maua lenei faamanuiaga?

Afai e lava le taimi, ia faatusatusa le fuaiupu 23 ma le 1 Tesalonia 4:3–7 ma ia talanoaina le taua o le mama atoatoa o feusuaiga ina ia faapaiaina.



O le malaga faafaifeautalai muamua (Galuega 13–14)	O le malaga faafaifeautalai lona lua (Galuega 15:36–18:22)	O le malaga faafaifeautalai lona tolu (Galuega 18:23–21:15)	Falepuipuiina i Kaisareia ma Roma (Galuega 21:16–28:31)	E oo atu i le falepuipuiina lona lua i Roma
--	--	---	---	---

Pe tusa o le T.A. 47–50 50–53 53–57 57–62 62–65

Tusitala ma E o Loo Tusi i Ai: O le tusi e 2 Tesalonia na tusia e Paulo ma sa faatatau mo le ekalesia i Tesalonia (tagai 2 Tesalonia 1:1; 3:17) Na tusia e Paulo lenei tusi pe tusa o le T.A. 50–51 (tagai *Taiala i Tusitusiga Paia*).

Talaaga Faasolopito: O le tusi lenei ma le 1 Tesalonia e toetoe lava a tutusa ma e malosi tele se la sootaga o le tele o tagata sa talitonu sa tusia i se vaitaimi e ono masina le va.

2 Tesalonia 1–3

Faatomuaga

Sa aoaoina atu e Paulo le mataupu faavae O le Toe Afio Faalua Mai o Iesu Keriso i se auala e sili ona malosi ma ua avea ma mea ua matua nonofo sauniuni i ai le Au Paia i Tesalonia. Ona i ai lea o ni manatu sese ua taufaaofi atu i le Ekalesia mai i faiaoga ua faapea i latou ua toe o se aga ona afio faalua mai lea o le Alii. O le toatele o tagata o Tesalonia na talitonu i lea manatu ma na avea lea ma mea ua latou faamuta ai a latou galuega faifai pea i lea aso ma lea aso ae faatalitali mo le toe afio faalua mai o le Alii. I le lenei Tusi na faamalamalama atili ai e Paulo ia faailoga o le toe Afio Faalua Mai.

Ia suesue ma le agaga tatalo le 2 Tesalonia 1–3 ma manatunatu i mataupu faavae nei ae le'i saunia au lesonea.

O Nisi Mataupu Faavae Tava o le Talalelei e Saili Iai

- O e e amio leaga o le a mauaina le faasalaga a le Alii i Lona toe Afio Faalua Mai (tagai 2 Tesalonia 1:3–10; tagai foi MFF 5:19; 133:50–52).
- Na valoia e Paulo o le a i ai le liliuese ma le toefuataiina o le a muamua mai i le Toe Afio Faalua Mai O Iesu Keriso (tagai 2 Tesalonia 2:1–10; tagai fo'i, Amosa 8:11–14; Efeso 1–10).
- E tatau ona tatou tatalo ma usiusita'i i e ua valaauina e le Atua e ta'itaia le Ekalesia (tagai 2 Tesalonia 3:1–7; tagai fo'i 2 Nofoaiga a Tupu 20:20; Mataio 10:41).
- O le Au Paia o Aso e Gata Ai e le tatau ona faavaivai e galulue mo le tausiga o i latou ma o latou aiga. (tagai 2 Tesalonia 3:10–13; tagai fo'i MFF 42:42; 64:33).

Fautuaga mo le Aoao Atu

Filifili mai i aitia nei, pe faaaogaina ni au lava, a o e saunia lesonea mo le 2 Tesalonia 1–3.



O le *New Testament Video* vaega 19, “O Le Afio Faalua Mai” (3:46), e mafai ona faaaogaina i le aoaoina o le 2 Tesalonia 1:1–2:3 (tagai i le *New Testament Video Guide* mo nisi fautuaga mo le aoaoina)



2 Tesalonia 1:1–2:3. E mafai e taitai o le Ekalesia ona fesoasoani ia i tatou mo le saunia mo le Toe Afio Faalua Mai o Iesu Keriso. E tatau on tatou tatalo ma usiusita'i i taitai o le Ekalesia. (40–45 minute)

Faailo i le vasega se kalena e leai ni aso o loo tusia ai ma se uati e leai sona vae itula. Valaaulia le vasega e faitau le Mataupu Faavae ma Feagaiga 49:7 mo se malamalamaaga pe o a mea e mafai ona faatusa i ai nei mea. Fesili:

- E i ai nisi o outou e fia iloaia tonu le taimi sa'o o le Toe Afio Faalua Mai? Aisea?
- O a ni faafitauli atonu o le a alia'i mai pe afai o le a tatou iloaia ma le mautinoa le aso ma le itula o le a afio mai ai le Alii?

Valaaulia le vasega e faitau le Alema 34:33, 35 ma mata'ituina ia mea o loo aoaoina mai e na fuaiupu e uiga i le faatuai ma ona taunuuga. Molimau atu i le taua tele o le saunia faaleagaga ma aua nei faatuai e taimi tatou te salamo ai.

Ta'u atu i le vasega sa le malamalama ia le Au Paia i Tesalonia i aoaoga a Paulo e uiga i le Toe Afio Faalua Mai. Faitau 1 Tesalonia 4:13–17 ma Fesili: O a ia ni fasi fuaitau i nei fuaiupu atonu ua sese ona faaliliuina ua maua ai manatu faapea o le Toe Afio Faalua Mai ua lata mai.? (“O i tatou o e ola”; ff. 13, 17.)

Na tusia e Paulo se tusi lona lua e faamalamalama atili ai le eseese e uiga i le Toe Afio Faalua Mai o Iesu Keriso. Faitau le 2 Tesalonia 1:3–10 ma mata'ituina ia upu poo fasi fuaitau taua e faailoa mai ai o le Toe Afio Faalua Mai o le a faataunuuna lava i le lumana'i. Fesili:

- O le a le mea o le a molimauina e le Au Paia ae le'i oo mai le Toe Afio Faalua?
- O le a se faamafanafanaga na tuuina atu e Paulo?
- Faitau le 2 Tesalonia 2:1–3. O a isi mea o le a tutupu ae le'i afio mai le Alii?
- Aisea e ono lē fiafia ai le Au Paia i le vaitaimi o Paulo i lenei mea?
- Mata o le a sou lagona e i ai?

Fesoasoani i le vasega ia malamalama i fuaitau nei.

<p>“Ina ne’i vave luluina o outou loto, pe faaatuatuvaleina i se agaga, po o se upu, poo se tusi” (f.2)</p>	<p>Aua ne’i faapopoleina i aooga sese e te faalogo i ai, ae faalogo na o i latou o loo i ai le pule.</p>
<p>“Aua ne’i faasese se tasi ia te outou” (f.3).</p>	<p>Ia faaeteete ia i latou e aoaoina mai mataupu faavae sese.</p>

Talanoaina le taua o perofeta i le fesoasoani mai lea ia te i tatou e sauniuni mo le Toe Afio Faalua Mai. Fesili: E faapefea ona latou fesoasoani? Faamalamalama atu o le a e faitauina ni tala se tolu o ni mea na tutupu pe o ni tala faaitaitai ma ta’u atu i le vasega ina ia latou mafaufau pe o le a le mea o le a latou faia i tulaga faapea.

Tala Faatusa E Aoao Mai Ai 1: O se tamaititi i lau vasega seminare ua faaalua se popolega e uiga i ni mea na ia faalogo i ai e tusa ai ma le Toe Afio Faalua Mai. Na ia fia iloa pe o lava le taimi mo ia e sauni ai mo se misiona, kolisi, faaipopoga, ma se fanau. O le a sau tali ia te ia? Talanoaina a latou tali, ona tuuina atu lea o le faamatalaga lenei a Elder Boyd K. Packer:

“O mea uma ua ou aoao mai i faaaliga ma lo’u olaga ua faamautuina ai ia te a’u o loo tele le taimi mo oe e sauniaina ai ma le faaeteete mo se olaga umi.

“O le a sau se aso o le a e faafeagai ai ma se fanau talavou a oe lava ia. Ua tatau lena mo oe. I se taimi mulimuli ane, o le a e faamatanana ona fai fanau a lau fanau, ma o le a faapefea fo’i ona latou faia i fanau a a latou fanau. A fai o le a vave ona faamutaina se ola o se tasi, o se pogai lea e tatou te faia ai ia mea sa’o ma le moni” (*Liahona*, Me 1989, 59).

Fesili:

- E faapefea i le manatu na faaalua e Elder Packer on avefa faamafanafanaga?
- O a ni lu’i e oo mai i le iloa ina lea o le Toe Afio Faalua Mai o le a faataunuuna i se taimi atonu e mamao atu i le lumana’i?

Tala Faatusa e Aoao Mai Ai 2: Ua ta’u atu e sau uo na alu i se faeasaita ma na taua ai e le failauga sa fai lana miti e uiga i le Toe Afio Faalua Mai. I lena miti na ta’uina atu ai ia te ia e aoao le Au Paia i mea uma e tatau ona latou faia ina ia latou saunia. O lau uo ua na leiloa pe na te faia le mea lea na taua i le lauga pe leai. O le a sau faamatalaga o le a tuuina atu ia te ia? Talanoaina a latou tali ona tuuina atu lea o le faamatalaga lenei a Elder Boyd K. Packer:

“E maua e i tatou ia avanoa e maua ai ia faaaliga mo i tatou lava. A e ui i lea, e le mafai ona tatou mauaina ia faaaliga faatatau i mea e tatau ona fai e isi vagana ai ua uma ona valaauina faapitoa oe i se tofiga pulefaamalumu. . . .

“E i ai ia taimi e fai mai ai nisi ua latou mauaina le pule e aoao ma tuuina atu ai faamanuiaga e aunoa ma se valaauina ma le faamanuiaina i le tofiga. . . .

“O le ala lena e puipuia tele ai e le Ekalesia ma le faaeteete ia le taliaina o i latou ua valaauina i tofiga. . . . ina ia silafia ai e tagata uma po o ai ua i ai le pule e aoao ma faamanuia.

“O se aafiaga faaleagaga uiga ese atonu e le o se valaauga e faatonuina ai ia i si. O lo’u talitonuga maumaututu, o lagona uiga ese, e paia o mea patino tonu lava i le tagata lava ia ma e tatau ona tausia pea e ia” (*Liahona*, Ianuari 1989, 14–15).

Fesili:

- E tusa ai ma le faamatalaga a Elder Packer, o ai na te taliaina ia faaaliga mo le Ekalesia?
- O ai e faamanuiaina i mea faaleagaga uiga ese na latou mauaina?
- O le fautuaga a ai e tatau ona tatou mulimuli ai?

Tala Faatusa e Aoao Mai Ai 3: Ua sau i le fale lou tuafafine ma le loto popole aua ua logoina atu e lona faiaoga seminare faapea o faailoga o le Toe Afio Faalua Mai ua toetoe ona mae’a ona faataunuuna, o mala mata’utia ua oo mai, ma afai e le faaputuina meaai a tagata o le Ekalesia e i’u ina ua tuai. O le a sau tala e fai atu i si ou tuafafine mafatia? Talanoaina ma le vasega a latou tali, ona tuuina atu lea o le faamatalaga lenei a Elder Neal A. Maxwell:

“I le faasologa mai o le talafasolopito o le au Kerisiano, sa i ai lava nisi ua latou mata’ituina ia ni nai valoaga ae faagalo i isi, ma ua latou vave faia ai se faai’uga ua oo mai le Toe Afio Faalua Mai. I ona po nei, o loo ua tatou latalata atu i lena taimi mata’utia ma ua tatou i ai fo’i i lena lava mafatiaga e tasi. . . .

“I le uiga o nei apoapoiga, ou te le solomuli lava i le ta’u atu ua i ai ia ni nai faailoga—ae le’i uma mai—o lona uiga ua latalata mai ‘tausaga vevela’ (Mataio 24:32). . . .

“O tagata o le Ekalesia e le tatau ona popole fua. E leai se mea e tatau ai fua ona suia lo latou olaga mai i le sailia ma le filemu ma le amiotonu o o latou lava olaga.” (*Liahona*, Iulai 1988, 9, 10).

Fesili:

- Pe ua faataunuina uma ea faailoga o le toe afio mai o le Alii?
- O le a le fautuaga a Elder Maxwell i le mea e tatau ona tatou faia?

Molimau atu ua auina mai perofeta soifua, tagatavaai, ma tali faaaliga e fesoasoani i le sauniuniga o i tatou mo “lena aso o le Alii.” Ia tuuina atu le molimau lenei a Peresitene Polika Iaga:

“Ua e saunia ea mo le aso o le faasalaga o le a oo mai, o le a susunuina ai e le Alii o e amioleaga ma faaumatia i le faaali mai o lana afio? Leai. Ia aua la e te naunau i le vave faataunuina e le Alii o lana galuega. Ia tulimatai atu lo tatou faanaunauga i le mea lenei e tasi, o le faapaiaina o o tatou lotu, ia mama lo tatou alofa, o le sauniuniga o i tatou mo le oo mai o mea o le a tutupu ua vave ona oo mai ia i tatou. O le mea lena e tatau ona tatou popole i ai, e tatau ona tatou aoao i ai, ma e tatau ona avea ma a tatou tatalo i aso uma....Saili i le mauaina o le Agaga o Keriso, ina ia tatou faatalitali ma le onosa’i i le taimi o le Alii, ma saunia i tatou mo taimi o le a oo mai. O lo tatou tiute lea” (in *Journal of Discourses*, 9:3).

Ia uuna’ia le vasega e mulimuli i le fautuaga a Polika Iaga.



2 Tesalonia 2:1–3 (Mau Tauloto). Na valoia e Paulo o le a i ai se liliuese ae le’i oo i le Toe Afio Mai o Iesu Keriso. (10–15 minute)

Valaauina se toalua mai le vasega e avea ma ni faifeautalai. Avane se i si e avea ma tagata su’esu’e. Atonu o le a e mana’o e fai se faataitaiga puupuu ae le’i amataina le vasega po o le tuuina atu i ai o ni faatonuga i ni fasi pepa pe a amata le vasega. Ia faamatala e faifeautalai ia le auala na toefuataiina ai le Ekalesia moni i luga o le fogaeleele. Ia fesili le tagata suesue: “Afai sa i ai le Ekalesia a Keriso i luga o le fogaeleele mai le taimi na Ia faatuina ai, aisea ua tatau ai ona toe i ai se Toefuataiina?”

Fesili i le vasega po o a ni a latou tali i lea fesili. Fesili: I lou lava manatu, faamata e faafia ona fesiligia ia faifeautalai i lenei fesili? Ta’u atu i le vasega o le malamalamaaga i mataupu faavae o le Liliuese ma le Toefuataiina e taua i le talaiga.

Faitau e le vasega le 2 Tesalonia 2:1–3, Fesili:

- O le a “le aso o Keriso”?
- O le a le mea o le a tupu ae le’i oo i lea aso?

Faamalamalama o le pauu ese e tutusa ma le Liliuese Tele. Faitau le faaliliuga a Iosefa Samita o le 2 Tesalonia 2:7–9 ma mata’ituina po o le a le mea na mafua ai le Liliuese. Fesili:

- Atonu o a ia “faailoga ma vavega pepelo” a Satani?
- E le gata i le Liliuese Tele (le pauu ese o le Ekalesia), o le a se isi ituaiga liliuese o loo i ai?
- Afai e mafai ona pauu ese fo’i ia tagata taitoatasi, o a ituaiga “faailoga ma vavega pepelo” e faaogaina e Satani e faaseseina ai i latou?
- E faapefea ona tatou alo ese mai i faailoga ma vavega pepelo a Satani?
- Aisea ua manaomia ai e Satani ia le uuna’ia o tatou ina ia tatou pauu ese?

Faitau e le vasega le 2 Tesalonia 3:1–7 ma mata’ituina mea e mafai ona tatou faia e alo ese mai ai i le liliuese taitoatasi. Molimau atu i le moni o le mea faatoa uma ona aoaoina. Faai’u i le faitauina o le faamatalaga lenei a Peresitene Harold B. Lee:

“O lenei, na pau lava le saogalemu tatou te maua o le avea ma tagata o le Ekalesia, o le faia tonu lea o le mea na fai mai ai le Alii i le Ekalesia i lena aso ina ua faatuina le Ekalesia. Ua tatau ona tatou aoao i le ususita’i i upu ma tulafono o le a tuuina mai e le Alii e ala mai i Ana perofeta....Atonu o le a e le fiafia i mea o loo tuuina mai e taitai o le Ekalesia. E mafai ona le gatusa ma ou manatu faapolokiki. Atonu foi e feteenai ma ou manatu faalesoifuaga. Atonu o le a avea ma pa puipui i lou olaga faalelalolagi. Ae a e faalogo i nei mea e pei o la e aumai tonu i le fofoga o le Alii lava ia....’o le a le mafai e faitoto’a o seoli ona manumalo ia te oe....” (Lipoti Konafesi, Oke. 1970, 152; tagai foi MFF 21:4–6).

O LE TUSI MUAMUA A LE APOSETOLO O PAULO IA TIMOTEO

O lenei Tusi na tusia lava i le taimi lenei.

O le malaga faafaifeautalāi muamua (Galuega 13-14)	O le malaga faafaifeautalāi lona lua (Galuega 15:36-18:22)	O le malaga faafaifeautalāi lona tolu (Galuega 18:23-21:15)	Falepuipuina i Kaisareia ma Roma (Galuega 21:16-28:31)	E oo atu i le falepuipuina lona lua i Roma
--	--	---	--	--

Pe tusa o le T.A. 47-50 50-53 53-57 57-62 62-65

Tusitala ma E o Loo Tusi i Ai: O le tusi 1 Timoteo sa faatuatusi e Paulo i lana soa a’o la tala’i ma sa taua e ia “o lona lava atalii i le faatuatusa” (1 Timoteo 1:2). O le tusi lenei, faatasi ai ma le 2 Timoteo ma Tito ua taua o tusi mo le taitaiga aua ua i ai ia fautuaga mo e ua avea ma faifeau po o taitai o le Ekalesia.

Talaaga Faasolopito: O Timoteo na fanau i Lusa (tagai Galuega 16:1-3; tagai fo’i i le faafanua 6 o le *Taiala i Tususiga Paia*). O lona tama o se tagata Eleni. Sa tupu a’e o ia i lalo o le tausiga a lona tina Iutaia ma le tina o lona tina (tagai 2 Timoteo

1:5). Sa la aoa ia Timoteo i tusitusiga paia mai lona talavou (tagai 2 Timoteo 3:15. Na valaauina e Paulo e avea ma ana soa i laga malaga faafaifeautalāi lona lua (tagai Galuega 16:3). Mai lena taimi, na auauna ia Timoteo ma le faatuatusa i le avea ai ma se faifeautalāi ma se taitai o le Ekalesia (tagai Galuega 19:22; Filipi 2:19). Na tusia e Paulo lenei tusi i le va o lona falepuipuiga muamua ma le falepuipuiga lona lua i Roma, pe tusa o le T.A. 64 (tagai *Taiala i Tususiga Paia*; “Tusi a Paulo”). I le vaitaimi lea, na malaga ai ia Paulo i nofoaga ua uma ona ia faatuina ai ia paranesi o le Ekalesia, ma faamalosi ia i latou i le faatuatusa. I se taimi mulimuli ane na tofia ai e Paulo ia Timoteo e vaai le Ekalesia i Efeso, ma o lana galuega patino e fai o le taofia lea o le tuputupu a’e o aoaoga faavae sese (tagai 1 Timoteo 1:3-7).

Autu: I lenei tusi, na fautuaina ai e Paulo ia Timoteo e uiga i le auala e tatau ona faagaoioia ai le Ekalesia ma pe faapefea foi ona fegalegalea’i tagata o le Ekalesia. (tagai 1 Timoteo 6:11-16). Na ia matua faamalosi le avea o taitai o le Ekalesia ma faataitaiga talafeagai mo tagata o le Ekalesia e mulimuli ai (tagai 1 Timoteo 4: 6-10).

1 Timoteo 1-6

Faatomuaga

I le taimi na mauaina ai e Timoteo le tusi a Paulo, sa avea o ia ma taitai perisitua i Efeso. Sa faamoemoeina tele e Paulo o ia i le tele o ni tofiga taua ma sa faamaonia lava le faatuatusa o Timoteo. Ona o le laititi tele o Timoteo i ona tausaga, sa faafaigata ai i e matutua ma tagata o le Ekalesia ua i ai tofi maualuluga ona taliaina lana taitaiga (tagai 1 Timoteo 4:12). Sa tusi atu Paulo

e apoapoai ma faamalosi i lana uo mafatia. O i tatou foi e faapei o Timoteo, tatou te mauaina foi ni valaauga faigata e galulue ai. A o e faitauina lenei tusi, saili fautuaga ma apoapoaiga e mafai ona fesoasoani ia te oe a o e tautua i le Ekalesia.

Ia suesue ma le agaga tatalo 1 Timoteo 1-6 ma manatunatu i mataupu faavae nei a o le’i saunia au lesona.

O ni Mataupu Faavae Taua o le Ekalesia E te Sailia

- O le matafaioi a taitai o le Ekalesia o le faamautinoa lea o loo aoaoina ia mataupu faavae moni o le Ekalesia i le Au Paia (tagai 1 Timoteo 1:3-7, 18-20).
- E oo mai le alofa o le Atua ia i tatou e ala mai i le Togiola (tagai 1 Timoteo 1:12-17; tagai fo’i MFF 29:1)
- O le liliuese o tagata taitoatasi o se tasi lea o faailoga o aso mulimuli (tagai 1 Timoteo 4:1-15; tagai fo’i 2 Nifae 27:1-2; MFF 112:23-24)
- O le Au Paia e i ai le tiute o le tausii o e matitiva ma le tagolima (tagai 1 Timoteo 5:1-16; tagai fo’i i le Iakopo 1:27; Iakopo 2:19).
- E le tatau ona tuuina atu lo tatou faatuatusa i oa o le lalolagi, “aua o le mana’o i le tupe o le pogai lea o mea leaga uma lava” (1 Timoteo 6:1-19; tagai fo’i i le MFF6:7).

Fautuaga mo le Aoao Atu

Filifili mai i aitia nei pe faaaogaina ni au lava, a o e saunia lesona mo le 1 Timoteo 1-6.

1 Timoteo 1:3-7, 18-20. O le matafaioi a taitai o le Ekalesia o le faamautinoaina lea o loo aoaoina ia mataupu faavae moni o le Ekalesia i le Au Paia. (25-30 minutes)

Faaali atu i le vasega ia ni pine o se autu faafitafita (fitafita, taua, auupega) pe o se lipine o se pese faafitafita. Faitau le MFF 35:13-14 ma fesili:

- O le a le faia a lenei mau ma le ata (musika)?
- Aisea i lou lava manatu ua faaaogaina ai e le Alii ia mea faafoliga i autau i lenei mau?
- Faitau 1 Timoteo 1:18-19. E faapefea ona faatusatusa le faia o le galuega a le Alii ma le alu i le taua?
- Faitau le MFF 76:28-29. O ai le fili?
- O ai ua ia faasagatau i ai?
- O le a le ituaiga taua o loo tatou tau ai nei?

- Faamalamalama, i le vaitaimi o Paulo sa faifai malie lava ona aafia le Ekalesia le liliuese. Na lapata'i atu Paulo ia faaeteete i faiaoga pepelo o loo latou aoaoina ia mataupu faavae sese e faavae i tala faafagogo faa-Iutaia e le moni ma ua suia ai le uiga moni (tagai Tito 1:14), ma e to'atele i latou na talitonu i ai.

Tuu atu ia tofu le vasega ma se fasi pepa ma fai atu i ai e faafoliga o loo tusia se tusi i sana uo ua amata ona talitonu i mataupu faavae sese. Ia latou faaogaina le mataupu faavae i le 1 Timoteo 1:3-7 ma le 4:1-7 i le fautuaina o a latou uo. Ia ao pepa ma faitau nisi i le vasega. Fesili:

- Aisea e taua ai i taitai o le Ekalesia ona mautinoaina o loo aoaoina ia mataupu faavae moni?
- O a mea e mafai ona faia e o tatou taitai e fesoasoani ai ia i tatou i le aoaoina o mataupu faavae moni.?

Ia tuuina atu le fautuaga lenei a Elder M. Russell Ballard:

“O i latou e aoao atu e tatau ona latou mautinoa o loo tumau le mama atoatoa o mataupu faavae o loo aoaoina atu. Aoao atu i le Agaga, ma le faaogaina o tusitusiga paia ma isi mea ua uma ona faamaonia ma faatagaina. Aua ne'i talanoaina pe aoaoina ni mea e leai se faavae mautu pe le mautinoa foi. I le lalolagi e tumu i le agasala, fevaevaeiga, ma le mautonu, tatou te mauaina le filemu ma le saogalemu i le iloaina ma le ola i mea moni ua faaalua o le talalelei. (*Liahona*, Ianuari 1994, 77).

Fesili:

- Aisea i le tele o taimi e saunoa mai ai o tatou perofeta i le aoaoina o tusitusiga paia i aso ta'itasi?
- E faapefea i le aoaoina o mataupu faavae o loo aoaoina i tusitusiga paia ona puipuia i tatou mai i aoaoga sese o loo taatele nei i le lalolagi?

1 Timoteo 1:12-17. E faaalua le alofa o le Atua ia i tatou e ala mai i le Togiola. (10-15 minute)



Faaali i le vasega se fua pauna. Ia tusia i luga o ni tama'i poloka ia upu nei, tulafono, agasala, ma le faasalaga. Tuu uma poloka i le isi itu o le fua. (A leai se fua, ia tusia se fua i luga o le laupapa ma tusia ia ata o poloka i se itu e tasi o le fua ma fesili i le vasega pe o le a le mea o le a tupu i le fua). Tusia le upu pulea ma le amiotonu i luga o le laupapa ma faamalamalama atu o se tasi nei o uiga o le Tama oi le Lagi. Fesili i le vasega:

- Afai o le fua lenei o se faataitaiga o lou faamasinoga mulimuli, faamata e faapefea ona e aafia i le pule ma le amiotonu a le Tama oi le Lagi?
- Faamata e talafeagai?

Tusia le upu *Togiola* i se piliki ma tuu i le isi itu o le fua seia masani le fua i le isi itu. (Afai o e faaogaina se ata, fesili i le vasega pe o le a le mea o le a tupu i le fua.) Fesili: O le a le mea e aoao mai i lenei faataitaiga e uiga i le malosi ma le faamoemoe e tuuina mai e Iesu Keriso ia i tatou? Tusi le upu *Alofa Mutimutivale* i luga o le laupapa ma faamalamalama atu e tasi fo'i lea o uiga o le Atua. Faitau Galuega 9:1-5 ma fesili:

- E faapefea ona le fetau le fua pauna a Paulo a o malaga atu i le auala i Tamaseko.?
- O le a sou lagona pe ana fai o oe lea o Paulo? Aisea?

Faitau le 1 Timoteo 1:12-17 ma mata'ituina le auala na maua ai e Paulo le alofa. Fesili: O le a le mea tatou te manaomia ai le alofa? Faitau e le vasega le Alema 5:32-33 ma mata'ituina pe faapefea ona tatou mauaina le alofa. Faitau 1 Timoteo 2:3-6 ma le faaliliuga a Iosefa Samita o le 1 Timoteo 2:4. Molimau atu i le tele o le alofa mutimutivale e oo mai ia i tatou e ala mai i le Togiola a Iesu Keriso pe a tatou salamo.

1 Timoteo 2:9-15. O tagata o le Ekalesia e tatau ona avea ma faataitaiga o le talalelei a Iesu Keriso. (10-15 minute)

Tufa atu ni fasi pepa i le vasega. Ia tusia e tama'ita'i ia uiga mama latou te moomia i alii talavou o le Ekalesia. Ia faapea fo'i ona faia e alii mo tama'ita'i. Ia fetufaa'i ia o latou lagona ma talanoaina i le vasega.

Faitau 1 Timoteo 2:9-15 ma mata'ituina ia uiga na ta'u mai e Paulo e tatau ona i ai i tama'ita'i o le Ekalesia. Ia faatusatusa le lisi a Paulo i le lisi a alii.

Faitau 1 Timoteo 3:1-7 ma mata'ituina ia uiga na aoaoina e Paulo e tatau ona i ai i se epikopo. Faatusatusa le lisi lenei ma le lisi a tama'ita'i. Atonu o le a e manao e faamalamalama atu e ui ina talanoa mai ia Paulo i epikopo, ae o le tele lava o nei uiga e mana'omia e le Alii ina ia atinae e tama tane uma. Fesili:

- O ai e ese mai le Alii e faatauaina nei uiga?
- E faapefea i nei uiga ona faatusatusa atu i uiga ua faatauaina e le lalolagi?
- O a mea e mafai ona tatou faia e atina'eina ai ia nei uiga.?

1 Timoteo 5:3–16; 6:1–19. E le tatau ona tatou faalagolago i oa a le lalolagi, “aua o le mana’o i le tupe o le pogai lea o mea leaga uma lava.”
(25–30 minute)

Faaali atu i le vasega ia se faaputuga tupe taalo. Fesili:

- O le a lau mea o le a fai pe afai e te mauaina lenei tupe i se masina? vaiaso? aso? itula?
- E to’afia outou o loo faamoemoe e fia mauoa i se aso? Aisea?
- O le a le leaga o le mauaina o tele o le tupe?

Faitau Iakopo 2:18–19 ma mata’ituina ia aoaoga a le Alii e uiga i oa. Fesili:

- O a tuutuuga ua tuuina mai e le Alii i le mauaina o le oa?
- O le a le mea silisili tatou te sailia nai lo se isi lava mea? (tagai Mataio 6:33).
- O le a le taua o lenei fautuaga?

Faitau 1 Timoteo 6:10–12 ma mata’ituina ia lapataiga a Paulo. Fesili:

- O le a le leaga o le oa?
- O le a le mea e tatau ona tatou sailia i lenei olaga?
- Afai ua tatou mauaina ni oa e tusa ai ma le fautuaga a le Alii i le Iakopo 2, e faapefea ona tatou faaaogaina.?

Su’e le 1 Timoteo 5:8–10 ma su’e e le vasega po o ai o loo finagalo le Alii tatou te tausia. Fesili: Aisea e taua ai le tausia i fafine ua leai ni ta’ito’alua ma o latou aiga? Su’e i le Esekielu 16:49 ma fesili: O a mafuaaga na faatamaia ai Sotoma ma Komora? Faitau le Iakopo 1:27 ma mata’ituina pe faapefea e Iakopo ona faamatalaina i latou e amio atua. Talanoaina pe o le a le sootaga o lenei mataupu faavae ma aoaoga a Paulo i le 1 Timoteo 5.

Faitau 1 Timoteo 6:17–19 ma maitauina ia tuutuuga e ono na tuuina atu e Paulo i le Au Paia mauoa. Tusia i luga o le laupapa ma talanoaina. Fesili:

- O a faamanuiaga e oo mai ia i latou e tausia ia tuutuuga e ono o loo tusia i luga o le laupapa?
- O afea e maua ai nei faamanuiaga?

Tusi le fuaiupu lenei i luga o le laupapa: *E ese lava le mauoa, ae ese fo’i le mauoa i le ala a le Alii.* Fesili i le vasega po o le a le uiga o le mauoa i le ala a le Alii. Faitau faatasi ma le vasega le MFF 6:7. Fesili:

- O le a le eseese o le mauoa i le ala a le Alii ma le mauoa faalelalolagi?
- Faamata aisea o le a manao ai se tagata i oa a le Alii ae lē o oa faalelalolagi?

O LE TUSI E LUA A LE APOSETOLO O PAULO IA TIMOTEO

O lenei tusi na
tusila lava i le taimi
lenei.

Malaga faafaifeautalal muamua (Galuega 13–14)	Malaga faafaifeautalal lona lua (Galuega 15:36–18:22)	Malaga faafaifeautalal lona tolu (Galuega 18:23–21:15)	Faafalelepuipui i Kaisareia ma Roma (Galuega 21:16–28:31)	E oo i le faafalelepuipui lona lua i Roma
--	--	---	--	---

Pe tusa 47–50 50–53 53–57 57–62 62–65
o le T.A.

Tusitala ma E o loo Tusi i Ai: O le tusi 2 Timoteo sa faatuatusi e Paulo “ia Timoteo, lona atalii pele.” (2 Timoteo 1:2; tagai f. 1)

Talaaga Faasolopito: Na faamae’aina le talaiga a Paulo i Roma. O le tolusefulu tausaga o le auunaga ma le malosi o se aposetolo a le Alii o Iesu Keriso na suia ai ia Saulo o Taso ia Paulo o se e mauaina le “pale o le amiotonu” (tagai 2 Timoteo 4:6–8). O le falepuipuiina lona lua sa faigata (tagai 2 Timoteo 2:9) O ana uo ua sosola ese ma o i si ua fultua ia te ia; vagana ai ia Luka, na faalagolago ia Paulo ia Timoteo, ma tumau i le faamaoni (tagai 2 Timoteo 4:10–11). E ui i ia mafatiaga, sa tumau pea Paulo i le faatuatusi ma le loto tele se’i oo i le faai’uga. Ina ua molia o ia i ni moliaga ma ni faasalaga, sa ia folafola atu, “Ua ou tau le taua lelei, ua i’u ia te a’u le tausinioga, ua ou taofi i le upu o le faatuatusi (2 Timoteo 4:7). Na ia tusia lenei tusi ae ua lata mai le taimi na faasalaina ai o ia i le oti pe tusa ma le T.A. 65

Autu: Na tusia faapito e Paulo le 2 Timoteo e tuuina atu ai ni faatonuga ile faatuatusi i se atalii e sili ia te ia. O lenei tusi na o mea lelei o loo tusia ai e ui i le tulaga faigata sa ia Paulo. Na ia faamalosi ia Timoteo e faatuatusi, faamanatu atu ia te ia ia faamanuiaga e faavavau e oo mai i le “fitafita lelei a Iesu Keriso” (2 Timoteo 2:3, ma toe lapatai atu ai i le oo mai o mataupu faavae sese. Na tusia e tatou te mauaina le faaolataga e faavavau e ala ma i le alofa tunoa o le Atua ma le faaogaina o mataupu faavae moni o loo aoao mai i tusitusiga paia ma perofeta soifua (tagai 2 Timoteo 3:13–17; 4:1–2).

2 Timoteo 1–4

Faatomuaga

A lata atu tagata i le oti, ona suia ai fo’i lea o o latou lagona i le mea e sili ona taua. Ona o lenei mea, tatou te mata’ituina ai upu mulimuli a le tagata. O le tusi 2 Timoteo o faamaumaga ia o upu mulimuli a Paulo, a’o faamalumu mai lona maliu. O nei toe upu o se talatuu mulimuli lea, o le oototoga o mea na ia faia ma lona atamai. Sa lapatai mai Paulo e uiga i tulaga mata’utia e pei foi o mea ua tatou feagai i nei aso. Faitau 2 Timoteo ma mata’ituina i aoaoga e uiga i auala e taulimaina ai le oti faapea foi ma fautuaga mulimuli a Paulo e uiga i le

faataunuuna ma le atoatoa o lau malaga i lenei olaga ma mauaina se fiafia loloto e pei ona folafolaina mai e le Faola (tagai Ioane 16:24).

Ia suesue ma le agaga tatalo le 2 Timoteo 1–4 ma manatunatu i mataupu faavae nei ae le’i saunia au lesona.

O ni Mataupu Faavae Tava o le Talalelei e te Sailia

- Na filifilia i tatou ae tatou te le’i o mai i le laueleele mo le faataunuuna o tiute na tuuina mai e le Alii (tagai 2 Timoteo 1:8–11; tagai fo’i Aperaamo 3:22–23).
- O le olaga e faavavau ua folafolaina atu ia i latou o e ola i le talalelei ma tumau e oo i le faai’uga (tagai 2 Timoteo 2:1–10; 4:1–8; tagai fo’i 1 Nifae 22:31; MFF 14:7).
- Ua faailoaina mai e tusitusiga paia mea leaga o nei ona po ma taiala i tatou i le faaolataga. (tagai 2 Timoteo 3:1–17; tagai fo’i Iosefa Samita—Mataio 1:37).

Fautuaga mo le Aoao Atu

Filifili mai i aitia nei pe faaogaina ni au lava, a o e saunia lesona mo 2 Timoteo 1–4.



2 Timoteo 1–4. O le olaga e faavavau ua folafolaina atu i e e ola i le talalelei ma tumau e oo i le iuga. (25–30 minute)

Vaevae le vasega i ni vaega se tolu ma tuuina atu i ai ia mataupu taitasi mai i mataupu nei. 2 Timoteo 1; 2; 4. Ia latou aoaoina a latou mataupu ua tofia ai, faatasi ai ma le Galuega 20:28–31 ma le 2 Tesalonia 2:1–3 ma saili ni faailoga e faamaonia ai le liliuese mai o le Ekalesia mai le mea moni i le vaitaimi o Paulo. Ia lipoti mai mea na latou maua ma talanoaina i le vasega. Fesili:

- O a ni faailoga na tuuina mai e Paulo e iloa ai o le a tulai mai se liliuese lautele?
- O afea o le a tupu ai?
- O a ni faailoga e mafai ona e tuuina mai, e ui ona o le liliuese nisi i lo tatou vaitaimi, o le a le avea lea ma mea o le a toe aveesea ai le Ekalesia mai le fogaeleele?

Tusi le *O le Ekalesia o Aso e Gata Ai* i luga o le laupapa. I lalo ifo, tusi ai le *Tanielu 2:44–45* ma le *Mataupu Faavae ma Feagaiga* 65:2–6. I faitau e vaega taitasi ia mau nei ma mata’ituina po o a valoaga o loo latou valoia mo i tatou i aso nei. Fesili: E i ai se faamoemoe mo i tatou? Talanoaina pe faapefea ona tatou fesoasoani e faataunuuna nei valoaga. Faitau e se tasi o le vasega ia le saunoaga lenei a Peresitene Gordon B. Hinckley:

“O loo i ai a nisi, e lē toaitiiti, o loo faitio ma faatu’iese, o e e liliuese ma faasagatau i lenei galuega. E i ai pea lava pea. Latou te tautalatala i o latou lava manatu a o latou savalia lenei olaga, ona lē pine ai foi lea ae mou atu. Ou te manatu atonu o le a i ai pea nei mea a o tatou taumafai e faaunuunuina le galuega a le Alii. O i latou e faamaoni, latou te iloaia le mea moni ma le mea le sa’o. Tatou te o atu i luma, ma savavali pei o ni fitafita ma a tatou fu’a ua tusia ai le mea moni e faavavau. O le tatou mataupu e i ai le faamalosi mo le mea moni ma le ta’uleleia. O i tatou o ni fitafita Kerisiano ‘ia tau le taua, ma Lona satauro i o tatou luma’ (“Savali i Luma le Autau Kerisiano, *Viiga*, nu. 153).

“O mea uma tatou te feoa’i ai, tatou te vaaia le malosi i lenei galuega. O loo i ai le naunautaga malosi i soo se mea o faatulagaina ai. O le galuega a le Faaola. O le talalelei o le upumoni. O se mea e fafia ma sagisagi atu i ai” (*Liahona*, Iulai 1996, 83).

Fesili: Aisea e mafai ai ona tatou mauaina se faamoemoe mo le Ekalesia i ona po nei.? Tusi i luga o le laupapa le faamatalaga lenei a Peresitene a Uilifoti Uutilafi:

“E le mafai lava ona faatagaina e le Alii a’u po o se isi tagata e avea ma Peresitene o lenei Ekalesia na te taitai sese ina outou” (“Fuaitau mai i ni saunoaga se tolu a Peresitene Uilifoti Uutilafi e uiga i le Manifesto,” ina ua mae’a le Ta’utinoga Tonu 1 i le Mataupu Faavae ma Feagaiga).

E tusa ai ma lenei faamatalaga, o a nisi mea tatou te faia e faafoia ai le liliuese? Faitau 2 Timoteo 4:7–8 ma molimau atu afai tatou te tutu malosi ma le faamaoni o le a faai’uina fo’i o tatou olaga ma le mautinoa atoatoa e pei lava o Paulo.



2 Timoteo 3:1–5, 16–17 (Mau Tauloto). Ua faailoaina mai e tusitusiga paia mea leaga o nei ona po ma taiala i tatou i le faaolataga
(15–20 minute)

Fesili i le vasega.

- E to’afia outou ua mauaina ni tui puipua mai i faama’i?
- E mafai ona e manatua lagona na e oo i ai?
- Faamata ua aoga le tiga? Aisea?
- O a ni mea e tutupu mai pe a fai e le faia ou tui puipua?

Faitau 2 Timoteo 3:1–5 ma fesili:

- O a ituaiga faama’i o loo taua?
- Mata e faapefea ona sili atu le matuia nai lo le ma’i pipili po o le tanesusu?

Faamalalama atu na valoia e Paulo o le faama’i faaleagaga o le a faatama’ia ai alalafaga i aso e gata ai. Fesili: Afai e mafai ona fai sou tui puipua mo nei faama’i faaleagaga, faamata o se a se tau o le a loto malie e totogi? Aisea? Faitau 2 Timoteo 3:15 ma mata’ituina ni fofo mo mea leaga o o tatou aso. Fesili:

- O le a le mea ua tuuina mai e le Alii e fesoasoani i le puipua o tatou mai i faama’i faaleagaga?
- E faapefea i tusitusiga paia ona fesoasoani e puipua i tatou mai nei ma’i?

Faitau 2 Timoteo 3:16–17 ma mata’ituina ia auala e fesoasoani mai ai ia tusitusiga paia ia i tatou i le faasagatau atu lea i faama’i faaleagaga. Faatusatusa ia fuaiupu nei ma le 2 Timoteo 3:1–5, ma talanoaina pe faapefea e tusitusiga paia ona puipua tatou mai i faama’i faaleagaga ta’itasi o loo ta’ua?

Faitau le faamatalaga lenei a Elder Boyd K. Packer:

“Na aoao mai ia Paulo, o le malamalamaaga i tusitusiga paia o lo tatou tui puipui lea mai nei mea leaga i aso e gata ai” (*Liahona*, Iulai 1985, 36).

Na faapoopo mai ia Peresitene Ezra Taft Benson e faapea:

“O le tali lenei i le lu’i mata’utia mo o tatou taimi. O le upu a le Atua pei ona mauaina i tusitusiga paia, i upu a perofeta soifua, i faaaliga a tagata taitoatasi, e i ai le pule e faamalosi ai le Au Paia ma faaauppegaina i latou i le Agaga ina ia mafai ona latou tetee atu i le leaga, tumau ma le maumaututu mo le lelei, ma maua ai le fafia i lenei olaga” (“O Le Mana o le Upu,” *Liahona*, Iulai 1986, 101).

Ia uuna’ia ia tagata o vasega ina ia faaaauu pea a latou aoaoga ma su’esuega i tusitusiga paia ina ia mafai ona faamalolosia e tetee atu i mea leaga o loo siomia ai i latou.

O LE TUSI A PAULO IA TITO

O lenei Tusi na
tusia lava i le taimi
lenei

O le malaga faafaifeautalai muamua (Galuega 13–14)	O le malaga faafaifeautalai lona lua (Galuega 15:36–18:22)	O le malaga faafaifeautalai lona tolu (Galuega 18:23–21:15)	Falepuipuiina i Kaisareia ma Roma (Galuega 21:16–28:31)	E oo atu i le faafalepuipuiina faalua i Roma
--	--	---	---	--

Pe tusa o le T.A. 47–50 50–53 53–57 57–62 62–65

Tusitala ma E o loo Tusi i Ai: O Tito o se tagata Eleni na liliu ma o ia o se tagata faatuatua sa galulue ma Paulo i le talaiina o le talalelei ma le faatulagaina o le Ekalesia (tagai Kalatia 2:3; 2 Korinito 8:16–23). O le tusi a Tito na tusia e Paulo (tagai Tito 1:1) ma sa faatuatusi “ia Tito, o lo’u lava atalii i la le faatuatua” (f. 4).

Talaaga Faasolopito: I se vaitaimi e le’i leva ona alu ese mai i le taimi muamua na falepuipui ai i Roma, na asia ai e Paulo ia Tito i le nuu o Kereta. Sa le’i mafai ona nofo ia Paulo i le nuu ona ia tuuina ai lea o Tito iina e faatulaga le Ekalesia (tagai Tito 1:5). O le tusi a Paulo mo se faamalosiaga ma se uuna’iga o Tito, tuuina atu o faatonuga faapitoa e uiga i tiute o i latou o le a galulue i le Ekalesia. Sa lapata’ia faapitoa e le Aposetolo ia Tito e mataala i faifeau pepelo atoa ai ma mataupu faavae sese. Sa ia logoina fo’i e uiga i amioaga e tatau ai mo i latou ua valaauina i le taitaiga faaleperisitua. O lenei tusi na tusia pe tusa o le T.A. 64 (tagai *Taiala i Tusitusiga Paia*, “Tusi a Paulo.”)

Autu: E pei o Timoteo, e faigata fo’i le galuega na tuuina atu ia Tito. O le lu’i sili na faafeagai ma ia ma taitai fou o le a ia tofia, o le taumafaiga lea ina ia mama ma atoatoa pea ia mataupu faavae i tagata fou o le Ekalesia. E pei o isi fo’i faalapotopotoga o le Au Paia, o le paranesi i Kereta ua tumu ai ia le tele o faiaoga ma mataupu faavae pepelo ma le sese. (tagai Tito 1:14; 3:9–11). O nisi o i latou ua le “taupulea...ma aoaoina mea e le tatau ona aoaoina, aua ua latou matape’ape’a i oloa.” (Tito 1:10–11). Na uuna’ia e Paulo ia Tito ia mataala i le lagolagoina o le faatuatua (tagai Tito 1:13–16; 2:15), ma tofia ia ni taitai malolosi ma talafeagai (tagai Tito 1:1–9), ma aoao le Au Paia i le ala o le faaolataga (tagai Tito 2:11–3:8).

Tito 1–3

Faatomuaga

Na tusia e Elder Bruce R. McConkie faapea: “O Tito o le tusi o le ususita’i. Na tusia ina ua toeaia Paulo, ma sa matua faamalosiaga pea o ia e le Agaga e faufautua atu i lana pele o Tito, ma e ala atu ia te ia le mana’oga e savavali i ala o le mea moni ma le amiotonu....

“O Tito o loo tusia foi mo le Au Paia. O se lauga o lapataiga aoga mo i latou o loo i ai i le lafu, o se faautautaga e taulima ai faafitauli o le olaga nei e aunoa ma le avea ai o ni o le lalolagi” (*Doctrinal New Testament Commentary*. 3:119).

Ia suesue ma le agaga tatalo le Tito 1–3 ma manatunatu i mataupu faavae nei ae le’i saunia au lesona.

O Nisi Mataupu Faavae Tava o le Talalelei e Saili Iai

- I le mua’i olaga na folafola mai ai e le Atua ia le ola e faavavau i e o le a faamaoni i le olaga faaletino (tagai Tito 1:1–3).
- O lo tatou faafitia o amioaga lē mama ma tuinanau o le lalolagi e taitai atu ai i tatou i leAlii (tagai Tito 2:1–15; tagai foi Moronae 10:32).
- O le alofa mutimutivale o le Atua, e mafai ai ona tatou maua le ola e faavavau i le papatisoina lea ma le faia pea o galuega lelei (tagai Tito 2:11–3:8; tagai fo’i Alema 12:33–34).

Fautuaga mo le Aoao Atu

Filifili mai i aitia nei, pe faaogaina ni au lava, a o e saunia ia lesona mo Tito 1–3.

Tito 2:11–3:8. O le alofa mutimutivale o le Atua e mafai ai ona tatou maua le ola e faavavau i le papatisoina lea ma faia pea galuega lelei.

(20–25 minute)

Faaali se laau toto e ola. Tusi upu *vai* ma le *malamalama* i luga o le laupapa. Fesili:

- O le fea o nei mea e mafai ona ola le laau pe a lē i ai?
- O le a le mea e tupu pe afai e misi le tasi?

Tusi i luga o le laupapa le *faatuatua ia Iesu Keriso* ma le *usitai i poloaiga a le Atua (galuega)*. Fesili:

- O lē fea o nei mea e manaomia mo le ola faavavau?
- E mafai faapefea ona tatou faatusatusaina nei mataupu faavae i mea e manaomia e se laau?

Faitau le Tito 1:16; 2:7, 14, 3:8, 14 e saili ai le mataupu faavae na faamamafaina e Paulo. Fesili:

- O a galuega lelei?
- E mafai faapefea ona fesoasoani ia i tatou e toe foi atu i le Tama Faalelagi?
- Faitau le Tito 3:3–5 ma fesili:
- Pe ogatusa ea nei fuaiupu pe lē ogatusa foi ma fuaiupu muamua sa tatou aoao ai e uiga i galuega?
- Pe na tetee ea Paulo ia te ia lava? Aisea na feteenai ai pe le’i feteenai ai?

- O le a sou manatu o le a le uiga o le tala a Paulo? (O galuega ma le alofa e o faatasi.)

Faitau le saunoaga lenei a Elder Dallin H. Oaks:

Matou te tautino atu o le mama mai agasala e ala i le Togiola a Keriso, e faalagolago i le faatuatua o le tagata agasala, lea e tataua ona faaalua e ala i le usiusitai i le poloaiga a le Alii ina ia salamo, papatiso, ma maua le Agaga Paia (tagai Galuega 2:37–38). . . .

“Na aoao mai e Nifae, ‘. . . aua ua matou iloa e faaolaina i tatou i le alofa tunoa pe a uma ona faia mea uma tatou te mafaia’ (2 Nifae 25:23). Ma o le a le uiga o ‘mea uma tatou te mafaia’? E moni lava o loo aofia ai ma le salamo (tagai Alema 24:11) ma le papatisoga, tausia o poloaiga, ma le tumau e oo i le iuga” (*Liahona*, Iulai 1998, 55–56).

Ia faitau e le vasega le Tito 3:4–8. Ona latou tusia lea o se tusi i se uo lē lotu [soo se igoa lava tau ina faataitai ai] e faamatala i ai le mafuaaga e talitonu ai le Au Paia o Aso e Gata Ai e manaomia uma le alofa tunoa o Iesu Keriso ma a tatou galuega lelei mo le faolataga.

Tito 2:1–15. O lo tatou faafitia o amioga lē mama ma tuinanau o le lalolagi e taitai atu ai i tatou i le Alii. (15–20 minute)

Talanoaina ma le vasega le aafiaga o isi ona o se tagata e faitio ma maitaita. Fesili: Aisea e lē logolelei ai le faatasi ma ia ituaiga tagata? Faitau le Tito 1:10–14 ma faamatala tagata na soifua faatasi ma Tito. Fesili:

- O le a sou manatu o le a se tulaga na oo ia Tito i le aoaoina atu lea o le talalelei i nei tagata?
- Mata o le a se tulaga o le aveai ai ma o latou taitai o le perisitua?

- O le a le taua o le faauo ia i latou?
- Mata e faapefea ona e faia?

Faitau le Tito 3:10–11 ma saili le fautuaga a Paulo ma fesili:

- O le a le uiga o le “teena” lea na ta’ua e Paulo?
- Pe na i ai ea se taimi na tataua ai ona tatou teena se mafutaga ma se tagata? Anafea? Aisea? (faatusatusa i le Kalatia 6:1).

Tufa ni pepa i le vasega ona fai lea i ai e tusi ni koluma se fa. Ia latou faitauina faatopetope le Tito 2: 2–6 ma saili vaega e fa o tagata na tuuina atu i ai e Paulo “mataupu e ola ai” (f. 1). Fai i le vasega e faaoga nei vaega o ni ulutala o koluma. Ona latou faitauina lea ma le faaeteete o fuaiupu 1–8 ma lisi i koluma ia fautuaga na manao Paulo ia maua e vaega taitasi. Ia valaaulia i latou e manatunatu loloto i fautuaga na tuuina mai ma mafaufau pe faapefea ona fetui foi mo i latou. Faamatala atonu e le mafai ona tatou suia le tele o tagata o loo siomia ai i tatou, peitai, e mafai ona tatou teena faatosinaga faalelalolagi ma faaleleia i tatou lava. Faitau le Tito 2:11–15 ma saili mea e mafai ona tatou faia e suia ai i tatou lava. Fesili:

- O le a le mea na faia e le Faaola ua mafai ai ona tatou sui?
- O a faamanuiaga e maua e i latou e galulue mo le suiga o o latou olaga?

O LE TUSI A PAULO IA FILEMONI

O lenei Tusi na
tusia lava i le taimi
lenei

O le malaga faafaifeautalai muamua (Galuega 13–14)	O le malaga faafaifeautalai lona lua (Galuega 15:36–18:22)	O le malaga faafaifeautalai lona tolu (Galuega 18:23–21:15)	Faafalepuipuiina i Kaisaraia ma Roma (Galuega 21:16–28:31)	E oo atu i le faafalepuipuiina lona lua i Roma
--	--	---	--	--

Pe tusa o le T.A. 47–50 50–53 53–57 57–62 62–65

Tusitala ma E o Loo Tusi i Ai: Na tusia e Paulo le tusi a Filemoni i le taimi o lona faafalepuipuiina muamua i Roma. O loo faatuatusi lenei tusi ia Filemoni, o se tagata o le Ekalesia ma le matai o le pologa e igoa ia Onesemo, o se tasi o tagata na faaliliuina mai e Paulo (tagai Filemoni 1:1–10).

Talaaga Faasolopito: O Filemoni o se tagatanuu o Kolose ma atonu foi o ia o se tasi o tagata na faaliliu mai e Paulo (tagai Filemoni 1:19–20). O ia o se tagata sagisagi o le ekalesia, ma sa ia tuuina atu ma le lima foai lona fale ma ana mea e faaoga e le Ekalesia (tagai Filemoni 1:2–5). Sa faamanino atu e Paulo i lenei tusi se manatu e tuu ia Onesemo—le pologa a Filemoni na sola—la te nonofo, aua o ia o se uo aoga. Peitai, e le mafai ona faia e Paulo, talu ai o le taulealea pologa ua liliu mai, o se meatotino a se tasi tagata. O le faasalaga mo se pologa e sola o le oti. Sa tauanau atu e Paulo ia Filemoni ina ia ona talia Onesemo e faapei ona ia taliaina Paulo (tagai Filemoni 1:12–19).

Autu: Sa manao Paulo i le tagata ia faatoa faaliliu mai e toe foi i le fale ma faalelei ma lona matai. Na ia tusia lenei tusi e faatoga atu ai mo lea mea, ma le faamoemoe o le a toe taliaina Onesemo e Filemoni i lona alofa tunoa. E ui o le toe foi atu i lona matai, o le a na le maua ai lona saolotoga fou mai le nofo pologa, ae ua mauaina e Onesemo se isi saolotoga e na o le talalelei a Iesu Keriso e maua ai (tagai Filemoni 1:10).

Filemoni 1

Faatomuaga

O le tusi a Filemoni o loo aumaia ai se tasi o faamalamalama sili o le uiga o le loto faamagalo ma le salamo lea e mafai ona maua i tusitusiga a Paulo. Ua faamaonia le Aposetolo o se faataitaiga o le alofa faaKeriso ma le agalelei. A o saisaitia i totonu o puipui o le falepuipui, sa faaalina e Paulo ona lagona faamomoloto a o ia faatoga atu mo se taulealea faatauava e leai lava se tasi ua na o Paulo e manao i ai.

Ia suesue ma le agaga tatalo le Filemoni 1 ma manatunatu i mataupu faavae nei a'o le'i saunia au lesonea.

O Nisi Mataupu Faavae Tava o le Talalelei e Saili Iai

- E tatau ona tatou faamagalo atu i isi i lo latou faatausua mai ia te i tatou (tagai Filemoni 1:10–20; tagai foi MFF 64:9–11).
- O le talalelei, e tutusa tagata uma i le silafaga a le Alii (tagai Filemoni 1:15–17; tagai foi Alema 1:26; MFF 88:107).

Fautuaga mo le Aoga Atu

Faaoga aitia nei pe faaoga ni au lava, a o e saunia e aoga atu le Filemoni 1.

Filemoni 1. O le talalelei e tutusa tagata uma i le silafaga a le Alii. (35–40 minute)

Tusi igoa o *Paulo*, *Onesemo*, ma *Filemoni* i luga o le laupapa, ma tusi ai se filifili mamafa.



- O a mea sa faaogaina ai filifili i le talafaasolopito atoa?
- O a mea e faatusa i ai?

Faamatala o igoa o loo i luga o le laupapa o tagata ia na i ai filifili i o latou olaga. Fai i le vasega e faitau faatopetope le Filemoni 1:1–21 ma saili filifili o i latou ia taitoatasi. A latou mauaina tali, ona tusi lea i luga o le laupapa ma talanoaina. (E mafai ona aofia ai le faafalepuipuiina o Paulo, o Onesemo o se pologa, ma Filemoni atonu o se matai e lē maua le loto faamagalo.)

Fetufaa faamatalaga talafeagai mai le faatomuaga o le tusi a Filemoni. Faamatala i le vaitaimi o Filemoni ma Onesemo, o pologa e matua leai se avanoa e tuu i ai e o latou matai. E oo lava i ni nai masei faatauava e masani lava ona faasalaina i faiga aupito sauā. Mafaufau e faitau atu le faamalamalama lenei:

“O le uiga faaalina o le tulafono i tagata pologa sa faaalina lea i se faiga *servile caput nullum jus habet; e leai se aiātatau a le pologa*. E leai se tuaoi o le malos o le matai. E mafai ona ia toesea se vaega o le tino, faataugā, pe fasiotia foi le pologa pe a manao ai o ia [matai]. . . O le sailia o pologa sosola o se galuega. O pologa e toe maua mai e faailoga o latou muauulu, faasalaina i le faaluaina o le mamafa o a latou galuega, ma o nisi taimi e tau'ai ai i manu feai i totonu o le malae o taaloga. E matua tele naua le faitau aofai o pologa. O nisi tagata sa fai a latou pologa e oo atu lava i le luasefulu afe [a latou pologa]” (Marvin R. Vincent, *Word Studies in the New Testament*, 4 vols. [1900–1901], 3:519).

Fesili:

- O le a se mea e mafai lava e Filemoni ona fai i lana auauauna?
- Mata e aofia ai i totonu o lana aiā tatau faalelotu?
- O le a le mea na suia i le olaga o Onesemo na oo atu ai se isi malamalama ese i le tulaga sa i ai? (Ua liliu atu o ia i le talalelei a Iesu Keriso.)

Toe faitau faatasi ma le vasega le Filemoni 1:8–20, ma saili tali mo fesili nei:

- O le a le mataupu faavae o le talalelei na talosagaina e Paulo ia Filemoni e faaoga?
- Aisea e ono faigata ai ia Filemoni ona faamagalalo atu?
- O le a se mea e mafai ona tatou aoaoina mai nei aoaoga?

Fai i le vasega e mafaufau i se taimi na faigata ai ona latou faamagalalo se tasi. Fesili:

- O le a le faigata o le suia o ou uiga faaalua i se tagata? Aisea?
- Na faapefea ona í'u ina mafai ona e suia?
- Faasino igoa o loo i luga o le laupapa ma fesili:
- O le fea o nei tagata e sili ona alofagia e le Atua?
- Faitau le 2 Nifae 26:33. Aisea e faigata ai ona filifili?
- Tatou te iloaina e tofu lava tagata ma tulaga eseese i le olaga, peitai o le a le mea e tutusa ai?
- O le a le mea e faia e le talalelei mo i tatou uma, tusa lava pe o le a le tulaga tatou te i ai i le soifuaga?

Ia tautino atu o le talalelei e faatutusa ai tagata uma. O le mea lena e tatau ai ona tatou ola atili i le taliaina ma fefaapalepalea'i le tasi i le isi.

O LE TUSI A LE APOSETOLO O PAULO I EPERU

Tusitala ma le Aso: Talu mai le tausaga pe tusa ma le T.A. 400, na faapea o le tusi o Eperu i lona sau a’i na tusiaina e Paulo. Ae peitai, e i ai nisi o loo tuufesili pe o Paulo na tusiaina lenei Tusi ona o le ala o loo tusitusia ai ma le gagana e matua esese lava mai i isi tusi a Paulo. I lona tulaga lautele, o loo taliaina e faapea afai e le o Paulo e ana tusitusiga, ae o manatu o a Paulo ia, ona o aoaoga faavae o loo i le Eperu o loo ogatasi ma mea o loo i isi tusi a Paulo.

Ina ua faia e le Perofeta o Iosefa Samita se iloiloga musuia o le Tusi Paia sa le i tuufesili o ia pe o Paulo na tusiaina. Mo se faataitaiga, na aoao mai le Perofeta:

“Na faapea mai Paulo i lana tusi i le au uso i Eperu, na mauaina e Apelu le molimau na amiotonu o ia” (*Teachings of the Prophet Joseph Smith*, 59).


O le aso na tusiaina ai lenei Tusi e le o mautinoa foi. Ae peitai talu ai e le o ta’uina mai e Eperu le faaleagaina o le malumalu, lea na tupu i le 70 T.A., ma o loo faatatau pea i le malumalu i le taimi nei, o loo taumateina ai o lenei tusi na tusiaina ao le i oo i lona taimi. Afai foi o Paulo na tusiaina, atonu na tusiaina ao le i maliu o ia i le tausaga pe tusa ma le 65 T.A.

O E o Loo Tusi i Ai: O lenei Tusi o loo matele atu i aoaoga ma tu o le Feagaiga Tuai. O lea e foliga mai o loo faamoemoe o e o loo tusi atu i ai o tagata Iutaia (Eperu) Kerisiano.

Talaaga Faasolopito: E pei ona sa tatou iloaina i le [tusi o] Galuega ma Tusi ua mae’a ona tatou suesue i ai, sa masani ona i ai ni feeseeseaiga malolosi i le va o tagata Kerisiano o nuu ese ma Iutaia pe e tatau ona mulimuli pe leai foi i tulafono a Mose (tagai Galuega 15). O se tasi mafuaaga na tusiaina ai le tusi o Eperu ina ia uunaia ai tagata Iutaia liliu mai ia tutumau i le faatuatua i le talalelei ma ia aua le toe tepa i tua i ala o le Feagaiga Tuai i o latou olaga.

Ina ua amata ona manino le aveesea o tu faa-Mose i le taulaga togiola a Keriso, na tulai mai ai ni fesili faaleiloga se lua: Afai tatou te taliaina le mea moni e le toe avea le tulafono a Mose ma mea e tausaiaina e le au Kerisiano, o le a la le aoga moni o le Feagaiga Tuai? Ma e tatau faapefea ona faamatalaina pe faaliliuina? Faatasi ai ma ni nai tusitusiga na taliaina, na o le pau tusitusiga paia na mafai ona mauaina e le au Kerisiano i ia uluai vaitaimi o tusitusiga o loo tatou ta’ua nei o le Feagaiga Tuai. O le Feagaiga Fou sa i le tulaga o le sauniuni, ma ina ua mavae le lata i le tolu senituri ae taliaina loa o se vaega faatonuina o tusitusiga paia. O [le tusi o] Eperu poo se vaega foi, e foliga mai na tusiaina ina ia taliaina ai le fesili pe o le a le ala e tausai ai e le au Kerisiano le Feagaiga Tuai ma le tulafono a Mose. O Keriso ma Lana talalelei o le a muai faamuamaina nai lo le tulafono tuai.

E Sili Keriso i Mea Uma



Autu: Na aoao e Paulo le Au Paia i Kolose e ao ina latou “faafetai atu i le Tama” o Lē na auina mai Lona Alo Ulumatua, “ina ia fai o ia ma faasilisili i mea uma lava” (Kolose 1:12–18). O loo faapoo atu le tusi o Eperu i lea mea moni autu o Iesu Keriso, i lalo o le Tama, e silisili i mea uma lava. O lea ua tuuina ai ia te Ia le pule e faataunuuna ai le feagaiga tuai o le tulafono ma tuuina atu ai le feagaiga fou o le talalelei. E pei ona sa tusiaina e se tagata atamai o le Au Paia o Aso e Gata Ai:

“O le Eperu . . . i le Feagaiga Fou ae o le Levitiko i le [Feagaiga] Tuai: O loo faamatalaina mai i le Levitiko ia tu faa-Mose, ae o loo faamalalamaina i le [tusi o] Eperu. I lea tusi, o loo faaalii ai e Paulo le ala na tupu ae ai le talalelei mai le faavae i le tulaga faa-Levitiko. Ona o le malamalamaaga i le talalelei na toefuataiina i ona aso, o loo ia faaalii ai le ala na faamoemoe ai le tulafono faa-Levitiko ina ia sosoina le ala e ui ai i latou o e tigaina i faosoosoga o le olaga faitino e tau atu i le malologa o le Alii.

E leai ni tusi o tusi o le Feagaiga Fou, e aofia ai ma Tala Fiafia, e sili atu ona faaautu ia Keriso nai lo o tusi a Paulo i tagata Eperu. I lea tusi, o loo saili ai Paulo ina ia faailoa atu o Keriso o le faataunuuga lea o le tulafono a Mose. O tulaga faatusa i le tulafono a Mose na faatinoina lea i le taulaga togiola a Iesu le Nasareta” (Joseph Fielding McConkie, “Jesus Christ, Symbolism, and Salvation,” i le Robert L. Millet, *Studies in Scripture: Volume 6, Acts to Revelation* [1987], 192).

Eperu 1–2

Faatomuaga

I le Eperu 1–2 o loo tulaia atu i le tulaga faapitoa o Iesu Keriso i le avea ai ma Alo o le Atua. O Lona mamalu ma le faaeaina

e sili atu nai lo o agelu o le lagi, ae peitai na mafai e Ia ona avea o Ia lava ia “faamaulaloina teisi i agelu” (Eperu 2:9; tagai foi Salamo 8:5). Mafaufau i le uiga o lenei fasi fuaitau ma saili i le Eperu mo aoaoga o loo faapea mai ai e sili Iesu Keriso i mea uma.

Ia suesue ma le agaga tatalo le Eperu 1–2 ma mafaufau i mataupu faavae nei a o le i sauniaina au lesona.

O Nisi Mataupu Faavae Tava o le Talalelei e Saili Iai

- O Iesu Keriso o le Alo e Toatasi na Fanaua ma “ua matua tusa lava” ma le Tama Faalelagi (tagai Eperu 1:1–6; tagai foi Ioane 14:9).
- O Iesu Keriso e sili atu nai lo o agelu o le lagi, ae peitai na finagalo o Ia e tauaveina i Ona lava luga ia tulaga o le olaga faitino ina ia malamalama ai o Ia i o tatou puapuaga ma faaososoga (tagai Eperu 1:4–12; 2:9–18; tagai foi Alema 7:11–13).

Fautuaga mo le Aoao Atu

Filifili mai manatu nei, pe faaaogaina foi nisi o ou lava manatu, ao sauniuni au lesona mo le Eperu 1–2.

Eperu 1–2. O Iesu Keriso “ua matua tusa lava” ma le Tama Faalelagi. E sili o ia nai lo agelu o le lagi, ae peitai na finagalo o Ia e tauave i Ona lava luga tulaga o le olaga faitino ina malamalama o Ia i o tatou puapuaga ma faaososoga.

(35–40 minute)

Ia faatonu ni tamaiti se toatele o le vasega ia aumai i le vasega ni o latou ata o laiti ma ni ata o o latou matua i le tupulaga lava lea e tasi. Ia faapipii i luga ata ma fai pe mafai e isi tamaiti ona faatusatusa ata o matua i ata sa’o o o latou alo.

Ia talanoaina pe o a foliga faaletino na fesoasoani i tamaiti e faatusatusaina ai matua ma fanau.

Ia valaaulia tamaiti e faitau le Eperu 1:1–3 ma vaavaai mo mea o loo aoaoina mai e nei fuaiupu e uiga i foliga faaletino o Iesu Keriso. Ia fesili atu: Afai e mafai ona e vaai i se ata o le Tama Faalelagi ma Iesu Keriso, o a ni mea e tutusa ai o la foliga? Ia talanoaina ma tamaiti isi uiga, e ese mai foliga tutusa faaletino, e mafai ona tatou mauaina mai o tatou matua.

Ia fai atu i tamaiti o le vasega e faitau le Ioane 14:6–10 ma vaavaai mo se mea faapoopo o loo “matua tusa ai lava” Iesu Keriso ma le Tama Faalelagi. Ia valaaulia tamaiti o le vasega e faitau le Eperu 1:6–12, ae ia vaavaai mo uiga, o mana, poo amio a Iesu Keriso e tutusa ma le Tama Faalelagi. Atonu e te manao e lisiina mea nei mai le Eperu 1 i luga o le laupapa:

Fuaiupu 6	O le a tapuai agelu ia te Ia.
Fuaiupu 8	O le a ia te Ia le tootoo o le amiotonu.
Fuaiupu 9	E inoino o Ia i le amioleaga.
Fuaiupu 10	Na Ia faavaeina le lalolagi.
Fuaiupu 12	E tumau pea o Ia e faavavau.

Fai atu i tamaiti o le vasega e faitau le Eperu 2:7, ma ia fesili atu: Talu ai o Iesu Keriso sa avea ma se Atua i le muai olaga, aisea na filifili ai o Ia e sau i le lalolagi ma “faamaulaloina teisi i agelu”? Ia talanoaina manatu o le vasega. Ia faamatala na finagalo Iesu e sau i le lalolagi ina ia faataunuuina le Togiola mo fanau uma a le Tama Faalelag (tagai Eperu 2:9; Filipi 2:5–11; Mosaea 3:5–9). O le finagalo o le Faola ina ia tuua Lona nofoalii i luga, ae avea ma tagata faitino, ma puapuagatia i le maliu i luga o le satauro, ma totogiina agasala a tagata ua ta’ua o le “faamaulalo o le Atua” (1 Nifae 11:26–33).

Ia valaaulia le vasega e faitau le Eperu 2:10–18. Ia fai atu ia i latou e vaavaai mo ni mea o loo molimau mai o le alofa o Keriso mo i tatou ma Lona manao ina ia o tatou maua le avanoa e toe foi atu ai i Lona Tama na uunaia ai o Ia e puapuaga i mea uma na Ia faia. Ia fesili atu:

- O le fea o fuaiupu na pito sili ona faagaetia ai oe? Aisea?
- O le a le lagona e oo atu i le iloa ina talu ai na tigaina o Ia i faaososoga ua mafai teisi ai ona fesoasoani mai o Ia ia i tatou pe a faaososoina i tatou?

Ia fetufaa atu ma tamaiti o le vasega le alofa o loo e lagonaina mo le Faola o Iesu Keriso.

Eperu 3–6

Faatomuaga

I le Eperu 1–2 o loo ta’uina mai ai o Iesu Keriso e sili i agelu. I le Eperu 3–4 o loo faatusatusaina ai Iesu ia Mose, le perofeta, na pito sili ona aloaiaina e tagata Iutaia. I le Eperu 5–6 o loo aoao mai ia i tatou o Keriso, i le avea ai o se faitaulaga sili i le tulaga o le Mekisateko, e sili atu nai lo faitaulaga sili i le tulafono a Mose i le tulaga o le Levitiko. Vaavaai mo aoaoga e uiga i le faatuatua, alofa mutimutivale, alofa tunoa, ma le faatoatoaina.

Ia suesue ma le agaga tatalo le Eperu 3–6 ma mafaufau i mataupu nei ma mafaufau i mataupu faavae nei ao le i sauniaina lau lesona.

O Nisi Mataupu Faavae Tava o le Talalelei e Saili Iai

- O Iesu Keriso e sili atu nai lo se isi lava perofeta (tagai Eperu 3:1–6).
- O i latou o e le faamalo o latou loto i le Faaola o le a ulufale atu i Lona malologa i lenei olaga ma le olaga a sau (tagai Eperu 3:8–19; 4:1–11).
- O le faalogo i le talalelei e faaliliuina mai ai i latou o e e faatuatua (tagai Eperu 4:1–2; tagai foi Alema 32:21–43).
- O loo ofoina mai e le Alii le alofa mutimutivale ma le alofa tunoa ina ia faamamaina ai i tatou ma mafai ai ona tatou o mai ia te Ia (tagai Eperu 4:12–16; tagai foi Eteru 12:27).
- O e ua tuuina i ai le pule e umiaina le perisitua e ao ona valaauina e le Atua e pei o Arona (tagai Eperu 5:1–4; tagai foi Mataupu Faavae o le Faatuatua 1:5).
- E le mafai ona salamo pe togiolaina atalii o le malaia (tagai Eperu 6:4–6; tagai foi MFF 76:30–49).

Fautuaga mo le Aoa Atu

Filifili mai i aitia nei, pe faaoga ni au lava, ao sauniuni au lesona mo le Eperu 3–6.

Eperu 3–4. O i latou o e le faamalo o latou loto i le Faaola o le a ulufale atu i Lona malologa i lenei olaga ma le olaga a sau. (30–35 minute)

Fai atu i se tamaitiiti e fetufaai mai i le vasega se sini taua o loo manao o ia e faataunuaina i lenei olaga. Fesili i le tamaitiiti pe o le a le faigata o le a i ai le faataunuaina o lona sini. Lisi nisi o laasaga atonu e manaomia e ausia ai lona sini, ma talanoaina mea na i le vasega. Fesili i tamaiti:

- O le tiutetauave a ai le ausiaina o lona sini?
- Afai e te le ausiaina mea e manaomia mo lona sini, pe e te manatu e tatau ona e mauaina pea se tau? Aisea pe aisea foi e le mafai ai?

Tusi le fasi fuaitau *ulufale i le malologa o le Alii* i luga o le laupapa. Fai atu i tamaiti e faitau le Eperu 3:8–19 ma vaavaai mo vaega o tagata o e na teenaina le ulufale atu i le malologa o le Alii. Ia fesili atu:

- O le a le mea o loo faatatau atu i ai lenei malologa? (O le atoatoaga o le mamalu o le Atua; tagai MFF 84:24.)
- O a agasala na ala ai ona aveesea lea avanoa mai ia i latou?
- O a agasala na lapatai atu ai Paulo i tagata i ona aso ina ia le toe oo ia i latou le faasalaga lava lea e tasi?
- E te manatu e faapefea ona faaogaina ia i tatou lapataiga o loo i fuaiupu 12–15?

Ia faamatala atu o lē amiotonu e ulufale atu i se tulaga o le malologa ua ta’ua o le parataiso pe a maliliu i latou, ae e mafai foi ona tatou mauaina le malologa o le Alii i lenei olaga. Ia fetufaai atu le saunoaga lenei a Peresitene Iosefa F. Samita:

“O loo saunoa mai perofeta o anamua e uiga i le ‘ulufale atu i le malologa o le Atua’; o le a le uiga o lona mea? I lo’u mafaufau, o lona uiga o le ulufale atu i le malamalama ma le alofa o le Atua, ma maua le faatuatua i lona faamoemoega ma lana fuafuaga, i se tulaga e tatou te iloa ai e sa’o i tatou, ma tatou te le o sailiili mo nisi mea, ma e le faalavelaveina i tatou i le pesi mai o matagi o aoaoga faavae taitasi, po o le faitogafiti ma le pepelo o tagata o e o loo tutu ma faatalitali mai e faaseseina i tatou. . . . O le tagata ua na ausiaina lona tulaga o le faatuatua i le Atua ma ua tuueseina masalosologa uma ma le fefe mai ia te ia, ua ulufale atu o ia i le ‘malologa o le Atua,’. . . . O le malologa mai masalosologa, mai le mata’u, mai le atuatuvaale ona o mea matautia, o le malologa mai fetenaiga faalelotu o le lalolagi” (Aoaoga Faavae o le Talalelei, 58; tagai foi Mataio 11:28–30).

Ia fesili atu:

- Aisea e aoga ai le faataunuaina o le sini o le ulufale i le malologa o le Alii, i lenei olaga ma le olaga a sau?
- O le tiutetauave a ai le ausiaina o lona sini?
- Afai e te le faataunuaina mea o loo manaomia ina ia ulufale ai i le malologa o le Alii, pe e te manatu e tatau ona e mauaina pea lona faamanuiga? Aisea pe aisea foi e le tatau ai?
- Faitau le Eperu 4:1. O le a le mea na faamalosi atu ai Paulo i isi ina ia aua nei faia? (O le le ulufale atu i le malologa o le Atua.)
- O le a sou lagona pe afai e te le ausiaina lenei sini taua?

Fai atu i tamaiti o le vasega e faitau le leoa le Eperu 4:2–12. Valaaulia i latou e makaina fasi fuaitau e lagona e i latou o le a maua ai le malosi ma le taitaiga i le sailia o le malologa o le Alii. Valaaulia tamaiti uma o le vasega ina ia fetufaai ma le vasega ia fasi fuaitau na latou makaina.

Faitau le Eperu 4:14–16. Ia fesoasoani i tamaiti o le vasega ia malamalama e ia Iesu Keriso le mana e fesoasoani ai ia i tatou taitoatasi ia mauaina Lona malologa. Fai i le vasega e faitau le Mataio 11:28–30; Iakopo 1:7–8; Alema 12:34; ma le Mataupu Faavae ma Feagaiga 59:23 ma saili mo auala e mafai ai ona tatou “o mai ai ma le malosi i le nofoalii o le alofa tunoa” ma mauaina le mana o loo ofoina mai e Iesu Keriso. Ia uunaia le vasega ina ia saili le filemu, olioli, ma le malologa e oo mai ia i latou o e o mai ia Keriso.

Eperu 4:12–16. O loo ofoina mai e le Alii ia i tatou le alofa mutimutivale ma le alofa tunoa ina ia faamamaina ai i tatou ma mafai ai ona tatou toe foi atu ia te Ia. (15–20 minute)

Ao le i amataina le vasega ia tusi upu nei o le *alofa mutimutivale* ma le *alofa tunoa* i luga o le laupapa. Ia ta’u atu i le vasega: Faapea ua te’i lava ua avatuina oe i se malo mamao ese atu

e te le i faalogo muamua lava i ai. E lelei ma fiafia tagata, ae peitai ua e iloaina o aso taitasi i le aoauli e moomia ai tagata uma ina ia taofi mea o loo latou fai ae faapotopoto faatasi e iliina le vii o le malo i pu faapitoa. Ina ua maua oe e leai sau pu, ona molia ai lea o oe, ma tuuina atu i luma o le tupu, ma logoina oe o le faasalaga o le oti.

Fesili atu i le vasega: O le a lau tala o le a fai atu i le tupu? Faaali atu i le vasega upu o loo i luga o le laupapa ma fesili atu: O le fea o mea nei e te faamoemoe o le a ofoina atu e le tupu ia te oe, talu ai e te le i iloaina le tulafono?

Fai atu i le vasega: O se laveai sili ia te oe, ua ofoina atu e le tupu ia te oe le alofa mutimutivale ma faamagaloina oe ona o le leai o se foafoa. Faasino le upu *alofa tunoa* o loo i le laupapa. Fesili atu: O le a le eseese o le alofa mutimutivale ma le alofa tunoa? Mo se fesoasoani i le taliina o lenei fesili, faitau faatasi ma le vasega le uiga o le *alofa tunoa* o loo i le *Taiala i Tusitusiga Paia*.

Faitau le Eperu 4:12–16. Ia talanoaina le ala e le gata ina faamagaloina ai i tatou e le Alii pe a tatou salamo, ae o loo fesoasoani foi ia i tatou ia suia o tatou natura ina ia mafai atili ai ona tausia poloaiga. Ia fai ni kopi o fasi fuaitau nei ma tuuina atu i tamaiti o le vasega. Ia iloiloaina mea na i totonu o le vasega ma uunaia le vasega e suesue ma aoao i ai i le fale.

O le *alofa mutimutivale* o le agaga alofa, agamalu, ma le faamagalo atu. O se tasi lea o uiga o le Atua.

O le *alofa tunoa* o le mana lea mai le Atua e mafai ai e i tatou ona mauaina faamanuiaga i le olaga nei ma mauaina le ola e faavavau ma le faaeaina i le olaga a sau. O le mana lea e mafai ai ona suia o tatou natura leaga ma liua o tatou vaivaiga e avea ma malosiaga. O lea fesoasoani paia e tuuina mai e ala i le alofa mutimutivale ma le alofa o le Atua ia i latou o e faatuatua, salamo, ma taumafai ma le naunauta'i e tausia poloaiga (tagai Eteru 12:27; *Taiala i Tusitusiga Paia*, “alofa tunoa”).

Ia fai atu o le alofa mutimutivale ma le alofa tunoa e galulue faatasi mo faamanuiaga ma le faaeaina o le tagata. Afai tatou te faatuatua ia Keriso, ma salamo, o le a tuuina mai e le Tama Faalelagi Lona alofa mutimutivale ma faamagaloina ma faamamaina i tatou (tagai MFF 110:5). E ala i Lona alofa tunoa ua mafai ai ona tatou “tuuese le tagata o le agasala” ma avea ma Au Paia. O nei mea uma e oo mai e ala mai i le Togisala a Iesu Keriso (tagai Mosaea 3:19; Alema 33:8–11). Faitau ma talanoaina le saunoaga lenei a Elder Gene R. Cook, o se tasi o Fitugafulu:

“Masalo o nisi o i tatou e le i mauaina pe le iloaina foi le ala e faaogaina ai le mea alofa sili o le alofa tunoa o le Tama ua tuuina mai ia i tatou e ala i le Togisala o Lona Alo, o Iesu Keriso. . . .

“Sei ou fetufaai atu ma outou ni mataupu faavae se lima atonu e fesoasoani ai ia i tatou ina ia mauaina lena taitaiga paia i o tatou lava olaga. . . .

“O le mataupu muamua o le *faatuatua*. . . .

“O loo molimauina o lenei alofa tunoa, poo le mana e mafai ai, o loo mauaina lea e ala i le faatuatua. Leitioa a avea le faatuatua i le Alii ma mataupu faavae muamua o le talalelei. . . .

“O le *salamo* o le mataupu lona lua lea. O le alofa tunoa o le Alii e ala i le Togisala e mafai ona faamamaina ai a tatou agasala ma fesoasoani ia i tatou i le faaatoatoaina o i tatou lava e ala i o tatou tofotofoga, o ma’i, faapea foi o tatou uiga le lelei. Ua faapaiaina ma faamasinotonuina i tatou e ala i le alofa tunoa o le Alii (tagai MFF 20:30–31). . . .

“O le mataupu lona tolu o le *lotomaulalo*. ‘A ua foai mai e ia le alofa tunoa e sili; o lea ua faapea mai ai, E tetea atu le Atua i e faamaualuga, ae foai mai le alofa tunoa i e faamaualalo’ (Iakopo 4:6). . . .


“O le *faia o mea uma i lou lava malosi* o le mataupu lona fa lea. . . .

“. . . aua ua matou iloaina e faaolaina i tatou i le alofa tunoa pe a uma ona faia mea uma tatou te mafaia’ (2 Nifae 25:23).

“. . . E maeu le matagofie o le mataupu faavae ina ia malamalama i ai: o le fesoasoani lea a le Alii ia i tatou—po o le malosi o lo tatou faatuatua poo le vaivai foi; pe o se alii, poo se tamaitai, poo se tamaitiiti foi—e le faalagolago lea na o mea ua tatou iloa, pe o le a le tele o lo tatou malosi, pe o a foi o tatou tulaga, ae faalagolago tele lea i le *tuuina atu o mea uma e mafai ona tatou tuuina atu ma faia mea uma tatou te mafaia* i tulaga o loo tatou i ai nei. Pe a tuuina atu e le tagata mea uma na te mafaia, ona faia lea e le Alii, e ala i Lona alofa tunoa, e fesoasoani atu ia te ia (tagai MFF 123:17). . . .

“O le mataupu faavae lona lima, o le *tausia o poloaiga*, o se tulaga moni lava e mauaina ai le alofa tunoa o le Alii: ‘Aua afai tou te tausia a’u poloaiga, o le a outou maua i lona atoatoaga, . . . ; o lea. . . , o le a outou maua lea amioga mama i lea amioga mama’ (MFF 93:20; tagai foi 93:28).

“Ina ia maua le alofa tunoa, e le faapea e tatau ona atoatoa se tasi, ae peitai e tatau ona ia taumafai e tausia poloaiga i le silisili na te mafaia ai. Ona tuuina atu ai lea e le Alii ia te ia lena mana (*Liahona*, Iulai 1993, 93–94).

 **Eperu 5:4 (Mau Tauloto). O e ua faatagaina e umiaina le perisitua e tatau ona valaauina e le Atua.** (10–15 minute)

Faali i tamaiti se tusi pasi tipiloma, se tusi pasi faamaonia, po o soo se tusi laisene foi. Ia fesili atu:

- O le a le mea e manaomia ina ia mauaina ai se tasi o mea nei?
- O le a le mea e manaomia ina ia tuuina atu ai se mea faapenei?
- Pe e te fia manao e faia sou taotoga e se fomai e nofo lava ia ma fai sona laisene e aunoa ma sona mauaina o ni aoaoga faafomai?

Ia fai atu i le vasega o le mataupu lava lea e tasi o loo faaaogaina foi i e o loo umiaina le perisitua. Ia fai atu ia i latou e faitau le Eperu 5:1–4 ma vaavaai mo mea e manaomia i se tagata e avea ma se tasi ua faatagaina e umia le perisitua. Ia fai atu ia i latou e faitau le Esoto 28:1 ina ia aoao ai i le ala na valaauina ai Arona. Faitau le saunoaga lenei a Elder Boyd K. Packer:

“E le faaeina atu le perisitua e pei ona tuuina atu o se tipiloma. E le mafai ona tauaoina atu ia te oe i se tusi pasi. E le mafai ona avatuina ia te oe i se savali pe tuuina atu ia te oe i se tusi. E na o le sauniga tonu lava e mafai ona tuuina atu ai. O se tasi ua faatagaina e umiaina le perisitua e tataua ona i ai iina. E ao ona ia faaeina ona lima i luga o lou ulu ma faauuina oe”
(*Liahona*, Aperila 1982, 56).

Ia tau atu ma le mautinoa i le vasega o le pule ma le mana moni o le perisitua o loo maua lea i le Ekalesia a Iesu Keriso o le Au Paia o Aso e Gata Ai.

Eperu 7–10

Faatomuaga

O le Perisitua Mekisateko e maua atu nai lo le Perisitua Levitiko (Eperu 7), ma o le talalelei a Iesu Keriso ma Lana taulaga e maua atu nai lo o le tulafono a Mose (Eperu 8–10). Faitau le Eperu 7–10 e iloa ai pe o a mea o loo aoao mai e uiga ia Mekisateko ma le ala e eseese ai le peristua maua mai le Perisitua Arona poo le Levitiko.

Ia suesue ma le agaga tatalo le Eperu 7–10 ma mafaufau i mataupu nei ao le i saunia au lesonea.

O Nisi Mataupu Faavae Tava o le Talalelei e Saili Iai

- (tagai Eperu 7:11–28; 8:6–13; 9:11–15, 22–28; 10:1–4, 9–22).
- O faitaulaga sili ma taulaga na latou faia i lalo o le tulafono a Mose o ituaiga ma faatusa ia o Iesu Keriso ma Lana Togisala (tagai Eperu 8:3–6; 9:6–28; 10:1–12; tagai foi 2 Nifae 11:4).

- E le mafai ona faolaina i tatou i le toto o manu; e na o le toto lava o Iesu Keriso e mafai ona togiolaina i tatou mai lo tatou tulaga o le pau (tagai Eperu 9:11–28; tagai foi Alema 34:9–15).

Fautuaga mo le Aoao Atu

Filifili mai aitia nei, pe faaoga ni au lava, ao sauni au lesonea mo le Eperu 7–10.

Eperu 7–10. E sili atu Iesu Keriso nai lo Aperamo ma Mekisateko. E sili atu Lana perisitua nai lo le Perisitua faa-Levi. E sili atu Lana taulaga nai taulaga uma o le Feagaiga Tuai. (30–35 minute)

Fesili i tamaiti o le vasega pe o le a le perisitua o loo umiaina e le perofeta, ma tusi le tali i luga o le laupapa. Ia valaaulia tamaiti ia faapuupuua ona fetufoai mai se tala talafeagai e uiga i le faaaogaina o le mana o lona perisitua. Fai atu ia i latou ia faitau le Mataupu Faavae ma Feagaiga 107:2–4 ma vaavaai mo le igoa o lona perisitua ma pe aisea foi ua faaigoaina ai i le igoa o Mekisateko.

Ia faamatala atu, i le Eperu 7–10 na aoao mai Paulo i le maua o le talalelei a Iesu Keriso ma le Perisitua Mekisateko i sauniga uma o le tulafono a Mose. Ia talanoaina fesili nei i totonu o le vasega, ma faaaogaina ai mau fesoasoani ua saunia. (Pe tufaina atu i ai ni kopi i tamaiti o le vasega e galulue ai taitoatasi pe faavaega foi.)

- O ai Mekisateko? (tagai Eperu 7:1–2).
- O ai e maua atu le pule, o Mekisateko poo Aperamo? (tagai Eperu 7:2–4; pe a fesili tamaiti i le uiga o le fuaiupu e 3, ia saili le Faaliliuga a Iosefa Samita o lenei fuaiupu o loo i le *Taiala i Tusitusiga Paia*).
- O le a le perisitua na umia e Iesu Keriso? (tagai Eperu 5:5–6).
- Afai o Iesu Keriso o se faitaulaga i le tulaga o le Mekisateko, e faapefea la ona sili atu o ia nai lo Mekisateko? (tagai FIS, Eperu 7:3).
- O a ala o loo sili ai le Perisitua Mekisateko nai lo le Perisitua Arona poo le Levitiko? (tagai Eperu 7:11–12, 22–25; 3 Nifae 15:8–9).
- E faapefea ona maua atu le feagaiga fou o le talalelei, na puleaina e le Perisitua Mekisateko, nai lo le feagaiga tuai poo le tulafono a Mose, na puleaina e le Perisitua Arona? (tagai Eperu 8:8–13).
- E faapefea e le Togisala a Iesu Keriso, na faataunuaina e le Faitaulaga Sili Maua atu, ona maua atu nai lo taulaga uma na osia e faitaulaga i le Feagaiga Tuai? I se isi faamatalaga, o le a le mea o loo faia e le Togisala a Iesu Keriso e le i mafai ona faia e le tulafono a Mose? (tagai Eperu 9:1–15; Alema 34:10, 13–14).

Eperu 10:9–22. E mafai ona oo mai le faamamaina i le na o le mana lava o le Togisala a Iesu Keriso. (15–20 minute)



Ia faaali atu i tamaiti o le vasega le pagota o loo i le ata lenei (tagai i le faamatalaga o ata o loo i le pito i tua, i. 301).

Manatua: Ia faaeteete i lagona o tamaiti o le vasega o loo i ai tagata o o latou aiga i le falepuipui. Ia fesili atu:

- Aisea e i’u ai tagata i le falepuipui? (Ua latou soliiina le tulafono.)
- Aisea e te manatu ai atonu o le a faanoanoa se tagata i lenei tulaga?
- Pe a mae’a ona totogiina le faasalaga o lana soligatulafono ma ua tatalaina, aisea o le a fiafia ai o ia? Pe le fiafia foi?

Faaali le ata lona lua (tagai i le faamatalaga o ata o loo i le pito i tua, i. 302) ma fesili i tamaiti o le vasega pe aisea ua manatu ai i latou o nisi o pagota e le suia o latou ala ma toe foi atu ai i le falepuipui. (O loo mataua nisi ma faaaauu pea ona solia le tulafono.) Fai atu i le vasega e faitau le Mosaea 2:41, ma ia talanoaina le mea e tatau ona faia muamua e lenei tagata ao le i mauaina e ia le fiafia moni. Ia talanoaina fesili nei:

- O a taunuuga pe a tatou solia tulafono a le Atua? (tagai Alema 41:10).
- E faapefea ona iloa lo tatou fiafia i le ala o loo tatou ola ai ae le na o loo tatou siosiomaga?
- E faapefea ona tatou lagona le ta’usalaina i nisi taimi ma avea i tatou, e pei o le pagota lea, o ni pagota i se falepuipui faaleagaga? (tagai Roma 3:23; 1 Ioane 3:4).
- O le a le mea e ao ona tatou faia ina ia maua ai le fiafia i lenei olaga ma le olaga a sau?

Ia valaaulia le vasega e faitau le Eperu 10:10, 14–17 ma vaavaai mo mea e mafai ona tutupu ia i tatou ona o le taulaga a Iesu Keriso. (E mafai ona faamamaina i tatou.) Tusi le upu *faamamaina* i luga o le laupapa ma fai atu i le vasega e faamatala mai pe o le a le uiga ia i latou. Fai atu i le vasega e faitau le saunoaga lenei a Elder Joseph B. Wirthlin, ma ia talanoaina e le vasega:

“E ala i le mana ofofofia o le Togisala a Iesu Keriso, o se mana e galueaiina e ala i loo tatou usiusitai i Ana poloaiga, e mafai ai ona matua faamamaina i tatou i a tatou agasala. O Lona alofa mutimutivle e le gata mai e mafai ai ona ‘faamalie iuga o le faamasinoga’ [Alema 34:16] mo tagata uma o e salamo” (*Liahona*, Ianuari 1997, 84).

Ia talanoaina fesili nei:

- O le a le mea e ao ona tatou faia ina ia faamamaina ai i tatou i le mana o le Togisala?
- E mafai faapefea i le faamamaina o agasala ona aumaia ia i tatou le fiafia i lenei olaga ma le olaga a sau?
- Aisea e ta’uaogaina ai le totogiina o soo se tau mo le fiafia e mafai ona tuuina mai e le Alii?
- O le a se mea e mafai ona e faia i le asō ina ia olioli ai i le fiafia moni?

Eperu 11–13

Faatomuaga

O le *Lectures on Faith*, (Laugaina e uiga i le Faatuatua), na tuufaatasia i lalo o le taitaiga a le Perofeta o Iosefa Samita, na folafolaina atu o le faatuatua ia Iesu Keriso o le mataupu faavae muamua lea o le talalelei ma le “faavae o le amiotonu uma” (*Lectures on Faith* [1985], 1). O loo aoaoina ai foi “o le faatuatua e le gata o le mataupu e uiga i galuega, ae faapea foi le mana, i agaga atamamai uma” (13). I le Eperu 11–13, o loo aoaoina ai i tatou e uiga i le faatuatua ma le ala e mafai ai ona avea ma se mataupu faavae o le mana i o tatou olaga.

Ia suesue ma le agaga tatalo le Eperu 11–13 ma mafaufau i mataupu faavae nei ao le i saunia au lesona.

O Nisi Mataupu Faavae Tava o le Talalelei e Saili Iai

- O le faatuatua o le faamoemoe lea ma le mautinoa o mea e le o vaai ae e moni ia (tagai Eperu 11:1–3; tagai foi Alema 32:21).
- O le faatuatua o le mana lea na mafai ai e le Au Paia o anamua ona tausia poloaiga a le Atua ma faia ai galuega sili o le amiotonu (tagai Eperu 11:4–40; tagai foi Alema 26:22–36).
- E ala i le faatuatua o loo mafai ai e i tatou ona onosaia le aoaiga a se Tama alofa ma faatagaina mea e oo mai ina ia faaleleia ma faaatoatoaina ai i tatou (tagai Eperu 12:5–13; tagai foi MFF 95:1).
- O le mafutaga o le faaipoipoga e paia ma faauuina e le Atua (tagai Eperu 13:4; tagai foi MFF 131:1–2).

Fautuaga mo le Aoao Atu

Filifili mai aitia nei, pe faaoga ni au lava, ao saunia au lesona mo le Eperu 11–13.



O le *New Testament Video* Vaega 20, “O le Faatuatua e Ola ai le ua Amiotonu” (12:19), e mafai ona faaaogaina i le aoaoina atu o le Eperu 11 (tagai *New Testament Video Guide* mo fautuaga mo le aoaoina atu).



Eperu 11:1–12:3. O le faatuatua ia Iesu Keriso o se mataupu faavae e uiga i galuega ma le mana. O lea faatuatua na mafai ai e le Au Paia o anamua ona tausia poloaiga a le Atua ma faia galuega o le amiotonu. (35–40 minute)

Fesili i tamaiti o le vasega pe ua totoina e i latou se togalaau. Ia fesili atu: Sa faapefea ona e iloaina o le a tupu ma ola fatulaau? Fesili atu ia i latou pe ua latou faatali pasi? Ia fesili atu: Sa faapefea ona e iloaina o le a sau le pasi? Fesili atu ia i latou pe ua latou lafoina se tusi. Ia fesili atu: Sa faapefea ona e iloaina o le a lafoina atu e pei ona fuafuaina. Ia fesoasoani i tamaiti o le vasega ia malamalama sa le i iloaina tonu e i latou o le a tutupu ia mea, ae ona o mea na tutupu i le taimi ua tuanai na latou talitonu pe na faamoemoe ai o le a tutupu na mea. Ia fesili atu: O a nisi mea o loo tatou faia i aso taitasi ma talitonu o le a aumaia e na mea taunuuga o loo tatou faamoemoe i ai? (O le alu atu i le aoga poo le galuega, taliaina o tupe, o le laasiaina o se alalaupapa.)

Ia tusi le *O le a le faatuatua?* i luga o le laupapa faatasi ma mau nei i lalo ifo: *Eperu 11:1; Alema 32:21; ma Eteru 12:6*. Faitau mau nei e tolu faatasi ma lau vasega ma galulue faatasi ia tusiina le uiga o le faatuatua mai mau (tagai *Taiala i Tusitusiga Paia* “faatuatua”). Ia talanoaina le ala o loo fesoasoani ai lenei faauigaina o le faatuatua e faamatalaina ai pe aisea ua tatou loto ai e totoina fatulaau pe o atu i le aoga poo o le galuega i aso taitasi.

Ia fai atu i tamaiti o le vasega, i le avefa ai o le faatuatua ma se mataupu faavae o le mana, e ao ina avefa ma mea sili atu nai lo le na o se talitonuga malosi i ni mea o le a tutupu i le lumanai. Tusi i le laupapa: *O le mataupu faavae muamua o le talalelei e le o le faatuatua. O le faatuatua ia _____*. Fai atu i le vasega ia faitauina le mataupu faavae o le faatuatua lona fa ma faauma le fuaiupu o loo i luga o le laupapa (o le tali o “Iesu Keriso”). Valaaulia se tamaitiiti o le vasega ia faitauina le saunoaga lenei a Elder Boyd K. Packer:

“Ou te iloaina ni ituaiga o faatuatua se lua. O le muamua o le ituaiga o loo iloaina e le lalolagi. O se uiga taatele i le tele o mea uma o loo o tutupu. O se mea o loo mafai ai ona tatou ola. O se mea o loo aumaia ai se faamoemoe ia i tatou e faataunuaina ai soo se mea. E i ai i tagata uma, e tele atu ona i ai i nisi nai lo isi. O le ituaiga faatuatua lona lua, e matua seasea ona i ai, e le maua gofie, o le ituaiga o faatuatua lea o loo faia ai mea ina ia tutupu. O le faatuatua o se malosiaga moni e pei lava o le malosiaga moni o le eletise ae peitai e faaife ona sili atu lona malosi. Pe ua e faa-aogaina ea le faatuatua—faa-aogaina, ma faataitai ona e ola ai, ae le o le manatu mama i ai? Pe a e vaai ifo ia te oe lava, ia fesili ia te oe lava pe o le a le tele o lou faatuatua o loo i ai? O se mataupu faavae muamua o le talalelei i le Alii. Pe o se mataupu faavae muamua ea ia te oe?” (*Your Articles of Faith*, Brigham Young University Speeches of the Year [21 Mati 1962], 8).

Ia fesili atu: E mafai faapefea i le faaautuina o loo tatou talitonuga ia Iesu Keriso ona fesoasoani ia i tatou ia maua lenei ituaiga o faatuatua lona lua? Ina ia iloaina ni faataitaiga o tagata o e na oo i ai lenei ituaiga o faatuatua lona lua, faitau uma pe na o ni vaega foi o le Eperu 11:2–40. Ia valaaulia tamaiti o le vasega e faailoa mai ia faataitaiga na pito sili ona faagaetia ai i latou ma fetufaai mai i le vasega.

Ia fesili atu: E te manatu aisea na lisiina ai e Paulo ia faataitaiga e tele e uiga i le faatuatua? Faitau le Eperu 12:1–3 ma fesili i lau vasega pe mafai ona latou sueina mai se mafuaaga. Ia fesili atu: O le a le uiga o le “tuu ese ia o mea mamafa uma, atoa ma le agasala e faalavelavegofie ai i tatou” (f. 1)? Ia fetufaai atu le saunoaga lenei a Elder Neal A. Maxwell, o le na avefa i le taimi lea ma se tasi o le Au Fitugafulu:

“E ao ina tatou manatua o le avefa ai ma se tagata faatuatua o le Ekalesia e matua mamafa lava e aunoa ma le puapuagatia mai aafiaga o le agasala lea e mafai ona aveesea e ala i le uia o laasaga o le salamo. Na tuuina mai e Paulo ia i tatou se apoapoiga lelei e uiga i lenei mea ina ua ia saunoa mai, ‘...ina tatou tuu ese ia o mea mamafa uma, atoa ma le agasala e faalavelavegofie ai i tatou, ia tatou taufetuli ma le onosai i le ala tanu o i o tatou luma.’ (Eperu 12:1.) E matua sili atu ona faigata mo i tatou le tauaveina o le satauro pe afai ua iloga ona no’u o tatou tua i avefa o uiga leaga” (*Deposition of a Disciple* [1976], 75).

Ia talanoaina fesili nei:

- E faapefea ona fesoasoani le onosai ia i tatou i le taulimaina o luitau o le olaga?
- E faapefea ona fesoasoani le tepa taulai atu ia Iesu Keriso e atiae ai loo tatou faatuatua?
- E faapefea i Lana faataitaiga o le faatuatua, onosai, ma tutumau ona aafia ai ou lagona e uiga i ou tofotofoga ma puapuaga?



Eperu 12:5–11. E ala i le faatuatua e mafai ai ona tatou taliaina ma onosaia le aoga a se Tama Faalelagi alofa ma faatagaina e faaleleia ma faatoatoaina ai i tatou. (25–30 minute)

Tusi i luga o le laupapa *Pe a tatou puapuagatia*. I lalo o lena fasi fuaitau, tusi ai le *Mafuaaga*:. Ia fesili atu:

- E toafia outou ua feagai ma se aso le lelei?
- E toafia nisi na mauaina se aso le lelei ona o ni filifiliga le lelei na e faia? (*Faasilasilaga*: Aua nei fesili atu mo ni faataitaiga.)
- E toafia nisi o outou na feagai ma se aso le lelei ona e le o se mea sese na e faia?
- Pe na e taumanatu ea, “Aisea ua tupu ai lenei mea ia te au?”

Fetufaai ma lau vasega le saunoaga lenei a Elder Richard G. Scott. Ia fai atu ia i latou ia faalogologo mo ni mafuaaga se lua e tutupu ai mea leaga.

“E leai se tasi e manao i puapuaga. O faaososoga, o le le fiafia, o faanoanoaga, ma le loto tiga e oo mai ia i tatou ona o ni mafuaaga autu eseese se lua. O i latou o e solia tulafono a le Atua o le a feagai pea ma na luitau. O le isi mafuaaga e oo mai ai tofotofoga o le faataunuaina lea o le finagalo o le Atua lava ia i o tatou olaga ina ia faaleleia ai i tatou mai tofotofoga. E matua taua lava mo i tatou taitoatasi ia iloa pe o le fea o nei mafuaaga e lua o loo oo mai ai o tatou tofotofoga ma luitau, ona o le aoaiga e matua eseese lava” (*Liahona*, Ianuari 1996, 16).

I lalo ane o le *Mafuaaga*: tusi ai le o *a’u lava agasala* ma le *fesoasoani ia te au ia aoaoina ai*. Faaopoopo i ai le upu *faamoemoega* i luga o le laupapa ma faamatala atu e ui ina o o tatou tofotofoga e sili atu nai le tasi le mafuaaga, ae e foliga mai o loo i ai se faamoemoega lautele e tasi. Valaaulia le vasega e faitau le Eperu 12:6–11 ma vaavaai mo le faamoemoega o le aoaiga a le Alii (tagai foi MFF 95:1). Mafaufau i le faaogaina o fesili nei:

- Aisea e aoai ai e le Alii Lana fanau?
- E faapefea ona fesoasoani mai o Ia pe afai tatou te onosaia Lana aoaiga?
- O a faigata e puapuagatia ai i tatou e le mai le Alii ia?
- O le a le mea o loo aoao mai e le Eperu 12:9 o loo faamatalaina ai pe aisea e matua manatu mai ai le Tama Faalelagi i lo tatou alualu i luma?
- E faapefea ona fesoasoani le iloa o i tatou o ni fanau agaga a lo tatou Tama Faalelagi a o tatou taumafai e ave faapei o Ia?

Fai i le vasega ia tusi se parakalafa e faamatalaina ai pe o le a le uiga ia i latou o i latou o ni fanau agaga moni a le Tama Faalelagi. Ia fai atu i ni tamaiti e fetufaai ma le vasega mea na latou tusia. Ia faaiu e ala i le faitauina o le saunoaga lenei a Elder Richard G. Scott:

“Pe a e feagai ma faigata, o le a oo ai ina e tuufesili i ni fesili se tele. . . .O le a se mea e tatau ona ou faia? O le a se mea e tatau ona ou aoao mai ai mai lenei tulaga? O le a se mea e tatau ona ou suia? O ai e tatau ona ou fesoasoani i ai? Pe mafai faapefea ona ou manatuaina ni ou faamanuiaga se tele i taimi o faigata? O le faataulagaina ma le lotoatoa o ni manaoga loloto faaletagata lava ia ona o le finagalo o le Atua e matua faigata tele ona faia. Ae peitai, pe a e tatalo ma le naunautaiga moni, ‘Faamolemole, sei e faailoa mai ia te au Lou finagalo’ ma faapea atu ‘Ia faia lava Lou finagalo,’ ua e i le tulaga pito sili ona malosi i le mauaina o le fesoasoani sili mai lou Tama alofa” (*Liahona*, Ianuari 1996, 16).

Eperu 1–13. O se iloiloga o le tusi a Eperu o loo faaalai ai le molimau a Paulo e uiga i le silisili o Iesu Keriso i mea uma. (20–25 minute)

Ia fai ni kopi o le ata o loo faaulutalaina *E Silisili Iesu Keriso I Mea Uma* o loo i le faatomuaga o le Eperu (i. 229–30). Ia faaavanoa pea pusa o loo i lalo ane o *Iesu Keriso* sei vagana ai ia mau faatusatusa. Tuu atu i tamaiti taitasi o le vasega se kopi mo i latou. Ia ta’u atu ia i latou o lenei kopi o se ata o le savali autu a Eperu. Tusi mau faatusatusa mai le siata lenei i luga o le laupapa, ma fai i le vasega e sueina mau na, ma vaavaai mo le savali autu o loo faamatalaina mai i mau taitasi. (Ia fai atu ia i latou e mafai ona galulue i latou taitoatasi pe faavaega foi.) Pe a latou mauaina ia savali autu, fai atu ia i latou e tusi i totonu o pusa o loo i totonu o a latou kopi.

Mau faatusatusa	Savali autu	Risosi faaopoopo
Eperu 1:4–6	O Iesu Keriso, le Alo, e sili atu nai lo agelu.	
Eperu 3:1–6	O Iesu Keriso, le Alo, e sili atu nai lo Mose, le perofeta.	
Eperu 5:5–10; 7:11–12; MFF 107:1–4	E maualuga atu le perisitua o Keriso nai lo le Perisitua Levitiko.	
Eperu 7:1–4; FIS, Eperu 7:3	O Iesu Keriso e sili atu nai lo Mekisateko ma Aperaamo.	
Eperu 9:1, 10–14; 10:10–14; Alema 34:10	O le taulaga a Keriso e sili atu I taulaga uma o le Feagaiga Tuai.	
Eperu 11	O le mana o Iesu Keriso e malosi atu nai lo soo se faafitauli o le olaga faitino poo se mea e fai ma faalavelave.	

Ia iloiloina a latou tali. Ia molimau I le taualoaina o Iesu Keriso, ma uunaia le vasega ia talitonu ma faalogolago atili I le Alii. O loo ia te Ia le mana e fesoasoani ai ia I tatou ma faaolaina I tatou I lenei augatupulaga e pei ona sa la faia I taimi ua mavae. Mafaufau ia faaiiina I le usuina poo le faitauina o le viiga “Ua Sili Oe” (*Viiga*, nu. 46).

Tusitala Ma Ē Na Tusia I Ai: Na tusiaina e le tusitala le tusi o Iakopo i “ituaiga e sefululua o loo salalau solo” ma na faailoaina mai o ia lava o “Iakopo, o le auauna a le Atua ma le Alii o Iesu Keriso” (Iakopo 1:1). Masalo o Iakopo lea le uso o Iesu, ae le o Iakopo le uso o Ioane (tagai Mataio 13:55; Kalatia 1:19; Bible Dictionary, “James”). I le aveia ai o se alo o Iosefa ma Maria, atonu na latalata le mafutaga a Iakopo ma le Alii ma atonu foi na ia matua iloaina o Ia e pei o se isi tagata i le olaga faitino. Ma le isi foi mea, na mauaina e Iakopo se molimau i le paia o Keriso ma le Toetu (tagai 1 Korinito 15:7).

Talaaga Faasolopito: O [le tusi o] Iakopo o loo faatulagaina o se Tusi Faalaua’itele. Ua ta’ua o Tusi Faalaua’itele ona e le o tusiaina atu i se au faitau patino e pei o le tele o Tusi a Paulo. O le itiiti o ni faamatalaga patino ua faigata ai ona iloa le alo ma le nofoaga na tusia ai. Talu ai e le o ta’uina mai e Iakopo pe o anafea ma pe o fea foi na ia tusiaina ai lana tusi, ae ua na o se manatu taumate faapea na tusiaina i Ierusalem ona o iina sa nofo ai o ia.

E mafai ona iloa na tusiaina le Tusi a Iakopo a o lei oo i le 62 T.A. ona o le tausaga lena, e pei ona faamaumauina e le tagata tusi talafaasolopito o Iosefatu, e faapea o Iakopo le uso o le Alii ma isi na tuuina atu i luma o le au Saneterini, ma faasalaina i le oti, ma toe aveina ae ina ia fetogia i maa (*Antiquities of the Jews*, 20.9.1). Ma le isi mea, o le le ta’uina mai e Iakopo o le faapotopotoga i Ierusalem pe tusa ma le 50 T.A. (tagai Galuega 15) e mafai ona iloa ai o lenei tusi sa tusiaina ao lei oo i lena foi taimi. Afai e sa’o ona aveia ai lea o lenei tusi ma se tasi o tusi pito i leva o le Feagaiga Fou.

Savali autu: O lenei tusi o loo aoao mai afai tatou te taliaina le talalelei ma faatuatua i le Alii, e tatau ona tatou faatinoina loa le moni o lena faatuatua i aso taitasi o o tatou olaga. O le Tusi a Iakopo o loo faaautuina i ni lauga pupuu o loo apoapoai atu ai i le Au Paia ina ia le nao le iloaina o le afioga a le Atua ae ia ola ai.

Iakopo 1–5

Faatomuaga

O loo iloaina le Iakopo 1–5 i lona faamamafaina o le ola faalelotu e ala i faatinoga.

Afai tatou te faatuatua, e ao ona tatou faaalua e ala i a tatou galuega, mo se faataitaiga o le faamafanafana ma fesoasoani ia i latou o e puapuagatia. Ia Iakopo o le faatuatua e o faatasi lava pea ma galuega. O se tasi o faataitaiga pito sili ona faagaetia lotu o lena faatuatua faapena na tupu ina ua faitauina e le tamaitiiti o Iosefa Samita le Iakopo 1:5: “A e afai ua leai se potu i so outou, ina ole atu ia i le Atua, o lē foai tele mai i tagata uma ma le toe ta’uta’ua; ona foaiina mai ai lea ia te ia.” Na lagona e Iosefa le musuiaina o ia ia alu atu i le vao ma

fesili atu i le Alii pe o le fea o ekalesia e moni. Na tauia e le Tama Faalelagi lona faatuatua e ala i le faaali atu ia te ia, faatasi ma Iesu Keriso. Na tali e le Tama le tatalo a Iosefa e ala i le faasino ia Iesu ma fetalai mai, “O Lo’u Atalii Pele Lenei. Faalogo ia te Ia!” (Iosefa Samita—Talafaasolopito 2:17).


Ia suesue ma le agaga tatalo le Iakopo 1–5 ma mafaufau I mataupu faavae nei ao lei sauniaina au lesona.

O Nisi o Mataupu Faavae Taua o le Talalelei e Saili Iai

- E faamalosiaina i tatou e le Alii ao tatou onosaia ma tutumau mai faigata ma tetee atu i faasoosoga (tagai Iakopo 1:2–4, 12–21; 4:7–10; tagai foi FIS, Iakopo 1:2).
- O le amio Atua o le aapa atu lea i galuega o le alofa i e ua puapuagatia ma ia aua nei pisia mai le lalolagi (tagai Iakopo 1:27; 2:1–9; tagai foi Mataio 22:34–40; Mosaea 4:15–27; MFF 59:9).
- E le mafai ona tatou faatuatua e aunoa ma galuega, pe mafai foi ona faalaina i tatou i le na o le faatuatua lava. O galuega amiotonu o fua ia o le faatuatua (tagai Iakopo 2:14–26; 1:22–25; FIS, Iakopo 2:18).
- O le leoleoina o le laulaufaiva (puleaina o upu tatou te tautatala ai) e fesoasoani ia i tatou i le atinaeina o le atoatoa (tagai Iakopo 3:1–12; tagai foi Mosaea 4:30; Alema 12:14).
- O i latou o e opogi mea o lenei lalolagi e aveia i latou ma fili i le Atua (tagai Iakopo 4:4–10; tagai foi Mosaea 3:19).
- O le faatuatua i le Alii, o le tatalo, ma le perisitua o mea taua ia e manaomia i le faamanuiaina ma faamaloloina o e mamai ma e ua puapuagatia (tagai Iakopo 5:13–18; tagai foi MFF 35:9).

Fautuaga mo le Aoao Atu

Filifili mai i manatu nei, pe faaoga foi nisi o ou lava manatu, ao e sauniaina lesona mo Iakopo 1–5.

 **Iakopo 1:5–6 (Mau Tauloto). E mafai ona tatou ole atu mo le potu ma mauaina mai le Atua pe afai tatou te ole atu ma le faatuatua ma ia aua nei masalosalo.** (25–30 minute)

Tusi i luga o le laupapa le saunoaga lenei a Elder Bruce R. McConkie:

“O lenei fuaiupu e tasi o tusitusiga paia o loo i ai se aafiaga sili atu ona aoga i tagata nai lo se isi lava fuaiupu e tasi ua faamauiina e soo se perofeta i soo se vaiataimi” (*Doctrinal New Testament Commentary*, 3:246–47).

Valaaulia le vasega e mate mai pe o le a le mau o tusitusiga paia o loo faatatau i ai le saunoaga a Elder McConkie ae pe aisea foi.

Faitau le Iakopo 1:5 e le vasega ma fesili pe faapefea ona faataunuina e lenei mau le saunoaga o loo i luga o le laupapa. Faitau le Iosefa Samita—Talafaasolopito 2:10–19 ma vaavaai mo mea na oo mai le faitauina e Iosefa Samita o lena fuaiupu. Ia fesili atu:

- Ua aafia faapefea lou olaga ona o le Uluai Faaaliga?
- O le a se mea atonu o le a ese i lou olaga pe ana fai e le mulimuli Iosefa Samita i le uunaiga a le Agaga ia tatalo?
- E faapefea ona ese le ole atu mo le potu mai mea e masani ona tatou ole atu ai i le tatalo?
- O le a le eseese o le ole atu i le Tama Faalelagi ia foia ou faafitauli ma le ole atu mo le potu ia taulimaina ai faafitauli?
- Pe mafai ona e manatuaina ni faaitaitaiga o lena eseese? (Ia faataga le vasega e fetufaai mai ni mea na oo ia i latou pe a manano ai, ae ia fai atu ia i latou ia faateete ina ia aua nei fetufaai mai ni mea e paia pe o ni mea tau i le tagata lava ia.)
- E mafai faapefea i le ole atu mo le potu ona aumaia atili le mana i a tatou tatalo faaletagata lava ia?

Faitau le Iakopo 1:6 ma vaavaai mo le mea na sau ai le mana na faaogaina e Iosefa ina ia mauaina ai tali mai le Atua. Ia fesili atu: O le a le eseese o se tatalo e tuuina atu ma le faatuatua ma le tatalo e tuuina atu ma le masalosalo?

Fai atu i se tagata o le vasega e faitau le mea o loo aiao mai e Peresitene Iosefa Samita e uiga i le tatalo:

“E le tele ni upu tatou te ole atu ai i le Alii mo mea o loo tatou manaomia; ae peitai e ao ona tatou ole atu i le faatuatua, mautinoa ma le faamaoni. E le tatau ona i ai ni masalosaloga i o tatou mafaufau pe a tatou ole atu i le Alii mo se faamanuiaga” (*Gospel Doctrine*, 216).

Ia talanoaina faatasi ma tamaiti o le vasega mea e mafai ona latou faia ina ia tatalo ma le faatuatua atili ma le le masalosalo. Ia molimau atu o a tatou tatalo o le a i ai le mana e suia ai olaga pe afai tatou te ole atu i le Atua i le mautinoa ma le faatuatua mo faamanuiaga tatou te moomiaina.



Iakopo 1:22–27. Ia avea ma e anaana i le upu ae le na o le avea ma e faalogologo i le upu. (35–40 minute)

A o lei amataina le vasega ia saili ma faitau se lauga talu ai nei a le Peresitene o le Ekalesia o loo ia saunoa atu ai i le au talavou a le Ekalesia (mo se faaitaitaiga i se sauniga perisitua poo se konafesi a tamaitai). Filifili ni mea se tolu poo se fa o loo apoapoai ai o ia i le au talavou. Tusi mea na i le laupapa ma fesili i tamaiti o le vasega ia iloiloaina i o latou lava mafaufau pe na latou usitaia apoapoaiga a le perofeta.

Faitau le Iakopo 1:22–25 ma talanoaina fesili nei:

- O le a le uiga o le avea ma se e anaana i le upu?
- O le a le uiga o le avea ma se e na o le faalogologo?
- O le a le uiga o le avea ma se tasi e faalogologo ma toe galo? (O se tasi e le o faatinoina mea o loo aiaoaina.)
- O a ni faamanuiaga e oo mai ia i latou o e filifili e avea ma e anaana i le upu e faatusatusa ia i latou o e na o le faalogologo lava?

(*Manatua*: Pe a manaomiaina, e mafai ona e tuuina i ai le fautuaga o le aiao atu mo Iakopo 2:17–18 iinei ina ia iloa ai le sootaga o le avea ma se e faalogologo ae le faia ma le faatuatua ae leai ni galuega.)

Faitau le Iakopo 1:26–27 ma vaavaai mo le uiga o le “amio Atua.” Ia fesili atu:

- O le a le eseese o le foliga mai e amio Atua ma le ola i le amio Atua?
- E mafai faapefea i le avea ai ma se e anaana i le upu ona fesoasoani ia i tatou ia faatoilaloina le nao le faafoliga mai e amio Atua?

O le tusi o Iakopo o loo tuuina mai ai ni fautuaga se tele mo le faatinoina o le avea ma e anaana i le upu. Vaevae le vasega i ni vaega se lima. Tuu atu i vaega taitasi se fasi pepa o loo tusiina ai le *Lisi o Mea e Faia*. Ia tofiaina vaega taitasi i mataupu eseese o le Iakopo. Ia fai atu i vaega ia faitauina la latou mataupu ma vaavaai mo mea o loo fautu mai ai Iakopo e mafai ona tatou faia ina ia avea atili ai ma ni ē mulimuli ia Iesu Keriso. Ia talanoaina mea na latou mauaina ma tusi se lisi manino “o mea e faia” i luga o le laupapa. Ia fesili atu:


- E mafai faapefea ona suia lou olaga pe afai e te mulimuli i apoapoaiga a Iakopo?
- O le fea o nei apoapoaiga ua faamanuiaina ai oe ona ua e mulimuli ai?

Valaaulia i latou o e mananao e fetufaai mai se faaitaitaiga i le ala na faamanuiaina ai i latou ina ua faia lena mea. Ia uunaia le vasega ia faaa’oa’o ona tausia lisi “o mea e faia” (aemaise lava mea o loo saunoa mai ai perofeta) ina ia avea ai i latou ma e anaana i le upu ae le o ni e faalogologo ma faagalo.



Iakopo 2:17–18 (Mau Tauloto). E le mafai ona tatou faatuatua e aunoa ma galuega, pe mafai foi ona faaolaina i tatou e ala i le na o le faatuatua lava. O galuega amiotonu o fua ia o le faatuatua. (10–15 minute)

Aumai ni foe se lua o se vaa i le vasega. Ia tusi ai le faatuatua ia Iesu Keriso i le tasi ma le isi galuega. Ia liliu foe ina ia aua ne’i iloa e tamaiti o le vasega ia upu o loo tusia i foe. Pe tusi se ata o se vaa ma ni ona foe i le laupapa (aia le tusia se mea i foe). Ia fesili atu:



- O le fea o foe e sili atu ona taua?
- Afai e tasi le pito o loo e aloina ai le vaa ma e aloina i le malosi e te mafaia, o fea le itu o le a e alu agai i ai?
- Aisea e te manaomiaina ai foe uma e lua?

Faitau le Iakopo 2:17–18 ma liliu ia foe ina ia iloa atu upu o loo tusia ai (pe tusi ia upu i foe i le ata o loo i le laupapa). Ia fesili atu:

- E faapefea ona pei le savali o nei fuaiupu i le lesona e uiga i foe?
- O a ni auala o le a le mafai ai ona tatou faaaogaina le foe o le “faatuatua ia Iesu Keriso”?
- Faamata e faapefea ona tatou faagaloina le foe o “galuega”?

Valaaulia tamaiti o le vasega e faitau ma tali fesili o loo i le Iakopo 2:14. Faitau le Iakopo 2:15–26 ma vaavaai mo tali a Iakopo ma mea e mafai ona tatou faia e mautinoa ai o loo ia i tatou le faatuatua ma galuega.

Iakopo 3:1–12. O le leoleoina o le laulaufaiva (puleaina o upu tatou te tautatala ai) e fesoasoani lea ia i tatou i le atinaeina o le atoatoa. (20–25 minute)

Ia tusi, *O Ai A’u?* i luga o le laupapa ma faitau ia faamatalaga nei. Ia fai atu i tamaiti o le vasega e tusi ni tali talafeagai ao e faitauina atu faamatalaga taitasi.

- E faigata ona pulaina a’u.
- E mafai ona ou faamanuia atu ma fetuu foi.
- E mafai ona ou tuuina atu mea oona e tele.
- E mafai ona ou faamafanafana i tagata.
- E mafai ona ou faaleagaina le galuega a le Alii.
- E mafai ona ou faaleagaina olaga o isi tagata.
- E mafai ona ou molimau i le talalelei a Iesu Keriso.

Ia tuuina atu i tamaiti o le vasega se avanoa e taliina ai mea na. Faitau faatasi le Iakopo 1:26 ma mataituina le tali. Ia fesili atu: O a auala e mafai ai ona talafeagai upu tatou te tautatala ai ma faamatalaga nei?

Afai o i ai se faagutu o se solofanua, ia faaali atu i le vasega ma fesili atu i tamaiti pe o le a lenei mea. Ia fesili atu:

- O le a le mea e faaaogaina i ai se faagutu? (Ina ia faatonuina ma taitaiina ai se solofanua.)
- O le a le uiga o le “taofiofia” le laulaufaiva?
- E mafai faapefea ona tatou faia lea mea?
- O a ituaiga o faalavelave e mafai ona tatou oo i ai pe afai tatou te le taofiofia o tatou laulaufaiva? (tagai foi Alema 38:12).

Ia fai atu i le vasega e faitauina le faamatalaga lenei mai le tamai tusi o le *Mo le Malosi o le Au Talavou*:

“O lau tautala ma upu e te faaaogaina e iloa ai oe. Faaaoga upu e atiina a’e ma sii a’e ai i luga i latou tou te faatasi. O le palauvale, laulau vavale, poo ulaga eleelea, ua le fiafia i ai le Alii. E faaleaga ai lou agaga ma faamaulalo ai oe. . . .

“O le faitala o se tasi lena o mea leaga. A e faia se tala leaga e uiga i tagata e le o i ai, poo lou ta’u atu o ni mea lilo ua e iloa e uiga ia i latou, ua e faitatala. O le faitala e tupu mai ai le tiga ma le faanoanoa i isi tagata. Ua poloai mai le Alii ia I tatou ia tatou fealofani. Ina ia tatou mulimuli i lenei poloaiga, ia e tautala alofa ma lelei e uiga i isi” (*Mo le Malosi o le Au Talavou*, 10–11).



Valaaulia le vasega e mafaufau pe o ai o le a aafia ai pe afai tatou te le taofiofia o tatou laulaufaiva. Faitau le Iakopo 3:1–10 e le vasega ma talanoaina le uiga o fuaiupu taitasi.

Atonu o le a fesoasoani le tusiaina i luga o le laupapa o ni ata o se faagutu o le solofanua ma le pito uamea o le faagutu, o se foeuli o se vaa, o se afitusi, o se fagu o loo i ai se vai oona ina ia faatatau atu i ai ao e talanoaina fuaiupu nei. Faitau ma faaogaina mai le Mataio 15:10–20 e mata'ituina ai le ala o loo fesootea ai fuaiupu nei ma aoaoga a Iakopo e uiga i le laulaufaiva. Ia fesili atu:

- O fea e o mai ai upu o loo tatou tautatala ai?
- Pe mafai ea i le taofiofia o le laulaufaiva ona aafia ai mea o loo i le loto? Pe aafia faapefea?
- E mafai faapefea i le puleaina o o tatou loto ona aafia ai lo tatou taumafai ia faaatoatoaina?

Faitau le Mosaea 4:30 ma mataituina apoapoiga a le Tupu o Peniamina na tuuina mai e uiga i le laulaufaiva. Aisea e tatau ai ona tatou faaeteete i upu tatou te faia? Faitau le Alema 12:14 mo le tali. Ia molimau atu e ao ona tatou faaeteete i a tatou upu aua o upu le talafeagai o le a ta'usalaina ai i tatou. Ia uunaia le vasega ina ia faaa'oa'o ona faagutuina o latou laulaufaiva ina ia avea ma se mea e faamanuia ai i isi ma faaatoatoaina ai i latou lava.

Iakopo 4:4–10. Afai tatou te opogi mea o lenei lalolagi, e avea i tatou ma fili i le Atua.

(25– 30 minute)

Ia tusi ia upu nei *O Mea a le Atua* ma faapipiina i tua o se nofoa. Ia tusi se isi pepa upu nei *O Mea a le Lalolagi* ma faapipiina i tua o se isi nofoa. Ia tuu felata'i nofoa e lua ma fesili i le vasega pe mafai ona i ai i ni "nofoaga" se lua i se taimi e tasi. Valaaulia se tagata o le vasega e faatinoina i le saofai lea i nofoa e lua i le taimi e tasi. Ia fai atu i le tagata lena e tu, ona tuu eseese lea o nofoa ma faamamao ese. Fesili atu i le vasega pe mafai pea ona i ai i ni nofoaga se lua i se taimi e tasi. Ia fai atu i le tagata lena e filifili se tasi o nofoa e nofo ai.

Ia fesili atu i le vasega:

- O le a se mea o loo faatatau i ai lenei faatinoga?
- O le a le mea e tupu i la tatou mafutaga ma le Atua pe afai tatou te taumafai e faia mea o le lalolagi ma mea o le malo [o le Atua] i le taimi e tasi?
- O a ni faigata e oo mai i o tatou olaga ona o ni taunuuga o loo tatou filifili o mea o lenei lalolagi ae le o mea a le Atua?

Faitau le Iakopo 4:4–10 ma valaaulia le vasega e mataituina fasi faitau o loo aoao mai ai le ala i le avea ai ma se uo a le Atua. Ia faitau le Mosaea 3:19 ma talanoaina le ala o loo avea ai lenei fuaiupu ma se molimau lona lua i le aoaoga a Iakopo.

Faitau le Iakopo 1:12–13. Ia fesili atu pe faamata o le Atua o loo tuuina mai faosoosoga o loo tatou feagai ai. Faitau le Iakopo 1:14–16. Ia fesili atu:

- E faapefea ona faatosinaina e le tiapolo i tatou ina ia agasala?
- Aisea e fia avea ai oe ma uo a le Alii pe a toe afio mai o Ia?

Faitau le Iakopo 5:7–20 ma mataituina auala e mafai ai ona tatou saunia e avea ma uo a le Atua, ma lisiina mea na i le laupapa. O nei mea atonu e aofia ai:

- Ia onosai (f. 7–8).
- Ia faamalosiaina lou loto (f. 8).
- Ia aua nei feitagai (f. 9).
- Ia faaoga faataitaga a perofeta (f. 10).
- Ia tutumau (f. 11; tagai foi Iakopo 1:2–4).
- Aua le palauvale (f. 12).
- Tatalo pe a mafatia (f. 13).
- Ia lagiina viiga (f. 13).
- Ia aami i toeiina mo faamanuiaga (f. 14).
- Ia tautau atu ou sese (f. 16).
- Ia tatalo mo isi (f. 16).
- Ia faaliliuina mai le tagata agasala (f. 20).

Fesili atu i le vasega pe faapefea i le usitaia o apoapoiga o loo lisiina i le laupapa ona fesoasoani ia i latou ia saunia e avea ma uo a Iesu Keriso i Lona afio mai. Valaaulia le vasega e filifili mai le lisi se mea e tasi pe lua foi o loo vaivai ai ma tusi se fuafuaga a le tagata lava ia e faaleleia ai na vaivaiga. Ia fetufaai atu le apoapoiga a Elder Joseph B. Wirthlin:

"O le mea moni faigofie o lenei: soo se mea e faia e le latalata ai i tatou i le Atua e aveeseina ai i tatou mai ia te Ia. E le mafai ona tatou tutu faavaeloto, e le mafai foi ona tatou le mautonu ma mafai ai ona tatou agasala teisi e aunoa ma le tumaulaloina ai o loo tatou ola faaleagaga. O le mea lena e tatau ai ona tatou salamo ma o mai ia Keriso i aso taitasi i o tatou tulivae ina ia mafai ai ona taofia a tatou molimau malolosi mai le faaleagaina e le agasala" (*Liahona*, Ianuari 1993, 36).

Ia uunaia tamaiti o le vasega ina ia tuuese le lalolagi ae ia avea ma uo a le Atua.

O LE TUSI MUAMUA A PETERU

Tusitala ma e na tusi atu i ai: O le tusi o 1 Peteru na tusiaina e le Aposetolo sili i le Au Paia i vaega e lima o Asia Toaitiiti (tagai 1 Peter 1:1; tagai foi i le Taiala i Tusitusiga Paia, faafanua 6).

Talaaga Faasolopito: I ona po o Peteru, sa faaalua e le malo o Roma ia le latou taliaina o tapuaiga uma faalelotu, e aofia ai ma le faa-Kerisiano. Sa i ai le Ekalesia i lalo o se taitaiga faalelagi ina ia talaiina atu le talalelei “i le laloalagi uma” (Mareko16:15), ma na amataina i le faasalalauina o le savali o le talalelei i Malo o Roma. E ui ina sa faasalalauina le talalelei i ni auala filemu, o le savali na folafolaina atu ai le afio mai o le Keriso toetu e avea ma Tupu o Tupu sa lei taliaina e i latou o e na avea ma tupu o Roma.

I le 64 T.A. na faaleagaina ai e se afi le vaega tele o Roma. Na tuuaina ai le taitai o le malo o Nero i lea mea e ui i ni ana taumafaiga e fesoasoani ai ia i latou o e na leai ni mea e nonofo ai ona o lena afi. I se taumafaiga e aveesea ai le tuuaiga, na ia tuuaina ai le au Kerisiano. E le i umi ae sauaina le Au Paia i le malo atoa ona o le inoino ma le le malamalama. Pe tusa ma le taimi lava lea, na tusi atu ai Peteru ina ia faamalosi i le Au Paia i o latou puapuaga ma faamanatu atu ia i latou le tui e faavavau ona o lo latou faatuatua. Na tusia e Peteru lena tusi mai “Papelonia” (1 Peteru 5:13), lea atonu e faatatau ia Roma (tagai i le Taiala i Tusitusiga Paia, “Papelonia”).

O Tulaga Uiga Ese: I lena tusi, o loo ta’ua ai e Peteru nisi o fasi fuaitau pito sili ona manino o le Tusi Paia e uiga I le faolaina o e ua malilii.

1 Peteru 1–5

Faatomuaga

Na saunoa mai le Perofeta o Iosefa Samita, “Na tusiaina e Peteru i se gagana pito sili ona faaeaeaina nai lo se isi lava o le au aposetolo” (*Teachings of the Prophet Joseph Smith*, 301). Ao e faitauina le 1 Peteru ia mataituina lena gagana faaeaeaina ma mataupu faavae o loo aoaina mai ai. Ia faailogaina fuaitau o loo uunaia ai oe e suia lou olaga.

Ia suesue ma le agaga tatalo le 1 Peteru 1–5 ma mafaufau i mataupu faavae nei ao le i sauniaina au lesonea.

O Nisi Mataupu Faavae Tava o le Talalelei e Saili Iai


- O le tutumau ma le faatuatua i le tofotofoina o lo tatou faatuatua e mafai ona fesoasoani ia i tatou i le mauaina o le faaolataga (tagai 1 Peteru 1:3–11; 4:12–16; tagai foi Eteru 12:4–6).

- Ua valaauina e le Atua le Au Paia ina ia tea ese ma o ese mai le lalolagi (tagai 1 Peteru 2:9–17; tagai foi Teuteronomie 7:6; 2 Korinito 6:14, 17).
- Na saunia e Keriso le ala e talaiina ai le talalelei ia i latou o e ua malilii (tagai 1 Peteru 3:18–20; 4:6; tagai foi MFF 138:1–32).
- O taitai o le Ekalesia e ao ona fafagaina le lafu mamoe a le Atua i le alofa ma faataitaiga. E ao ona latou sauniaina i latou mo le afio mai o Iesu Keriso, o le Leoleo Mamoe Sili (tagai 1 Peteru 5:1–4).
- O le faatuatua i le Atua i le agaga o le lotomaulalo e taitaiina ai i tatou i le ola e faavavau (tagai 1 Peteru 5:5–11; tagai foi 2 Peteru 1:1–10; Mosaea 4:6–7).

Fautuaga mo le Aoao Atu

Filifili mai manatu nei, pe faaoga ni ou lava manatu, ao e sauniaina au lesonea mo le 1 Peteru 1–5.

1 Peteru 1:3–11. O le tutumau ma le faatuatua i le tofotofoina o lo tatou faatuatua e mafai ona fesoasoani ia i tatou i le mauaina o le faaolataga. (30–35 minute)



Tusi se ata o se taula o se vaa i luga o le laupapa ma fesili atu:

- O le a le aoga o le taula?
- O a ituaiga o taula tatou te manaomia i le olaga?

Tusi i luga o le laupapa ia upu faamafanafana nei mai i le Perofeta o Iosefa Samita:

“E ui ina pa faititili ma feemo uila, ma lulu mafuie, ma taua malolosi o loo siomia ai i tatou, ae peitai o lena faamoemoe ma le malamalama o le a fesoasoani i o tatou agaga i taimi uma o tofotofoga, faalavelave ma faigata” (*Teachings of the Prophet Joseph Smith*, 298).

Valaaulia tamaiti o le vasega e mafaufau pe o le a “lenei faamoemoe”, ma tusi o latou manatu i luga o le laupapa. Faitau le Eteru 12:4–6 ma mataituina upu autu o loo faamatalaina ai lenei faamoemoe. Ia talanoaina fesili nei:

- E faapefea ona aumaia e le faatuatua ma le talitonu i le Atua se faamoemoe mautinoa?
- O le a le mea o loo faatusaina i ai e Eteru lenei ituaiga o faamoemoe?

Ia toe foi atu i le saunoaga a le Perofeta o Iosefa Samita ma fautua atu e mafai foi ona faitauina faafaatusa. Ia fai atu i tamaiti o le vasega ia ta’uina mai ni auala e faatusaina i ai le pāpā o faititili, le feemo o uila, le lulu o mafuie, ma le oo mai o taua i o latou lava olaga. Ia toe faitau le saunoaga a le Perofeta o Iosefa Samita ma sui tulaga i ai fautuaga na tuuina mai e le vasega mo faititili, o uila, o mafuie, ma taua. Ia fesili atu:

- E mafai faapefea e se faamoemoe mautinoa i le toe tutu mamalu ona taulaina i tatou ao tatou feagai ai ma luitau o le olaga?
- E mafai faapefea ona tatou mautinoa o loo loloto ma mamau lo tatou taula ma taofiofiina ai i tatou mai le fesou’iina.
- E faapefea ona faatupulaiaina lou lototele i le iloaina o lenei faamoemoe o le a “fesoasoani i lou agaga i taimi uma o tofotofoga, faalavelave ma faigata”?
- Aisea e foliga mai ai e faamatagatagaina e faaosoosoga o tatou taula ma luitauina ai lo tatou faatuatua?

Faitau le talaaga faasolopito o le faatomuaga o le tusi o le 1 Peteru (i. 241) ma talanoaina ia tofotofoga na feagai ai ma le Au Paia o anamuā. Ia fesili atu: Aisea na tofotofoina ai lo latou faatuatua i tulaga na latou i ai? Ia faamatala atu o Peteru, i le avea ai ma Peresitene o le Ekalesia, na tuuina atu apoapoiga ia i latou i le ala e taulimaina ai o latou tofotofoga. Vaevae poloka o mau nei i tamaiti o le vasega: 1 Peteru 1:3–11; 2:19–25; 3:8–17; 4:12–19. Ia fesili atu ia i latou ia sueina ma tusiina i lalo ia aoaoga o loo faagaetiaina ai i latou e uiga i tofotofoga. Ia talanoaina mea na i le vasega.

Ia molimau o le faatupulaiaina o lo tatou faatuatua o le a saunia ai mo i tatou se faamoemoe e taulaina i tatou i le Atua ao tatou onosaia tofotofoga o le olaga. Faitau le 1 Peteru 1:7; 2:21; 3:17; 4:12–13. Ia faaiuina e ala i le molimau atu e uiga i le taua ma le aoga o le onosaia o tofotofoga o lo tatou faatuatua.

1 Peteru 2:1–17. Ua valaauina e le Atua le Au Paia ina ia tea ese ma o ese mai le lalolagi. (20–25 minute)

Tusi upu nei *filifilia, tautupu, paia*, ma le *tulaga ese* i luga o le laupapa. Ia fai atu i tamaiti o le vasega ia mafaufau faapea o loo tutu i latou i le nofoalii o le Atua. Valaaulia i latou e filifili se upu e tasi mai le lisi e pito sili ona mananao i latou e faaogaina e lo latou Tama Faalelagi e faamatalaina ai i latou. Ia fesili atu pe o le fea o tamaiti o le vasega na filifiliina le upu *filifilia*. Fesili atu ia i latou pe aisea. Toe tuu atu fesili nei mo isi upu e tolu.

Faamatala i lona tulaga lautele o le uiga o le fasi fuaitau *nuu na faatauina mai* o le tulaga ese, poo le ese lava. Faitau le 1 Peteru 2:9 ma fesili pe o le a so latou manatu i le uiga o le saunoaga a Peteru o le Au Paia o se “nuu na faatauina mai.” Ia fesili atu: Aisea ua avea ai le “nuu na faatauina mai” o se faalagina lelei? Ia fetufaai atu le saunoaga a Elder Russell M. Nelson e uiga i lenei upu:

“O lea ua tatou iloaina nei o le upu o loo i tusitusiga paia o le *faatauina mai* o loo faatusaina i ‘oloa taua,’ ‘o le faia’ poo ‘le filifiliaina e le Atua.’ I le faalagilagiina o i tatou e auauna a le Alii o *lona nuu na faatauina mai* o se faaupuga faaviivii lea i se tulaga pito sili ona maualuga” (*Liahona*, Iulai 1995, 39).

Ia talanoaina le ala e mafai ai ona avea i tatou ma “oloa faapitoa” a le Atua. Ia fesili atu: O le a le mea e ao ona faia e se tasi e ānaina ai se mea? Fai atu i le vasega e faitau le 1 Korinito 7:23 ma le Galuega 20:28 ma mataituina le tau na tofogiina mo i tatou ina ia avea ma oloa faapitoa a le Atua. Ia fesili atu: I lo tatou iloaina na tofogiina e Iesu Keriso se tau e matua maualuga lava mo i tatou ina ia avea ma *nuu na faatauina mai, filifilia, tautupu*, ma *paia*, o le a se mea e ao ona tatou faia? Vaevae le vasega i ni vaega se lua. Ia sueina e le tasi vaega le 1 Peteru 1:1–5, 13–25 ma le isi vaega e sueina le 1 Peteru 2:1–17 mo mataupu faavae e fesoasoani ia i tatou ia avea pea ma oloa faapitoa a le Atua. Lisi ia mataupu faavae i luga o le laupapa pe a mauaina e tamaiti o le vasega.

Faitau le vaega o loo faaulutalaina “O le a le Pogai o Aoaoga Faavae?” o loo i le tamaitusi o le *Mo le Malosi o le Au Talavou* (i. 6). Ia talanoaina:

- Aisea ua tuuina mai ai e le Alii ia i tatou ia tulaga faatonuina?
- E mafai faapefea i le ola ai i Ona tulaga faatonuina ona avea ai i tatou ma tagata tulaga ese mai le vaega tele o le lalolagi?
- E mafai faapefea ona fesoasoani ia i tatou le faatusatusaina o a tatou amioga ma manatunatuga i tulaga faatonuina a le Atua?

Ia molimau atu e finagalo lo tatou Tama o i le Lagi ia avea i tatou ma ni tagata tulaga ese, ma ia ese mai ia i latou o e o loo ola i le olaga i ala o le lalolagi. Ia molimau o le a ese lava i tatou ma agavaa ina ia mauaina “faamanuiaga e le mafaitaulia mai le lagi” pe afai tatou te filifili ia ola e tusa ai ma feagaiga ma poloaiga o le talalelei.

1 Peteru 3:18–20; 4:6. Na saunia e Keriso le ala mo le talaiina o le talalelei ia i latou o e ua maliliu. (25–30 minute)

Ia valaaulia se tagata o le vasega e alu atu i luma. Ia fai atu i se isi tagata o le vasega e alu atu i fafo ma tapuni le faitotoa. Ia fai atu i le tagata o loo i luma e faamatalaina lemu ma faaupupu le tala ia Iosefa Samita. Fai atu i le tagata o loo i fafo e sau i totonu, ma fesili atu i ai pe na ia lagonaina le

mea na faamatalaina atu e le isi tagata. Aisea na ia lagona pe na ia le lagonaina ai foi? Ia fesili atu i le vasega: E mafai faapefea e lenei faatinoga faataitai ona faatusaina i le lalolagi o agaga? Ia faamatala atu o e amiotonu e tuueseeseina ma e amioleaga i le lalolagi o agaga. Faitau le Mose 7:38 ma ia fesili atu:

- O ai tagata e faafanoina “I lologa”?
- O le a le “falepuipui” o le a tuuina i ai i latou?



Faitau le 1 Peteru 3:18–20 ma mataituina mea na faia e Iesu ao i ai Lona tino i le tuugamau. Ia faamatala atu o le faamatalaga o loo i le Peteru o se faupuupuina o le tala. Na mauaina e Peresitene Iosefa F. Samita, o le Peresitene lona ono o le Ekalesia, na mauaina se faaaliga o lena mea. Faitau le Mataupu Faavae ma Feagaiga 138:28–32 ma valaaulia tamaiti o le vasega e faamatalaina pe na faapefea ona mafai e Iesu “ona talai atu i na agaga. . . i se taimi puupuu lava.”

Fai atu i tamaiti e faitau le 1 Peteru 4:6, ma fetufaa'i atu le saunoaga lenei. Na saunoa mai Elder Mark E. Petersen, o le na avea ma se tasi o le Korama a le Toasefululua:

“Na faamatalaina e Iesu o ia o le Atua mo e o loo feola ma mo e ua feoti, ma o le mea moni lava, o loo feola foi e ua feoti ona o ia. (Tagai Luka 20:38.)

“Ae peitai, e tasi lava lana talalelei; ma talu ai e tutusa e o feola ma e ua feoti ona o ia, e ao ai foi ona faaolaina e o loo feola ma e ua oti i mataupu faavae lava nei e tasi o le talalelei. E le faailoga tagata le Alii” (Liahona, Oketopa 1976, 14).

Na aoa mai Elder Gordon B. Hinckley, o le na avea i le taimi lea ma se tasi o le Korama a le Toasefululua:

“I le tulaga o e ua maliliu e ao ona faia ni galuega fesui mo i latou pe afai e faamasinoina i latou e tusa ai ma tagata i le tino, ma ina ia faataunuuna lenei mea e ao ona faailoaina i latou; ma o lea ua faia ai le polokalama sili i mea tau gafa a le Ekalesia o Iesu Keriso o le Au Paia o Aso e Gata Ai. Sa le i faatuina ina ia faamalieina ai le sagisagi atu e faia se mea e fiafia i ai, ae ina ia faataunuuna ai faamoemoega e faavavau a le Atua” (Liahona, Oketopa 1977, 66).

Na saunoa mai Elder Joseph Fielding Smith:

“Na amataina e le Faaola lenei galuega sili ina ua ia alu atu ma talai i agaga na i le falepuipui, ina ia faasalaina i latou i le tino i la le tagata, (poo se isi faamatalaga, e tusa ai ma mataupu faavae o le talalelei) a e ola ai i le agaga i la le Atua, e ala i lo latou salamo ma le taliaina o le misiona a Iesu Keriso o le na maliu mo i latou” (Doctrines of Salvation, 2:132–33).

Ia talanoaina fesili nei:

- Aisea na faasoo ai e Iesu le va ma saunia le ala mo le talalelei ina ia folafolaina atu ia te i latou i le falepuipui o agaga?
- O le a le uiga o le “faamasinoina e tusa ma le tagata i le tino” ma le “ola i le agaga i la le Atua”?

Tautino atu ona e alofa le Tama Faalelagi ia i tatou, o lea na ia saunia ai se fuafuaga o le faaolataga ina ia mafai ai ona tatou aoaoina mea uma ma talia le savali o Lana talalelei.

1 Peteru 5:1–11. E mafai e taitai o le Ekalesia ona saunia i tatou mo le Afio Faalua Mai o Iesu Keriso ma mo le ola e faavavau pe afai tatou te lotomaualalo, usitai i a latou fautuaga, ma aoa e faatuatua i le Tama Faalelagi. (30–35 minutes)

Faaali atu se ata o le Au Peresitene Sili. Tuu atu i tamaiti o le vasega e faailoa mai ia igoa o alii taitoatasi. Ia auauai i le faitauina o le savali a le Au Peresitene Sili o loo i itulau 3–5 o le tamaitusi *Mo le Malosi o le Aualavou*. Ona talanoaina lea o fesili nei:

- O a ni lagona o le Au Peresitene Sili e uiga i le aualavou o le Ekalesia?
- O le a sou manatu aisea na latou faaaluina ai le taimi ma taumafaiga ina ia maua ai lenei tamaitusi?
- O le a lo latou faamoemoe o loo i ai mo le aualavou?
- O le a se mea e mafai ona e faia ina ia fesoasoani ai ia i latou ia iloa lenei faamoemoe?

Ia faamalamalama atu faapea o loo faaalua mai i tusitusiga paia e ao i taitai o le Ekalesia ona fesoasoani e saunia i tatou mo le Afio Faalua Mai o Iesu Keriso. Faitau faatasi ma tamaiti o le vasega le 1 Peteru 5:1-4, ma talanoaina po o le a le uiga o le:

- “Tausi le lafu” (f. 2).
- Ia “leoleo i le lafu o ia te outou” (f. 2).
- Ia avea ma “faaa’oa’o i le lafu” (f. 3).

Fesili atu: O ai le “Leoleo Mamoe silisili”? Faitau le 1 Peteru 2:21 ma vaai mo auala e lua ua faamanuiaina ai e Iesu o tatou olaga. Fesili atu:

- E mafai faapefea e le faataitaiga a Iese ma Lona puapuaga ona saunia ai i tatou mo Lona afio mai?
- Faitau le 1 Peteru 2:25. O a ni auala e pei ai i tatou o ni “mamoe ua se”?
- E mafai faapefea ona tatou avea Iesu ma “Leoleo Mamoe ma Epikopo o o [tatou] agaga”?

Na tuu atu foi e Peteru le fautuaga i tagata talavou. Faitau le 1 Peteru 5:5-11 e vaai ai mo upu ma fuaitau autu e faamatalaina ai lenei fautuaga, ona lisi lea i luga o le laupapa. Ia talanoaina pe mafai faapefea ona fesoasoani lenei fautuaga i le autalavou ina ia saunia lelei ai i latou mo le afio mai o le “Leoleo Mamoe silisili.”

Fesili atu i tamaiti o le vasega pe latou te iloina ni tagata o loo misi mai le seminare po o se latou vasega mulimuli a tamaitai talavou po o se fonotaga a le korama a le Perisitua Arona. Fesili atu: Aisea e taua ai le iloina po o ai i latou? Faitau atu le saunoaga lenei mai ia Peresitene Gordon B. Hinckley:

“Ona o le faatupulaia o le fuainumera o tagata liliu mai, e ao ona tatou faia se taumafaiga tele naua e fesoasoani ai ia i latou pe a latou mauaina lo latou ala. E manaomia e i latou uma taitoatasi ni mea se tolu: o se uo, o se matafaioi, ma ia ‘faafaileleina i le afioga lelei a le Atua’ (Moronae 6:4). O lo tatou tiute ma le avanoa e sauniaina o nei mea” (i le Conference Report, Ape. 1997, 66; po o le *Liahona*, Iulai 1997, 57).

Fesili atu i tamaiti o le vasega mo ni auala patino e mafai ona tatou mulimuli ai i le fautuaga a Peresitene Hinckley faatasi ma i latou tatou te iloa.

Ia molimau atu o le Alii ma Lana Ekalesia e manaomia ai tagata uma, e aofia ai le autalavou, ina ia faataunuuina fuafuaga a le Atua i aso e gata ai. Ia uu atu i luga ia tusitusiga paia ma le tamaitusi *Mo le Malosi o le Autalavou*, ma uunaia tamaiti o le vasega ina ia usiusitai i fautuaga e tuuina mai i taitai faamaoni o le Ekalesia mai tisipenisione uma lava.

O LE TUSI E LUA A PETERU

Tusitala ma e na Tusi Atu Iai: O le tusi e 2 Peteru na tusi atu e Peteru i le Au Paia faamaoni i Asia Toaitiiti (tagai 2 Peteru 1:1; 3:1; tagai foi 1 Peteru 1:1).

Talaaga Faasolopito: Atonu na tusia e Peteru lana Tusi lona lua mai Roma i se vaitaimi i le va o le T.A. 64 ma le 67. E le pei o lana tusi muamua, lea na fesoasoani ai i le Au Paia ina ia tatalia ia sauaga mai fafo, o lana tusi lona lua na ta'ua ai le liliuese i totonu o le Ekalesia lea na faamata'uina ai le lumanai o le Ekalesia. O perofeta ma faiaoga pepelo ua faatupuina ia "vaevaeaga e fano ai, ma latou faafiti le Alii na ia faatau mai ia te i latou" (2 Peteru 2:1).

Autu: O le autu faatumutumuina i lenei tusi pe faapefea lea ona mauaina e se tasi se malamalama i lo tatou Alii o Iesu Keriso. E mafai ona vaevaeina le tusi i ni vaega tetele se tolu. O le vaega muamua e aoaina ai lo tatou mauaina o se malamalama i lo tatou Alii o Iesu Keriso e ala i le avefa lea ma tagata e "tofo i le natura paia" ma ia "faamauiina lo [tatou] valaauina" (tagai 2 Peteru 1). O le vaega lona lua e faatusatusa ai lenei malamalama moni ia Iesu Keriso ma le malamalama sese ma vaevaeaga e tuuina mai e tagata liliuese (tagai 2 Peteru 2). O le vaega lona tolu o loo faamatalaina ai le faamoemoe lea e oo mai ia i latou o e manaomia se malamalama moni i le toe afio mamalu mai o le Alii i le lalolagi, lea o le a nonofo ai e amiotonu (tagai 2 Peteru 3). Na tusi atu e Peteru le tusi ina ia uunaia ai le Au Paia ina ia faamautinoaina o latou valaauga ma le filifiliana e ala le ai le ola ma le faamaoni i le talalelei ma le tuputupuae i le malamalama o le Alii.

2 Peteru 1–3

Faatomuaga

Na saunoa mai Peresitene Harold B. Lee: "Ou te manatu i Tusi a Peteru o nisi ia o tusitusiga sili ona manino ua tatou maua i le Feagaiga Fou. Pe a ou manao e sii mai se mea ou te maua ai ni mafauaiga musuia ou te toe foi i tua i se tasi o Tusi a Peteru" (semina a sui risone, 5 Ape. 1973, 2). A o e faitauina lenei Tusi, ia maitauina ia mafauaiga musuia na e oo mai ia te oe, ma outou fetufaai ai ma au tamaiti o le vasega.

Suesue ma le agaga tatalo le 2 Peteru 1–3 ma mafauaiga i mataupu faavae nei ae le'i saunia au lesonea.

O Nisi Mataupu Faavae Tava o le Talalelei e Saili Iai

- E tatau ona tatou atinaeina ni uiga faaleatua ina ia maufofi ai i le ola e faavavau (tagai 2 Peteru 1:1–9).
- E fesoasoani le Agaga Paia ia i tatou ina ia malamalama i tusitusiga paia (tagai 2 Peteru 1:20–21).

- E mafai e le Agaga Paia ona fesoasoani ia i tatou ia iloaina ma aloese mai faiaoga ma aoaga sese (tagai 2 Peteru 2:1–2, 9).
- O le ola ai i le talalelei e fesoasoani lea ia i tatou e aloese mai le faaseseina i aoaga sese (tagai 2 Peteru 2:1–19).
- O le a tele le leaga e tauaveina e tagata liliuese nai lo tagata e le'i faalogo lava i upumoni o le talalelei (tagai 2 Peteru 2:20–22; tagai foi Alema 24:30; MFF 82:3).

Fautuaga mo le Aoao Atu

Filifili mai manatu nei, pe faaoga ni ou lava manatu, a o e sauniaina au lesonea mo le 2 Peteru 1–3.

2 Peteru 1:1–9. O a tatou taumafaiga e tatau ona i ai i lenei olaga atoa o le atinaeina lea o uiga faaleatua lea o le a saunia ai i tatou mo le ola e faavavau. (20–25 minute)

Fesili atu i tamaiti o le vasega:

- O le a le mea sili e te manao ai i le aoga? i le olaga faaleaiga? i le galuega?
- I le tulaga lautele, o le a le mea e tatau ona e faia ina ia ausia ai au sini?

Na saunoa atu ia Peteru i le Au Paia e tusa ai ma lo latou manao ina ia avefa e faapei o le Tama Faalelagi. Ia valaaulia tamaiti o le vasega e faitau le 2 Peteru 1:1–4. Fesili atu: O a upu na faaogaina e Peteru i le fuaiupu e 4 e faamatalaina ai le avefa e faapei o le Atua? Na faamalamalama mai e Peresitene Tavita O. Makei, le fuaitau lea o le "tofusia ai i le amioatua," e faapea:

"Na iloa e [Peteru] le uiga o le ootia i le faaleagaga, ia tulai ae nai la le tino, o faalogona, ma le tofusua i le paia o le Agaga o le Atua" (i le Conference Report, Oke. 1961, 90).

Ia valaaulia tamaiti o le vasega e faamatala atu po o le a so latou manatu i le uiga o le saunoaga a Peresitene Makei. Tuu atu ia i latou e ta'ua mai ni faaitaiga pe mafai faapefea ona tatou mulimuli i le fautuaga a Peteru.

Tusi se ata o se laau faatasi ma ni li'o se valu e fai ma ona fua. Faaigoa le laau o le *uiga paia*. Ia valaaulia tamaiti o le vasega e faitau le 2 Peteru 1:5–8. Tuu atu ia i latou e faaigoa ia fua o le laau e tusa ai ma uiga e valu o loo i ai i nei fuaiupu, ona talanoaina faapuupuu lea o uiga taitasi. Ia fetufaai atu le faamatalaga leni mai ia Peresitene Ezra Taft Benson:

"O uiga na ootoina mai e Peteru o ni vaega ia o uiga paia, po o uiga o le Faaola. O uiga nei e ao ona tatou faaitaitai i ai pe a tatou mananao e avefa faapei o Ia"

(i le Conference Report, Oke. 1986, 59; po o le *Liahona*, Ian. 1987, 45).

Atonu e te manao e talanoaina ia fesili nei:

- O ai le tagata e ona ia uiga ia o loo faamatalaina mai i le 2 Peteru 1:5–8?
- O ai lea ua aoaoina i tatou ina ia tatou avea faapei o ia? (tagai 3 Nifae 27:27).
- O le a faapefea ona tatou latalata atu i le Atua i le sailia o nei uiga?
- Afai tatou te saili e faaitaia nei uiga, o le a faapefea ona aafia ai a tatou filifiliga i aso taitasi?

Ia molimau atu faapea o le avea faapei o Keriso o se taumafaiga faifaipea. Tuu atu i tamaiti o le vasega e toe faitau le 2 Peteru 1:8, e faamamafa ai le manaomia ona fuatele mai i le malamalama ia Iesu Keriso. Fesili atu: E faapefea ona avea le iloa atili e uiga i le Faaola ma se faamanuiga nai lo le leiloa o se mea? Ia faamamafa atu faapea o le iloa atili e uiga ia Iesu Keriso o le a fesoasoani lea ia i tatou e faaitaia Ona uiga paia.

Tuu atu i tamaiti o le vasega e faitauina le faauigaina o le upu *alofa* i le Taiala i Tususiga Paia. Atonu latou te manao e faailoga ia upu “auala o le fesoasoaniga po o le malosi faalelagi” ma le “mana e mafaia ai.” Ia faamalamalama atu faapea o le mana e suia ai ma tofusia ai i le uiga paia e maua mai lea i lo tatou faalagolago ma le lotomaulalo i le alofa o le Atua. Tuu atu i tamaiti o le vasega e faitauina le 2 Peteru 1:9–10 ma maitauina ai le esesega i le va o i latou e le o ia i ia uiga faaleatua (f. 9) ma i latou o e taumafai ma le maelega ina ia faaitaia ia uiga (f. 10). Ta’u atu i tamaiti o le vasega e tatau ona ‘aia ne’i faalotovaivaiina i tatou pe afai e le vave oo mai nei uiga. Ia fetufaai atu le fautuaga leni mai ia Peresitene Iosefa Filitia Samita e uiga i le atoatoa:

“O upu a le Faaola i le Lauga i luga o le Mauga,, ‘O leni, ia atoatoa ona lelei o la outou amio , e pei o lo outou Tama oi le Lagi e atoatoa ona lelei o ia’ [Mataio 5:48], ua matuai iloga lava ona faaogaina sese e isi pe ua faatapulaa foi lona faaogaina. Na silafia lelei e Faaola e le mafai e le tagata i la le tino ona oo atu i le sili autu o le atoatoa e pei o lona Tama Faalelagi, ae o iinei i le olaga faaletino o le nofoaga lea e tatau ona faataatia ai le faavae. Ona tatou faaauau ai lava lea amioga mama ma lea amioga mama, e le gata i leni olaga, ae faapea foi i le faavavau, ma e mafaia lava e soo e agaga faamaoni ona mauaina lena atoatoa” (Answers to Gospel Questions, 4:72).

2 Peteru 1:20–21. Ina ia malamalama i tusitusiga paia, e tatau ona tatou suesueina i latou ma le Agaga. (10–15 minute)

Ia faaali atu i lau vasega se tusi o loo tusia i se isi gagana ese lea e le mafai e se tamaitiiti o le vasega ona malamalama. Tuu

atu i se tamaitiiti e taumafai e faitau. Faaali atu i tamaiti se seti o tusitusiga paia ma fesili atu po o le a le gagana o loo tusiaina ai. E i ai nisi atonu o le a latou fautuaina mai faapea o le faaEperu, faaEleni, po o le Igilisi. A mae’a ni nai fautuaga ona faitau lea o le 2 Nifae 32:2–3 ma fesili atu:

- O le a le “gagana a agelu”?
- O le a le mana e tautatala ai ia agelu?
- O fea e mafai ona tatou faitau ai i afioga a Keriso?

Faitau le 2 Peteru 1:20–21 ma faamalamalama atu faapea e ui lava e moni faapea o tusitusiga paia e faaliliuina mai se isi gagana i nisi gagana, ae na mua’i faaaliina atu i perofeta e ala i le mana o le Agaga Paia. Tuu atu i se tamaitiiti o le vasega e faitauina le saunoaga leni mai ia Elder Delbert L. Stapley, o le sa avea ma sui o le Korama a le Toasefululua:

“Afai e tautatala ia perofeta i le mana o le Agaga Paia, ona moomia lea ona faaliliuina sa’o e le Agaga Paia ia aoaoga a tagata paia. O lea la, o i latou e le mauaina le Agaga o le Atua e le mafai ona malamalama i mea a le Atua” (i le Conference Report, Oke. 1966, 113; tagai foi 1 Korinito 2:10–11, 14; 2 Nifae 25:4).

Ia talanoaina pe aisea tatou te manaomia ai le fesoasoani a le Agaga Paia ina ia malamalama lelei ai i tusitusiga paia. Fesili atu i tamaiti o le vasega e fetufaai atu ni mea na latou aoaoina i le auala e valaaulia ai le Agaga a i latou suesuega o tusitusiga paia.



2 Peteru 2:1–20. O le ola i le talalelei e fesoasoani ia i tatou e aloese mai aoaoga ese. (40–45 minute)

Tusi le faaupuga leni i luga o le laupapa: *Liliuese: O se liliuese mai le upumoni*. Fesili atu: Pe faatatau ea leni upu i le taimi ua tuanai, le taimi nei, po o le lumanai? Aisea? Ta’u atu i tamaiti o le vasega faapea ua lapataina i tatou e le Alii i auala e mafai ai ona taitaieseina i tatou mai le upumoni. Fesoasoani ia i latou ia malamalama e faaoga e Satani ia auala lava e tasi o le taufa-asese i aso nei e pei ona i ai i taimi o Peteru. Ina ia faatinoina, ia vaeave le vasega i ni vaega laiti ma tuu atu i ai se fasi pepa. Ia tofiaina ia vaega taitasi e faitauina se poloka o mau se tasi pe sili atu foi ma tusi se ata e faailoa mai ai le faaogaina o le taufa-asese. E le tau manaomia ona e faaogaina uma ia poloka o mau.

- 2 Peteru 2:1–2
- 2 Peteru 2:12–13
- 2 Peteru 2:18–19
- 1 Ioane 2:9–11
- Iuta 1:4
- Iuta 1:16
- Iuta 1:19

Ia valaaulia ia vaega e faaali atu a latou ata i le vasega. Faitau le mau e o faatasi ma ata taitasi ma faamalamalama atu ai le lapataiga o loo tuuina mai ai.

Ia faamalalama atu faapea o le Ekalesia i le taimi o Peteru sa feagai ma le liliuese. Sa sauaina le Au Paia e le gata ai tagata e le o ni Kerisiano ae faapea foi i nisi lava tagata i totonu o le Ekalesia o ua na latou tuua le upumoni ma teenaina ia taitai o le Ekalesia. O nei tagata liliuese na matuai sili ona matautia i tagata fou o e e mu'amu'a a latou molimau. E le faapea la ua aunoa i tatou ma nei foi ituaiga fili i aso nei. Ia fetufaai atu le saunoaga lenei a Peresitene Gordon B. Hinckley:

“E pei lava ona mautinoaina o le galuega lenei a le Alii, o le a faapea ona i ai foi ia faafeagai. O le a i ai i latou, atonu e le toatele, o e o le a i ai ni a latou faaupuga taufaasese ma fuafuaga atamamai o le a faasalalauina ai le masalosalo ma saili e ta'ufaata-uvaaina le faavae na faavaeina ai lenei galuega. O le a na so sina vaitaimi lava e lauiloa ai i latou. O le a na o sina vaitaimi e faamaonia ai i latou e le au masalosalo ma manatunatuga ma faitioga. Ae o le a galoma atu lava ma o le a faagaloina e pei ona sa latou i ai i le taimi ua tuanai” (i le Conference Report, Ape. 1994, 76; po o le *Liahona*, Iulai 1994, 60).

Fesoasoani i au tamaiti o le vasega ia malamalama e mafai ona tatou aoaoina ina ia tetee atu i le liliuese e ala lea i le faitauina o mea na oo i ai le Au Paia i taimi o Peteru. Tusi mau nei i luga o le laupapa:

- 1 Ioane 2:4–5
- 1 Ioane 2:15
- 1 Ioane 3:9–10 (tagai foi FIS, 1 Ioane 3:9)
- 1 Ioane 4:7–10
- Iuta 1:20

Ia tofi ni tamaiti eseese e faitau leotele se tasi o poloka o mau mai le laupapa, e vaai ai po o le a le mea o loo aoao mai ai e uiga i le aloese mai le liliuese. A maea ona latou faitauina le fautuaga, ona tuu atu lea ia i latou e o mai i luga o le laupapa ma tusi i lalo mea na latou mauaina e soo atu i le mau sa latou faitauina. Ia talanoaina pe mafai faapefea e le ola ai i le talalelei ona faamalosi se tagata e tetee atu i le faaseseina. Faitau atu le fautuaga a Elder Marvin J. Ashton:

“I o tatou aso nei ua toatele naua i latou o e ua luluina ia fatu o le felotoai ma le feaina'i. Faatasi ai ma upumoni ma tuuaiga sese, ua latou matuai galulue ai lava e taitaiina atu tagata o le Ekalesia a Iesu Keriso i le liliuese. . . . O i latou o e ua matuai mausali lo latou tautinoga i le ola ai i le talalelei a Iesu Keriso o le a le faafenumiaiina, lofituina ai, pe taitaiseseina ai” (i le Conference Report, Oke. 1983, 89; po o le *Liahona*, Ian. 1984, 63; tagai foi Mosaea 23:14).

Ia molimau atu o le ola ai i le talalelei e fesoasoani ia i tatou ia iloa ma aloese mai aoaoga ma faiga taufaasese.

2 Peteru 2:20–22. Afai tatou te iloa e moni le talalelei ma toe liliuese mai a tatou molimau, ua sili atu ona leaga i tatou nai lo lo tatou leiloaina o le upumoni. (15–20 minute)

Aumai se ipu pesini o loo i ai ni palapala ma ni tamai ipu 'ai se lua o loo i ai ni keke, falaoa, po o nisi meaai lea e mafai ona 'ai i lima. Ia valaaulia ni tamaiti o le vasega se toalua e o mai i luma o le vasega. Tuu atu i se tasi o i laua e fai ni polo i le palapala. Ia saunia se auala e fufulu ai o la lima. Ona tuu atu lea i se tasi o i laua e fai se isi polo i le palapala. Ia tuu atu se ipu mea'ai ia i laua uma ma valaaulia e 'ai loa. Fesili atu: O le fea tamaitiiti o le vasega o loo mafai ona lelei le tulaga e 'ai ai? Aisea?

Filifili se tamaitiiti o le vasega e faitau le 2 Peteru 2:20–22. Ia valaaulia isi tamaiti o le vasega e faalogo a o faitau tamaiti o le vasega ma sii o latou lima pe a latou vaai atu loa e fesootai ma le lesona faatino. Fesili atu:

- O le a le mea e mafai ona tatou faatusatusaina i ai le tamaitiiti o loo eleelea ona lima?
- O le a le mea e mafai ona tatou faatusaina i ai le tamaitiiti o loo mama ona lima?
- Aisea e sili atu ai ona tatou leaga i le toe foi atu i le agasala pe a ua uma ona salamo mai ai?

Ia faamamafa atu faapea na lauga atu ia Peteru i tagata o le Ekalesia o e na latou iloa le talalelei. Tuu atu i tamaiti o le vasega e faitau lemu le Alema 24:30 ma le Mataupu Faavae ma Feagaiga 82:3. Ia valaaulia i latou e faamalalama atu pe faapefea ona avea nai fuaiupu ma faamalosi i le aoaoga a Peteru. Ia fetufaai atu le lapataiga a Peresitene Spencer W. Kimball:

“Pe a uma ona mauaina o sauniga tatau ai mo le faaolaina e ia i le papatisoga, meaalofa o le Agaga Paia, sauniga o le malumalu ma faamauga faalemalumalusa —e tatau ai i se tasi ona tausia e ia o feagaiga uma na osia ai. E tatau ona tumau o ia i le faatuatua. E tusa lava pe o le a le lelei o galuega na auauna atu ai epikiopo po o le peresitene o le siteki, po o se isi tagata ae afai o le a toe sese mai ai o ia i se taimi mulimuli ane, ma le toe mafai ona ai o ia i le amiotonu 'seia oo i le gataaga,' o lona uiga e leai se aoga o galuega lelei uma na ia faia. O le mea moni lava, o se tasi o le ua auauna atu ae tei ua toe liliuese mai ai e mafai ona faatusaina o ia i le vaega lea, e pei ona taua e Peteru, 'ua toefoi le uli i lona lava puaiaga.' (Tagai 2 Peteru 2:22.)” (O le *Vavega o le Faamagalalo Atu*, 121).

Ia faaii i le talanoaina o fesili nei:

- Talu ai ona e sili atu le le faalogo i le talalelei nai lo le faalogo i ai ona toe foi lea i a tatou agasala, aisea la tatou te tuu atu ai i lea tulaga matautia?
- O le a le mea ua ofoina mai e le talalelei lea e aoga ai le tauaveina o lea tulaga matautia?

Tusitala: O Ioane, o se tasi o uluai Aposetolo e Toasefululua a Iesu, ua lauiloa o ia o le tusitala o le Ioane 1, 2, ma le 3. E ui lava e le o ta'ua le igoa o Ioane i totonu o nei tusi, ae o loo i ai ni faamatalaga faamaonia se tolu e faailoa mai ai o ia o le tusitala. Muamua, o uluai tusitala o le senituri lona lua latou te fai mai o ia le tusitala. Lona lua, o tusi e aofia ai le tusiaina o upu ma le ituaiga tusitusi e pei lava o le Talalelei a Ioane. Lona tolu, na tusia e le tusitala faapea na ia pa'i ma vaai i le tino o Iesu, o se faamautinoaga moni lava lea o se Aposetolo (tagai 1 Ioane 1:1–4; 4:14).

O e na tusi atu i ai: O e na tusi atu i ai mo le 1 Ioane e le o matuai faailoa manino maia i totonu o le tusi. Ae peitai, o faamatalaga o loo faailoa mai ai na tusi atu Ioane i e na talitonu (tagai 1 Ioane 1:3–4; 2:12–14). E mafai ona faapea na tusi atu i le Au Paia i vaega eseese. O le tusi o loo tuuina mai ai sina faamaoniga po o le leai foi o se faamaoniga i se nofoaga po o le taimi na tusia ai. Afai e sa'o na umi ona nofo ia Ioane i Efeso, e mafai la ona tusia mai le tusi mai iina i le va o le T.A. 70–100.

Talaaga Faasolopito: Na tulai mai ia tagata taufaasese mai uluai tagata o le Au Paia. O a latou aoaoga sese ua lauiloa e le mafai ona fesootai atu se tagata i le Atua seiloga e faafesootaia se agelu. Na faasa'oina e Ioane ia aoaoga sese a tagata nei e ala lea i le tuuina atu o se molimau malosi i le i ai o le Faaola i la le tino (tagai 1 Ioane 1:1–2; 4:2, 14; 5:6).

1 Ioane 1–5

Faatomuaga

Na manao Ioane e puipuia mai ia le Au Paia mai i faiga faataumaoui o le Au le Talitonu. Na ia teena ia manatu o le Au le Talitonu i le faamalosi atu lea i le Au Paia e faaauau pea lo latou talitonuga ma ola i mea ua mae'a ona aoao atu e uiga i le paia o le ave o Iesu ma alo. Na aoao mai e Peresitene Ezra Benson e faapea:

“A tatou faamuamua le Atua, ona sologa lelei ai lea o isi mea uma pe toulu ese foi mai o tatou olaga. O lo tatou alolofa i le Alii o le a pulea ai manaoga mo o tatou lagona alofa, o le tulaga manaomia o o tatou taimi, o faanaunauga tatou te tulimatai, ma le faasologa o mea tatou te faamuamua.

“E tatau ona tatou faamuamua le Atua nai lo *isi tagata uma* i o tatou olaga” (*Liahona*, Iulai 1988, 9).

Ia suesue ma le agaga tatalo, le 1 Ioane 1–5 ma manatunatu i mataupu faavae nei a e le'i saunia au lesona.

O ni Mataupu Faavae Tava e te Sailia

- E tuputupu a'e lo tatou malamalama ma le alofa i le Atua pe a tatou tausia Ana poloaiga (tagai 1 Ioane 1:1–7; 2:1–6; 5:1–3; tagai fo'i i le Ioane 14:15, 21, 23; 15:10).
- E faaalua lo tatou alolofa i le Atua pe a tatou alolofa ma auauna atu mo isi (tagai 1 Ioane 3:10–18, 23; 4:7–10, 20–21; tagai fo'i i le Ioane 13:34–35; 15:12–13).
- “O le alofa atoatoa e faateaeeseina ai le fefe” (1 Ioane 4:18).
- O le Au Paia e fananau mai i le Atua, e ala mai i le talitonu ia Keriso ma le tausia o Ana poloaiga (tagai 1 Ioane 5:1–4; tagai fo'i Alema 5:14–30).

Fautuaga mo le Aoao Atu

Filifili mai i aitia nei, pe faaaogaina ni au lava, a o e saunia lesona mo 1 Ioane 1–5.

1 Ioane 1:1–2:11. O le tausia o poloaiga a le Atua e aumaia ai i tatou i le malamalama o le Atua. (40–45 minute)

Tape ia moli o le potu ae tuuina i luga o se laulau ia ni ituaiga moli eseese e (pei o moliuila, moli tu, moli laau kerisimasi). Fesili: Aisea tatou te faalagolago tele ai i le malamalama?

Ki moli. (Afai e sili atu le malamalama o isi moli, e mafai ona e faaaogaina.) Tusi le upu *malamalama* i luga o le laupapa. Fai i tagata o le vasega e faamalalama mai ia ni uiga vaaia se tele o moli ma lisi i luga o le laupapa. (Faataitaiga, o le malamalama e mafai ai ona vaai, maua ai le ola, e mafai ona toe faatepa, e eseese lona malosi.)

Faamalalama atu e i ai fo'i uiga o moli e mafai ona faatusatusa i le malamalama faaleagaga. E mafai ona maua ai lo tatou manuia mai i le faatusatusaina o le lua. Vaevae le vasega i ni vaega se lua. Ia tuu le 1 Ioane 1:1–10 i le tasi vaega ae ave atu le 1 Ioane 2:1–11 i le isi. Faatonu i latou e faitau a latou fuaiupu ma saili ni upu po o ni fasi fuaitau e faatatau i le malamalama. Talanoaina mea na latou maua. Talanoaina pe faapefea ona tutusa uiga faaleagaga o le malamalama ma ona uiga faaletino.

Tusi fesili nei i luga o le laupapa. Ia tufatufa atu fesili i le vasega ma sue ia mau o loo maua ai ia tali:

- 1 Ioane 1:1–3. O le a le mea na molimautino ai Ioane? O a ni mau tauloto o loo tautala i molimautino ia Keriso?
- 1 Ioane 1:5–6. E faapefea ona fesootea nei fuaiupu e lua ma le Mataio 6:24?
- 1 Ioane 1:7. E faapefea ona tatou “savavali i le malamalama”? E faapefea i le mulimulita’i i faataitaiga a Keriso ona “[faamamaina] i tatou mai agasala uma”?
- 1 Ioane 1:8–2:1 (tagai FIS, 1 Ioane 2:1) E faapefea i le aumaia o a tatou agasala i le malamalama (ta’uta’u atu) ona saunia tatou e salamo?
- 1 Ioane 2:3–4. O le a sou lagona i le Faaola pe a e taumafai ma le malosi e faataunuuina le mea o loo fetalai mai ai? E i ai se faalagona ese ia te Ia pe a e le faalogo i Ana upu? Aisea?
- 1 Ioane 2:5–6. E faapefea i le tausia o upu a le Faaola ona faaalai ai Ana faataitaiga i o tatou olaga?

Talanoaina ia fesili faatasi ma le vasega. (*Manatua:* O le tali i le fesili o le mau tauloto o le Esoto 33:11; Luka 24:36–39; MFF 76:22–24.)

E mafai ona faai’uina i le talanoaina o mataupu faavae e uiga i le malamalama o loo aoaoina mai i mau nei: 1 Ioane 1:7; Mataio 5:14–16; 3 Nifae 18:16, 24; Mataupu Faavae ma Feagaiga, 88:67; 93:36–37. Fautua atu i tagata o le vasega a mae’a ona faitauina ia nei mau ona latou fatuina lea o se faasologa o mau i le tusia lea o le tusi o le isi mau i autafa o le itulau. A mae’a ona latou faitauina uma ia mau, ia latou faaatoaina le faasologa o mau i le tusia lea o le tusi o le mau muamua i tafatafa o le mau mulimuli.

1 Ioane 2-5. E faamanuiaina i tatou e le Tama Faalelagi pe a tatou faaalai lo tatou alofa mo Ia i lo tatou alolofa lea ma auauna atu i isi.

(35–40 minute)

Ia faaalai se ata o se fatu tele lanumumu. I le itu tauagavale, tuu ai se ata o le Faaola. I le itu taumatau, tuu ai ia ata o mau ma ni ituaiga tagata eseese, e pei o se aiga, tamaitiiti o le vasega, ta’ita’i o atunuu, po o se perofeta. Fesili i le vasega pe latou te mautinoa le mea o loo taumafai le ata e ta’u mai. (O se tali talafeagai o le sootaga o le alofa mo le Atua ma le alofa mo isi.)

Tusi le siata leni i luga o le laupapa. Fesili i le vasega e filifili ma faitau le leoa ia se mau se tasi mai le siata ma saili ni tali o fesili e lua.

1 Ioane

Alofa mo le Atua	2:5	5:3	3:11, 23	4:20–21	3:16–18	4:9–11
O le a se tala a leni mau e uiga i le alofa?						
O le a sona uiga ia te a’u						
Tuufaatasi ma ootooto mai manatu uma.						

A mae’a ona talanoaina lea o mea na latou aoaoina. Faatumu le siata a o fai mai ia manatu a tagata o le vasega e uiga i fuaiupu sa latou faitauina (po o le valaaulia o tagata o le vasega e o mai i le laupapa ma tusia a latou tali). Fesili i tagata o le vasega po o a mea o loo aoaoina mai e Ioane e uiga i le alofa atu i le Atua mai i mau ma tusia a latou tali i le laina o “Tuufaatasiga ma ootootoga”. (O ni tali talafeagai e aofia ai, o le tatou alofa mo Keriso e tuputupu pea a o tatou faalogo ia te Ia; e le mafai ona tatou alolofa moni i le Atua e aunoa ma le alolofa atu i isi; ma e sili ona faaalai lo tatou alofa i le mulimuli i faataitaiga a le Faaola i le fesoasoani atu lea i isi.)

Fai i le vasega e faitau ma manatunatu i le 1 Ioane 4:18–19. Ona faitau lea o le faamatalaga leni a Elder Jeffrey R. Holland, o se sa avea ma sui o le Au Fitugafulu:

“O le olaga e i ai ona atuatuvaalega ma ona foi toilalo. O nisi taimi e i ai faaletonu, ua tau lē fe’a’uta’i. I nisi o taimi i le olaga faaletagata lava ia ma le faalaua’ite, ua leai ai se malosi e faaauuina ai. E i ai ia taimi ua le faamaoni nisi o tagata e tusa ai ma le tatou va, po o ua faaletonu le tamaoiga ma isi fuafuaga, ma ona o faigata o le olaga ma le lototiga e mafai ai ona tatou maua le lagona tuulafoaiina.

“Ma a oo mai ia taimi faigata faapea ia i tatou, ou te molimau atu e i ai le mea e tasi e le mafai ona tuulafoaiina i tatou. E tasi le mea e tutoatasi i faigata o taimi, o puapuaga uma, ma faalavelave uma, ma agasala. E tasi le mea e le mafai ona uma...o le alofa mama lea o Keriso.

“...Na o le alofa mama o Keriso o le a fesoasoani ia i tatou. O le alofa o Keriso e onosai, ma e agamalu. O le alofa o Keriso e lē faafefeteina ma e lē faaitaitagofie foi. E na o lona alofa mama e mafai ai e ia—ma i tatou—ona lavātia mea uma, faamoemoe i mea uma, ma onosa’ia mea uma” (*Liahona*, Ianuari 1990, 26).

Aoao atu i le vasega, a o tuputupu a’e lo tatou alolofa mo le Atua, o le a Ia faamanuiaina i tatou i le lagona sili atu o le mautinoa, ma aveese ai lo tatou atuatuvaale.

O LE TUSI E LUA A IOANE

Tusitala: O Ioane le Aposetolo ua iloatino o ia na tusia le 2 Ioane (tagai i le faatomuaga o le tusi 1 Ioane itulau 248).

O e Na Tusi i Ai: O lenei Tusi na tusia mo “le tama’ita’i filifilia ma lana fanau” (f.1). E le o matua mautinoa pe sa talanoa atu ia Ioane i ni tagata faapitoa pe sa talanoa atu i tagata o le Ekalesia i se gagana faafaatusa.

Talaaga Faasolopito: O le talaaga o le 2 ma 3 Ioane e tai tutusa ma le tusi muamua a Ioane (tagai faatomuaga o le tusi 1 Ioane.). O lo o taumanatu sa tusia nei tusi e lua pe tusa o le T.A. 85–95 i se mea i totonu o le malo o Roma.

Autu: O le Au Paia i aso anamua sa latou faatagaina ia ta’ita’i ma faiaoga o le Ekalesia sa femalaga’i, e api i o latou aiga (tagai 3 Ioane 1:5, 6). O faiaoga pepelo foi ma e na liliuese sa faalauteleina la latou savali o le Le Talitonu, ma sa latou femalaga’i fo’i ma faataigamalieina le agalelei o tagata o le Ekalesia. Sa aioi atu Ioane i lana au faitau ia faaogaina ia musumusuga ina ia alo ese ai mai i ia ituaiga tagata, ne’i te’i ua lagolagoina e le Au Paia le talaiga o mea pepelo.

2 Ioane 1

Faatomuaga

Ua talitonu ia Elder Bruce R. McConkie o le 2 ma 3 Ioane atonu o ni ana ia lava tusi na tusia i tagata o lona ia lava aiga tupito (tagai *Doctrinal New Testament Commentary*. 3:409). O nei tusi ua faaalai ai o Ioane o se sa popole i tagata o le Ekalesia i lona aotelega ma o se tagata sa ia faatauaia fo’i ia tagata ta’ito’atasi.

Ia suesue i le agaga tatalo le 2 Ioane 1 ma manatunatu i mataupu faavae nei a e le’i saunia au lesonea.

O ni Mataupu Faavae Tava o le Ekalesia e te Sailia

- O le ola i le talalelei e aumaia ai le fiafia ia i tatou faapea ma isi (tagai 2 Ioane 1:1, 4; tagai fo’i 3 Ioane 1:1–4)
- E tatau ona mataala ia le Au Paia pe a latou faafeagai ma e le talitonu ia Iesu Keriso (tagai 2 Ioane 1:7–11).

Fautuaga mo le Aoao Atu

Filifili mai i aitia nei pe faaogaina ni au lava, a o e sauni e aoaoina ia le 2 Ioane 1.

2 Ioane 1:1, 4; 3 Ioane 1:4. Tatou te aumaia le fiafia i isi pe a tatou ola i le talalelei. (15–20 minute)

A o le’i amataina le vasega fesili i matua, uo ma ta’ita’i o le Ekalesia e iloaina tagata o lau vasega e tusia sina faamatalaga puupuu e faamatala mai ai o latou lagona pe a filifili le tagata o le vasega latou te iloa, e tausi poloaiga. A talafeagai ai, taumafai ia maua se palakalafa mo tagata taitoatasi. I teuina nei faamatalaga faalilolilo ina ia aua ne’i iloaina e tagata o le vasega. (O le isi mea e mafai ona fai o le tusia lea e tagata o le vasega ia ni faamatalaga faatatau i se isi tagata ua ia tausia ia poloaiga.) A o le’i amataina le vasega tusia ia fesili nei e tolu i luga o le laupapa: *O ai sa faatuatua? O ai na aafia ai i lena faatuatua? E faapefea ona aafia isi i lena faatuatua?*

- E faapefea ona tatou maua le fiafia ona o le tausiga o poloaiga?
- O a ni faataitaiga?
- E faapefea i lou usita’i ona aafia ai ia olaga o e te iloaina?

Faitau e le vasega ia le 2 Ioane 1:1, 4 ma le 3 Ioane 1:4. Fesili:

- O se a se faalogona a Ioane e tusa ai ma lana “fanau”?
- O a mea na latou faia na maua ai e ia le fiafia?

Valaauina se tagata o le vasega e to’atasi e faitauina leotele se tasi o mau nei:

- Mataio 3:13, 17
- 1 Nifae 3:6–8
- Alema 38:3
- Moronae 8:1–2

Fai la’ia i le tagata lena e tofi se isi tagata o le vasega e tali le fesili o loo i luga o le laupapa mo le mau muamua. Faitau e se isi tagata o le vasega ia le mau lona lua, ma tofi se isi tagata o le vasega e taliina le fesili mo lena mau. Faaauau se’i uma ia mau. Fesili i tagata o le vasega e faamatala ni mea ua latou vaايا e faailoa mai ai ia faamanuiaga na mauaina e isi ona o le faatuatua. Fai i le vasega e ta’u mai nisi faataitaiga faaleagaga po o ni mea moni na tutupu ua latou iloa.

Molimau atu o le usita’i i le talalelei e maua ai le fiafia i o tatou olaga ae maua ai fo’i ma faamanuiaga o isi o lo o i lo tatou siosiomaga. Faai’u i le talanoaina o tusi na maua e uiga i tagata o lau vasega. Uuna’ia i latou ina ia mafaufau ma manatua le fiafia na maua e isi ona o a latou filifiliga lelei sa faia.

O LE TUSI E TOLU A IOANE

Tusitala: O Ioane le Aposetolo ua iloitino o Ia na tusia le 3 Ioane (tagai i le faatomuaga o tusi 1 Ioane itulau 241)

O e Na Tusi i Ai: O lenei tusi na faatuatusi ia Kaio o se tagata faatuatua o le Ekalesia. O le aganuu a tagata o le Ekalesia i aso anamua, latou te aveina tagata tala'i Kerisiano i o latou fale ma tausia i mea latou te manaomai. Na viia e Ioane ia Kaio ona o lona alofa le faapito i le galuega a Keriso i le tuuina atu lea o mea e nonofo ai auauna femalagaa'i a le Atua.

Talaaga Faasolopito: E le gata i faafitauli o faiaoga pepelo o lo o feoa'i solo ma taufaaseseina ia le Au Paia (tagai i le faatomuaga i le tusi 2 Ioane, itulau 250), ae sa i ai fo'i ma nisi o taitai o le Ekalesia sa auauna atu mo i latou lava a e le ona o le alofa ia Keriso po o Lana Au Paia. O Tioterifi o se tasi o nei ta'ita'i. Na ta'usalaina o ia i lona taumafai e fai lana pule i luga atu o le pulega a Aposetolo.

Autu: Na tusi ia Ioane e faamalo ia Kaio mo lona faatuatua ma faamalosi atu ia te ia. Na manao foi Ioane e lapata'i atu ia Teoterifi.

3 Ioane 1

Faatomuaga

O le Au Paia i le taimi o Ioane na pagatia i sauaga mai fafo atu o le Ekalesia, ma sa latou puipui ia i latou lava. Na faamalo atu i ai Ioane ona o le latou lagolagoina o o latou uso o le Au Paia. O le Au Paia o Aso e Gata Ai i tausaga ua te'a sa latou oo fo'i i mafatiaga faapenei ma sa faamalolosa ai i latou. Sa faamalalamaina mai e Elder Harold B. Lee, a o ave a ia ma sui o le Korama a le Toasefululua e faapea: "O aso muamua o le Ekalesia, sa tatou pasi mai i se periota o le taufaaleaga ma le ta'useseina, ma sa tatou manumalo ai. Na tuu faatasia ai i tatou ona o le fili mai fafo. Sa tatou laasia mai foi se periota o tagata faatupu faalavelave ma le tutulieseina mai lea nofoaga i lea nofoaga, o le taimi na faaumatia ai le tele o soifua ma le toto maligi, ma o le nofoaga na malilili faamaturu ai na tatou maua ai le malosi. Na tatou laasia mai le mativa, ma na tatou mauaina le malosi mai na tofotofoga. Ona tatou laasia mai lea i le vaitaimi e mafai ona tatou ta'ua o le liliuese, po o le faalataina mai i totonu—o se tasi o tofotofoga e sili le matuia na tatou pasia. O lenei la ua tatou feagai ma se isi ituaiga o tofotofoga....o se vaitau e mafai ona tatou faaupuina o le pote faalelalolagi. O le taimi lenei ua tele ai tagata popoto ua le fia faalogo i perofeta lotomaulalo a le Alii. Ma na tatou mafatia i lena. O se tofotofoga mata'utia tele" Sweet Are the Uses of Adversity" *The Instructor*. Iuni 1965, 217).

Suesue ma le agaga tatalo le 3 Ioane ma mafaufau i mataupu faavae nei a e le'i saunia au lesona.

O ni Mataupu Faavae Tava o le Talalelei e Saili Iai

- O le faia o le mea sese e vavaeeseina mai ai i tatou mai le Agaga (tagai 3 Ioane 1:9–11; tagai fo'i MFF 121:34–39).

Fautuaga mo le Aoao Atu

Filifili mai manatu nei pe faaoga ni ou lava manatu a o e sauni e aoaoina le 3 Ioane 1.

3 Ioane 1. O le auauna atu ma le le manatu ifo ia te oe lava tatou te latalata atili ai i le Atua. O le tatou fia pule malosi atu i isi o le a vavae ese mai ai i tatou mai le Agaga. (10– 15 minute)

Tusi i luga o le laupapa le siata lenei:

Mau	O ai o lo o fai atu i ai?	O le a lana mea na fai?	Sa fiafia Ioane pe leai?	Aisea?
3 Ioane 1:1, 3, 5–6				
3 Ioane 1:9–11				

Vavae le vasega i ni vaega se lua ma faitauina e vaega ta'itasi ia poloka o mau, ma mata'ituina ia tali mo fesili. Faatumu le siata ma talanoaina mea ua aoaoina e tagata o le vasega. Faitau, Mosaea 2:17 ma le Mataupu Faavae ma Feagaiga 121:37, 39 ma fesili:

- E faapefea ona faatatau nei mau ia Kaio ma Tioterifi?
- Aisea e toatele ai tagata e "faaoga le pulega le tonu"?

Valaauina tagata o le vasega e faamatala mai ta'ita'i o le Ekalesia latou te iloaina e faaalua lo latou lotomaulalo tele i o latou valaauga. Fesili po o le a se mea ua latou aoaoina mai i o latou ta'ita'i e uiga i le auauna atu ma le lotomaulalo.

Tusitala: Na faaalai mai e le tusitala o Iuta o ia o se “auauna a Iesu Keriso ma o le uso foi o Iakopo” (Iuta 1:1). O le Iuta lenei e pē’i lava o le uso o Iesu e tina faatasi (tagai Mataio 13:55). E leai se faailoga tatou te iloa ai po o le a se tofiga sa ia Iuta, ma e pei ona faataata mai e le Tusi lava ia o Iuta sa umia se tofiga ta’ita’i pule ma o lea ua agavaa ai e tusia tusi o fautuaga.

O e Na Tusi I Ai: E pei foi o isi Tusi Faalaua’itele, e faalemautinoa po o ai tonu e faatatau i ai ia le tusi a Iuta. Na faatuatusi tusitusiga a Iuta “i e o lo ua faapaiaina e le Atua le Tama, ma leoleoina e Iesu Keriso” (Iuta 1:1).

O ni Uiga Ese: E ui o Iuta o se tasi o tusi puupuu i le Feagaiga Fou, ae o Iuta o lo o i ai ia faamatalaga e le o mauaina i se isi lava vaega o le Tusi Paia. Na tautala ia Iuta i agelu “na tausia lo latou uluai tofi” (f. 6; tagai fo’i Aperaamo 3:26), i le finauga a Mikaele ma Lusifelo i le tino o Mose (f.9), ma se valoaga a Enoka e uiga i le Afio Faalua Mai o le Faola (ff.14–15; tagai fo’i ia Mose 7:65–66).

Autu: Na tusi atu Iuta e uuna’ia tagata o le a faitauina lana tusi, ina ia faamaoni i lo latou puipua o le faatuatua i taimi o le liliuese, ma lapataia i latou e uiga i tagata i totonu o le Ekalesia o e ua taumafai e ta’ita’i latou i auala faasaina (tagai Iuta 1:3–4). O le Iuta 4–9 e tai tutusa faaupuga ma le 2 Peteru 2, vagana ai o Peteru sa valoia o le a i ai le liliuese i le lumana’i, a o Iuta sa tautala i le faataunuaina o lena valoaga (tagai 2 Peteru 2:1; Iuta 4).

Iuta 1

Faatomuaga

O le Iuta 1 o lo o faaagaina ai ni faataitaiga e faapupula ai le auala na taulimaina ai e le Atua le fouvale: (1) o le fanauga a Isaraelu na taofia mai le nuu na folafolaina, (2) o agelu “e le’i tausia lo latou uluai tofi” na tulia i fafo, ma (3) o i latou na i Sotoma ma Komoro o e na teena ia lapataiga paia sa faatama’iaina. Na lapataia e Iuta ia e na liliuese o le a i ai le aso o le a afio mai ai le Alii “ma faataunuaina ia le faamasinoga o i latou uma” o e amio faalematau (tagai Iuta 1:4–8, 14–19). Na ia folafola atu i e e faatuatua o le atinaeina o le faatuatua e ala i le tatalo ma le alofa i le Atua o le a lavea’ia mai ai i latou mai taunuuga o le liliuese (tagai Iuta 1:20–25).

Ia suesue ma le agaga tatalo le Iuta 1 ma manatunatu i mataupu faavae nei a e le’i saunia au lesona.

O ni Mataupu Faavae Taa o le Talalelei e te Sailia

O le faamallosia o lo tatou faatuatua i le Alii o Iesu Keriso e saunia ai i tatou e fesoasoani i e ua vaivai le faatuatua (tagai Iuta 1:20–23).

Fautuaga mo le Aoa Atu

Faaoga ia aitia nei, pe faaoga ni au lava, a o e sauni e aoaina le Iuta 1.

Iuta 1. E mafai ona tatou faamalosi atu i e e vaivai i le faatuatua. (10–15 minute)

Vaevae le vasega i ni vaega se lima. Ia faitau e vaega taitasi ia poloka mau nei ma tusi ia se oototoga ia latou lava upu: Iuta 1:1–4; 1:5–11; 1:12–16; 1:17–19; 1:20–25.

Ia aoaina e se tagata o le vasega ia ni oototoga se lima [mai le vasega] ma faitauina mai faasologa, i le vasega. Fesili i se isi tagata o le vasega e toe faia se oototoga mulimuli o oototoga ua uma ona faitauina o le tusi o Iuta (tagai i le “faatomuaga” o le Iuta i le mataupu 1).

Tuu se nofoa i tafatafa o se laulau malosi. Ia tu se tagata o le vasega i le nofoa ae tu se isi i tafatafa o le nofoa. Fesili i le vasega po o ai le tagata o lo o i le tulaga e faafaigofie ai ona ia fesoasoani i le isi e o o atu i luga o le laulau. Aisea e faafaigofie ai e le tagata i luga o le nofoa ona fesoasoani i le o loo tu i lalo. Na iloina e Iuta o le Au Paia e latou te manaomia le fesoasoani o le tasi i le isi i le teena o aoaoga a e na liliuese. Faitau e le vasega le Iuta: 1:20–21 ma mata’ituina ia fautuaga na tuuina atu i le Au Paia faatuatua. Faitau le Iuta 1:22–23. Fesili: Aisea ua tuuina atu ai lenei fautuaga i le faai’uga nai lo le amataga a e le’i tuuina atu le fautuaga i le Iuta 1:20–21? Tuuina atu ia le faamatalaga lenei a Elder Gordon B. Hinckley, a o aveva ma se tasi o le Korama a le Toasefululua:

“O le faataitaiga o o tatou olaga o le a maua ai se aafiaga tele nai lo talaiga uma e mafai ona tatou faia. E le mafai ona tatou sii a’e isi i luga vagana ai ua maua le mea o lo o tatou tutu ai.” (*Liahona*, Fepuari 1976, 39–41).

Fesili i tagata o le vasega e ta’u mai ni auala faapitoa na siitia a’e ai i latou i se tulaga maua atu o le ola ai i mataupu faavae o le talalelei po o ona tulaga faatonuin.

Faamalalama atu o le auala tatou te ola ai atonu o le a faaosofia ia isi e teena faaososoga ma talia le savali o le talalelei. Na saunoa mai ia Peresitene Hinckley:

“E le’i i ai se isi taimi muamua na sili atu ai le tauleleia o lenei Ekalesia nai lo le taimi nei. Ua tupu lenei mea ona o outou, uso ma tuafafine. O le taofi o tagata e uiga ia i tatou i le tele lava o itu, e mafua mai i aafiaga patino o tagata taitoatasi. O lo outou uiga faauo, o lo outou popole alofa mo isi, ma faataitaiga lelei i o outou olaga na ua mafua ai ona faaalai manatu o isi e uiga i le Au Paia o Aso e Gata Ai” (*Liahona*, Ianuari 1998, 4).

Fai i tagata o le vasega e tusi ia latou tusi o talaaga so latou uiga taua, pe ua malosi atu, ma ua mafai ona fesoasoani ia i latou e siitia a’e ai isi i se tulaga e maua atu foi.

O LE FAAALIGA A IOANE LĒ PAIA

O le tusi o le Faaaliga i nisi taimi e faaigoina o le Apokalifa, ma o lona uiga i le faaEleni o le “faaaliga,” ‘tatalaina’, po o le “faailoa.” O le Faaaliga o loo tusia ai e Ioane mea na faaali atu e Iesu Keriso ia te ia i se faaaliga, “o mea e tusa ona vave oo mai” (Faaaliga 1:1). O le faamoemoega o le tusi ia manuia ai i latou e faalogo “i upu o lenei valoaga, ma tausi i mea ua tusia ai” (f. 3).

Na saunoa mai le Perofeta o Iosefa Samita faapea, “o le tusi o Faaaliga o se tasi o tusi e sili ona malamalama gofie ua finagalo le Atua ina ia tusia. (*Teachings of the Prophet Joseph Smith*, 290). E ui ina tamaoiga i tala faafaatusa ma faailoga e faafaigata ona malamalamaina, ae o autu o le tusi e faigofie ma e maua ai ia musumusuga. E pei ona tusia e se tagata atamai o le Ekalesia: “E mafai ona tatou pei o le Au Paia Muamua, ia tatou mata’ituina ma saunia. E mafai ona tatou magafagafa, ma matua mataala i soo se ituaiga o mea leaga. E mafai ona tatou mauaina se faamafanafanaga i le mautinoaina o lo o ta’ita’i le Atua o le Lagi, ma o lo o pulefaamalumu o Ia i mataupu a alii ma tamaitai, ma o le amiotonu paia ma le alofa faamagalalo o le a taitaiina ai ma tauia le Au Paia” o le a tuuina atu ai ia le tau o le Au Paia” (Robert L. Millet, “Revelation of John Offers Recurring Lessons, Doctrinal Refrains and Hope,” *Church News*. 23 Dec. 1995, 10).

Tusitala: O Ioane, le atalii o Sepetaio ma le soo faapelepele o Iesu Keriso (Mataio 4:21–22) na tusia lenei tusi (tagai 1 Nifae 14:18–27; tagai foi *Taiala i Tusitusiga Paia*, “Ioane.”)

O e na Tusi i Ai: O le tusi o Faaaliga na tusia ma faatuatusi i lala e fitu o le Ekalesia i Asia (tagai Faaaliga 2–3). A e peitai e le faapitoa le tusi o le Faaaliga mo na o i latou ia. Na saunoa le Perofeta o Iosefa Samita “Na iloina e Ioane na o mea ua faataatia atu mo le lumana’i” (*Teachings*. 289), ma avea ai ma mea e aafia ai ia le Au Paia o lo o soifua i aso e gata ai. Na faaaliga e le Alii ia Moronae, afai ae salamo le Au Paia o aso e gata ai ma toe iloa a latou feagaiga, “ona folafolaina atu ai lea i luma o tagata uma lava o a’u faaaliga na ou poloaiina ai la’u auauna o Ioane na te tusia” (Eteru 4:16; tagai ff. 14–17).

Talaaga Faasolopito: O le Faaaliga na tusia i le taimi a o tetele ia sauaga faasaga i le Au Paia. E pei lava o sauaga nei sa faia e Roma a lē o le taimi o le nofoaiga a Nero (T.A. 54–68) po o Tomitiana (T.A. 81–96). O Tomitiana sa faasalaina i latou e lē taupua’i i atua ua faamaonia e le malo, ma o le to’atele sa le usita’i sa fasiotia pe faatafea ma tagata faaunuua i le taimi o lana nofoaiga. Na tusia e Ioane le tusi mai le motu o Patamo, o se nofoaga e fai ai faasalaga i Roma, ma o iina sa faaunuua ai o ia “ona o le upu a le Atua, ma le molimau ia Iesu Keriso” (tagai Faaaliga 1:9).

Faatasi ai ma sauaga tetele mai fafo, na mafatia fo’i ia le Ekalesia mai i le liliuese mai i totonu o le Ekalesia lava ia. Na fai mai ia Paulo [o le a] oo mai ia te outou “luko saua” o e le faasaoina le lafu mamoe” (Galuega 20:29). Na faataunuua le valoaga a Paulo i le latalata i le faai’uga o le senituri muamua T.A. O le leo o lapataiga e faasaga i faiaoga ma mataupu faavae

pepelo e pei ona i ai i tusitusiga a Ioane ma le Faaaliga 2–3 o lo o faailoa mai ai le ogaoga o le liliuese ua i totonu o le Ekalesia i ona aso (tagai *Taiala i Tusitusiga Paia* “Tusi a Ioane”).

Autu: “O le savali a le Faaaliga e tutusa lelei ma isi tusitusiga paia; o le a i’u ina manumalo ia le Atua i le fili i luga o le fogaeleele; o se manumalo tumau mai le fili, o le au paia i e sa faasaua ia i latou, o le malo o le Atua e manumalo i malo o tagata ma Satani” (Bible Dictionary, “Revelation of John,” 762). Na faalautele atu e Ioane le savali o le faamoemoe i tagata uma o e ua latou mafai ona tetee atu i faaosoosoga a le lalolagi (tagai Faaaliga 2:7, 11, 17, 26; 3:5, 12, 21).

Faaaliga 1–3

Faatomuaga

E mafai ona vaevaeina le tusi o Faaaliga i ni vaega se lua: o se faaaliga i ona po o Ioane (mataupu 1–3) ma le faaaliga mo le lumana’i (mataupu 4–22). O loo amata le tusi i faaaliga na mauaina e Ioane i le aso Sapati, o Iesu Keriso o lo o tu i lona mamalu faatasi ma ni tuugalamepa se fitu o le faatusa “o ekalesia e fitu i Asia” (Faaaliga 1:11). E ui ina mafatia ia le Au Paia i le taimi o Ioane ona o le liliuese ma sauaga, ae sa latou mauaina se faamafanafanaga i le faatusa o le Alii o lo o tutu faatasi ma i latou. I le mataupu e 2–3, o lo o faaaliga ai e le Alii i ekalesia e fitu o latou malosia ma vaivaiga ma valaauina i latou e saunia mo le lumana’i e ala i le salamo ma le aoao ina ia manumalo mai le lalolagi.

Ia suesue ma le agaga tatalo le Faaaliga 1–3 ma manatunatu i mataupu faavae nei a e le’i saunia au lesonea.

O ni Mataupu Faavae Tava o le Ekalesia e te Sailia

- A tatou usita’ia ia faaaliga a le Atua, o le a Ia taitai i tatou e toe fo’i atu i Lona afioaga (tagai Faaaliga 1:1–3; tagai foi Faaaliga 22:7; 1 Nifae 10:17–19).
- A toe afio mai Iesu i le fogaeleele, ma ana “au paia e manomano,” “e iloa atu foi o ia e mata o tagata uma” ma o le a auē i latou e amioleaga (tagai fo’i 1 Tesalonia 4:14–18; Iuta 1:14–16; MFF 88:95–98; 101:23–24).
- E mafai ona tatou manumalo i le lalolagi ma mauaina ia faamanuiaga faaleatua e ala i le mana o Iesu Keriso (tagai Faaaliga 2:2–3, 7, 10–11, 17, 26–28; 3:5, 8, 11–12, 21; tagai foi Faaaliga 5:10; 7:9–17; 21:7; MFF 101:35–38).
- Talu ai e alofa lo tatou Tama Faalelagi i Lana fanau, o lea e a’oa’iina ai i latou ina ia latou salamo (tagai Faaaliga 2:4–5, 14–16, 20–23; 3:2–3, 19; tagai fo’i i le Helamana 15:3; MFF 95:1–3).

Fautuaga mo le Aoao Atu

Filifili mai i aitia nei pe faaaoga ni au lava, a o e saunia lesona mo le Faaaliga 1—3.



O le *New Testament Video* vaega 21, “Fesoasoani mo se Malamalamaaga o le Tusi o Faaaliga” (7:48), e mafai ona faaaoga i le aoaoina o le tusi o Faaaliga (tagai *New Testament Video Guide* mo fautuaga mo le aoaoina atu).

Faaaliga 1:1, 9–11. Na faauvina e le Alii ia le Aposetolo o Ioane i le mua’i olaga e tusia le tusi o Faaaliga. (15–20 minute)

Fesili i le vasega:

- O le a le tele o le silafia e le Alii o i tatou taitoatasi?
- E mafai faapefea e le Alii ona faailoa mai mea o le a tutupu i le lumana’i? (tagai 2 Nifae 9:20).

Faitau 1 Nifae 14:18–22 ma faamatata mai e tagata o le vasega le tagata na vaai i ai ia Nifae i le faaaliga. Faitau 1 Nifae 14:24–27 ma saili le igoa o le tagata. Fesili: O fea e mafai ona tatou maua ai ia tusitusiga a lenei Aposetolo o aso e gata ai? Faailoa atu na ta’u atu e le Alii ia Nifae e uiga i le tusi o Faaaliga i le tele o senituri a e le’i tusia le tusi. Fesili: Faamata o le a se mea taua o lo o ta’uina mai e uiga i le tusi o Faaaliga?

Molimau atu i le vasega i le taua o le aoaoina o le tusi o Faaaliga. Faitau Faaaliga 1:1 ma faatusatusa i le Faaliliuga a Iosefa Samita o le fuaiupu lava lea e tasi. Talanoaina ia suiga na faia e Iosefa Samita. Faitau le Faaaliga 1:9–11. Toe iloilo le 1 Nifae 14:24–27, ma fesili:

- E faapefea ona faataunuuna ia le faaaliga a Nifae i tusi o Faaaliga? (Na faatonuina e Iesu ia le Aposetolo o Ioane e tusia le tusi; tagai 1 Nifae 14:24; Faaaliga 1:11.)
- E mafai faapefea ona tatou fesoasoani e faataunuuna ia le misiona a le Atua na ia faatonuina i tatou e fai?

Uuna’ia ia tagata o le vasega ina ia mauaina o latou faamanuiaga faapeteriaka i le taimi e tatau ai e fesoasoani atili ai ia te i latou mo le faataunuuna o le misiona a le Atua mo i latou.

Faaaliga 1–22. O le autu sili o le tusi o Faaaliga o aso e gata ai ma le toe Afio Faalua Mai o Iesu Keriso. (10–15 minute)

Faaali atu i tagata o le vasega ia se mea a faalapopoa ai mea niniii (microscope) ma se se tioata e faamatatetele ai ia mea (magnifying glass) po o ni ata foi o nei mea pe a leai ni mea moni. Fesili:

- E eseese faapefea ona ese mai le tioata e vaai ai ni mea ninii [microscope] mai le tioata e faamatamata tetele ai ni mea [magnifying glass] i mea e mafai ona la faaaliga?
- O le a le mea e lelei ai le iloaina o faamatalaga aupito iti?
- E mafai faapefea ona tatou manuia mai le vaai i se ata e lapo’a atu?

Fai i tagata o le vasega o le aso o le a tatou tilotilo ai i le “faalauteleina po o le ata tele” o le tusi o Faaaliga.

I faia se pepa malamalama (overhead transparency) o le siata “O Le Mea O I Ai le Faamamafa” i le (itulau 296) pe tusi foi i luga o le laupapa. Ia talanoaina le siata faatasi ma le vasega, ma faamanino atu o faamaufaaailoga muamua e lima (o le talafaasolopito lea o le laueleele mai i aso o Atamu e oo mai i aso o Ioane) o lo o talanoaina i fuaiupu e sefulutasi, a o isi faamaufaaailoga e lua (o lo tatou vaitaimi e o o atu i le iuga o le lalolagi) o lo o talanoaina i fuaiupu e 273. Faitau le Faaliliuga a Iosefa Samita o le Faaaliga 1:3 ma fesili:

- O le le mea o le a tupu na tusia ai le tusi o Faaaliga e saunia i ai le Au Paia?
- O le a le mea o lo o aoaoina mai ia i tatou e uiga i le taua o le tusi o Faaaliga mo i tatou i ona po nei.?

Ta’u atu i tagata o le vasega na matua saunia ma le faaeteete lava e le Alii le tusi o Faaaliga mo i tatou.

Faaaliga 1:1–3. A o tatou usita’ia ia faaaliga a le Atua, o le a la ta’ita’ia i tatou i Lona afioaga. (15-20 minute)

Na faaafia ai e Ioane ni mataupu faavae e mafai ona fesoasoani ia aoga ma manuia ai le au faitau o leni tusi o valoaga ma faaaliga. Ina ia fesoasoani i tagata o le vasega e aoao mai ai i nei foi mataupu faavae, tusi i luga o le laupapa ia se auala ma ni ona magaala i itu eseese. Fai i tagata o le vasega e mafafau faapea o loo i ai i se fetaula’iga o ala ma o loo taumafai e fuafua pe o fea le itu e tatau ona alu i ai. Fesili:

- E mafai faapefea ona faatusatusa leni faaitaiga i le olaga?
- E faapefea ona e filifili po o fea le itu e te alu i ai?
- O a risosi o lo o maua e fesoasoani ia te oe i le faiga o le filifiliga aupito sili?

Faitau e se tagata o le vasega ia le faamatalaga leni a le Perofeta o Iosefa Samita:

“E leai se tagata e mafai ona mauaina le Agaga Paia e aunoa ma le mauaina o faaaliga. O le Agaga Paia e maua mai ai ia faaaliga” (*History of the Church*. 6:58).

Fesili:

- E faapefea ona fesoasoani le Agaga Paia ia i tatou i le faatonutonuina o o tatou olaga?
- O fea tonu le nofoaga mautu o le a taitaiina i ai i tatou e le Agaga Paia? (Ia faitau e tagata o le vasega ia ni nai laina muamua o le “faaaliga” i le *Taiala i Tusitusiga Paia* mo se tali i leni fesili.)
- Afai ua finagalo le Atua e tuuina mai ia faatonuga i faaaliga e ala mai i le Agaga Paia, o le a la le tatou matafaii?

Faitau e tagata o le vasega ia le Faaliliuga a Iosefa Samita o le Faaaliga 1:1–3, ma fesili: E tusa ai ma nei fuaiupu, o le a le mea

tatou te faia ina ia mafai ai ona faamanuiaina o tatou olaga i upu o lenei faaaliga.? Tusi ia tali i luga o le laupapa ma talanoaina pe faapefea ona faaoga e tagata o le vasega. O tali e mafai ona aofia ai mea nei:

- *Faitau* i ai
- *Faalogo* i ai
- *Malamalama* i ai
- *Tausia* ma *usita'i* i ai

Faamalamalama atu e ui o Ioane sa tautala atu i nei fuaiupu i upu o le tusi o Faaaliga, o mataupu faavae lava ia e tasi e faatatau fo'i i isi faaaliga. E tatau ona tatou faitauina ia upu o tusitusiga paia ma o tatou faamanuiaga faapeteriaka. E tatau fo'i ona tatou faalogo i upu a perofeta soifua ma musumusuga a le Agaga. E tatau ona tatou manatunatu i ia upu ma mafaufau pe faapefea ona tatou faaogaina i o tatou olaga. Ma e tatau ona tatou mulimuli ai.

Faai'u i le faitauina o le faamatalaga lenei a Elder James E. Faust:

“O tagata o le Ekalesia ua latou iloa o musumusuga a le Agaga e mafai ona mauaina mo tulaga eseese o le olaga, e aofia ai ia aso ta'itasi, ma faai'uga faifaipea (tagai MFF 42:61). E mafai faapefea i le mafaufau o se tagata ona ia faia se faai'uga taua e pei o le, 'O ai o le a avea ma a'u soa?' 'O le a le galuega o le a ou faia?' 'O fea o le a ou nofo ai?', ma 'E faapefea ona ou ola?' e aunoa ma le sailia o musumusuga a le Atua Silisili Ese” (*Liahona*, Oketopa 1980, 15).

Faaaliga 1:4, 8, 19. Na faatonuina ia Ioane e tusia ia mea sa i ai, o mea o lo o i ai, ma mea o le a tutupu. (5–10 minute)

Manatua: O fautuaga nei mo le aoaoina atu e mafai ona aoao o se vaega o fautuaga mo le aoaoina mo le Feagaiga 1–22 (itulau 248). O se tasi lea o auala e mafai ai fo'i ona silasila i le “ata lautele” o le Faaaliga.

Faali atu i tagata o le vasega ia ni mea mai i aso ua leva ona tuana'i, aso nei, ma le lumana'i. O ni mea mai i aso ua leva ona tuana'i e aofia ai ni tusitusiga, ata tuai, pepa fanau, po o tusitusiga o talafaasolopito. O ni mea mai i aso nei e aafia ai ia laisene avetaavale, nusipepa, po o se kalena. Mo le lumana'i e aofia ai ia fatu, soo se ituaiga faasalalauga e pei o faaiipoiga, o se faamanuiaga faapeteriaka, po o se talosaga mo le faia o se misiona. Ia iloiloina ia mea ua i ai ma faatulagaina pe mai i aso ua tuana'i, aso nei po o le lumana'i.

Tusi i luga o le laupapa *aso ua leva ona te'a, aso nei, lumana'i*. Ia faitau e se tagata o le vasega ia le Mataupu Faavae ma Feagaiga 93:24. Fesili: Aisea e avea ai lenei ma faamatalaga talafeagai mo le mea moni? Talanoaina le aoga o le iloaina o mea tau i aso ua te'a, aso nei, ma le lumana'i.

Faitau le Faaaliga 1:4, 8. O a mea o lo o ta'uina mai e nei fuaiupu ia i tatou e uiga ia Iesu Keriso? (O Ia sa i ai ma o lo o i ai, ma o le a afio mai. O Ia o le Amataga ma le Gataaga)

- O le a sou manatu o le a le uiga o nei fuaiupu? (O se tasi o tali, o Iesu na foafoaina le lalolagi, Na te Ia taitai ma puipuia i tatou i nei vaitaimi ma o le a Ia toe afio mai i le lalolagi i lona mamalu)
- Faitau le fuaiupu 19. Aisea e talafeagai ai ona tusia e Ioane o mea e uiga i aso ua te'a, aso nei, ma le lumana'i?

Faamanino atu ona o Keriso o le Amataga ma le Gataaga, o lea e tatau ai ona tatou malamalama i aso ua tuana'i, aso nei, ma le lumana'i ina ia tatou maua ai se malamalamaaga mo Ia. O le tusi o Faaaliga o loo tautala i mea na tutupu i ia vaitaimi. Atonu o le a fesoasoani ia te oe le faitauina o tusitusiga paia mo ia periota taitasi e pei ona tuuina mai i le siata. (Faamanino atu o mea o lo o lisiina i lalo o le “Aso Nei” na tutupu i le vaitaimi o Ioane, ma o le tele o mea o lo o i lalo o le “Lumana'i” o lo o tutupu i le taimi nei pe o le a tutupu foi. O se vaega tele o le tusi o Faaaliga o lo o aoao mai ai mea o le a tutupu i le lumana'i.)

Aso ua te'a	Aso nei	Lumana'i
Faaaliga 6:1–8; 12:7–11	Faaaliga 1–3; 6:9–11; 12:1–6, 12–17	Faaaliga 4–5; 6:12–17; 7–11; 13–22

Faaaliga 1:4–20. O le malamalama i faailoga i le tusi o Faaaliga o le a faailoa mai ai ona uiga. (20–25 minute)

Aumai i le vasega ia ni pepa faapisinisi po o ni faailoga ua tipi mai i ni nusipepa po o ni mekasini. Piki mai ia faailoga e malamalama i ai ia tagata o le vasega. Faaali atu i tagata o le vasega ma mata'ituina pe fia ni faailoga latou te mafai ona ta'u maia i se taimi puupuu.


Faamalamalama atu tatou te iloaina ia faailoga tatou te vaai soo i ai pe faaogaina soo. O tagata o loo ta'ua i le Tusi Paia sa latou talanoa i gagana faafaatusa. O le faaaliga a Ioane o lo o tumu i ni mea faafoliga ma faailoga. O le malamalamaaga i le faaogaina e le Au Lutaia o mea faafoliga ma faailoga e mafai ai e i tatou ona tatou malamalama i le tusi o Faaaliga.

Tusi le fainumera lapo'a lava o le 7 i luga o le laupapa. Fesili: O fea ni mea tatou te vaai ai i le numera fitu? (Aso o le vaiaso, periota o le i ai o le fogaeleele). Faamalamalama atu o le aganuu faaEperu, o le numera 7 e faasino i le faataunuuna po o le atoatoa. Fesili:

- E faapefea i lou mafaufau ona faatusa lea i aso o le vaiaso?
- E faapefea ona faatusatusa i le periota o le Foafoaga?
- E faapefea ona faatusatusa i periota o talafaasolopito o le lalolagi?

Ia faamanino o le numera fitu o lo o ta'ua soo i le tusi o Faaaliga. Ia tusitusi solo upu nei e faataamilo i le numera 7 i luga o le laupapa: *ekalesia, agaga, fetu, tuugalamepa, faamaufaaailoga, agelu,*

pu, ipu malamalama, ulu. Faamalamalama o nei mea faafoliga uma e i ai o latou uiga ma e taua i le faaliga a Ioane. Manatunatu i le faaogaina o le tasi po o gaoioiga uma nei e lua:



- Faaoga se pepa malo e tusia ma tipi ese mai ai ia ata o mea nei ma tusi ai ia upu nei “agaga,” o se pulou tupu, o mata’itusi Eleni o le alefa (A) ma le omeka (Ω), o se tuugalamepa, o se fetu, o se pelu, ma ki. Tuuina atu i tagata o le vasega ma fai atu i ai e saili ia faailoga nei i le Faaliga 1 ma sueina o latou uiga i le faaogaina o le *Taiala i Tusitusiga Paia*. A mae’a, ona valaauina lea e fetufaa’i ai ma le vasega mea ua latou aoaoina.
- Ia faia kopi o le siata lenei ma tufatufa atu i tagata o le vasega, a e aua le tusia se mea i le koluma “Faaliliuina”. Vaevae le vasega i ni vaega. Ia latou sueina, maka ma sue nisi mau e mau ai faailoga taitasi ona faatumu lea o faaliliuga i pepa. A mae’a ona siaki faatasi lea ma le vasega atoa.

O Faailoga i le Faaliga 1

Fuaitupu	Faailoga	Faaliliuina	Mau
4	Agaga e toafitu	O auauna po o ta’ita’i i ekalesia e fitu i Asia.	FIS, Faaliga 1:4
6	Tupu ma faitaulaga	O tulaga o i latou i le malo selesitila.	MFF 76:51–59
8	Alefa ma le Omeka	O le mata’itusi muamua ma le mulimuli o le alafapeta a Eleni, e faatusa i le natura e faavavau o Iesu Keriso.	Taiala i Tusitusiga Paia, “Alefa.”
12	Tuugalamepa e fitu	O ekalesia e fitu, e tatau ona uuina i luga le sulu o le talalelei	Faaliga 1:20; 3 Nifae 18:24
16–17	Aao taumatau	Aao o le feagaiga, aao o le alofa ma le mamalu, faailoga o le malosi	Galuega 7:55; Eperu 1:3, 13
16	Fetu e fitu	O se tasi o faatusa o taitai pulefaamalumu o ekalesia e fitu	JST, Faaliga 1:20
16	O le pelu e faataumaai ona itu	O le upu a le Atua, e faamasinoina ai e amio leaga ma faasaoina ai i latou e lē sala	Eperu 4:12
18	Ki o seoli ma le oti	Ki e tatalaina ai faitoto’a o le oti faaleagaga ma le oti faaletino.	2 Nifae 9:10–13

Faai’u i le faitauina o le faamatalaga lenei:

“O faailoga o se gagana e leai se vaitau e patino i ai ma e lauiloa uma foi, na filifilia e le Atua i lona atamai, e aoao mai ai lana talalelei ma molimau mai ai i lona Atalii. O gagana ia o tusitusiga paia, o le gagana o faaliga, o le gagana a le Agaga, o le gagana o le faatuatua. O se gagana e masani ai le Au Paia o augatupulaga uma” (Joseph Fielding Mc Conkie, *Gospel Symbolism* [1985], 1).

Uuna’ia tagata o le vasega e faata’ita’i ona “vaai” a e le na’o o le faitau o tusi o Faaliga.

Faaliga 1:4–20. O tusi o Faaliga o se molimau i le misiona a Iesu Keriso. (10–15 minute)

Ae le’i amataina le vasega, tusi i luga o le laupapa ni igoa o ni tagata ta’utaua i talafaasolopito (mo se faaitaiga, Lisati le Toa, Alesana le Sili, Aperaamo Linikone). Fesili: O a mea e mafai ona ta’u mai e suafa ua faasuafaina ai tagata taitoatasi? Tuu se ata o le Faola i luga o le laupapa. Fai i le vasega e suesue i le Faaliga 1:4–20 ma saili ni upu ma fasi fuaitau o loo faaogaina e faamatala ai Iesu Keriso. (O ni tali talafeagai, e aofia ai le “molimau faatuatua” [f. 5], “Alefa ma le Omeka” [f.8].) “le Atalii o le Tagata” [f.13], “o lē ola nei lava, sa oti” [f. 18].) Tusi

i tafatafa o le ata i luga o le laupapa ia igoa latou te maua. Fesili: O a mea o lo o ta’u mai i ia igoa e uiga i le misiona a le Faaliga?

Ia tautino atu o le tusi o Faaaliga o se molimau i le misiona a Iesu Keriso e faato’ilaloina ai Satani ma faasaoina ai le fanau a le Atua. Uuna’ia tagata o le vasega e mata’ituina ia faailoga e faali mai ai e moni lenei molimau a o latou aoaoina le toega o le tusi o Faaaliga. (*Manatua*: Mafaufau e faaaoaga i i le gaoioiga A mo le Faaaliga 1 o loo i le taiala suesue a le tagata.)

Faaaliga 2–3. Ona e alofa le Alii ia i tatou, o lea ua la a’oa’iina ai i tatou ina ia tatou salamo. A o tatou salamo, e fesoasoani mai o la ina ia tatou manumalo i le lalolagi, ina ia mafai ai ona tatou mauaina ia faamanuiaga o le faaolataga.

(35–40 minute)

Ta’u atu i tagata o le vasega sa faigata i lona vaitaimi ona avea ma soo o Keriso, ina ua mauaina e Ioane le faaaliga e pei ona tusia i le tusi o Faaaliga. Na luitauna e sauaga mata’utia ma aoaoga pepelo le faatuatua o tagata o le ekalesia. O loo folafolaina mai e le Alii i le mataupu e 2–3 e ui ina to’atele e ua sese, afai latou te salamo ma manumalo i le lalolagi, o le a mafai lava ona latou olioli i faamanuiaga o le faaolataga.

Faamalalama atu o le Faaaliga 2–3 o loo faatūtū atu i tagata o le ekalesia i laumua e fitu oi Asia. Na faaaliga e le Alii ia Ioane ia latou malosiaiga ma vaivaiga ma ta’u atu ia te ia e tusia ni tusi i lala uma e fitu o le Ekalesia

Vaevae le vasega i ni vaega se fitu ma tofia ia vaega taitasi latou te “asia” ia vaega taitasi e fitu o le Ekalesia. Ia latou sueina o latou laumua i le faafanua 8 i le *Taiala mo Tusitusiga Paia*. Tuu atu ia i latou ni kopi o le siata “O Ekalesia e Fitu i Asia (Faaaliga 2–3)” mai i le (itulau 294–95) ma faatumu le avanoa mo le latou laumua. Fai i le vasega e fetufaa’i ia mea ua latou aoaoina, aemaise ia mea lelei ma mea sese ua faia e ekalesia, ma le faasa’oina e le Alii.

Fesili i tagata o le vasega

- O le a sou lagona pe a otegia oe e se isi tagata?
- Afai e alofa le Atua ia i tatou, aisea o le a a’oa’i ai i tatou e Ia?

Faitau le Mataupu Faavae ma Feagaiga 95:1 ma talanoaina pe faapefea ona fesoasoani le a’oa’iina tatou te salamo ai ma maua le faamagaloina.

- E faapefea ona a’oa’iina i tatou e le Tama Faalelagi? (E ala mai i le Agaga, tusitusiga paia, taitai o le Ekalesia, o matua.)
- E mafai faapefea i lenei fuaiupu ona aafia ai le ala tatou te tali atu ai i a’oa’iga?
- O a faamanuiaga e o o mai i e e manumalo i le lalolagi ma tumau e o o i le faaiuga?

Faitau le Faaaliga 1:6 ma le Mataupu Faavae ma Feagaiga 76:53–57 ma mataituina ia le tulaga e oo i ai a tatou galuega faamaoni. Ia lu’iina ia tagata o le vasega ina ia matua naunau e avea ma soo o Iesu Keriso. Faitau le faamatalaga lenei:

“E ui ina a’oa’iina e le Alii lona nuu i le olaga faaletino, ae o a’oa’iga o le a faapalenia i lona alofa tunoa ma le faamagaloina pe a faalogo ma usitai lana fanau ia te ia (MFF 101:2–9; 3 Nifae 22:8–10). O i latou uma o le a sao mai i le to’asa o le Atua o le a aofia ai tagata uma e salamo ma tausia poloaiga, ma saunia i latou mo le itula o le faamasinoga o le a oo mai, faapotopotoina ‘faatasi i le nuu o Siona ma ona siteki o le nofoaga mo le sulufaiga (MFF 115:6; [faatusatusa] Alema 12:33–37; 13:30; MFF 88:76–88; 98:22). O le to’asa o le Atua e aoga, aua o ē alofagia e ia, na e a’oa’iina foi (MFF 95:1; [faatusatusa] Eperu 12:6–11)” (“Wrath of God,” *Encyclopedia of Mormonism* 4:1598).

Faaaliga 4–5

Faatomuaga

O le Faaaliga mataupu 4 o lo o amata ai faaaliga a Ioane mo le lumana’i. Na vaaia e Ioane se faitotoa i le lagi ua avanoa ma sa valaaulia ai o ia “ina sau ia i luga nei” ma sei vaai i fuafuaga a le Atua mai se tulaga paia. O iina na ia vaai ai i le nofoalii o le Atua, le laueleele i lona tulaga faaselesitila, ma le to’atele o tagata ua faaeaina o lo o pepese ma vivii i le Atua ma le Tamai Mamoe. O le iuga manuia lenei mo le fanau faamaoni uma a le Atua mai i tisipenisione uma. Ua faataunuuna lenei mea ona o Iesu Keriso “Le leona o le ituaiga o Iuta,” (Faaaliga 5:5) ua “faatauna foi i matou i Lona] mo le Atua” (f.9) ina ia mafai ai ona avea tatou ma “tupu ma faitaulaga” i le Atua (f.10).

Ia suesue ma le agaga tatalo le Faaaliga 4–5 ma manatunatu i mataupu faavae nei a e le’i saunia au lesonea.

O ni Mataupu Faavae Taa o le Ekalesia e te Sailia

- O loo tatou Tama Faalelagi o le na faia mea uma, ma o i latou uma e faaolaina i le malo selesitila o le a tapua’i ia te Ia (tagai Faaaliga 4; 5:13–14; tagai fo’i i le Isaia 6:2–3; MFF 88:104).
- O le umi o le i ai o lenei laueleele e fitu afe tausaga mai i le Pau o Atamu e oo atu i le faaiuga o le Meleniuma. A mae’a lena ona avea loa lea o lenei laueleele ma malo selesitila ma o le a nofoia e le to’atele o atalii ma afafine o le Atua o e ua faaeaina e ala mai i le Togiola a Iesu Keriso (tagai Faaaliga 5:1, 9–11; tagai fo’i Faaaliga 7:9–10, MFF:6–7, 12).
- O meaola uma o le a viia le Tamai Mamoe a le Atua, o le na fasiotia e faaolaina ai i tatou i Lona malo (tagai Faaaliga 5:1, 9–11; tagai fo’i i le Isaia 45:22–23).

Fautuaga mo le Aoao Atua

Filifili mai i aitia nei pe faaaogaina ni au lava, a o e saunia lesona mo le Faaaliga 4–5.

Faaaliga 4. O le tatou Tama Faalelagi o le Fofoa o mea uma, ma o i latou ua faaolaina i le malo selesitila o le a latou tapua’i ia te Ia. (20–25 minute)

Toetoe lava o le tusi uma o le Faaaliga e amata atu i le faaiuga o le mataupu e 4 o lo o faatatau i mea o le a tutupu i luma mai o ona po o Ioane. “Mo se fesoasoani ia usuina pe faitauina fo’i ia upu o le pese “Fofoaga Uma a le Atua”(Viiga nu. 39) Ta’u atu i tagata o le vasega o le mataupu e 4 o le a latou aoao ai i taimi o le a faataunuu ai lenei pese. Tuu atu i ai ni kopi o le siata ae faaavanoa pea le koluma “Faamalamalamaga.” Ia makaina ia mau ma faatumuina le siata, e mafai ona galue le tagata lava ia pe fai foi faavaega.

Faaaliga 4		
O Le Mea na Vaai i ai Ioane	Mau Faatusatusa	Faamalamalamaga
Nofoalii o le Atua (tagai ff.2–3)	MF 137:1–4	O le nofoalii i le lagi e afio ai le Atua
E luasefulufa toeaina ma palealii (tagai f. 4)	MF 77:5	O toeaina faatuatua o lala e fitu o le ekalesia
Agaga e fitu o le Atua (tagai f. 5)	JST, Faaaliga 1:4; 4:5	O auauna e vaaia ekalesia e fita
Sami tioata (tagai f. 6)	MF 77:1; 130:6–9	O le laueleele i lona tulaga faapaiaina
O meaola e fa (tagai ff.6–7)	MF 77:2–3	O manu moni na faatusa i ai ituaiga o tagata paia
Tele mata ma apaau e ono (tagai f. 8)	MF 77:4	O le malamalama tele ma le malosi o manu feai e gaioi ma faatino ai

A mae’a, ona talanoaina lea o mea ua latou aoaoina. Faaoga ia fesili nei pe a manaomia:

- O a mea o le a vaai i ai ia Ioane a o i le lagi: (tagai Faaaliga 4:1).
- O ai sa nofo i le nofoalii lea na vaai i ai Ioane?
- Aisea ua taua ai mo le Au Paia i ona po o Ioane le iloaina o e na malilii i le faatuatua i le ekalesia, sa i ai ni o latou pale i le nofoalii a le Atua?
- Aisea e taua ai le iloa foi e le Au Paia o ona po nei lea mea?

Faitau e le vasega ia le Faaaliga 4:8–11 ma mataituina ia uiga o meaola na faia e le Atua ia na vaai i ai Ioane. Fai fesili faapea:

- O le a le mea tatou te aoao mai i mea na fai mai ai ia meaola i le fuaiupu e 8 ?

- Aisea e matua taua ai le avatu o le mamalu, faaaloologa ma le faafetai i le Atua? (Tagai f. 9).
- E mafai faapefea ona saunia i tatou i se tulaga lelei tatou te faatasi ai ma le Atua e faavavau.? (Mosaea 3:19; Helamana 3:35).
- E tusa ai ma le mataupu e 11, o le a se pogai e tasi e tatau ai ona tatou tapua’i i le Atua? (Talanoaina a latou tali.)
- O a ni auala e mafai ai ona tatou faamamalu ma tapuai i le Atua? (Talanoaina a latou tali.)

Tautino atu tatou te tapuai moni lava i le Atua pe a tatou tuuina atu ma le naunautai i tatou lava i Lona finagalo.

Faaaliga 5. O lenei fogaeleele e fitu afe tausaga lona umi e i ai e amata mai le Pau o Atamu seia oo atu i le faaiuga o le Meleniuma. O le a vivii meaola uma i le Tamai Mamoe a le Atua, o le na fasiotia ina ia faaolaina ai i tatou i Lona malo. (20–25 minute)

Faali le ata O Le Uluai Faaaliga (aitema no. 62470). Fesili:

- O lē fea le tagata i lenei ata tatou te tapua’i i ai?
- Aisea tatou te tapua’i ai i le Tama? (tagai Faaaliga 4:11 mo se pogai se tasi).
- Aisea tatou te tapua’i ai i le Alo?

Ta’u atu i le vasega o le aso o le a tatou talanoaina ai ma le atoatoa ia le pogai e ala ai ona tatou tapuai ia Iesu Keriso.

Tuuina atu i tagata o le vasega ia se kopi o le suega lenei. Ta’u i ai e faaaogaina a latou tusitusiga paia e tali ai le tele o fesili latou te mafai ona tali.

Faaaliga 5

1. O a mea sa i totonu o le tusi o loo faamatalaina i le fuaiupu 17.
2. O le a le umi o le i ai o le tulaga faaletino o le fogaeleele?
3. O ai le tagata e toatasi na te mafaia ona tatala ma faitauina le tusi i le fuaiupu e 5?
4. O le a le suiga o fuainumera na faia e le Perofeta o Iosefa Samita i le fuaiupu e 6?
5. O ai i le fuaiupu lenei e faatusa i ai ia agaga o le Atua?
6. Pe o ni manu moni ea o loo i le fuaiupu e 8? (tagai foi Faaaliga 4:8).
7. Aisea e mafai ai e Iesu ona tatalaina le tusi na faamaufaailogaina?
8. E toafia agelu na vaaia e Ioane o alalaga ma vivii i le Tamai Mamoe? (tagai f. 11)
9. O ai i isi na viia o Ia?

O tali:

1. O le “finagalo, o mealilo, ma galuega a le Atua” e faatatau i le fogaeleele i le taimi a o i ai i lona tulaga faaletino (tagai MFF 77:6).
2. Fitu afe tausaga (tagai MFF 77:6).
3. Iesu Keriso (tagai Faaaliga 22:16).
4. Na Ia suia le numera fitu i le numera sefululua. (tagai FIS, Faaaliga 5:6)
5. O Aposetolo e Toasefululua (tagai FIS, Faaaliga 5:6).
6. Ioe, e ui o loo faamatalaina mai e Ioane i se gagana faatusa i le Faaaliga 4:8 (tagai MFF 77:2-4).
7. Ona o Lana taulaga togiola (tagai f. 9).
8. “Ua mano ni mano, ma afe ni afe” (f. 11).
9. “O meaola uma” (f. 13).

Faasa’o le suega faatasi e le vasega, ma tuuina atu ia mau faatusatusa ma valaaulia tagata o le vasega e tusi a latou tali i a latou tusitusiga paia. Talanoaina fesili nei:

- Afai o le Faaaliga 5 o se tusitusiga mo se tala, o ai le tagata autu?
- O le a Lana mea e fai ua avea ai o Ia ma tagata autu?
- Mai i mea ua outou aoaoina, aisea ua tatou tapua’i ai ia Iesu Keriso?

Faitau e se tagata o le vasega ia le saunoaga lenei a Peresitene Gordon B. Hinckley:

“Ia outou malolosi ia outou molimau ia Iesu Keriso, o le Alo o le Atua. O ia lava o le maa tulimanu autu o lenei galuega tele. Ou te matua molimau atu i Lona paia ma le moni. O ia o le Tamai Mamoe e aunoa ma se ila na taulagaina mo agasala a le lalolagi. E ala i ona tiga ma ona puapuaga ua ou maua ai le faaleleiga ma le ola e faavavau. O ia o lo’u Faiaoga, o lo’u Faaa’oa’o, o la’u Uo ma lo’u Faaola ou te alofa i ai ma ou tapuai i ai, o le Togiola o le lalolagi” (Liahona Ianuari 1993, 70).

Faaaliga 6-7

Faatomuaga

I le Faaaliga 6-7 o lo o tatalaina ai e Iesu Keriso le tusi ma ona faamaufaaailoga e fitu. A o tatalaina ia faamaufaaailoga taitasi, na vaai Ioane i ni faatusa o mea o le a tutupu i le afe tausaga o le talafaasolopito o le laueleele. O le mataupu e 6 o loo ta’ua ai le tatalaina o faamaufaaailoga muamua e ono. O le mataupu e 7 o lo o faaalina ai le ala e saunia ai e le Alii tagata faatuatua

o le fogaeleele mo mea mata’utia o le a tutupu i le faamaufaaailoga lona fitu. O le toefuataiina o le talalelei ma sauniga o le perisitua, o le a mafai ai e le Au Paia mai nuu uma ona onosa’ia.

Aoao ma ole agaga tatalo le Faaaliga 6-7 ma manatunatu i mataupu faavae nei a e le’i saunia au lesona.

O Nisi Mataupu Faavae Tavaa o le Talalelei e Saili Iai

Na vaai Ioane i se faaaliga o mea taua o le a tutupu i le ono tausaga muamua o le fogaeleele i lona tulaga faaletino. E aofia ai i le faaaliga ia taua, amioga leaga, o le faatafunaga, oge, oti, o le fasiotia o soo o Keriso, faailoga o aso mulimuli, ma le Toefuataiina (tagai Faaaliga 6:1-7:4).

Fautuaga mo le Aoao Atu

Filifili mai i aitia nei, pe faaaogaina ni au lava, a o e saunia lesona mo le Faaaliga 6-7



Faaaliga 6. Na vaai ia Ioane i se faaaliga o faatusa o mea taua o le a tutupu i le ono tausaga muamua o le fogaeleele i lona tulaga faaletino. (15-20 minute)


(Manatua: Aua le faaaluina se taimi tele i le taimi o faamaufaaailoga muamua e lima. E na o le sefulutasi ia fuaiupu i le tusi o Faaaliga o lo o ta’ua ai ia faamaufaaailoga e lima. O le tele o le tusi o Faaaliga o loo faamatala mai ai ia le faamaufaaailoga lona ono ma le fitu, e taua mo i tatou aua e aofia ai mea e tutupu i aso e gata ai.

Tufa kopi o le siata lenei i le vasega ma faavanoa ia le koluma o le “Faaliliuina”. Ia tusia e tagata o le vasega i le koluma “O Ituaiga Mea Eseese” ia mea po o faailoga na vaai i ai ia Ioane a o tatalaina nei faamaufaaailoga taitasi. A mae’a, faatumu le koluma o le “Faaliliuina” e le vasega. Fesili pe faamata o a mea o lo o faatusatusa i ai ia mea pei ona faaalina (o tali fautuaina o loo i lalo). Faamatala i ai ootoga o loo tuuina atu i lalo.

Faaaliga 6: O Faamaufaaailoga Muamua e Ono

Faamaufaaailoga	O Ituaiga Mea Eseese	Faaliliuina
Faamaufaaailoga muamua (tagai f. 2)		solofanua sinasina = manumalo au = taua palealii = lē manumalo Na ta’ua e Elder McConkie e faapea o leni tulaga ua faamatalaina ai ona po o Enoka, ma o lē sa tietie [i le solofanua] o Enoka.
Faamaufaaailoga lona lua (tagai ff.3-4)		solofanua mumu = toto maligi pelu = taua ma le faatafunaga Na ta’ua e Elder McConkie e faapea, o le tulaga leni o loo faamatalaina ai ona po o Noa, ina ua lilofia le lalolagi i le amioleaga.

Faamau-faailoga lona tolu (tagai ff. 5–6)	solofanua uliuli = oge fua faatautau= taugata o le tau o meai Na ta’ua e Elder McConkie o le tulaga lenei, o le vaitausaga lenei o Aperaamo, na toatele ai i latou e maliliu i le faiaai.
Faamau-faailoga lona fa. (tagai ff. 7–8)	solofanua samasama = lanu o tino oti oti ma seoli = fasioti e le amioleaga le amioleaga Na saunoa Elder McConkie, “O le meleniuma lenei o na malo tetele ma atunuu na sii taua ma faia mea leaga na faamata’u ma saga faato’ilaloina ai pea lava pea [Isaraelu].”
Faamau-faailoga lona lima (tagai ff. 9–11)	fata faitaulaga = faailoga o le taulaga agaga = maturo (tagata o le Ekalesia na fasiotia ona o o latou talitonuga.) Na ta’ua e Elder McConkie, e faasino tonu lenei i sauaga na mafua ai ona maliliu le to’atele o Kerisiano i aso anamua i le vaitaimi o Ioane.
Faamau-faailoga lona ono (tagai ff. 12–17)	O mea mata’utia o le a tutupu ua tuuina mai e avea ma faailoga i aso e gata ai. Na faailoa mai e Elder McConkie e faapea o nei mea e faasino tonu i le taimi o lo o tatou i ai nei ma mea o le a tutupu e aga’i atu i le Meleniuma, o le a nofo tupu ai ia Iesu i le fogaeleele.

 **Faaaliga 7. O le toefuataiina o upumoni o le talalelei ma le pule o le perisitua e fesoasoani i mea o le a tutupu i le faamau-faailoga lona fitu.** (20–25 minute)

Ia saunia ni atigi pusa se fitu ua uma ona “faamau lelei” a e le’i amataina le vasega ma faanumeraina mai le tasi e o o i le fitu. Tuu i totonu o pusa taitasi ia faamatalaga o faamaufaaailoga e o faatasi ma le numera o le pusa. (Ia manatua e lua ia faamatalaga o le faamaufaaailoga lona ono.)

1. Enoka ma Siona.
2. Taua, amioleaga, ma lologa.
3. Oge ma le oti.
4. O malo tetele ma atunuu malolosi
5. Tagata Kerisiano na maliliu ona o o latou talitonuga.
6. O faalavelave faanatura e avea ma faailoga o aso e gata ai. Toefuataiina o le talalelei ma faamanuiga o le malumalu.
7. Ua faatamaia Papelonia; ua afio mai Iesu Keriso i le mamalu; ua saisaitia Satani, ua faapotopoto faatasi e amiotonu ma le Faola; ma o le a i ai pea le filemu i le meleniuma; o le a toe faasa’olotoina Satani mo se vaitaimi, o le a tau le taua tele mata’utia mulimuli; o le a faia le faamasinoga mulimuli, ua maua e le fogaeleele lona mamalu faaselesitila.

Ia tuu ia atigipusa i luma o le vasega. Mo se taimi puupuu, toe iloilo ia mea e tutupu i faamaufaaailoga taitasi, i le tatalaina lea o pusa muamua e lima, ma faitau faamatalaga o lo o i ai.

Tatala le pusa lona ono, ae faitau na o le faamatalaga muamua e (faasino i faalavelave faanatura). Faitau e le vasega le Faaaliga 7:1–4. Fesili: I le fuaiupu muamua, o ai agelu e fa i tulimanu e fa o le lalolagi? (tagai MFF 77:8).

Faitau le saunoaga lenei a Peresitene Uilifoti Uutilafi:

“Na taofia e le Atua ia agelu o le faatafunaga mo ni tausaga se tele, ina ia aua ne’i latou seleina le saito faatasi ma le titania. A e ou te fia ta’u atu nei ia te outou, ua o ese nei agelu na mai faitotoa o le lagi, ma o lo o latou leoleo i nei tagata ma le atunuu i lenei vaitaimi, ma o lo o latou faatalitali ma mata’itu le taimi e liligi mai ai faamasinoga. Ma e amata atu i le asō ona liligi mai ia faamasinoga. Ua matua faateleina fevesia’iga ma faalavelave ua tutupu i le fogaeleele, ma e i ai le uiga o nei mea. Ia manatua nei mea ma mafaufau i ai. Afai e faataunuuina lou tiute, ma ou faia fo’i lo’u tiute, o le a maua e i tatou le puipuiga ma o le a tatou pasi atu i faigata i le filemu ma le saogalemu. Faitau tusitusiga paia ma faaaliga. O le a latou ta’uina atu ia te outou e uiga i nei mea” (*Discourses of Wilford Woodruff*, sel. G. Homer Durham [1946].

Fesili:

- I le Faaaliga 7:2, o ai le agelu o lo o i ai ia faamaufaaailoga o le Atua soifua? (O Ioane lava ia, i le tulaga o Elia ma le pule e faapotopoto ma faamaufaaailogaina ituaiga o Isaraelu; tagai MFF 77:9, 14.)
- O le a le talosaga a lenei agelu? (Na ia talosaga atu i isi agelu e aua ne’i afaina ia le fogaeleele se’ia faamaufaaailogaina auauna a le Atua.)
- I le fuaiupu e 4, o ai le 144,000 ua faamaufaaailogaina? (tagai Faaaliga 7:5–8; MFF 77:11).
- E faapefea ona faamaufaaailogaina i tatou i ona po nei? (I le mauaina o sauniga uma o le talalelei ma faamae’aina i le malumalu sa ma le tausia o poloaiga.)

Faitau le faamatalaga lona lua i totonu o le pusa lona ono. Molimau atu ua talafeagai le toefuataiina o le ekalesia ma le perisitua e saunia ai tagata mo le toe Afio Faalua mai o Iesu Keriso. Faitau le saunoaga lenei a Peresitene Howard W. Hunter:

“O a tatou taumafaiga uma i le talaiina o le talalelei, faaatoatoaina o le Au Paia, ma le faaolaina o e ua maliliu e faai’uina i le malumalu sa paia aua o sauniga o le malumalu e matua sili ona taua; e le mafai lava ona tatou toe fo’i atu e faatasi ma le Atua e aunoa ma nei sauniga” (*Liahona*, Ianuari 1995, 88).

Fesili i tagata o le vasega:

- O le a mea e mafai ona tatou faia e fesoasoani e saunia ai i tatou, o tatou aiga, uo, ma isi mo le toe Afio Faalua Mai o Iesu Keriso?
- Faitau le Faaaliga 7:9–10, 13–14. E tusa ai ma nei fuaiupu, e to'afia e ua faasinasinaina o latou ofu i le toto o le Tama'i Mamoe ma nonofo faatasi ma le Atua? (Molimau o le a le mafaitaulia i latou o le a mauaina le mamalu faasesitila.)

Uuna'ia le vasega e sauni mo le afio mai o le Alii i le tausia o poloaiga ma le mauaina o sauniga uma o le malumalu sa. Ia faitauina e se tagata o le vasega ia le talosaga leni mai ia Peresitene Hunter:

“Ou te faamalosi atu i tagata uma ia ulufale atu i le malumalu ma le agavaa po o le galulue foi mo le aso e mafai ai ona outou ulufale atu i lena maota paia mo le mauaina o o outou sauniga ma feagaiga.

“Ia outou taliaina le uiga matagofie ma le filemu o le malumalu i o outou olaga i aso uma ina ia mafai ai ona oo mai le aso o le meleniuma” (*Liahona*, Ianuari 1995, 88).

Faitau e tagata o le vasega le Mataupu Faavae ma Feagaiga 109:22–26, 35. Fesili pe faapefea i sauniga o le malumalu sa ona fesoasoani ia tatou manumalo i le lalolagi ma mauaina ai le malosi mai luga.

(*Manatua*: O le pusa lona fitu o le a tatalaina i le fautuaga mo le aoaoina mo le Faaaliga 8:5–13; 9; 11.)

Faaaliga 8–11

Faatomuaga

O le faamaufaaailoga lona fitu o le a tatalaina “ona lologo ai lea o le lagi” (Faaaliga 8:1) Na vaaia e Ioane se agelu ma se asu o mea manogi e faatusa “i talosaga a le au paia” (f.4), ma o lo o mulimuli mai ai agelu e toafitu o lo o latou iliina pu o mala o le faatafunaga ma taua. E ui i le tele o lapataiga, ae na lipotia mai e Ioane faapea “e le'i salamo lava tagata i galuega a o latou lima” (Faaaliga 9:20). Na ia vaaia lana ia lava misiona o le fesoasoani i le faapotopotoina o ituaiga o Isaraelu a e le'i Afio Faalua Mai Iesu Keriso. Na ia vaaia ia ni perofeta se to'alua ua fasiotia i auala o Ierusalem ma sa toe tutu mai le oti ina ua mae'a aso e tolu ma le afa ma o a'e ai i le lagi.

Ia suesue ma le agaga tatalo le Faaaliga 8–11 ma manatunatu i mataupu faavae nei ae le'i saunia ia au lesona.

O Nisi Mataupu Faavae Taua o le Talalelei e Saili Iai

- O le a liligi mai e le Atua le anoano o mala o le faatafunaga ma taua i e amioleaga e sauniuni atu ai mo le nofo tupu o Iesu Keriso i le meleniuma (tagai Faaaliga 8:5–13; 9; 11; tagai foi Faaaliga 16; MFF 88:92–110).
- O Ioane le Talifaaaliga na muai faauuina e fesoasoani i le faapotopotoina o ituaiga o Isaraelu i aso e gata ai. (tagai Faaaliga 10:1–2, 8–11; tagai foi MFF 77:14).
- Ae le'i afio mai le Alii, o le a i ai ni perofeta se to'alua i Ierusalem ma le tuuina atu o la'ua ola mo le talalelei ma a mae'a aso e tolu ma le afa ona toe tutu mai ai lea i le oti ma o a'e i le lagi (tagai Faaaliga 11:3–12; tagai foi i le Sakaria 4:11–14; MFF 77:15).

Fautuaga mo le Aoao Atu

Filifili mai i aitia nei pe faaaogaina ni au lava, a o e saunia ia lesona mo le Faaaliga 8–11.

Faaaliga 8–14. O le a tatalo le fanau a le Alii i aso e gata ai ina ia puipuia i latou e la mai le lalolagi amioleaga. E alofa le Alii i Lana fanau ma e tali mai ia latou tatalo i Lana lava ala. (20– 25 minute)

Fesili: O le a le uiga o le tala faatusa? (O se tala faatusa, o se faatusatusaga lea o se mea e tutusa pe foliga foi i le isi; mo se faaitaiga, “o le faatuatua e faapei o se fatu.”) Tusi i luga o le laupapa ia upu nei. *O le tatalo e pei o le _____*. Fai i le vasega e aumai ni faatusatusaga i le tatalo.

Faitau e le vasega le Faaaliga 8:1–4 ma mataituina ni faatusatusaga. Fesili:

- E faapefea ona faatusatusa le tatalo i le asu?
- E te manatu o le a le mea o lo o tatalo ai le Au Paia i nei fuaiupu?

Valaaulia ni tagata se to'atolu e faitauina i le vasega le Faaaliga 6:9–10; Mataupu Faavae ma Feagaiga 87:6–7; ma le Mataupu Faavae ma Feagaiga 133:38–41. Fesili:

- O a mea o le a tatalo ai le Au Paia i aso mulimuli? (Ina ia afio mai le Alii e faamasino ma faaitiitia o latou mafatiaga ma faaumatia le amioleaga.)
- Faitau Mamona 8:20. O le a le mea o lo o aoao mai i leni fuaiupu e uiga i le faamasino atu po o le sailia o se taui i e ua faasaua mai ia i tatou? (E tatau ona tatou tuu atu i aao o le Alii na te tauia.)

Vaevae ia le Faaaliga mataupu 8–14 i le vasega ma su'eina faavave pe faapefea o na tali mai le Alii i talosaga a le Au Paia. Lisiina ia mea ua latou mauaina i le laupapa. Faitau pe usuina “Le Tupu o Tupu, Afio Mai” (*Viiiga* nu. 25). Talanoaina pe e faapefea i leni pese o na pei o se tatalo i aso e gata ai a le Au Paia. Valaauina ia tagata o le vasega, pe a fai latou te le'i faataunuuna, i na ia faaopoopo atu i ai a latou tatalo i tatalo a le to'atele o e o lo o tatalo mo le afio mai o le Alii ma le faaumatia o le amioleaga.



Faaaliga 8:5–13; 9; 11. A o le'i Afio Faalua Mai Iesu Keriso, o le a sasaaina mai e le Atua ia faama'i ma taua i luga o e amioleaga. (35–40 minute)

(Manatua: O le fautuaga lenei mo le aoaoina o se faaauuina o le fautuaga mo le Faaaliga 7.)

Ia faaali pusa e fitu ia na faaoga i le fautuaga mo le aoaoina o le Faaaliga e 7. Faaali i le vasega se ata o le siata i luga o le masini malamalama “O Le Mea e Faamamafaina” i le itulau 296), pe tusi foi i luga o le laupapa. Fesili:

- E fia fuaiupu i le tusi o Faaaliga o lo o faamatala mai ai faamaufaailoga e ono? (25.)
- E fia ai la fuaiupu ua totoe mo le faamaufaailoga e fitu? (259.)
- Aisea e te manatu ai ua tele naua ia fuaiupu ua faamatalaina ai lenei faamaufaailoga?

Tatala le pusa lona fitu ma faitauina lona faamatalaga. (“Ua faatafunaina Papelonia; ua afio mai Iesu Keriso i le mamalu; ua saisaitia Satani; ua potopoto faatasi e amiotonu ma le Faaola; ua i ai le filemu mo le meleniuma; ua tatalaina Satani mo sina vaitaimi; ua tau le taua tele mulimuli; ua faataunuuina le faamasinoga mulimuli; ua maua e le fogaeleele lona mamalu faaselesitila.”) Faamalamalama atu ona o le tele naua o mea o le a tutupu, o lea ua tusia ai e Ioane ni faamatalaga se tele mo mea o le a tutupu i le faamaufaailoga e fitu.

Tuuina atu i tagata o le vasega ni kopi o le “O Pu e Fitu o le Faamaufaailoga Lona Fitu” mai i le (itulau 297), ma valaaulia i latou e faaoga a latou tusitusiga paia e tali ai ia fesili. E mafai ona galulue i ni vaega pe galue foi le tagata lava ia. A mae’a, ona toe iloilo lea o tali faatasi e le vasega (tagai i le siata e pei o na tuuina atu)

O Tali

1. Tasi vae tolu o laau uma ma vao lanumeamata na mu.
2. O le sami, manu o le sami, ma vaa.
3. A. O le Laau e oona i le tofo; E. Ua oona matuitui le vai.
4. O le la, masina, ma fetu.
5. Satani.
6. Atonu o lo o ia faamatalaina ia mea tau faonaponei e pei o vaalele, tane tau, ma fanafanua.
7. $200,000 \times 1,000 = 200,000,000$.
8. Tasi vae tolu
9. Perofeta e toalua o loo umia le Perisitua Mekisateko.
10. A, E, I
11. O le a fasiotia ma toe tutu mai pe a mavae aso e tolu ma le afa ona siitia a’e ai lea i le lagi.
12. Sese.
13. O malo o Keriso.
14. E, O.

Faaaliga 10:1–3, 8–11. O Ioane le Talifaaaliga sa muai faauuina e fesoasoani i le faapotopotoina o ituaiga o Isaraelu i aso e gata ai. (15–20 minute)

Tusi le *Suamalie* i se tasi o itu o le laupapa a e tusi le *Oona* i le isi itu. Fesili: Faamata e mafai ona suamalie ma oona se mea i se taimi se tasi? Faaali atu i tagata o le vasega ia ni mea eseese po o ni ata ma fai atu i ai e faamalamalama mai pe faapefea ona suamalie ma oona i le taimi e tasi. O nei mea atonu e aafia ai ia:

- Pepa lole. (O lole e suamalie i le tofo, ae a tele e mafai ona e ma’i ai)
- O le ata o se Aiga ma se Pepe (nu. 62307). (O aiga e i ai ia taimi e fiafia ai faapea foi ma taimi e maua ai i le loto momomo.

O le ata O Faifeautalai i le Talaiga (nu. 62611). (O le galuega faafaifeautalai e maua ai le olioli i le aoaoina o le talalelei, peitai e mafai foi ona faigata ma maua ai ma le faanoanoa.)

Afai e manaomia, ona valaaulia lea o se taitai o le Ekalesia e faamatala i le vasega ni mea na ia faia e faaaliga ai le suamalie o le galuega a e maua ai fo’i ma le faanoanoa ona o filifiliga ua faia e isi.

Faitau e le vasega le Faaaliga 10:1–3 ma saili le mea na uuina e le agelu i lona lima. Faitau le Faaaliga 10:8–11 ma fesili:

- O le a le mea na fai mai ai le leo mai le lagi e fai e Ioane?
- O le a le mea na fai atu ai le agelu ia Ioane e fai i le tusi ititiit?
- E faapefea lona tofo?
- E te manatu o le a le mea o loo faatusa i ai le tusi?
- O a ni faailoga o lo o tuu mai i le fuaiupu 11 mo se malamalamaaga i le uiga o le tusi? (O Ioane ua tatau ona toe vavalo i luma o nuu e tele)

Faitau e le vasega le Mataupu Faavae ma Feagaiga 77:14, ma fesili:

- E tusa ai ma le fuaiupu lenei, o le a le misiona a Ioane?
- E faapefea ona faaali mai i lenei mea o Ioane na faauuina i le muai olaga?
- Faitau le Mataupu Faavae ma Feagaiga 7:1–2. Aisea ua suamalie ai lenei misiona ia Ioane? (O lona faanaunauga autu o le aumaia lea o agaga ia Keriso.)
- Aisea o le a oona ai ia te ia? (“O faamasinoga ma mala na folafola atu i e na avatu i ai le upu a le Alii na mafua ai ona le fiafia ma faanoanoa i le agaga” [Bruce R. McConkie, *Doctrinal New Testament Commentary*. 3:507].)

Faaiu i le usuina po o le faitauina o upu o le pese “Le Atua Malie Lau Galuega” (*Viiga*, nu. 82). Valaaulia le vasega e faamatala mai ni mea na avea ai le talalelei ma mea suamalie i o latou olaga.

Faaaliga 12–14

Faatomuaga

O le Faaaliga 12–14 o sina koma i le tatalaina mai o le faaaliga o le faamaufaaailoga lona fitu. A e le'i faaalina mai le manumalo mulimuli o Iesu Keriso i le malo o le tevelo, na faaalina e le Alii ia Ioane le talafaasolopito o taua i le va o le lelei ma le leaga e oo atu i le faatumutumuga o mea ole a tupu i le faamaufaaailoga lona fitu. I le mataupu e 12, na vaai ai Ioane i le Taua i le Lagi, le tulieseina o le tasi vae tolu o fanau faaleagaga a le Tama Faalelagi o e na mulimuli ia Lusifelo, ma le faaaauaina o taua i luga o le fogaelele. I le mataupu e 13, na molimauina ai e Ioane le tuputupu a'e o malo faaupu fai ma malo faalelotu e musuia pe faaautu i mea leaga (tagai ff. 7–8), ma faatupula'ia ai le pule a Satani i le fanauga a tagata. I le faai'uga i le mataupu e 14, na vaai ai e Ioane le mea moni ma le mana o le perisitua ua toefuataiina i le fogaelele (tagai ff.6–7) e saunia e ua talitonu mo le faatafunaga o e amioleaga.

Ia suesue ma le agaga tatalo le Faaaliga 12–14 ma manatunatu i mataupu faavae nei a e le'i saunia au lesona.

O Nisi Mataupu Faavae Taua o le Talalelei e Saili Iai

- O le taua na tauina i le lagi o lo o faaaauaina pea i le taimi lenai. Ua saunia e le Alii auala mo i tatou e mafai ai ona sao mai i lenei taua (tagai Faaaliga 12:3–17; tagai foi MFF 76:25–29; 1 Ioane 1:6–7).
- O lo o ia Satani le malosi e faaseseina ai ia tagata e ala atu i faailoga ma mea ofoofogia (tagai Faaaliga 13; tagai foi MFF 52:14).
- Na toefuataiina e le Atua le talalelei e ala mai i Ana auauna i aso e gata ai e saunia ai tagata o le fogaelele mo le afio mai o le Alii (tagai Faaaliga 14:6–7; tagai foi MFF 133:16–19, 36–40).
- O le au faatuatua e mulimuli ia Iesu Keriso o le a i ai se aso e malolo ai mai ia latou galuega, ma o a latou galuega sa faia i le amiotonu o le a manatuaina (tagai Faaaliga 14:8–13; tagai foi Mataio 11:28–30; Alema 40:11–12).

Fautuaga mo le Aoao Atua

Filifili mai i aitia nei pe faaaogaina ni au lava, a o e saunia lesona mo le Faaaliga 12–14.

Faaaliga 12:3–13. O le taua na amata i le lagi o lo o faauaina pea i ona po nei. Ua saunia e le Alii ia auala e puipuia mai ai i tatou mai le manu'alia i lenei taua. (30–35 minute)

Tusi le upu *Taua* i luga o le laupapa. Fesoasoani i tagata o le vasega ina ia malamalama o lo o latou i ai i le totonugalemu o se taua faaleagaga, i le talanoaina lea o nisi o fesili nei:

- E te iloa se tagata sa i se taua? Afai e te iloa, o le a se lagona o lenei tagata i mea na tutupu?
- Faamata o le a se lagona o se tagata o le a alu atu i se taua?
- Faitau le Efeso 6:12. E tusa ai ma lenei fuaiupu, o le a le taua o lo o tatou aafia ai nei?
- O le a sou lagonaa, o le a le mea pito i sili ona faigata i lenei taua faaleagaga?

Faamalamalama atu i le vasega o le Faaaliga 12–14, na motusia e le Alii ia Lana faamatalaga o mea o le a tutupu i aso e gata ai. A o le'i faaalina Lona manumalo mulimuli i le malo o le tiapolo, na faaali atu e le Alii ia Ioane le talafaasolopito o le taua i le va o le lelei ma le leaga, seia oo atu i le faatumutumuga o mea e tutupu i le faamaufaaailoga lona fitu. Faamalamalama atu fo'i o le iloina o uiga o ni faailoga e fesoasoani ai ia i tatou mo se malamalamaaga i nei mataupu. Tuuina atu i tagata o le vasega ni kopi o lenei siata po o le tusi fo'i i luga o le laupapa, ae faaavanoa le koluma "O uiga". Ia galulue faaatasi le vasega, ma tuuina atu avanoa i tagata o le vasega latou te su'eina ai ni tali talafeagai mo faailoga mai i mau faatusatusa.

Faaaliga 12

Faailoga	Mau Faatusatusa	Uiga
Fafine (ff. 1, 6)	FIS, Faaaliga 12:7; MFF 5:14	Le Ekalesia a Iesu Keriso
O fetu e sefululua (tagai f. 1)	FIS, Faaaliga 5:6	Aposetolo e Toasefululua
O se tamaititi, tama tane "o le a na te pule i nuu uma" (tagai ff. 2, 5)	FIS, Faaaliga 12:3; MFF 65:5–6	O le nofo tupu o Keriso i luga o le fogaelele
Tarako (tagai ff. 3, 9)	MFF 88:110	Satani po o Lusifelo
O le lona tolu o vaega o fetu ua toso ese e le tarako (tagai f. 4)	MFF 29:36–38	Aveesea e Satani o le tasi vae tolu o agaga
Ai u'amea (tagai f. 5)	1 Nifae 11:25	Le upu a le Atua
O fafine ua sola i le vao (tagai f. 6)	Amosa 8:11; MFF 86:1–3	Ua aveesea le Ekalesia i le taimi o le Liliuese Tele

Faitau faatasi ma le vasega le Faaaliga 12:1–6 ma talanoaina manatu nei:

- O le misiona a le Ekalesia i aso anamua o le saunia lea mo le afio mai o le malo o le Atua o lea o le a nofotupu ai Iesu Keriso.
- Na taumafai Satani ma e mulimuli ai e faatamaia lena malo (tagai ff. 3–4).
- Na avea le malo o le Atua i le lagi ina ua pau atu le Ekalesia i le liliuese (tagai ff. 5–6).

Faitau le Faaaliga 12:7–9 ma fesili: O a ia taua o lo o faasino tonu i ai ia nei fuaiupu? (Le Taua i le Lagi.) Ta’u atu i tagata o le vasega o latou fo’i sa aafia ai i lena taua a o avea ma fanau agaga a le Atua i le muai olaga. Valaaulia i latou e faitau le Faaaliga 12:11, ma fesili: O le a le mea na mafai ai ona manumalo i latou sa i le itu a le Atua i le taua? Tusi a latou tali i le laupapa ma talanoaina. O ni tali talafeagai e aofia ai:

- Lo tatou faatuatua i le Togiola a Iesu Keriso (“o le toto o le Tamai Mamoe”).
- Lo tatou naunautai e tautino atu o tatou talitonuga (“ma le upu a la latou mau”).
- Lo tatou naunautai e ola i o tatou ola faaletino ma o nisi taimi e tatau ai ona tuuina atu o tatou ola mo le amiotonu (“ua latou le faapelepeleina fo’i lo latou ola ua oo i le oti”).
- Tau atu i le vasega, o le feeseeseaiga na amata i le Taua i le Lagi ma na oo atu ai i le sauaina o le Ekalesia i aso anamua, o lo o faaauau pea i ona po nei. Faitau le Mataupu Faavae ma Feagaiga 76:28–29 ma fesili:
- E mafai faapefea i mataupu faavae na fesoasoani ia i tatou i le Taua i le Lagi ona fesoasoani ia i tatou i ona po nei?
- O le a se mea e mafai ona tatou faia ia malolosi atili ai a tatou molimau ia Iesu Keriso?

Ina ia fesoasoani i tagata o le vasega ia malamalama i le auala e faamalolosi ai a tatou molimau ma faato’ilaloina Satani, faitau ma talanoaina le faamatalaga leni a Elder Rbert D. Hales:

“O Molimau e masani ona oo mai pe a i ai le naunautai e auuina i soo se mea e valaauina ai i tatou. E oo mai pe a faia se faaiuga e taumafai e usitai. O Molimau e mauaina a o taumafai e fesoasoani, sii i luga ma faamalosia ia isi. E mauaina i le tatalo ma le aoaoina o tusitusiga paia ma le faatinoina io tatou olaga. Po o le a lava ia le tulaga ua tatou i ai, e foliga mai e i ai lava vaitaimi i o tatou olaga o le a mafai ai ona tatou mauaina ia le malamalamaaga o loo soifua le Atua ma o Iesu o le Keriso. E leai lava se isi sailiga e sili atu i le olaga ona tatou faia nai lo le naunau ia mauaina se molimau i le mea moni” (*Liahona*, Ianuari 1995, 22).

Faaaliga 13. O lo o ia Satani fo’i le malosi e taufaasese ai ia tagata e ala i vavega ma faailoga. (20–25 minute)

Fesili i tagata o le vasega:

- Mai le fanau uma a le Atua, mata o ai e ono i ai le naunauga sili e faafoliga mai e amiotonu ae o loo aoaoina atu mea sese?
- Aisea e manao ai ia Satani e taitai sese i tatou?

Faitau le faamatalaga leni pe tusi i luga o le laupapa

“E uiga i le malo o le Atua, o le tiapolo e masani ona faatuina lona malo i le taimi lava e tasi ia tuu faafeagai ma le malo o le Atua” (*Teachings of the Prophet Joseph Smith*, 365).

Faamatala i le vasega o le misiona a Satani o le faaleagaina lea o le galuega a le Atua e ala i lona taitai eseina lea o Lana fanau mai le mea moni. O le aoaoina o le faaaliga a Ioane o le a mafai ai ona tatou iloina pe mafai faapefea ona galue Satani ina ia mafai ona tatou teena ana taufaasese. Faitau Faaaliga 13:1–4, ma tuuina atu ia le faamatalaga leni a Elder Bruce R. McConkie:

“O lo o vaaia e Ioane i i ia se manu i le lagi, o lo o i foliga o malo o le laueleele” (FIS, Faaaliga 13:1),² o lona uiga o le manu o lo o faaoga e avea ma faailoga o ni malo e le iloa o latou igoa i le laueleele ma faali atu ai a latou gaoioiga e faasaga i le Au Paia ma le mau a le amiotonu: (*Doctrinal New Testament Commentary*, 3:520)

Fesili:

- O le a le mea e faasino tonu i ai le manu feai i le Faaaliga 13:1?
- O ai e maua mai ai e nei malo ia le latou malosi ma le pule? (O le Tarako, po o Satani; tagai Faaaliga 12:9).
- Aisea e tapua’i ai tagata i le Tarako ma le manu feai?

Faamalamalama atu o le manu feai o le a i ai lona malosi i le lalolagi. Faitau le Faaaliga 13:7–8).

- E tusa ai ma nei fuaiupu, o ai o le a faato’ilaloina e le manu feai?
- O ai i latou o le a le tapua’i i le manu feai?
- O le a le uiga o le tusia o lou igoa i le tusi o le ola a le Tamai Mamoe? E faapefea ona tusia ai lou igoa iina? (tagai Alema 5:57–58).

Ina iloa pe aisea ua pulea ai e Satani le tele o tagata i le fogaeleele, faitau leotele le Faaaliga 13:11–18, ma talanoaina faatasi ma le vasega fesili nei:

- I le fuaiupu e 11, mata o le a sa tatou faaiuga e uiga i le tasi manu feai “ua i ai ona nifo e pei onifo o se tamai mamoe” ae “ua tautala ia pei o se tarako”? (E lē o le tulaga lea na foliga mai i ai.)
- O a ni auala o lo o faataitai ai e le manu feai le mana o le Atua?
- O le a se aafiaga o tagata o lo o nonofo i le laueleele e ala mai i vavega?
- I le fuaiupu 14, o le a le mea e faasino tonu i ai ia le faia o se faatusa o manu feai muamua. (Tapua’i i le manu feai.)
- O le a le mea na manaomia ina ia “faatau mai pe faatau atu” i malo o le manu feai.

Manatua: O le uiga tonu o le manu feai e le'i faailoaina mai, ma o se talanoaga e uiga i le numera 666 ua na o ni taumatematega ma e leai sona aoga tele. Nai lo lena, talanoaina ia fesili e pei o nei:

- O a auala ua "faailogaina" ai e tagata e mulimuli ia Satani i latou lava? (tagai Isaia 3:13-19).
- Faitau Alema 34:35. E mafai faapefea ona tatou faatagaina Satani e pule ia i tatou?
- Pe mauaina fo'i e tagata e mulimuli i le Alii ia se faailoga? (tagai Faaaliga 7:3; 14:1).
- O le a le mea e mafai ona tatou faia tatou te mauaina ai le faailoga po o le faamaufaaailoga a le Alii? (tagai Mosaea 5:7-12, 15).

Manatunatu i le faitauina o le faamatalaga lenei a Elder Marvin J. Ashton:

"O le ekalesia a Iesu Keriso o le faatulagana a le Atua mo le ola amiotonu ma le ola e faavavau. E mafai ai ona faataunuuina ia le faatuina o sini maualuluga ma le taua. O le a taumafai Satani ma lana vaega i taimi uma e taufaasese ma faalata tatou ina ia tatou mulimuli i ana fuafuaga. Afai tatou te manaomia ia le saogalemu i aso taitasi, le faaeaina ma le fiafia e faavavau, e tatau ona tatou ola i le malamalama ma le moni o fuafuaga a lo tatou Faaola. O le faaolataga uma e faamoemoe i lo tatou Faaola" (*Liahona*, Ianuari 1991, 25).

Ia tautino atu, e ui i le tele o le malosi o Satani, ae sili atu ai lava le mana o le Alii.



Faaaliga 14:6-7 (Mau Tauloto). Na toefuataiina le talalelei i aso e gata ai e ala mai i agelu a le Atua e saunia ai ia tagata o lo o i le fogaeleele mo le afio mai o le Alii.
(15-20 minute)

Faaali i tagata o le vasega ia se ata o se malumalu sa, po o le malumalu sa o loo i lo outou eria faatasi ai ma le faatagata o le agelu o Moronae. Faitau le Faaaliga 14:6-7 ma fesili: Faamata o ai le agelu lea o lo o ta'ua i nei fuaiupu? Tusi i le faatagata o i le ata ma fesili: I lou lava manatu, faamata aisea ua tuuina ai ia le faatagata o le agelu o Moronae i le tumutumu o le tele o o tatou malumalu sa?

Faitau e se tagata o le vasega le saunoaga lenei a Peresitene Gordon B. Hinckley:

"Na 'iloaina fo'i e Ioane le talifaaaliga se tasi agelu ua lele i le taulotoaiga o le lagi, ua ia te ia le talalelei e faavavau e tala'i atu i e o lo o nonofo i le lalolagi, i atunuu uma, ituaiga ma gagana eseese, ma tagata'

(Faaaliga 14:6). Ua uma ona sau lena agelu. O lona igoa o Moronae. O lona leo o lo o tautala mai i le efuefu, ma na ia aumaia ai le isi molimau e moni lava o loo soifua le Alii o Iesu Keriso" (*Liahona*, Ianuari 1996, 70).

Faaali i le vasega le ata o Moronae ao ia Faaali atu ia Iosefa Samita i Lona Potu (Talafaasolopito o Iosefa Samita 2:29-47) (nu. 62492). Ia toe faamanatu le tala i le asiasiga a Morone ia Iosefa Samita mai i le Talafaasolopito o Iosefa Samita 2:29-34, ona talanoaina ai lea o fesili nei:

- O le a le mea e aumaia e Moronae i le lalolagi? (tagai MFF 27:5; 133:36-37).
- O a meafaigaluega na saunia e le Alii o le a fesoasoani ia Iosefa Samita i le faataunuuina o lana misiona? (O le Urima ma le Tumema; tagai MFF 20:8-10; Talafaasolopito o Iosefa Samita 2:35.)
- Aisea e taua ai le tuuina atu o le savali a le talalelei? (Ua oo mai le itula o le faamasinoga a le Atua; tagai MFF 133:38-40.)
- E faapefea e le talalelei ona saunia tagata mo le faamasinoga a le Atua o le a oo mai a e le'i Toe Afio Faalua Mai Iesu Keriso?
- O le a le auala na fesoasoani ai ia Moronae i le laveaiina o le lalolagi mai i le faatafunaina?
- O a mea e mafai ona tatou faia i le taimi nei e fesoasoani ai i le faataunuuina o le misiona na amataina e Moronae.

Faamatala o le talalelei e tatau ona folafola atu "i atunuu uma, ituaiga ma gagana ma nuu (Faaaliga 14:6). Fesili:

- O fea na tala'i atu i ai e au uo ma tagata o outou aiga le talalelei? (Tusi atunuu ma ni gagana i luga o le laupapa.)
- Pe ua talaiina ea le talalelei i gagana *uma* ma atunuu *uma*?

Faitau e se tagata o le vasega le faamatalaga lenei a Peresitene Hinckley:

"O le taimi lenei e le'i mafai ona tatou avatua le talalelei i atunuu uma, ituaiga, gagana ma nuu. E ui i lea, ua tele le galuega ua mae'a ona faataunuuina. Ua tatou mafai ona avatu le talalelei i soo se nofoaga ua faatagaina ai i tatou tatou te o atu i ai. O lo o taitai le Atua, ma o le a tatalaina ia faitoto'a e ala mai i Lona mana ma e tusa ai ma Lona finagalo paia. O lena mea ua ou maua ai le mafanafana. Ua ou mautinoa foi" (*Liahona*, Ianuari 1996, 70-71).

Faamalosiau atu i le vasega e manatua le uiga o le faatagata o le agelu o Moronae ma saunia i latou e faataunuuina ni misiona pe a oo mai le taimi.

Faaaliga 14:8–13. O le au faatuatua o loo mulimuli ia Iesu Keriso o le a i ai se aso e malolo mai ai ia latou galuega ma o le a manatuina pea a latou galuega amiotonu. (10–15 minute)

Tusi le upu *malolo* i luga o le laupapa ma fesili i ni tagata o le vasega se to’atasi pe to’alua fo’i e faamatalaina mea latou te faia mo se malologa pe a taunuu mai i le fale i le tuua o le aoga. Fesili: O a upu o le a e faaaogaina e faamatala ai pe o le a sou lagona i lena malologa?

Faitau e tagata o le vasega le Faaaliga 14:8–13 ma makaina taimi uma e faaaoga ai le upu *malolo*. Fesili:

- E faafia ona ta’u le upu *malolo*? (Faalua; tagai ff. 11, 13)
- E faapefea ona faatusa le malolo a le amioleaga i le malolo mo le Au Paia?
- O le a se mea e te naunau e fai ina ia maua ai le malologa po o le filemu o le a mauaina e le Au Paia?

Valaaulia ia tagata o le vasega e faitau le Alema 34:34–35 ma le Mosaea 5:15. Fesili:

- O le a le mea e te faia e “faamauiina” ai oe i le tiapolo?
- O le a le mea e te faia e “faamauiina” ai oe i le Alii?

Tautino atu o le a tatou mauaina le tau e faavavau e faalagolago i filifiliga tatou te faia. Tuu se lu’i i tagata o le vasega e faia ia filifiliga e i’u ai latou te maua ai le malologa mai a latou galuega. Faitau e se tagata o le vasega ia le faamatalaga lenei a Peresitene Joseph F. Smith:

“O perofeta anamua sa saunoa i le ‘ulufale atu i le malologa o le Atua: o le a le uiga? I lou mafaufau, o le uiga o le ulufale atu i le malamalama ma le alofa o le Atua, ma le i ai o le faatuatua i lona faamoemoe ma lana fuafuaga e tatou te iloa ai e sa’o i tatou, ma e tatou te lē o sailia se isi mea....O le tagata ua oo i le tulaga lena o le faatuatua i le Atua, ma ua aveesea uma le masalosaga ma le fefe mai ia te ia, ua ia ulufale atu i le ‘malologa o le Atua,. . .mai le tagi aue o loo alu a’e iinei po o iina” (*Gospel Doctrine*.58).

Faaaliga 15–16

Faatomuaga

O le Faaaliga 15–16 o loo faaalua ai ia ni mea o le a tutupu mulimuli a e le’i faamutaina le malo o le tiapolo. I le Mataupu 15, na vaai ai e Ioane ia le Au Paia i le mamalu selesitila o loo vivii atu i le Atua mo Lana faamasinoga amiotonu, faatasi ai ma agelu e fitu ua sauni e liligi mai i le fogaeleele o “mala e fitu e faaiu ai” (f. 1). O le Faaaliga 16 o loo tusia ai ia faama’i, taua, ma i si mea mata’utia, atoa ai ma perofeta pepelo ua faia valoaga ma faaauau le aoaoina o mataupu faavae sese e taitai

seseina ai tagata o le lalolagi (tagai ff. 13–14). E ui i le tele o faigata ma faatama’iga, ae toatele lava e le “salamo i latou i a latou amio” (f. 11). Ma i le faai’uga, na folafolaina atu ai e se leo selesitila e faapea, “Ua uma ona fai” (f. 17).

Ia suesue ma le agaga tatalo le Faaaliga 15–16 ma manatunatu i mataupu faavae nei a e le’i saunia au lesona.

O Nisi Mataupu Faavae Taua o le Talalelei e Saili Iai

- O le Au Paia e tausia a latou feagaiga ma mataituina le afio mai o le Alii o le a faamanuiaina ma puipuia a o liligiina mai e le Atua Lana faamasinoga i luga o e amioleaga. (tagai Faaaliga 16; tagai fo’i 1 Nifae 22:14–19, 28; MFF 106:4–5; Iosefa Samita—Mataio 1:37, 46–50).

Fautuaga mo le Aoao Atu

Filifili mai i aitia nei pe faaaogaina ni au lava, a o e saunia lesona a o e sauni e aoaoina le Faaaliga 15–16.

Faaaliga 16. O le Au Paia e tausia a latou feagaiga ma mataituina le afio mai o le Alii o le a faamanuiaina ma puipuia a o liligi mai e le Atua Lana faamasinoga i luga o e amioleaga. (25–30 minute)

Fai atu i tagata o le vasega e mafaufau faapea ua i ai se faama’i ua pesi i le lalolagi e leai sona togafitiga ma ua feoti ai ia le tasi mai le tolu o tagata. Manatunatu o lenei faama’i o loo aafia ai atunuu uma i le taimi lava e tasi ma e tai miliona i latou ua feoti mai i le faama’i i le vaiaso. Fesili: Afai e i ai se auala e mafai ona faasaoina mai ai oe mai i lenei faama’i ma mauaina le fiafia i faamanuiaga a le Atua, faamata e te fia iloa po o lea lena auala?

Fesili i tagata o le vasega e mafaufau i le fesili a o aoaoina le Faaaliga 16.

Faamalamalama atu i le Faaaliga 15, na toe vaai ai Ioane ia Satani ua faaeaina ma o loo viia le Atua i le malo selesitila (“sami tioata,” f. 2; tagai fo’i MFF 77:1). Na ia toe vaai fo’i i nisi agelu e toafitu, o loo tofu ma uuina se ipu o loo o i ai le faama’i. Ona faatonuina ai lea e se leo mata’utia ia agelu e, “O ia ina liligi ifo le ipu o le toasa o le Atua i le lalolagi” (Faaaliga 16:1).

Tusi ni ata o ni ipu se fitu i luga o le laupapa ma faanumera mai le 1 e oo i le 7 po o le tusia fo’i o numera i luga o le laupapa. Faitau e tagata o le vasega ia le Faaaliga 16:2–4, 8–12, 16–21 ma fautua atu po o le a le mea o loo faasino tonu i ai ia nei mala taitasi. Tusi a latou fautuaga i lalo ifo o le ipu po o le numera. Faamalamalama atu e tuu mai e le Atua ia mafatiaga i tagata ona o a latou agasala ina ia latou maua ai le molimau e tatau ona latou salamo. Fesili:

- O le a le tala a Ioane e faailoa mai ai pe na salamo ia tagata pe leai? (tagai ff.9, 11).
- Faamata o le a le tulaga e i ai lou olaga pe ana faapea o lo o e ola i lea vaitaimi?

- Faamata e mafai ona sola ese se isi?

Faitau le 1 Nifae 22:14–19, 28 ma talanoaina na o ni nai fesili po o fesili uma nei:

- O ai o le a faatama'ia e le Alii?
- Aisea o le a faatama'ia ai e le Atua i latou e amioleaga?
- E faapefea ona puipui ma faasao e amiotonu?
- O le a le ki i le ola saogalemu i le Alii?

Ina ia fesoasoani atu i tagata o le vasega mo se malamalamaaga, e ui ina o le a puipuia i latou e amiotonu, ae o le a i ai lava i latou o le a mafatia, faitau le saunoaga lenei mai le Perofeta o Iosefa Samita:

“O se manatu lē sa’o le faapea o le a lavea’ia mai le Au Paia mai i faamasinoga uma, ao e e amioleaga o le a mafatia; aua o tino uma o le a mafatia, ma ‘e toetoe lava foi ina lē sao mai ai i latou o e amiotonu;’ a e ui i lea o le to’atele o le Au Paia o le a sao mai ai, aua o le amiotonu o le a ola i le faatuatua; ma e to’atele fo’i o e amiotonu o le a maua i faama’i, faama’i pepesi, ma isi lava mea e ala mai i vaivaiga o le tino, ma o le a mafai o faasaoina i le Malo o le Atua” (*History of the Church*, 4:11).

Faitau e tagata o le vasega le Faaaliga 16:15, ma fesili: O a fasi fuaitau e lua o loo i totonu o lenei fuaiupu o loo faamatala mai ai ia e o le a mauaina le fiafia i faamanuiaga o le puipuiga a le Alii. (“O le mataala” ma “tausī i ona ofu.”) Ia tusi ia fasi fuaitau e avea ma ni faauluuluga o ni koluma se lua i luga o le laupapa. Tusi le *Iosefa Samita—Mataio 1:37, 46–50* ma le *Mosaea 4:30* i le koluma ma le faauluuluga “O le mataala”. Tusi 2 *Nifae 9:14*, ma le *Mataupu Faavae ma Feagaiga 36:6; 109:72–76* i le koluma ma le faauluuluga, “tausī ona ofu”. Vaeluaina le vasega i ni vaega se lua ma tofu ma le koluma. Ia latou sue’su’e i mau ma mataituina le uiga o a latou fasi fuaitau. Talanoaina o latou manatu, ma tusi i luga o le laupapa.

Molimau atu e alofa le Alii i Ona tagata ma o le a ia puipuia i latou i aso mulimuli, e oo lava i le taulotoaiga o faatama’iaga matuia. Uuna’ia ia tagata o le vasega e mataala, ma tausī a latou feagaiga ina ia mama ma saunia o latou ofu. Uuna’ia e faalateleina lo latou faatuatua ma talitonu i mea uma ua folafola mai e le Alii.

Faaaliga 17–19

Faatomuaga

Ua folafola mai e le Alii i Isaraelu o Aso e Gata Ai...“Ina o atu ia outou.....nai Papelonia, mai le amioleaga, aua o le Papelonia faaleagaga lea. . . .

“..... ina ne’i faafuase’i ona faaumatia [oe]” (MFF 133:14–15). I le Faaaliga 17, na vaai ai Ioane i Papelonia, i le faailoga o le malosi o Satani ua salalau atu i le lalolagi. Ma i totonu o le “ituaso e tasi” (Faaaliga 18:19) na ia molimauina ai le faatafunaina o Papelonia. O i latou na fiafia i ana agasala na fetagisi ma laue i lona pa’ū a o e amiotonu ua fiafia ma olioli (tagai ff. 11–24). Ona vaai ai lea o Ioane i sauniuniga mo le “tausamaaga a le Tama’i Mamoe,” ua leva ona faatali aua o “lona faletua fo’i [le Ekalesia] ua saunia o ia e ia” (Faaaliga 19:7). O le Tama’i Mamoe ua avea ma “TUPU O TUPU, MA LE ALII O ALII” (f. 16).

Ia suesue ma le agaga tatalo le Faaaliga 17–19 ma manatunatu i mataupu faavae nei a e le’i saunia au lesona.

O Nisi Mataupu Faavae Tava o le Talalelei e Saili Iai

O Papelonia o le faailoga o le amioleaga o le lalolagi, o le a faatafunaina i le Afio Faalua Mai o Iesu Keriso. A tatou usitai i faatonuga a le Atua tatou te “o ese mai i Papelonia,” o le a tatou le faia ia agasala a le lalolagi pe aafia fo’i i mala o le a faatama’ia ai. (tagai Faaaliga 18; MFF 133:1–15).

- I aso mulimuli, o le Au Paia ua saunia i latou mo le afio mai o le Faatoafaiava (Iesu Keriso) o le a faaofuina i le amiotonu ma valaaulia i le tausamaaga a le Tamai Mamoe, (tagai Faaaliga 19:5–9; tagai foi MFF 58:8–12)
- O i latou e faasagatau i le Tama’i Mamoe, o le a faatama’ia pe a oo mai Iesu Keriso ma “le autau sa i le lagi” (Faaaliga 19:14; tagai Faaaliga 19:11–21; JST, Faaaliga 19:18; tagai fo’i MFF 133:46–51).

Fautuaga mo le Aoao Atu

Filifili mai i aitia nei pe faaaogaina ni au lava, a o e saunia ia lesona mo le Faaaliga 17–19.

Faaaliga 17:1–6, 14; 18:1–18. O Papelonia, o le amioleaga lea a le lalolagi, o le a faatama’ia i le afio Faalua Mai o Iesu Keriso. A tatou mulimuli i faatonuga a le Atua e tatou te “o ese mai i Papelonia,” o le a tatou le fiafia i agasala a le lalolagi pe tatou te aafia i mala o le a faatama’ia Papelonia. (25–30 minute)

- Faitau e le vasega le fuaiupu muamua o “Isaraelu, Ua Valaau Mai le Atua” (*Pese* nu. 6) Fesili:
- O ai e te manatu e faasino i ai “Papelonia” i lenei pese?
- E faapefea ona faatusatusa ia Siona?
- E faapefea ona pa’ū Papelonia?

Faamalalama atu na vaai e Ioane le pa’ū o Papelonia i le Faaaliga 17–18. Faitau e tagata o le vasega le Faaaliga 17:1–4 ma faamatala po o ai le fafine na iloa e Ioane i nei fuaiupu. Fesili:

- O le a le faia a lenei fafine ma le manu feai?

- Faitau le Faaaliga 12:1–4. E faapefea ona eseese le faia a lenei fafine ma le manu feai ma le fafine i le Faaaliga e 17?

Faamalamalama atu ua tuuina mai e le Alii ia ni faamatalaga musuia i lenei fasi faitau o le Faaaliga. Na vaaia fo’i e Nifae se faaaliga faapea ma na ia tusia mea na ia vaai i ai. Faitau e tagata o le vasega le Faaaliga 17:5–6 ma le 1 Nifae 14:9–12. Fesili:

- E faapefea ona faatusa e Nifae ia fafine e toalua? (Le ekalesia a le Tamai Mamoe ma le ekalesia a le tiapolo)
- O fea e te mauaina ai ia nei ekalesia e lua? (I luga o le fogaeleele.)

Faitau e tagata o le vasega ia le Faaaliga 17:14 ma 1 Nifae 14:13–17, ona talanoaina ai lea o fesili nei:

- O le a le misiona a le ekalesia a le tiapolo? (Faasagatau ia Iesu Keriso.)
- O le a le mea o le a taofia ai le ekalesia a le tiapolo mai le faataunuaina o lana misiona? (O le mana o le Tamai Mamoe.)
- O le a le mea o loo mafai ai e le Au Paia a le Atua ona mauaina lenei mana? (Amiotonu.)
- O le a le i’uga o le ekalesia a le tiapolo? (Faatama’ia.)

Faamatala i le vasega e i ai le faalavelave i le ola ai i le taimi o loo i ai nei ekalesia. Faitau e se tagata o le vasega ia le faamatalaga lenei mai ia Elder Carlos E. Asay, o se tasi o le Au Fitugafulu:

“O loo o i ai se talapepelo—o se talapepelo matautia—o loo faataamilo i le Au Paia o Aso e Gata Ai ma ua i ai se aafiaga o le autalavou. Ma e faapea o se ‘tagata e paleni lelei’ o se tagata lea e pui puia ia lava mai i le aveva o se tagata e matua amiotonu naua. O lenei talapepelo o le a e talitonu ai e mafai ona e ola manuia ma fiafia o se tagata ‘faalotoloto-lua’ e tu le tasi vae i Papelonía a’o le isi e tu i Siona (tagai Iakopo 1:8)” (Liahona, Iulai 1992, 41).

Fesili:

- O a ni faataitaiga o le tu o le tasi vae i Papelonía (lalolagi) a o le isi i Siona (le Ekalesia)?
- Aisea e faigata ai ona tuu se vae i nofoaga e lua?

Na saunoa mai Elder Boyd K. Packer:

“O le mamao i le va o le Ekalesia ma ala ua mulimuli ai le lalolagi, lea e le mafai ona tatou mulimuli ai, o le a matua faateleina lava.

“O nisi o le a pauu atu ma liliuese, o le a solia a latou feagaiga, ma suia le ata o le faaolataga ia latou lava tulafono” (Liahona, Iulai 1994, 26).

Faitau le Faaaliga 18:1–4 ma fesili:

- O le a le mea e finagalo le Alii tatou te faia?
- O a mafuaaga e lua o loo tuuina mai e le agelu mo i tatou e tatau ai ona tatou “o ese mai” ma Papelonía? (O le sosola ese mai i agasala a le lalolagi ma mala o le a oo mai.)

Faitau le Faaaliga 18:5–8 ma fesili: O le a le tau i o le a tuuina atu e le Alii ia Papelonía ma e e fiafia i ana agasala? (Talanoaina ia tali a le vasega.)

Fai atu i le vasega e teu i o latou mafaufau le i’uga o Papelonía a o latou manatunatu i fesili nei mai ia Elder Asay:

“E mafai ona matua amiotonu a’ia’i se tagata? Matua pei o Keriso? E le mafai! Faamata e mafai e le ‘tagata paleni lelei’ ona savali lelei i le lauu faalava i le va o le lelei ma le leaga? E leai. E maluelue sitepu taitasi, ma e i’u ina pau ma le tausia e ia poloaiga a le Atua” (Liahona, Iulai 1992, 45).

Fesili: E faapefea ona eseese uiga e faalia e i latou e amioleaga i le faatama’ia o Papelonía mai i uiga o e amiotonu? (tagai Faaaliga 18:11–18, 20). Ta’u atu o Papelonía na ia aumaia le oa na fiafia i ai le lalolagi. Fesili: O le a le mea e mafai ona tatou faia e taofia ai le faanoanoa i le faatafunaga o Papelonía faatasi ai ma e e amioleaga? Faitau e tagata o le vasega ia le Mataupu Faavae ma Feagaiga 121:34–35 ma mataituina pe faapefea ona fesootai nei fuaiupu ma le lesona. Ia tusia e tagata o le vasega ia ni fasipepa mea o le a latou faia e “o ese mai ai” i Papelonía. E mafai ona faai’u i le faitauina pe usuina le fuaiupu lona tolu o le “Isaraelu, Ua Vala’au Mai le Atua” (Viiga nu.6).

Faaaliga 19:5–21. I aso mulimuli, o le Au Paia ua saunia mo le afio mai o le Faatoafaiava (Iesu Keriso) o le a faaofuina i le amiotonu ma valaauina i le tausamaaga a le Tamai Mamoe. O i latou uma o e faasagatau i le Tamai Mamoe o le a faatama’ia. (25–30 minute)

Faaali le ata O le Afio Faalua Mai (nu. 62562) ma fessili: Pe o e sagisagi fiafia atu ea i le afio mai o le Alii? Faamalamalama atu na iloa e Ioane le faai’uga o le amioleaga uma i le lalolagi. Faitau e tagata o le vasega le Faaaliga 19:11–16. Fesili: E faapefea ona tatou faatusatusa le faamatalaga lenei e uiga i le Afio Faalua Mai i le ata? Talanoaina manatu nei:

- O le solofanua pa’epa’e na vaaia e Ioane o le faailoga lea o le afio mai o Keriso o le Tupu o Tupu ma le manumalo i le amioleaga (tagai i le faamatalaga mo le Faaaliga 19:11-16 i le Le Olaga o Aoaoga a Iesu ma Ona Aposetolo. Itulau 468)²
- O le a afio mai ia Keriso i laei mumu, ina ua mae’a ona ia solia toatasi le soligavine. O le faatusa lea o le Togiola ma Lona Faamasinoga o e amioleaga (tagai MFF 133:46–51).
- O le a pulea e Keriso le fogaeleele i le ai u’amea po o le upu a le Atua (tagai FIS, Faaaliga 19:15; 1 Nifae 11:25).

Fai ia se pepa o loo tusi ai meaai i le mea tou te nonofo ai, pe aumaia foi se pepa o taumafataga mai se faleaiga. Faaali atu i le vasega le pepa ma fesili atu e mafauafau faapea ua valaaulia i latou i se taumafataga a se tagata mauoa o le latou aiga.

- Afai e mafai ona e filifilia le nofoaga o le a faataunuu ai le taumafataga, o fea e te lua o i ai?
- O a mea ua e faamoemoe o le a i ai i le pepa o taumafataga?

Ia fai ni koluma se lua i luga o le laupapa. Tusi le faaluuluga o le tasi *O le Tausamaaga o le Faaipoipoga a le Tama'i Mamoe ma le isi O le Tausamaaga o le Atua Silisili Ese*. Faitau e tagata o le vasega le Faaaliga 19:5–10 ma mataituina ia mea o le a faia i le tausamaaga o le faaipoipoga a le Tamai Mamoe. Talanoaina fesili nei ma tusi ai tali i le koluma “Tausamaaga o le Faaipoipoga”

- O ai le Faatoafaiava ma lana faaipoipoga o lo ua fiafia ma olioli ai le lagi? (O le Tamai Mamoe, po o Keriso; tagai f. 7.)
- O ai le faletua (ua saunia o ia e ia” (f. 7). (O le Au Paia.)
- O a laei e manaomia le ofuina mo le tausamaaga? (Le ie vavae mama ma le pupula; tagai f. 8.)
- O le a le mea e faasino tonu i ai nei ofu? (O le amiotonu a le Au Paia; tagai f. 8.)
- O le a le mea na faatonuina Ioane e tusia e uiga i e ua valaauina i lenei faaipoipoga? (“Amuia i latou”; f. 9.)
- E faapefea i a tatou molimau ia Iesu ona fesoasoani ia i tatou ina ia mafai ona tatou auai i le faaipoipoga a le Tama'i Mamoe

Faitau e tagata o le vasega le Faaaliga 19:17–21 ma mataituina ia mea o le a faia i le tausamaaga a le Atua Silisili Ese. Talanoaina fesili nei ma tusi ia tali i le koluma: “Tausamaaga a le Atua Silisili Ese.”

- O ai o loo valaaulia i le tausamaaga a le Atua Silisili Ese? (O manu felelei i le taulotoaiga o le lagi; MFF 29:18–20.)
- O a mea o le a i ai i le pepa o taumafataga.? (O tagata amioleaga o le lalolagi; tagai f. 20)
- E tusa ai ma le vaega mulimuli o le Faaliliuga Faaperetania a Iosefa Samita o le fuaiupu e 18, o a mea na fai e e amioleaga na oo ai ina tuu i le pepa o taumafataga. (Na faasagatau i le Tamai Mamoe.)
- O le a le fasi fuaitau e iloa ai pe ua lava meaai a manu felelei?

Faamanino atu i tagata o le vasega e sili atu le faitau i le pepa o loo tusia ai taumafataga nai lo le avea ma se mea ai [o ia taumafataga]. Ia tautino atu o e ua saunia i latou mo le afio mai o le Alii o le a valaaulia i le tausamaaga o le faaipoipoga a le Tamai Mamoe. Faitau le leoa e le vasega le Alema 5:27–28 ma mataituina pe faapefea ona faagavaaina i tatou mo ofu papa'e o le a ofuina e le Au Paia i le tausamaaga o le faaipoipoga a le Tamai Mamoe.

Faaaliga 20–22

Faatomuaga

A mae'a ona faatama'ia e amioleaga ma saisaitia Satani, ona malolo ai lea o le lalolagi i tausaga e afe o le nofotupu o le Alii. Peitai a mae'a le Meleniuma ma a o le'i oo mai le i'uga, o le a “tatala Satani mai le falepuipui: (Faaaliga 20:7) ma o le a toe faatagaina e toe “taufaasese i atunuu” (f. 8). Na vaai Ioane i le faatama'ia o le autau mulimuli a le tiapolo ma le faamasinoga mulimuli mo le fanau uma a le Atua (tagai Faaaliga 20:9–13). Na ia faalogo ia Keriso o loo tuuina atu le savali e faamanatu atu ai savali na tuuina atu i ekalesia e fitu i Asia: “O le e manumalo e maua e ia mea uma” (Faaaliga 21:7). I le faai'uga, na ia vaai ai ia le Au Paia o e na manumalo o loo nonofo i le fogaeleele i le tulaga faaselesitila (tagai Faaaliga 22).

Ia suesue ma le agaga tatalo le Faaaliga 20–22 ma manatunatu i mataupu faavae nei a e le'i saunia au lesona.

O Nisi Mataupu Faavae Tava o le Talalelei e Saili Iai.

- I le taimi o le Meleniuma, o le a saisaitia ia Satani ma o le a le toe mafai ona ia mauaina le mana e taufaasese pe taufaasese i tagata (tagai Faaaliga 20:1–3; tagai foi 1 Nifae 22:24–26).
- I le Faamasinoga, o le a faamasinoina e ua maliliu e faatatau i a latou galuega (tagai Faaaliga 20:12–13; tagai foi Alema 11:43–44).
- E na o i latou e tausia ia poloaiga ma o mai ia Keriso o le a mafai ona nonofo i le mamalu selesitila (tagai Faaaliga 21:23–27; 22:12–17).

Fautuaga mo le Aoa Atua

Filifili mai i aitia nei pe faaogaina ni au lava, a o e saunia lesona mo le Faaaliga 20–22



Faaaliga 20–22. O mea o le a tutupu i le Meleniuma ma mea o le a tutupu pe a mae'a le Meleniuma o vaega uma ia o le fuafuaga o le faaolataga a le Tama Faalelagi.
(25– 30minute)

O Ioane o se tasi o se vaega toaititi o perofeta na vaai i le faai'uga o le lalolagi ma o ana tusitusiga na faatagaina e le Alii e faasalalauina i le lalolagi (tagai 1 Nifae 14:24–27). I le aoaoina o nei mea na tutupu, manatunatu e tuuina atu i tagata o le vasega ni kopi o le siata o loo i le itulau e 271 ma talanoaina faatasi ma le vasega. A le o lena, ia faia se siata e faaoga ai na o mau ma galulue ai ia tagata taitoatasi o le vasega pe fai faatasi fo'i e le vasega. Faasa'o faatasi e le vasega, ia faaoga

ai le siata i le itulau 271 e fai ma taiala. O le a e iloaina o mea na tutupu i le Faaaliga 20–22 e ese fo’i o latou uiga. A manaomia, e mafai ona faia se talanoaga faasamasamanoa e iloiloaina ma talanoaina ai le Meleniuma ma le i’uga o le lalolagi, e aunoa ma le faaogaina o pepa pei ona tufatufa atu po o nisi lava mea.

Faitau e se tagata o le vasega ia le saunoaga lenei mai ia Peresitene Ezra Taft Benson:

“Ou te tautino atu e lē o toe tele ni tausaga ona faamamaina lea o le laueleele...O le a toe afio mai Iesu Keriso, i lona malosi ma le mamalu tele e faatoilalo Ona fili [faatama’ia i latou e ita ia te Ia] ma pule ma nofotupu i le lalolagi” (*Liahona*, Ianuari 1989, 92).

Fai i le vasega e faitau le Faaaliga 22:20. Fesili: Mafaufau i le saunoaga a Peresitene Benson. Aisea e te manatu ai i le tatalo a Ioane i le faai’uga o lana tusi o Faaaliga ua faai i le faapea “O lea lava le Alii e Iesu, ia e afio mai”?

Faaaliga 20:1–3. O le a saisaia ia Satani i le taimi o le Meleniuma ma o le a le toe i ai sona mana e faaososo pe taufaasese ai i tagata.
(10–15 minute)

Aumai se maea i le vasega. Fesili mo se isi e ofo mai ona saisaia lea. Fesili:

- E faapefea i le saisaia ona aafia ai le sa’olotoga o lenei tagata?
- O a ni tulaga e talafeagai ai ona saisaia se isi?

Faitau e le vasega le Faaaliga 20:1–3 ma mataituina ni aiaiga faapea e pei ona faamatalaina e Ioane. Fesili:

- O ai o loo “saisaia” i nei fuaiupu?
- O le a le umi o le a saisaia ai Satani?
- O le a le mea o le a le toe mafai ona ia faia?
- O lona uiga ea o le a saisaia Satani i maea e pei o maea o loo i le lalolagi? Afai e leai, e faapefea ona saisaia o ia?


Valaaulia le vasega e faitau le 1 Nifae 22:26 ma mata’ituina se auala se tasi o le a saisaia ai ia Satani. Mo se fesoasoani tagai i le mataupu faavae lenei, ma talanoaina ia manatu nei:

- O e e amioleaga o le a faatama’ia pe a afio mai ia Iesu Keriso i lona mamalu; na o e e amiotonu o le a sao (tagai Malaki 4:1; MFF 35:21; 38:8).
- Tatou te maua le amiotonu i le salamo ma le mana faola o Iesu Keriso (tagai 1 Nifae 22:28; Alema 24:10).

Faitau e se tagata o le vasega le faamatalaga lenei a Elder Spencer W. Kimball, a o avea ma se tasi o le Korama a le Toasefululua:

“Pe a saisaitia Satani i se aiga... ..pe a saisaitia Satani i se ola e tasi—ua amatalia le Meleniuma i lena aiga po o lena fo’i ola” (*The Teachings of Spencer W. Kimball*,) 172).

Fesili: E faapefea ona tatou saisaia Satani i o tatou olaga?


 **Faaaliga 20:12–13 (Mau Tauloto). O le a faamasinoina tagata uma e tusa ai ma a latou galuega.** (10–15 minute)

Faali atu se samala laau le ituaiga e faaogaina e le faamasino pe tusi se ata i luga o le laupapa. Faitau e se tagata o le vasega le Faaaliga 20:12–13 ma mataituina po o le a le faia a nei fuaiupu ma le ata. Fesili:

- O le a le ituaiga aso o le a oo i ai lena aso mo e sa ola i se olaga leaga?
- Ae faapefea e na ola i se olaga amiotonu?

Vaevae le vasega i ni vaega se tolu ma tuuina atu i ai ia tofu faitauina mau nei: Ioane 5:22, 25– 29; Alema 5:15–16; 11:43–44; Mataupu Faavae ma Feagaiga 128:6–7. Ia fetufaai ia mea ua latou mauaina e uiga i le faamasinoga ma talanoaina i le vasega.

Valaaulia tagata o le vasega e manatunatu i mea e tatau ona latou faia ina ia avea le Aso Faamasino o se aso fiefia mo i latou.

 **Faaaliga 22:12–17. E na o latou e tausia poloaiga ma o mai ia Iesu Keriso o le a mafai ona nonofo i le mamalu selesitila.**
(10–15 minute)

Ta’u atu i tagata o le vasega na tapunia e Ioane lana tusi o Faaaliga ma se savali e mafai ai ona saunia i tatou mo le afio mai o Keriso ma mauaina ai le fiefia i faamanuiaga o lo ua faamoemoeina e le Atua mo Lana fanau faamaoni.

Tusi le faamatalaga lenei i luga o le laupapa, a e tuu se avanoa i le mea o loo i ai le upu *usitai*:

“O le usitai o le tulafono muamua o le lagi” (Joseph F. Smith, *Journal of Discourses*. 16:247– 48).

Valaaulia le vasega e fautua mai i se upu e faatumu ai le avanoa e faasa’o ai le fuaiupu. Ia latou tuuina mai ni faamaoniga mai i tusitusiga paia e lagolago ai le faamatalaga. Faitau le Faaaliga 22:12–14 ma mataituina pe mafai ona latou mauaina le tulafono muamua o le lagi mai i nei fuaiupu. Tusi le upu *Usitai* i le avanoa ma fesili: Aisea ua avea ai ia le usitai ma tulafono muamua o le lagi? (tagai MFF 130:20–21).

I le Meleniuma	Faai'uga o le Meleniuma	Pe a mae'a le Meleniuma
<p>O le a saisaia Satani mo le afe tausaga ma e le toe mafai ona taufaasese i nuu (tagai Faaaliga 20:1–3; 1 Nifae 22:26–28).</p>	<p>Ua tatala mai Satani mai le falepuipui ma ua toe taufaasese i nuu. Ua ia faapotopotoina tagata mo le taua e faasaga i le Atua. (Tagai Faaaliga 20:7–8; MFF 88:110–11.)</p>	<p>Ua mauaina e le fogaeleele lona mamalu selesitila. Ua faatuina le nuu paia o le Atua i luga o le fogaeleele. (tagai Faaaliga 21:1–3; 22:1–2.)</p>
<p>O e e amiotonu o le a tutu i le Toetutu Muamua (tagai Faaaliga 204–6; Mosaea 15:21–23; MFF 88:96–98).</p>	<p>Ua siosiomia e le autau a Satani le tolauapiga a le Au Paia. Ua auina mai e le Atua le afi e faatama'ia ai le autau a Satani. Ua lafoina Satani ma isi i le lepa afi ma le teio. (Tagai Faaaliga 20:9–10; MFF 88:112–14).</p>	<p>O le Au Paia amiotonu o le a mau ma le Atua i le fiafiaga faaselesitila (tagai Isaia 60:19–21; Faaaliga 21:4–7; 22:3–5).</p>
<p>“I lena afe tausaga o le filemu o le a faataunuaina le galuega tele a le Alii i totonu o malumalu sa, ma o le a ulufale atu tagata i ia malumalu sa e galulue ai mo e ua maliliu ma o loo faatalitali mo le faataunuaina o nei sauniga...e faia mo i latou e o loo soifua pea i le lalolagi” (Joseph Fielding Smith, <i>Doctrines of Salvation</i>, 3:58; tagai fo'i i le Isaia 2:2–5; MFF 128:15).</p>	<p>O i latou e le o i le Toetutu Muamua o le a toetutu ma faamasinoina. O e e amioleaga o le a toe tuli esea e pologa i le oti faalua. (tagai Faaaliga 20:11–15; Helamana 14:17–19; MFF 63:17).</p>	<p>O i latou ua faaeaina o le a avea o ni atua (tagai MFF 132:20). “O tagata uma e nonofo i le mamalu selesitila o se Atua i ana pulega: (Iosefa Samita, <i>Teachings of the Prophet Joseph Smith</i>, 374).</p>

Faitau e se tagata o le vasega ia le tala lenei mai ia Elder Russell M. Nelson:

“I le ulua’i taimi o le ma faatoa faaipoipo ma Sister Nelson a o ma’ua nonofo ai i Minneapolis, sa ma fuafua ai matou te fiafia faatasi ma la ma’ua tama teine e lua tausaga le matua i se aoauli ma te le faigaluega ai. Na matou o atu i se tasi o vaituloto matagofie o Minnesota ma nono mai se tamai vaa. Ina ua mavae ona matou taualoina le vaa ma ua mamao ese mai le pa’u matu, sa matou faaopeopea loa ma malolo ma fiafia i le matagofie o le vaaiga. E lei pine ae sii le vae e tasi o le ma tama teine ma faatautau i fafo o le vaa ma amata ona tau oso i lalo ma valaau mai, ‘O le taimi o le oso i lalo, Tama!’

“Na vave ona ma taofia o ia ma faamalamalama atu i ai, ‘E leai la’u pele, e le’i oo i le taimi e te oso ai i fafo ma le vaa; e tataua ona tatou nonofo pea i totonu o le vaa seia tatou oo atu i le pa’u matu ma le saogalemu.’ Ona o le tele o le ma faatauana atu na mafai ai ona faamanuiaina e faatalitoniina o ia e faapea, o le alu ese vave mai le vaa e taitaiina atu ai i puapuaga. . . .

“E faapea foi ia i tatou i le aveai ai ma fanau a le Tama Faalelagi, e mafai ona tatou manatu faavalea ina ia tatou ‘o ese mai le vaa’ ae tatou te le’i taunuu atu i le taunuuga e finagalo tatou te o i ai. . . .

“O faamanuiaga e tuuina mai e le Atua e masani lava ona faaautu i le usiusitai i le tulafono [tagai MFF 130:20–21]. Afai tou te faatusatusa lena mau i la’u faamatalaga e uiga i le vaa, tatou te feosofi muamua lava ‘i luga o le vaa’ faatasi ma Ia. Ona tatou mafuta ai lea faatasi ma Ia. Ma afai tatou te le ‘o ese mai le vaa’ a’o le’i oo i le taimi e tataua ai, o le a tatou oo atu i Lona malo, lea o le a faaeaina ai i tatou i le ola e faavavau” (*Liahona*, Iulai 1997, 87).

Tuuina atu nisi o fesili nei:

- O le a le taunuuga o loo finagalo le Tama Faalelagi tatou te taunuu i ai?
- O le a le “vaa” ua saunia e le Atua e aveina i tatou iina?
- O a auale e faaosoosoina ai tagata e o ese mai le vaa?
- E faapefea i le usiusitai ona fesoasoani ia i tatou e taunuu ai i le faamoemoe ma le saogalemu?

Faitau le Faaaliga 22:17 ma mataituina ia le valaaulia a le Faaola mo i tatou taitoatasi. Uuna’ia ia tagata o le vasega e o mai ia Keriso. Faai’u i le valaaulia o tagata o le vasega e fetufaai ia mea ua latou mauaina i lenei tausaga i le seminare e fesoasoani ia i latou ia usiusitai ma “tumau i totonu o le vaa.”

Tusi a Mamona	Feagaiga Tuai	Feagaiga Fou	Mataupu Faavae ma Feagaiga
1 Nifae 3:7	Mose 1:39	Mataio 5:14–16	Talafaasolopito—Iosefa Samita 2:15–20
1 Nifae 19:23	Mose 7:18	Mataio 6:24	MFF 1:37–38
2 Nifae 2:25	Aperaamo 3:22–23	Mataio 16:15–19	MFF 8:2–3
2 Nifae 2:27	Kenese 1:26–27	Mataio 25:40	MFF 10:5
2 Nifae 9:28–29	Kenese 39:9	Luka 24:36–39	MFF 14:7
2 Nifae 28:7–9	Esoto 20:3–17	Ioane 3:5	MFF 18:10, 15–16
2 Nifae 32:3	Esoto 33:11	Ioane 7:17	MFF 19:16–19
2 Nifae 32:8–9	Levitiko 19:18	Ioane 10:16	MFF 25:12
Iakopo 2:18–19	Teuteronome 7:3–4	Ioane 14:15	MFF 58:26–27
Mosaea 2:17	Iosua 1:8	Ioane 17:3	MFF 58:42–43
Mosaea 3:19	Iosua 24:15	Galuega 7:55–56	MFF 59:9–10
Mosaea 4:30	1 Samuēlu 16:7	Roma 1:16	MFF 64:9–11
Alema 32:21	Iopu 19:25–26	1 Korinito 10:13	MFF 64:23
Alema 34:32–34	Salamo 24:3–4	1 Korinito 15:20–22	MFF 76:22–24
Alema 37:6–7	Faataoto 3:5–6	1 Korinito 15:29	MFF 82:3
Alema 37:35	Isaia 1:18	1 Korinito 15:40–42	MFF 82:10
Alema 41:10	Isaia 29:13–24	Efeso 4:11–14	MFF 84:33–39
Helamana 5:12	Isaia 53:3–5	2 Tesalonia 2:1–3	MFF 88:123–24
3 Nifae 11:29	Isaia 55:8–9	2 Timoteo 3:1–5	MFF 89:18–21
3 Nifae 27:27	Ieremia 16:16	2 Timoteo 3:16–17	MFF 121:34–36
Eteru 12:6	Esekielu 37:15–17	Eperu 5:4	MFF 130:18–19
Eteru 12:27	Tanielu 2:44–45	Iakopo 1:5–6	MFF 130:20–21
Moronae 7:16–17	Amosa 3:7	Iakopo 2:17–18	MFF 130:22–23
Moronae 7:45	Malaki 3:8–10	Faaaliga 14:6–7	MFF 131:1–4
Moronae 10:4–5	Malaki 4:5–6	Faaaliga 20:12–13	MFF 137:7–10

O LE FUAFUAGA SILI O LE FIAFIA

Faatomuaga

I le 1993, na saunoa ai Elder Boyd K. Packer, o se tasi o le Korama a Aposetolo e Toasefululua, i faiaoga o le Ofisa o Aoga e faapea, faatasi ai ma se vaaiga aoteleina o le mataupu e aoaoina, e ao ona latou tuuina atu se vaaiga o le ata o le faaolataga i le amataga o tausaga aoga taitasi:

“O le a matua tele se aoga i au tamaiti aoga o se vaaiga aoteleina o le ‘fuafulaga o le fiafia’ (lea e avea ma a’u filifiliga, ma autu ou te fiafia lava i ai, i le talanoaina o le ata poo le fuafulaga), pe afai e tuuina mai i le amataga ma toe asia pea i lea taimi ma lea taimi.

“E i ai se tofiga faatonuina mo oe. . . .Ua tofiaina oe e saunia se vaaiga aoteleina poo se aotelega o le fuafulaga o le fiafia—le ata o le faaolataga. Ia fuafulaina e avea ma se ata faataatia e mafai ona faatulagaina ai e au tamaiti aoga ia mea moni o le a e fetufaaai atu ia i latou.

“I le taimi muamua atonu e te manatu ai o lena mea o se tofiga faigofie. Ou te ta’utino atu ia te outou e le o se mea faigofie. O le faapuupuuna ma le faafaigofieina e matua faigata lava ona ausiaina. I le taimi muamua o le a faaososoina oe ia tele ni mea ia aofia ai. O le ata poo le fuafulaga i lona atoatoaga e tuufaatasia uma ai mea moni taitasi. . . .

“Masalo o se mea pito sili ona faigata lena mea, ae mautinoa lava o se tofiga pito sili ona tauia i lau galuega faafiaaoga.

“O lau aotelega o le fuafulaga o le fiafia e tatau ona avea ma se aotelega puupu ma faigofie o ni mea moni mai tusitusiga paia. Ona mafai ai lea e au tamaiti aoga i se taimi mulimuli ona latou tuuina i latou lava e tusa ai ma le fuafulaga.

“O le a ou tuuina atu na o se faaataataga o le fuafulaga e avea ma se amataga, ae e tatau ona saunia e oe lava ia le vaega o loo totoe o le ata faavae.

“O mea nei o loo i lalo o vaega taua ia o le *fuafulaga sili o le fiafia*, o le *fuafulaga o le togiolaina*, *poo le ata o le faaolataga*:

“O le muai olaga
Fofoaga faaleagaga
Filifili saoloto
Taua i le lagi

Fofoaga faaletino

O le Pau ma le olaga faitino

O mataupu faavae ma sauniga o le talalelei a Iesu Keriso (o uluai mataupu faavae: faatuatua i le Alii o Iesu Keriso, salamo, papatisoga. . .)

O le Togisala

Olaga pe a mavae le oti

Lalolagi o agaga

Faamasinoga

Toetutu”

(*The Great Plan of Happiness* [address to religious educators at a symposium on the Doctrine and Covenants/Church history,

Brigham Young University, 10 Auk. 1993], 2–3; poo le *Charge to Religious Educators*, 3rd ed. [1994], 113–14).

O le faamatalaga lena ua tuuina atu ina ia fesoasoani atili ai ia te oe ia malamalama i le ata poo le fuafulaga sili o le fiafia ma atiae lau vaaiga aoteleina. Atonu o le a faaososoina oe ia matele lau aoa atu e uiga i le ata o le faaolataga ae faaleamanaiaina le vaaiga aoteleina na fautuaina mai e Elder Packer.

Faamolemole, ia aloese mai ai, ma ia manatua o le tele o le auiliiliga o le fuafulaga poo le ata o le a talanoaina i mataupu o le a e suesueina o le Feagaiga Fou. Ao e aoaoina nei mea i le vaitaimi o le tausaga aoga, ia fai ma toe faatautu atu i tua i lau vaaiga aoteleina i le ata o le faaolataga.

O le Ata o le Faaolataga e Pei o se Tala Faatino e Tolu ni Vaega

I se saunoaga faafaesaiti i le 1995 i le autalavou matutua, na saunoa ai Peresitene Boyd K. Packer, o le o loo fai nei ma Peresitene o le Korama a le Toasefululua:

“O le alafua o lo tatou olaga faitino, mai le fanau mai e oo atu i le oti, o loo faatulagaina i tulafono e faavavau ma o loo mulimuli i se fuafulaga o loo faamatalaina mai i faaaliga o se fuafulaga sili o le fiafia. O le manatu lava lena e tasi, o le mea moni foi e tasi o le a ou faamamafaina atu i o outou mafaufau o le mea lena: E tolu ni vaega o le fuafulaga. O loo e i ai i le vaega lona lua poo le ogatotonu, o le vaega lea o le a tofotofoina ai oe i faaososoga, e ala i faigata, pe atonu foi e ala i faanoanoaga. Ia malamalama i lena mea ma o le a mafai teisi ai ona e malamalama i le olaga ma tetee atu ai i le faamai o le mautonu ma le lototiga faapea lagona le fiafia.

“O le fuafulaga poo le ata o le togiolaina, faatasi ai ma ona vaega e tolu, e mafai ona faatusaina i se tala matagofie e faatinoina e tolu ni vaega. O le vaega 1 ua faaulutalaina ‘O le Muai Olaga.’ O loo faamatalaina e tusitusiga paia o loo tatou tofi muamua lea (tagai Iuta 1:6; Aperaamo 3:26, 28). I le vaega 2, mai le fanau mai e oo i le taimi o le toetutu, o le ‘Tofi Lona Lua.’ Ma le vaega 3 ua ta’ua o le ‘Olaga pe a Mavae le Oti’ poo le ‘Olaga e Faavavau.’

“I le olaga faitino, ua pei i tatou o ni tagata e faatinoina se tala o e ua ulu atu i se fale e maimoaina ai ae amataina loa le vaega lona lua. Ua tatou misiina le vaega 1. O le tala e tele ni ona vaega autu ma ni vaega lagolago e fefiloi faatasi, ma ua faigata ai ona iloa pe o ai e fesootei ma ai ma o le a foi le sootaga o lea mea i lea mea, pe o ai tagata totoa ma pe o ai foi tagata leaga. Ua atili ai ona faigata ona e le gata ina o i tatou o ni tagata maimoa; ae o i tatou foi o ni tagata o loo i ai i le tala, o loo faatinoina, i ona vaega uma lava! (*The Play and the Plan* [address to young adults, 7 May 1995], 1–2).

O le Muai Olaga

Ae tatou te le i fananau mai i le olaga faitino sa tatou mau faatasi ma lo tatou Tama Faalelagi

(tagai Iopu 38:4–7; Ieremia 1:5; Aperaamo 3:21–23). O le Tama Faalelagi o se tasi ua i le tulaga selesitila, ua faamamaluina, ma ua atoatoa, ua i ai se tino o aano ma ivi (tagai MFF 130:22). Na aoao mai le Perofeta o Iosefa Samita: “O le Atua lava Ia sa i ai e pei ona tatou i ai nei, ma o se alii ua faaeaina, ma o loo nofotupu i lagi na!” (*Teachings of the Prophet Joseph Smith*, 345).

O le Tama Faalelagi o le tama o o tatou tino faaleagaga (tagai Numera 16:22; Galuega 17:29; Eperu 12:9; Mose 3:5). O loo ia te Ia se atoatoaga o uiga atua uma ma le olioli, ma e finagalo o Ia ina ia avea Ana fanau faapei o Ia (tagai Mataio 5:48; 2 Nifae 9:18; Mose 1:39).

Fofoaga Faaleagaga

Na vaai Aperaamo i fanau uma a le Tama Faalelagi o “atamai” poo agaga na faatulagaina ao le i faia le lalolagi (tagai Aperaamo 3:18–23). Na aoao mai Peresitene Packer: “E faavavau agaga o alii ma tamaitai (tagai MFF 93:29–31; tagai foi Joseph Smith, *Teachings of the Prophet Joseph Smith . . .*, 158, 208). O i latou uma o atalii ma afafine o le Atua ma na nonofo i se muai olaga o ni Ana fanau agaga (tagai Numera 16:22; Eperu 12:9; MFF 76:24). O agaga o tagata taitasi e foliga i le tagata i le olaga faitino, o alii ma tamaitai (tagai MFF 77:2; 132:63; Mose 6:9–10; Aperaamo 4:27). E foliga i latou uma i foliga o ni matua faalelagi” (*The Play and the Plan*, 3).

I le “O le Aiga: O se Folafolaga i le Lalolagi,” na faapea mai le Au Peresitene Sili: “O tagata soifua uma—tane ma le fafine—ua foafoaina i le faatusa o le Atua. Oi latou taitoatasi o se atalii poo se afafine faaleagaga faapelepele a ni matua faalelagi ma, o lea ua tofua ai i latou taitoatasi ma se natura ma se taunuuga paia. O le tulaga tane poo le fafine (o le tagata) o se vaega taua lea o le mua’i olaga, olaga faitino, ma lona faamoemoe e faavavau. (*Ensign*, Nov. 1995, 102; tagai foi MFF 29:31–32; Mose 3:5).

Filifiliga saoloto

1. O tagata ola uma e faatulafonoina i tulafono faalelagi, o le usiusitai i ia tulafono e aumaia ai faamanuiaga. O le le usiusitai e oo mai ai puapuaga ma le malaia.
2. E i ai i tagata taitoatasi le meaalofa faalelagi o le filifiliga saoloto e filifili ai le lelei poo le leaga. E mafai e se tagata ona tapuai pe o le a le ala, o fea, pe o le a foi le mea e tapuai ai o ia, ae peitai, o le aoao ma le usiusitai i tulafono faaselesitila na o le pau lea o le ala e mafai ai ona faaeaina o ia.
3. E mafai e tagata taitoatasi ona filifili mo ia lava pe afai e mauaina e ia le malamalama o le lelei ma le leaga ma o loo aafia ai o ia e ala i le filifiliina o le lelei poo le

leaga” (“Basic Doctrine,” *Charge to Religious Educators*, 3rd ed. [1994], 85).

O le faaaogaina tonu o la tatou filifiliga saoloto e taua lea i le avea ai faapei o le Atua (tagai 2 Nifae 2:14–16). Ae peitai, o loo i ai ni taunuuga i le tuuina mai ia i tatou o lea avanoa e filifili ai. E pei lava ona taua le filifiliga saoloto i lo tatou ola tuputupu ae, e mautinoa foi o le a tatou lē filifili pea ma le sa’o. E pei ona tusia e le Aposetolo o Paulo, “Aua ua agasala tagata uma lava, ma ua le oo i le viiga mai le Atua” (Roma 3:23). O lenei taunuuga na faataatiaina ma sauniaina i le fuafuaga poo le ata na tuuina atu e le Tama i Lana Fanau i se fononua na faia i le muai olaga.

O le Fono Sili ma le Taua i le Lagi

Ina ua mae’a ona saunia mo i tatou e le Tama Faalelagi ni tino faaleagaga i lenei muai olaga, sa avea i tatou faapei o Ia, ae peitai sa i ai pea ni uiga taua se tele sa tatou le i mauaina. O Ia o se tasi ua faaeaina ma atoatoa faatasi ma se tino faaletino ua faamamaluina; sa le i mauaina e i tatou lenei mea. Na faapopotoina faatasi e le Tama Lana fanau i se fononua sili i le lagi ma tuuina mai ai Lana fuafuaga poo le ata e fesoasoani ai ia i tatou ia avea faapei o Ia (tagai Mose 4:1–4; Aperaamo 3:22–27).

Na saunua mai Peresitene Packer:

“I le fononua a Atua, na lagolagoina ai le fuafuaga a le Tama Faalelagi (tagai Alema 34:9; tagai foi *Teachings [of the Prophet Joseph Smith]*, 349–50). Na saunia le ata poo le fuafuaga mo le foafoaina o se lalolagi ina ia maua ai e lana fanau ia tino faaletino ma o le a tofotofoina ai e tusa ma ana poloaiga (tagai Mose 6:3–10, 22, 59; Aperaamo 3:24–25; 4:26–27). Na tuuina atu i agaga taitasi i le muai olaga ia avanoa ina ia aoao ma usiusitai ai. Na tuuina atu i agaga taitasi ia le filifiliga saoloto. (tagai Alema 13:3–5).

“Na faatulagaina se fononua tele i le lagi (tagai *Teachings*, 349–50, 357). Na manaomia ai e lea fuafuaga paia se tasi e auina mai o se faaola ma le togioala ina ia faataunuu ai le fuafuaga a le Tama. Na ofo mai ma le lototoa le Ulumatua a le Tama e faavavau, o leova, ma na filifilia o Ia. (tagai Mose 4:1–2; Aperaamo 3:19, 22–27).

“E toatele na lagolagoina lenei filifiliga. Na fouvale nisi, ma na faia ai se taua i le lagi. O Satani ma i latou na mulimuli ia te ia i le fouvale i le fuafuaga a le Tama na tulia ese ma le tuuina i ai ni tino faitino (tagai Faaaliga 12:7–13; MFF 29:36; 76:28; Mose 4:3).

“O i latou na tausia lo latou tofi muamua (o loo i ai faatasi ma i latou) o le a tuuina atu i ai ma se tino faaletino ma faatagaina e nonofo ai i le lalolagi i lea lava tofi lona lua na fuafuaina

(tagai Aperaamo 3:26). Na taitasi ma tofiaina i tausaga ma mea latou te nonofo a (tagai Teuteronomi 32:8; Galuega 17:26). Na faauuina nisi e fai ma perofeta (tagai Alema 13:7–9; Aperaamo 3:23; tagai foi *Teachings*, 365)” (*The Play and the Plan*, 3).

Fofoaga Faaletino

O le fofoaga faaletino o le lagi, le lalolagi, ma mea uma lava o i ai o se isi lea laasaga taua i le fesoasoani ai ia i tatou ia avea faapei o lo tatou Tama oi le Lagi (tagai Mose 1:33–39; Aperaamo 3:24–26). Ina ua fofoaina e le Atua le lalolagi “na. . .vaai atu i mea uma. . .ua lelei” (Mose 2:31) ma o se nofoaga o le matagofie ma le faatamaoigaina (tagai Kenese 1–2; Mose 2; 3:7–25; Aperaamo 4–5; tagai foi MFF 59:16–20).

Na aoao mai Peresitene Packer: “Ona faatulagaina lea o se lalolagi (tagai Aperaamo 5:4). O Atamu ma Eva, i se tulaga faaparataiso, o i laua o le uluai tane ma le fafine (tagai Mose 1:34; 3:7; 4:26; 6:3–10, 22, 59). Na faaiipoipoina i laua e faavavau ma tuuina i ai poloaiga (tagai Mose 3:23–25). Na i ai i laua i se tulaga mama ma na la le iloaia le agasala (tagai 2 Nifae 2:23)” (*The Play and the Plan*, 3).

O le Pau ma le Olaga Faitino

O le Pau o Atamu ma Eva o le laasaga lea na sosoo ai sa i ai i le fuafuaga o le fiafia. Na aumaia e le Pau tulaga o le olaga faitino, e aofia ai le oti faaleagaga ma le oti faaletino (tagai 2 Nifae 2:19–25; Alema 42:1–10). O le olaga faitino i le lalolagi e taua lea i le avea ai ma Atua. E maua ai e i tatou le avanoa ina ia mauaina ai se tino faaletino ma mafai ai ona faaauuina ai pea ona tuputupu ma aoao e ala i le i ai o le filifiliga saoloto e filifili ia mulimuli ai i apoapoiga a le Atua poo faatosinaga a Satani (tagai Alema 42:1–12; MFF 29:36–43; Mose 5:9–12). O filifiliga ia tatou te fiafia o loo “faataitai” ai i tatou lava (tagai Aperaamo 3:25).

I le faataitai atu i lana faataitaiaga o le fuafua i se tala faitino e tolu ni vaega (tagai i. 273), na tuuina mai ai e Peresitene Packer le apoapoiga lena e uiga i lo tatou tulaga faitino:

“I le avea ai ma vaega o le fuafuaga e faavavau, o le manatuaina o lo tatou muai olaga, i le vaega 1, ua ufitiaina i se veli. Ona ua tatou ulu atu i le olaga faitino i le amataga o le vaega 2 e aunoa ma le manatuaina o le vaega 1, o lea ua faigata ai ona malamalama i le mea o loo tupu.

“O lena le manatua ua tuuina mai ai ia i tatou se amataga mama. Ua talafeagai ai mo le suesueina; e puipuiina ai taitoatasi la tatou filifiliga saoloto ma tuusaoloto ai i tatou ina ia faia filifiliga. E tele filifiliga e ao ina faia e ala i le faatuatua lava ia. Ae ui i lea, o loo tatou tauaveina ma i tatou sina malamalamaaga o loo musumusumu mai o loo tatou muai olaga ma loo tatou tulaga o ni fanau a ni matua i la le agaga.

“Na fanauina outou i le mama, ona ‘o agaga uma o tagata sa mama i le amataga’ (MFF 93:38), ma o loo i ai i totonu ia te outou se iloaia o le lelei ma le leaga, ona o loo ta’uina mai e mau ia i tatou i le Tusi a Mamona e faapea ‘ua lava le aoaoina o [i tatou], ua [tatou] iloa ai le lelei ma le leaga’ (2 Nifae 2:5). . . .

Pe afai e te faamoemoe e na o le faigofie ma le filemu ma le olioli atoatoa e te mauaina i le taimi o le vaega 2, o le mea

moni o le a e faanoanoa. O le a itiiti lou malamalamaaga i le mea o loo tupu ma pe aisea foi ua faatagaina ai mea e tutupu e pei ona i ai.

“Ia manatua le mea lena! E le i tusiaina lava i le vaega 2 e faapea ‘Ona nonofo fiafia ai lea o i latou uma’. O lena fasi fuaitau e talafeagai lea ma le vaega lona tolu, ina ua faaalua mea lilo ma tuu sa’oina mea uma. . . .

“Seiloga ua i ai sou malamalamaaga tele i le tulaga e faavavau o lena tala faitino, o le a e le iloaia le uiga o mea faale lelei i le olaga. O nisi e fananau mai ma sina mea itiiti ae o nisi o ni mea e tele. O nisi e fananau mai ma le mativa, ma le le atoatoa o le tino, ma le tina, faapea faigata. O nisi e oo vave i ai le oti, e oo lava i fanau iti e mama. O loo i ai matāsele malolosi ma le le matinea o le olaga ma le agaleaga o tagata i tagata. E le i leva ona tatou vaaia le anoanoa o lena mea.

“Aua le faapea ua faatagaina e le Atua na mea e tutupu mo ana lava faamoemoega. Pe a e iloaia le fuafuaga poo le ata ma lona faamoemoega atoa, e oo lava i nei mea o le a faaalua ai se Tama o i le Lagi alofa.

“O loo i ai i iina ni tusitusiga mo lena tala faitino sili, o le tala faitino o augatupulaga uma. . . .

“O na tusitusiga, ua tataua ona e silafiaina, o tusitusiga paia—o Faaaliga. Faitau i ai. Suesue i ai. . . .

“E tautala mai tusitusiga paia i mea moni. E te aoaoina mai ai mea ua lava e uiga i vaega uma e tolu e tapu’eina ai oe ma tapasaina ai lou olaga. O loo faaalua mai ai foi ‘sa i ai foi outou i le amataga faatasi ma le Tama, o le Agaga la lea, o le Agaga lava o le upu moni;

“O le upu moni o le malamalama foi lea o mea e pei ona i ai nei, e pei ona sa i ai, ma e pei ona o le a oo mai’ (MFF93:23–24).

“Vaega 1, vaega 2, ma le vaega 3” (*The Play and the Plan*, 2).

O le Misiona a le Ekalesia ma Mataupu Faavae ma Sauniga o le Talalelei

O le Pau o Atamu ma Eva e le o se mea sese pe o se mea na te’i lava ua tupu. Pe ana le filifili i laua e faitino, e le maua e i laua poo le fanau uma a le Tama Faalelagi le alualu i luma e avea ai faapei o le Atua (tagai 2 Nifae 2:22–25). O le Pau o se vaega talafeagai lea o le fuafuaga, ae peitai e i ai nisi o taunuuga le lelei e tataua ona faaolaina mai ai i tatou.

O le talalelei a Iesu Keriso ua saunia le ala mo tagata uma ina ia faaolaina ai i le afioaga o le Atua ma avea faapei o Ia pe afai latou te ola ai (tagai 2 Nifae 31:10–21; Mosaea 3:19; Alema 7:14–16; 3 Nifae 27:13–22; Mose 5:9; Mataupu Faavae o le Faatuatua 1:4). Pe afai tatou te tetee e mulimuli i le fuafuaga ma le taliaina le Togisala a Iesu Keriso, e le mafai ona faaolaina i tatou mai a tatou agasala ma faaatoatoaina i tatou (tagai Mosaea 2:36–39; 4:1–12; Alema 11:40–41; MFF 29:43–44).

I tisipenisione taitasi, na auina mai ai perofeta e aoao le talalelei i fanau a le Atua i le lalolagi. Ua faatuina le Ekalesia a Iesu

Keriso i aso nei e gata ai ina ia valaauliaina tagata uma ia o mai ia Keriso e ala i le talaiina o le talalelei i le lalolagi, faaatoatoaina o le Au Paia, atoa ai ma le faaolaina o e ua maliliu (tagai Aмоса 3:7; Efeso 4:11–15; MFF 1:4–23; 138; Mataupu Faavae o le Faatuatua 1:5–6).

O le Togiola

Ona o le Pau o Atamu o le a oti uma ai i tatou (oti faaletino), ua aveeseina i tatou mai le afioaga o le Atua ma e le mafai ona tatou toe foi atu ia te Ia na o i tatou lava (oti faaleagaga), ma o loo tatou ola uma ai i se olaga o le galue, agasala, ma faanoanoaga. Ua saunia e le Togisala a Iesu Keriso le toetutu o tagata uma, faatasi ma tino faitino pe a mavae le olaga nei, ma manumalo ai mai le oti faaletino. E saunia foi e le Togisala le faaolaina o tagata uma mai le Pau ma toe aumaia i le afioaga o le Atua i lo latou tulaga toetutu mo le Faamasinoga, ma manumalo ai i le oti muamua faaleagaga (tagai 2 Nifae 9:15, 21–22; Helaman a14:16–18). E ala i le Togisala, pe afai tatou te salamo e mafai foi ona faamamaina i tatou mai agasala a le tagata lava ia ma suia mai ai i lo tatou tulaga o le pau i le avea ai faapei o le Atua lo tatou Tama (tagai 2 Nifae 2:5–10; 9:4–14, 19–27; Alema 7:11–13; 12:32–34; 34:8–16; 42:11–28; MFF 19:16–19; Mataupu Faavae o le Faatuatua 1:3; “O le Fono Sili ma le Tauga i le Lagi,” i. 275).

E leai se tagata na mafai ona faataunuaina le Toetutu ma le togisalaina mo agasala a tagata uma. E na o le toatasi lava na i ai le mana i le oti ma le mana o se olaga e aunoa ma se agasala na mafai ona faataunuaina lea mea. Na moomia ai se taulaga a se Atua (tagai Ioane 10:17–18; Alema 34:9–14; MFF 45:4).

O le Olaga i Tua Atu o le Oti

O le Lalolagi o Agaga

O le oti faaletino o le tuueseeseina lea o le tino ma le agaga. I le taimi e oti ai e o atu ai agaga o fanau uma a le Tama Faalelagi i se lalolagi o agaga e faatalitali ai le Toetutu. I le lalolagi o agaga o loo i ai se tuueseeseina o i latou o e na taliaina le talalelei ma tausia poloaiga mai ia i latou o e na le i taliaina ma tausia poloaiga. E pei ona sa faamatalaina e Peresitene Packer, “O le fiafia ma o se parataiso mo e amiotonu. O le faanoanoa mo e amioleaga. (tagai 2 Nifae 9:10–16; Alema 40:7–14). I tulaga uma e lua, e faaauau ai pea ona tatou aoao ma faamasinoina i tatou mo mea tatou te faia (tagai MFF 138:10–22)” (*The Play and the Plan*, 3). Mo nisi faamatalaga e uiga i le lalolagi o agaga, tagai i le Mataupu Faavae ma Feagaiga 138—o le faamatalaga a Peresitene Iosefa F. Samita i le faaaliga matagofie na oo ia te ia e uiga i le galuega o loo faia ai iina.

O le Faamasinoga

Ina ua tuuina mai e le Tama Lana fuafuaga ma faatuina mai le foafoaga o se lalolagi, o Lona faamoemoega o le “faataitai” lea o Lana fanau ina ia iloa ai pe latou te tausia Ana poloaiga

(tagai Aperaamo 3:25). Na faaaliga e ala mai i le Perofeta o Iosefa o le a faamasinoina i tatou e le gata i mea tatou te faia ae faapea foi i manaoga o o tatou loto (tagai Alema 41:3–6; MFF 137:9).

O le Faamasinoga ma le Toetutu e valalalata lo la fesootaiga, ma o le vaega o lo tatou faamasinoga mulimuli o le a faia lea pe a tatou toetutu. O tagata uma lava, sei vagana ai atalii o le malaia, o le a toetutu mai i le Toetutu faatasi ma tino atoatoa, ae peitai o le a eseese i latou i mamalu. O tagata uma o le a toetutu ma se tino e talafeagai ai ma le malo o lo latou tofi, pe o le selesitila, teresitila, poo le telesitila. O le a toe tutu atalii o le malaia ae peitai o le a le tuuina atu ia i latou ni tikeri o le mamalu, o le a tulieseina i latou i le pouliuli i fafo (tagai 1 Korinito 15:35, 39–42; MFF 88:28–32).

Na saunua mai Peresitene Packer:

“Pe a mae’ a ona tuuina tutusa atu mea uma, o le a faia se faamasinoga (tagai Mosaea 3:18; tagai foi *Teachings*, 218–19). O le a taitasi ma toetu mai i lona lava faatulagana. Ae peitai, o le mamalu e mauaina e se tasi o le a faalagolago lea i le usiusitai i tulafono ma sauniga o le fuafuaga a lo tatou Tama (tagai 1 Korinito 15:40–42).

“O i latou o e ua faamamaina e ala i le salamo o le a mauaina le ola e faavavau ma toe foi atu i le afioaga o le Atua. O le a faaeaina i latou e avea o ni ‘suli lava o le Atua, o suli faatasi ma Keriso’ (Roma 8:17; tagai foi MFF 76:94–95; 84:35; 132:19–20; see also *Teachings*, 374).

“Ua saunia se fuafuaga mo i latou o e nonofo i le olaga faitino ina ia le iloaina le fuafuaga:

‘A leai se tulafono e leai se faasala, a leai se faasala e leai se ta’usalaina. . . talu le Togisala, aua ua laveaiina i latou i lona mana’ (2 Nifae 9:25).

“A le aunoa ma lena galuega paia o le faaolaina o e ua maliliu, o le a le atoatoa le fuafuaga ma o le a matua faapito lava. O sauniga o le malumalu—o faaeega paia, o le faamauga i le faaipoipoga e faavavau—ua alagata ai sauniuniga uma e manaomia. Aua le faia se mea atonu o le a e le ola agavaa ai i le mauaina o na mea poo le vaega 3 o lea tala faitino e faavavau o le a itiiti ifo nai lo le mea o loo e saoloto nei e faia (*The Play and the Plan*, 3–4).

O le Toetutu

O tagata uma o e na ola i lena lalolagi, pe amiotonu pe leai foi, o le a toetutu mai ma se tino faaletino i le olaga a sau. O se meaalofo lena ona o le Togisala a Iesu Keriso (tagai 1 Korinito 15:19–22; 2 Nifae 9:6–15, 19–22). E le toetutu mai tagata uma i le taimi e tasi, “ae taitoatasi ma lona lava tofi” (1 Korinito 15:23; tagai foi Mosaea 15:20–26; Alema 40:1–2; MFF 76:15–17).

O le Perofeta Mulimuli o Faamaumauga

I le tele o tausaga, e toatele nisi i Isaraelu na faafitiina, lē taualoaina, faasauaina, tetee, ma fouvale i perofeta. O Malaki le perofeta moni mulimuli i Isaraelu i le vaitaimi o le Feagaiga Tuai lea o loo tatou mauaina ai se faamaumauga. Ina ua mavae o ia, sa na o le moomoo ai o Isaraelu i perofeta poo afioga sa faamanuiaina ai i latou i le taimi muamua.

Na finagalo le Atua ia Isaraelu ia avea ma se nuu paia, o Lana oloa taua (tagai Esoto 19:5–6). Na Ia folafolaina ia te ia le oa, mamalu, ma le mana:

“Ou te matua faamanuia ana mea e ai: ou te faamaoona ona tagata matitiva i le areto.

“Ou te faaofuina ana ositaulaga i le olataga: e alalaga foi ma le olioli ona tagata amio Atua” (Salamo 132:15–16).

Ae peitai na finagalo o Ia ia mamā Isaraelu ina ia mafai ona mau o Ia i ona aai. E avea Isaraelu ma Siona, lea na folafolaina e le Alii o le a fai mona afioaga e faavavau (tagai Salamo 132:13–14). Ina ua mavae le misiona a Malaki (pe tusa ma le 430 T.L.M.) na oo ai Isaraelu i se vaitau na faamuamua ina ai aoaoga a le au tusiupu nai lo o Faaaliga. E ui ina o nisi o ositaulaga ma le au sa Levi sa faaauu pea ona faamamaluina le perisitua, ae na faaleagaina i mea eleelea le soifuaga faalelotu, faalevafealoai ma le faaletulafono o Iutaia. O le vaitau lea o le auē ai o tagata ona ua leai ni perofeta ma na latou fia faalogo atu i o latou siufofoga o le taitaiga. Na amata ona o latou faapotopotoina, faasaoina, ma toe tusitusiaina tuleiga a perofeta o e ua maliliu.

Ua Faateleina le Au Tusiupu

Ina ua toe foi ane tagata Iutaia mai le aveeseina atu i Papelonia (pe tusa ma le 537 T.L.M.) na i ai nisi o suiga iloga i lo latou atunuu. O se tasi o nei suiga o le faateleina lea o le au tusiupu. O le au tusiupu i le amataga mai, o ni alii aoaoina o e na maua ni o latou oa mai le tusitusia o faamaumauga ma le faia ina o ni kopi o tusitusiga paia e ala i lo latou tusilimaina poo nisi foi ala na latou faaaogaina. O nei mea na latou suesueina ma le maelega, ina ia malamalama i le uiga atoa ai ma le sailia o ni mea sese a le au tusiupu. Na tuuina atu e le au tusiupu kopi o tusitusiga paia i sunako ua faateleina ma na avea foi i latou ma aoao poo faiaoga o le tulafono. Ao i ai perofeta i Isaraelu, na faatumauina pea le faia o le au tusiupu ma e na faia tusitusiga paia atoa ai ma le avea ma aoao. Ae peitai ina ua aveesea le siufofoga o perofeta mai ia Isaraelu, na amata ona faatumuliaina ai i nei tagata popoto i le tulafono a Mose.

O Esera, o se tasi tusiupu faapena, na toe aumaia se vaega na aveeseina atu mai le faatafeaga ma aoaoina Isaraelu “i le tulafono ma faamasinoga” (Esera 7:10; tagai foi Neemia 8:9–12). Faatasi ma Neemia na laua aoao atu, e le gata i faitaulaga ma sa Levi, ae o tagata uma na i le tulafono a Mose. O lea mea

fou o le faitauina faalaua’itele atu o tusitusiga paia na avea ma se tasi o vaega pito sili ona lauiloa i le olaga faalutaia.

O se pogai autu na mafua ai le faateleina o le pule a le au tusiupu o le suiga lea i le gagana na masani ai tagata mai le Eperu i le Aramaika. E ui ina o ni gagana e usoga, ae na matua eseese lava ma o tagata Iutaia o e na tautatala i le na o le gagana Aramaika na le malamalama i tusitusiga paia. Ma o lea na faalagolago ai tagata i e atamamai ina ia faaliliuina ma faamatalaina ia tusitusiga paia. E le o se mea e tatau ona maofa ai i le le tutusa o faaliliuga a nei tagata atamamai, pe na latou taumafai foi e aumaia isi i o latou manatu eseese.

O le FaaEleniina o Iutaia

I le taufaaiuu o tausaga o le senituri lona fa T.L.M., na amata ai ona i ai se puleaga fou: o tagata Eleni. O le Tupu o Filipino o Maketonia na tuufaatasiaina le peninsula atoa o Eleni ma saunia ai e Iutaia le puleaga a tagata Peresia. I le 334 T.L.M., na osofaia ai e le alii o Filipino o Alesana le pulega a Peresia ma manumalo ai. Mai lena mea na vave ona oo atu o ia i Sasae Tutotonu atoa ma faatoilaloina ai atunuu uma e aofia ai ma Iutaia. I ona tua na mulimuli mai ai tagata Eleni—o tagata fefaataua’i, o tufuga, ma tagata faigaluega—na nofoia nuu na latou faatoilaloina ma na latou naunau e faasalalauina le aganuu faaEleni. E le i umi ni tausaga ae oti Alesana, ae o aafiaga faaEleni, na iloga ona i ai i Iutaia i le anoanoai o senituri.

O Iutaia i lalo o le Pulega a Malo FaaEleni

Ina ua maliu Alesana (323 T.L.M.), na fevataua’i ai ana taitaiau ina ia o latou mauaina lona malo. Na faatoilaloina e Seluka ia Suria ma le itu i matu o Sasae Tutotonu. Na puleaina e Tolamī ia Aikupito. Na vaeluaina Iutaia e itu taua e lua. Na fesuisuia’i ai pulega i le tele o taimi i ni nai tausaga na sosoo ai, ma oo ai ni taunuuga leaga i tagata o Iutaia. I le 302 T.L.M., na i’u ai ina puleaina Iutaia e Tolamī o Aikupito, ma na tumau ai iina mo ni tausaga e tasi le selau. I le 198 T.L.M. na faatoilaloina ai e sa Selukā ia Iutaia ma latou puleaina ai.

I lea taimi sa faaauu pea ona faateleina le faitau aofai o tagata Iutaia. E toatele tagata Iutaia na nonofo i nuu i fafo atu o Iutaia. O le aai a Alesana i Aikupito, mo se faataitaiga, sa toatele ni tagata Iutaia na nonofo ai. Sa toatele foi nisi i Papelonia ma isi aai. Sa sili ona toatele atu tagata Iutaia o le Faataapeapeina (o e na taapeape ma nonofo i atunuu eseese) nai lo o tagata Iutaia na nonofo i Iutaia.

Ina ua pule Anitioka Epifanesa, o se tupu o sa Selukā, i le 175 T.L.M., na tonu ai ia te ia ua umi ona onosaia e tagata Eleni le le magafagafa ma lo latou talitonu i mea faali’ali’a na ia vaai ai tagata Iutaia. Na ia taumafai ai e aveesea le lotu a tagata Iutaia e ala i le tuuina malosi atu o le lotu faaEleni ia i latou. I le 169 T.L.M., na toeseina ai mea totino o i le malumalu i lalo

o lana faatonuga. I se taimi puupuu mulimuli ane na talepeina ai papuipui o Ierusalem, ma faatuina ai se nofoaga o le vaegaau i se olo na fausiaina e lata ane i le Mauga o le Malumalu ua taueleeleaina. O tapuaiga faalemalumalu na faia faatapulaaina na vave ona faasaina. O le tausia o le Sapati, o aso faailogaina, ma le peritomeina sa faasaina ma o le oti lona faasalaga. O meaituaolo, na fai ma mea eleelea i lalo o le tulafono a Mose ma sa faia e tagata Iutaia o se mea inosia tele, sa osiina ai taulaga ao laulaututu fitafita a Anitioka e vaavaaia. Na faia faamalosi tagata ia tapuai i tupua o Siu ma isi atua pepelo.

O le Tava a le au Hasemona ma le au Makapena

Na faateleina ma faatupulaiaina le saua o taumafaiga a Anitioka e aveeseina ai le faalutaia. Sa le i gauai ma ususitai ai tagata Iutaia, ae na atili ai ona tetee i latou, ma faatuputeleina ai lo latou inoino ia Anitioka ma ana fitafita Eleni. I le 167 T.L.M., i le nuu ititi o Motino, na faapotopotoina ai tagata e fitafita Suria ma mananao ai ia Matatia, o se faitaulaga ua matua, e osia se taulaga i se atua faapaupau. E ui ina sa faafefeina o ia i le oti, ae na tetee Matatia. O se tasi faitaulaga na tu atu i luma ma ioe e faia le mea e pei ona mananao i ai fitafita. Ao sii ane e lenei faitaulaga faavaivai le pelu, na ita tele ai Matatia ma ia seiina ai se pelu ma fasioti ai le faitaulaga ma le fitafita Suria. Ona sosola lea o Matatia ma ona atalii e toalima i le mauga ma valaauina tagata Iutaia uma e au ma i latou. Na amataina ai le taua. Na soo ai le nuu atoa, ma na lagolagoina e itu uma ao faasagatau atu tagata Iutaia i le au Suria inosia. E oo ane i le taimi na tūtūāai ai Anitioka i le taua, ua feagai o ia ma se atunuu atoa ua galala i le fia saoloto.

Ona o Matatia o se faitaulaga na saili e puipuia le tulafono a Mose, na matua lagolagoina ai e tagata Iutaia lona aiga, o le au Hasemona. E le i umi ona amataina le taua, ae maliu loa Matatia, ae peitai, na faaauauina e lona atalii o Iuta. O Iuta o se taitaiu poto ma na ia apoapoi pea lava pea i ana fitafita toaitiiti ma le faatauvaa ina ia faatuatua i le Atua faapea le amiotonu o la latou mau. Na ia faatoilaloina pea lava pea vaegaau a le fili o e e faaluaina i le faafaina ona faateleina le toatele atu i lana lava vaegaau.

E oo ane i le 165 T.L.M., ua toe maua Ierusalem e tagata Iutaia, faamamaina le malumalu mai mea eleelea, faapea le toe faapaiaina ina ia tapuai ai ia Ieova. O le taimi muamua lea ua tutoatasi ai Iutaia mai faiga pulepuletutu a isi atunuu i le sili atu ma le fa selau o tausaga. O le taua a le au Hasemona o loo sili atu ona iloina o le taua a le au Makapena ona o le atalii o Matatia na ta'ua o Iuta Makapena, o le uiga o lea mea o "Iuta le Malosi." Ae peitai, o manumalo a Matatia ma ona atalii sa le i faigofie ona maua sa le i umi ona tumau ai pea. Na matua vave lava ona galo i le fanauga a Hasemona o le Alii na laveaiina i latou. E pei o Saulo ma Tavita ma Solomon, o tagata na avea ma taitai o le malo fou na faaseseina e le pule ma le

faaviiviiga o le mamalu. O atalii ma atalii o atalii o le au Makapena na toe foi lava i tulaga faaletulafono na masani ai, ma i le sili atu ma se tasi le selau o tausaga mulimuli ane, i le 63 T.L.M., na faatoilaloina ai Isaraelu e le kovana o Roma o Pomiapo.

O le au Faresaio ma le au Satukaio

I le vaitaimi o le senituri lona lua T.L.M., na i ai ni vaega se lua o tagata Iutaia: o le au Faresaio ma le au Satukaio. Na lagolagoina e le au Faresaio le tausaiaina o tu faaIutaia ma le aoaoina o le Tora (o tusi e lima a Mose). O nisi o i latou na faia ni tautoga ina ia tuueseaina i latou lava mai aafiaga eleelea o tu faaEleni na amata ona oo atu i le olaga faaIutaia, ma ina ia latou matua mulimulita'i i la latou faaliliuga o le tulafono. Sa le gata ina latou faatumauiina le faaaogaina o le Tora e avea ma punaoa o la latou faatuatua, ae na faapea foi ona latou faalateleina lea punaoa, ma taumafai ai e faafetauiina tu ma faiga tuai i faiga fou. O lea faaliliuga na ta'uaina o le tulafono tuugutu, ona o lona vaega tele na taulotoina ma tuugutuina atu. Na talitonu le au Faresaio i le tuufaatasia o le saolotoga ma le muai iloina o taunuuga, le Toetutu, ma se faamasinoga o lona iuga o le tauia poo le faasalaina i le olaga a sau.

Na pulunaunau le au Faresaio i le faasaoina o le tulafono a Mose. I le tetee atu i aafiaga faaEleni, na latou matua'i usitaia ai le tulafono. Ona o a latou taumafaiga e tuueseaina i latou lava mai manatu sese o faiga eleelea faalelalogagi, na ta'uaina ai i latou o *Faresimo (Perushim)*, o se upu faaEperu o lona uiga o "tagata ua tuueseaina." O le upu *Faresaio (Pharisee)* e mauaina mai le toe fetuuna'iina faaEleni o le upu *Faresimo (Perushim)*. I se vaitaimi o le faatupulaiaina o le vevesi i le tuulafoaiina o talitonuga tuai faalutaia, na faateleina ai le ta'uta'ua o le au Faresaio seia oo lava ina avea i latou e fai ma sui e faailoaina manatu faalelotu o le anoanoai o tagata Iutaia.

O le au Faresaio e faavaeina mai i ni tagata lautele, o le au Satukaio o ni tagata na i ai i tulaga tofi maualuluga o le nuu: o faitaulaga, o le au faioaloa, ma le au taualoa. O le igoa o lea vaega o ni tagata (*Setukimo* i le faaEperu) masalo e mafua mai ia Satoka, o le faitaulaga sili i onapo o le Tupu o Tavita. Na tuuina atu e Esekielu i le aiga o Satoka e puleaina le malumalu (tagai Esekielu 40:46; 43:19; 44:10–15), ma o e na tupuga mai i lenei aiga na puleaina le malumalu seia oo i tausaga pe tusa ma le 200 T.L.M.. O le upu Satukaio masalo e faatatau atu ia i latou o e na alolofa i le au sa Satokā.

O le au Satukaio i lona vaega tele na tetee i ni suiga fou e oo mai. E le pei o le au Faresaio, na tetee le au Satukaio i le tulafono tuugutu e avea ma se tulafono e aloaia sei vagana ai le vaega lena o loo ta'ua o le Tora. Na latou faatauaaina taulaga na faia i le malumalu ma na tetee i se talitonuga e uiga i agelu ma le Toetu. O le au Satukaio i lona tulaga lautele o se vaega o ni tagata mauoa o e na taliaina le aganuu faaEleni; ma o lea na le lauiloa ai le au Satukaio e le vaega tele o tagata.

O le au Esene

Na taumafai le au Esene ia aloese mai i mea eleelea faaletapuaiga e ala i le faaeseaina o i latou mai le lalolagi. Masalo o le uiga o lea upu o le “au faamaoni a’ia’i.” Na amata ona lauiloa lenei vaega o tagata i tausaga mulimuli o le 1940 ma ono tupu i le mauaina i Kamurana o ni tusitusiga na talitonu tagata popoto o ni tusitusiga paia ua ta’ua o Tusi Tāai o le Sami Mate. Na talitonu le au Kamurana i le matua faaeseaina mai le lalolagi. Na mulimuli i latou i se “faiaoga o le amiotonu” o e na talitonuo i latou na mauaina faaaliga. Na latou mulimuli i ni faiga tutusa faalenuu, ma latou suesue ma le faamaoni i tusitusiga paia. Na talitonu i latou o le a le pine ona afio mai se Mesia o Lē o le a taitaiina i latou i se taua tele mulimuli e faasaga tau atu i atalii o le pouliuli.

O Iutaia i Lalo o le Puleaga a Tagata Roma

Ina ua tuuina atu Iutaia e Pomiapo mo Roma, na ia tofiaina ai se tasi o le au Hasemona e avea ma tupu. O Anetipa, o se faatonu i se tasi na ta’u tupuina o Iutaia, na vave ona fai Roma ma ana mea fiafia ma na ia puleaina ai. O Anetipa o ia o se tagata o Itumia, o ni tagata na inoino i ai tagata Iutaia. Na faatumauina e ia lana pule e ala i lona fesoasoani ia Roma i le taua ma le au Parafina, o se fili mai sasae na taufaafefe i fuafuaga a Roma. Ona o lea fesoasoani, na tuuina ai ia Anetipa le pule e tofiaina ai lona atalii e fai ma tupu o Iutaia. O lea la na mafua ai ona i ai Herota le Sili, o se alii na o’o’o ona aafiaga i le talafaasolopito o Iutaia. Sa sau ma agaleaga Herota le Sili (o le Herota lea na faatonuina le fasiotia o tamaiti pepe ina ia fasiotia ai Iesu) ae peitai sa avea o ia ma se tagata malos i pulega. Na fiafia i ai tagata Roma, ona sa ia tausaiaina le filemu o se atunuu na lauiloa i le faatumulia i faafitauli, ma sa matua faamaoni o ia ia Roma. Sa itiiti le pule na tuuina atu i tagata Iutaia e ala atu i le au Saneterini, o se vaega o ni tagata faalelotu ma faaletulafono na masani ona faatulagaina o ni alii e toafitusefulu ma le tasi ma na pule faamalumu ai le faitaulaga sili.

O Herota o se tagata na lagolagoina le aganuu faa-Eleni ma le faa-Roma ma na ia faaofiina atu i Iutaia. I le faaofiina atu o le faaEleni, na ia faia ai ni polokalama o le fausiaina o ni fale tetele i lona atunuu atoa. I lona taumafai e ua’i mai loto o tagata o lona nuu, na ia amataina ai se galuega tele i le faatelēina o le tulaga maualuga o le malumalu ma avea mulimuli ai le malumalu ma se tasi o mea pito sili ona matagofie i le lalolagi tuai. O lenei polokalama o le fausiaina o fale na tumau pea ona i ai i onapo o Keriso. Na oti Herota le Sili i se taimi puupuu ina ua mavae le fanau mai o Iesu, ma na vaeveaina ai e tagata Roma le malo i atalii e toatolu o Herota. Na puleaina e Filipo le itu i matu ma sasae o Kalilaia, na puleaina e Herota Anetipa ia Kalilaia ma Perea; ma Arekilao na puleaina Iutaia, Samaria ma Itumia. Ona o le itiiti o lona tomai ma le poto masani, na aveeseina ai Arekilao e Roma i le 6 T.A.. Na puleaina lona atunuu e Roma e ala i taitai sili na tofiaina e Roma.

O le au Herotiano ma le au Selota

Na lagolagoina e se vaega o ni tagata Iutaia ia le nofoaiga a Herota Anetipa ma latou uunaia tagata ina ia lagolagoina lana faigamalo. Mo lena mea na ta’ua ai i latou o le au Herotiano. Na iloina e le au Herotiano le tulai mai o Herota Anetipa i le pule o le faataunuina lea o nisi o manatu faalemesia na i ai i na onapo. Na latou talaiina atu o latou manatu ma tetele atu i soo se tasi na latou iloina na ono faalavelave i tulaga na i ai le malo. O lea vaega faaupufai na auau faatasi ma le vaega o ni tagata faalelotu o le au Faresaio e tetele ia Iesu (tagai Mataio 22:16) ona na latou iloina na fai o Ia ma faalavelave i a latou fuafuaga faaleupufai.

Na teena le au Herotiano e le au Selota. Na latou tetele atu i pulega faanuuese ma aafiaga ma na latou mananao ia tuu saoloto Iutaia. Na manatu nisi o le au Selota e ta’uamiotonuina le faia o taua ina ia sailia ai le faatoilaloina o Roma. O lo latou fouvale i le 6 T.A. na faatoilaloina e Herota Anetipa e fai ma sui o tagata Roma. Ina ua mavae le maliu o Iesu, o le au Selota na taitaiina le faasagatau atu ia Roma ma na iu ai i le faaleagaina o Ieruselema i le 70 T.A..

O le Faaiuga

I vaitaimi o le fetaua’i na faalavelaveina ai sauniga i le malumalu, ae peitai na faaaauina pea ia sauniga i le vaega tele o lena vaitaimi. Na faia e faitaulaga ia taulaga tonu i luga o le fata faitaulaga sili, ma na faaaauina pea ona tatalo tagata i aso taitasi ao faamuina e le faitaulaga ia mea manogi i luga o le fata faitaulaga i le mea paia. I se tasi aso, na i ai se faitaulaga e igoa ia Sakaria sa le i toe foi vave ane e pei ona masani ai mai le mea paia pe a mae’a lana sauniga. Na amata ona taufaiofo tagata, ma ua alagatatau ai, ona ua toe tatala pupuni o le lagi ma ua toe tuuina mai faaaliga. O Sakaria o se tasi e lotomaulalo ma ua toaina foi na i ai o ia faatasi ma se agelu. “. . .ua faafogaina lau tatalo; e fanau lau ava o Elisapeta sou atalii. . . .

“E muamua atu o ia. . . ma le loto o Elia ma lona faamalosi, . . . e sauni le nuu e faatatauina mo le Alii” (Luka 1:13, 17). O lea tamaitiiti o le a avea ma Ioane le Papatiso, o le uiga o lona igoa i le faa-Eperu o le “meaalofa a le Atua.” Ua toe i ai i Isaraelu se perofeta, o se teuteu ala e saunia le ala mo le afio mai o Ieova i le lalolagi o se Alo o le Atua ma le Mesia ua leva ona faatalitali i ai Iutaia.

O SE TAGATA TAUASO INA O FANAU MAI

Fuaiupu o Mau	Faresaio	Tagata Tauaso	Matua
1. "O le tasi tagata e igoa ia Iesu ua na faia le palapala, ua nini a'i o'u mata; ua fai mai foi ia te au. . .ia mulumulu ai. Ona ou alu ai lea, ma ou mulumulu, ona ou vaai ai lea" (Ioane 9:11).			
2. "E le mai le Atua lenei tagata, aua ua le tausī e ia le sapati"(f. 16).			
3. "Pe mafai faapefea e se tagata agasala ona fai o faailoga faapena? (f. 16).			
4. "O le perofeta lava ia" (f. 17).			
5. "Po o la oulua tama lenei, lua te fai mai ai, sa tauaso? Pe na faapefea ona vaai nei?" (f. 19; sa le i talitonu i latou na tauaso o ia ina o fanau mai).			
6. "Ua ma iloa o la ma tama lenei, na tauaso foi ina o fanau mai" (f. 20).			
7. ". . .ua la fefefe ia Iutaia" (f. 22).			
8. ". . .ua matou iloa o le tagata agasala lena [o Iesu]" (f. 24).			
9. "Ua uma ona ou ta'u atu ia te outou, a e tou te lei faalogo mai lava" (f. 27).			
10. "O oe lona [Iesu] soo; a o i matou nei, o soo o Mose i matou" (f. 28).			
11. ". . .ua le iloa e outou pe maifea o ia, a ua faapupula mai e ia o'u mata" (f. 30).			
12. "Ana le mai le Atua lena tagata, na te le mafaia se mea e tasi ona fai" (f. 33).			
13. "Le Alii e, ua ou talitonu lava" (f. 38).			
14. "O i matou foi, ua matou tauaso ea?" (f. 40).			

O Mau Fesoasoani	O Lona Tāua
<p>“. . . lua te iloa le tamai asini ua noatia, e le i tietie ai lava se tasi tagata” (Luka 19:30; tagai f. 30–35; tagai foi Sakaria 9:9; Mataio 21:2–7; Mareko 11:2–7;</p>	<p>“Na tietie mai o Ia i se asini, o se faailoga o le filemu, ma faailoaina mai i le alalaga Osana o le motu o tagata; e le i afio mai i se solofanua teuteuina faamatagofie ma laeiina ni ofutau faapea le iliina leotetete o ni foafoa ma ni pu. . . O le asini o loo faasinotonu e avea ma ‘faatusa tautupu faa- Iutaia o anamua,’ ma o le tagata o loo tietie i le asini o loo faaalai ai se faatupulaiaina o le filemu” (James E. Talmage, <i>Jesus the Christ</i>, 3rd ed. [1916], 516–17).</p>
<p>“[Ua] latou fofola o latou ofu i le ala” (Luka 19:36; tagai foi Mataio 21:8; Mareko 1:8).</p>	<p>“E na o tupu ma ē na manumalo e faia i ai ia faaaloaloga sili e pei o lenei. (2 Tupu 9:13.) I vaega taitasi o lenei ulufalega o le manumalo i Ierusalem, e foliga mai e le gata ina faatagaina e Iesu ae na Ia taliaina faiga faaviivii ma le taualoa na masani ona faia i na’o tupu ma taitai sili” (Bruce R. McConkie, <i>Doctrinal New Testament Commentary</i>, 3 vols. [1966–73], 1:578).</p>
<p>“[O]na ave lea e i latou o lau o pama, ma o mai e faafetaiai ia te ia” (Ioane 12:13; tagai foi Mataio 21:8; Mareko 11:8).</p>	<p>“I le taulotoaiga o viiga ma le alalaga mo le faaolataga ma le laveaiina, o loo tatou vaai ai i le au soo o loo folaina le ala o le Alii i lau pama o se faailoga o le faaeaina ma le manumalo. O lenei vaaiga atoa faagaetia loto o loo muai faaalai ai le i ai ‘o se motu tele o tagata,’ e le mafai ona faitauina e se tasi, ‘o atunuu uma, ituaiga, ma tagata, ma gagana,’ o le a tutu ‘i luma o le nofoalii, ma luma o le Tamai Mamoe, ma laeiina ni ofu talaloa sinasina, faatasi ma lau pama i o latou lima,’ ma alalaga ma le leotele, ‘O le Faaolataga i lo tatou Atua o Lē nofo i le nofoalii, ma le Tamai Mamoe’ (Faaaliga 7:9–10.)” (<i>Doctrinal New Testament Commentary</i>, 1:578).</p>
<p>“Osana i le alo o Tavita; ia manuia lē afio mai i le suafa o le Alii” (Mataio 21:9; tagai foi Mareko 11:9–10; Luka 19:38; Ioane 12:13).</p>	<p>“E leai se isi lava tagata na soifua mai na faia pe na tuuina tonu i ai ni viiviiga, faaaloaloga, ma tapuaiga faapea. I lenei mea o loo tatou vaaia ai le anoanoai o le motu o tagata o molimauina lo tatou Alii i le paia o le avea ai ma Alo. I se gagana faigofie o loo latou taualaga ai o Iesu o le Alo o Tavita, o le Laveai o Isaraelu, o lo latou Faaola ma le Togiola, o le Mesia na folafolaina, o le Alo o le Atua. Ma o loo latou faia ma le poto, ma faaogaina tonu ai le taualaga paia, <i>Osana</i>, ma siitiaina upu o le valoaga faa-Mesia lea e faamatalaina ai le faaolataga ma le manumalo o le Alo o Tavita na folafolaina.</p> <p>“O le uiga moni o le upu <i>Osana</i>, o le <i>Ia faaola mai</i>, poo le <i>Matou te ole atu ia faaola mai</i>, poo le <i>Ia faaola mai o la matou lea faatoga atu</i>, ma o loo aumaia mai le valoaga faa-Mesia lea na valoiaina o lena mea o le a taualaga ai Isaraelu i lo latou Mesia i le aso o Lona afio mai [tagai Salamo 118:22–26]” (<i>Doctrinal New Testament Commentary</i>, 1:578–79).</p>
<p>“[A] le feganavai i latou nei, e alalaga mai lava o maa” (Luka 19:40; tagai foi Ioane 12:19).</p>	<p>“O le faamoemoega o Keriso i le tuuina atu o Ia lava i lea aso i loto o tagata ma taliaina a latou faaaloaloga faatupu atonu tatou te le matua malamalama i ai o se mafaufau pumoomoo lea mea. Pe faapea foi o loo molimauina lea tulaga o se mea e le i fuafuaina pe o se mea foi na tupu faafuasei, lea na Ia soona faia e aunoa ma se muai mafaufau i ai. Na muai silafia e Ia le mea o le a i ai, ma le mea o le a Ia faia. E le o se faaaliga e leai se uiga; ae peitai o le afio moni atu o le Tupu i Lona aai tautupu, ma Lona ulufale atu i le malumalu, o le maota o le Tupu o tupu” (<i>Jesus the Christ</i>, 517).</p>

O LE VAIASO MULIMULI O LE SOIFUAGA O LE FAAOLA

O mea na tutupu	Nofoaga	Mataio	Mareko	Luka	Ioane	Faaaliga o Aso e Gata Ai
O le aso lona ono a o le i oo i le Paseka	Petania, Petefake				12:1	
O se taumafataga i le fale o Mareta ma Maria	Petania				12:2	
Ua faauuina Iesu e Maria	Petania				12:3	
O le fouvale o Iuta	Petania				12:4-8	
Ua potopoto tagata ia Iesu, Lasalo	Petania?				12:9	
Taupulepule ia Lasalo	Ierusalema				12:10-11	
O le aso lona lima a o le i oo i le Paseka					12:12	
Valoaga ua faataunuaina	Mauga o Olive	21:1-5	11:1-6	19:28-34		
O le ulufalega o le manumalo	Ierusalema	21:6-11	11:7-11	19:35-38	12:12-18	
E le talia e le au Faresaio	Ierusalema			19:39-40	12:19	
Ua tutulu Iesu ona o Ierusalema	E lata i Ierusalema			19:41-44		
Ua mananao tagata Eleni e fia vaai ia Iesu	Ierusalema				12:20-22	
Mataupu na aoaoina: Na auina mai Iesu e le Tama	Ierusalema				12:23-50	
Ua tulia i fafo e na fefaataua'i	Ierusalema	21:12-16	11:15-19	19:45-48		
O le aso lona fa a o le i oo i le Paseka		21:17-18	11:12			
Ua fetuuina le mati, ma ua mamae	E lata i Petania	21:18-22	11:12-14, 20-26	tagai 13:6-9		
Ua fesiligaina e faitaulaga le pule a Iesu	Malumalu	21:23-46	11:27-33	20:1-8		
O le Faataoto: O atalii e toalua	Malumalu	21:28-32				
O le Faataoto: O le galuevine amioleaga	Malumalu	21:33-46	12:1-12	20:9-20		
O le Faataoto: O le faaipoipoga a le aloalii o le tupu	Malumalu	22:1-14		tagai 14:1-24		
O lafoga ia Kaisara: O le au Faresaio ma le au Herotiano	Malumalu	22:15-22	12:13-17	20:21-26		
O le Faaipoipoga, o tane e toafitu: o le au Satukaio	Malumalu	22:23-33	12:18-27	20:27-38		
O le poloaiga sili: O le au Faresaio	Malumalu	22:34-40	12:28-31	10:25-37		
Ua le māgagana le au Faresaio	Malumalu	22:41-46	12:35-37	20:39-44		


O mea na tutupu	Nofoaga	Mataio	Mareko	Luka	Ioane	Faaaliga o Aso e Gata Ai
O le tupe a le fafine ua oti lana tane	Malumalu		12:41-44			
O le ta'usalaina o tagata pepelo poo le au faafiaamiotonu	Malumalu	23:1-36	12:38-40	11:37-54; 18:9-14; 20:45-47		
O le auega a Iesu ona o Ierusalema	E lata i Ierusalema	23:37-39		13:34-35		
Mataupu na aoaoina : O Faailoga o le Afio Faalua Mai	Mauga o Olive	24	13	12:37-48; 17:20-37; 21:5-38		Iosefa Samita— Mataio 1
O le Faataoto: Taupou e sefulu	Mauga o Olive	25:1-13		tagai 12:35-36		MFF 45:56-59
O le Faataoto: O Taleni	Mauga o Olive	25:14-30				
O le Faataoto: O mamoe, o oti	Mauga o Olive	25:31-46				
O le aso lona tolu a o le i oo i le Paseka						
(E leai ni faamaumauga o ni lauga ma ni mea na faia)						
O le aso lona lua a o le i oo i le Paseka		26:2	14:1			
O le valoaga a Iesu i le Paseka o le Faasatauroga	E lata i Ierusalema	26:2				
Taupulepulega i le fale o Kaiafa	Ierusalema	26:3-5	14:1-2			
O le aiga faatasi ma Simona le Faresaio	Petania	26:6	14:3	7:36		
Ua uuina Iesu e se fafine	Petania	26:7-13	14:3-9	7:37-50		
O le taupulepule a Iuta e faalata Iesu	Ierusalema	26:14-16	14:10-11	22:1-6		
O le uluai aso o le areto e le faafefeteina	Ierusalema	26:17-19	14:12-16	22:7-13		
O le Afiafi o le Paseka	Ierusalema	26:20	14:17	22:13-14	13:1-2	
"E faalataina a'u e se tasi o outou na."	Ierusalema	26:21-24	14:18-21	22:21-23	13:18-22	
Ua faailoaina le tagata faalata	Ierusalema	26:25			13:23-30	
Ua faatulagaina le faamanatuga	Ierusalema	26:26-29	14:22-25	22:15-20		
Ua mulumuluina e Iesu vae o le au soo	Ierusalema				13:2-5	
O le tetee a Peteru	Ierusalema				13:6-12	FIS, Ioane 13:10
O le faataitaiga a Iesu	Ierusalema				13:13-17	
O se poloaiga fou	Ierusalema				13:31-35	
Ua faamafanafanaina e Iesu le au soo	Ierusalema				14:1-15	

O mea na tutupu	Nofoaga	Mataio	Mareko	Luka	Ioane	Faaaliga o Aso e Gata Ai
O se Tasi Fesoasoani	Ierusalema				14:16–31	
O le Vine Moni	Ierusalema				15:1–8	
Ia outou fealofani	Ierusalema				15:9–17	
O le Inoino i le lalolagi	Ierusalema				15:18–25	
Ua molimau le Agaga o le upu moni	Ierusalema				15:26–27	
O lapataiga i le au Aposetolo	Ierusalema				16:1–6	
O le Fesoasoani	Ierusalema				16:7–16	
O le tuufaafegai: O le olioli ma le faanoanoa	Ierusalema				16:17–30	
O le valoaga: O le a faataapeapeina le lafu mamoe	Ierusalema	26:31–32	14:27		16:31–33	
O le tatalo faatauana a Iesu	Ierusalema				17	
O le afio ese atu i Ketesemane	Mauga o Olive	26:30	14:26	22:39	18:1	
Peteru: “Pe a liua mai oe. . .” Ierusalema	Ierusalema			22:31–32		
Valoaga: “A o le i vivini moa”	Ierusalema	26:33–35	14:29–31	22:33–34	13:36–38	
“Na faitauina foi o ia faatasi ma e pagotata”	Ierusalema			22:35–38		
O tiga o Iesu ma ana tatalo	Ketesemane	26:36–46	14:32–42	22:40–46		2 Nifae 9:21–22; Mosaea 3:5–12; MFF 19:1–24
O le faalata a Iuta	Ketesemane	26:47–50	14:43–46	22:47–48	18:2–3	
Ua pauu i le elelee fitafita na moliaina [Iesu]	Ketesemane				18:4–9	
Ua tu atu Peteru ma le pelu e puipui ia Iesu	Ketesemane	26:51–54	14:47	22:49–53	18:10–11	
Ua sosola ese le au soo	Ketesemane	26:56	14:50			
Ua moliaina Iesu	Ketesemane	26:55–57	14:46–52	22:52–54	18:12	
O le faamasinoina i luma o faitaulaga sili	Maota o Kaiafa	26:57–68	14:53–65	22:54	18:13, 19–24	
O le faafiti o Peteru	Maota o Kaiafa	26:69–75	14:66–72	22:55–62	18:15–18, 25–27	
Ua tauemu fitafita ia Iesu	Maota o Kaiafa			22:63–65		
O le taeao na sosoo ai	Ierusalema	27:1	15:1	22:66	18:28	
O le faamasinoina i luma o Kaiafa	Ierusalema	27:1	15:1	22:66–71	18:24, 28	
O le faamasinoina i luma o Pilato	Ierusalema	27:2, 11–14	15:1–5	23:1–6	18:28–38	
O le tiga ma le oti o Iuta	Malumalu	27:3–10				
O le faamasinoina i luma o Herota	Ierusalema			23:7–10		

O mea na tutupu	Nofoaga	Mataio	Mareko	Luka	Ioane	Faaaliga o Aso e Gata Ai
Ua tauemu Herota ma fitafitia Iesu	Ierusalema			23:11-12		
O le faamasinoina lona lua i luma o Pilato	Anetonia	27:15-31	15:6-15	23:11-17		
Ua faasaolotoina se tagata fasioti tagata	Ierusalema	27:15-21, 26	15:6-15	23:18-25	18:39-40	
O le ta'usalaina o le toto	Ierusalema	27:24-25		tagai 23:4, 14, 22	tagai 19:4	
Ua sasa ma tauemuina Iesu	Ierusalema	27:27-31	15:15-20		19:1-12	
Ua aveina atu Iesu i Kolokota	E lata i Ierusalema	27:32-34	15:20-23	23:26-31	19:13-17	
O le Faasatauroga	Kalevario	27:35-44	15:24-33	23:32-43	19:18-22	Helamana 14:20-27; 3 Nifae 8:5-22; 10:9
Ua faia e fitafita le vili mo le ofu o Iesu	I Kalevario e lata i Ierusalema	27:35	15:24	23:34	19:23-24	
O le faailoga: O le Tupu o Tagata Iutaia	I Kalevario e lata i Ierusalema	27:37	15:26	23:38	19:19-22	
O le Pouliuli: O le ituaso e ono e oo i le itu aso e iva	Ierusalema	27:45	15:33-36	23:44-45		
Ua tuuina atu le tausiga o le tina o Iesu ia Ioane	Kalevario				19:25-27	
O le Maliu o Iesu Keriso	Kalevario	27:46-50	15:37	23:46	19:28-30	
O le mafuie: Ua saelua le ie puipui o le malumalu	Ierusalema	27:51-53	15:38	23:45		
Ua tuiina i le tao	Kalevario				19:31-34	
Ua faataunuua le mau e uiga i le Paseka	Kalevario				19:35-37	
O tagata maimoa e lata ane i le satauro	Kalevario	27:54-56	15:39-41	23:47-49		
O le tanuga o Iesu	E lata i Ierusalema	27:57-61	15:42-47	23:50-56	19:38-42	
Ua tapuni mauina e ositaulaga sili ma le au Faresaio le tuugamau	E lata i Ierusalema	27:62-66				
Aso muamua: O le mafuie, ma agelu ua tatalaina le tuugamau	E lata i Ierusalema	28:1-2		24:1-2		
Ua alu atu Maria le Makatala i le tuugamau ua tatalaina	E lata i Ierusalema				20:1-2	
Ua tamomoe Peteru ma Ioane i le tuugamau	E lata i Ierusalema			24:12, 24	20:3-10	
"Funa e, se a le mea e te tagi ai?"	E lata i Ierusalema				20:11-13	
"Aua e te tago mai ia te au"	E lata i Ierusalema				20:14-17	
Ua ta'uina atu i le au soo ae na le i talitonu	E lata i Ierusalema		16:10-11	24:9-11	20:18	
Ua o atu Maria e toalua i le tuugamau	E lata i Ierusalema	28:1	16:1-4	23:55; 24:3		

O mea na tutupu	Nofoaga	Mataio	Mareko	Luka	Ioane	Faaaliga o Aso e Gata Ai
Ua fetaia'i fafine ma Iesu	E lata i Ierusalema	28:9-10	16:9			
Ua totogi tupe e taitai ia fitafita	E lata i Ierusalema	28:11-15				
Ua faaali Iesu i soo e toalua	Emau		16:12	24:13-32		
Ua ta'uina e le toalua i isi e le i talitonu	Ierusalema		16:13	24:33-35		
O le afiafi: Ua faaali Iesu i le au soo	Ierusalema		16:14	24:36-49	20:19-23	
E le i i ai Toma, ma na le i talitonu	Ierusalema				20:24-25	
I aso e valu mulimuli ane: Faatasi ma Toma	Ierusalema				20:26-29	
O le faamoemoega o le Talalelei na tusia e Ioane					20:30-31	
Peteru: "Ou te alu ou te fagota"	Vai (Sami) o Kalilaia				21:1-19	
Ua fesili Peteru e uiga ia Ioane	Ierusalema				21:20-22	
O le molimau e uiga ia Ioane	Ierusalema				21:23-25	3 Nifae 28:6; MFF 7
O apoapoiga sili i le Toasefululua	O se mauga o Kalilaia	28:16-20	16:15-18			Mamona 9:22-24
O le Afio a'e, o le folafolaga	E lata i Ierusalema		16:19-20	24:50-53		

O LE ASO MULIMULI O LE SOIFUAGA O KERISO



1. Mataio 26:57–68; 27:1–2
2. Ioane 18:28–38
3. Luka 23:7–12
4. Ioane 18:39–19:16
5. Mataio 27:31–32
6. Mareko 15:22–28
7. Mataio 27:39–44
8. Luka 23:44–45

9. Luka 23:34, 43; Ioane 19:26–27; Mataio 27:46; Ioane 19:28; Luka 23:46; Ioane 19:30
10. Luka 23:44–46
11. Mataio 27:50–51
12. Ioane 19:31–37
13. Mareko 15:42–47; Ioane 19:38–42


O LE ESOTO MA LE IOANE 6

O le malaga umi a Isaraelu mai Aikupito	O se Esoto Fou
Na taitaiina e le Atua le fanauga a Isaraelu i le vao e lata ane i le Sami Ulaula(tagai Esoto 13:18).	(Ioane 6:1–2)
Na alu atu Mose “i le mauga o le Atua” (Esoto 3:1; tagai foi f. 12; 19:1–3).	(Ioane 6:3, 15)
Na faateleina e Ieova faailoga ma mea ofoofogia (tagai Esoto 7:3; tagai foi Esoto 7–11).	(Ioane 6:2, 26, 30)
Na faatulagaina e le Alii le Tausamaaga o le Paseka (tagai Esoto 12).	(Ioane 6:4)
Na tuuina atu e le Atua ia Isaraelu le manai poo “le areto mai le lagi” (Esoto 16:4; tagai f. 3–35; Teuteronomie 8:3).	(Ioane 6:5–14, 31–58)
Na fetalai le Alii i tagata ina ia faapotopotoina na o mea e manaomiaina e i latou i aso taitasi ina ia lei se mea e faamaumauina (tagai Esoto 16:16–30).	(Ioane 6:12)
Na folafolaina mai e le Alii le faatuina o se Perofeta e pei o Mose (tagai Teuteronomie 18:15–18).	(Ioane 6:14)
Na faasaoina e le Alii ia le fanauga a Isaraelu e ala i le vaeluaina o le Sami Ulaula; na savalia e i latou le elele matutu (tagai Esoto 14). O loo ta’u faamamafaina mai le pouliuli ma matagi (tagai f. 20–21).	(Ioane 6:16–21)
Na muimui Isaraelu i le Alii (tagai Esoto 15:24; 16:8; 17:3; Numera 11:4–6).	(Ioane 6:43, 61, 66)
Na molimauina e perofeta le tāua o le malaga umi (tagai Esoto 14:31–15:21; Numera 20:12; Teuteronomie 4:33, 35; 6; 26:5–9; Isaia 51:9–16; 52:1–6; 1 Nifae 17; 2 Nifae 25:20; tagai foi MFF 136:22).	(Ioane 6:66–69)

O MEA NA TUTUPU I LE SOIFUAGA O PETERU

- | | |
|------------------------|---|
| ___ 1. Galuega 2:14–40 | A. Ua moliaina Peteru, ua laveaiina e le agelu, ua toe foi atu o ia e lauga i le malumalu, ma toe moliaina ai foi o ia. |
| ___ 2. Galuega 3:1–11 | E. Ua faatonuina e taitai Iutaia ia Peteru ia taofia le talaiga, ua molimau malosi atu Peteru e uiga ia Iesu Keriso |
| ___ 3. Galuega 3:12–26 | I. Ua iloa e Peteru se faaaliga e uiga i manu mama ma manu e le mama, lea na oo ai ina avatuina le talalelei i le lalolagi atoa. |
| ___ 4. Galuega 4:1–22 | O. Ua faamaloloina e Peteru se tagata pipili i le faitotoa o le malumalu. |
| ___ 5. Galuega 5:1–11 | U. Ua faasa’oina e Peteru se ulugalii e uiga i le soliaina o le la feagaiga o le faatauina o le fanua; ua feoti uma le tane ma le ava. |
| ___ 6. Galuega 5:12–16 | F. Ua o atu Peteru ma Ioane i Samaria e tuuina atu le meaalofo o le Agaga Paia; ua aoa’iina e Peteru ia Simoma ona o lona manao e faatauina le mana o le perisitua.. |
| ___ 7. Galuega 5:17–42 | G. I le aso Penetekoso, ua tuuina atu ai e Peteru lana uluai lauga na tusingusia i faamaumauga. |
| ___ 8. Galuega 8:14–25 | L. Ua faamaloloina e Peteru ia Ainea ma faatuina Toreka nai le oti. |
| ___ 9. Galuega 9:32–41 | M. Ua tuuina atu e Peteru lana lauga lona lua na tusingusia i faamaumauga, ma valaau atu i taitai o Iutaia ina ia salamo ma talitonu ia Iesu Keriso o Lē na latou fasiotia. |
| ___ 10. Galuega 10 | N. Ua matua taualoaina le mana o Peteru ma ua lolofi atu ai tagata ia te ia ina ia faamaloloina. * |

O LE LALOLAGI METITIRANE I ONA PO O LE FEAGAIGA FOU



O MISIONA A LE APOSETOLO O PAULO

(Faaaliga: O loo faatusatusaina aso.)

Malaga	Soa Tala'i	Aai/Atunuu	Mea Tavaa na Tutupu	O Tusi na Tusiana
O le malaga faafaifeautalai muamua (T.A. 47–49); Galuega 13–14; tagai i le <i>"Taalala i Tusitusiga Paia</i> faafanua 6."	Panapa, Ioane Mareko (tagai Galuega 13:2, 5, 13)	o Anetioka ma Selukeia i Suria; o Salamina ma Pafu i le Motu o Kuperu, o Anetioka, o Ikonio, o Lusa ma Teipe i Kalatia	Na teenaina e Elima le makoi, na talai atu ma faamalolo i le Sapati; na sauaina ma tulieseina mai Anetioka; na fetogiina i maa ma faapea ai ua maliu; na toe malosi o ia ma toe talai atu	E le iloaina
O le faapotopotoina i Ierusalem (T.A. 49–50); Galuega 15; Kalatia 2:1–10	O Panapa, o Tito (tagai Galuega 15:2; Kalatia 2:3)	Ierusalem	Aloaiaina e taitai o le Ekalesia o se tasi na tu atu mo tagata o Nuu Ese ona o le talalelei	E le iloaina
Malaga faafaifeautalai lona lua (T.A. 50–53); Galuega 15:36–18:22; tagai i le <i>Taalala i Tusitusiga Paia</i> faafanua 6.	Sila (tagai Galuega 15:40), Timoteo (tagai Galuega 16:1–3), Luka (tagai Galuega 16:10)	o Anetioka i Suria; o Taso, o Teipe, o Ikonio, o Lusa, ma Anetioka i Kalatia; o Teroa; o Filipi, o Tesalonia, ma Perea i Maketonia; o Atenai ma Korinito i Eleni; o Efeso i Litia; o Ierusalem	Na taitaiina e le faaaliga ina ia aoao atu i Maketonia; na tulieseina le agaga leaga nai le auauna tamaitai i Filipi; na fasia ma faapagotaina faatasi ma Sila; na ia faaliliuina mai le leoleo o le falepuipui, na lauga atu i Areopako	1 Tesalonia (T.A. 50–51); 2 Tesalonia (T.A. 50–51); o Tusi uma e lua na tusiana mai i Korinito (tagai Bible Dictionary, "Pauline Epistles")
O le malaga faafaifeautalai lona tolu (T.A. 54–58); Galuega 18:23–21:15; tagai <i>Taalala i Tusitusiga Paia</i> faafanua 6.	o Timoteo, o Erato (tagai Galuega 19:22); o Kaio o Maketonia, o Aritako (tagai Galuega 19:29); o Sopata, o Sekuno, o Kaio o Teipe, o Tuiko, o Tofimo (tagai Galuega 20:4); o Luka (tagai Galuega 20:5–6)	o Anetioka i Suria; o Taso, o Ikonio, ma Anetioka i Kalatia; o Efeso, o Teroa; o Filipi, o Tesalonia, ma Perea i Maketonia; o Korinito; o Meleto, o Patara; o Turo, o Kaisareia, ma Ierusalem	Tuuina atu le meaalofo a le Agaga Paia e ala i le faaeeina o lima; o ni vavega faapitoa na faia e le Atua e ala ia Paulo; na aoai atu i e na tapuai ia Tiana; faatuina Eutiko nai le oti; valoiaina lona ia lava moliaga ma lona maliu	O se tusi na leiloa (tagai 1 Korinito 5:9); 1 Korinito (55 T.A. mai Efeso); 2 Korinito (56 T.A. mai Maketonia); Kalatia (56 T.A. mai Maketonia); Roma (57 T.A. mai Korinito)

Malaga	Soa Tala'i	Aai/Atunuu	Mea Tava na Tutupu	O Tusi na Tusiana
Moliaina i Ierusalema ma faafalepuipuiina i Kaisareia (58–59 T.A.); Galuega 21:16–26:32	E le iloa	o Ierusalema ma Kaisareia	Na sauaina, moliaina, ma saisaiina; na toe faamatalaina le tala o lona liliu mai; na faamasinoina i luma o Anania ma Saneterini; na faaali le Alii ia te ia; na aumaia i luma o Filiki ma Feso, faapea le Tupu o Akeripa; na toe talosaga atu ia Kaisara	E le iloaina
O le malaga i Roma (59–60 T.A.); Galuega 27:1–28:16; tagai i le <i>Taiala i Tusitusiga Paia</i> faafanua 6	o Aritako, o Luka (tagai Galuega 27:2)	o Kaisareia ma Saitonu; o Atumotu o Kereta, o Melita, ma Sesili, o Puteoli e oo atu i Roma e ala atu i le Auala o Apiana	O le malaga faigata i Roma; na faamafanafanaina e le agelu; na vavalo i mea leaga o le a afatia ai; o le faaleagaina o le vaa i Melita; na u e se gata uogo ae le i afaina ai o ia	E le iloaina
O le uluai faafalepuipuiina i Roma (faapagotaina i se fale; 60–62 T.A.); Galuega 28:16–31	o Epaf eroti (tagai Filipi 4:18), o Epafara (tagai Filemoni 1:23), o Timoteo (tagai Filipi 1:1), o Tuiko (tagai Efeso 6:21), o Iuso (tagai Kolose 4:11)	o Roma	Na leoleoina i aso taitasi e fitafita Roma; na talai atu i tagata e toatele na asiasi ane	Filipi, Kolose; Efeso; Filemoni; Eperu; na tusiaina uma mai i Roma i le va o le 60–62 T.A.
I va o le faapagotaina i Roma (62–65 T.A.)	E le iloaina	Asia, Maketonia, Kereta, atonu ma Sepania foi (tagai Bible Dictionary, "Paul,")	Tuuina atu apoapoaiga i taitai perisitua e ala i tusi	1 Timoteo (64 T.A.mai Maketonia); Tito (65 T.A. mai Efeso)
O le faapagotaina lona lua i Roma (65 T.A.)	Luka (tagai 2 Timoteo 4:11)	Roma	Na tusiaina lana molimau mulimuli i le 2 Timoteo	2 Timoteo (65 T.A. mai Roma)

O EKALĒSIA E FITU I ASIA (Faaliga 2–3)

Aai	O le Faamatalaina o Keriso	O Mea Sa’o na Latou Faia	O Mea Sese na Latou Faia	O le Aoauga a le Alii	O le Folafolaga a le Alii
Efeso (2:1–7)	“Lē uu i fetu e fitu [o taitai o ekalesia e fitu] i lona lima taumatau” (2:1).	“Ua ou iloa i au _____, ma lou _____, ma lou _____” (2:2; tagai f. 2–3, 6).	“Ua e tuua o lou uluai alofa [o Keriso]” (2:4).	“Ia e salamo, ma ia e faia au uluai _____” (2:5).	“O lē manumalo, ou te avatua ia te ia e ai i le _____” (2:7).
Semurana (2:8–11)	“Lē _____ ma lē _____ o le na oti, a ua ola mai” (2:8).	“Ua ou iloa au galuega, ma lou puapuaga, ma lou mativa” (2:9).	E le o ta’uina mai	“Aua lava e te fefe i mea o le a e tiga ai. . . : Ia e _____ seia oo i le oti” (2:10).	“Ona ou avatu ai lea o le _____ o le _____.” “... O lē manumalo, e le afaina lava o ia i le _____” (2:10–11).
Perekamo (2:12–17)	“Lē ua i ai le pelu e faataumaai ona itu ua maamaai lava” (2:12).	“Ua e taofi mau foi i lo’u _____, ma ua e le faafitia le _____ ia te au” (2:13).	Na taliaina e nisi ia aoao sese ma mulumuli atu i aoaoga sese (tagai 2:14–15).	“Ina e salamo ia” (2:16).	“O lē manumalo, ou te avatua ia te ia le manai lilo e ‘ai ai” (2:17). O le manai poo le areto o le ola, ua faatusaina ia Iesu Keriso (tagai Ioane 6:31–35, 48).
Tuatira (2:18–29)	“Le Atalii o le Atua, o le e pei o le mumu o le _____ ona mata, o ona vae foi e pei o le _____” (2:18).	“Ua ou iloa au _____, ma lou _____, ma lou _____, ma lou faatuatua, ma lou onosai” (2:19).	O nisi na faatagaina aoaoga sese e aoaoina ma na faitaaga i latou (tagai 2:20–23).	“Ou te avatua foi ia te outou taitoatasi e tusa ma a outou galuega” (2:23).	“O le manumalo . . . ou te avatua ia te ia e pule i malo e tele”

Aai	O le Faamatalaina o Keriso	O Mea Sa’o na Latou Faia	O Mea Sese na Latou Faia	O le Aoaiga a le Alii	O le Folafolaga a le Alii
Sarataisa (3:1–6)		<p>“Ua ia te oe ni nai tagata. . . o e ua le faaeleelea o latou _____</p> <p>[e le i eleeela faaleagaga]” (3:4).</p>	<p>“Aua ou te le iloa au galuega ona atoatoa i luma o le Atua” (3:2).</p>	<p>“Ia e taofiina ai, ma ia e salamo. Afai foi e te le _____, ou te alu atu [faafuasei] ia te oe e pei o se _____” (3:3).</p>	<p>“O le manumalo, e faaofuina o ia i _____; ou te soloiesea foi lona igoa i le tusi o le ola, ae ou te ta’u atu lona igoa i luma o lo’u Tama, ma luma o ana agelu” (3:5).</p>
Filatelefaia (3:7–13)	<p>“Le Paia, o le faamaoni ia, o le ua i ai le _____” (3:7).</p>	<p>“Ua e tausia la’u upu, ma ua e le faafitia lo’u igoa” (3:8; tagai foi f. 10).</p>	<p>O i latou “oe o fai mai o Iutaia i latou, a e leai lava” e avea ma “sunako o _____” (3:9).</p>	<p>“Ia e taofi mau i le mea ua ia te oe” (3:11).</p>	<p>O le a avea i latou ma _____ i le malumalu o le Atua ma o le a tusia i o latou luga ia le suafa o le Atua ma le igoa o Ierusalem Fou (tagai 3:12–13).</p>
Laotikaia (3:14–22)	<p>“Le _____, o le molimau moni ma le faamaoni, o le amataga o mea na faia e le Atua” (3:14).</p>	E le iloaina	<p>E le “_____ i latou pe _____ foi.” Ae ua “_____” i latou (3:15–16).</p>	<p>Ia faatau le auro mai ia Keriso (ia saili le oa o loo i le lagi), ia oofu i latou i _____ (ia mama i latou), ma ia faau’uina o latou mata (ina ia vaai faaleagaga i latou; tagai 3:18).</p>	<p>“Ai se tasi e faalogo mai i lo’u leo, ma tatala mai le puipui, ou te ulufale atu ia te ia. . . .</p> <p>“O le manumalo ou te avatua ia te ia ma te nonofo faatasi ma a’u i lo’u nofoalii” (3:20–21).</p>

O MEA O LOO I AI LE FAAMAMAFI

O LE TUSI O FAAALIGA

O mea na tutupu a o le i oo i le Pau	O le Faamau-faailoga Muamua	O le Faamau-faailoga Lona Lua	O le Faamau-faailoga Lona Tolu	O le Faamau-faailoga Lona Fa	O le Faamau-faailoga Lona Lima	O le Faamau-faailoga Lona Ono	O le Faamau-faailoga Lona Fitu	Ua Avea le Lalolagi ma Malo Selesitila
5 fuaiupu: O le Taua i le Lagi (12:7–12)	11 fuaiupu: O Faamaufaa- iloga Muamua e oo i le Lima (6:1–11)	14 fuaiupu: O le Faamaufaa- failoga Lona Ono (6:12–7:8)	211 fuaiupu: Mai le tatalaina o le faamaufaaailoga lona fitu e oo atu i le Afio Faalua Mai o Iesu Keriso (mataupu 8–19)			6 fuaiupu: O le Meleniuma (20:1–6)	9 fuaiupu: O vaaiga mulimuli (20:7–15)	33 fuaiupu: O le lalolagi selesitila (21:1–22:6)

Aumaia mai i le Gerald N. Lund, "The Book of Revelations—Three Keys for Making It a Book of Revelations," i le *A Symposium on the New Testament* (1980), 120.

O PU E FITU O LE FAAMAUFAAILOGA LONA FITU



1. O le a le mea na tupu ina ua oo mai le uatoa ma le afi ina ua ili e le agelu muamua lana pu? (tagai Faaaliga 8:7).



2. O a mea e tolu na suia i vaega e tolu ina ua iliina le pu e le agelu na sosoo ai? (tagai Faaaliga 8:8–9).



3. Ina ua maea ona iliina le pu e le agelu lona tolu, na pau se fetu (tagai Faaaliga 8:10–11).

- A. O le a le igoa o le fetu?
- E. O le a le mea na tupu na faia e le fetu?



4. Ina ua mavae le iliina o le pu lona fa, o a mea e tolu na faapogisaina? (tagai Faaaliga 8:12).



5. O le a le mea na alu ae nai le to e le gata ina ua tatalaina e le agelu lona lima? (tagai Faaaliga 9:13).

6. O le a le mea atonu o loo faamatalaina mai e Ioane i le Faaaliga 9:7–10?



7. E toafia fitafita na i ai i lea taua tele na vaaia e Ioane ina ua mavae le iliina o le pu lona ono? (tagai Faaaliga 9:16).

8. O le a le vaega o tagata o le a fasiotiaina i lea taua? (tagai Faaaliga 9:18).

9. O ai molimau e toalua o loo faatatau i ai le Faaaliga 11:3? (tagai MFF 77:15).

10. O le a le umi e talai atu ai nei perofeta e toalua i Ierusalema? (tagai Faaaliga 11:23). Lio tali uma e sao.

- A. Pe tusa ma le 3^{1/2} tausaga
- E. 1,260 aso
- I. 42 masina

11. O le a le mea faavavega o le a tupu i nei perofeta e toalua pe a maea ona talai atu i laua? (tagai Faaaliga 11:7–12).


12. Sao pe Sese. A o le i iliina e le agelu lona fitu lana pu, o le a agi mai se asiosio tele i le lalolagi (tagai Faaaliga 11:13–14).




13. I se taimi pe a mavae le iliina o le pu lona fitu, o le loto o ai o le a faia ai malo o lenei lalolagi? (tagai Faaaliga 11:15).


14. A o le i ave a malo o le lalolagi ma malo o Iesu Keriso, o le fea o mea ia e lua o le a tutupu? (tagai Faaaliga 11:19).


- A. O le matagi
- E. O le uatoa
- I. O le lolo
- O. O le mafuie











O LE EKALESTIA A
IESU KERISO
O LE AU PAIA O ASO
E GATA AI

